


Deuxu Rybe
Tyyriti



New Testament in Karajá (BR:kpj:Karajá)

Deuxu Rybe Tyyriti
New Testament in Karajá (BR:kpj:Karajá)

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files dated 29 Jan 2022
55ce0bcd-101e-52a3-984e-847027efe150

Contents

MATEU	1
MARKU	54
LUKA	83
JOAÕ	133
AÕHEBO ROTÏÏNYRE	171
ROMA-Ò	223
1 ORITXI-Ò	246
2 ORITXI-Ò	266
ALATXIA-Ò	280
EFESU-Ò	287
FILIPÌ-Ò	294
ÒLÒSÒ-Ò	299
1 TESALONIA-Ò	304
2 TESALONIA-Ò	309
1 TXIMÒTXI-Ò	312
2 TXIMÒTXI-Ò	318
TXITU-Ò	323
FILEMO-Ò	326
HEBREU-Ò	328
Txiau	344
1 PEDRO	350
2 PEDRO	356
1 JUAÕ	360
2 JUAÕ	366
3 JUAÕ	367
JUDAS	368
APOCALIPSE	370

Mateu Deuxu Rybe Wihikỹ Tỹmyra, Mateu Tyyritidỹỹdu

¹ Kaheka Jesuisi Kristu labiehekỹ rare. Juhuu tahe Abraõ heka Davi labiehekỹ rare. Iribi tahe Davi heka Jesuisi Kristu labiehekỹ rare.

² Ibutumy ilabiebohonimy arelyykre. Juhuu tybynimy arelyykre idi iriòrenimy: Abraõ, Ijai, Ijaò,

³ Juda, Peresi, (Peresi seriòre tahe Zera inire. Isereny tahe Tamara inire.) Esraõ,

⁴ Araõ, Aminadabe, Nasaõ, Salmaõ,

⁵ Boasi, (Raabe, Boasise rare.) Obede, Rute, Ijese, Kie.

⁶ Davi hãwyy heka Uria hãwyy juhUU raremyhỹ. Iribi Davi-wana roire. Salomaõ iriòre rare. Tii heka Roaboaõ tyby rare.

⁷ Idi Abia reare.

⁸ Idi Asa, Josafa, Joraõ,

⁹ Uzia, Jõtaõ, Aka, Ezekia,

¹⁰ Ezekia, Manase, Amo,

¹¹ Josia, Jekonia, taseriòre-wana.

¹² Babilonia-ribi rohonyreu tahe tiiboho reare, Jekonia riòre wahe: Salatieli (Tii Babilonia-ki reare.) Zorobabe,

¹³ Abiude, Eliaki, Azo,

¹⁴ Sadòki, Aki, Eliude,

¹⁵ Eliaza, Matỹ, Ijaò,

¹⁶ Ijaò tahe Jyje tyby rare, Jyje tahe Marie hãbu. Jesuisi tahe Kristu Deuxu deòdỹỹna rare.

¹⁷ Kia labiehekỹ sõwe tahe 14my rare, Abraõ-ribi Davi-ò wahe. Tule labieboho 14my rasõwerenyre Davi-ribi Babilonia hãwã-ò ridyreny ixideewimy aõkõ ròte-ò. Ixyby 14my rasõwerenyre. Iribi tahe Jesuisi reare.

¹⁸ Kawese heka Jesuisi Kristu reare. Juhuu Marie Jyje-wana roikremy rare. Tii ijadòmaule tahe Deuxu Tyytybytyhy ribòtònyre.

¹⁹ Jyje hãbu òbiti rare. Tai tahe riixãwididỹỹnkemy rõhõtynyre. Kia õmo-ò rarybeòlere tuu.

²⁰ Kiau ýju tamy rarybere tarasina-ki: —Jyje, Davi riòre riòre. Ahãwyy, Marie, biteònyòke. Tuu bexihãwyyntykre. Iriòre dori Deuxu Tyytybytyhy riòre rare.

²¹ Jesuisimy raninykre. Kiani tahe irybereny rare: tarasadu. Ibutumy iny dori iòraruna-ribi ritakre.

²² Iwese Deuxu rybe ihetxiu rarybere wese tahe tii wiji riwinyre. Kia wese ihetxiu rybe rare:

²³ —Ijadòma rabòtònykre. Iriòreni heka Emanueli rarekre.

Kiani tahe irybe-ki kia rare:

Deuxu iny-wana ratxireri.

²⁴ Iribi tahe Jyje dexixade tarasina-ribi. Iwese Inynyrỹreny tuu tamy rarybere wesemy heka tii riwinyre. Tii-wana ratxiòre. Tii aõhe risỹnyòre.

²⁵ Uladu reare xiery tii aõhe rira. Tamy niõ riwahinyre, Jesuisi wahe.

2

¹ Belẽ hãwã-ki Jesuisi reare, Judeia bedeki wahe. Iòlò Herodi iòlòmý raremyhỹ. Iu reareu, Hãbu Erytyhy mahãdu taina tỹmyramy robirenyre. Tai tahe iòlò mahãduõ doidenyde biura-ribi Jerusalẽ hãwã-ò.

² Tiiboho rỹraxyrenyrene: —Iule judeu mahādu iòlò aõbo kaki reare. Jiarỹboho itainamy rabirenyre tahe nadoidenyde riwowydynyrenykemy. Kaiboho teerytenynte aõbo titxibo ratxireri?

³ Tahe inyõ Herodiko relyyrenyrene. Herodi kia roholareu sõwemy riõtiniyrene. Tule ibutumy Jerusalē hāwā mahādu riõtiniyrenyrene.

⁴ Tahe Herodi ibutumy dinodu mahādu ributunyrene: Xiwena wahidỹỹdu dinodu, bedede ywina tyyriti erydu mahādu tule. Tahe tamyreny rỹraxyrene: —Titxibo Kristu reakemy timybo tyyriti-ki ròritidỹỹmy roire?

⁵ Tiiboho tamy rarybere: —Judeia bedede-ki, Belē hāwā-ki wahe. Kia tahe ihetxiu rybedu riritinyrene.

⁶ —Kai Belē hāwā mahādu. Judeia bedede hāwāõ. Kai hāwā yja iny rōhõtiniyrene. Tahe inatyhy aõkõ rare. Kai hāwā nihikyrene. Aribi dori dinoduõ rōhõnykre. Wamahādu iòlòmymy ronykre. Idinodumy rarekre, judeu mahādu dinodu wahe.

⁷ Tahe Herodi heka biura mahādu ributunyrene ibutumy iny-ribi wasimy. Tamy rỹraxyrene: —Tiutxubo taina rōhõnyrene? Tahe rirawyõnyrene.

⁸ Tamyreny rarybere: —Kaiboho boibenyke Belē hāwā-ò. Idi tahe uladu-ki mahabenykre. Iu wadee manarybebedenykre. Jiarỹ tule tamy arakre ariwowydynykemy.

⁹ Biura Hābu Erytyhy mahādu roholarenyrene. Tahe roirenyrene. Ryki ixityrene tainamy robirenyrene. Uladu tyrehekỹle ritoosõnyrene.

¹⁰ Iu tahe sõwemy reysarenyrene.

¹¹ Heto-ò rehemynyrene. Tahe ralorenyrene. Uladu rare Marie-wana. Tahe tatiowotimymy reserenyrene riwowydynykemy. Isareny riraynyrene tamy riwahinykemy: womati tỹrỹrỹhỹkỹ, hee aderõna, aderõnatyhy wana.

¹² Idi tahe Biura Hābu Erytyhy mahādu rarasinyrene. Deuxu tamy rarybere: —Kaiboho Herodi-ò bõõsebenyõke. Tai tahe rywitzira-di tasubedereny-ò ròõserenyrene.

¹³ Biura mahādu tahe ròireny rahudi tahe Inynyrỹ yju nade Jyje-ò rybemy, irasina-ki tamy rarybere: —Ariõre, ise-wana bidyke Egito bedede-ò. Herodi dori uladu rubudỹỹmy ratxireri. Adee tiu ararybekreule kaò bõdõõseke.

¹⁴ Tai Jyjeboho rummy rahenyrenyrene Egito bedede-ò.

¹⁵ Herodi rubusỹtybymy tahe dõõsedenyde. Tii riwinyrene iwese ihetxiu tyyriti rarybere wese, Deuxu rybedu rybe wahe:

—Wariõre Egito bedede-ribi nadidyde.

¹⁶ Herodi reburere. Biura Hābu Erytyhy mahādu dori tii riitxenanyrene. Tai ibutumy uladu rirubunyrene Belē hāwā-ki, tule ijõ iõhò hāwā-ki. Ibutumy howỹtõdu rirubunyrene inatã beõra ijõdikeki tahe rirubunyõre. Tai Jesuisi rirubunyrenyrene risỹnyrene, iwese tii rareu Biura Hābu Erytyhy mahādu tamy rarybere.

¹⁷ Kiamy ta rỹire iwese Deuxu rybedu rarybere wese, Jeremia wahe:

¹⁸ —Rama hāwā-ribi ibru-ò iny roholamyhỹrene. Rakeli rare. Tii robumyhỹrene. Ibutumy iriõre ituere. Tai robumyhỹrene. Inyõ riteysanyõtyhy iriõre rurureki.

¹⁹ Herodi tahe rurureu, Inynyrỹ yju heka Jyje rasina-ki tamy nade.

²⁰ Tamy rarybere: —Bõõsebenyke judeu bedede-ò. Uladu ise-wana bidyke. Kia rirubunyrenyrene risỹnyrenyrenyrene tahe, rurure.

²¹ Tahe Jyjeboho ròirenyrene judeu bedede-ò.

²² Akelau tahe Herodi riõre ronyrene iòlòmymy, tyby derõwumy. Tai kowa-ò Jyje ròirenyõre sỹmy. Rasina-ki rybeõ rieryrene Kalileia-ò ròirenyrenyrene. Tai tahe ròirenyrene kowa-ò.

²³ Nazare hāwā-ki rasỹnyrenyre. Kia tahe riwinyre iwese Inynyrỹ rybedu ihetxiu rarybere wese: –Nazare ludu tii rarekre.

3

¹ Kiau Judeia bederahy-ki Joaō Sebedỹỹdu heka iny-ò rarybemyhỹre:

² –Deuxu Iòlòna bededỹỹnana iòhòmy ratxireri. Aòraruna-ribi biixāwibenyke, bexirāhĩke!

³ Joaōmy heka Isaia ihetxiu riritinyre kawese:

Inyò bederahy-ki ryrireri: –Inynyrỹ dee ryòbiti biwinyke. Biwinyke ryò tamy kanakemy.

⁴ Joaō kamelo radetyy ityy rare. Iròdutyy iwereysanare. Seihikỹle bidi-wana irỹsỹna rare.

⁵ Ibutumy iny tamy ròirenyre irybe-ò roholakemy iòhò hāwā-ribi, Jerusalē, Judeia, Jordaō bero-ribi wahe.

⁶ Tamy òrarunamy relyyrenyre rabadewomy tamy relyyrenyre. Tai tahe Joaō heka bero Jordaō-ki tii riratysebenyre.

⁷ Fariseu mahādu, saduseu mahādu doide tamy riratysebenykemy. Kiau Joaō tamyreny rarybere: –Hemylala mahādu! Deuxu aòhòkỹmydỹỹnana-ribi mahenybenyòtyhy. Aòhe inatyhy?

⁸ Juhuu aòwiwihikỹ widỹỹna biwinybeny. Tai tahe iny rierykre kaiboho aòraru-ribi inatyhymy texihutenynte.

⁹ Fariseu mahādu, kaiboho tahòtinytenynte: Abraō heka inylabiehekỹreny rare. Rikirāhĩòtyhy. Deuxu-ò kia aò aòkō rare. Tamy wikeki mana-ribi Deuxu heka Abraō riòkòreō riwinykre.

¹⁰ Woma tahe òwòru-ribi iòhòmy rỹira. Òwòru bederaty wiwihikỹ ihoòkeki, kedesekre. Rasòkre. Woma heka Deuxu aòhòkỹmydỹỹnana wese rare.

¹¹ Jiarỹ bedi araratisebedỹỹnyra aòraruna-ribi texirāhĩteki. Jesuisi tahe Deuxu Tyytybytyhy-di ròratisebedỹỹkre heòty-wana riratysebenykre. Tii waratyre awityhymy ratxireri. Jiarỹ riwaixỹrunymy watxireri iwa ariwykeki.

¹² Tii maixòmo risykre. Maixòmo ributunyre tahyna-ò. Irỹnysi heòty-di riworonykre. Heòty itueòna heka rare.

¹³ Idi tahe Kalileia bede-ribi Jesuisi nade bero Jordaō-ò. Tii Joaō-ò nade riratysebenykremy.

¹⁴ Joaō aòkòmy rarybere: –Jiarỹ tahe aò aòkō rare. Kai biwaratysebenyke.

¹⁵ Jesuisi tahe tamy rarybere: –Deuxu deewina heka kia rare. Rikiwinykre. Tahe Joaō riratisebedỹỹre.

¹⁶ Ròratisebenymy rahudi tahe Jesuisi ròtuòra. Biuwetyy rarayre Jesuisi tahe bòtòenimy robire, itxi dobehede, Deuxu Tyytybytyhy wahe. Rybeō biu-ribi narybede:

¹⁷ –Kia heka Wariòre rare. Jiarỹ heka sòwemy tukure. Idi wadeysareri.

4

¹ Idi tahe Deuxu Tyytybytyhy heka Jesuisi ridyre bederahy-ò. Tai Satanasi riurihikemy tamy rehemynyre.

² Jesuisi heka 40 txumy, 40 rummy heka aò rirỹsỹòhy bede idi rỹire. Sòwemy heka rama risamy tai raremyhỹ.

³ Taile Satanasi tamy nade. Tahe iurihiximy tamy rarybere:

–Kai inatyhy Deuxu Riòre ahāte wana heka mana-di orotxumy biwitxi-ranymy biwinyke ahinamy.

⁴ Tahe Jesuisi dirawyònyde: Deuxu Ritidỹỹna-ki kiamy roire: –Iny heka orotxudile aòkō irumy rỹirakre. Ibutumy Deuxu rybedile iny irumy rỹirakre.

⁵ Idi Satanasi heka Jesuisi ridyre Jerusalē hāwā-ò. Templo heto ratyre tahe ritidire.

⁶ Tahe tamy rarybere:

—Kai inatyhy Deuxu Riòre ahāte wana heka katyre-ribi ixi-di behukre bede-ò. Buruõtyhy heka besekeki. Deuxu taỹju kiditeònykre aramykemy. Bede-ò aõkõ beseke.

Ijõ tyyriti rarybere:

—Deuxu araywinykre taỹju-di. Tii ýju kiditeònykre tebò-di ariijekemy. Awa ritõmonyõtyhy manatyre-ki.

⁷ Jesuisi rirawyònyre: —Tyyriti tule rarybere:

—Deuxu uritere biurihiõke.

⁸ Iribi Diabo heka Jesuisi ridyre hāwālòõ-ò. Tamy ibutumy bede iòlòna riteòsinyre.

⁹ Tahe tamy Satanasi rarybere: —Beseke atiwotimy tahe biwawowy-dynykeki, adee kia ibutumy iòlòna wiwihikỹ ariwahinykre.

¹⁰ —Make Satanasi, Jesuisi rarybere: —Tyyriti rarybere:

—Deuxu-ò sohojile deàlàna, wowydyna biwahinyke. Tiile bityhynykre. Deòdu tamy sohojile mabeke.

¹¹ Satanasi tahe Jesuisi-ribi rexitare. Ýju mahādu rehemynyre iyrubudỹmy.

¹² Joaõ òludu heka ròtenawo-ki ritidira. Kia Jesuisi roholareu, Kalileia bede-ò ròðsere.

¹³ Nazare-ribi rare Kafanaõ hāwā-ki rasỹnykremy rare. Tii aho-ki iòhòre, Kalileia aho wahe. Zebulõ bede, Natali bede tahe inatxi hāwā ibiòwa rare.

¹⁴ Kia tahe Isaia Tyyriti rarybere wese:

¹⁵ —Zebulõ bede, Natali bede, Jordaõ bero kowawe-ribi ijà-ò. Ahohokỹry-ki. Kai judeukõdu mahādu bede rare, Kalileia wahe.

¹⁶ Iny kowasỹ mahādu bede luru-ki rasỹnymyhỹre. Tahe tiiboho loosònahakỹmy robirenyre. Bede lurusỹ mahādu-ki tahe Deuxu loosòna ritoosònyre.

¹⁷ Iribi tahe Jesuisi ritelenyre Deuxu rybe ritỹnynykemy. Tii rarybere: —Aòraruna-ribi bexirāhĩke. Deuxu Iòlòna bededỹnana ðori iòhòmy ratxireri.

¹⁸ Kalileia aho ijāti-ki Jesuisi rariamy ratximyhỹ. Tahe inatxi waxidu seriòremy robire, Simaõ Pedro, tule Andre ijõre. Rià-di utura rimymyhỹreny.

¹⁹ Jesuisi tamyreny rarybere: —Bodoike wahemy. Iny wadee bimykre. Iwese araerynanykremy bimykre.

²⁰ Aõwesele tahe tarià ririrenyre. Jesuisi-wana roirenyre.

²¹ Roirenyre tahe inatxi ijõ seriòre-ki Jesuisi robire. Txiau ijõni rare. Joaõ ijõre. Tiiboho Zebedeu riòre roire. Tiiboho talawo-ki ronyrenyre rià riywinyrenymy. Jesuisi tamyreny rarybere: —Wahemy bòðòike.

²² Tai tahe tybyreny ririrenyre. Jesuisi hemy ròirenyre.

²³ Ibutumy Kalileia bedey-ki Jesuisi rariamyhỹre. Tii judeu dohodỹna heto-ki rarybemyhỹre. Deuxu Iòlònamy ritỹnynymyhỹre, Rybe Wihikỹ Tỹmyra wahe. Sõwemy webinadu mahādu riteytenyre.

²⁴ Jesuisimy iny relyyre ibutumy hāwā hāwā-ki Siria bede ibutumy. Tai tahe sõwemy webinadu mahādu didydenyde tamy, iny tyytybybina-di, iny iumy imyremyrehekỹ wahe. Jesuisi ibutumy iny riteytenyre.

²⁵ Iny sõwehekỹ riheludunyre, Kalileia bede-ribi, Debòwiò hāwā-ribi, Jerusalē-ribi, Judeia bede-ribi, tule Jordaõ bero kowa-ribi.

5

¹⁻² Jesuisi inymy sõwemy robireu, raðwònyre hāwālò ratya-ò, Ierydỹna mahādu tamy doidenyde. Taile rierynadỹnymy ronymyhỹre.

³ Deuxuko-ki iny ibinamy r̃ymyh̃re. Kia iny tuu rexierymyh̃re, teysatyhy rare. Tii deysana s̃owemy tai ratximyh̃re, Deuxu Iòlòna heka ih̃or̃orenymy rarekre.

⁴ Robumy r̃yirakeki teysamy heka r̃yirakre. Ibedewona wiòhed̃ỹna rybe-di heka tamy kanakre.

⁵ Kia inytyhy-di widee ratxireri, tii heka teysahyymy ratximyh̃re. Ibutumy heka iny ih̃or̃olehek̃yle r̃yirakre. Bede bede heka ih̃or̃omy rarekre teysamy rarekre.

⁶ Inyõ-ò òbitinamy lobiximy rurukeki tahe teysamy rarekre. Deuxu tamy òbitina riwahinykre.

⁷ Inyõ ruxetòena-di ratxireri. Deuxu heka tamy ruxetòena-di rarekre.

⁸ Inyõ irayky òbitimy ratxikeki tii heka teysamy rarekre. Tii dori Deuxumy robikre.

⁹ Inyõ ywina-di wiwana r̃yirake teysamy rarekre. Ywinaõ-di rarekré, teysamy rarekre. Tii dori rarinikre: Deuxu riòremy.

¹⁰ Inyõ aõhõk̃ymy d̃ỹnana reuròkeki, tii dori òbitimy rurukeki, tii tules̃y teysamy rarekre. Deuxu Iòlòna dori ih̃or̃omy rarekre.

¹¹⁻¹² Inyõ umyreny relyykeki uritere hek̃yle. Ruirybe-di umyreny relyykeki, aõhõk̃ymyd̃ỹnana adee riwahinykre wana, tai tahe beysakre. Awim� mohõtinykre. Kai dori biu-ò mahenykre. Tai tahe beysakre kai awim� nohõtỹkre. Uritere nohõtĩ rosarenyõmy. Kia wese tule Deuxu rybemy rybedu aõhõk̃ymy rot̃ỹnyre.

¹³ Kaiboho heka saawesemy atximah̃atenyte, jyyra wesemy wahe bede mah̃adu iny-ò, kai dori kiamy bede mah̃adu tewiòhenanyte. Auri tahe urihim� biõnonykeki tahe aurihixina heka urihim�òlemy releke. Kaa jyyra urile idi adehu r̃yikre iny ityre rariakremy. Awiòhed̃ỹna biõnonykeki tahe aõma aõk̃õ beleke.

¹⁴⁻¹⁵ Kai loosòna wesemy atximah̃ate kabede mah̃adu iny-ò. H̃awãõ h̃awãlò ratyy-ki roikeki, tiu heka rexiwòõtyhy it̃ỹnyhy roimyh̃ke. Loosònaõ iny ritoosònykeki, tule heka tiu heka hyna rawoõ-ki roiõtyhy roosòm̃y. Aõma roosònanymyh̃re ibutu heto jurajuramy heka ibutu ritxuxanymyh̃re. Aõma tamana-ki r̃ymyh̃reki wahe.

¹⁶ Kaiboho tule amah̃adureny awiwihik̃ymy robikeki tahe Deuxu-ò wowy-dyna riwahinykre.

¹⁷ Jiar̃y heka anaõde bede ywina tueded̃ỹmy. Anade aõ Deuxu dee rybedu tueded̃ỹmy aõk̃õ heka anade. Anade ibutumy aõmybo rarybere wid̃ỹmy. Timybo rarybere wese heka ibutumy tuu rot̃ỹnymy rarekre.

¹⁸ Inatyhymy adeereny ararybekre bede ywina tyyritiy-ribi tiu ijõ iõõtyhy ijõ sohoji ritiwedena yreõ reseõhykre. Ibutumy roikre aõhebo rot̃ỹnymyh̃reò bede konanako-txi.

¹⁹ Inyõ t̃ohõtĩ urihim�ò bede ywina rosakeki rexidelenymyh̃re iny ribedeerynyõkemy iny ritohonyõmyh̃kemy. H̃ãbu tahe iyjamy Deuxuko-ò rarekre, Deuxuko-txi. Inyõ rityhynymyh̃re irybe iny rybedeerynymyh̃re. Tii tahe Deuxu Iòlòna-ò nihik̃ymy rarekre.

²⁰ Kaiboho aõma fariseu mah̃adu-ribi awityhymy ixi-di mohõtĩnybenykeki. Tiu heka Deuxu Iòlòna-ò aròterenyõmy. Kaiboho heka awi toite aõma fariseu mah̃adu judeu mah̃adu wedu ratyre heka awi boibeke. Kia aõk̃õkeki tahe malòbenyõtyhy.

²¹ Ihetxiu bede ywina Tyyriti kawesemy rare:

–Kai inyõ birubunyekeki heka iòwynamy iny akanarubunye. Kia heka bede ywina heka rare.

22 Tahe warybe urihimyo iwitxira bede ywina-ribi. Kai inyõ-ò maraykynykeki. Tai tahe brebunahakỹ-ki tate. Abiõwa-ò bininikeki itxýtemy. Tamy kai marybekeki: —Kai aõki awiõre. Tai tahe akỹnadykre heka aõma ywisidỹỹduko-ò araòwynykre. Inyõ-ò kai makyaranykeki kai brebuna-ki texilõrõmy tate. Kai inyõ deramy mabekeki uriteremy nodu tamy marybekeki, tai brebuna-ki tate. Inyõ òsỹny aradykre wisidỹỹdu mahãdu-ò. Inydee ratyhymy mabeke wana aõkõ raremy marybekeki, heòty kõnana bede-ò make lau brebuna-ki tate. Iõhãrure kai heòty bede-ò makemy.

23 Kaki aõma nieru xiwena wahidỹỹna-ò behemynykeki inyõ-wana aõhe widee botỹỹnykeki õhõti rosaõlemy ahãte wana.

24 Deuxu heka axiwena tewahinyõhyymyhỹte aõma xiwena bire-ki heka birike. Tahe biijeke aseriõre juhuhu. Aõma wana biõbitinybenyke widee marybebenyke. Iribi tahe tamy bedehemynyke xiwena wahidỹỹna-ò wahe tadevenymy atximahãte wana hãbuõ-ò.

25 Aõma tai tahe iõraru-ki aõludumy relera wana. Tamy behemynyke aõma timybo tii-wana widi biywinykemy timybo adeve biõwynykemy tamy heka bitobiny òrale heka aõma rieryke urenana. Aradyhemy aõma ywisidỹỹna ube-ò, idi ywisidỹỹna mahãdu, idi soldado. Tai tahe bitobinyke bede rierykemy.

26 Inatyhy heka adee ararybekre rõtenawo-ki malõkeki. Tiu heka aõlõkõmy aõma iõwy mahumy adi rõhõtynykre. Idi mohõtynyke xiery heka bõhõnyke.

27 Juhuu ihetxiu heka kaweselemy Tyyriti-ki rarybere:

—Òtaõmy!

(Bede ywina tyyriti-ki wahe.) Kawesemy heka jiarỹ rebedeerynywãhãre.

28 Òtamy rõhõtynykeki hãwyy-ò retehekeki òtamy rexinohõtynykeki. Tai heka tii òta òraru riwinymyhỹre. Iwese iwitxira hãwyy-wana roireri yrubule taheka òta òraru riwinymyhỹre.

29 Arueõ òraruna-txi araatykeki, bitake. Awityhymy biu-ki malõke kawesekile heka awire, Deuxusỹ-ò malõke wahe. Arue wiõmy tahe awiõmy biu-txi arue yremy heòty bede-ò make tahe ibinatyhyre.

30 Tule eraõ bitake iurelemy era-di make biu-txi. Aumy ibutuhukỹlemy heòty bede-ò rakehãrele tahe awiõre.

31 Bede ywina heka kawesemy rõhõnyre iny-ò juhuhu wahe:

—Inyõ tahãwyy ixi-ribi riteõnykeki rixãwididỹỹnyra tamy tyyritiõ riritinymyhỹre.

32 Iwitxira rybe-di jiarỹ arukile tahe hãbu tahãwyy riatyra. Inyõ uritere òta òtana òraru-ki ixi-ribi tahãwyy riteõnymyhỹre. Tai tahe hãwyy roimyhỹre hãbu wixira hãbuõ-wana. Tai tahe òta òtadumy kia hãwyy rininire. Adỹỹwe òraru-ò riteõnyre tahãwyy riteõnyre uritere õhyynaõle. Tai tahe tii adỹỹwe òrarunaõle heka riteõnyre. Taile heka hãwyy hãbu wixiramy heka roimyhỹre ahãbuõ tahãwyy uritere hyynaõle riteõnymyhỹre mahãdu hãbu heka. Tii heka tule òtadumy relemyhỹre hãwyy òta òtaduõ heka roireki wahe.

33 Juhuu heka ihetxiu kia wesemy Deuxu tamyreny kia rarybere:

—Taholatenyde kiamy Deuxu heka uritere ruiõmy atximahãbenyke Deuxu-ò biwinybenykemy marybemy bimyekeki biwinybenyke.

34 Tahe jiarỹ heka kiamy adeeremy ararybekre. Aõwidỹỹmy ixi-di nohõtirenõmy ryberenyõmy iwidỹỹmy. Ixinohõtidiỹỹmy ryberenyõmy ariwinykre biwawiõhenanyke wana biu-ribi wawiõhenanykre wana. Uritere heka tuu ryberenyõmykre kia wesemy biubrò-ki aõkõ biu dori Deuxu rynana rare.

³⁵ Kiamy uritere rybeõmy bedebrò-ki aõkõ aõ biwinykemy aõmy mabekemy. Bede dori Deuxu idi ratximyhÿre rare. Deuxu waa elehyna dori bede rare. Jerusalẽ hãwãbrò-ki tule aõkõ, tii dori Iòlòtyhy hãwã rare.

³⁶ Tule arade-di widÿÿmy uritere dori rybeõmy kai dori awitxiranyõtyhy arade iura-ò ilyby-ò urile araykywydynakile tuu ratxike.

³⁷ Aõma araykywydynakile heka tuu riwitxiranykemy idi tahõtinyinmyhÿte. Kiamy heka tarybemahãte iwidÿÿnamy teuremy tarybemyhÿte: –Kohe, kiale ariwinykremy marybeke ada aõkõre, ariwinyõtyhymy aõbo. Kiamy marybekeki iratylemy kohe, aõkõre myÿ aõbo. Sõwemy marybekeki tahe aõbina binahakÿle heka ròhònykre.

³⁸ Ihetxiu bede ywina ròhònyre.

Inyõ witxira rueõ ribinadÿÿnykeki, iny witxira tule iwesele riwinyke. Kia widÿÿdu rue heka ribinadÿÿnyke. Rue heka wilemy raòwynyrene rueõwilemy. Juhu tasÿ ÿjuõlemy raòwynyrene. Jiarÿ tahe rebedeerynyre kawesemy.

³⁹ Inyõ aõbinamy adee riwinykeki, aõ aõkõ tamy biwinyke. Inyõ aòsÿny rihetenykeki, tule iwyò-di beake rehetenykemy.

⁴⁰ Uritere aòludu-ò ixidòwydÿÿõmy. Aõma ijõ aty ritakeki heka tule tamy arahana biwahinyke. Inyõ sohoji urixinamy adee ixidinomy reake wana. Inatximy heka tii-wana beake.

⁴¹ Inyõ ixitòedÿÿmy aõ aribi riwykeki tamy biwahinyke tule inyõ aribi aõ huòtemy riwyke wana.

⁴² Abròrò itue-di tamy òkeseõmyke iwòde-ki ihuòtemy biwahinyke.

⁴³ Ihetxiu heka taholatenynte kawesemy:

–Kai heka aõ hãwã ludu mahãdu luomy heka madònymyhÿke.

Aòludumy aki ratxike wana tukumy atxike teramy atximahãke.

⁴⁴⁻⁴⁶ Tahe iwitxiramy ararybekre. Aòludu heka arabedeerynyke. Tukumy mabekemy inyõ aõhòkÿmydÿÿnana rotÿÿnyreri wana tamy rexitòenyke. Kia wese-ki heka inytyby riòremy mabeke, Deuxu riòremy wahe. Tii dori juu riòlòdÿÿnymyhÿre inybina tyre-ki wahe. Tule iny wiwihikÿ tule-ki aõma biu heka tule riteònymyhÿre. Aõma iny òbitikõdu mahãdu tule-ò. Tule òbiti mahãdu tule riteònymyhÿre. Aõma tukumy ahãte sohoji ratximyhÿre sohojile kai itukukeki. Kia heka awi aõkõ rare ibutumy òraru mahãdu heka tule riwinyremyhÿre kia wese. Aõma urile rybedÿÿ azry mahãdu, Aseriòre mahãdu.

⁴⁷ Tulesÿ kia aõma aõkõ rare aõma tule heka judeukõdu mahãdu dori tule riwinyke, tii Deuxu rierykõre.

⁴⁸ Òbitityhymy kaiboho boibeke. Aõma jiarÿ heka arabedeerynyrenyreri biu-ki inytybyreny ratximyhÿre dori òbitityhy rare.

6

¹ Wahisidÿÿna wiwihikÿ kai hãburu-ki iwahisidÿÿõmy iny-ò. Kai itxerenaõnamy biwahinymyhÿ. Aõkõkeki tiu inytybyreny-ribi bitaõtyhy aòwy awahisidÿÿna.

²⁻⁴ Kai biwahinykeu iny adee aõmybo rurumyhÿreó. Uritere ibutumy iny itxerenamy iwahidÿÿõmyhÿ. Inyõ-ò òbiti mahãdumy riwisÿnymyhÿre mahãdu, kia wesemy heka tii riwinymyhÿre heka. Dohodÿÿmy heto-ki tuu riwinymyhÿre kia wesemy tule ibutumy hãwãhãkÿ ruetyawetyamy tuu riwinyrerimy ihÿre. Inatyhy dori adee rarybereri: –Aõma wahisidÿÿnatyhymy heka adee rarybereri: –Wahisidÿÿnaõ ixidee ritamyhÿre. Aõbo Deuxu wahisidÿÿnaõ heka adee riwahinyõtyhy. Tai heka Deuxu wahisidÿÿnatyhymy riwahinyõtyhy tamyreny. Iny-ò aõ biwahinykeki, abiòatyhy-ò belyyòke.

Wasilemy tamyreny awiòhedỹỹna biwahinyke. Iny tybyreny dori ibutumy aõna aõna ròtena rieryre aõwahisidỹỹna adee kidiwahinykre.

⁵ Iwese budu mahãdu riwinymyhỹre wese uritere iwidỹỹõmyke. Kia wesemy aõkõ heka bexitòenyke. Ibuturu-ò rexitòenymyhỹre dohodỹỹna hetowo-ki heka lamamy rexitòenymyhỹre. Hãwãy-ki dori rexitòenymyhỹre ibutu itxerenakemy. Inatyhymy heka adee rarybere: –Atarasana ibutumy ritare.

⁶ Inatyhy dori ritare.

–Bexitòenykeu malòke aheto jurawo-ò. Ixi-di biijòtòbònyke. Ierykõnamy boo ratximyhỹreò heka bexitòenymy myike. Ibutumy heka boo aõbo wasimy iny riwinyriwinymyhỹremy robimyhỹre. Tai-ki tahe bedewina wihikỹ heka adee kidiwahinykre.

⁷ Tule rexitòenymyhỹreu uritere irehemy idi lamaõmy uritere ixityre ixityremy tamy ixitòedỹỹõmy wiwesewesehyyle. Judeukõdu mahãdu dori kawesemy riwinymyhỹre. Kiamy heka raraykywydynanymyhỹre aõma rexitòenyre ehehekỹkeki heka roholatyhykemy rohòtinymyhỹrenyre uritere widỹỹõmy iwese tii riwinymyhỹre wesemy.

⁸ Inytybyreny dori rierymyhỹre aõmybo iny raraykynymyhỹré. Inyboho heka rexitòenymyhỹreu rierymyhỹre aõmybo inyboho rurumyhỹrenyre. Iny sòwemy rarybemyhỹrele aõkõ heka tii roholamyhỹre. Aõmybo iny rurumyhỹrenyre, heka bexitòenybenyke. Kia wese:

⁹ Wahareny, biu-ki atximahãte. Anityhy iny ibutumy rityhynykemy idi rierykemy watxireri.

¹⁰ Aiòlòna heka wymy kanake. Iny adeewile riwinykemy iwese biu-ki relemyhỹre wese.

¹¹ Wadeereny txuõ txuõ rỹsỹna bidiwahinyke.

¹² Waòrarunareny òhòti-ribi bitosadỹỹnyke. Iwese jiarỹ inyò òraruna wanohòti iribi aritosadỹỹnymyhỹre wese.

¹³ Isiratyhy urihixina-ribi heka biwayrubunyke, òraruna-txi reseke lau. Aõna aõna bina-ò bidiwaijebenyke. Iòlòna, ruru, loosòna heka ahòròhy rare. Kie.

¹⁴⁻¹⁵ –Inyò ariixãwidinykeki iaõbina-ribi. Tule inytybyreny riwaiixãwididỹỹnyke. Deuxu iòraruna-ribi riixãwididỹỹnyke. Beinareheke wana.

¹⁶ Uritere aòsỹny bedetòiidỹỹõmy iwese budu mahãdu rỹira wesemy. Tai heka byreõmy iny-di txuu rỹimyhỹremy widi retehemyhỹre. Wiji òhòtirenyreake. Heka raòwynyra inarehena irareny.

¹⁷ Tai narehereheu tainarehenyete. Atarina-di ahãtemy beake aòsỹny bisuhòke.

¹⁸ Inywitxira heka anaeryòtyhy kai tenarehemy atxiteri. Inytybyreny sohojile heka rierymyhỹre. Inyò tuu robiòtyhy. Tii tahe ibutumy aõna aõnamy robimy wasimy rỹiramy. Iribi tahe tii araòwynyrenyke.

¹⁹ Aõna aõna butudỹỹõmy tyy, nieru, aõna aõna wiwihikỹ butudỹỹõmy kabede-ki. Txudòera dori ibutumy kabede-ki tuu riroxike aõna aõnamy. Aõma rararỹỹnyke iaõmydỹỹna ibutumy rararỹỹnyke rahuke. Wasidu tamy ralòke. Iaõmydỹỹna-ò sòweò wyremy rasinyke iaõmydỹỹna-di.

²⁰ Kaki ibutudỹỹlemy heka biu-ò bibutunyke. Tai heka txudòera aõriròòtyhy tule rararyòtyhy. Tule wasidu aõkõ rare.

²¹ Titxibo aõmydỹỹnana ratxireri iwesele taheka arayky ratximyhỹre. Biu-ki aõbo ada bedeki aõbo. Aõma bedeki araykywydyna ratxireri wana heka kakile taraykywydynanyte. Biu-ki araykywydyna ratxireri wana heka biu-ki heka arayky aõmydỹỹna butuna raykywydyna ratximyhỹre.

²² Arue heka loosòna wesemy rare. Aumy dee itỹnykeki heka aumy ibutumy loosòna-di tỹximy rarekre.

²³ Aumy ibinakeki tahe bede loro-ki matxike. Aumy bede lorohokỹ-ki ratxikeki ibinatyhymy matxike aõma butunale-di iny rōhōtinykeki heka tiu Deuxu iny riwiòhenyōtyhy. Deòdumy heka releōtyhy.

²⁴ Inatxi wedu-ki dori inyō rityynyōtyhy. Tule heka tii roholamyhỹre ijō-ribi tahe tōhōti rosamyhỹre. Inyō Deuxu deòdumy releōtyhy tii aõna aõna butunadile rōhōtinymyhỹreki.

²⁵ Tai heka tuu rarybereri adeereny. Uritere nohōtiyreōmy arỹsỹnamy tule atyymy, idi matykynykemy. Aumy dori rỹsỹna ratyre aõnityhymy ratximyhỹre. Tule aumy tyky ratyre aõnityhymy ratximyhỹre.

²⁶ Nawii-di inihe betehebennyke. Tiiboho heka aõòworumy aõkõ ròbròmyhỹreny. Aramyre heka aõma tarỹsỹna wydumy bederahymy tarỹsỹna riyrubunyōhyymyhỹre heto nihikỹ-ò. Deuxu biu-ki ratximyhỹré heka nawii riyrubunymyhỹre irỹsỹna tamy riwahinymyhỹre. Kaiboho tahe iratyretyhy toite, Deuxu-ki wahe.

²⁷ Sōwetyhymy maraykywydynanykeki aõbohe, arumy aõbo arirarehemy mariake. Aõkõre.

²⁸ Uritere nohōtiyreōmyke atyymy. Betehemyhỹ inihe noijasa-di. Aõma tiiboho heka raaõmysỹdỹỹōhykymyhỹre. Tai tyky wihikỹ-di rexytyynyke. Tyy ixidee riwinyōtyhy. Ihãre tahe Deuxu rityynywihikỹre heka tyy wihikỹ tamy riwahinyreri.

²⁹ Salomaõ heka itykynihikỹra. Ihãre tahe ityky heka awityhy aõkõ rare. Noijasa heka iratyre ityky wityhyre.

³⁰ Deuxu heka noijasa ritykynymyhỹre aõma noijasa heka wijilemy idi ihỹre. Biurasòmy tahe ixãwilemy reamyhỹre, risõra. Tii heka tyky adee kidiwahinykre. Nohōtiyreōmy tahe. Tii dori adee kidiwahinykre tykyõ. Aityhyna dori ibutetyhyre heka.

³¹ Tahe raykyōmy nohōtiōmy titxiribibo arỹsỹna bidiwykré, atyky amona.

³² Tyhydỹỹdukõdu mahãdu heka kiaòle heka ritōhōtidỹỹnymyhỹre. Inytybyreny heka rierymyhỹre aõmybo tarumahãte. Ibutumy heka araerymyhỹre aõmybo taruterimahãte.

³³ Tii Deuxu aõma dỹỹnana sohojidile. Manaykynykeki heka tii ibutumy adee riwahinykre.

³⁴ Uritere nohōtiyreōmy aõbo biurasò kia aõmydỹỹnana-ò. Rỹire dori sōwemy wiji biaõmysỹdỹnanykremy biwinykré. Iwitxiramy bidiwinykre iwitxira aõmydỹỹnanaõ.

7

¹ Iny wixira wixira-di ywisidỹỹòkeki. Aywisidỹỹna wesemy heka Deuxu ruxetòena-di ywisidỹỹmy araywinykre.

² Iny teywinyamahãte wesemy heka Deuxu araywinykre.

³ Kai heka òwòru nihikỹereõ arue-ki ijōdikeki, aõherekibo bederarasi sōmo-di inywixira rue-ribi bitakemy atxiteri.

⁴ Tai heka kai bobiōtyhy itarasa-ki wahe. Arue-ki dori òwòruere ijōdireki heka bobiōtyhy. Òwòru ere dori aòraruna sōwemy rỹire wesemy heka atximahãte.

⁵ Kai texibònyteri. Aòraruna-ribi juhuu bexiòbitinykre. Idi tahe aseriòre òraruna-ki biwiòhenanykre. Aòraruny-di rierymy idi òbitimy betehekre iòraruna-ribi iixitarasadỹỹmy biwiòhenanykemy.

⁶ Inyõ heka utura rati mana wiwihikỹ-di rehuōtyhy aõma ixỹni herina-txi. Ixỹni dori ityre rariake tahe riõnonyke adee heka kanakemy wahe. Iwese

tule heka ijòròsa-ò biwahinydỹỹòmyke. Rybewiwihikỹ hãbu òrarudutyhy-ò iwahisidỹỹòmyke.

⁷⁻⁹ Rexitòenykeki tahe bitake kia. Biekeki tahe tai mahake. Bihetenyekeki heka iny adee riraynyke ijòtòbòna. Inyò heka Tyby-ò rỹsỹnaõmy rexitòenykeki, mana heka tyby tamy riwahinyõtyhy.

¹⁰ Uturaõmy rexitòenykeki tahe hemylala binahakỹ tamy tiu riwahinyõtyhy.

¹¹ Kai aõna aõna wiwihikỹ biwahinyke heka teerymyhỹte auladu-ò wahe, hãbu òrarudu hãrele wahe. Aõbo heka tule Deuxu inytybyreny inydeereny riwahinyke aõna aõnaõ wihikỹõ. Rexitòenykeki tahe tamy ariwahinyke. Inytybyreny heka tamy riwahinyke. Iwese iny wixira teyrubunymahãte wesele heka iny araywinymy ixi-di tahõtinyinmahãte wese.

¹² Tule kai aõwiwi inyò ixidee aõhebo rotỹỹnymyhỹkemy taruterí, kiaweselemy tamy botỹỹnymahãke. Kia heka Moisesi bedede ywina tyyriti-ki roire. Kiale Deuxumy rybedu mahãdu ribedeerynyre.

¹³ Biu bedede wiwihikỹ kia ryỹijòhỹtỹdile malokre. Heòty ijò bederyijò heka nihikỹ rare. Iny kia ryhykỹ irumy rakre heka isirare iny ibute kowa ralore.

¹⁴ Irumy nonona ijò tahe ihỹtỹre. Ryy heka ihỹtỹre heka ibutere iny ryhỹtỹ-di ròtedu timy bedede erydỹỹkõdu-ò.

¹⁵ Bexiijebyenyke kia mahãdu lau Deuxu rybe rybedu mahãdu tyhymy aõkõ lau wahe. Budoeni wese ratximyhỹre inytyhy wesemy. Tawo-ki tahe inatyhy rare ahola debore wesemy heka ratximyhỹre.

¹⁶ Teeryte wesemy ibederaty-ò betehekeki. Hede-ò heka uvamy figomy tule tiu iratyõna. Iaõmydỹỹna-ò bierybyenyke tibo roiré.

¹⁷⁻¹⁸ Tii heka bierybyenyke aõhebo rotỹỹnyre wana teerytenyete. Tii heka riitxenanyõtyhy kia aõma matyty matynimy heka tiu biitxenanyõtyhy. Tule betehekeki, bierybyenyke aõwesele heka òwòruõ bierybyenyke. Aõma bederatyõ birỹsỹkeki tiu heka bederaty wihikỹõ arỹsỹõna òwòru ratyy-ò, bederaty-binahakỹ tule rierykre.

¹⁹ Òwòruõ bederaty wihikỹmy raratynyõkeki heka hemy raòròròke rokoke.

²⁰⁻²¹ Kia weselemy heka iny teerytenyete. Aõhebo iny rotỹỹnyke wahe. Tai tahe terytenyete heka, tetehetenyerikile wahe. Òbiti mahãdu wesemy rarybemyhỹre. Tahe òbitimy aõkõre ihỹre. Sõwemy heka iny tawedumy riwaninire. Ihãrele tahe biu-ò ralòõtyhy. Deuxu tyhydỹỹdule tahe ralokre. Ywisidỹỹnatxu heka kawesemy wadee rarybekre.

²² Sõwemy iny wahe: —Wanyrỹ, Wanyrỹ, jiarỹ hewa iny iwixira sõwemy aijyy rarybemy rare wahe. Tule heka tyytybybina reteõnymy rarewãhã. Tule deytana wiwihikỹ heka ani-di rewinymyhỹre.

²³ Tai tahe jiarỹ tamy ararybekre heka: —Kõrehe, kaiboho aõ wamahãdumy aõkõ atximahãte. Umy reerykõre. Waribi bexitake. Aòarana dori sõwere.

²⁴ Kawesemy heka iny bedede eryna ratximyhỹre. Warybe-ò roholamyhỹreu heka aõwesele riywinymy rityhynymyhỹre. Kia hãbu hetowidỹỹdu wesemy heka rare. Iheto heka manatyre-ki riwinyre. Tii heka ibedeery sõwemy ihỹre.

²⁵ Biu heka beòra heka rariamyhỹre. Iu tahe biu rejuxunymyhỹre, yhy rebonyre. Tahe tiu reseõtyhy manatyre-ki dori riwinyre.

²⁶ Warybe ijohonadu tahe iwixiramy ihỹre. Hãbu itxỹte tahe warybe-ribi aõwesele tõhõtireny rosamy reamyhỹre. Kaiboho aõbedeeryhykỹ aõkõre roire. Tii heka iwese hãbu ãnarakile heto riwinymyhỹ wese rare.

²⁷ Biu risebenykeu, beòra rareareu, yhy rebonyreu tahe iheto reseke, ibutumy iõre, rahura.

28-29 Ibutumy heka Jesuisi rybe erysydỹna-ò bede riòtiinyre. Tii heka hãbu erysydỹdu wesemy tii ribedeerymyhỹre. Aõ judeu wedu wesemy aõkõ ribedeerynyre.

8

¹ Tiu hãwãlò-ribi dobehedeu, sõwemy heka iny ihemy doidemyde webinadu, tybina heka tamy nade.

² Wowydyna rybe-di heka tamy rarybere: –Adee wikeki heka kai biwateytenyke. Jesuisi dirawyònyde:

³ –Wadee awire, arateytenykre. Tahe tamy tebò ritytere tamy reerimy. Ityybinana riteytenyre.

⁴ Tahe Jesuisi tamy rarybere: –Boholakre, iny-ò uritere rybeõmy.

Kai tahe makre xiwena wahidỹdu-ò xiwenaõ biwahinykre. Idi tahe Moisesi bede ywina raryberewesemy xiwenaõ biwahinykre. Kai tahe iny rierykemy heka yteny ratximyhỹre.

⁵ Jesuisi Kafanaõ hãwã-ò rehemynyre heka hãbu soldado weduõ tamy rehemynyre. Tii tahe Jesuisi-ò rexitònyre:

⁶ –Wadeòdu biteytenyke raterenymy ratxireri waheto-ki. Sõwemy aõhõkõmy rotỹnyreri. Ibinatyhymy roireri rexisiranymy raratykõhykylemy.

⁷ Tai tahe Jesuisi tamy rarybere: –Rakakre, tai ariteyteytenykre.

⁸ Idi soldado wedu rariwyònyre: –Aõkõre, Kai hãbu wiwihikỹ tate. Jiarỹ tahe hãbu aõ aõkõmy jiarỹ watxiwãhãre. Waheto-ò manalòõtyhy. Karibile marybekre tamy taile taile tahe wadeòdu reytekre.

⁹ Jiarỹ dori reyryre. Jiarỹ heka tule hãbu weduõmy watxiwãhãre. Soldado heka sõwemy riwatyhynymyhỹre. Iny sohoji-ò aõma rakremy rarybemyhỹre heka, ramymyhỹre. Tule ijõ dee rarybemyhỹre: –Manake, tai tahe namyhỹde. Ijõ dee rarybemyhỹre wana: –Kai biwinyke, idi riwinymyhỹre.

¹⁰⁻¹¹ Tai tahe Jesuisi ribedeòtiidỹnyre irybe-ki wahe. Tahe rarybere erydỹna mahãdu-ò: –Judeu mahãduy-ki tai rahaõre ijõ-ki kahãbu wesemy inatyhynana sõwerek. Sõwemy heka judeukõdu mahãdu ritynykre kia weselemy. Ijõ txu aõ wiji aõkõ heka riroxirenyke: Abraõ, Ijai, Ijaò-wana biu-ki heka riroxirenyke bede ludu iny mahãdu-wana.

¹² Judeu mahãduõ ròirenyõkre tamy. Tule kaibohoõ tahe aõhetykrebo. Ijõ mahãdu dori bede lorohokỹ-txi resekre. Taiki tahe irynamy rurykre aõkõmydỹnana-ò.

¹³ Taita Jesuisi soldado dinodu-ò rarybere: –Makre, timybo wiji tahõtinyinmy tetyhynyte wesemy heka rarekre. Iurele teòdu reyttere.

¹⁴ Iribi tahe Jesuisi Pedro heto-ò ralòre. Iriòre lahi heka aõma rubuna nihikỹ roimyhỹ.

¹⁵ Tahe Jesuisi rimyre tebò-di tamy rerire. Idi tahe irubuna iribi ròhònyre. Tai tahe tii ronyre. Ronymy tahe rỹsỹna riwinymyhỹ tamyreny.

¹⁶ Txiorotyhymy inyõ didyde aõma tyytybybina nihikỹ-di ratximyhỹõ. Iu Jesuisi sohoji rybeõmy rarybereu tahe aõwesele iribi ròhònyre. Kia webinadu didyde, tule reyttere.

¹⁷ Iwese ihetxiu Isaia ryberiti rarybere wesemy heka tule riwinyre: Jesuisi riwinyre. Kiamy wahe. Wabinanarenymy waribireny riwinyre. Inatyhyre.

¹⁸ Iny sõwemy ributunyre. Tai tahe taerydỹna mahãdu-ò tii rarybere: –Rokoirenyhe kanawe-ribi ijà-ò.

¹⁹ Tai judeu mahãdu, bede ywina bederydỹduõ tamy rarybere: –Awana arakre titxibo makre heka ahekile anakre.

²⁰ Tahe Jesuisi dirawyònyde tamy heka rarybereri: —Ijòrò heka ihâloo dire, ibýtý dire, nawii býtý isý dire. Tahe jiarý, Deuxu Riòre Hâbutyhyhyký wahe, wahetoõre, waherinaõre.

²¹ Ka ijõ iheludu mahãduõ tamy rarybere: —Wanyrý, waha heka rurura. Tai heka juhuhu arituunykre.

²² Tamy rarybere: —Manake, wijile biwaheludunykre. Rubuõmy rýira, rubu mahãdu heka rituunykemy idi ratxireri.

²³ Jesuisi hãworo-ki ronyre tahe reurore. Ieryredýýna mahãdu riheludun- yrenyre kia lawokile.

²⁴ Ahobetya-ki tahe yhy debore nihiký tamyreny rehemynyre. Tahe òbò nihikýmy resemyhýre. Uritereribile yhyhyký bee riòbònyra hãwò rilýmynyre iòhòtyhyre. Jesuisi tahe ròròmy roimyhý iu.

²⁵ Tai tahe ierydýýna mahãdu heka riixixadýýnyre. Tamy raryberenyre: — Biwayrubunykre, Wanyrý. Aõkõkeki, rukururenkyre.

²⁶ Jesuisi tamyreny rarybere: —Aõherekibo kaiboho taberutenyteri? Aity- hyna sòwe aõkõ atxitenyteri. Jesuisi tahe rýimy reare. Yhy debure-ò, òbò-ò rarybere: —Biyryke, bede binahaký. Tahe aõwesele ibutumy riyrira.

²⁷ Ierydýýna mahãdu urile ribedeòtiinyre. Tiiboho raryberenyre: — Aõhãbubo tii ihýre. Òbò, tahe yhy-wana tamy roholare. Iwese tii rarybere wese rityhynyre. Irybemynale riwinyre.

²⁸ Kalileia aho ijõ weribi ijana-ò ritehemynyre. Kowa bede heka Kadara inire. Tule hãbu inatxi heka tyytybybina-di tai rasýnyrenyre wabedewo-ki. Kiary-ki tahe ibutumy iny ruberure. Iribi tahe ròhònymy reare.

²⁹ Aõwesele heka ryrymy roirenyre Jesuisi-ò rarybekremy: —Aõwe wadi- reny Tate, Deuxu Riòre? Kai aõbina binahakýmy wahòròdýýõmykre.

³⁰ Tahe kowa-ki ixýni juramy roximy rýimyhý.

³¹ Tyytybybina tahe Jesuisi-ò rexitònyre: —Biwatònybenykeki, ixýni jura- womy aralorenkyemy biwateònyke.

³² Tahe Jesuisi rarybere: —Bòibenyke hãbuwo-ribi. Tahe ròirenyre ixýniwo-ò. Ixýni jura tahe ibutumy rejuxunyre ijòtira-ribi. Berawo-txi tahe rabòròròre.

³³ Ixýni-di itxeredu mahãdu tahe hãwã-ò roirenyre ijyymy.

³⁴ Kia hãwã ludu mahãdu tahe roirenyre Jesuisi-ò itxeremy. Tai tahe tamy rarybere ibede-ribi ròhònykemy.

9

¹ Ribererenyre aõma hãwò nihikýro-ò reuròrenykyre kanawe-ribi ijà-ò. Tai tahe Jesuisi tahãwã-ò rehemynyre.

² Tai tahe didydenyde weryrybòõ byre-di idi betyky-di ramyremyrenymy roimyhýre. Tahe hãbu mahãdu inatyhyna Jesuisi rieryreu heka hãbu dee rarybere: —Waexi, beysake, aòraruna dori reixãwididýýnyra.

³ Tai tahe ritidýýna bederydýýdu mahãdu retehereri. Ixideele heka rarybe- mahã: —Kia heka ibinamy Deuxumy rarybereri.

⁴ Iyky Jesuisi rieryre tahe tamyreny rarybere: —Kai aõbo ibinamy waki tahateri arayky-ki.

⁵ Timybo heka kaiboho tahòtinyteri. Aõma iòraruna ariixãwidinyke aõbo ada iumy ariteytenyke aõbo? Aõbohe isiratyhyre wadee tahòtinyte wahe.

⁶ Deuxu-ribi waruru dire. Kabede-ki heka òraruna ariixãwididýýnyke jiarý heka Deuxu Riòre Hãbu tyhyhyký rareki wahe. Tamy rarybekre: —Myike, abyre bimykre ta mariakre asý-ò.

⁷ Tai tahe hãbu aõwesele rýimy reare. Tahe taheto-ò rare.

⁸ Tahe bede inysōwetyhy heka ribedeòtiidỹnyre. Deuxu heka wowydyna riwahinyre. Tii iny-ò ruru riwahinyreki wahe.

⁹ Jesuisi iribi rariamy rare. Tai tahe tii Mateu-wana heka witxi reare ryki: —Jiarỹ heka nieru butudỹna heto-ki ranymahã. Jiarỹ rebutunymahã aõma inyòwydỹna heka rebutunymyhỹre. Iu Jesuisi wadee rarybere: —Manake waerydỹnaõmy heka beleke. Tai tahe jiarỹ tii-wana heka rare aõwesele heka ihemy rare.

¹⁰ Tai jiarỹ retobinyre kanakemy waheto-ò. Waheto-ki riroxikemy taerydỹna mahãdu-wana. Tai tahe sōwemy heka iny waery mahãdu dōidenyde, òrarudu nihikỹ mahãdu wahe.

¹¹ Tule heka fariseu mahãduõ tai ratximyhỹ. Tahe Jesuisi erydỹna mahãduõ kiaõ-ò heka rarybere: —Aõherekibo Jesuisi òrarudu nihikỹ mahãdu-wana riroxireri?

¹²⁻¹³ Tai Jesuisi roholarehe tamy rarybere: —Aõma òhotibedu heka, webinadu mahãdulemy aõnityhymy rarumahãre. Òhotibedu-ò kanakemy. Binadu mahãdu-ò tahe tiu ararariòwyòtyhy aõma òbiti widỹdu mahãduõle heka anade. Warurumy rurumyhỹle mahãdu ariwiòhenanykemy anade. Aõ awihikỹmy ixi-di rōhōtinyrerìò aõkō wahe. Deuxu Ryberiti-ki tahe kaweselemy roire:

Ixiwe heka wadee awiõre aruxetòena wadee awire. Kaiboho bierybenyke aõbo katyyriti rare.

¹⁴ Tahe Jesuisi-ò rarybere Joaõ erna mahãdu: —Aõherekibo Joaõ Sebedeỹdu kia erydỹna mahãdu renarehemyhỹre rexitòenykreu. Fariseu mahãdu erydỹna heka tule heka renarehemyhỹre. Ihãrele taheka aõherekibo abedeerydỹna mahãdu heka tiu iwesemy riwinymyhỹre. Aõherekibo ka.

¹⁵ Taita Jesuisi dirawyònyde: —Iu iny inyhãwyymy roimyhỹre heka iny reysamyhỹre. Aõma kia weryrybò hãwy kialiina heka teysamy ratxirerimyhỹre. Tiu rirubunyòhymyhỹre teti-ò. Tahe aõutxumy tahe weryrybò hãwyymy heridu heka inyò ritakremy ratximyhỹre. Iu tahe renarehekere heka.

¹⁶ Uritere inyò deratyby ritòbonyòtyhy tyytỹmyra-di. Inyò itòbòna tỹmyra-di ritòbonyekeki, raykake heka iura ranihikỹke. Aõma iwesele rare aõma vỹ tỹmyra iròdutyy tỹmyrahakỹle ritidikre. Aõma itỹmyra-ò heka iròdutyy itỹmyrahakỹle raykake.

¹⁷ Aõhe tiu vỹ tỹmyra iròdutyy tyby-ò rihynyòtyhy. Inyò kia wesemy riwinykeki taheka raykake heka rejuxunykere irube. Ihyna heka rabinake. Vỹ wihikỹ taheka aõma iròdutyy tỹmyra hyynawo-ki ka awimyhỹke.

¹⁸ Iu dohodỹdu hetoõ bede erydỹduõ heka Jesuisi-ò nade tariòre rurureki wahe. Tai ta Jesuisimyhỹre reallàre tamy heka rarybere: —Aõma wariòre rarurura wahirari wahe. Kai waheto-ò manake wariòre ruru-ribe biixixanykremy.

¹⁹ Tahe Jesuisi taerydỹna mahãdu-wana roirenyre tii wana wahe.

²⁰⁻²¹ Tahe hãwy rōhōtinyre heka: —Jikarỹ heka ityky reroti-kò karirikrekule karekytekre.

Tii dori ihãlubu rihyõhyy raremyhỹre waò inatxi reurò beòramy. Iòhòmy iribi reare. Ireroti wereysanakile rimymy resere.

²² Taita Jesuisi ròðsemymyhỹre reare. Tuu robire tamy rỹraxire: —Lerỹ, awi heka rare. Aityhyna heka arateyteynyre. Inatyhymy teyteta. Tai tahe hãwy aõwesele reytemy reare.

²³ Idi tahe aõwesele rehemynymyhỹre reare. Judeu wiuna bedeerydỹdu heto-ò rehemynyrene. Tai heka hãwy sōwemy robumy rỹimyhỹ rubura-ki rawiunymyhỹ.

²⁴ Tai tahe Jesuisi tamyreny rarybereri: —Bòibenyke hewahe. Hiraririkỹ heka ruruõhyky roireri. Urile heka rōrōmy roireri. Tahe iny rutxuenyre.

²⁵ Tai iny sōwemy ròhònnyre iribi. Tahe Jesuisi ralòre titxibo hirarihikỹ roireriò. Debò-ki rimyre tahe riteytenyre. Rexixare ixyby.

²⁶ Ibutu bede bedemyhe inina-ò roholare. Kia deytana riwinyraò.

²⁷ Tahe hābu ruetà inatxi Jesuisi riheludunyre heka. Kia hetoy-ribi wahe. Tamy heka raryberenyre: –Kai heka iòlò Davi riokore tate. Tai tahe ruxetòena-di biwawotòenyke.

²⁸ Idi tahe Jesuisi taheto-ò ralore tai rasỹnyny ratximyhỹò. Iny mahādu ihewomy rare tahe ralòre. Tamy rarybere: –Inatyhymy aōbo tetyhynytenyte, ixyby arāitxeredỹnykeò. Tiiboho raryberenyre: –Kohe Wanyrỹ, retyhynyre.

²⁹ Jesuisi rarybere: –Ainytyhynadireki arue tabita. Aōwesele robirenyre.

³⁰⁻³¹ Jesuisi heka rarybere tarurumy tamyreny uritere ijyyōmykremy. Tai tahe aōma ròirenyre ibutuko relyyrenyre.

³² Idita tako-ò rexidorunymy reareki tasỹ kia hābuō-txi reare tyytybybina-di ratximyhỹò.

³³ Tahe Jesuisi-ò didydenyde hābu irybeōna kia tyytybybina òraru-ki wahe. Jesuisi tuu òlòdỹnyre iribi. Iule tahe hābu aōwesele heka rarybere iroo-ki. Kia iny ibutumy ribedeòtiidỹnyre. Timy heka rarybeōhyyre iko-ki juhūu raremyhỹu. Tuu rabiōhe iwesedỹnadumy.

³⁴ Idi tahe fariseu mahādu rarybere: –Tyytybybina-di ratximyhỹre. Tai heka tyytybybinahakỹ reteònymyhỹre iny-ribi. Ihārele heka Satanasi-di ihỹre. Tyytybybinatyhy wedu heka ratximyhỹre.

³⁵⁻³⁶ Idi tahe ibutumy hāwā hāwā-di Jesuisi rariamy rare ròbedeerydỹmy. Judeu mahādu dohodỹna heto-ki relyymyhỹre, Rybewihikỹmy. Tai Iòlòna kia ritỹnynymy tuu relyymy. Ibutumy iny bina bina kia heka riteytenyre. Iny nade ihewo-ribi. Sōwemy heka iny aōna aōna bina binahakỹ riwinymyhỹre idi rỹimyhỹ. Titxibo rakre heka rieryōhykymyhỹre ta aōna aōna òraru-ki idinoduòreki wahe. Tai tahe Jesuisi riwotòenymyhỹre ibutumy tiiboho dori budoeni wese ratximyhỹre, itxeredu ihoòreki.

³⁷ Tai tahe taerydỹnana mahādu-ò Jesuisi rarybereri: –Iny heka maixōmo sōwehekỹ rỹira wese heka iny ratximyhỹre. Aōma ibutelemy heka arixidu rỹira.

³⁸ Bexitòenyke Deuxu-ò. Tii heka bederomy maixōmo rỹira wedu rare. Bexitòenyke tamy aōbo maixōmo arixidu-ò kiditeònykemy. Irybe-di heka raaōmysỹdỹkre ibedero-ki. Ibutu bedero-ki heka idi raaōmysỹdỹkre.

10

¹ Ributunyre Jesuisi aōma tawa-ò inatxi reurò kia bede erydỹna mahādu. Tamy heka ruru riwahinyre. Aōma tyytybybina riteònykemy. Tule tamy riwahinyre ibutu binana deytana heka riwahinyre tamy.

² Kia heka tadeòdỹmahādurenynimy ararybekre. Juhūu heka Simaō Pedro. Juhūu heka Simaō inire, ihewomy tahe Pedromy naninide. Andre ijō. Tii heka Pedro seriòre rare. Txiau, Joaō-wana heka Zebedeu riòre rare:

³ Filipi tasỹ ijō rare. Idi tahe Bartolomeu ijōre. Tome ijōre. Mateu ijōre, jiarỹ wahe. Jiarỹ nieru tarasaduò rare, imposto tarasadu wahe. Ijō Txiau tasỹ Afeu riòre rare. Tadeu ijōre.

⁴ Simaō ijōre. Tii Kana bede luduò rare. Judasi Isariò ijōre. Tii heka Jesuisi tyhedỹdu rare.

⁵ Jesuisi taerydỹna mahādu waòinatxi reruòmy riteònyre. Tamyreny rarybere: –Judeukōdu mahādu-ò aōkōkre reteònyre. Aōma Samaria mahādu hāwā heka ralòōhyymyhỹre.

⁶ Kaiboho heka bòibenye judeu mahādu-ò sohojile. Tiiboho Israeli riokore mahāduō ihÿre. Aōma budoeni reòsamyhÿre mahadu wesemy tiiboho ratx-inyhÿrenye.

⁷ Aōma tamy marybebenye: —Deuxu Iòlòna biu-ki heka aōwesele kedehe-mynykemy ihÿre.

⁸ Webinadu mahādu heka biteytenye. Aōma iny rubu-wana witxi beakeki, biixixadÿÿnyke rubu-ribi. Tykybina yjy yjyhykÿ-ribi iny biteytenye. Tyytybybina inywo-ribi biteònyke. Iwese aō tetate wese iòwykō heka ijō-ò biwahinyamahāke, iòwykō wahe.

⁹ Uritere nieru wydyōmy, womati tÿrÿrÿhÿkÿ nieru aōkō, prata womati nieru aōkō, cobre womati nieru aōkō wahe.

¹⁰ Aōma anieru hyna nihikÿ wydyōmy, awa ijō wydyōmy, ijō dera wydyōmy. Aōma òwòru arirana wiòhedÿÿna wydyōmy. Aōmysÿdÿÿdu taòwy riwykre. Kia òbitire.

¹¹ Hetoō malòke. Kia heka arayrubunykre. Adee riwahinykre ibutumy aōmybo rarumyhykre. Iu hāwā-ò malokreu, hābu ityhydÿÿdu mahāduō biijekre. Taihyy bonykrehyy tahe iwitxira hāwā-ò iribihyymy makre.

¹² Iu hetoō-ò malòkeu Deuxu ywina tamy marybekre, Deuxu deysanamy wahe.

¹³ Kai awimy ityhydÿÿdu hetomy rÿike wana, biwahinyke aalàna tamyreny. Kai òbitimy aōkō atxiteri wana tahe uritere tamy Deuxu deysanamy tamy wahidÿÿōmy.

¹⁴ Aōma tii arybe-ò roholaōkeki, kai hāwā-ribi bexitake taheto-ribi wahe. Tahe iribi bòhònykeu tahe awabrybyxi biubÿtÿnymy bòhònyke. Tii tahe tamyreny rioimyhÿre. Aōma tamyreny ibinatyhykre.

¹⁵ Inatyhymy heka adee ararybekre. Sodoma hāwā mahādu, Komora hāwā mahādu inatyhymy heka ibinare tamyreny tahe isiraōkre aōhòkÿmy dÿÿnana wahe. Aōma kia hāwā arybe-ò raholara heka kia ratyre heka tamy isiraōkre. Kia hāwā tahe aōnityhymy aōhòkÿmy rotÿÿnykre. Ywisidÿÿna txu heka rÿekreu wahe.

¹⁶ Iwese budoeni ijòrò aholay-ki rÿikre wese heka kaiboho boibekre. Hemy-lala erydÿÿna wesemy heka maraykynykre. Idi tahe sòwemy aōma ywina-di maraykynybenykre bòtòwesena-di.

¹⁷⁻¹⁸ Uritere inatyhy heka aramykre araròtenykre dohodÿÿna hetowo-ò adi ralokre. Waòraru-ki heka bede dinodu mahādu heka araywisidÿÿnynakre. Judeukōdu mahāduko Rybewihikÿ Tÿmyra rarybekre. Tiiboho arahātenykre.

¹⁹ Aō heka belyyke ikoreny ibutumy roholakemy. Aramykeu heka uritere nohòtiōmyke aōmybo marybekremy ywisidÿÿna-ki wahe. Bede heka riwahinykre rybe ibededÿÿnanau. Rybeōmyke, urile rybeōmyke.

²⁰ Kai ixivanale aōkō marybeke. Aōma Deuxu Tyytybytyhy arāwiòhenanymyhÿrenye.

²¹ Inyō heka taseriòre rityhenykre. Tybyō tule tariòre rityhenykre. Aōma iriòre tasÿ tyby-ò iky reakre idi rirubunykre.

²² Ihyy ibyrymy heka aluu aōkòkre waòraru-ki. Ibutumy iny deramy rarehyyke waòraru-ki: Inyō tule òbitimy rarekreki, ikonanatxu-u, Deuxu Iòlòna-ò ralokre.

²³ Tahe anatakre. Aōma hāwāhākÿ-ki atxikeki mahenykre ijō hāwā-ò. Ihewoludu ikonana hāwā hāwāhākÿ-ribi behemynyke-ribi tahe adòòsekre. Judeu hāwāhākÿ-ò behemynykre kòule tahe adòòsekre, jiarÿ Hābutyhyhykÿ wahe.

²⁴⁻²⁵ Aōma bederydÿÿdu mahādu tahe aōma ierydÿÿna mahādu ratyre rare. Tule iwedu deòdu ratyre heka ihÿre. Iwesereny tahe boibebenykre. Tahe

awedu tate. Inyō tahe riwarinimyhÿre Satanasi, Belisibu wahe raremy. Tahe iwesele heka iny araninikre waweselemy, ibinatyhyre wahe.

²⁶⁻²⁸ Jiarÿ adee wiji relyreri. Biurasòmÿ heka tuu bedelyykre ibutu ijohonanamy adeereny relyreri. Wasimÿ wijirumÿ adeereny relyyre. Biurasòmÿ tahe ibutu ijohonanamy tuu belyybenykre. Uritere ilau brebuōmÿ. Aōbo wasimÿ rÿire heka ibutumÿ ratÿnykre. Uritere ilau brebuōmyke. Adeelekre rirubunykre atyytyby ta rirubunyōtyhy. Iruruōre dori atyytyby rirubunyké. Deuxule tahe bityhynyke. Tii dorihe iruru-di heka rare. Tii bedeluru-txi heka atyytyby bedeluru heōty-txi heka adi rehuke. Bityhynyke idile maraykynyke. Hābu lau brebuōmÿ hābu aōbina bina riwinimyhÿre lau brebuōmÿ.

²⁹ Nawiiō iny riwimyhÿre womati nieru iyja-di, iōwy riōre iny heka riwimyhÿre. Ibutumÿ heka Deuxu nawii rieryre sohoji sohojimy. Tiu heka Deuxu rieryōhyimyhÿre nawii sōmo rurumyhÿreu heka tiu rieryrykōmÿ idi reteheōtyhy. Kiawese aōbo tahōtinymahāte. Aōkōre, inatyhymÿ idi retehemyhÿre. Ijō rurumyhÿreu heka tuu robimyhÿre. Aōma Deuxu heka anaeryimyhÿre nawii sōmo ratyre heka aumÿ rieryimyhÿ.

³⁰ Ara erymÿ heka aōma arati-ki tiwesebo radeti rÿimyhÿre heka rieryimyhÿre.

³¹ Breburenykōmykre, kaiboho dori nawii ratyre Deuxu-ō toite.

³²⁻³³ Kai marybeke: –Jiarÿ retyhynyre dori tahe umÿ arelyyke. Jiarÿ heka umÿ ararybeke inynrÿ dee biu-ki wahe. Iny sōwehekÿy-ki riwatxiōnykeki tule aratxiōnyke jiarÿ Wahako-ō. Jiarÿ heka suō anade.

³⁴ Aō ywina wydumÿ aōkōre heka anade. Jiarÿ heka ywina aōkōre diwyde. Bedejeideidÿmÿ anade iribi wadee wou rÿikremÿ. Hābu heka tybe òludumÿ rarekre.

³⁵ Tule hāwyy tadi òludumÿ arisynykre. Tule iriokorese tariōrelahi òludumÿ arisynykre. Aōma inyō òludu heka tasÿ mahādu òludumÿ rarekre.

³⁶ Boluu adireny boreny heka boibekre. Kia luumÿ heka boibekre. Tai tahe iratyremÿ boibekre aōkōkeki tahe waluuōkeki tahe wahōrō mahādumÿ aōkō boibeke.

³⁷⁻³⁹ Kaweselemy boibeōkeki. Tai tahe kai wahōrō mahādumÿ aōkōhe mabekre. Aōma biyrurubunutyhykeki tahe kai ihārele aōkre. Aōma kai waōraru-ki aōhōkÿmÿ botÿÿnykeki wadee waaōmysÿdÿÿ òraru-ki inyō anarubunyekeki aōhe adee rutÿÿnykeki. Tai tahe aumÿ rōhōnykre inyō tasÿ-ō aradykeki iwese tii tasÿ-ō riwadyra wesele heka aradykre.

⁴⁰ Tii riwadyra wana Deuxu heka ridymyhÿre riwateōnyreki wahe.

⁴¹ Deuxu rybeduō bidybenykeki. Tii Deuxu-ō arāwahinykre. Deuxu adee uriiōno kadiwahinykre. Adeereny kidiwahinykre. Wahisidÿÿna ritakre wese heka tule kai bitakre. Adeereny ararybekre. Deuxu hōrō mahādu heka bimymahābenyke. Aheto-ō bidybenyke hābuwi ihÿreny. Tiiboho dori wese uriiōno ritarenykre wesele kaiboho bitabenyke.

⁴² Kai uladu-ō bemonāō biwahinykeki bedi imonamy. Tai tahe kanakre inatyhymÿ adee aō kidiwahinykre. Kai waōraru-ki ityhydÿÿdu-ō bee biwahinykeki, inatyhymÿ heka aōwy adee kanakre.

11

¹ Jesuisi heka rexihure aōma taerydÿÿna mahādu waōinatxi bedeerydÿÿna-ribi. Kia bedeluru ywina tamyreny riwahinyre. Rexihureu tahe rare rōhōnyre iribi hāwā-di. Aōma rybe ritÿnydÿÿmÿ rakremÿ hāwā hāwā-ō.

² Idi tahe ròtenywokile heka iu Joaõ roimyhỹ. Aõbo Jesuisi tahe iu aõna aõna wiwihikỹ ritxienymyhỹreu heka Joaõ tamy roholare. Ròtenywo-ki roimyhỹ-ribi. Idi tahe Joaõ taerydỹña mahãdu riteònyre Jesuisi-ò dỹỹraximy:

³ –Kohe, anaraòdenyde tate. Aõma Deuxu deòdỹña wahe kanakre aõbo ihewo-ribi. Ariraòrenykre aõbo urihimyò.

⁴ Tai Jesuisi rirawònyre: –Aõma bòòsebenyke ixybyle Joaõ-ò. Belyybenykre ikò aõna aõna wiwihikỹ rewinyre arureny-ki tule tabite wamyreny.

⁵ Aõma iruetàhàkỹ heka. Reruedỹỹnymy rare wahe. Itiere tasỹ retinywãhãre dinoduhukỹ ityy reytemyhỹre. Aõma ijõ Rybewihikỹ Tỹmyra roholaõhyymyhỹre tasỹ tule reijohonadỹỹnyre. Aõma rubu tule rubu-ribi reixixadỹỹnyre. Rybewihikỹ Tỹmyramy heka retỹnydỹỹnyre ibutu iny-ò wahe, iny aõkõ mahãdu-ò wahe. Tule Joaõ-ò marybembenyke kaweselemy wahe.

⁶ Maratyhybenykeki, beysabenyke.

⁷ Iribi ròhònyreu tahe Jesuisi heka rarybere Joaõ bededỹỹnanamy. Aõmybo wahe Joaõ-di rõhòtinyrenyre aõmy tuu bedi nohòtinyrenyre tamy itxereny bederahy ròirenyreki wahe. Otxirarade wese yhy-ki tahòtinyteri.

⁸⁻⁹ Ada aõma hãbu urimynodutyhymy aõbo idi rõhòtinyrenyre. Aõma butòre wesemy idi rõhòtinyrenyre. Ada iwitxiramy aõbo idi tahòtinytenynte hãbu tyy-wihikỹdiremy idi rahòtinytenynte. Iòlò taheto wihikỹ-ki ratximyhỹre. Aõkõre, kia iny heka aõ Deuxu rybeduõmybo tahòtinytenynte. Inatyhy tii kia rare.

¹⁰ Iratyre heka tii rare. Aõma dori Tyyriti-ki rarybemyhỹre:

–Tii heka wako-ki kadehemynykreky ratximyhỹre, wamy relyykemy, wary riywinymyhỹre.

¹¹⁻¹⁴ Inatyhy heka rare. Tii heka ibutu hãbu ratyre ratximyhỹre. Ihãrele tahe heka Deuxu Iòlòna-ki heka ijõ iny iratyre ratximyhỹre. Hãbu binahakỹ heka Deuxu Iòlòna-ò raaõbinanymyhỹre. Joaõ rexidelenyry rybe itỹnydỹỹmy rexidelenyreuhyyle heka ritelemy ralore. Tule wiji nalòmnyhỹde sòwemy. Iu Joaõ rehemynykõle heka tuu rarybemyhỹre ibutu Deuxu rybedu mahãdu heka tuu rarybemy raremyhỹ. Tule Moisesi bede ywina kia rarybere. Tii Eliasi wesele ihỹre. Tetyhynytenynte aõbo. Iwese Deuxu rarybereri wesemy heka tii nade.

¹⁵ Inyõ ierysmy rurukeki, roholake wiji. Aõmybo ararybekre kainymy tiwesebo rỹimyhỹremy.

¹⁶ Tiiboho heka iwese weryry uladu risinymyhỹre wesemy ihỹrenyre. Kiamy heka tiinamahãdu-ò rarybemyhỹre:

¹⁷ –Jiarỹboho heka aõma wiunawihikỹ-di rawinymyhỹrenyre. Idi tahe teysatenyõhyymãhãtenynte. Tahe wiuna bederarysyna-di heka rawiunymyhỹrenyre. Ta bedewoõhyymahãtenyteri.

¹⁸ Joaõ Sebedỹỹdu heka riroxiõre. Vĩĩmy riõõre. Inywesereny tai tarybetenynte: –Tii raitxỹtemy ihỹre. Tyytybybina-di ihỹre.

¹⁹ –Jiarỹ Deuxu Riòre heka rehemynyre Hãbutyhyhykỹ wahe. Jiarỹ reroximyhỹre. Reõmyhỹre tahe kiaboho heka waluu aõkõ heka toite. Urile heka wamy tarybemyhỹtenynte wabyre nihikỹremy wabemomohòkỹremy. Aõma òrarudu kia liinatyhy heka jiarỹ rare. Aõ ikòkõlemy heka taraykynymyhỹtenynte ihãrele taheka òbitilemy ixi-di tanohòtimyhỹtenynte.

²⁰ Jesuisi heka sòwemy aõwiwihikỹmy riwinymy raremy. Ihãrele heka imahãdu rityhynyõhyymyhỹre heka. Kia Jesuisi heka rarybere kia hãwã mahãdumy.

²¹⁻²² Orasi hãwã aõ heka adee binatyhymy kanakre amahãdu-ò wahe. Be-saida hãwã mahãdu, kaiboho aõna aõna wiwihikỹmy tabitenynte ahãwãreny-ki. Tiu heka ixi-txi õhòtirenny reaõhykymyhỹre. Jiarỹ aõma Tiro hãwã-ki Sidõ

hāwā-ki aōna aōna wiwihikỹ ariwinyre wana inihe heka ixi-txi tōhōtireny reare iniheka saumy tyky rexityynyre tule brybysi ixityreney heka rexihumy. Sidō hāwā Tiro hāwā heka urihimyo adeereny isirakre.

²³⁻²⁴ Kafanaō hāwā mahādu! Kaiboho heka tule ixitxireny ōhōtireny reaōhykyre. Aōma kaiboho heka awireny ixidireny tahoōtinymahātenyete, awityhyremy. Kaiboho heka ōhōtenamy bekoabenykre bedebina heōtyhykỹ-ō dori besebenykre. Sōwemy dori aōwiwihikỹmy kaiboho tabitenyete. Deysana wiwihikỹ-di wahe. Tiu heka ixi-txi ōhōtireny reaōhykymy aōrarureny-txi. Aō wiwihikỹ Sodoma hāwā-ki rewinyre wana wahe. Tiu heka rabinaōhyre inihe heka wiji-ō. Aōkō botỹỹbenykre aōma Sodoma hāwā ratyre heka aōhōkỹmy botỹỹnybenykre, Deuxu ywisidỹỹnatxu.

²⁵ Tahe Jesuisi rexitōenyre Deuxu-ō: –Waha, biu bede-wana iwedu atximahāte. Kai uladu-ō aōna aōna tetỹnynte. Tewōmahāte heka kia ibedeeryhykỹ lau heka tewōmahāte. Kai ixi-di bedeeryhykỹmy rōhōtinymyhỹre lau wahe.

²⁶ Tii heka adeewinare.

²⁷ Ibutumy heka Waha wadee riwahinyre tii heka riwaeryre. Jiarỹ tule tii reeryre. Aōma ixidee wikeki inydee ariteōsinyke. Timybo Waha rare.

²⁸ Elehydỹỹmy buruke aōbo? Manake wadee. Jiarỹ heka araelehinykre.

²⁹ Walōtityreherina ixidee bitidibenyke. Tai tahe wawana maaōmysỹdỹỹbenyke. Arabederynykre heka ywina-di. Aritidiōtyhy heka aō utxiehekỹ atyreneny. Elehyna adeereny ariwahinykre awo araykyreny-ō.

³⁰ Aaōmysỹdỹỹna adeereny rewahinymyhỹre isiraōre heka. Iutxiemy aōkō rare.

12

¹ Sabado txuu, judeu elehynatxu Jesuisi rariamy rōirenyre maixōmoni oworu-ki. Tahe rekoarenyre aōma maixōmoni oworuro-di heka irenyre. Kia heka tahe Jesuisi taerydỹỹna mahādu heka riarimyhỹre aōma riyrenykremy rama rahuraki.

² Iu-ki tahe fariseu mahāduō retehemy ratximyhỹre. Tiiboho tahe rarybere kia Jesuisi-ō rarybere: –Kia hewa brebuna rare aōma sabadotxu riwinymyhỹré: –Aōherekibo aerydỹỹna mahādu iu riwinyrereri.

³ Tahe Jesuisi tamy rỹỹraxire aōma ijyymy ikoreny relyyre iwese Davi riwinyre wesemy heka riwinyreri ramy rahureu.

⁴ Davi riki heka ralōre Deuxu dohodỹỹna hetowo-ō heka ralore. Tai tahe rirỹsỹmyhỹ kia aōma xiwena-ki heka riymy. Kia orotxu heka aōma xiwena-ō hidỹỹna mahāduōle rỹimy. Tahe ihārele heka riyrenyre heka. Taijoi mahādu-ō riwahinyre.

⁵ Kia wesemy aōma tariakōte bede ywina tyriti-ki wahe. Aōma xiwena wahidỹỹdu heka rityynyōhyymyhỹre. Aōma sabadotxu kia wahisidỹỹna. Xiwena bede ywina wahe. Iu dohodỹỹna hetowo-ki ratximyhỹu. Tii heka sabadotxu bede ywina rityhynyōhyymyhỹre. Tahe heka aōbina bina riwinyrenyōhyymyhỹre. Kia tahe heka tule heka bede ywina tyriti heka ritidỹỹna roire. Idi tariatenyōte.

⁶ Inatyhymy heka adee ararybekre. Inyō kaki ratxikeki jiarỹ heka kaki heka inyō ratximyhỹre aōma dohodỹỹnahakỹ heto-ki wahe. Dohodỹỹdu mahādu ratyre heka watximahāre jiarỹ wahe.

⁷ Kiamy heka ritidỹỹna rỹimyhỹre. Jiarỹ heka xiwena luure ihāre tahe sōwemy heka iratyre ruxetōena luure. Jiarỹ aōma xiwena luure ihāre tahe iratyre heka aōma ruxetōena luure sỹ. Kaiboho terytenyete wana.

Aõma heka ibinamy tarybehyynehÿte inyõ teòsamy ratxikeò. Aõma aõ ri-winyrenykhõhyre. Kiamy wahe.

⁸ Jiarÿ dori Deuxu Riòre Hãbu watximyhÿre. Jiarÿ tule aõma sabadotxu wedu wãhãre.

⁹ Tai tahe Jesuisi nade heka ixbyby aõma tohodÿÿnareny heto-ò. Ralòre heka sabadotxu.

¹⁰ Hãbuò ratximyhÿre debò binare. Debò rayjayja ihÿmyhÿre. Tahe fariseu mahãdu heka Jesuisi-di mynamy ratximyhÿre. Aõ rybebinamy rarybeke òraru-ki rinykemy. Tai tahe rÿÿraxire Jesuisi-ò: –Timyrebohe brebuna aõbo sabadotxu deytedyÿ ada aõkõre aõbo.

¹¹ Tai ta Jesuisi rirariwònyre: –Kaweselemy røkõhõtinyrenyke. Kai heka aõmy abudoeni sohojilere. Sabadotxu heka reseke hãlooro-txi aribi. Timybo mohõtinyke aõma bitake hãlooro-ribi. Inatyhyre aõbo. Sabadotxu hãrele bitake. Kohe, inatyhyra.

¹² Hãbu heka budoeni ratyire heka iòwy rare. Aõma sabadotxu aõwaxinyre heka reyteke.

¹³ Tai hãbu-ò rarybere Jesuisi: –Ebò biditytyke. Debò ritytyra ta wiwesele debò relere awimy.

¹⁴ Fariseu mahãdu heka wii ributunyre, iribi ròhòrenyreu wahe. Widee raryberenyre: –Aõma timybo rikisÿnyrenykre rikimyrenykre rikirubun-ynykre.

¹⁵ Tahe Jesuisi rierymyhÿ kiamy rarybermyhÿreny heka roholamyhÿ. Tahe Jesuisi rierymy heka. Iribi irehemy ratximyhÿreny hãrele, rierymy heka. Iribi tahe rexitare heka hãwã-ribi wahe. Idi heka ihemy heka rare riheludunyre. Sòwemy heka webinadu ihemy rare. Ibutumy riteytenyre.

¹⁶ Teyteydÿÿna mahãdu-ò rarybere: –Uritere itÿnydyÿÿomykremy tuu ijyyõmykremy inyko-ò.

¹⁷ Ihexiu Isaia tyyriti-ki heka kawesemy rÿimyhÿre. Tii heka Deuxu rybeduò rare.

¹⁸ –Kaheka Wadeòdu rare. Tuure heka jiarÿ, tii heka retare. Rehitxinyre. Tii heka deysana wadee riwahinymyhÿre Tatytybytyhy tamy ari-wahinykre. Ywisidyÿÿna txuu heka ibutuko-ò relyykre.

¹⁹ Tii heka ryryòtyhy rebureòtyhy heka inyõ-wana widee. Tiu heka inyõ roholaòtyhy irybe dee. Ryki heka inyõ irybe-ò roholaòtyhy.

²⁰ Aõma bòtòreò irybòhòmy roikeki. Tii raòròòtyhy. Txuheòtyjurà loosòna urihimiyòkeki heka tiu ruriòtyhy eleti-di. Tii ritakre iaõbinana, inatyhynaõ binana wahe.

²¹ Ibutumy heka iraròsòna iribi ritakre.

²² Hãbu rybeò ruetàò heka iny didydenyde Jesuisi-ò wahe ralòmehÿreki wahe. Tii tyytybybina iwo-ò ralòmehÿreki wahe. Jesuisi tyytybybina riteònyre. Tai irue heka awimy relere rarybere.

²³ Ibutu iny sòwe heka heka ribedeòtiidÿÿnyre. Widee tahe raryberenyre: –Ka heka Davi riore riore òsana rare, Deuxu deòdÿÿna wahe.

²⁴ Tahe fariseu mahãdu-ò roholare. Tahe rarybere Jesuisimy: –Tii inatyhymy tyytybybina riteònymyhÿre inywo-ribi. Aõma tyytybybina wedu ruru-di heka riteònymyhÿre. Belisibu ruru-di wahe.

²⁵ Jesuisi heka rieryre iraykyreny. Tai tahe tamy rarybere: –Ijyymy heka tamy rarybere. Iòlòna mahãdu wiribi ibutumy rexihitxinykeki tahe rexihukre ibutumy wiribireny. Tahe hãwã mahãdu taijoiy-ribi rexihitxinykeki, awi aõkõ rare tai wahe.

²⁶ Wiribi rexihitxinyke wana. Tule awi aõkõ rare tai wahe. Aõma Satanasi rexideònykeki tahe tayreny-ribi rexitake.

²⁷ Belisibu ruru-di tyytybybina ariteònyke wana aõdibohe aheludu mahãdu riteònykemy ratximyhÿre. Tiibohe heka aywisidÿÿdurenymy ratximyhÿre.

²⁸ Jiarÿ Tyytybytyhy ruru-di ariteònykeki heka kaiboho arurunareny Deuxu-ribi nade. Iòlõna adeereny rehemynreri.

²⁹ Inyõ heka hãbu rurutere hetowo-txi ralòõtyhy wasimy wahe. Tai rawasinymy ratximyhÿkeki tahe urile juhoo hãbu ritaataake. Idi tahe iheto-ribi aõdibo rawasinyke.

³⁰ Inyõ wabiòwamy aõkõ ihÿre wana heka, waòludu rare. Inyõ wawana ibutumy ratxiõmyhÿre wana tahe raybàtàmehÿre.

³¹ Inatyhymy jiarÿ adee anarybekre. Ibutu òraruna kanaixãwididÿÿke. Hãbu aõtxile aõbina bina rarybemyhÿre. Sohojile taruxãwidÿÿõtyhy. Aõtxile inyõ aõbina binamy Deuxu Tyytybytyhy rarybekeki. Tii aòraru rataõtyhy. Kia heka òraruna tiiehyymy rarekemy ihÿre.

³² Hãbutyhyhykÿ heka Deuxu riòremy aõbina binamy iny rarybekeki, wamy wahe, tii tahe ixãwidina dire. Deuxu Tyytybytyhyhymy rarybekeki, tii tahe iixãwidinyõhyre. Tiehyy kia òraruna-di rareke.

³³ Jesuisi rawesenanyre iny òwòru wese rare. Òwòru awimy rÿike wana, tai heka iratywihikÿõ-ki iny rahake. Ruru rasunymyhÿre raruburerimy ihÿre. Kia tasÿ iratywimy aõkõ rÿike ibinamy. Aõma òwòru iny rierymyhÿre aõbo iribi iraty dejuxunymyhÿde òraru-ki iny rierymyhÿre, awire.

³⁴⁻³⁵ Kaiboho heka hemylala mahãdu wesemy atximyhÿtenyte. Kaiboho heka abinatyhymy ahãtenyte. Timybo heka kaiboho aõwiihikÿmy mary-bebenyke. Arayky aõbina bina hakÿlemy tõhõtinyteri wana. Tai taheka ary tuu ròhònyke ary tuu rarybeke. Aõma hãbu wihikÿõ ratxiremyhÿre wana aõnana wiihikÿle tarayky-ki riyrubunymyhÿre. Tii heka rarybemyhÿre. Hãbu bina tahe tarayky-ribi ibinalemy rarybemyhÿre.

³⁶ Ibutumy aõmybo iny rarybemyhÿre heka ywisidÿÿna txu tuu rarybemyhÿre rierymy timykibo tuu rarybere wahe.

³⁷ Òrarukibo rarybere: –Arybe òraru-ki heka ywisidÿÿna-ki atxiteri. Bitakemy aõbo ada aõkõre aõbo.

³⁸ Bedeerydÿÿdu mahãdumy heka fariseu mahãduõ tamy rarybereri: –Erydÿÿdu, wadeereny biteòsinyke awiihikÿõ.

³⁹ Jesuisi dirawyònyde: –Iny kamahãdu heka ibinatyhy rare aõ awiihikÿ rexitòenymyhÿre. Abina binale wahe. Aõ wihikÿle bobiõtyhy. Tahe sohoji aõwiihikÿõmy heka mohõtinyke. Jonasi widÿÿna wahe.

⁴⁰ Jonasi Deuxu rybeduõ widÿÿna wahe. Tii inataõ txu inataõ rummy uturahakÿ wona-ki ihÿmyhÿwesemy. Iwese Deuxu Riòre Hãbutyhyhykÿ bede-ki rarekremyhÿ wesemy inataõ txummy inataõ rummy.

⁴¹ Ninive hãwã mahãdu heka roholarenymy tõhõtireny reare. Iu Jonasi rybe ritÿnydÿÿreu wahe. Tahe inyõ kaiboho tamy taholatenyte. Sõwemy heka iny Jonasi ratyremy ihÿre. Ihÿrele kaiboho ixitxireny õhõtireny reaõre. Ninive tamahãdu tahe ibinany adeereny rarybekre. Ywisidÿÿnatxu wahe.

⁴² Iòlò Hãwyyõ heka ibòò irehe-ribi nade. Aõma Salomaõ bede erydÿÿna-ò roholakemy. Kaiboho heka inyõ-ò taholatenyte. Salomaõ ratyre heka sõwe inihikÿ ihÿre. Ihãrele ta ixitxi nohõtireny reaõre. Ywisidÿÿnatxu heka Iòlò hãwyy ibinanamy kÿnarybekre umyreny wahe. Ywisidÿÿnatxu.

⁴³ Aõma tyytybybina hãbu-ribi ròhònykreu tahe elehyydÿÿna riijekre. Aõma bedebinana tòtehekÿ tahe tuu reakre. Ihÿre tahe tai rahaõhykre elehyena-ki wahe.

⁴⁴ Tai tahe ixidee rybekre: –Aròòsekre kÿhe. Iribi ranywÿhÿreò anakre. Tai tahe kia hãbu-ki rahara. Tyyrahakÿmy iwo-ki iruxeramy.

⁴⁵ Tai tahe ijõ-txi reare. Debò inatxi reurò tyytybybina-txi iratyre tyhy wahe ibinare. Tai tahe ridyke tahãbu-ki rasÿnyrenykemy. Kia hãbu heka iwese juhu raremyhÿre ratyre ibinamy ratximyhÿre. Kaiboho heka kia tyytybybina wese atximyhÿtenyte.

⁴⁶ Jesuisi tahe ijõ-ò rarybere ijõ ijoi-ò, tai tahe ise rehemynyre, iseriòreboho-wana. Sõwemy iny mahãdu-ò heka rarybere.

⁴⁷ Inyõ tamy rarybere: —Inyõ heka arãijereri adi ahelÿÿna. Kie heka rehemynreri adee rarybekemy adi ratxireri.

⁴⁸ Jesuisi dirawyõnyde: —Mota heka nadireri, mota heka waseriòrereri?

⁴⁹ Tai tahe tebòhe riteòsiriteòsinyre taerydÿÿna mahãduõ-ò. Ka heka nadi rare. Ka heka waseriòre. Ka ijõ heka waseriòre.

⁵⁰ Wahadeewi riwinymyhÿreki tahe, tii heka nadi rare. Waseriòre rare. Waha dori biu-ki ratximyhÿre.

13

¹ Itxu taheka Jesuisi rare heto-ribi Kalileia aho ijà-ò. Tahe tai ronyre. Tahe rexiterenyre Jesuisi iny ribedeernymy.

² Tai ibututyhymy heka iny wirotyre. Tai tahe Jesuisi rexitareny urihimiyò hãworo-ò ronomy rexitaranyre. Iny sõwehekÿ mahãdu tahe aho ijàkile heka roholamy rÿimyhÿre.

³ Tii heka relyymyhÿre aõma ijyyõ relyyre: —Aõna aõna wese ijyy rawesenanyre. Hãbu alòbòròmy rara. Tii heka alòbòròna dehudu rare.

⁴ Ijõ heka idi rehumyhÿu heka ijõ ryro-txi resere. Nawii heka riròmyhÿre riore heka.

⁵⁻⁶ Ijõ tahe rejuxunyre aõma manarutysu-txi. Tii tahe raumynyre aõwesele. Iraruxiõlemy heka rÿimyhÿ suu ibutureki. Idi bedetòtee rimoedÿÿnyre. Idi tahe rurure.

⁷ Òwòrudÿÿ resere edey-txi. Idi ta ruhunyre edewanale. Idi tahe ede riòdesedÿÿnymyhÿre. Tai heka raratynyõlemyhÿre.

⁸ Ijõ tahe resere suwitxirawihikÿ-txi. Tai tahe sõwemy raratynyre. Sohoji òwòruty-ribi tahe 30my raratynyre iraty wahe. Ijõ 60my raratynyre iribi. Ijõ ta 100my raratynyre.

⁹ Tahe Jesuisi heka rarybere: —Kia boholatyhymy bonyke. Òhõtirenydikeki boholabenyke.

¹⁰ Tai tahe ierydÿÿna mahãdu Jesuisi ritÿÿraxinyre: —Aõherekibo kai ijyy-di bierynanykemy atxiteri, rawesenanyreri wahe.

¹¹ Tai tahe dirawyõnyde: —Kaiboho aõmybo Deuxu reerynanyre kaiboho bierybenyke. Ijõ mahãdu tiu ijyy rieryõtyhy. Kaiboho dori Deuxu Òlòna teerytenyte.

¹² Hãbuõ iaõdikeki ijõ heka iratyre tamy ariwahinyke. Tai tahe sõwemy tamy rauhenyke. Tahe hãbu ihoõkeki ibutelemy ijõdikeki heka kiale iribi ibutumy aritakre.

¹³ Retehe my ihãre tahe robiõhyymyhÿrenyre tahe ririõhyymyhÿre. Tai heka ijyy-di reerynany watzireri.

¹⁴ Iwese Isaia tyriti-ki roire wese heka tiiboho ihÿrenyre: —Roholamyhÿre, roholamyhÿre ihãre tahe rieryõhyymyhÿre. Retehe my ihãre tahe tiu robiõhykymyhÿre.

¹⁵ —Irayky tererenyreki wahe rieryõre heka. Òhõtireny heka ritòbònymyhÿre ta ijohonana-ribi. Tarue ribrenymyhÿre robike lau. Tahe wadee ròòseõtyhy. Aõkõre heka ariteytenykemy idi watzimyhÿre. Tibo heka terareny aõkõre.

16 Jesuisi ijõ relyymyhÿre tamyreny: –Kaiboho heka eysamy atxitenyteri. Kaiboho heka bobibenyke tahe bierybenyke. Aõmybo kaiboho tabitenyteri heka, taholatenyteri wahe.

17 Ihetxiu mahãdu, hÿÿna mahãdu wahe, tuu lobiximy riwisÿnymyhÿre. Aõma aõwobo kaiboho taholamyhÿtenyteò heka roholakemy riwisÿnymyhÿre tahe roholaõhyymyhÿre.

18 Tahe boholahe heka adee aritÿnynyke aõbo ijyy rare.

19 Òwòrutu ryro-txi resemyhÿre heka iny ijoireny wesemy ihÿre. Ijhona tuuwesemy wahe. Tibo roholamyreny ihÿre tahe rieryõhyymyreny. Aõma Satanasi heka nade tai tahe warybe heka iribireny ritamyhÿre.

20 Ijõ manarutysu-txi resemyhÿ mahãdu tahe ijõ ijohonadu wesemy heka roire. Tiiboho heka deysana-di roholamyhÿreny.

21-22 Tai tahe urihimyòle rityhynymyhÿreny aõhòkÿmy dÿÿnana kanakeu tahe aõwesele riatyke ririmy reake. Kia edey-txi resera tasÿ aõma ijõ ijohonadu mahãdu wesemy heka rare. Tiiboho heka aõma 1000 nierule aõnityhmy idi ròhòtinymyhÿreny nierudile. Tai tahe rexibedewonymyhÿreny. Tiu heka Deuxu aõmydÿÿna riwinyõhyymyhÿre, Deuxu Rybe riwiòhenanyreny.

23 Kia suwitxira wihikÿ-txi resera wana tahe iwitxira ijohonadu mahãdu wesemy heka rare. Tiiboho heka roholamyhÿreny rityhynymyhÿre sòwemy Deuxu dee roholamyhÿreny heka. Ijõ 100my wesemy raratynyre. Ijõ 60my raratynyre ijõ 30my raratynyre. Iny sohoji sohojiò heka Deuxu-ò aõ riwinyrimy ihÿre.

24 Idi tahe iwitxira ijyymy relyyre Jesuisi tamyreny: –Deuxu Iòlòna heka kia wesemy ihÿre. Oworudu heka aõma alòbòròna wihikÿò ritòbrònymyhÿre taoworuro-ò.

25-28 Tahe iòluduò rummy heka tamy nade. Tahe iu ibutumy iny ròròmyhÿreu, asibinaty-di tamy rehure. Tai tahe alòbòròna asibina-wana ruhunyre kia aõma ede wana wimy urilemy. Taiki tahe kia aõma oworudu kia aõmysÿdÿÿdu mahãdu. Tuu heka ijyy-di nade tuu ijyymy. Idinodu rarybere: –Aõma waòludu heka kia riwinyre wadee. Idi oworudu narybede: –Aõhebohe arotÿÿnyrenykre? Ta idile aõbohe arisiherenykre araxirenyre. Tai tahe rirawyònyre:

29-30 –Aõkòre wahe, kia ibutumy alòbòròna rirarutxinykre. Ixinamy heka ratybienykre tii-wana wiurilemy kia maixòmo arixina bededÿÿnany bede relerekeu tahe iribi raarike. Ararybekre heka tamy kia aõma oworu-di raaõmysÿdÿÿkreò. Juhu delemy asi arisykre. Tahe ritoonykre. Idi tahe maixòmo heka riarikre kia maixòmo hetowo-ò riyrubunykre.

31 Tahe Jesuisi ijõ ijyy witxiramy relyymyhÿre: –Aõma Deuxu Iòlòna heka aõma alòbòròna sòmo sòmo wesemy ratximyhÿre.

32 Aõma raumynyri heka aõma òwòru iyjatyhmy ibutumy òwòrutu-ribi rariwesele relemyhÿre.

Taiki tahe kia nawiile tuu rÿtÿnymyhÿre kia òwòru-ò.

33 Uri paõ uri ixìòlòdÿÿna heka Deuxu Iòlòna wesemy heka kia ihÿre. Hãwyy heka paõ riwinyymyhÿreu, riurinyymyhÿreu tahe ibutumy raubÿtÿmyhÿre kia ibemy.

34 Tai tahe rexiòlònymyhÿre Jesuisi heka sòwemy tuu relyymy raremyhÿ. Iu iny ribedeerynymy raremyhÿ. Tiiemy heka Jesuisi relyyhy raremyhÿ iu ròbedeerydÿÿmy raremyhÿ.

35 Deuxu rybedu dori ihetxiu rarybere:

–Jiarỹ ijyy-di rebedeerynymyhỹre. Aõma tuu relyymyhỹre heka ierykõna rare. Tiuhe rieryõhyymyhỹre. Iu bede rexideelenyrauhyyle.

³⁶ Idi tahe Jesuisi rexitare iny sõwey-ribi rexitare. Hetoõ-ò heka ralore. Tai tahe aõmybohe wakoreny inihe bedelyyke. Aõludu inybo arasỹnyremy. Kia ijyy heka aõma hãbu ede-di rehure ioworu-ò, taõludu oworu-ò. Kia inihe wadee bitỹnynyke aõbo rare wahe. Kia ijyy telyyté.

³⁷ Tai tahe Jesuisi tii dirawyõnyde: –Kia hãbu alòbòrõna wihikỹ ribòrõnyre heka Deuxu Riõre Hãbutyhyhykỹ, rare wahe.

³⁸⁻³⁹ Ioworu heka ibutu bede heka roimyhỹ wesemy roimyhỹre. Aõma alòbòrõna wihikỹre heka ityhydỹỹdu iwese rỹirawesemy rỹira. Asi tahe kia ityhydỹỹdukõdu mahãdu wesemy heka ihỹre. Aõma kia iòludumy rarybereri tahe kia Satanasile heka ihỹre. Kia iyresynamy rarybereri aõbo bedekonana heka tuu rininimy heka tuu rarybereri. Kia ýju heka iyresydumyhỹ tuu rarybereri. Kia rimykre ede riorokremy rarybereri heka aõma ityhydỹỹdukõdu mahãdu heka tuu rininimy rarybereri.

⁴⁰ Ritakre heka rihitxinykre. Heòty bedehékỹ heka idi rehukre risõkre iu wahe. Iwesele taheka bedekonana heka rarakre.

⁴¹ Deuxu Riõre, Hãbutyhyhykỹ heka aõma ýju riteònykre ibutu iny ributunykremy.

Ityhydỹỹdukõdu mahãdu ijõ iny òraruna-txi rityhedỹỹdu mahãdu heka ibutumy ributunykre widee. Ibutumy aõbina bina widỹỹdu wahe.

⁴² Idi tii rihukre. Tai tahe ryrykre aõkỹmy rotỹỹnykre tai. Robumyhỹre taju.

⁴³ Kiau aõma

Deuxu hõrõ mahãdu tahe Waha Iòlòmý ronymyhỹre kie ronykre. Tiiboho loosòny wesemy heka ritoosònanykre txuu loosòna wesemy.

Õhõtirenydikeki ibutumy heka boholabenyke.

⁴⁴ Deuxu Iòlõna tahe nieru wesemy ratximyhỹre. Aõma nieru heka hynaõ-ki rahara nieru-di tỹximy aõma surawo-ki idi hãbu ixyby riwore. Tai tahe tii reysatyhymy ròsere. Kia ibutumy taaõmydỹỹna-di heka rohonyre. Kia bedero riwykremy.

⁴⁵⁻⁴⁶ Ijõ tahe tule Deuxu Iòlõna wesemy ka ratximyhỹre. Iwese ixiura wydydu ihỹre wesemy heka Deuxu Iòlõna ihỹre. Iwydydu heka iijese iijesemy riwymyhỹre. Aõwi riererimy riererimy heka tai rahamyhỹre iruxera-ki tii tahe riwymyhỹre. Kiau tahe tai rahare aõ òwyhykỹõ-ki heka rahare. Tii idi tahe rohonyre ibutumy taaõmydỹỹna-di idi tahe kia iwydymy idi ratxireriò riwyre.

⁴⁷ Riàõ wese heka tule Deuxu òlõna ihỹre. Aõma rià-di iny rehumyhỹre wana heka ibutumy utura rimymyhỹre.

⁴⁸ Kia aõma idi tahe idi raixỹnymyhỹre riarimyhỹre iky-ribi. Aõma awi-di awihe riarirerimy iky-ribi. Ibinare rihitxiny my iribi.

⁴⁹ Kia bedekonana tahe iweselemy heka rarekre. Kia aõma ýju heka riarikre awi heka ibinau-ribi riarikre.

⁵⁰ Rehukre heòty bedebinakỹ-ò wahe. Tai ki tahe rirajuamyhỹkre ta aõhõkỹmy rotỹỹnymyhỹkre. Txuu rikyiny myhỹkre

⁵¹ Tahe Jesuisi tamy rỹỹraxire: –Kiamy ibutumy teerymyhỹtenynte? Tiiboho riraòwònyreny: –Kohe, reerymyhỹreny.

⁵² Idi Jesuisi rarybere: –Inyõ bede ywina bedeerydỹỹna heka rityhynyreu, waheludu rarekreu wahe. Tii tahe iwese hãbu butudỹỹdumy ratximyhỹre wese heka ronymyhỹre. Tii heka ibutudỹỹna heto-ribi ritamyhỹre, tasỹ mahãdu-ò riwahinykemy. Aõ tyby aõ tỹmyra. Ibutumy heka ritamyhỹre.

⁵³ Tahe iribi Jesuisi rexitareu,

⁵⁴ tahe tahāwā-ò ròòsere. Judeu dohodỹỹna heto-ki ribedeerynyre. Tahe ibutumy ribedeòtiidỹỹnyre. Tiribibo heka tii bedeeryna rierymyhỹre: –Timyrekibohe aõwiihikỹ rierymyhỹre. Tii kỹny heka aõma òwòru besedỹỹwidỹỹdu riòre heka rare.

⁵⁵ Jyje riòre wahe. Marie heka tule rare ise wahe. Txiau, Simaõ, Jyje, Judasi-wana iseriòre ihỹre tule wahe inatyhy?

⁵⁶ –Iseriòre hāwyy heka tule kaki rasỹnymyhỹre inatyhy. Timyrakibohe aõna aõna ikõkõ rierymyhỹre.

⁵⁷ Tahe rityhynyõhyymyhỹre heka tai wahe. Jesuisi tamyreny rarybere: –Deuxu Riòre Hābutyhyhykỹ heka tiu tauludu wijirana hāwā-ki inyõ rityhynyõtyhy rybeduõ ihetomy ijirana-ki.

⁵⁸ Tai tahe aõna aõna wiwihikỹ heka tai riwinyõhyre, rityhynyõmyhỹreki.

14

¹ Kia bedeu tahe Herodi, Kalileia iòlò, Jesusini-ò roholare. Aõikõkõ heka riwinymyhỹre.

² My heka rarybere teòdu mahādu-ò: –Kia Joaõ Sebedỹỹdule aõbohe rubu-ribi riixixadỹỹnyre. Tai tahe tii aõikõkõ riwinymyhỹre.

³ Herodi tahe juhū Joaõ ròtenawo-ki riteònyre. Tii taseriòre hāwyy òraru-ki kia wesemy riwinyre, Herodia òraru-ki wahe. Herodia heka Filipi hāwyy rare.

⁴ Juhū Joaõ Herodi-ò rarybere: –Awi aõkõ rare. Kai dori aseriòre hāwyy-wana atxiteri. Uritere heriõmyke.

⁵ Tai tahe Herodi heka Joaõ rubudỹỹmy riwisỹnyre. Urile ruberumy judeu mahādu lau. Tamyreny Deuxu rybeduõmy rỹiramy Joaõ Sebedỹỹdu rare.

⁶ Herodi kai beòramy bede reareu tahe worana bedehesi ritxienyrenyre. Herodia riòre ijadõma heka iko-ò resemyhỹre. Iixe-ki tahe awimy Herodi rahare, Ijadõma luure wahe.

⁷ Tii tahe tamy rarybere kanakemy. Aõmybo wadee bexitòenykre. Inatyhymy adee ibutumy ariwahinykre.

⁸ Tai ise ijadõma-ò rarybere: –Aõma bexitòenykre: Sebedỹkỹdu ratilemy tamy bexitòenykre. Tai tahe ijadõma tamy rexitòenyre: –Wadeke bidiwyke Joaõ Sebedỹkỹdu rati, pratoro-ki.

⁹ Tai tahe iòlòhe rabadewore. Ibutu ijohonaru-ò dori tuu rarybere ijadõma-ò. Tahe ibutumy riwinyke rỹire.

¹⁰ Tahe ihārele iòlò heka soldadoõ riteònyre ròtenawo-ò kia Joaõ rati resymy.

¹¹ Inyõ diwyde pratoro-ki. Ijadõma-ò heka riwahinyre. Tahe tii tadi-ò idi rare. Riwahinyre.

¹² Idi tahe Joaõ erydỹỹna mahādu dioryde iumy, riwykremy, rituunykremy. Iribi tahe roirenyre Jesusiko relyre.

¹³ Kia roholareu tahe Jesuisi ròhònyre ixisohojilemy bederahu-txi. Hāwò-di rexitaranyre rare. Iny sõwemy bede-di ròirenyre ihemy titxibo iru-ki rakemy.

¹⁴ Rehemynyreu tahe iny sõwehekỹmy Jesuisi robire. Tai tahe Jesuisi riwotòenyre. Ibutumy riteytenyre webinadu mahādu.

¹⁵ Tahe ratxioronyre. Tahe ierydỹỹna mahādu tamy nade. Tamy rarybere: –Txuu ratxioronyra. Bederahy-ki dori atxiteri. Iny tahe biteònykre hāwā-ò tai rỹsỹna ixidee riwykemy.

¹⁶ Tahe Jesuisi rirawyònyre: –Aõkõre, ariteònyõtyhy jiarỹ. Kaibohole tahe aõ tamy bidiwahinybedenyke.

¹⁷ Jiarỹboho kỹny diwatxiõnyreri iruyre orotxu-di, utura inatxire.

¹⁸ Tai tahe Jesuisi narybede: –Bidiwahiny wadee.

¹⁹ Jesuisi tahe ibutumy iny asityre-ki ronykemy risỹnyre. Orotxu in-
aubiòwa, utura inatxi rỹire, utura-wana rimyre tahe ritehere biu-txi àlàna
Deuxu-ò riwahinyre. Idi tahe paõ riyreyrenymyhỹre teòdu mahãdu-ò ri-
wahinyre. Idi rare iny sõwehekỹ-ò.

²⁰ Ibutumy iny riroxirenyre ihãre rihydyre. Kia iuhe-di ierydỹỹna mahãdu
12 weriri ritỹxinyre.

²¹ Hãbumy 5000 òsana rỹimyhỹre. Ihãre tahe uladu-di rariaõhyyre
hãwyyboho-di.

²² Tahe Jesuisi taerydỹỹna mahãdu riteònyre aho kanawe-ribi ijà-ò
reuròrenykemy hãwò-di. Jesuisi tahe rarire iny sõwehekỹ mahãdu
rirybedỹỹmy.

²³ Jesuisi heka iny tahetoreny-ò riteònyremy rahudi tahe tii raòwònyre
hãwãlò ratyy-ò ixitòedỹỹmy. Taihyyle idi bede roronyre ixi sohojihyyle.

²⁴ Kiaule hãwò ahotya-ki rare. Òbò nihikỹy-txi ixinalemy ratximyhỹre. Tiò
tiò òbò riwelòrò riwelòròmỹ idi rehumyhỹ. Yhy deade txura-ribi.

²⁵ Rudile tahe Jesuisi biura-di heka rare taerydỹỹna mahãdu-ò, beratyredile
heka rare.

²⁶ Iu Jesuisile betyredile tamy rarau tahe, tiibohe heka ruberurenyre.
Rirajuarenyre: –Worỹsỹ òsana inydee rareri.

²⁷ Tai tahe Jesuisi rarybere: –Aworeny bitamadỹỹnybenyke. Jiarỹle
watxireri.

²⁸ Tahe Pedro rarybere: –Wanyrỹ, inatyhymy kai atxiteriwana heka
wadee manyarybeke betyre-ki arariakemy.

²⁹ Tahe Jesuisi tamy rarybere: –Manake wahe. Aõwesele tahe Pedro
hãwò-ribi ròhònymy reare, Jesuisi-ò rakemy. Betyre-ki rariare.

³⁰ Yhylemy tahe robure. Tii urile ruberure. Tai ijirahakỹlemy riwisỹnyra
berahatxi-ò. Tai tahe Pedro rarybere: –Biwatakewa Wanyrỹ.

³¹ Tahe Jesuisi rimyre: –Ainatyhynakỹny ibutelemy atxiteri. Aõherekibo
heka tiwatyhynyõteri.

³² Idi hãworo-ò wiwana rorukurenyre. Yhy ruhure.

³³ Ierydỹỹna mahãdu Jesuisimy reàlàre. Inatyhymy heka kai Deuxu
Riòretyhy tate.

³⁴ Tai tahe reuròrenyrene Kenesare bede-ò.

³⁵ Ibutumy iny kowa Jesuisi rieryrenyrene. Ti ibutumy webinadu mahãdu-ò
relyyrenyrene Jesuisimy. Tahe hãwã ikõkõ-ribi ritelenymy didydenyde.

³⁶ Tahe Jesuisi-ò rarybere. Ixinamy watyky-ò rerike, awimy relerenykemy.
Ibutumy tamy rerire heka reytere.

15

¹ Jerusalẽ hãwã-ribi bede ywina bede erydỹỹna mahãduõ dehemynyde Je-
suisi-wana rarybekemy. Tiibohe-wana tule fariseu mahãduõ dehemynyde.
Tiibohe heka Jesuisi-ò rỹỹraxirenyre:

² –Aõherekibo aerydỹỹna mahãdu tebòreny risuhòkõreri roxiko-ki. Iny-
deereny kia bede ywina rare. Aõherekibo rityhynyõreri ihetxiu lahi rybe.

³ Jesuisi rirawyònyre yỹraxina-di: –Aõherekibo kaibohe Deuxu rybe tety-
hynyõteri kaibohe lahirybele tetyhynytenyde.

⁴ Deuxu bede ywina kawesemy rarybere:

–Boo adi-wana ibutumy heka bityhynybenyke. Inyõ rybebina tadi-ò tyby-ò
rarybekeki. Tii tahe ruruke, tuu bede ywina rybe wahe.

⁵ Kaibohe tahe kawesemy tebedeerynytemy tewitxiranyte: Inyõ tadimy
tybymy rarybekeki Wanieru Deuxu-ò wahisidỹỹnamy.

- 6 Tai tahe inieru-ei tyby tadi-wana riwiòhenanyõre kia bede ywina witxira tewinymahãte. Deuxu bede ywina rityhynyõreki.
- 7 Kaiboho itxerenadu mahãdu atxitenyteri. Isaia inatyhymy umy rarybereu:
- 8 –Kia mahãdu wadee rybe-di riwadealànanyrenyre. Wowydyna wadee riwahinymyhÿrenyre. Inatyhymy aõkõ heka kai tarybemahãte. Arayky dori Deuxu-ribi irehemy ratximyhÿre. Teerytyhyõlemy heka atximahãte.
- 9 Iwowydyna heka wadee aõ aõkõ rare. Wabede ywina ribedeerynyõtyhy. Texibedeerynymahãteny abede ywinarenydile.
- 10 Jesuísí rexidelenymy ribedeerynyre: –Boholabeny warybe-ò.
- 11 Brebuna roxina-di biroxibenykeki, aõ adeereny ibinaõtyhy aõ aryrenymy ralòmÿhÿre aõkõ heka ibinare. Ryribi ròhòmÿhÿre heka ibinare, arybe wahe.
- 12 Tai tahe Jesuisi erydÿÿna mahãdu Jesuisiko rarybere: –Fariseu mahãdu kÿny tamy awiõre kia wiji tuu tarybeta wahe.
- 13 Tahe Jesuisi rarybere: –Aõhere aõkõ rare. Timyre aõkõ rare. Ixinamy tuu raryberenyre. Iorutere-di nohõtirenyõmy. Kia fariseu bedeeryna lòbòròna wese rare. Waha ribòrònyõre. Ibutumy waha ribòrònyõre suribi mahãdu ritakre.
- 14 Inatxi hãbu ruetà widee ryò ritÿnynymyhÿre wese. Hãwãry-ribi wiwanale hãloo-txi resekre. Tiiboho ixinamy biribenyke.
- 15 Tahe Pedro Jesuisi-ò rÿÿraxire: –Wakoreny inihe biditynynyke, roxina brebuna ijyy wahe.
- 16 Kaiboho ibutu wese atxitenyteri. Teeryõteny.
- 17 Ibutumy iny aõ rirÿsÿmyhÿre weryri-di ramyhÿre tahe ròhònymyhÿre.
- 18 Tahe inyõ rybebinamy rarybemÿhÿre. Tii iwo ibinare, irayky ibutumy ibinare tai wahe.
- 19 Raykywydyna binahakÿ-ribi heka òtaòtana, rubuna, wasina, ruina ujõmo inyry-ribi ròhònymyhÿre.
- 20 Kia aõmydÿÿnana iny risurisumÿhÿre, inydee ibinare. Tahe roxinako-ki iny tebò risuhòmÿhÿré, kia tahe aõ aõkõ rare, ibina aõkõ rare.
- 21 Iribi tahe kia-ribi ròhònyreu tahe Jesuisi rare irehetytymy Tiro hãwã-ò Sidõ hãwã-ò.
- 22 Kana bede hãwyyõ tamy nade. Tahe tamy rexitòenyre: –Wahĩ, Davi riòkòre, biwaruxetoenyke hewa. Waritxòre heka tykytyby bina-di iwoku-ki ratximyhÿre. Anohòkÿmy heka idi rotÿkÿnymÿhÿre.
- 23 Tahe Jesuisi aõmy rarybeõhyyre tamy. Taerydÿÿna mahãdu tahe rarybere: –Biteònyke hewa. Inyboho dori riixiranyrenyteri.
- 24 Jesuisi tahe rarybere: –Jiarÿ Deuxu riwateònyre judeu mahãduòle, tabudoeni mahãdu iõre mahãdu wese wahe.
- 25 Hãwyy ixityre nade. Tatiowotimy resere. TAhe ixityre tamy rarybere: –Biwawikòhenanyke hewa, Wahĩ.
- 26 Jesuisi rirawyònyre: –Awiòhedÿÿna kia wese rare aõma hãbuõ tariòre-ribi rÿsÿna riwyrta tahe idi rehura ijòròsaòle. Kiawese rarekre, jiarÿ arawiòhenanykeki.
- 27 Hãwyy rarybere: –Inatyhy rare. Kuladu-ribi ano rÿsÿna resemÿhÿre bede-txi, tiki tahe itxòròsa ritxòre idi riwymy reakamy riròmÿhÿre.
- 28 Inatyhymy Jesuisi rirawyònyre: –Kai ainatyhyna sòwere. Adee ariwinykre aõmybo textitòenyteri. Iule iriòre reytemy rare.
- 29 Tahe Jesuisi ròòsere ixityre Kalileia ahohokÿ-ò. Raòwònymy rare hãwãlò-ò. Iratytyre ronyre.

³⁰ Sōwemy heka iny webinadu didyde: itiere mahādu, iruetā mahādu, irybeō mahādu, aō ikōkō heka bina bina wixira wixira idi rare. Jesusiko-ò heka ritidirenyreki ibutumy riteytenyre.

³¹ Iny ruetā rŷira mahādu itxeretyhymy riwinyre. Rarybekōmy rŷira mahādu, rarybemy rŷimyhŷ teysamy. Itiere rŷira mahādu, rariamy rŷimyhŷ. Tai ibutumy iny ribedeōtiidŷŷnyre heka tahe judeu mahādu Deuxu-ò wowy-dyna riwahinyre.

³² Jesuisi rarybere taerydŷŷna mahādu-ò kanakemy. Tahe tamyreny rarybere: —Jiarŷ kŷny rewotōenyreki kainy mahādu rŷireridi. Inataō txumy bederiera waki. Aō heka ihokōre rirŷsŷrenykemy. Iōwedŷŷkōlemy ariteōnykeki heka ijō reseke ryrowetyakile. Rama riatyke.

³³ Tai tahe ierydŷŷna mahādu rarybere: —Inyboho bederahy-ki, titxibo heka rŷsŷna arimykre iny sōwehekŷ-ò ariwahinyrenykremy?

³⁴ Tahe Jesuisi tamyreny ritŷŷraxinyre: —Tiwesebo roxina-di atxitenyteri. Tahe rirawyōnyre: —Debō inatxi reurō orotxu sōmo sōmomy idi watxireri utura deyre ijō rare.

³⁵ Jesuisi rarybere ibutumy iny ronykemy.

³⁶ Tahe tŷi rexitōenyre Deuxumy reālāre. Orotxu, utura-wana riereerenyre tahe taerydŷŷna mahādu-ò riwahinyre idi rakremy.

³⁷ Ibutumy riroxire heka kia iny sōwehekŷ ta rihydyre. Tabyre rahudi tahe riarire ierydŷŷna mahādu. Tai tahe rahure tŷxihikŷlemy. Debō inatxi reurō weririmy heka ritŷxinyrenyre.

³⁸ Tahe 4000 hābumy riōwenyre, kia txuu wahe. Uladu, hāwyy-di rariaōhyre.

³⁹ TAhe Jesuisi iny-ò rarybere tasŷ-ò ròðsekemy ixby. Iribi tahe Jesuisi hāwō-di reurōmy rare Magadā hāwā-ò.

16

¹ Fariseu mahādu saduseu mahādu nade Jesuisi-ò iurihixidŷŷmy riitxenanyrenykemy: —Aōbedeerydŷŷnabo heka biu-ki iribi rexitōenyre. Biwateōsinyke heka aōwiwihikŷ-dŷi biu-ò jiarŷboho arieyrenykre, kai inatyhy tate wahe.

² Idi tahe Jesuisi rarybere: —Kaiboho heka awirenyre biuwetyky ersy-ki. Jesuisi rarybere: —Kia rybe tarybemahāte. Txiorotxumy heka biuwetyky isòhòkŷra-ki, biurasōmy tahe awimy txu kedekre.

³ Biurasou ibede lyby lybomy txu-di kedekreki tahe biu ròahyyhy bedetxu rariakre. Myhe tarybemahāte. Kaiboho heka iwixira aōhebo rotŷŷnykre heka teerytenykōlemahātenyte.

⁴ Iny kamahādu heka ibutumy ibina binare. Tiu heka rityhynyōhyymyhŷrenyre. Rexitōenymyhŷrenyre heka biu-ò rityhynykemy. Tahe riwahinyōtyhy heka aōma bedeerynaō. Kia Jonasi-ò bedeeryna rareōle tahe tamy rakre heka. Tahe Jesuisi rexitamy rare iribireny.

⁵ Idi tahe aho weribijā-ò reurōrenyre tahe, tōhōtirenre rosare tarŷsŷnarenre-ribi.

⁶ Jesuisi tamy rarybere: —Fariseu mahādu, saduseu mahādu iurina-ò bexiebenyke.

⁷ Ierydŷŷna mahādu tahe widee rarybere: —Tii kia rarybere iny orotxu diwyōdeki.

⁸ Jesuisi roholare aōmybo raryberenyre tahe tamyreny rarybere: —Aityhynarenre urihimyre. Aōherekibo orotxumy jiarŷ rarybererimy tahōtinytenyte?

⁹ Tiu kaiboho bierybenyõtyhy. Iruyre orotxumy remyre. Idi 5000 hãbumy reòwenyre. Ihãre tahe weriri txỹxi tỹxihikỹlemy rỹimyhỹre rauhenyre. Itxi aõbo õhõtireny reakõmyhỹre.

¹⁰ Ixityreu tasỹ 4000my reòwenyre, debò inatxi reurò orotxu-di. Ixiyrubule rauhenyre.

¹¹ Jiarỹ orotxumy rarybeõre. Fariseu mahãdu, saduseu mahãdu urina-ribi bexiebenyke.

¹² Tai ierydỹỹna mahãdu rieryrenyre aõmybo rarybemyhỹmy Jesuisi heka fariseu saduseu bedeerydỹỹnamy rarybereri.

¹³ Idi tahe Sesaria Filipi hãwã iòhòmy rehemynyre. Jesuisi rỹỹraxire taerydỹỹna mahãdu-ò: –Iny wamy rarybereri. Mobo heka jiarỹ raremy heka wadi rỹireri. Jiarỹ Hãbutyhyhykỹ rare, Deuxu Riòre wahe.

¹⁴ Ijõ kỹny rarybemy rỹireri: –Kai riki heka Joaõ Sebedỹỹdu atxiteri. Ijõ riki Elia atxiterimy adi rỹireri. Ijõ tahe Jeremiamy adi rỹireri. Ijõ heka Deuxu rybeduõ riki heka atxiterimy adi rỹireri.

¹⁵ Tai tahe Jesuisi rỹỹraxire taerydỹỹna mahãdu-ò: –Mowexe watxirerimy wexe wadi tahõtintenyteri.

¹⁶ Simaõ Pedro heka rarybere: –Kai Kristu atxiteri Deuxu deòdỹỹna heka tate. Kai heka Deuxu Riòre tate.

¹⁷⁻¹⁸ Tahe Jesuisi rirawyònyre Pedro-ò: –Inatyhymy Pedro tate, Waha, biu-ki Mana ani rare. Boholake, ratximyhỹrele kia adee riteòsinyre. Iny aõkõ kia adee riteòsinyre. Wadohodỹỹna mahãdu kia mana tyre-ò ariwinykre. Rubu dori heka tiu ituedeõna.

¹⁹ Waiòlòna rayna heka adee ariwahinykre. Kabede-ki aõwidỹỹ adee binakeki tule biu-ki ariijõnykre. Aõtixiletibo aõwidỹỹmy burukre tasỹ biu-ki tule adee ariwinykre.

²⁰ Jiarỹ inatyhymy Deuxu deòdỹỹna rare. Tuu ijyyrenyõmyke.

²¹ Iribi tahe Jesuisi itỹny relyymy taerydỹỹna mahãdu-ò. Rurukremy heka relyyre: –Arakre heka Jerusalẽ-ò. Tai heka matuari mahãdu, õnosõna bederyna mahãdu, xiwena wahidỹỹdu mahãdu-wana riwarubunykre. Inataõ txu-di tahe ixyby rubu-ribi adexiakre.

²² Idi tahe Pedro heka Jesuisi ridyre ijõ erydỹỹna-ribi tahe tamy rarybere: –Aõkõre, Wanyrỹ, tiu heka tiiboho ararubunyrenyõtyhy.

²³ Tahe Jesuisi rarybere Pedro-ò: –Waribi bexihitxinyke. Kai heka Satanasi weselemy atximahãte. Iwese kai taraykynmahãte heka aõ Deuxu deewinamy aõkõ tuu tahõtynmahãte hãbudeewile rare.

²⁴ Idi tahe Jesuisi rarybere taerydỹỹna mahãdu-ò: –Inyõ wawanany rurukeki, ixi-ribi heka tõhõtí rosake. Nomy rurukeki heka taitxeò rimyke idi tahe wahemy kanake.

²⁵ Inyõ wahemy rariakemy ixi-di rõhõtinyhyke wana heka irumy inonana irehemy ixi-di ratxikeki heka tii ihãrele ruruke. Inyõ taumy riõnonykeki waòraru-ki tai tahe tii ròtake.

²⁶ Inyõ heka ibutumy aõna aõna bedeki ributunyekeki. Tahe ihãrele heka tii ruruke. Tule umytuedeõna riõnonyre. Aõ tarasana tamy aõ aõkõ rare. Iny iruna riòwynyõhyymyhỹre, ixiyby tamy kanake wahe.

²⁷ Jiarỹ, Deuxu Riòre, Hãbutyhyhykỹ dori kanakre wana aõwesele. Taỹju loosõna-ki tii kanake.

Iny ibutumy ariòwynykre bibutunymy aõbo iny riwinymyhỹré heka aõwiwihikỹ aõbina bina.

²⁸ Iu jiarỹ, Deuxu Riòre, Hãbutyhyhykỹ, kanakeu tahe inyõ kaibohoõ tuu robikre, Iòlòmý kanakreu.

17

¹ Reare heka debò sohoji reurò txумы. Tahe Jesuisi ridyre Pedro, Txiau, Joaõ-wana. Joaõ tahe Txiau seriòre rare. Tahe raòwònyre tiiboho-wana hãwãlò ratòhòkỹ ratyy-ò. Inyõ heka tii wana raõhyre.

² Ikoreny-ki tahe Jesuisi rexiwitziranyre. Iòsana heka roosòre. Txuwe-sehekỹle relere iòsana heka ratỹrỹrỹnyre. Ityky tasỹ rauranyhỹkỹre. Tahe roosòna itoosònadihikỹre.

³ Iu tahe tuu robire Moisesi rubu, Elia rubu, Jesuisi-wana widee rarybemỹhỹreny.

⁴ Tahe Pedro tamy rarybere: –Awire, Wanyrỹ, kawese watzirenyreri kaki. Adee wikeki hetomy ariwinyrenykre ijõ adeekre, ijõ ta Moisesiòkre, ijõ Eliaòkre.

⁵ Iu Pedro rarybereriule tahe biuwetyky urahakỹ relere. Iyribile rybeõ narybede: –Kia heka Wariòre waluu heka rare. Boholabeny irybe-ò.

⁶ Idi tahe ierydỹỹna tamy roholareu, tahe ruberure. Tahe reserenyire iòsanareny bede-ò.

⁷ Jesuisi tamyreny nade: –Breburenyõmyke hewa bodorukubedenyke heka.

⁸ Reteherenyre tahe Jesuisi sohojile tai rỹire.

⁹ Iribi tahe dibernydenyde hãwãlò ratyy-ribi, Jesuisi narybede: –Uritere waijyyõmyke inyko wiji tuu tabitimy. Iu jiarỹ, Deuxu Riòre Hãbutyhyhykỹ, rubu-ribi riixixanykreu tahe tuu belyykre.

¹⁰ Tahe ierydỹỹna mahãdu Jesuisi-ò rỹỹraxire: –Aõherekibo tarybetenyteri –Elia juhUU kanakemy ako-ò juhUU kanakemy.

¹¹ Jesuisi rirawyònyre: –Inatyhy rare tii juhUU kanakre. Ibutumy heka bede riywinykre.

¹² Tule ararybekre kiamy: –Elia nade tahe ihãrele heka iny rieryõhyre. Aõhòkỹmy risỹnyre. Iwese Elia aõhòkỹmy risỹnyre wesele tahe Deuxu Riòre Hãbu heka aõhòkỹmy risynykre, jiarỹ wahe.

¹³ Tai tahe Jesuisi erydỹỹna mahãdu rieryrenyire aõmybo Eliamy tii raryberemy Joaõ Sebedỹỹdule tahe Jesuisi rarybere.

¹⁴ Iribi tahe dòòsedenyde iny sòwemy riraõmy rỹimyhỹre. Hãbu-ò nade Jesuisiko-ò tatiowomy resere:

¹⁵ –Wanyrỹ, ruxetòena wariòre-di biwahinyke. Irayky awimy aõkõ ratximyhỹre. Bera-txi resemyhỹre. Heòtyru-txi resemyhỹre. Ibutumy aõna aõna riwinyrerimy ihỹre.

¹⁶ Aerydỹỹna mahãdu-ò heka adidyde tahe tiu riteytenyõtyhy.

¹⁷ Jesuisi rirawyònyre tamyreny: –Kaiboho isira mahãdu atxitenyteri. Aõ heka inatyhyna heka akireny ijòkõre. Tiwese bede dỹỹnana bohe araòludunyrenykre. Bedese inihe bididy uladu wadee.

¹⁸ Tahe Jesuisi rarybere kia uladuwo-ki ratximyhỹò: –Iribi wa bohonyke! Tahe uladu reytemy reare.

¹⁹ Idi ierydỹỹna mahãdu Jesuisiòle rarybere: –Aõherekibohe jiarỹboho tyytybybina iribi reteònykõreri?

²⁰ Aõmareki kiehe ainatyhyna ibutetyhyreki òwòruty sòmowesele ainatyhyna dikeki heka kai aõwiwihikỹ biwinyke. Kai hãwãlò-ò marybeke: –Iribi bexitake! Tai tahe hãwãlò rexitake iwitxira suò. Aõ aõkõ adee isirake, ainatyhyna direki wahe.

²¹ Kia tyytyby bina iwitxira rare. Isiratyhyre heka. Kaiboho bexitòenybenykeki, binarehebenykeki, ixiery tyytybybina biteònybenyke.

²²⁻²³ Kalileia bede-ki Jesuisi taerydỹỹna mahãdu-wana ributunyre. Tai Jesuisi rarybere tamy: –Jiarỹ, Deuxu Riòre Hãbu, rare. Tai inyõ riwahinykre

hãubinaõ-ò warubudỹmy. Inataõ txu-di tahe rubu-ribi adexixakre. Tai tahe ierydỹna mahãdu rabadewo nihikỹre.

²⁴ Iu tiiboho heka Kafanaõ hãwã-ò ritehemynyreu, inyõ Pedro-ò nade. Tii dohodỹna òwy butudỹdu rare. Tahe rarybere: –Awedu aõbohe tii rexiòwynykekõ.

²⁵ Pedro rirawyònyre: –Tii riòwynymyhỹre. Tai tahe Pedro rakemy reare. Iu Pedro tuu Jesuisi-ò rarybekemy hetowo-ò raloreu, Jesuisi juhuu rarybere: –Moribibo iòlò rexitòenymyhỹre òwydỹnamy. Mynydu mahãdu-ribi aõbo ada ta taijoiribile aõbohe rotamyhỹre.

²⁶ Pedro tahe rirawyònyre: –Mynydu mahãduòle rexitòenymyhỹre. – Inatyhy rare, Jesuisi rarybere. Iijoi mahãdu òsana riòwynyõhykymyhỹre. Jesuisi rarybere: –Ihãre tahe ròkòòwydỹkre.

²⁷ Òbitimy rakaòwònyrenykre. Kia Templo heto òwmy. Ibinamy kia iny-ò ariwinyòtyhy. Kai heka makre ahohokỹ-ò awaxi-di behukre. Juhu utura kanakrele heka bidimykre. Idi iry biraynykre. Tai nieruõ-ki mahake. Iribi biditamy tahe makre iny òwydỹmy.

18

¹ Iule tahe Jesuisi erydỹna mahãdu tamy rehemynyre rỹraxire: –Mobohe Deuxu Iòlòna-ki nihikỹmy rarekre.

² Jesuisi heka ratximyhỹ uladuõ ibire-ki.

³ Idi tamy rarybere: –Kai uladu weseleõmy mabeõkeki, Deuxu Iòlòna-ò malòbenyòtyhy

⁴ Uladu wese maraykynybenykeki heka, tii tahe Deuxu Iòlòna-ki inatyhymy rỹirakre.

⁵ Kai waòraru-ki uladu kawesemy biwiòhenanykeki tiwawiòhenanymahãte

⁶ Kai uladuõ òraruna-txi resekemy risỹnykeki, kai abinatyhymy atximahãte. Inyõ òy ritakamy reroti-di aratakemy heka inyõ adi rehuke bera-txi. Tii tahe awityhyre adee.

⁷ Sõwemy heka aõna aõna rỹira wary-ribi iny riatykemy. Tii adee ibinatyhyre. Tiiemy heka tuhy rarekre. Inydee heka ibinakre heka. Wary-ribi riòlòdỹnymyhỹre heka tamy ibinakre.

⁸ Ebò òraru-ki tahe wainatyhyry-ribi bexitakeki, ebò biòròmy idi behuke. Awityhyre heka adee Deuxu Iòlòna-ò malòkre sohoji ebòdile. Inatxi ebò-di heòty bedebina-ò malòkeki, awiõre heka.

⁹ Tule arue sohoji òraru-ki kia òrarunamy beseke lau, urile bitake idi behuke. Arue wiò-di heòty bedebina-ò malòheny arue-di wiòle. Biu bedewihikỹ-ò malòke tahe awire heka arueyremy.

¹⁰ Iny nihikỹ ityhy iny yja mahãdu heka tuuõre. Uritere heka iweserenyõmy atxibenyke kaiboho bexiijebenyke tamy. Iny aõkõ mahãdu dori tii iỹju dire heka. Iỹjurenny heka Deuxuko tii ibutumy relyymyhỹre turenny. Idi õhõtirenny-ribi bosabenyõke.

¹¹ Jiarỹ Hãbutyhyhykỹ rare, Deuxu Riòre wahe. Ityhydỹdukõdu mahãdu ibutumy aritakemy anade.

¹² Rakawesenanykre heka kaijyy wesemy. Rakarybekre heka kahãbu 100 budoeni ijõdire wesemy. Sohoji heka iõre iy-ribi. Kia hãbu idi itxeredu tahe iy-ribi iõre rakre ijesemy. Iuhe tahe hãwãlò-ki riroximy ririre.

¹³ Tai rahakre wana heka teysamy ratxikre. Kia sohoji òrarukile reysakre.

¹⁴ Iwesetyhylemy taheka inyõ iõòtyhy Waha-ribi. Tamy dori kia ibinare.

¹⁵ Inyõ adee rexiòrarunykeki tahe tamy makre rybemy. Uritere inywitxi-rako-txi rybeõmy tuu. Tahe tamyhyylemy marybeke. Aityhydỹdu seriòre

heka arybe-ò roholakeki, tahe ixi-txi tōhōti reake wana, ixi dee ibinamy rōhōtinyra wana, tai tahe kai ixyby tii-wana ityhydỹdu seriòre biòwamy beleke.

¹⁶ Aōhe wana tahe arybe-ò roholaōhykre, tahe ixityre make inyō wana rexibiòwanymy.

Iny inatximy ixihe-ki bidyke. Tii tahe arybe-ò ijohonaduke inatyhy raremy arybera-txi resekemy wahe. Iu dohodỹna-ki rarybekreu, tai tasỹ tii rarybeke teòsamy aōkō ratximyhỹrelemy rarybeke.

¹⁷ Tii irybereny-ò roholaōkeki, tai tahe dohodỹna mahādu-ò belyyke. Tii irybereny-ò roholaōkeki, tai tahe biteònyke. Tii iwese òrarudu mahādu heka adee rarekre, bede dinodu-ò nieru wydydu wese wahe.

¹⁸ Iwese kaiboho waityhydỹdu mahādu kabede-ki rōhōtinyre wesele, tule araykywesetyhyle Deuxu biu-ki rōhōtinykre. Aōbo adee kabede-ki aōwidỹ ibinare ada awire heka tule biu-ki ibinamy rarekre, awimy rarekre. Arybe riwitxiranyōtyhy kowa biu bede-ki.

¹⁹ Iwitxiraōmy adeereny ararybekre: —Ijō titxibo inatxi ada inataō ityhydỹdu seriòre wiweselemy raraykynykre. Waha-ò rexitòenymyhỹreki iwese rexitòenyre wesele heka tamy riwinykre biu-ki.

²⁰ Titxibo waniòraru-ki inatxi, inataō wii ributunykre heka, jiarỹ taile watxireri.

²¹ Tahe Pedro rỹraxire Jesuisi-ò: —Bede erydỹdu! Waityhydỹdu seriòre heka wadee rexiòrarunyekeki, tiwesebo sōwe ariixāwididỹnykre ixi-ribi debò inatxi reurò, my aōbo?

²² Jesuisi rirawyònyre: —Aōkōre, debòinatximy aōkōre, 490 wesemy wahe. Ixityre ixityre biixāwidỹnykre.

²³ Deuxu Iòlòna kawesemy rare: —Iòlò heka teòdu mahādu kia contamy robikemy idi ratxireri. Tiwesebo inieru-di rasiranyre wesemy wahe.

²⁴ Sohoji teòdu juhū dehemynyde. Sōwemy heka tevedỹna ratximyhỹre, 1000,000 womati tỹrỹrỹhỹkỹ nieru wahe.

²⁵ Inieruōre heka iòwydỹna wahe. Idi rohonykemy heka iwedu riteònyre deòdu mahādu wesemy. Tariòre-wana tahāwyy-wana ibutumy deòdumy roirekemy. Aōbo tai rỹimyhỹ heka ibutumy idi rohonyre.

²⁶ Tai kia deòdu heka tatiowotimy resere kia iòlòko-txi: —Waiòlòreny, txioinihe biwaraòkre ariòwynykre ibutumy.

²⁷ Tai tahe iòlò riwotòenyre aōma ixinahykylemy ritusanyre.

²⁸ Tai tahe kia hābu he rare kia urihimyo tamy radevenymyhỹò heka rexinohōtidỹnyre. Tai tahe hābu lòtikile rimyre. Rierenymy resere ribòtòrarytxynyre: —Bidiwaòwynykre kỹnyhe wijityhyle.

²⁹ Tai tahe tatiowomy resere, rarybere: —Txiokre inihe ariòwynykre ibutulemy.

³⁰ Tai tahe rirutyre ròtenawo-ò idi riòtenyre. Riwotòenyreōhyyre.

³¹ Itxeredu mahādu heka rabadewore tai tahe ibutumy relyyre iòlòko.

³² Tai tahe ixityre tamy rarariòwyre tamy rarybere: —Aōherewe, deòdu binahakỹ, jiarỹ araixāwididỹnyre ibutumy inatyhy? Kai dori ixitòedỹna wadee tewinyta.

³³ Aōherekibohe aleina kia adee nadevenymyhỹde kia teixāwidinyōta, iwese jiarỹ araixāwidinyre wese.

³⁴ Tai tahe tii rimyre reburere itere iòlò, tai imynymy riteònyre rotenawo-ò riòwynykre xiery riòlòdỹnykremy. Tai aōhōkỹmy rotỹnyymyhỹre.

³⁵ Jesuisi rexihura narybede: –Kiawesele heka adeereny rarekre. Ity-hydÿÿdu seriòre taseriòre riixãwidinyòkeki heka iwesele heka waha adi ri-wisÿnykre.

19

¹ Jesuisi ibedeerydÿÿna-ribi rexihureu, Kalileia bede-ribi ròhònyre. Bero Jordaõ weribiijà-ò reurore, Judeia hãwã bede kanawe-ribi ijà-ò rehemynyre.

² Tai tahe sòwemy iny webinadu mahãdu rÿire. Idi tahe ihemy rare. Ibutumy riteytenyre.

³ Fariseu mahãdu imynomy idi riwisÿnymyhÿre aõbinamy rarybekeki rimykemy. Tai tahe tamy dÿÿraximy namyhÿde aõsirahakÿmybo: –Iny bede ywinareny tahãwyy riteònymyhÿre urirybelemy, wiribi resekemy.

⁴ Jesuisi dirawyònyde: –Ritidÿÿnamy aõbo tariaõmyhÿte idi? –Deuxu ibutu widÿÿdu heka juhUU hãbu hãwyy-wana riwinyre.

⁵ Idi tahe rarybere:

–Hãbu heka tybyboho-wana tadiboho-wana wiribi rexihitxinymyhÿre tai tahe tahãwyywanale wii ributunomy rÿira.

⁶ Inatxi heka sohoji weselemy rarekre, hãbu tahãwyy-wana. Deuxu heka hãbu tahãwyy-wana ributunyre, inyò heka tiu rihitxinyòtyhy.

⁷ Tahe ijòmy fariseu mahãdu rityÿraxinyre: –Aõherekibo Moisesi kawesemy juhUU rarybere:

–Hãbu tahãwyy riteònykeki juhUU urile tyyriti tamy riwahinyke riteònykekoki.

⁸ Tahe Jesuisi kawesemy rarybere: –Kaiboho heka ieryna urihimyoòlereki aõ isirareki heka kia riwinyre. JuhUU tahe kawese aõkò rÿire.

⁹ Aõmale tahe ixinamy riteònyke ixi-ribi òta òtadule heka aõwaxiny tuu riteònyre ixi-ribi.

¹⁰ Tai tahe ierydÿÿna mahãdu rarybere Jesuisi-ò: –Tahe kiawesekeki heka uritere heriòmy hãwyyòmy, hãbuòmy.

¹¹ Jesuisi tahe dirawyònyde: –Kaa bede eryna heka aõ ibutuhukÿ-ò aõkò tureri aõma Deuxu bede eryna tamy riwahinymyhÿreòle heka tureri.

¹² Aõtxi-ki tahe tuu hãbuò rÿira hãwyyomy heridumy aõkò rÿira. Ijò hãbuò tahe tiemy tunodumy rÿirerimy ihÿre. Iwixira hãbu-ò rexiwahinomy rÿireriki heka tuu rÿirerimy ihÿre. Ijò tahe tuu rÿirerimy ihÿre aõma Deuxu aõmysÿdÿÿna òraru-ki wahe. Kaa rybe tahe inyò tahe rityhynykeki tii inatyhymy rityhynyke.

¹³ Inyò didyde uladuò Jesuisi-ò tamy rexitòenykemy tebò iraty tyre-ki roirerilemy. Ierydÿÿna mahãdu tahe uritere iixiradÿÿòmyke.

¹⁴ Tahe Jesuisi rarybere: –Ixinamy kanamyhÿke uladu wadee. Uritere itinysÿrenyòmy. Uladu wesemy dori Deuxu Iòlòna ròtedu mahãdu ratx-imyhÿre.

¹⁵ Jesuisi tahe iratytyre tebò ritidire tamy rexitòenyre. Idi tahe Jesuisi rare.

¹⁶ Aõu tahe hãbuò Jesuisi-ò nade: –Erydÿÿdu, aõhebo arotÿÿnykre. Aõma, timykibo umytuedeõna aritakemy wahe. Aõwidÿÿ wiwihikÿbo ariwinykemy.

¹⁷ Jesuisi rarybere: –Aõherekibo wadee aõwiwihikÿmy widÿÿ tÿÿraxiteri? Iny sohojile awi rare, Deuxule wahe. Kai bede ywina ibutumy bityhynyke, umytuedeõna hakÿ-ò molokre.

¹⁸ Aõbedeywinabo arityhynykre? Tahe Jesuisi rirawyònyre:

–Rubudÿÿòmy, Òta òta widÿÿòmy, wasiòmy, ruiòmy,

¹⁹ Adi boo-wana bityhynyke, iwese ixiluure wese heka abireludu mahãdu luuke.

²⁰ Hãbu rarybere: –Kia heka aõu aõu jiarÿ retyhynyre. Aõijòmybo arotÿÿnykre?

21 Jesuisi rirawyònyre: —Kai òbitimy mabekekile aõmydÿÿna-di ibutumy. Kia idi bohonyke òwy tahe biwahinyke urimynodu mahãdu-ò. Tai sòwemy aõna aõna biu-ki ahòròmykre. Iribi tahe biwaheludunyke.

22 Iu hãbu kia roholareu tahe rabedewonihikÿre inieru sòwerekì heka rabede-wore.

23 Tai tahe Jesuisi taerydÿÿna mahãdu ribedeerynyre: —Isiratyhyre heka biu bede-ò ralòke aõma ityhy nihikÿkeki.

24 Isirare heka aõma kamelo tyy rurena òtummy ralòke heka isirare, inatyhy? Tai tahe aõma ityhy mahãdu ralòke tarasanamy reake heka isirare.

25 Jesuisi erydÿÿna mahãdu ribedeòtiinyre kai-ò roholareu. Tai tahe ròhòtinyre: —Aòkòre isiratyhyre tuu ròte. Inyò tarasanamy reaòtyhy.

26 Jesuisi tamyreny retehere tahe rarybere: —Inatyhy rare hãbu-ò isirare. Deuxu dee tahe isiraòle rare.

27 Tai tahe Pedro rarybere: —Jiarÿboho ibutumy aõmydÿÿnareny adiri-denyde. Araheludunymy watxiwãhãre. Aõma ritarenykre?

28 Jesuisi tahe dirawyònyde: —Kiamy heka adee ararybekre. Jiarÿ Deuxu Riòre Hãbu tyhyhykÿ wahe. Kaiboho heka tule borukubenyke aiòlònaryna-ki iu ibutumy ratÿmyrakre. Kaiboho iny sohoji sohojimy judeu ijoiò biy-wisidÿÿnanybenykre, waijoi waòinatxi reurò mahãduò wahe.

29 Inyò kia ibutumy aõbo waòraru-ki ririmyhÿre iwese taheto ririmyhÿre waòraru-ki, taseriòre, tadi, tyby, uladu, taoworu, ririmyhÿre. Kia sohoji sohoji-ribi heka aõ sohoji sohoji òwomy 100 ritakre. Tule umytuedeòna ijòmy ritakre.

30 Inyò nihikÿmy ityhymy ratxirerimy ihÿre, tii iyjalemy relekre, aõma aòkò tai relekre. Tule iyja nihikÿmy relekre. Sòwemy urimynodu kaki rÿirerimy ihÿre tahe biu-ki inihikÿmy rarekre.

20

1 Jesuisi tasÿ riteòsinyreri ijyyò timyrebo Deuxu Iòlòna. Hãbu aõmysÿdÿÿdu heka oworu widÿÿmy heka riteranymy tamy rarybemyhÿre:

2 —Aõmamy araòwynykre, sohoji prata womati nieru, iwese ibutumy raòwynymyhÿre wese, sohoji txuòwy wahe. Tai tahe tii raaõmysÿdÿÿre uva oworu-di raaõmysÿdÿÿmyhÿ.

3-4 Idi tahe tii reare 9 horau tule, txutyeyu tule, titxibo iaõmysÿdÿÿna rÿireri titxibo hãbu teaõmysÿdÿÿmyhÿò. Tahe tuu robire urile ratximyhÿmyhe idi rethemyhÿ. Tai tahe tamy rarybere: —Maaõmysÿdÿÿke hewa, waoworu-ki. Ikonana txu heka òbitihyky araòwynykemy adi watxireri.

5 Tiiboho raaõmysÿdÿÿre tule. Txutyeyu tasÿ ixiryubule ijò riteranyre aõma iwese kia juhoo ijò-ò rarybera wesele.

6 Txuinyòbira-ò ijò rimyre, tule ijò txiorotxure.

7 Iruyre hora-ò ijò tasÿ riteònyre.

8 Tahe txiorotxummy ròhònyra tahe kia iòwydÿÿdu tamy rryre.

9 Tahe 1 womati nieru tamy riwahinyre, sohoji hora raaõmysÿdÿÿre mahãdu wahe.

10 Tahe txusohojimy raaõmysÿdÿÿre tahe iratyre ròtakremy ixi-di ròhòtinyre. Tahe tule riòwynyra iwese ijò riòwynyra weselemy, 1 womati nieru, sohoji sohoji wahe.

11 Tai tahe rimyre nieru urile tamy rexibinanymy rarybere:

12 —Kowa heka sohoji horale raaõmysÿdÿÿhãrele heka 1 teòwynyta. Jiarÿ boho tahe txuhy raaõmysÿdÿÿra, bede tòtee-ki wahe.

13 Tahe iwedu rarybere: —Wabiòwa, adeereny rarybera. Wiji 1 womati nieru ariwahinykremy heka inatyhy? Tuheka adeereny rewahinyre. Aribi rawasinyora.

14 Boibenykre heka ibutumy araòwynyneri. Wiwesetyhylemy heka araòwynyrenyneri, iwese rarybere wese.

15 Hora sohojilemy raaòmÿsÿdÿÿraò sohojimy wanieru ariòwynykre inatyhy. Tamy wanieru ariwahinykemy ixideewimy, aòhe inatyhy? Aòherekibo tebureteri? Jiarÿ urihimyo raaòmÿsÿdÿÿraò wawiremy tarybetenyteri wahe.

16 Jesuisi tahe rexihure kia rybe-di, kiamykre bede: —Ikoludu heka ihe-woludu-ò resekre. Ihewoludu tasÿ iko-ò resekre.

17 Tai tahe Jesuisi ròwònyre Jerusalë hãwã-ò. Iny-ribi tawaò inatxi reurò mahãdu rihitxinyre. Tamy relyyre timybo aòhebo rotÿÿnykremy Jerusalë hãwã-ki:

18 —Jiarÿ, Hãbutyhyhykÿ adee ararybekre: —Inyò riwawahinykre aòma-ò Xiwena wahidÿÿdu wedu mahãdu-ò. Tule diwatyhenykre judeu wedu mahãdu-ò. Tahe riwarubunykeny heka tiiboho wamy rarybekre ijò iny-ò.

19 Tii heka riwamykre tahe riwawahinykre Roma iòlò-ò, judeukòdu mahãdu iòlò wahe. Ibinatyhymy aòhebo riwasÿnymy riwahetenyre. Itxeò nihikÿ-ò riwamatadÿÿnykre. Tahe txu inataò-di rubu-ribi areixixanykre.

20 Zebedeu riòrese Jesuisi-ò nade. Tatiowotimy resere tahe rexitòenyre aòmybo Jesuisi-ò tariòre-wana nade.

21 Jesuisi tamy rarybere: —Aòbo rare hãwyy rarybere: —Waritxòre inatxi hãbu rare. Tikiboho kÿnyhe, aikòlònykuna rynana-ki ronykre awana. Ijò aruruna-txi, ijò ahywe-txi wahe, kai aikòlòkuna-kò malokreku wahe.

22 Jesuisi heka iriòre-ò rarybere: —Kaiboho aòmybo textitòenyteri teerykòleteru. Kai Txiau, kai Joaò, teerytenyete aòbo aòhebo wadi rotÿÿnykre arurukre dori jiarÿ kaiboho tulekre? Tiiboho dirawyònyde: —Tulekre.

23 Tahe Jesuisi rarybere: —Inatyhy rare kaiboho tule aòhòkÿmy botÿÿnybenykre. Tahe mobo warora-txi ada waruruna weribi rynana-txi ronykre. Jiarÿ reerykòre. Wahale heka rieryre. Tiile tamy riywinyre.

24 Idi tahe debòwiò ierydÿÿna mahãdu kia rieryre aòmybo Txiaaku Joaòboho rexitòenyrenyrá. Tai tahe tiiboho rakyarananyrenyre.

25 Tahe Jesuisi ibutumy taerydÿÿna mahãdu tamy kanakemy rarybere: —Iny iòlò iruru dire. Ibutumy dinodu tahe kia weselere —taijoi mahãdu riteònymyhÿre. Teòdu mahãdu riteònymyhÿre.

26 Tahe aò tuukre aòkò heka rare ayreny-ki. Inyò dinodumy ixidikre heka deòdumy rarekre.

27 Kia iny nihikÿmy ixi-di rexinohòtynyneri tasÿ aò aòkò tii rarekre.

28 Iwese jiarÿ riwinyre wesemy heka rarekre. Hãbutyhyhykÿ aò dinodumy aòkò anade. Iwese deòdu rÿira wesemy heka nade waumy riwahinykremy rubu-ò kabede-ki. Tai sòwemy iny ritakre.

29 Iu Ijeriò hãwã-ribi ròirenyreu, tahe sòwemy iny riheludunyre.

30 Inatxi iruetàmÿ heka rononymhÿ iu Jesuisi ibire-di rareu. Tiiboho roho-larenyre kia Jesuisi raremy. Rexitòenyre ryryre Jesuisi-ò: —Davi riokore, wadee hewa ruxetòena biwahinyke.

31 Tai tahe iòhòmÿ iny iribi rÿimyhÿ rarybere: —Txiokre inihe, biyryke! Ixityre ryryre tarurutyhy: —Inynyrÿ Davi riokore, Biwawotòenyke hewa.

32 Jesuisi tamy rarybere: —Aòwexe adeereny ariwinykre.

33 —Wanyrÿ, Kai wa bidiwaruenykre warue biraynykremy.

³⁴ Tahe Jesuisi riwotònyre iruebymy reare tebò-di. Aõwesele tahe ruòmý reare. Tai tahe Jesuisihe riheludunyre.

21

¹ Jesuisiboho tahe rehemynyrenyre Jerusalē hāwā iòhòmý. Betabaji hāwā-ò heka rehemynyre. Kia Oliveira hāwālò-ribi irehemy aõkõ ihỹre. Tahe Jesuisi inatxi iny riteònyre hāwā-ò, taerydỹna mahādu wahe. Tamy rarybere:

² –Juhu hāwā dele-ò malokreule aõma bobikre, jumenta tariòre-wana. Tahe bitaanalawekre ta bididykre kaò.

³ Inyõ aratyỹraxykre wana, tai tahe kiamy bisỹnykre aõma: –Wawedu hewa idi ratxikemy rõhõtynyre. Tai ki tahe ahemy kiditeònykre.

⁴ Kia ihetxiu ritidỹna tuheka relemý roimyhỹre. Kamy rarybere:

⁵ –Marybeke heka Jerusalē hāwā-ò:

–Deuxu Iòlòna heka kanakre adeereny wahe. Tii inihikỹ wesemy aõkõ kedehemynymy, jumenta tyre-ki heka kedehemynykre.

⁶ Tahe ierydỹna mahādu riwinyre iwese Jesuisi rarybere weselemý.

⁷ Didyde tahe jumenta tariòre-wana. Ihetyreny jumenta tyre ritidire. Jesuisi ityre ronyre tahe idi rare.

⁸ Tahe inyõ sõwemy-ribi tahetyreny-di rehumyhỹre iryko-txi idi rariakemy ityre-di. Ijõ tasỹ hereru-di iryko-txi rehure iryube hetymy ityre-di rariakemy.

⁹ Sõwemy tai iny rirajuamy rỹimyhỹ iko-ò, ihewo-ò:

–Iòlò Davi riokore heka sõwemy iny wowydyna tamy iny riwahinyreri. Tii Deuxu Riòre Hābu rare. Deuxu deysana heka tamy biwahinyke!

¹⁰ Jesuisi hāwāy-ki rehemynyreu, ibutumy iny ribedeòtiidỹnyre: –Mohābuwe kia ralòreri Jerusalē hāwā-ki wahe?

¹¹ Tai tahe iny mahādu rarybere: –Aõkõre, kia Deuxu rybeduõ rare. Jesuisi inire Kalileia bederibi Nazare hāwā-ribi dehemynyde.

¹² Tahe ralore Deuxu dohodỹna heto-ò. Tai kia aõna aõna-di rohonyreri heka riteònyre. Kia aõma nieru wiuròna iòwòruwebese tahe riatyre. Kia aõma bòtòe dohodỹdu ryna ibutumy ritxiwire riatyre.

¹³ Tahe Jesuisi rarybere: –Deuxu Tyyriti rarybere:

–Dohodỹna heto heka waha heto rare, ixitòedỹna heto rare.

–Kaiboho heka inywasidu mahādu-di tetỹxinytenyta.

¹⁴ Sõwemy iny itiere, iruetà, nade Jesuisi-ò dohodỹna heto-ò. Jesuisi taile riteytenyre.

¹⁵ Tahe xiwena wahidỹdu wedu tuu robire. Tule judeu bede ywina bede eryna mahādu robireu tahe, aõma uladu templo-ki ryrymy rỹimyhỹò aõma: –Davi riokore heka Deuxudeewina rare. Tai tahe kia rybe-ò reburerenyre.

¹⁶ Tiiboho tahe raryberenyre Jesuisi-ò: –Kai aõbo taholate aõbo rarybereri. Jesuisi rirawyònyre: –Kohe, raholare. Kaiboho teeryòtenyte:

–Uladu dori wowydyna tamy riwahinykre. Tiu aõbo tariatenyõhyymahāte kia Tyyriti-ki.

¹⁷ Tahe Jesuisi iribi ròhònyre Betỹnia hāwā-ò. Taile tahe ruu idi rỹire.

¹⁸ Biurasò txumy tahe tii dòòsede Jerusalē-ò. Tahe rama risare iu.

¹⁹ Òwòruõ tai rỹire. Tai tahe diaride figoraty-ò. Tahe iratyõre, txirule rỹire. Tai Jesuisi rarybere òwòru-ò: –Tiu heka kai maratynyõtyhy aõwesele tahe irade rairuxỹrure.

²⁰ Tai tahe ierydỹna mahādu heka ribedeòtiidỹnyre: –Timykibo heka aõwesele rairumyrõmy reareri.

21 Tahe Jesuisi tamy rarybere: –Kai ainatyhyna ijōdikeki heka iwesele biwinyke. Iratyre biwinyke. Kaiboho heka bitxiōnyōkeki kaa hāwālò-ò dori marybekre kiamy: –Iribi bexitake tahe aho-ò boikre. Tai hāwālò-ò aōwesele heka ahoro-ò roikre.

22 Aōtxile kai bexitōenykre heka adee ijō rỹikre. Bityhynytyhykeki, tahe ibutumy bitake.

23 Tai Jesuisi dehemynyde Deuxu dohodỹyna heto-ò. Tai tahe ròbedeerydỹmy ratximyhỹ. Tahe xiwena wahidỹdu mahādu, tule judeu bedede ywina erydỹna mahādu tule tamy dỹraxyimy nade. Tai tahe Jesuisi-ò rỹraxyire: –Morurudibo heka kai aōmydỹnana tewinymahāte? Mobo heka arateranyre kia biwinykemy.

24 Tai tahe Jesuisi tamy rarybere: –Kai aōbo myraxyikeki wadee tai ako tuu arelyykre. Kai dỹraxyinaōmy bidiwatỹnynykeki tahe, adee tuu arelyykre.

25 –Joaō Sebedỹdu heka morurudibo nade morybekibo tuu tadiwinymahāte wesemy. Morybekibo Joaō iny risebenymyhỹre. Deuxu Rybe-ki aōbo ada iny rybe-ki aōbo. Tai tahe widee rarybe raryberenyre: –Aōma Deuxu Rybe-ki tuu ròsebedỹmyhỹre. Mykeki rakarybenykre taheka: –Aōherekibo tetyhynytenyōte myle tii risỹnykre.

26 Aōmamy rikisỹnyrenykeki: –Iny rybekile tii tahe nade. Myỹ rikisỹnyrenykeki tasỹ kia ijoi inydeereny rakaryananyke. Joaō Sebedỹdu dori ibutumy iny rityhynyrenyre moma tii Deuxu deòduō ratximyhỹre heka. Rakarybenyōkre tahe.

27 Tai tahe Jesuisi-ò raryberenyre: –Aōkōre, reeryrenyōre heka irawyòdỹ titxiribibo iruru nade. Tahe Jesuisi rirawyònyre: –Tule jiarỹ yỹraxyina adeereny aritỹnynyrenyōtyhy.

28 Ijō Jesuisi relyyre: –Timybo maraykynybenykre ka ijyymy arelyykre. Hābuō heka inatximy iriōre raremyhỹ. Tariōre dela-ò rarybere: –Dàà, maaōmysỹdỹkre waoworu-ki, wiji wahe.

29 Tahe tamy dirawyònyde: –Waha, araōkre hewa. Ihārele tahe tawo rirahòrere rakremy. Tahe rare.

30 Idi tahe tyby rarybere helỹna-ò: –Kai tule makre waaōmysỹdỹna biwinykemy: –Dei wahe, arakre araaōmysỹdỹkre. Ihārele tahe tii raòhyyre.

31 Adeereny inihe arāyraxykre. –Tibohe weryrybò aōma tybyrybe rityhynyre? Tai tahe dirawyònyde: –Juduludule irybe rityhynyre. Tai tahe Jesuisi tamy rarybere: –Iny òrarudu tyhy heka wydena-wana ralòkre biu bedede ròtena-ò. Ihārele tahe kaiboho birònybenyōtyhy.

32 Joaō Sebedỹdu dori adeereny rarybere. Ihārele tahe kaiboho ixitxireny aòrarureny-txi òhòtireny reakemy Deuxu bityhynykemy. Kaiboho heka teramy tekoamahāte tahe sōwemy òrarudu mahādu wydena mahādu rityhynyrenyre. Kaiboho tuu tabitenyete ihārele teerytenykōte.

33 Ijō ijyymy arelyykre:

–Hābuō heka uva oworuhukỹle ritòbrònyre. Tahe òtityna riwinyre. Tai tahe utà riwinyre yrubudỹdu mahādu itxerenamy.

Tai tahe rihuòtere oworu wahe hābu mahādu-ò. Tii tahe rabetỹinymy rare taheto-ribi.

34 Iu uva bederaty kia siredenamy bedede reareu, riherehe txuramy ixidee ritxuakemy wahe.

35 Tai tahe huòtedu mahādumy heka teòdu mahādulemy raòhòtere. Ijō tahe rirubunyre ijō manadile tamy rehunanymy rỹimyhỹ.

36 Iribi tasỹ teòdu mahāduō didyde sōwetyhymy juhuna ludu ratyre. Tahe ixbyble tuu raòhòtere juhūu iwese tuu rotỹnyra wesele.

- 37 Tahe iwedytyhy rōhōtinyre: —Aōma wariōrele kōri ariteōnykre. Tai tahe wariōre rityhynykre heka. Tahe tariōre diteōnyde.
- 38 Tahe huōtedu mahādu weryrybōmy robireu, tahe wideereny rarybere: —Kaa heka iwedu riōrele rare. Aōma iwedu rurukreu iaōna aōna, ioworu heka ixideereny rikimyrenykre.
- 39 Tahe rirubunyreny iumy-di rehurennyre oworuro-ribi.
- 40 Tahe Jesuisi rarybere: —Adeereny araŷraxikre aōbo iwedu tamyreny riwinykre huōtedu mahādu-ò iu tii rehemynykre wahe. Timybohe tii riwinykre?
- 41 Tiiboho dirawyōnydenyde: —Kia rirubunykre ibutumy hābu bina. Iny-witxira-ò huōtenamy ele elemy wijuramy riatykre-ò riwahinykre.
- 42 Tahe Jesuisi tamy rŷŷraxire: —Kaiboho aōbo Ryberiti-di tariaōletenyteri: —Mana-di heka heto widŷŷdu rehumyhyre kia manale heto hātxi-ki ritidimy roimyhŷre. Jiarŷ kia mana wese rare. Inynyrŷ Deuxu kia riwahinyre. Tai awi heka rare. Ijō riwiōhenanyre, mana wahe.
- 43 Tahe Jesuisi tamyreny rarybere: —Tule jiarŷ adeereny ararybekre: —Deuxu Iōlōna heka aribi ritakre. Tahe inywitxira-ò aribi riwahinykre. Inyō txura wylemy riwahinykremy Deuxu-ò.
- 44 Kia iny mana tyre resemymhŷkre heka tii heka wiōrōmy ixōdumy rare. Mana inytyre resekeki tasŷ iny risurusurunya.
- 45 Inyō roholakeki kia aōbo aōma xiwena wahidŷŷdu mahādu roholamy rŷimyhŷ tule fariseu mahādu. Tule rexierymyhŷrenyre tiiboho Jesuisi turenyle rarybereri heka rierymyhŷrenyre.
- 46 Tai heka tii mahādu rymykemy idi riwisŷnymyhŷ tahe iny sōwehekŷ lau ruberumyhyrenyre. Iny mahādu dori idi rōhōtiny tii Deuxu rybeduō ratx-imyhŷremy.

22

- 1 Jesuisi heka rexidelenyre ijyymy relyykre:
- 2 —Timybo Deuxu Iōlōna rare ijyymy heka relyykre. —Iōlō heka tariōre herinamy worana bedehesi riywinyre.
- 3 Iaōmydŷŷnana rōrarukōmy rŷidi tahe teōdu mahādu iōrysomy roire. Rexihumy rŷireriki iaōmydŷŷnana, kanakremy wahe. Tahe ōrysna noderamy reare.
- 4 Ijō riteōnyre teōduō iny ritobinykremy. Aōhere tahaka, wabroreni kŷnyhe rerubunyre heka. Ibutumy heka waaōmydŷŷna rehumy rŷireri. Tahe kedeake kedeake heka kōdōidenyke heka.
- 5 Tahe timy heka irybe rityhynyrenyōhyre. Iny sohoji sohoji tatyresidi ijohona-ò, ijō taaōmysŷdŷŷna-ò rea reare, ijō taoworu-ò reare.
- 6 Ijō lobidŷŷna reburere teōdu mahādu dee. Tii teōdu dee heka rawobinare. Ijō aōbina bina heka ritxienyre ijō rirubunyre dori.
- 7 Tai tahe iōlō reburere lobidŷdŷna mahādumy bina bina raōhōtedŷŷnyre, rirubunyre. Ihāwā ritoonyre.
- 8 Tai iōlō rarybere teōduboho-ò: —Waworana bedehesi rexihumy rŷireri ibutumy. Kia iny mahādu ijoi juhūu retobinyra heka aō ibina heka roire. Urile riōmysanymyhŷreny.
- 9 Tai tahe ibutumy boibenykre hāwā-ò ibutumy iny-txi bekoabenybekre heka bitobinybenybekre ibutumy waworana bedehesina-ò kedeakekremy.
- 10 Tai tahe didyde iny wiwihikŷ, iny ityhy iny bina mahādu. Hetowo tahe ritŷxire tŷmyra mahādu-di.

¹¹ Tahe iòlò ralore hetowo-ò kia iny mahādu dee rybemy. Tahe tii robire hābuōmy kia worana bedehesi kia tykyōmy ratxirerimy.

¹² Tai tahe tamy iòlò rarybere: —Waliiny, aōherekiwe worana bedehesi kia tyky-di aōkō atxiteri? Kia tahe hābu rybeōmy riijere.

¹³ Tai tahe iòlò aōma rarybere teòdu mahādu-ò: —Bimybenyke kaa hābu. Waa bitaataabenyke imy behubenyke tahe idi diòlòdỹmy idi rehukre luruhukỹ-ò. Tai Aōhōkỹmy dỹnana-ki tai txuraruti rikyikyiny. Tai rahinykre.

¹⁴ Tai tahe Jesuisi rarybere: —Sōwemy iny heka kidirahukre tahe ibutemy kanaarikre.

¹⁵ Tai tahe fariseu mahādu rōhònyre wii rotyre. Aōbinamy Jesuisi rarybekeule heka rimykyemy idi rỹimyhỹ.

¹⁶ Kia aōma fariseu ijoiō heka riteònyre Jesuisi-ò. Tule Herodi ijoi mahādu riteònyre. Rỹraxyre Jesuisi-ò: —Erydỹdu, kai heka hābuwi tate, hābu òbiti. Kai heka tòbedeerydỹmahāte Deuxu deewinamy. Awire aōbo ariòwynyrenykre Roma hāwā mahādu dinodu-ò.

¹⁷ Kai heka ixinamy aōma adee iny rarybererimy ihỹre. Timybo iny raraykynyreerimy ihỹre. Iny bede ywinareny aōbohe ixinamy nieru aōna aōna òwydỹnamy rōhònyke aōbohe awire?

¹⁸ Tai Jesuisi heka rierymyhỹ aōma awimy aōkō tai rahareri heka rexierymyhỹre: —Kaiboho òbitimy aōkō toite. Aōherekibo heka kai biwaitxenanybenykemy wamynomy wadi atxitenyteri?

¹⁹ Timybohe nieru-ki rakaharenykre aōna aōna òwydỹnamy. Biditeòsinyke kia-ò arierykremy. Tai tahe tamy riteòsinyre womati nieruō.

²⁰ Tahe Jesuisi ritỹraxyre: —Motyytybybo koa rỹire. Monibo ityre-ki koa roire?

²¹ Tai tahe rirawyònyre: —Roma hāwā iòlònile tai roire. Tai tahe Jesuisi rarybere: —Tibo Roma hāwā iòlò nierubo heka tamy biwahinykre. Tibo Deuxu nierule tasỹ tamy biwahinykre.

²² Tai tahe urile ribedeòtiidỹnyre. Tai ririrenyre ròirenyre.

²³ Tahe kia txule saduseu mahāduō heka dòidenyde Jesuisi-ò. Rityhynyōhyymyhỹre kia aōma rubu-bibi ixixana heka rityhynyōhyymyhỹre, saduseu mahādu wahe.

²⁴ Tamy rarybere: —Erydỹdu, Moisesi tyriti heka kawesemy ribedeerynyre:

—Aōma hābumy hāwyy heridumy roikeki aōbohe timykibo hāwyy uladu-di ratxikeki. Hābuō iriòrekō-di rurukeki tai tahe iseriòre heka iriòrese tyby-wana roike. Tai heka kia hābu rubuweleu, kia deròwomy heka uladu ritybienyke.

²⁵ Aōu heka debò inatxi seriòremy kaki rasỹnomy raremyhỹ. Telareny heka roire hāwyy tahe iriòrekōlemy rurure. Tahe ihāwyytybyhe kia iseriòrewanale roire.

²⁶ Ihelỹna sỹ tule rurure. Kia heka ibutumy debò inatxi reurò tii-wana roihyre iriòrekōule.

²⁷ Tahe hāwyy heka tule rurure.

²⁸ Tai tahe kia ruru-ribi rexixakreu tahe, tiwexe ihābukre? Ibutumy dorihe tii-wana heka roilehekỹlera.

²⁹ Tai tahe Jesuisi rirawyònyre: —Kaiboho teerytenykōlemahātenyde timybo Tyyriti-ki roimyhỹre. Deuxu ruru tule teeryòte.

³⁰ Tiu iny rubu-ribi rexixakreu iwitxiramy rexixakre. Ŷju wesemy ronykre. Timy heka hābumy hāwyy roiõtyhy.

31 Kaiboho heka tetyhynytenyõhyymahãtenyete rubu-ribi ixixana. Idi heka tariatenyõhyymahãtenyete timybo Deuxu rarybere?

32 Kiamy heka rarybere: –Jiarỹ heka Abraõ Deuxu rare. Ijai Deuxu rare. Ijaõ Deuxu jiarỹ rare. Tii heka iru mahãdu Deuxu heka tii ihỹre rubu mahãdu Deuxu aõkõ wahe.

33 Iu iny sõwe ribedeerynyreu, tahe urile iny ribedeòtiidỹnyre.

34 Fariseu mahãdu doidenyde Jesuisi-ò wii rotyrenyete. Roholareki wahe aõma saduceu mahãdu ribedeòtiidỹnyrenyete.

35 Bede ywina erydỹna mahãduõ rỹraxyre heka aõmybo Jesuisi-ò. Tii rimyky heka idi riwisy nymy kia rybebinaõmy rirawyõnykeki rimyky.

36 Tahe rỹraxyre: –Erydỹdu, tibohe aõbo bede ywina kia-ribi aõnityhymy hewe bedeòtiidỹnyamy ratximyhỹre. Wakoreny inihe tuu bedelyykre. Tibo kidiòtiidỹnyamy ihỹre.

37 Tahe Jesuisi dirawyõnyde: –Iny Deuxureny iny iòlòreny luuke heka. Ibutumy awo-ribi heka iluuke, ibutumy aruruna-ribi, ibutumy arayky-ribi luuke heka.

38 Tii heka inatyhy bedeòtiidỹna tyhymy ratximyhỹre ibutu bede ywina-ribi.

39 Ijõ ihelỹna tahe iwesele heka rare: Iwese ixiluure wese heka ibutu luuke.

40 Ibutumy Moisesi bede ywina heka juhoo rare. Tule Deuxu rybedu mahãdu erydỹna heka iribile rare. Kia bede ywina inatxi-ribi heka ibutumy iny bede eryna ròhònyre. Kia inatxi bityhynymy bohonykeki iuhe heka tetyhynmahãte.

41 Iu fariseu mahãdu iweroramy rỹimyhỹõ tahe rỹraxyre Jesuisi tamy:

42 –Mobo Deuxu deòdỹnyamy ihỹre, Kristu wahe? Moriòrebo tii ihỹre. Tai tahe tiiboho rirawyõnyrenyete: –Moma Davi riokore òsana. Tahe ijõ Jesuisi rỹraxyre:

43 –Tai tahe aõherekibo Davi heka Wanyrỹmy rininire Deuxu Tyytybytyhy irybe riwiòhenanyreu wahe. Davi dori kawesemy rarybere:

44 Deuxu wawedu-ò rarybere.

–Bodonyke warurunawe-ribi, jiarỹ heka aòludu mahãdu-di arawo-txi.

45 Davi tawedumy Kristu rininirehãre, timykibo Kristu iriokore riokorekre.

46 Tahe inyõ heka Jesuisi rirawyõnyõhyre. Tai tahe ruberumyhỹre tamy rỹraxyre lau.

23

1 Jesuisi heka iny sõwe nihikỹ ribedeerynymyhỹ taerydỹna mahãdu-wana. Tii rarybere:

2 –Judeu bedeerydỹdu mahãdu heka Moisesi bede ywina bede erydỹna mahãduõ rare. fariseu mahãdu tule bede ywina riwinymyhỹnyre.

3 Iwese ribedeerynyre wese tahe bityhynykre. Uritere iwese tii riwinymyhỹre wese uritere iwidỹõmy. Aõwidỹmy rarybemyhỹnyrehãre tahe aõwitxira heka riwinymyhỹnyre.

4 Tiiboho heka atyrereny riòdònyihikỹmyhỹre bede ywina. Ihãre tahe rityhynyrenyõhyymahãrenyete.

5 Aõma òbitimy ratxike sỹny heka iny tamy roholamyhỹre ixi-di ratxirerimy ihỹre. Aõma walabu riòreõ heka rỹimyhỹre axiò-ki bede ywina heka ritidimy roimyhỹre ityky ijete retydyna bede ywina-txi tõhõti reakemy tuu riwinyrenyete. Sõwemy heka iretydyna riwinyrenyete.

6 Ronymyhỹre heka ikoòhòkỹle ronymyhỹre, worana bedehesina rỹi-wana wahe. Dohodỹna heto-ki heka tule ronymyhỹre, iko-ò tuu rexisỹnymyhỹ.

⁷ Hãwã-ki iny tamy ryrymyhÿre: –Waerydÿÿdu, Habimy, kia tahe irybe-ki bede erydÿÿdu rare. Tii tahe tamyreny awire.

⁸ Tai tahe Jesuisi tamyreny rarybere: –Kaiboho heka uritere Habimy inyõ adeereny irykõmy ihÿke. Deuxu sohojile bede erydÿÿdu heka rare. Ibutumy kaiboho seriõre wesemy atximahãtenyete.

⁹ Kasu-ki taheka inyõ heka tiu wahamy inyõ widee rarybeõtyhy Deuxu biu-ki ratximyhÿrele tuu bininibenyke heka.

¹⁰ Uritere Wawedu myÿ inyõ kia nidÿÿõmy. Deuxu deõdÿÿnale heka awedu ratximyhÿre Mesia wahe.

¹¹ Anihikÿmy ixi-di mohõtinykeki tahe, kia iny biwiõhenanyke.

¹² Kia ityhy rare ixi-di rõhõtinykyhÿre, tii heka ihewo-ribi rabedewokre. Ihewo-ribi tahe aõma aõkõ relekre. Kia iaõkõmy ixi-di rõhõtinykre tahe nihikÿmy heka relekre.

¹³ Belãhãxe! Kaiboho itxenadÿÿluku. Ibina adeereny kanakre, kai bede erydÿÿna mahãdu, fariseu mahãdu. Kaiboho uritere iny rõtedÿÿrenyõmy Deuxu Iõlõna-õ. Kaiboho birõnybenyõtyhy tule iny rõtedÿÿ-õ biebenyke. Kaiboho bexisÿnybenyke õbitinamy.

¹⁴ Aixitõedÿÿna rehereheki wahe hãwã ube-ki. Kaiboho urile iny teitxenanymahãtenyete. Aõma wytese urimynodu heka iheto-ribi teteõnymahãtenyete kaiboho heka abinarenyre. Tai heka kaiboho yla aõkõ aõhõkÿmy botÿÿnybenykre.

¹⁵ Belãhãxe! Kaiboho ibutumy iny aratyhynyrenykemy ixi-di tahõtinyahãtenyete. Tai heka iny tesÿnymahãtenyete õrarudutyhymy wahe ixiratyre heka teijiradÿÿnymahãtenyete. Aõraru-ki heka aõhõkÿmy botÿÿnybenykre. Iny-di atxikemy heka tahõtinyahãte.

¹⁶ Kaiboho ruetã mahãdu wesemy kai ahãte. Kaiboho heka kia wesemy tebedeerynytenyete. Inyõ heka Deuxu bede eryna heto riwawiõhenanykeki heka aõna aõna ariwinykre. Myÿ marybebenykeki, heka aõ aõkõ heka rare. Deuxu dohodÿÿna heto womati tÿrÿrÿhÿkÿ-di marybekeki heka, tii heka rityhynyhy. Ibutumy heka kia bede ywina õta õta tewinymahãtenyete.

¹⁷ Kaiboho heka bede erydÿÿdu bede erytyhykõ mahãdu atxitenyteri dohodÿÿna heto kia-õ ralõkeki. Aõbo bedeõtiidÿÿna tyhyre womati tÿrÿrÿhÿkÿ aõbo ada dohodÿÿna hetole aõbo teeryõte, Deuxu Dohodÿÿna heto wahe.

¹⁸ Kaiboho tule tebedeerynyete kawesemy. Inyõ tarybe inatyhy-di rarybekeki, tai heka kia xiwena wahidÿÿna-di rarybekeki, tai tahe tii rityhynyõkeki, awira. Tahe tii xiwena wahidÿÿna tyre-ki rarybekeki tahe, tii õbitimy heka rarybeke.

¹⁹ Kaiboho ruetã mahãdu wese, kaiboho heka erydÿÿnakõdu mahãdumy toite. Aõbo awityhyre? Xiwena wahidÿÿna aõbo ada ityre-ki wahidÿÿna roimyhÿre aõbo?

²⁰ Wahisidÿÿna heka wiwesele rare. Aõma xiwena tyre-ki roire wana tule wiwesele rare. Aõma xiwena tyre-ki roiõre wana wahe heka aõ aõkõ rare. Xiwena utãle heka rierymyhÿre inatyhy rare. Myheka kai mararybekeki heka tai tahe kai heka xiwena utãlemy tarybeteri. Ibutumy iny ityre-ki rÿire bohomy tule heka tai tuu tarybeteri.

²¹ Deuxu dohodÿÿna heto õraru-ki kai koityhyxemy marybekeki heka tai heka kai dohodÿÿna hetomy tarybeteri hãre tahe Deuxu iwo-ki ratxirerilemy tuu tarybeteri.

²² Biu õraru-ki ka koityhyxenyteri marybekeki, Deuxusÿmy tarybeteri. Tii dori tarynana-ki ronyreri.

²³ –Belãhãxe! fariseu mahãdu! Kaiboho heka itxenadÿÿdu mahãduõ

toite. Tule bede ywina bede erydÿÿdu mahãdu. Adeereny heka ibinamy ratxikre. Arÿsÿna uri juraõ heka kai Deuxu-ò tewahinyte, hortelã, erva-doce, cominho wahe. Kaiboho heka aõninihikÿ tetyhynytenyõhyymahãtenyete. Iwese òbitina, ruxetòena, inatyhyna kia-ribi heka õhõti losamyhÿre ibutumy. Aõmydÿÿna jura wahisidÿÿna heka awi rare. Tahe tule uritere õhõti losaõmyke aõwitzira-ribi wahe. Aõbo bedeòtiidÿÿnare bede ywina-ki. Kaiboho heka bede erydÿÿdu toite hãre tahe teerytenyõte.

²⁴ Belàhàxe! Kai hãbuõ wese rare. Tiiboho imona berareny-ribi ohoruxõmo riarimahãre. Ihãrele tahe tiiboho iròdu nihikÿ rirÿsÿmyhÿre. Iwesele kaiboho tule terÿsÿmyhÿtenyete.

²⁵ –Belàhàxe fariseu mahãdu, bede ywina bede erydÿÿna mahãdu. Amona deoreny tesuhòmahãtenyete iwe. Iwo tahe ka isuhukÿlemy rÿimyhÿre. Itxenadÿÿna rÿire. Aõma aumy weselemy heka kia ratximyhÿre. Aõma aumy heka webòrosityy tyrare heka. Araykywo-ki tahe ibutu itxenadÿÿ heka tai rÿimyhÿre.

²⁶ Belàhàxe fariseu mahãdu! Kaiboho taruetà mahãdu. Kai mona hynawo bisuhòke heka biòtinyke. Aõma bisuhòke ihÿre tahe arayky bityranykre. Tahe ibutumy heka aumy ryranykre.

²⁷⁻²⁸ –Belàhàxe fariseu mahãdu! Kaiboho heka koityhyxenyteri. Rubu heto wiwihikÿ ixideereny tewinymahãtenyete. Kaiboho heka iwesetyhylemy toite. Aõma webòrositylydu heka iruxeramy idi toite. Aõma aworeny-ki tahe aõma iny rubu idi ròhòkÿdileka atxitenyteri mahãtenyete. Ibutumy aõbina bina awo-ki arayky-ki idi atxiteri mahãtenyete. Aumyreny-ki heka tykywihikÿ texitykyny mahãtenyete. Aõma hãbu wihikÿwesemy. Hãbu òbitimy matxibenyke myheka iny adi ròhòtirenkyemy heka tuu texitykynymahãtenyete. Araykywo-ki tahe arimyrewo-ki tahe ibutu itxenadÿÿna-di heka toite, òrarudu mahãdu toite.

²⁹ Belàhàxe! Tai heka kaiboho Deuxu rybedu mahãduõ rirubunyre. Kaa nohõti ijaranamy tuu tewinymahãtenyete. Awabederenywo-ki heka noijasa ruxerahakÿle tetidite.

³⁰ Kaiboho heka tarybemahãtenyete. –Tiu wahareny riwinyre wese heka ariwinyrenyõtyhy.

³¹ Kiamy tarybeteu heka hãbu bina riòremy texininite. Bowesele toite. Iriòre toite.

³² Iwese juhoo ibinamy riwinyre wese heka iwesetyhyle aõhebo tatÿÿnymahãtenyete.

³³ Iwese hemylala deborehekÿ wesemy heka kaiboho atximahãtenyete. Boreny tule iweselere. Timybo heka kaiboho heòty bede-ribi mahenybenyke? Kaiboho heòty bede-ò boibenyke.

³⁴ Adeereny ariteònykre aõma Deuxu rybeduõ hãbu erydu, tyyriti erydu wahe. Kaiboho bidirubunybedenykre. Ohodÿÿna heto-ki ijõ bidihetenybedenykre awaru hetenaõ-di. Itxeòtyre-ki ijõ bidirubunybedenykre. Ijõ heka biheludumykre hãwã hãwã-ò tamy ibinamy riwinykremy. Aõhòkÿmy dÿÿnana heka tamy biwahinybenykre ijõ hãwã-ò rakreu.

³⁵⁻³⁶ Kia heka hãbu ibutumy rurure tyby òraru-ki wahe. Dohodÿÿna hetowokile rirubunyrenyete. Kaiboho Abeli juhoo terubunytenyete ikonana tahe Zacaria, Barakia riòre wahe. Òbitityhy juratya-ki heka tuu tewinytenyete. Wijnabòdu mahãdu tai aõhòkÿmy rotÿÿnykre. Ibutumy ibinamy kai atyre-ò kedeseke.

³⁷ Jesuisi ikonana tahe rarybere: –Jerusalẽ hãwã mahãdu, kaiboho heka terubunytenyete Deuxu rybemy rybedu mahãdu. Jiarÿ heka aramykemy adi rewisÿnyreri wariòre wesemy tahe waderarenyre kaiboho. Iwese hãnieõ

iriõre ridyre wese idewo-ki.

³⁸ Aheto heka ixisohojilemy r̃imyh̃re.

³⁹ Kaheka ararybekre adeereny: –Wamy heka bobiõtyhy ixityre. Kai heka Deuxu deõd̃ỹna bidykreule wamy bobikre. Iu rarybereu, Deuxu deysanamy, wamy bobikre.

24

¹ Iu Jesuisi rõhõnyreu dohod̃ỹna-ribi, ieryd̃ỹna mahãdu tamy rarybere dohod̃ỹna heto itxeremy rõikemy, eleri-õ wahe. Tai tahe Jesuisi dirawyõnyde:

² –Inatyhy rare, awi heka rare. Urile tahe kidiixãwidid̃ỹnykre heka. Timy heka manaõ wityre-ki roiõhykre. Ibutumy bede-õ idi rehukre.

³ Iribi tahe Jesuisi rehemynyre Oliveira hãwãlõ-õ heka ronyre. Tai tahe eryd̃ỹna mahãdu tii rit̃ỹraxinyre iny sõwe-ribi: –Tiubohe ibutumy kedeixixãwidid̃ỹnykre. Tiuboho ibutumy bede konanad̃ỹnamy reakre. Timybohe rikeryrenykre kai bedehemynyke aõma bede ibutumy rexihukre.

⁴ Tahe Jesuisi tamy rarybere: –Uritere inyõ aitxenad̃ỹõmykre.

⁵ Sõwemyhe iny itxenad̃ỹnamy r̃yirakre. Jiar̃ỹ Kristu rare, Deuxu deõd̃ỹna heka jiar̃ỹ rare, myheka adee kanarybekre.

⁶ Kaiboho heka boholamy mabekre iny aõbina rõhõnymyh̃kre: boholamahãkre. Ihãre tahe iny rarybekre aõma: –Karibi heka aõbina urihimyõ rõhõnykre. Myhe rarybemahãkre. Ihãrele tahe kòdòõseõkre aõma ikonana urihimyõ. Ibutumy heka kia wesemy relekre.

⁷ Aõma kia wesemy heka bede roimyh̃ rarekre aõbo iny wixira wixira heka ibutumy iõlõna heka riteranymyh̃kre. Aõbinamy. Tai heka raaõbinanymy r̃yirakre. Aõma rama ijara reakre. Bede ibutumy ramytatakre hãwãõ-ki.

⁸ Kia heka iwese hãwyy uladu dese wesemy robumyh̃re wese tukre.

⁹ Adeereny heka aõhõk̃myd̃ỹnana tiuboho riwahinykre aõma wani õraru-ki wahe. Ijõ kaibohoõ heka ararubunyrenykre.

¹⁰ Sõwemy heka iny riatymyh̃kre wary-ribi heka riatymy ririmyh̃kre. Wii rityhenymyh̃kre. Widee rakyarananymyh̃kre.

¹¹ Rybebina rybeduõ heka sõwemy kedehemynykre tahe kia heka sõwemy iny riitxenanymyh̃kre.

¹² Iu heka õraru nihik̃y iu rõhõnykremy roimyh̃re. Sõwemy heka luuna-di r̃yiramyh̃ katahe wiji ixãwikre heka ihomy aõkõ relekre.

¹³ Kia idi hyy r̃yirakre ikonana-õ. Tii mahãdu tahe tarasanamy reakremy r̃yira.

¹⁴ Ibutumyhe kia iny-õ rybe t̃nyd̃ỹnamy reakremy r̃yira, Deuxu Rybewihik̃y T̃myra wahe. Ibutu iny wixira wixira heka roholakre rybe wihik̃y-õ. Kia rahudi hik̃yle heka taheka kedehemynykre heka ikonana.

¹⁵ Aõbinahak̃y tyhybohe ibinatyhy r̃yikre. Tii heka r̃yikre heka aõma Deuxu ubetyre-ki, Deuxu is̃y-ki, kiaweselemy heka r̃yikre. Bieryke aõbo kia rare. Bieryke aõbo kia rare Danieli heka Deuxu rybeduõ ihetxiu kiamy heka rarybere:

¹⁶ –Judeia mahãdu bede-ribi tahe kia bihenybenyke. Ibutumy heka bõibenykre hãwãlõ bede-õ biõturõnykre.

¹⁷ –Kia beded̃ỹnanau heka tiu aõ bimyoõtyhy ahetowo-ribi. Tiiemy heka rõhõnyhkykre aõwesele wahe.

¹⁸ Iu bedero raaõmys̃d̃ỹk̃re heka tiu kòdòõseõtyhy tatyky itxemy.

¹⁹ Tule aõma hãwyy bõtõmy r̃yira kia bedeu aõhõk̃my rot̃ỹnykremy r̃yira. Kia tohouã-di ratxireri tahe tamy isirakre heka itybied̃ỹ idi rakeõ heka isirakre.

- 20 Bedejutytykõkemy heka bexitòenyke ahena mahenykeu. Tule sabado txu aõkõkemy bexitòenyke.
- 21 Tiu heka aõhõkõmy dõõnanamy iny rotõõnyõhyymyhõre kaa aõhõkõmy dõõnana nihikõmy. Tule tiu tuu robiõhyymyhõre.
- 22 Kia Deuxu irokorehemykre wana heka ibutумы iny ituekre. Kaa uri-himyòlekre wana tahe kai Deuxu hõrõ mahãdule tuukre.
- 23 –Aõma Mesia heka kowa-ò rehemynyra, Deuxu deòdõõna wahe. Ihãre tahe kai heka inyõ adee rarybekeki tahe tetyhynyõhyte heka.
- 24 Kia iu kedehemynykreu tahe aõ Kristu tyhy aõkõ heka rarekre. Aõma rybedu itxenadõõdu heka tule aõna aõna wiwihikõ riwinykre. Aõma ityhy-dõõdu dori riitxenanykemy idi riwisõnykre:
- 25 Boholake, juhuu dori adee relyreri ibutумы aõhebo rotõõnykre.
- 26 –Aõma arateòwarinyre dori tuu. Kia Mesia, Deuxu Deòdõõna heka ròðsereri. Beteheke bederahy-ki, tule hetowo-ki. Iu tahe timy heka tamy itxeremy raõtyhy inatyhy aõkõreki.
- 27 Iu jiarõ Deuxu Riòre Hãbutyhyhykõ arehemynykreu ibutумы heka rierykre loosõna delaana wesele heka wadehemynyna heka rarekre biu ibutумы ritõxinykre.
- 28 Iwese aõ rubu roimyhõre, rara heka tamy rabutumyhõre. Kaiboho rierykre iu rehemynykreu.
- 29 Iu kia bede dõõnanamy reakre tahe txulyby heka kòdòhònykre. Ahãdu tule rybinykre. Taina tule ixewesehekõle kanakre. Ibutумы ramytatakre biu-ki.
- 30 Iule tahe kia wadehemynynamy iny robikre. Sõwemy heka hinana ibrunana bede bedemy rõirakre. Ibutумы heka iny robikre wadehemynynamy biuwetyky-ki, jiarõ dori, Deuxu Riòre, Hãbutyhyhykõ rare. Loosõna ruruna sõwekre, tahe arehemynykre.
- 31 Tule wajurõna-di, õju aditeònykre iu, ajurõna wodõõhõkõ-di. Tahe ibutумы wahõrõ mahãdu he ixidee aributunykre bede bede-ribi, ibutu rehetyhy-ribi wahe.
- 32 Jesuisi tule relyyre: –Ijyõmy heka ako arelyykre. Kai heka ibede erynamy bimykre. Iu kia figueira òwòru hãbu wiji tybiehekõ. Kia aõma iruru tõmyra rurunymyhõre. Tule aõma txirubò tõmyra ròhònykre. Tiu tahe bierykre. Kai iòhòra bohe wyra. Myhe tamy besekre.
- 33 Iwesetyhyle taheka kai heka bierykre. Aõma wadehemynyna ròhòny relekre wahe aõbitikre wadehemynyna iu, aõhõkõmydõõnana wahe.
- 34 Tiu kia bededõõnanaule heka bedekõnyna rexihukre.
- 35 Biu heka bede-wana ituekre warybe tahe aõu aõu heka rõihyymy rarekre.
- 36 Inyõ heka rieryõhyymyhõre. Tiubo txuu ruu kai konany rõimyhõre wahe õju dori tiu rieryõhyymyhõre. Aõma, jiarõ Deuxu Riòre dori rieryõre. Aõma Waha Deuxule tahe rierymyhõre.
- 37 Noe bededõõnana wesemy heka rõimyhõkre iny risinykre kia bedeu.
- 38 Ibutумы heka worana bedehesi rõikre kiau. Lisisò tahe rõikre. Herina lisina aõma hãwyymy herina.
- 39 Tahe Noe bededõõnana wesemy heka reakre. Iu heka beòra rariare. Tahe rityhynyõhyre tiiboho. Tahe heka raòwònyre rariare ibutумы ituere. Iwesele tii heka rarekre heka, wadehemynyna Deuxu Riòre Hãbutyhyhykõ wahe.
- 40 Inatxi hãbu heka oworu-ki raaõmysõdõõkre. Ijõ heka rakre dynamy reakre. Ijõ tahe rarikre.
- 41 Tule inatxi hãwy heka raaõmysõdõõkre heto-ki ratxikre mai risyrenykre. Ijõ heka dynamy reakre ijõ heka rarikre.

42 Tai heka iny rexiywinymy r̄ymyh̄kemy rybe roimyh̄re awedureny kanakreki. Tiubo rehemynykre, teeryõte.

43 Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy.

44 Bexiywinymy heka wadehemynyna biijemy bonyke, jiar̄y Deuxu Riõre Hãbutyhyhyk̄y wahe.

45 Ijõ Jesuisi relyyre: —Inyõ tadinodu deòdutyhymy ratxikeki, tii aõmys̄d̄ȳna riwinyhyy ronymyh̄ke tamy. Iheto riywinyhyke. Teòdu mahãdu txuõ txuõlemy riywinymahãke.

46 Kia riwinykeki, deysamy rarekre teòdu rehemynykreu.

47 Inatyhymy ararybekre: —Kia deòdu tadinodu aõmyd̄ȳnana ibutumy idi riywinykre, riyrubunykre. Tii ibutu wedu rarekre.

48-49 Ibinamy tahe tii rõhõtinykeki, kiawesemy riwinykre: Deòdumy raòhõtemyh̄y, lisilemy ronymyh̄y, riroximyh̄y momodu mahãdu-wana riõmyh̄y. Tii ixidee rarybekre: —Wawedu kedehemynyõtyhy, aõtxile ariwinykre.

50 Iu rehemynyõkremy rõhõtinyreu, iwedu kiaule rehemynykre.

51 Tai tahe raòhõtëbinakre. Heòty bede-ò riteònykre, Iwese itxena mahãdu tii riteònykre wese. Kia-ò rahinykre, robukre, txuraruti rikyikyinyomy aõhõk̄my d̄ȳnana òraru-ki.

25

1 Jesuisi ijõ relyyre: —Kia txu heka Deuxu Iòlõna ka ijyy wesemy rarekre. Debòwiò ijadõma heka hãbumy herina riraòmyh̄renyre. Iny sohoji sohoji heka toosõna riwyre iximynamyna.

2-4 Iruyrelë tahe tõhõtë reare aõma ad̄ȳ-di rit̄yxinykemy. Ihony tahe tõhõtë rosare iruyre was̄y, ijõ tule ihyna-ki riwykemy.

5 Weryrybò rehemynyõre, tai tahe ijadõma mahãdu ele rihynymy r̄ymyh̄y tehemyynyna riiraòmyh̄renyre. Iny sohoji sohoji heka toosõna riwyre iximynamyna.

6 Tai tahe rarybera: —T̄ymyra mahãdu-ò wahe rehemynyreri. Birybeny-benyke ruwetya.

7 Tai tahe ijadõma mahãdu he rituranymy r̄ymyh̄re. Toosò it̄nytyhymy rookemy.

8 Kia ijõ tahe tõhõtë rosare mahãdu tahe uritere riijere. Itood̄ȳmy idi riwis̄nymyh̄y. Aõma widee he rexitòenyre: —Urihimykò inihe wahõrõ-kò biditxiwike karihukòtekre.

9 Tai tahe kialemy ris̄nyre: —Anokõre wadehunale dokuri r̄yire. Bikòryke tahe ijõ itxe tahe. Maa.

10 Idi tahe ròireny iõbrad̄ȳmy. Tai titxi tai rohonymyh̄reò. Iòrysomy iõbrad̄ȳmy ròirenyra rookile tahe dehemynyde kia t̄ymyra mahãdu wahe. Tahe rironyrenyre ibutumy riroxikemy. Riratòbònyrenyre.

11 Tai tahe kia iruyre ijadõma iõbrad̄ȳmy rare tahe dehemynyde: —Wahĩ, itxòtòbòna wadeke bidirakynybedenyke!

12 Tai tahe kialemy rirawyònyre: —Jiar̄y umyreny reeryõre. Kie riki ijyy.

13 Tahe Jesuisi rarybere: —Tai kaiboho bexiywinymy ahãbenyke wadehemynyna biijebeny. Teerytenykõte dori tiubo adòòsekre.

14 Tii ijõ rarybere: —Ijõ ijyyomy adeereny arabedeerynykre timybo Deuxu Iòlõna raremy. Inyõ heka rakemy ratximyh̄re ijõ bede-ò rat̄yinykemy. Tii tahe taaõmyd̄ȳnana ririre teòdu mahãdu-ki.

¹⁵ Tanieru tahe tamy riwahinyre timykibo isiraõmy nieru ritamyhỹre myheka tamy riwahinyre. Ijõ-ò 5000 riwahinyre. Ijõ-ò 2000 riwahinyre. Ijõ-ò 1000 riwahinyre. Idi tahe tii rare tabede tỹinamy.

¹⁶ Kia iruyre ritara heka aõna aõna riõbranymyhỹre. Diwymyhỹre tasỹ idi rohonyrerimy ihỹre. Tai wylemy heka inieru rabuture. Ijõ ixityre iruyremy ritxienyre iratyretyhy.

¹⁷ Kia ijõ inatximy tamy riwahinyre tasỹ tulere aõwesele raaõmysỹdỹỹre ta ròtare tule ijõ inatximy ixityre.

¹⁸ Kia sohojimy tamy riwahinyre tahe urile riyrubunyre inieru hãloole riare tamy tahe riyrubunykemy heka riare.

¹⁹ Sõwemy rabeledỹỹnana-ribi tahe iwedureny dehemynyde. Tahe tamyreny rarariòwyre takõtareny riòbitinykremy.

²⁰ Iruyre riwyre heka debòwiò diwyde: –Beteheiny wawedu ijõ iruyre anieru tyre rebutunyre.

²¹ Tahe tawedu sõwemy riwowydynyre iaõmysỹdỹỹna wiwihikỹmy ròhònyraki wahe. Kiamy heka tamy rarybere: –Òbitimy idi taaõmysỹdỹỹteki heka. Sõwemy heka adee ariwahinykre riywinykemy. Aõwaxinyhe bitelenykre aõmysỹdỹỹna. Kai heka wawana beysanidikỹkre.

²² Idi tahe kia inatximy ròtaré sỹ dehemynyde: –Beteheke, inatxi tasỹ inaubiòwa ixityre adee rewinyra.

²³ Tahe iwedu rarybere: –Awityhymyhe taaõmysỹdỹỹta! Kai heka deòdu wihikỹ tate. Kai ibutedile sõwemy tewinyte tahe sõwemy ixityre adee ariwahinykre riwahinykemy. Kai heka wawana beysanidikỹkre.

²⁴ Kia sohojimy tamy riwahinyre tahe rarybemyhe retximyhỹ: –Kai heka hãbu nieru tarasaery heka tate. Aõ taaõmysỹdỹỹteri-ribi aõkõ heka nieru tetamahãte.

²⁵ Tai heka jiarỹ raberumahã alau watxireri. Tai heka rewore iny lau. Tahe tii sohojidile ratxireri.

²⁶ Iwedu rarybere: –Kai heka eoruxerere, awi aõkõ heka tate! Inyõ tehuòtekõta heka idi urihimyo ityre ròtakelemy wahe. Kai tiwaeryte wahe.

²⁷ Aõherekibo banco-ki aõkõ tetidite. Kia huòteòwy wanieru-ribi ritarerimy ihỹre.

²⁸ Bitabohe kia nieru-di atxitere, tahe kia debòwiò ritaraò wahe biwahinykre.

²⁹ Kia òbitimy raaõmysỹdỹỹra heka sõwetyhymy ròtakre. Kia òbitimy raaõmysỹdỹỹõmyhỹre kia heka ròðnodỹỹkre.

³⁰ Kia deòdu bimibenyeke. Tii dorihe ibinatyhyre inihe bede luruhukỹ-ò idi behubenyeke. Tai heka tii aõhòkỹmy rotỹỹnykre rahinykre.

³¹ Jesuisi tahe ikonana rarybere: –Iu jiarỹ, Deuxu Riòre Hãbutyhyhykỹ, arehemynykreu heka Waiòlònary-ò aronykre. Arehemynykre waỹju mahãdu-wana.

³² Ibutumy heka bede iny mahãdu wako-ki ributunyeke. Iwese budoeni itxeredu heka tabudoeni, budòe-wana wiribi rihitxinymyhỹre wese heka bede iny mahãdu wiribi arihitxinyeke.

³³ Wabudoeni heka warurunawe-ribi arisỹnykre. Buddè tahe wahywe-ribi arihitxinyeke.

³⁴ Idi tahe waruruna ludu-ò ararybere: –Manake hewa, beysabenyke. Waha Iòlòna-ò rokonykre. Myheka tamy ararybekre. Juhuu bedeu ihetxiu heka ywimy adireny kia rỹimyhỹre.

³⁵ Rama tahe riwasanyreu rỹsỹna wadee tewahinytenyete. Iu bemy rarureu, wadee tewahinytenyete. Jiarỹ heka tori rare asỹ-ò tiwadytenyete.

³⁶ Jiarỹ heka watykyhoho aõkõu, kaibohole wadee tewahinytenyete. Binamy rỹimy rarewãhã, waroramy tadõitenyete rõtenawo-ò.

³⁷ Tai tahe òbiti mahãdu rarybekre: –Wanyrỹ, tiu taheka ramamy heka wadeereny teate –Adee rewahinyrenyre? Tiubo heka bemy tarumy tatemahã adee rewahinyrenyre?

³⁸ Tiubo heka kai torimy tatemahã idi wahetoreny-ò aradyrenyre. Tiubo atykyõmy tatemahã-di, tyky adee rewahinyrenyre.

³⁹ Tiubo rõtëna-ki tỹimy tatemahã-ò ada webinadumy tatemahã-ò, aroramy ròirenyre. Wanohõti atxi reaõhyymyhỹre.

⁴⁰ Tai Jesuisi rarybere: –Jiarỹ, Iòlò, tamy ararybekre: –Iu kaiboho waityhydỹdu seriòre mahãdureny-ò waòraru-ki tewinymy toitemahãu, wadeele tuu tewinytenyete.

⁴¹ Idi tahe kia wahywenawe-ribi ludu tamy ararybekre: –Boibenyke karibi kaiboho heka abinarenyre heòty bedè-ò ihyymy boibenykre ixi-di ariteònykre. Diabo tatytybybinasỹ-ò idi boibenykre. Deuxu isỹ tamy riwinyre.

⁴² Tiu rama riwasareu rỹsỹna kaiboho wadee tewahinytenyõhyyte. Iu bemy rarureu heka ijõ wadee tewahinytenyõhyyte.

⁴³ Torimy rarewahãu, tiu tiwatobinytenyõhyyte. Tykyõ wadee tewahinytenyõhyyte. Binamy rãimy rarewãhã rõtëna-ki wororana webinadumy tahe tòiõhyyte.

⁴⁴ Tai tahe kiamy rarybekre: –Wanyrỹ, tiubohe tuu rewinyrenykorë. Wanohõti heka reaõhyymyhỹre aramamy rubuna-txi, abemy rubuna-txi, torimy tatemahãu, atykyõmy tatemahãu, rõtëna-ki webinadumy tatemahãu wahe.

⁴⁵ Tahe jiarỹ Iòlò tamy ararybekre: –Kaiboho heka waityhydỹdu seriòreõ tewiòhenanyõmahãtenyete tai heka tiwawiòhenanytenyõte.

⁴⁶ Tahe Jesuisi ikonanamy rarybere: –Tai tahe tii tiuhyymy rakre heòty bedè-ò, aõhõkỹmydỹnana-ò. Òbiti mahãdu heka umytuedeõna-ò rakre.

26

¹ Kia taijyy rahudi tahe Jesuisi taerymahãdu-ò rarybere:

² –Ixytyre inatxi txu-di tasỹ aõma Pascoa worana bedehesimy rỹikre. Kai-boho tahe kia teerytenyete. Iu iny riwatyhenykre Deuxu Riòre Hãbu wahe. Irahu-di tahe itxeònihikỹ-ò riwatamadỹnykre.

³ Tahe aõwesele heka xiwena wahidỹdu wedu mahãdu ributunyre heka judeu wedu mahãdu-wana wahe. Kaifa heto wii rotyre. Xiwena wahidỹdu mahãdu wedu wahe.

⁴ Wiwana heka raryberenyre: –Timybohe Jesuisi aõhebo rikisỹnyrenykre aõma teburemy ijiranakõnahakỹle. Timybo rikisiraõnyrenykre, rikimynyrenykre, rikirubunynyrenykre. Urile iny tuu rierykorë.

⁵ Pascoa worana bedehesi rỹireu tahe aõkõlemy idi rỹire. Kia worana bedehesiko-ki iny raaõbinanykeki dori ibutuhukỹlemy heka raaõbinanyke.

⁶ Jesuisi heka rare Betỹnia hãwã-ò hãbu tykybinaõ-wana heka isỹ-ò rare, Simaõ heto-ò wahe.

⁷ Iu iheto-ki riroximyhỹre tahe hãwyyõ tamy rare aderõna lỹnyrehekỹõ-di manaurahyna-ki. Tai tahe Jesuisi tyre ritxiwire, iratityre.

⁸ Ierydỹna mahãdu heka urihimyò heka rebure riòre iòraru-ki.

⁹ Iòwy nihikỹtyhyre dorihe. Tai heka tanieru uriterehekỹle rahuraki heka tai rawobinamy. Idi rohonykewile heka rare aõma iòwy tahe iny aõkõ mahãdu-ò riwahinykewihikỹle tii rõhõtinyre.

¹⁰ Tahe Jesuisi rierytyhymy aõmybo tuu raryberenyrerimy: —Aõherekibo kaiboho ibinamy tarybetenyteri hãwyy-ò. Aõwidỹnana wihikỹ wadee riwinyreri.

¹¹ Aõma kaiboho heka urimynodu mahãdu-wana ihyymy boibekre. Ibutulemy awanareny jiarỹ watxiwãhãde.

¹² Tii heka wahãloodỹna riwaywinyra aderõna watyre ritxiwireu. Kia tahe wadee riwinyre.

¹³ Boholake, iny itxi tõhõti reahyy rỹirakre iòraru-ki. Rybewihikỹ Tỹmyramy ritỹnydỹmyhỹkre heka rierymyhỹkre bede bedemy wahe.

¹⁴ Iribi tahe Judasi Isariò, tii waò inatxi reuròò rare, tii heka ròhõnyre ierydỹna mahãduy-ribi. Tahe rare xiwena wahidỹdu mahãdu wedu-ò. Tahe tamy rarybere:

¹⁵ —Adeereny Jesuisi ariwahikre wana heka tiwesebo biwaòwynybenykre? Kiamy tahe 30 prata womati nieru myhe tamy riwahinyre.

¹⁶ Judasi kia ribile rarunymy raremyhỹ dohodỹnaõmy Jesuisi tamy riwahinykremy.

¹⁷ Pascoa worana bedehesi rỹireule rexidelenyre, Paõ iuridỹkõ, kia txu rỹimyhỹ wahe. Jesuisi erydỹna mahãdu tai ritỹraxyre: —Titxiwexe rikirỹsỹkre Pascoa worana bedehesi jiarỹboho dori ariywinyrenykemy?

¹⁸ Tahe Jesuisi rirawyõnyre: —Hãbuõ hãwãhãkỹ-ki ratximyhỹre tii riwaeryre. Tahe tamy marybekre: —Wawedu kỹny rarybereri aõma aheto-ki heka Pascoa worana bedehesina rirỹsỹkremy taerydỹna mahãdu-wana. Ibededỹna dori iòhõre riki.

¹⁹ Tai tahe taerydỹna mahãdu kia riwinyre idi kowa worana bedehesi rỹsỹna riywinyre.

²⁰ Bedesõmy tahe tai riroximy rorukumyhỹreny, taerydỹna waò inatxi reurò mahãdu-wana wahe.

²¹ Aõma inyõ heka riwatyhenykremy ratximyhỹre. Jesuisi heka tuu rarybere:

²² —Mowexe tii rarekre. Tiiboho rabadewomy roire, tai tahe widee rarybere: —Jiarỹ kõaõboka.

²³ Tahe Jesuisi rarybere: —Kia wawana pratoro tebò rearerile taheka tiikre.

²⁴ Iwese Deuxu Tyyriti-ki Rybe roire wese heka arurukremy jiarỹ Deuxu Riòre Hãbutyhyhỹkỹ watxiwãhãre. Kia hãbu riwatyhenykre tahe tamy heka ibinatyhykre. Ratybienykõre wana inihe awityhyre.

²⁵ Tai tahe Judasi ityhedỹdu rarybere: —Erydỹdu, jiarỹ aõbohe rare? Tahe Jesuisi tamy rarybere: —Kaityhy wahe tate. Kaile tarybeta.

²⁶ Tai tahe Jesuisi orotxu sohojiõ rimyre ibutumy riroxireu, tahe riyreyrenymyhỹre tahe inysohoji sohoji-ò riwahinyre. Tai tahe tamy Jesuisi rarybere: —Kia biybenyke heka. Waumy wese heka kia ratxireri.

²⁷⁻²⁸ Idi vỹ monahynaõ rimymy rexitõenyre Deuxu-ò. Idi tahe tamy riwahinyre iribi sohoji sohoji riõrenykemy. —Biõrenyke kaa dori wahãlubu wesemy ratxireri. Tai sõwemy iny biu-ò rahenykre Deuxu dee. Ibutumy òraruna ixãwididỹmy heka tuu ròhõnyra. Wahãlubu heka Deuxu, iny-wana wii riwoàxinykre rare.

²⁹ Tahe bohólake warybe-ò. Awanareny heka ixityre vỹ monamy ar-iõõtyhy. Kia Waha Iòlõna-ò dehemynynahykyle tahe awanareny ixyby tuu ariõkre.

³⁰ Idi tahe wiuõ rawiunyrenyre idi tahe Oliveira hãwãlò-ò ròirenyre.

³¹ Jesuisi tamyreny rarybere: —Wijiru heka ibutumy kaiboho biwaribenykre. Tyyriti-ki heka roire kiawesemy:

Budoeni-di itxeredu rirubunykre. Ibutumy budoeni raubýtýk्रे bede bedemy.

32 —Waixixana kŷnyk्रेu tahe Kalileia bede-ki awanareny aratxik्रे.

33 Pedro tahe rarybere: —Ibutumy ararirenyk्रे wana tahe jiarŷ aōkōre. Ararirenyōtyhy.

34 Tai Jesuisi heka Pedro-ò rarybere: —Kai heka hānie dele robukōdile biwatxiō-ribi bexihuk्रे, inataōmy wahe. Tuu wijiru rarek्रे.

35 Pedro dirawyònyde: —Aōkōre wa, aruruk्रे heka tahe urile aratxiōnyōtyhy. Tule ibutumy ijō ierydŷŷna tule Pedro wesele rarybere.

36 Tahe Jesuisi ridyrenyre bederaty oworuō-ò, aōma Kesemani ninadu-ò ridyre: —Kakile bonyk्रे arak्रे dori ixitōedŷŷmy kowa-ò.

37 Tahe Jesuisi heka Pedro ridyre ixi-wana. Tule Zebedeu riōre wiwana ridyrenyre. Tahe Jesuisi rabedeòtiidŷŷre aōhōkŷmy rotŷŷnyre bedeòtiidŷŷòrarukile.

38 Tii tahe tamy rarybere: —Kaki wawanale atxibek्रे. Watyytyby heka tŷxihikŷlemy bedeòtiidŷŷ-di ratxireri. Waki bexiebek्रे.

39 Urile tahe tako-ò rariareu tahe resere bede-ò. Jesuisi tahe tyby-ò rarybere: —Waha, rubu mona waribi bitake adeewikeki. Aōkōkeki tahe ariōkre, aruruk्रे adeewilemy aōhebo arotŷŷnyk्रे.

40 Idi tahe dòsede kia ierydŷŷna inataō tai rōrōmyhŷò heka ixyby dòdōsemy nade. Jesuisi rarybere: —Pedro! Kai heka timy sohoji horamy adi bede rŷiōtyhy wawana.

41 Bexixaruhy atxibeke bexitōenymy. Aōkōkeki tahe òraruna kanamyk्रे. Kai heka òbitimy matxikemy tahōtinymahāte. Aumy tahe ibinare heka arurukōre wahe.

42 Ixityre rare rexitōenykemy. Tahe Jesuisi rarybere: —Waha, adeewinale ariwinyk्रे. Aōhōkŷmydŷŷnana monamy heka ariōkre. Kia mona waribi bitaōkeki ihārele heka aruruk्रे.

43 Tai dòsede tai rōrōmyhŷrenyòle heka nade. Tiiboho ixixamy rŷiōhyre.

44 Tahe ròsere ixybyle ikonanamy. Iweselemy rexitōenyre tyby-ò.

45-46 Idi tahe dòsede taerydŷŷna mahādu-ò rarybere: —Bexielehynybeny. Watyhedŷŷdu naderi. Rexihumyhe rare. Hābubina mahādu rehemynyre. Jiarŷ Deuxu Riōre Hābutyhyhykŷ, wahe. Bexixabeny, rakak्रे watyhedŷŷdu dori rehemynyre.

47 Tahe Judasi dehemynyde waòinatxi reurōō wahe. Jesuisi rarybereu, tii nade sōwemy hābu-di mayrehe-di, òhòte-di tōnori-di widotyde. Judeu mahādu wedu tahe iteòdŷŷdure xiwena wahidŷŷdu wedu wana wahe.

48 Juhuu Judasi tamyrenyre bede riywinyre. Kamy rexyrybenymy: —Iòsŷny-ò aruwokrele heka tiik्रे. Tiile bimybenyk्रे.

49 Tahe Judasi rarybere: —Rareri, Wawedu. Iòsŷny-ò ruwore.

50 Tahe Jesuisi rarybere Judasi-ò: —Iò, aōwaxiny aōbo biwinyk्रे iwidŷŷmy tateri. Tahe Jesuisi imahādu rimyre. Ritaataare.

51 Tahe Jesuisi mahāduō mayrehe-di rimymy resere. Tai hābuō-ò reare. Tai tahe tōhòtile rikòròmy idi reare, xiwena wahidŷŷdu wedu deòduō wahe.

52 Tahe Jesuisi tamy rarybere. Aōkōre amayrehe birutyke irasirahana-womy. Kia dori inyō maydese rimymy resekre heka tule ruruk्रे maydeselemy.

53 Karibi ixitarasamy arurukeki dori wahaòle ararybek्रे. Tai tahe waha sōwemy ŷju kiditeònyke, 12 aōbinadu ijoi mahādu wahe. Kia teeryòtenyte.

54 Ihārele tahe ibutumy tuu bededŷŷnana relekre iwese ritidŷŷna-ki roimyhŷre wese.

⁵⁵ Tahe Jesuisi rÿÿraxire tamyreny: –Aõbo jiarÿ raremy wadi tahõtintenyteri. Wasidu aõbo. Kai dori waòrysomy tehemynte maydese-di, tñori-di. Aõherekibo wahe. Jiarÿ heka arabedeerynyreny tXuõ tXuõlemy wahe Deuxu dohodÿÿna heto-ki. Aõherekibo taile tiwamytenykõte kowa watxiwãhãure.

⁵⁶ Kia ibutumy Deuxu Ritidÿÿna-ki roimyhÿre. Tai tahe tuu bededÿÿnana relekre iwese Deuxu rybedu mahãdu rarybere. Ibutumy aõna aõnamy rotÿÿnymy raremyhÿ. Tai tahe taryberahu-di. Ibutumy iery mahãdu iribi tahe robÿtÿre.

⁵⁷ Tiiboho heka Jesuisi ridyrenyre Kaifa heto-ò, xiwena wahidÿÿdu wedu wahe. Tai ibutumy judeu mahãdu wedu ributunyre bede ywina erydu mahãdu tule wahe.

⁵⁸ Pedro irehetyty-ribi riheludunyre. Iheto ube-ki tahe ronyre yrubu dÿÿdu-wana. Tahe rehere aõhebo rotÿÿnykremy.

⁵⁹ Xiwena dinodu mahãdu tahe ributunyre Jesusimy raruikremy heka riijemy. Aõma rirubunykre òbirele heka tuu rarybemyhÿ.

⁶⁰ Tahe inyõ-ki heka rahaõhyre turybedu wahe. Iny sõwemy tahe relyyre. Ihãrele rirubunyõhyre. Iroona-ribi tahe inatxi hãbu dehemynde.

⁶¹ Tai tahe kiamyhe tuu relyyre: –Aõma Jesuisi rarybere: –Aõwesele heka Deuxu dohodÿÿna heto ariatymy idi areake. Inataõ txudi tasÿ ixityre aditamadÿÿke, ibutumy adiwinyke.

⁶² Tai tahe xiwena dinodu heka Jesuisi-ò ryraxire: –Aõbo marybekre kia umy ijyy rohonyreri?

⁶³ Jesuisi tahe rybeõlemy ronyre roholare. Ixityre tamy rÿÿraxire: –Kai heka inatyhy tyhymy Deuxu Riõremy kai atximahãte. Mesia aõbohe kai tate? Deuxu riwaeryre inatyhymy rarybereri.

⁶⁴ Jesuisi dirawyõnyde tamy: –Kaile kia tarybete. Ibutumy iny-ò ararybekre: –Kaiboho ibutumy bobibenykre

Deuxu Riõre Hãbutyhyhykÿmy, jiarÿle wahe. Tii heka Deuxu rurunawe-ribi heka ronykre. Iribi tahe kanakre biuwetyky-ki. Jiarÿle wahe tiire.

⁶⁵ Tai tahe xiwena dinodu tatyky riykare. Reburere kie: –Aõhere tahaka. Deuxumy heka ibinatyhylemy tarybemahãte. Ijõ iny-ò aroholaõkre, rexi-hura!

⁶⁶ Ibutumy kaiboho irybe-ò taholatenyteri, inatyhy? Aõbo rikiwinykre tii ibinatyhyre dori, rikirubunyunykre tahe.

⁶⁷ Tahe iòsÿny-ò rarybexinyre. Rihetenyre.

⁶⁸ Tamy ihetedÿÿdu rarybere: –Marybeke Kristu, mobo arahetenyra inihe.

⁶⁹ Pedro tahe ube-ki ronemyhÿ. Tahe ijadõma heka deõduõ tamy rehe-mynyre: –Kai anõbo Jesuisi Kalileia ludu-wana atximahã. Kumymy rabire.

⁷⁰ Iny ibutuko Pedro rarybere: –Aõkõre, aõmybo arybe reeryõhykyreri.

⁷¹ Tai tahe rare ijò-ò. Ijõ ijadõma deõduõ rarybere kamahãduko: –Inatyhymy heka tiki Jesuisi Nazareludu mahãduno tiki rare.

⁷² Ixityrele Pedro ritxiõnyre: –Reerykõre wahe hãbu. Tiu heka rabiõwãhãre. Inatyhy rare.

⁷³ Idi hãbuõ heka narybede tamy: –Inatyhy rare. Kakÿny irybe weselemy tarybeteri, Kalileia rybe wahe.

⁷⁴ Tahe Pedro rarybere: –Jiarÿ reerykõreri, tuu heka rabiõwãhãre. Deuxu riwaeryre inatyhymy rarybereri. Iule taheka hãnie hãbu robumy reare.

⁷⁵ Tahe Pedro tõhõti itxi reare. Jesuisi rarybere weselemy heka tii riwinyra. Ritxiõnyre. Tai tahe Pedro ròhõnymy reare heka rahinyhyre.

27

¹ Ijõ biurasò ruidile tahe rÿire. Xiwena wahidÿÿdu wedu ributunyre judeu mahãdu wedu-wana. Timywexe aõhe rikisÿnyrenykre. Rikirubunyrenykemy heka idi watxiwãhãre.

² Roma dinodu-ò òsana rikidyrenykre. Tahe tiiboho Jesuisi ritaataare idi ridyrenyre tamy, Pilato-ò.

³ Judasi heka rieryre. Tai tahe tii rabadewonihikÿre rityhenyreki wahe. Tai tahe raraykynyre tawo-ò raòhòrere. Tahe nieru òkesedÿÿmy idi ròhòtinyre. Tahe nieru diwyde, 30 prata womati nieru tahe riòkesedÿÿnykremy judeu wedu mahãdu-ò, Xiwena wahidÿÿdu mahãdu-ò.

⁴ Tahe Judasi rarybere: —Ixãwirahe, jiarÿ raòrarunyra hãbu òbitityhymy ratximyhÿrele retyhenyre heka. Tahe judeu mahãdu dinodu rarybere: —Jiarÿboho, kia aõ aõkõ rare.

⁵ Tahe Judasi nieru-di bedetyrele rihure. Tahe ròhònyre iribi. Tahe rare. Rerotihikÿ-di rexibòtòtaare. Rexirubunyre.

⁶ Tai tahe xiwena wahidÿÿdu wedu riwyre nieru bede-ribi: —Aõwexe kanieru rikiwinyrenykre? Dohodÿÿna hetowo-ò rikirutyrenyke heka aõkõre. Aõma dori rare rubuòwymy iwahidÿÿ heka rare.

⁷ Urile suõle rikiwyrenykre idi. Tai tamy wabede rikiwinyrenykre. Aõma tori kaki rurukreu tahe rikitoonyrenykre tamyle wahe. Tai tahe tiiboho riwyrenyre aõma butxi widÿÿna subede heka riwinyrenyre. Kia heka inire suni wahe.

⁸ Kia bedero tahe rininire aõma Hãlubu Bederomy heka rininire. Wiji tule ini rare.

⁹⁻¹⁰ Iwese Jeremia tyyriti-ki roire wesele heka tii riwinyre:

Take 30 —Womati nieruõ-di heka bedero riwyre butxiwidÿÿdu-ribi. Iwese kai riwateònyre wese. Kia iòwy rare judeu mahãdu-ò tamy riwahinyre wahe. Txiòdÿÿna òwy wahe.

¹¹ Jesuisi heka Pilato, bede dinodusÿ-ki ratximyhÿ. Pilato tahe tamy rÿÿraxire: —Kai aõbo judeu mahãdu iòlò atxiteri? Jesuisi dirawyònyde: —Kai tuu tarybeta.

¹² Xiwena wahidÿÿdu wedu heka tamy rarybere: —Jesuisi rirawyònyòhyyre. Judeu mahãdu wedu-ò tule rirawyònyòre.

¹³ Pilato tahe tamy rarybere: —Kai aõbohe rybe-ò taholate.

¹⁴ Tule tamy Jesuisi dirawyònyòhyyde. Byy! Urile Pilato ribedeòtiidÿÿnyre.

¹⁵ Pascoa worana bedehesi bededÿÿnana tikiemy tuure. Ròtenawo-ribi heka sohoji beòra beòrahyyle ixinamy inyõ rexideònymyhÿ, inysõwe rybe òraru-ki wahe.

¹⁶ Kia beòra tahe hãbu ibinatytyre ròtenawo-ki rÿire. Baraba inire. Ibutumy iny tuu rieryre.

¹⁷ Aõma Pascoa worana bedehesi rÿireu ibutumy iny ributunyre. Tahe Pilato ritÿÿraxinyre: —Tibohe ixinamy ariteònykre Jesuisi Kristu aõbo ada Baraba aõbo?

¹⁸ Tahe iny heka ibutumy urile Jesuisi Kristu luure heka. Tai tahe judeu dohodÿÿdu wedu mahãdu tahe aõkõ tamy waritimy rityhenyrenyre. Pilato kia rieryre.

¹⁹ Iu tabede ywina dohodÿÿna-ki Pilato rÿireu, ihãwy tamy tyyriti riwahinyre. Kawese heka rarybere aõma: —Ixinamy Jesuisi bitekònykre. Anobinatytymybo dokuri rarasino txu wadi reakareri. Jikarÿ anohòkÿmy dÿkÿnana sòwemy ratÿkÿnyre Jesuisi kòraru-ki wahe.

20 Iny sōwehekỹ-ò heka xiwena wahidỹỹdu mahādu wedu rarybere: —Kaiboho mararybebenyke: —Baraba ixinamy biteònykre. Tiiboho dirawyònyde: —Jesuisi birubunykre.

21 Iribi Pilato rarybere: —Tiwexe ixinamy ariteònykre? Tiiboho dirawyònyde: —Baraba biteònykre.

22 Pilato tahe rỹỹraxire: —Aõhebo tahe arotỹỹnykre Jesuisi-di, Kristu-di? —Itxeò nihikỹ-ki bitamadỹỹnykre. Birubunykre.

23 Pilato tamy rỹỹraxire: —Aõbinahakỹ aõbo riwinyraki? Tai tahe ibutumy iny rirajuamy rỹimyhỹ: —Birubunyke kia bitamadỹỹnykre.

24 Pilato iny sōwe-di aõ riwinyõhyre aõbinatyhy òsana ròhònykremy idi ròhòtinyre, tai tahe inyõ rarybere: —Bee kidiwykremy baciaro-ki. Tahe tebò risuhore iny sōwehekỹko-ki. Tamy rarybere: —Jiarỹ kỹny waòraru-ki aõkõ heka rurukre. Kaiboho heka irubudỹỹ erydumyhe boibekre.

25 Tahe ibutumy iny rarybere: —Awire, inyboho heka irubudỹỹdu erydumy rokoirekre, tule wariòrereny òraru-ki wahe ihālubu rejuxunykre. Soldado ridyre itxeò nihikỹ-ò ritamadỹỹnykremy rirubunykre.

26 Tai tahe Pilato heka Baraba riteònyre ixinalemy. Iribi tahe Jesuisimy raòhòtere.

27 Pilato soldado mahādu urile idi juhu risinyre, soldado tyamy ritidire. Pilato heto-ò ridyre.

28 Ityky iribi ritare tahe aõma tykysò-di ritidire heka juhu rihetyntyre.

29 Iòdỹỹmy tahe idi ede lòrilòrihikỹ irati-ò ridekremy. Òwòruõ tebò-ò ritidire. Tai iko-ò resere tatiowotimy. Raryberenyre: —Awire, kai judeu Iòlòtyhy.

30 Ityre rarybexinyre. Òwòru rimyre tahe iratimy tuu raòhòtere.

31 Iribi ritarenyrenyre ihòrõ itykyle ixityre rirutyre ityre-ki. Idi tahe ryò ròirenyre.

32 Iu ròhònyreu, hābuõ Sireni bede luduõ-wana witxi reare. Tamyhe rarybere Jesuisi itxeò riwykemy.

33 Tahe Kòkòta hāwālò-ò rehemynyre. Aõma, rubu ratityby wesemy heka rare. Tai tahe Kòkòtamy heka rininimyhỹrenyre.

34 Tii vỹ riurinyre bee ihyra-wana, idi tahe Jesuisi-ò kia riwahinyre. Iurihi-di teramy reare.

35 Tahe itxeò nihikỹ-ki ritamadỹỹnyre. Irahu-di tahe ityy heka ritxuatxuaenyre wimy rarudeòsanyre tibo iwydydukemy.

36 Idi tahe rethemy rorukumyhỹrenyre.

37 Irati tyre-ki tahe ritidỹỹnaõ roire:

—Kia Heka Jesuisi Rare, judeu Iòlò Mahādu.

38 Tule wasidu brebunahakỹ tii-wana ritamadỹỹnyrenyre itxeò hòkỹ-ki, ijõ iruru-ribi, ijõ ihywe-ribi.

39 Iny ibire-di reamyhỹ idi risinymyhỹ kamy rexirybenymy:

40 —Kai inihe bexitake, kai Deuxu Riòre tateki. Bodobeheke itxeò nihikỹ-ribi.

41 Kai heka arurudiremy iximy tarybemahāte. Dohodỹỹna biatykemy heka iximy tarybete tahe inataõtXu-di heka biwinykemy tarybeta. Tule xiwena wahidỹỹdu wedu mahādu idi risinyre. Tii tahe rarybere:

42 —Tii heka iny iwitxira witxira aõbina bina-ribi ritamyhỹre ihāre tahe taaõbina bina-ribi rexitaõtyhy. Tii heka aõ judeu mahādu iòlò aõkõ rare. Myheka tuu rarybemyhỹ. Kia itxeòhòkỹ-ribi kedexiberesedỹỹnykekile tahe rikityhynyrenykre inatyhymy.

43 Tii heka iximy rarybemyhỹre Deuxu Riòre raremy, Deuxu rityhynymyhỹremy. Reketeherenykre inihe aõbo Deuxu riwiòhenanykremy wahe.

- 44 Wasidu mahādu kia itxeò nihikỹ rỹire iwesele heka tamy rarybere.
- 45 Txutyeyu tahe bedede luruhukỹ bedede reare, txioro tirehehekỹule bedede kamy reare.
- 46 Kiaule tahe bedede ratỹnyre Jesuisi iu ryryre:
—Eli Eli Lema Sabatani.
Kiamyhe rarybere:
—WaDeuxu, WaDeuxu, aõherekibo waribi õhõti rosare?
- 47 Tai tahe iny sõwe mahādu irybe-ò doholade. Ijõ kiamy narybede: —Eliasi-ò hòwa ryryreri.
- 48 Kia ele elemy riwinyre noseõ. Idi tahe vỹõ riryry tamy idi riteònyre. Teòrehemy riwinyre bemy rimonykremy.
- 49 Ijõhe raryberenyre: —Txiokre inihe inatyhymy aõbo reketeherenykre inatyhymy aõbo Eliasi iwiòhenadỹỹmy kanakremy aõbo inihe.
- 50 Jesuisi ixityre rirajuare. Rurure.
- 51 Kia dohodỹỹna heto-ki heka ixiwòtenaõ rỹimyhỹre ierykõna. Tahe urile idi ixivanale ruamy reare iratyre-ribi bede-ò. Suuhe ramytatare. Mana rabòhòbòhònyre.
- 52 Wabede hālooõ heka riraynyre. Deuxu hõrõ mahādu sõwemy rubu-ribi riixixanyre.
- 53 Wabede-ribi ròhònyrenyrene. Iu Jesuisi rubu-ribi riixixareu tahe Jerusalẽ-ò ròirenyre. Tai tahe sõwemyhe iny tuu robire.
- 54 Tai heka soldado dinoduõ ratximyhỹ idi retehemy. Tule soldado mahāduõ tii-wana ratximyhỹre. Ibutumy tuu robirenyre. Tai tahe tabrebu-ribi narybedenyde: —Tii inatyhymy Deuxu Riòre heka rare.
- 55 Hāwyyõ tule retehemy ratximyhỹre irehe-ribi idi. Aõma hāwyy Jesuisi riwiòhenanymy raremyhỹ heka idi retehemyhỹre. Tiiboho Kalileia bede-ribi doide.
- 56 Marie Madalena, Marie Txiause Jyjese, Zebedeu riòrese tule tai ratximyhỹ.
- 57 Bedesòmny Jyje rehemynyre. Tii ityhy heka rare Arimatea hāwã luduõ ratximyhỹre. Tii Jesuisi tyhydỹỹduõ ratximyhỹ.
- 58 Tai Jesuisi umy rexitòenyre Pilato-ribi. Tai tahe Pilato rarybere: —Tamy biwahinykre.
- 59-60 Tahe Jyje linho tyky rirahananymy. Tai tahe aõma wabede tỹmyrahakỹ riamy roireriò heka rituunykremy idi rara. Idi mana nihikỹ ritidire txiò. Idi ròirenyre.
- 61 Marie Madalena ijõ Marie-wana taile retehemy ronyre wabede-ki.
- 62 Ijõ txu tahe fariseu mahādu wedu tule xiwena wahidỹỹdu wedu heka Pilato-ò sexta feira rahudi tahe, judeu mahādu elehyna txu wahe ituere.
- 63 —Jesuisi irumy raremyhỹu tii rarybere:
—Rubu-ribi heka ariixixanykre inataõ txu-di.
- 64 Ruimy rare tahe ihārele tahe biyrubunyke iwabede. Aõkõkre-wana tahe ierydỹỹna mahādu heka iumy riwykre. Tai tahe rarybere: —Tii rexiixixanyre. Tai tahe ibutu rityhynykre iruina. Kia ibinatyhymy rarekre.
- 65 Tai tahe Pilato riteònyre soldado mahāduõ txiò-ki. Tamy rarybere: —Awimy biyrubunyke!
- 66 Kia bedede erynaõ heka tamy ritidire. Txiò-ribi resekreule heka ri-eryrenykre. Tahe soldado mahādu riyrubunymyhỹre.

28

1 Ijõ txu rudile tahe Marie Madalena, Marieõ-wana rare ihāloona-ò itx-eremy, domingo, nobiutxu wahe.

² Aõwesele tahe iu suu ramytatare. Wanyrỹ ÿju heka dobehede biu-ribi iu. Tahe hãloo ijò-ribi mana ritamy ityre ronyre.

³ Iòsỹny heka urile ritoosònyhỹkỹre. Ityky tasỹ iurahakỹre.

⁴ Idi itxeredu mahãdu heka aõma ruberunihikỹrenyre. Urile rõhõtiberemy reserenyre.

⁵ ÿju rarybere hãwyy-ò: —Uritere berebuõmyrenyke. Kai aõbo Jesuisi teijeteri, inatyhy? Aõma itxeò ritamadỹnyrenyre wahe. Reeryre kia.

⁶ Aõkõre kaki aõkõ heka ratxireri. Tii dori rubu-ribi rexiixixanyre iwese tii iximy rarybere wese wahe. Beteheke inihe iherina tyby-ò tai juhu roimyhỹò.

⁷ Make karibi ele elemy ierydỹnako belyykre tii rubu-ribi rexiixixanyraki. Tii heka rara Kalileia-ò tamy wirotyreriò. Matahe, relyyra dorihe adeereny.

⁸ Tai tahe rakòrunyrenyre, hãwyyboho. Ruberumy ròirenyre tasỹ reysamy ròirenyre. Ierydỹna mahãdu-ò heka riijemyhỹre aõma ÿju rybemy ikoreny relyykemy.

⁹ Iu rakòrunyrenyraule tahe wii reòbynyra. Jesuisiwanale heka itxi rekoare. Idi tamy rehemynyre iòhòmy. Iwa rimyrenyre tahe riwowydynyre. Jesuisi tamy rarybere: —Toiteri aõbo!

¹⁰ Uritere breburenyõmyke. Boibeny tahe ijyymy waityhydỹdu mahãdu seriòre-ò heka Kalileia-ò aròirenykemy. Tai tiiboho-wana wii areòbynyrenykemy.

¹¹ Tai tahe tiiboho ròirenyre. Kiaule tahe wabede soldado itxeredu rehemynyre xiwena wahidỹdu wedu-ò wahe. Tahe ibutumy relyyre iko.

¹² Tai tahe nieruõ riwahinyre ruiõmy relyykemy.

¹³ Tamyreny raryberenyre: —Ierydỹna mahãdu heka ridyra watỹireny reòbylemy.

¹⁴ Tai tahe bedede dinodu rierykreu heka aõ adee beleõtyhy aõbinahakỹõ.

¹⁵ Tai tahe nieru sòwemy riwyrenymy tahe tuu ròirenyre ruimy. Wiji dori tuu ijyy rỹira. Ibutumy judeu mahãdu kia rybe-ò rityhynymyhỹre.

¹⁶ Idi tahe ierydỹna mahãdu ròirenyre Kalileia-ò. Tiobo Jesuisi riteònyrenyremy juhutyhy.

¹⁷ Jesuisimy robirenyreu tahe tiiboho bedede-ò reserenyre tahe riwowydynyrenyre. Ijõ mahãduõ riseõnylemy idi rõhõtynymyhỹre.

¹⁸ Tai tahe Jesuisi iòhòtyhymy tamyreny relere kiamy tamy rarybere: —Waruruna heka ibutu ratyre ratximyhỹre kabede-ki tule, biu-ki tule.

¹⁹ Tai kaiboho waha deòdumy boibenyke ibutumy iny bedede mahãdu-ò, bedede konananahakỹ mahãdu-ò ihyy behemynybenyke. Waityhydỹdumy heka bitxienybenyke. Wahanimy, tule Deuxu Riòrenimy, tule Deuxu Tyytybytyhynimy, tahe bòratisebedỹnybenyke wadeòdurenymy, Waha, Ityytybytyhy, Iriòre kaboho deròwymy wahe.

²⁰ Ibutumy aõbo wabede ywina adee rewahinyredi bibedeerykre. Uritere nohòti losarenyõmy awanarenyhyy dori ararekre bededỹnanahyy rekehe-nykre.

Marku Deuxu Rybe Wihikỹ Tỹmyra, Marku Tyyritidỹdu

¹ Kaki heka Rybe Wihikỹ juhu kaki roire. Ka Rybe Wihikỹ Jesuisi Kristumy heka rarybereri. [Tii heka Deuxu Riòre rare.]

² Myheka Isaia tyyriti-ki kia rybe rỹire:
Deuxu rarybere: –Boholake, waõwàdàdu ariteònykre akomy. Tii ary ri-winykre.

³ Tii ryrymyhỹ bederahy-ki: –Kai biwinykre rywihikỹ Wanyrỹ dee. Òbiti tamy biwinyke.

⁴ Joaõ Sebedỹdu bederahy-txi taile ihỹmyhỹ rybe tyyriti ritỹnynymyhỹ. Tii sebenaõmy riòbitinymyhỹ. Kia riwinykemy ixi-txi tõhõti reakemy taòraru-txi kia Deuxu ritakemy.

⁵ Ibutumy Judeia bede ludu mahãdu Jerusalẽ hãwã mahãdu-wana rare bederahy-ò. Taòrarumy relyymy rahudi tahe, Joaõ risebenyre bero Jordaõ-ò.

⁶ Joaõ rexytyynyre kamelo rade tyy-di, tule iròdutyy wereysana iwetya-ki roimyhỹre. Irỹsỹna raremyhỹ, seihikỹle bidi-wana.

⁷ Joaõ rybe tyyriti ritỹnynydyỹmy rarybemyhỹ: –Jiarỹ aõ aõkõ rare, waruru-di aõkõ. Inyõ wahewomy kanakre tahe iruru waruru ratyredỹnyadu rare. Waratyre awityhyke. Jiarỹ riwaixỹrunymy watxireri iwataana ese-ki.

⁸ Jiarỹ bedi arãsebenyre. Tii heka Deuxu Tyytybytyhy-di arãsebenykre.

⁹ Kiatxu Jesuisi nade Nazare Kalileia bede ludu-ribi. Joaõ tii risebenyre Jordaõ bero-ò.

¹⁰ Tii bera-ribi dotuodeu biuwetyky rarayre. Deuxu Tyytybytyhy heka bòtòe wese tamy dobehede.

¹¹ Deuxu rybe-ò roholare biu-ribi: –Kai heka Wariòre waluu tate. Adi wadeysawihikỹreri.

¹² Aõwesele Deuxu Tyytybytyhy heka Jesuisi riteònyre bederahy-ò.

¹³ Tii bederahy-ki 40 txumy bede idi rỹire. Satanasi aõhõkỹmy risỹnymy Jesuisi raremyhỹ. Iròdu deborehekỹ tai rỹiramyhỹ. Ýjurenymy iyrubudỹnyre.

¹⁴ Joaõ rare ròtenawo-ò, idita Jesuisi Rybe Wihikỹ ritỹnynykremy dehemynyde Kalileia-ò. Jesuisi heka Rybe Wihikỹ ritỹnynydyỹre: –Deuxu Iòlòna bede-ò wahe.

¹⁵ Jesuisi rarybera: –Bededyỹnanahe bede reara. Deuxu Iòlòna bedehè iòhòra. Kaiboho ixi-txi õhõtirenymy reake aòrarurenymy-txi bityhynybenyke Deuxu Rybe Wihikỹ.

¹⁶ Jesuisi aho ijàti-ki rariamy ihỹmyhỹ. Tii robira tuurenymy taseriòre-wana ihỹmyhỹ-ò, Simaõ Pedro, Andre-wana. Tiiboho rehumy ihỹmyhỹrenymy rià-di. Tiiboho heka waxidu roire.

¹⁷ Jesuisi rarybera tamenymy: –Kaiboho bodoibedenyke wahemy. Tai tahe araerynanyrenykre iny rimykemy utura temyta wese.

¹⁸ Tahe aõwesele rià ririrenymy. Roire Jesuisi-wana.

¹⁹ Iko roire Joaõ, Txiau, taseriòre-wana. Tiiboho heka Zebedeu riòre roire. Tiiboho hãworo-ki ratximyhỹrenymy rià riywinymyhỹrenymy.

²⁰ Jesuisi tamenymy rarybera: –Wahemy bòdòike. Tahe aõwesele tybyrenymy ririrenymy teòdu-wana. Tahe tiiboho roire Jesuisi-wana ierydyỹnany roirekemy.

21 Tiiboho rirònyrenyrene Kafanaõ hãwã-ò. Judeu mahãdu aõmysÿdÿÿna txu aõkõ. Jesuisi ralore judeu mahãdu dohodÿÿna heto-ò erydÿÿmy.

22 Kowa mahãdu urile bedede riòtiinyre irybe-ki. Tii heka irurutyhy-di rierynanyre, ierydÿÿdu mahãdu wese aõkõ rohodÿÿnanymyhÿre.

23 Kia bedeu heka hãbu tyytybybina-di ratximyhÿre dohodÿÿna heto-ki. Tyytybybina hãbuwo-ribi rarybere:

24 –Aõhebo wadi botÿÿnykre Jesuisi Nazare ludu. Biwahubenykre aõbo? Jiarÿ araeryre mobo kai tatehe, kai heka hãbuõtyhy inatyhy Deuxu-ribi kai tate.

25 Jesuisi tarurumy rarybere: –Kai rybeõmyke. Iribi bõhònyke tyytybybina.

26 Tyytybybina hãbu riatorye riworÿsÿworÿsÿnylemy. Tyytybybina ryryre rybe iteremy, idi ròhònyre.

27 Ibutumy iny ribedeòtiinyre. Ritÿÿraxinyre ijõ: –Aõwexe ratxireri, aõerydÿÿnatÿmyrabo ratxireri. Tii riteònyre tyytybybina. Tyytybybina Jesuisi rityhynyre.

28 Ityhynina Kalileia bedede bedemy reare.

29 Tahe dohodÿÿna heto-ribi ròhònyrenyrene. Jesuisi, Txiau, Joaõ-wana roirenyre Simaõ, Andreboho heto-ò.

30 Simaõ riòre lahi roimyhÿ rubunamy. Tahe aõwesele tuu relyyre Jesusiko.

31 Jesuisi rimyre tebò-ki, tahe, aõwesele irubuna ixãwira. Idi tahe hãwyy tamyreny bedede redere.

32 Txu ralòmy rahudi, ibutumy tamy didydenyde inybina bina. Tule iny tyytybybina tamy didydenyde.

33 Ibutumy iny hãwã ludu iheto ijõ wirotyre.

34 Tii ibutumy binana òta òta riywinyre. Sõwemy tyytybybina riòlòdÿÿnyre. Tyytybybina Jesuisi rierymyhÿre. Tai tahe Jesuisi riijõnyre tyytybybina rarybekeò.

35 Rudile Jesuisi rare bederahy-txi rexitòenykremy.

36 Simaõ, ijõ mahãdu-wana Jesuisi ijesetyhymy roire.

37 Tiiboho Jesuisi raharennyre. Tamy rarybere: –Ibutumy iny arãijereri.

38 Jesuisi tamyreny rarybere: –Rokoikehe rekexinoranyrenyke hãwã wixira-ò. Jiarÿ tamyreny rybe tyyriti aritÿnynykremy. Iurenana tahe jiarÿ anade.

39 Jesuisi rare ibutumy Kalileia bedede-ò. Tyytybybina iny-ribi riteònyre. Tule dohodÿÿna heto-ki tii rybe tyyriti ritÿnynyre.

40 Hãbu tyybina mahãduõ Jesuisi-ò nade. Tii tatiowotimy resere Jesusiko-ò. Tahe Jesuisi-ò hãbu rarybere: –Adee awikeki tahe, biwateytenyke.

41 Jesuisi juhu urile riwotòenyre. Tii hãbu ritorunnyre. Tahe rarybere: –Wadee awire, aty awimy relekre.

42 Tahe aõwesele itybybina reytera.

43 Jesuisi hãbu riteònyre. Rarybere: –Kai tahe inyõdee rybeõmyke.

44 Kai bexiteòsinykre Deuxu aõmysÿdÿÿdu-ò. Iwese Moisesi ròerynadÿÿnyre wese, kai bexiteòsinykre. Kia heka inydee deòsinamy riteòsinyre. Kia iny rieryke timybo teytemy atximahãtemy.

45 Tahe hãbu rare ibutumy inyko relyyra. Kia heka Jesuisi tahe uritere hãwãhãkÿ-ò ralòõhyre. Tahe bederahykile rarire. Ibutumy iny tamy rare ibutumy bedede-ribi.

2

¹ Tiutxuõmybo Jesuisi dòòsede Kafanaõ-ò. Idi tahe rybe reare rehemynymy ratximyhÿ heto-ki.

² Tahe iny, aõriõre aõkõ, tamy wirotyre heto ijò-ò. Tahe Jesuisi relyymyhyõ Deuxu rybemy.

³ Hãbu inaubiõwa heka hãbubina-di tamy detyydenyde. Kia hãbu rawòronyre taumy-ki.

⁴ Jesuisi-ò rehemynyõhykylere iny sõwerekì. Tahe raòwònyrenyre idi heto ratyytyre-ò. Hetotyre riraynyrenyre tahe reru-di diberesedỹnydenyde byretyre-ki Jesuisiko-ò.

⁵ Jesuisi rieryre hãbu rityhynyrenyre, tai rarybere hãbubina-ò: —Waexi aòraru-ribi araxitarasadỹnyre.

⁶ Bede ywina erydỹ mahãdu rorukurenryeri, ixideele rarybemy rỹimyhỹre:

⁷ —Aõherekibo hãbu kiawese rarybereri. Tii iòwe òwelemy rarybereri. Deuxu dee aõbina binalemy rarybereri. Mobo tahe òraru-ribi iny ritake. Deuxule òraru-ribi iny ritake.

⁸ Jesuisile roholaõlere ihãrele rieryre aõmybo raryberenyre. Tai tahe Jesuisi tamyreny rarybere: —Aõherekibo kiawese tarybetenyteri.

⁹ Tibohe isiraõtyhyre, tuu ararybeke: —Aòraru-ribi anaixitarasadỹnyre ada myike, abyre bimyeke, mariake.

¹⁰ Kaiboho bierykemy Deuxu Riõre Hãbutyhyhykỹ irurudire iny òraru-ribi iny ritakemy.

¹¹ Tahe hãbubina-ò rarybere: —Boholake, myike, abyre bimyeke tahe makre aheto-ò.

¹² Tahe hãbu rỹire, tabyre rimymy tahe rare ibutumy inyru-ò. Ibutumy bede riòtiinyre tahe reàlãre Deuxumy. Ibutumy rarybere: —Tiu heka aõmy kawese rabiõhyymyhỹre.

¹³ Jesuisi rare ahohokỹ ijà-ò. Ibutumy tamy doide. Tii iny ribedeerynyre.

¹⁴ Levi, Afeu riõre, ronymyhy nierumynydu hetowo-ki. Jesuisi ibire-di rareò, tii robira. Jesuisi heka Levi-ò rarybere: —Waijoimy mynake. Tahe rỹimy reare Jesuisi ijoi-ò ralore.

¹⁵ Jesuisi taerydỹna-wana rorukure Levi hetowo-ki. Tule nierumynydu mahãduõ ronymyhỹre òrarudu-wana. Ibutumy riroximyhỹrenyre. Sõwemy heka kia iny mahãdu Jesuisi riheludunyrenyre.

¹⁶ Bede ywina erydỹ mahãdu, lahi rybe-di erydỹna mahãdu tuu ro-birenyra. Idi raryberenyre Jesuisi erydỹna mahãdu-ò —Aõherekibo tii rirox-ireri òrarudu-wana, nierumynydu-wana.

¹⁷ Jesuisi roholareu, tamyreny rarybere: —Iny ibinaõkeki tahe luahidu tamy kanaõtyhy. Tahe iny ibinakeki, tamy kanake bina-ò. Òbiti mahãdu itxemy aõkõ anade. Tahe òrarudu mahãdu itxemy anade.

¹⁸ Joaõ erydỹna mahãdu, lahi rybe-di erydỹdu mahãdu-wana byreõhyky txuu tutyhyle rỹimyhỹrenyre. Tahe roire Jesuisi dỹraxidỹmy. Inyõ Jesuisi ritỹraxyre: —Aõherekibo Joaõ erydỹna mahãdu byreõmy rỹiõmyhỹre.

¹⁹ Jesuisi rirawyõnyre: —Heriduõ, itxeredu-wana ratxireriu, byreõmy rỹiõtyhy tutyhylemy.

²⁰ Tiutxulemybo tahe heridu iribi kanatakre, tai tahe byreõmy kỹnyikre tutyhylemy.

²¹ Moheka tyytỹmyra dòbõna ritidikre tyytyby-ò. Idi inatyhymy dòbõna rayjakre tahe tyytyby sõwemy raykake.

²² Moheka òteti bederatyrube tỹmyra rihynymyhỹre iròduty walabuutybywo-ò. Idi tahe raberyrònymyhỹreu, urile iròduty walabuu raykake tahe irube rejujuke. Tule iròduty walabuu ribinadỹnymyhỹre. Irubetỹmyra awire heka iròduty walabuu tỹmyrarokile.

²³ Judeu elehydỹnareny txu Jesusiboho ririranymyhỹrenyre maixõmo wesena oworomy, tai ierydỹỹna riòròmỹhỹrenyre riroxirenykemy.

²⁴ Tahe lahi rybe-di erydỹỹdu mahãdu rarybere Jesusi-ò: —Aõherekibo aerydỹỹna mahãdu riwinyreri aõwidỹỹna aõkõ karare sabado txu.

²⁵ Tahe Jesusi tamy rarybere: —Kaiboho aõbo teriranyõletenyta tyyriti-di. Iwese Daviboho-wana aõhebo rotỹỹnyreri aõmy rekoarenymahãu, rama rahumyhyrenyu.

²⁶ Tii ralore hetotyhy-ò. Tai tahe orotxu sira ybina riyre, tule tamahãdu-ò riwahinyre. Kia tahe Deuxu deòdule rirỹsỹmyhỹre. Kia Davi aõhebo rotỹỹnyre Abiata heka Deuxu deòdu wedurau.

²⁷ Jesusi tamyreny rarybere: —Sabado txu heka rawidỹỹre inydee, iny tahe rawidỹỹõre sabado txu dee.

²⁸ Deuxu Riòre Hãbutyhyhykỹ tahe sabado txu wedu rare.

3

¹ Ixityre Jesusi ralore dohodỹỹna hetowo-ò. Hãbu debò binahakỹõ tai ratximyhyỹ.

² Lahi rybe-di erydỹỹdu mahãdu Jesusi retehemymỹhỹrenyre. Jesusi sabado txuule riteytenykeki, tiiboho rarybekemy aõbinabinakibo raharenykemy Jesusi.

³ Jesusi heka hãbubina-ò rarybere: —Manake.

⁴ Tahe Jesusi ijõ mahãdu-ò rarybere: —Aõwihikỹwidỹỹ awire ada aõbinalemy widỹỹ awire. Tibohe awire, itarasa-ki aõbo ada rubu-ki aõbo. Hãbu mahãdu urile riyryre.

⁵ Jesusi tamyreny retehere raõbinamy. Tii heka iaõna aõna riwotønyrenymỹhỹ. Jesusi hãbu debò bina-ò rarybera: —Ebò biterenyke. Tai tebò riterenyreu, aõwesele awimy relere.

⁶ Lahi rybe-di erydỹỹdu mahãdu rara Iòlò Herodi mahãdu-ò. Tiiboho raryberenyre timybo tahe Jesusi rirubunyenyeke.

⁷ Jesusi rexitare taerydỹỹna mahãdu wana aho-ò. Tahe sõwemy iny Judeia mahãdu, Kalileia mahãdu riheludunyre.

⁸ Ibutumy aõna aõna roholare Jesusi riwinyreò. Tahe sõwemy tamy nade: Jerusalẽ hãwã mahãdu, Idumeia hãwã mahãdu. Iny Jordaõ bero ijà-ribi tule nade. Tule iny Tiro hãwã, Sidõ beà hãwã-ribi iòhòmỹ tamy nade.

⁹ Tahe Jesusi taery mahãdu-ò rarybere: —Walawò bidiwykre. Iny sõwemy dori rehemynyreri. Kidiwawotõmonykre õsana.

¹⁰ Ibutumy bina mahãdu ibymy tebò reareri ixideytedỹỹmy. Urile iny sõwemy riywinyre dori.

¹¹ Tyytybybina Jesusi reteherenyreu, urile iko-txi resere ryryreri: —Kai Deuxu Riòre tate.

¹² Tai tahe Jesusi rarybere tyytybybina-ò, uritere iteòsidỹỹõmykemy.

¹³ Tii raòwònnyre bederatòòmỹ. Tahe taerydỹỹna-ò ryryre tibo tamy reòbykemy. Tahe tamy nade.

¹⁴ Tahe ierydỹỹna waòinatxi reuròmỹ rarunyre tii-wana rarekemy, rybe ritỹnynydyỹkemy.

¹⁵ Tule iruru-di rarekemy inybina riteytenykeky. Tule irurudikemy tyytybybina riteònykemy.

¹⁶ Kie ierydỹỹnanirenyre: Simaõ, (tii tahe Jesusi ijõni riwahinyre, Pedromy)

¹⁷ Txiau ijõ, tii Zebedeu riòre rare. Kia seriòre Jesusi rininirenyre, Boanejimy, inireny. Kia heka irybereny rare, Biumytxy riòrereny.

¹⁸ Ijõ heka Andre, Filipi, Bartolomeu, Mateu, Tome, Tadeu, Txiau. (Kia Txiau heka Afeu riõre rare.) Ijõ Simaõ iwitxira, (tii brebuõmy rybe-ki, tasubedeluudu wahe.)

¹⁹ Judasi Isariò ijõre, kia heka Jesuisi riwahinyre iòludu-ò.

²⁰ Tahe Jesuisi nalode taheto-ò. Ixityre iny sõwemy tamy nade. Tai tahe Jesuisi taerydỹỹna-wana riroxiõhyyre.

²¹ Idi tahe Jesuisi leinarenny itxỹtesana roholarennyre, riõryrennyre. Tiibohe raryberennyre: –Jesuisi itxỹte iòhòlere.

²² Bede ywina erydỹỹ mahãdu doide Jerusalẽ-ribi rarybemyhỹrennyre: –Belisibu idi ratximyhỹre. Tyytyby wedu ruru-di tyytybybina iny-ribi riteõnyreri.

²³ Jesuisi inyko ijyymy relyyre: –Timy taheka Satanasi rexiteõnykre Satanasi.

²⁴ Iòlõna wiribi rexihitxinykeki tahe, rexihukre ibutumy wiludu.

²⁵ Tahe sỹro luduõ wiribi rahitxikeki, rỹiõtyhy.

²⁶ Satanasi rỹikeki reburemy, tii ixiòbitile rexirubunyyke.

²⁷ Inyõ heka hãbu rurutere hetowo-txi ralòõtyhy. Tai rawasinykeki, urile iny ritaataake. Urile hãbu rataataakeki, iròòbymy iny rawasinyke.

²⁸ Inatyhy jiarỹ adee ararybereri, ibutumy òraru heka kanaixãwidinykre hãbu dee aõtxile aõbina binamy rarybemyhỹre.

²⁹ Kia inyõ aõtxile aõbina binamy Deuxu Tyytybytyhymy rarybekeki, tiu heka iòraru rataõtyhy. Kia òraru riwinyre tiiehyymy rarekemy.

³⁰ Jesuisimy kiamy narybedenyde: –Tii heka tyytybybina dire.

³¹ Tadi tahelỹỹna-wana nade. Tahe ahanakile ritamanyre. Tamy riteõnyrennyre iòrysmy.

³² Iny sõwemy iwerora-di ronyre. Tahe Jesuisise-ò rarybere: –Adi aseriõre-wana ahanakile nyide, araijereri.

³³ Jesuisi rarybere: –Mowe nadi rare, waseriõreboho rare.

³⁴ Juhu urile idi retehereri iwerora-ki. Tahe rarybere: –Betehekre, kai-boho ibutumy kaki nadiwesere, waseriõre wese toite.

³⁵ Inyõ aõna aõna riwinymyhỹkeki, Deuxu dee awira. Kia heka nadi, waseriõre roire.

4

¹ Jesuisi ròõsera ahobero ijà-ò iny dohodỹỹmy. Sõwemy iny wirotyre. Tai Jesuisi ronyre hãworo-ò tahe rexitaranyre ahoro-ò. Aho ijà-ò iny wirotyre ijohonamy.

² Tii aõna aõna sõwemy roerydỹỹnanyre ijyutyhydile. Kaa ijyymy tii relyyre:

³ –Boholake, alòbòròna-di dehuu rara alòbòrònamy.

⁴ Alòbòròna-di rehumyhỹu, ijõ ryro-txi resere. Tahe nawiixõmo rirore.

⁵ Ijõ rejujure manarutãsu-txi. Tahe aõwesele raumynyre iraruxiõlemy su dori ibutere.

⁶ Irauxiõreki, bede tòtee alòbòròna rimoenyre idi rurura.

⁷ Ijõ oworuty resere edehu-txi idi ruhunyyre edewanale. Tai tahe ede-ò riòdesenyre tai raratynyõlere.

⁸ Ijõ resere su witxira wihikỹ-txi. Kia tahe raumynyre. Tahe sohoji oworutyõ 30my iraty raratynyre. Ijõ oworuty 60my raratynyre. Ijõ tahe 100my raratynyre.

⁹ Tii rarybera: –Kaibohe aõbo õhõtidiirenyre, inatyhymy warybe-ò bohola. Adee awikeki, bierybenyyke.

¹⁰ Iny robỹtỹre, ijõ rarilere ierydỹỹna mahãdu-wana. Tiibohe rỹỹraxire Jesuisi-ò: –Aõhekemybo telyyta ijyymy.

11 Jesuisi tamyreny rarybera: –Deuxu Iòlòna rybemy Deuxu araery-nanykre. Kia heka tuu teeryõmahâte. Kowaboho-ò jiarỹ urile ijyymy relyyra.

12 Tai tahe kia wesele relyyra.

Iny rethemyhỹkemy tahe robiõhyymyhỹre. Roholamyhỹre ta, rieryõhyymyhỹre. Tai tahe ralòkemy aõkõ, taòraru riixãwididỹỹnakemy aõkõ.

13 Tii tamy rarybere: –Kaiboho aõbo teeryõhyyletenyteri ijyy. Ihãre tahe timykibo bierybenyke ijyy ibutumy.

14 Aloborodu rehumyhỹ alòbòròna-di. Kia oworuty heka rybe wese rare.

15 Oworuty ryijàti ludu heka iwese uriihohonadu wese heka rare. Rybe-ò roholarenyre, Satanasi nade rybe iwo-ribi ritakremy.

16 Manarutàsù ludu iwese iny reysamy roholareri.

17 Iny urihimyòle rarorehenymyhỹre iraruxi sòweòreki. Idihe rasirara irybe. Tule iny ralahatxinamyreki, ihyyle tahe riixãwidinyra.

18 Ede rawo ludu iwese iny wixira roholareri.

19 Tiiboho taaõmydỹỹnadile ròhòtinymyhỹre. Sòwemy nieru-di ratxikemy rexinohòtinymyhỹre ta nieru riitxenanyymyhỹre. Ijõ aõna aõnadile rexinohòtinymyhỹre. Kia aõna aõna rybe rirarutxinymyhỹre. Tai tahe rybe raratynyõmyhỹre.

20 Suwihikỹ ludu iwese iny wixira roholareri. Kia inatyhymy rỹireri heka raratynyre alòbòròna raratynyre wese. Ijõ raratynyre 30my, ijõ tahe 60my raratynyre. Ijõ tahe 100my raratynyre.

21 Tii rarybera tamyreny-ò: –Uritere loosòna ideõmyke butxi worawo-txi ada herina raworawoõ-txi aõbo. Loosòna bidekre bedewiõ-ò.

22 Inyõ iwòteõmy aõna aõna tiiehyymy. Tiutxulemybo ratỹnykemy ihỹre. Iwòteõmy atximahãbenyke aõu bodobikemy atximahãtenyete.

23 Kaiboho aõbo õhòtidirenyre, inatyhymy boholake.

24 Tahe Jesuisi tamyreny rarybera: –Kaiboho inatyhymy boholabeny tamy taholahahãtenyete. Urihixina iwese teõteri wesele, kai biwykre. Ihãre tahe biwykre ijõ teõta-ribi ritamy.

25 Hãbuõ ijõdikeki tamyle rawahidỹỹke, tahe hãbuõ ijõõkeki iribi ratatyhyke.

26 Jesuisi relyyra kia ijyymy: –Deuxu Iòlòna kia ijyy wese rare. Hãbu rehumyhỹre alòbòròna-di suò.

27 Hãbu rummy ròròmyhỹre txulemy rexixamyhỹre. Tii rieryõlemyhỹre timybo alòbòròna ratybienymyhỹre.

28 Suu xixi dee sohojile raratymyra. Juhuu iòle ramyhỹre. Idi tahe raratynymyhỹre, ihewonau, tahe, iraty rasònymyhỹre.

29 Bederaty rasònymyhỹre, iyresydu riteònymyhỹre. Mayrabu-di riòròkemy bederatysò butudỹỹna dori rexihumyhỹre.

30 Tii rarybera, Deuxu Iòlòna wexe aõwesere. Aõ-ò wexe rikioirenykre. Tiwexe ijyy kawesere.

31 Kia heka mostardaty wesere. Tii heka iylatyhymy ratximyhỹre kabede-ki.

32 Tahe tii raumynymyhỹre wana, ireitòbòròdỹỹ ratyre rarurururunymyhỹre. Tahe nawii tamyle rasỹnymyhỹre. Iubòròrò rawolemy taheto riwinyre.

33 Tahe Jesuisi Deuxu rybemy rierynanymyhỹre. Kia ijyy wese sòwemy ijyy rierynanymyhỹre. Kialemy iny-ò Jesuisi relyymyhỹ ibutumy tamy reny ritynynynyhỹreki.

34 Kia-ò riòbitinyòlere ijyyõ. Tahe iny-ribi irehemy taerydỹỹna-ò riòbitinyre.

35 Iu txu txiorolemy Jesuisi rarybere taerydỹỹna-ò: –Rikiòhòreonyke kowa weribi ijà-ò.

³⁶ Sõwemy iny rarire aho ijà-ki. Tahe taerydÿÿna tamy ralore. Roire hãwò-di. Tahe ijõ hãwò idi ratximyhÿre.

³⁷ Tahe bede binahakÿ rexidelenyrene yhymy. Tahe òbò hãwò rihãtenymyhÿ tai ritÿmynykemy ritelenyre.

³⁸ Tai tahe Jesuisi rõrõmy roimyhÿ tòro-ki irati tarahynatyre-ki. Tai tahe ri-ixixanyrene. Ijõ rarybere: —Waerydÿÿdu, adeehe awimy aõbo iny ituerenykre.

³⁹ Rexixamy Jesuisi. Tii yhy riixãwididÿÿnyrene. Tii ahohokÿ-ò rarybere: —Biyryke! Tai bede ruhuwihikÿre.

⁴⁰ Tamyreny rarybere: —Aõherekibo kaiboho taberutenyteri? Deuxu aõbo tetyhynyõmahãtenyte?

⁴¹ Tai tahe tiiboho bede riõtiniyrenyrene. Tahe widee raryberenyrene: —Mowexe tuu yhy ahohokÿ-wana irybe riywinyke.

5

¹ Ritehemynyrenyrene ijõ berohokÿ weribi ijàna-ò. Kowa heka ibutumy hãwãhãkÿ Kadarena inirenyrene.

² Jesuisi hãworo-ribi resereu, hãbu tyytybybina-di robire ròhònyreri wabede-ribi.

³ Kia heka tiemy rasÿnymy raremyhÿ wabede-ki. Katahe wiji moheka womati reroti-di rataataaõtyhy.

⁴ Aõdorihe òhòõre tebò iwa rataataare womati reroti-di. Tiemy heka rimoenymyhÿ. Teòruty ludu tawararu ludu tule ritòtynymyhÿre iyresymy. Moheka iruruõre iny erydÿÿmy.

⁵ Txuu ruu-wana heka tii rasÿnyrene wabedewo-ki. Tii rariamyhÿre bederatòõmy. Tule rirajuamy tai rexihãtenyrene mana-di.

⁶ Tai tahe Jesuisimy robireu, tii raijaranyrene Jesuisi-ò. Resere tatiowotimy Jesuisiko-ò.

⁷⁻⁸ Jesuisi tyytybybina-ò rarybere: —Iribi bòhònyke. Tahe tyytybybina rarybera: —Aõwe wadi tate. Kai, Jesuisi, ibutumy inyõ dee inyratyrene tate. Kai Deuxu Riòre tate. Lãhãmy lãhã, uritere aõbina binahakÿmy wahõrõdÿÿõmykre.

⁹ Jesuisi ritÿÿraxinyrene: —Mobohe anire. Tyytybybina rirawyònyrene: —Wanireny sõwetyhyrene wasõwrenyrenyrene.

¹⁰ Urile karibi wateòdÿÿrenyõmykre.

¹¹ Tahe kowa-ki ixÿni juramy riroximy rÿimyhÿ bederatòò-ki.

¹² Ibutumy tyytybybina rexitòenyrenyrene: —Biwateònybenyke ixÿni jurawomy aralòrenykemy.

¹³ Tahe Jesuisi riteònyrene. Tyytybybina aõwesele ròhònyrene tahe ixÿniwomy ralore. Ixÿni jura tahe raòrunyrene rejuxunyrene ijõtira-ribi. Berawo-txi tahe rabòròròre ahohokÿ-ki. Inatxi mil ixÿni rabòròròre.

¹⁴ Ixÿni-di itxeredu reare ijyymy ibutumy hãwã hãwãmy relyyrenyrene. Tahe iny dirahude tamy itxeremy.

¹⁵ Tiiboho Jesuisi-ò doideu, tuu robirenyrene hãbu tyytybybina-di raremyhÿ. Tii rexitÿynymy rononymyhÿre. Tii heka òbitimy ròhòtinymyhÿre. Tai iny mahãdu rabedeòtiidÿÿnyrene.

¹⁶ Tiiboho tuu robirenyrene, ijõ-ò relyyrenyrene ixÿni ijyymy, timybo aõhebo rotÿÿnyrenyrene hãbu tyytybybina-di ratximyhÿre. Tule relyyrenyrene timybo rotÿÿnyrene ixÿni jura.

¹⁷ Iny rexitòenyrene Jesuisi-ò rexitakremy isureny-ribi.

¹⁸ Jesuisi hãworo-ò ralore. Tahe hãbu tyytybybina-di ratximyhÿre, rexitòenyrene Jesuisi-wana rakemy.

19 Tahe Jesuisi idy derare. Tamy rarybera: —Mahe asỹ-ò, aijoi-ò belyyke aõna aõna Deuxu adee riwinyremy, iwese tii araruxetòdenymyhỹre wese.

20 Tahe hãbu rare Debòwiò hãwãreny-ò. Ibutumy Jesuisi aõna aõnamy ixidee riwinyremy relyyre. Ibutumy iny ribedeòtiidỹỹnymyhỹre.

21 Ixityre Jesuisi rare ahohokỹ weribi ijà-ò. Ixidee iny sõwemy ributunyre. Tii heka ihỹmyhỹ ahohokỹ ijà-ki.

22 Tahe dehemynyde tamy dohodỹỹna heto weduõ. Ijairu inire. Tii Jesuisi robireu, resere tatiowotimy iko-txi.

23 Ijairu rarybere Jesuisi-ò: —Wariòre irubu iòhòtyhylemy roireri. Kai manakre tamy ebò bitidikremy. Tai awimy relekre, ruruõtyhy.

24 Tahe Jesuisi tii-wana rare. Iny sõwemy tule rare iòhòkile tamy rỹire.

25 Kia heka hãwyyõ binamy ramyhỹre. Ihãlubu rejuxunymy raremyhỹ. Beòra waòinatxi reuròmymy rejuxunymyhỹre, rihuõhy raremyhỹ.

26 Tii aõhòkỹmy rotỹỹnymyhỹre sõwemy òhotibedu mahãdu-di. Tahe awimy rotỹỹòlemyhỹre. Urile tanieru ibutumy rahure òhotibedu mahãdu-ki. Awimy releõlemy, ire bede-ò resere.

27 Tahe roholare Jesuisi nina-ò tahe iòhò-ki nade inyy-ki. Idi ihewo-ribi rimyra ityynora-ki.

28 Hãwyy ixidee rarybemyhỹre: —Kriile itykynora-ki karimykeki, karekyteke.

29 Tahe aõwesele ihãlubu ijera ixãwire. Ixidee awimy rõhõtunyre.

30 Jesuisi rieryre iruru iribi ròhònyremy, tai rarybere: —Mobo watyynora rimyra.

31 Tahe ierydỹỹna raryberenyra aõherekibo tuu tarybeta ibutumy taheka iny abirelemy rỹireri.

32 Jesuisi rethemyhỹre urile mobo rarekemy.

33 Hãwyy rierymyhỹ aõhebo rotỹỹnyre. Tii ruberumy Jesusiko-ò resere relyykemy iko.

34 Jesuisi rarybera: —Lerỹ, atyhydỹỹna kỹnyhe aratara. Mahe, kai dori textiywinyta.

35 Tii rarybemyhỹò, dohodỹỹna wedu deòdu rehemynyrenyreri. Tiiboho raryberenyra: —Wawedu, Ijairu, ariòre rurumy roireri. Aõmybo tahe Ery-dỹỹdu-di atxiteri.

36 Jesuisi kia-ò roholara tahe rarybera dohodỹỹna wedu-ò: —Brebuõmy, urile bityhynykre.

37 Jesuisi-wana roire, Pedro, ijõ Txiau, ijõ Joaõ. Joaõ heka Txiau seriòre rare. Kaòle heka reòbyre tii-wana rakemy.

38 Dohodỹỹna wedu heto-ò dehemynydeu, ixijjadỹỹ-ò roholara, robureriò, rirajuareriò.

39 Jesuisi ralore tahe rarybera: —Aõherekibo tabutenyteri. Hirarihikỹ rurumy aõkõ roireri. Tii urile rõrõreri.

40 Juhu urile tai rutxuenyrenyra Jesuisi-ki. Tahe Jesuisi ibutumy iny riòlòdỹỹnyra hetowo-ribi. Tahe ise, tybyle, ixidee rimyrenyra ratxirenykemy. Tahe tamy rirònyrenyre tai hirarihikỹ roimyhỹò.

41 Jesuisi hirarihikỹ debò rimyre tahe rarybera: —Talita kumi. (Katahe iwitxira rybemy rarybera. Kiamyreri heka, mynykemy.)

42 Aõwesele hirarihikỹ rỹimy reara. Tahe rariara aõmyreki iwyrwa waòinatxi reuròmymy iwyrumy. Tahe urile bede riòtiinyrenyre.

43 Jesuisi riteranyre moõ rierydỹỹkemy aõkõ. Jesuisi tule rarybere: —Rỹsỹna tamy biwahynykre.

6

¹ Jesuisi dexitade kowa bede-ribi. Tahe tauladu tybiena hãwã-ò dehemynyde. Taerydỹna mahãdu riheludunyre.

² Sabado txumy rierynanyre dohodỹna heto-ki. Sõwemy iny roholamy rỹimyhỹ bede riòtiinymy. Tahe rarybere: –Tiribibo kia hãbu aõna aõna bede rieryre. Aõbedeeryhykỹbo ratximyhỹre. Timyta heka bedeòby riwinyre.

³ Kia aõbohe aõwidỹdule ratxireri, Marie riòrele. Tiibohe aõbohe Txiau, Jyje, Judasi, Simaõ, seriòrebohole ratxirenyreri. Terỹbohe aõbohe tule kakile ratxireri. Ibutumy iny heka Jesuisi derarenyre. Irybe rityhynyõre.

⁴ Jesuisi rarybere tamyreny: –Deuxu rybedỹdu heka tyhydỹna ritaõlekre tahãwãreny-ribi, tajoi-ribi, tasỹ-ribi.

⁵ Tahe Jesuisi kowa-ki bedeòby riwinyõlere. Urile tebò ritidire inybina bina tyre, taile riteytenyre.

⁶ Jesuisi urile bede idireny riòtiinyre rityhynyõlemyhỹrenyeki. Tahe Jesuisi reurore hãwã hãwã-di erydỹmy.

⁷ Tii ixidee ributunyre tawaõinatxi erydỹna mahãdu. Tii riteònyre inatxi inatxi iubỹtỹnyre. Tamyreny taruru-ribi riwahinyre tyytybybina deòdỹki.

⁸ Jesuisi tuu rarybere: –Urile biwykre adebõna. Uritere orotxu aõkõ, nieruhyna aõkõ, nieru wereysanawo-ki aõkõ, iwydysyrenyõmykre.

⁹ Uritere waubehetyõmy noõmykre. Uritere inatximy wirawomy tyy-di ixityydỹõmykre.

¹⁰ Hãwã-txi malòkeki, tiemy taile bonykre tiubedemybo iribihyyle bòhònykre.

¹¹ Titxi behemynybenykeki, uritere iny erarenymy reakeki, roholaõkeki, txiòrare, urileta awareny bitòtynkre bede erynamy.

¹² Tahe tiibohe roire. Rybe ritỹnydỹmyhỹre iny ixidee rexirahĩrenykemy.

¹³ Tyytybybina irehemy iny-ribi ririradỹnykemy. Sõwemy inybina tyre òlỹre ritxiwire. Tai tahe riteytenyre.

¹⁴ Kia heka iòlò Herodi roholara. Jesusini dori erynatyhymy raremyhỹ. Tahe ijõbohe rarybemyhỹreny: –Joaõ Sebedỹdu rexixara rubu-ribi. Ijõ rarybemyhỹreny: –Eliale ratxireri.

¹⁵ Ijõ rarybera: –Deuxu rybedỹdu ratxireri. Deuxu rybedỹduõ wese heka ratxireri.

¹⁶ Herodi roholareu aõbo Jesuisi riwinyreu, rarybera: –Kia hãbu Joaõ ratxireri. Kia heka irati reore heka rare.

¹⁷ Kia heka iòlò Herodi riteònyre imynamy. Idi tahe ritisanyre ròtenawo-ò. Taseriòre hãwyy òraru-ki kia riwinyre. Filipi iseriòreni rare. Iseriòre hãwyyini Herodia rare. Herodi, Herodia-wana roire iseriòre riòrese-wana.

¹⁸ Juhuule Joaõ rarybere Herodi-ò: –Kai aõkõre aseriòre hãwyy-di mabeõtyhy.

¹⁹ Herodia tamy iky reamyhỹ rirubunykemy ratximyhỹ tahe aõkõhyylere.

²⁰ Herodi tahe Joaõ rityhynyre. Tii rierymyhỹre Joaõ hãbu wihikỹõ ratximyhỹ. Tai riyrubunyre ròtenawo-ki. Herodi Joaõ roholareu, urile bede riòtiinyre urile roholawihikỹre.

²¹ Kia txuu ibeòra reare Herodi lisina berenamy riwinyre. Tahe ibutumy hãwã dinodu, soldado wedu mahãdu, tule ibutumy hãbu ninihikỹ Kalileia mahãdu-ribi rihuòtere.

²² Ijadõma ralore resere, Herodia riòre. Herodi, iny huòtedu mahãdu-wana tamyreny awire. Iòlò ijadõma-ò rarybera: –Aõtxile aõma wadee bexitòenyke, adee ariwahinykre.

²³ Inatyhymy adee ararybekre. Waaõna aõna iweeremy bexitòenykeki, adee ariwahinykre.

²⁴ Ijadòma tadi ritỹỹraxinyre aõmybo tahe tamy rexitòenykre. Ise rarybera: —Joaõ Sebedỹkỹdu rati kai bexitòenykre.

²⁵ Tahe ijadòma ròsere iòlò-ò. Tahe ijadòma rarybera: —Joaõ Sebedỹkỹdu rati kai biwahinykre hyna tyre-ki.

²⁶ Iòlò sòwemy rabedewore irybe-ki. Rexitxiõnyõlere iny dori sòwemy ibire-ki.

²⁷ Iòlò soldado rariare Joaõ rati òrysomy. Tahe irati riorore ròtena-ki.

²⁸ Tahe irati diwyde besetyre-ki. Ijadòma-ò riwahinyre, tahe ijadòma tadi-ò riwahinyre.

²⁹ Joaõ erydỹỹna rieryreu tahe, nade iumy òrysomy. Tahe iumy riwyre wabede-ò.

³⁰ Jesuisi erydỹỹna mahãdu ròserenyre Jesuisi-ò. Tahe relyyrenyra ibutumy aõmydỹỹnana tule ibutumy rierynanyhỹre.

³¹ Jesuisi tamy rarybere: —Inyboho sohojile rokoireny bederahy-txi ixielehydỹỹmy. Tii dori rarybera tamy heka byrena iòhòtyhyõlere tamy roxina raòhòõlere. Iny sòwemy tamy wii reutydynyri.

³² Tahe tiiboho sohojile hãwò-di roire bederahy-txi inyõ-ò.

³³ Iny sòwemy tuu robira ròhònyrerimy. Tahe iny ibutumy hãwã hãwã ludu rajaranyre tòròsòna-ò. Tiibohole juhu rehemynyre iko-ki.

³⁴ Jesuisi rororeu, tahe iny sòwemy robire, riraòreriò. Jesuisi tamy ratòenymyhỹre. Tiiboho dori iwese budoeni idi itxereduõmy rỹireri wesemy.

³⁵ Txuu raloreu, ierydỹỹna mahãdu Jesuisi-ò roire. Tiiboho rarybere: —Ka kỹnyhe bederahy roire txuuke rexihura.

³⁶ Kai tahe iny biteònykre hãwã hãwã mahãdu-ò rỹsỹna ixideereny õbradỹỹmy.

³⁷ Jesuisi tamyreny rarybera: —Kaiboho tamy rỹsỹna biwahinykre. Tahe raryberenyre: —Timybo tahe inyboho 200 prata womati nieru-di orotxu rikiõbranyrenykre. Timy wexe tamyreny rỹsỹna rikiwahinyrenykre. Jesuisi tamyreny rarybera:

³⁸ —Tiwese orotxu bohe rỹire. Maa tamy itxeremy. Idi tahe rieryrenyreu, rarybera: —orotxu iruyre, utura inatxi.

³⁹ Idi tahe Jesuisi iny rabòròhòkỹ asityre rorukukremy.

⁴⁰ Idi tahe iny rabòròhòkỹ wii rirareare, ijõ sĩwõtamy, ijõ 100my.

⁴¹ Jesuisi orotxu utura-wana rimyre tahe retehere biu-ò Deuxu-ò rexitòenyre. Idi tahe orotxu reòròròre. Riwahinyre taerydỹỹna mahãdu-ò riwykremy iny-ò. Tule utura inatxi wirarea riwahinyre iny mahãdu dee.

⁴² Ibutumy iny riroxire. Rihydymy rỹimyhỹ.

⁴³ Idi tahe ritỹxinyre waòinatxi reurò weririmy orotxu yre yre utura-wana rauhenyredi.

⁴⁴ Kia heka rerỹsỹre 5000 iny rỹsỹna-di.

⁴⁵ Juhu Jesuisi riteònyre taerydỹỹna mahãdu ixiko-ò kanaijõwe-ribi ijà-ò, Besaida hãwã-ò. Tii tahe ririre iny riteònykremy.

⁴⁶ Tahe riteònyreu, tii rare ixitòedỹỹmy bede ratòhòkỹ-ò.

⁴⁷ Txioro bedesou hãwò ahotya-ki ratximyhỹre. Jesuisi suki ratximyhỹre ixisohojile.

⁴⁸ Tahe yhy rebònymyhỹ iutedereny-ribi. Hãwò rariaõlemyhỹ. Tahe Jesuisi tuu robire txu ijera iòhò-di. Tahe betyredile tamyreny rariare. Jesuisi iratyreny wese rariakre.

⁴⁹ Tahe tuu robireu, betyre-di rariareriò, tiiboho unisỹna rõhòtinyreny, rirajuareny.

⁵⁰ Tahe ibutumy tuu robira ibutumy ruberurennyre. Jesuisi aõwesele rarybere: —Urule beysabeny, breburennyõmy. Jiarýle watzireri.

⁵¹ Tii ralore tamyreny hãworo-ò. Yhy urile ixãwire. Ierydýñnaboho bederiòtiinyrennyre.

⁵² Tiiboho ruberurennyre, orotxu bedebõbina dori rierykõrennyre.

⁵³ Tiiboho riòhòrennyreu, ritehemynnyre Kenesare-ò. Kia-ki hãwò ritisarennyra.

⁵⁴ Tahe hãworo-ribi ròtuòreriu, ibutumy iny Jesuisi rieryra.

⁵⁵ Juhu raòrunnyrennyre bina bina mahãdu òrysomy. Idi tahe didydenyde roholarennyre titxibo tai Jesuisi ratximyhýð.

⁵⁶ Tii raloreu iny hãwã-ò aõbo ada hãwãhãký-ò aõbo ada bedero-ò aõbo, tiemy iny bina bina mahãdu iryko-txi ritidire. Tai tamy rexitòdenihikýre tamy debò reakemy ityynora-ò. Ibutumy tamy debò reareu, tahe riteytennyre.

7

¹ Jesuisi-ò ributunnyre fariseu mahãdu lahi rybe-di erydýñdu mahãdu wahe. Tule bederi ywina erydýñ mahãduributunnyre. Jerusalẽ-ribi ritehemynnyreri.

²⁻⁵ Jesuisi erydýñna mahãdu tebò risuhòõmy riroxireri. Fariseu mahãdu, Bederi ywina erydýñ mahãdu-wana Jesuisi-ò ritýñraxyrennyre: —Aõherekibo aerydýñna tebò risuhòõmy riroximyhýrennyre. Aõherekibo ihetxiu bederi ywidýñnana rityhynyõreri. Lahi rybe-di erydýñdu mahãdu judeu mahãdu-wana ihetxiu iwidýñnana riwinymyhýrennyre. Tii heka tebò tiu suròduõmy riroxiõmyhýre. Tiiboho aõna aõna wydyna heto-ribi dòõsemahãdeu, tiu heka rõhòõdile riroxiõmyhýre. Sõwemy iwidýñnarenny rityhynymyhýre. Bemona butxi, womati bese-wana risuhòrennyre.

⁶ Jesuisi tamy dirawyònyde: —Isaia juhuule rarybere tiwesebo kaiboho toite. Kaiboho itxenadýñdu toite. Riritinymy rýire:

—Kaiboho riwawowydynymyhýre tary-di. Tahe awo-ribi waluuõlemyhýre.

⁷ Kaiboho riwawowydynnyre tahe watxi nohòti ijeraõlerenny. Kai teerynanyteri erydýñna-di iny nohòti-ribi namyhýdeòle.

⁸ Kai Deuxu erydýñna tyhydýñõmy. Iny erydýñnale tetyhynytennyte.

⁹ Tii tamyrenny rarybera: —Kaiboho aõbo ijõ bihõrõnybenyke, biaõmysýnybenyke. Deuxu rybe bederi ywina kaiboho tetyhynyõlemyhýtennyte. Arybe bederi ywinale tetyhynyõlemyhýtennyte.

¹⁰ Moisesi rarybera:

—Kaiboho biytyhynybenyke adirybe-ò, tybyrybe-ò. Inyõ tadimny tybimny iehehemy rarybekeki, aõtaxiny ruruke.

¹¹ Kaiboho teerynanyteri hãbuõ-ò tadi tybywana-ò rarybekemy: —Wanieru waribi bitaõke. Ariwahiny dori Deuxu-ò. Wanieru heka korbý rare. (Korbý heka uri wahidýñna rare, iwitxira rybe wahe.)

¹² Jesuisi rarybehymny rare: —Kiawese rierynanymny raremyhý, kaiboho uritere hãbuõ tadiboho-ò aõmydýñõmy rarekemy.

¹³ Kawese ityhydýñrennyõmy Deuxu rybe, aerydýñna òraru-ki. Sõwemy aõna aõna kawese tatýñnytennyte.

¹⁴ Tahe Jesuisi ixityre rarybera inysõwe-ò: —Bodoholabenyke, ibutumy bierybenykenny.

¹⁵ Aõbo iny-ò ralòmyhýre, kia tahe iny risunyõlemyhýre, inywo-ribi tahe namyhýde kia tahe iny risunymyhýre.

¹⁶ Inyõ bierybenykeki, boholawibenyke.

¹⁷ Tahe iny-ribi rõhònyreu, heto-ò raloreu, ierydýñna mahãdu tahe tamy rýñraxyre ijyyimny.

18 Tii tamyreny rarybere: —Kaiboho tule aõbo teeryõmahãtenyte. Aõbo iny-ò ralòmyhỹre, kia iny risỹnyõlemyhỹre.

19 Tawotyhy-ò dori ralòõlemyhỹre. Urile weryri-ò ralòmyhỹre idi umy-ribi ròhònymyhỹre. (Ibutumy rỹsỹna tahe awire riki.)

20 Tule rarybere: —Aõbo iny-ribi namyhỹde, kia risurisuunymyhỹre.

21 Inywo-ribi tahe ròhònymyhỹre ibutumy nohòtinana binahakỹ. Kia heka rare nohòtinana binahakỹ: òta òtalemy, wasilemy, rubudỹylemy, ijõ hãbu riðrese ridymy,

22 ibutumy aõna aõna wedu iny ratyrekemy, binamy ròhòtinymyhỹre, ruilemy, aõbina binaõle, itxeredu, aõbina binalemy rybedu, tule itxỹtelemy.

23 Kia heka ibutumy bina bina inywo-ribi namyhỹde. Kia heka iny rexisunymyhỹre.

24 Jesuisi rexitare. Tahe r re Tiro hãwãreny-ò, Sidõ beà hãwã hãwã-ò. Tahe tii ralore hetowo-txi tahe moõ rierykõdi ixidire hetowo-txi. Ralòrau tahe, rexiwòke aõkõ.

25 Jesuisi tyhynina-ò hãwyy roholare, tahe tamy nade, tatiowotimy resere. Iriðre-riki tyytybybina dire.

26 Kia heka hãwyy Grego mahãdu rare. Ilahinanire heka Siru Senisia. Tii Jesuisi-ò rỹrãxire tyytybybina iriðre-ribi deòdỹỹmy.

27 Tahe Jesuisi tamy rarybere: —Txioiny, juhu inihe uladu mahãdu rirox-ikre. Wadee awiðre uladu-ribi rỹsỹna ritake ijòròsa-ò.

28 Hãwyy rirawyðnyra: —Inatyhy rare, Wãhĩ. Kurile rỹsỹna kyre kyre rejumãhãre. Kòwòruku bese-ribi, kuladu-ribi. Kiamy heka itxoðròsa rirakuximyhỹre.

29 Tahe Jesuisi tamy rarybera: —Kia rybe òraru-ki heka kaa tarybeta tyytybybina ariðre-ribi rohonyra. Kia bòðsekre aheto-ò.

30 Hãwyy taheto-ki rehemynyreu, iriðre-ki rahara byretyre-ki roire. Hãwyy rieryre tyytybybina iribi ròhònyre.

31 Tai tahe Jesuisi ixityre rexitare Tiro hãwãreny-ribi, Sidõ beà hãwã reny-ò rara Kalileia aho-ò. Tii raremyhỹu, Debòwiò hãwã hãwã reny ririre.

32 Tahe tamy didydenyde hãbuõ nohòtityõ. Tii roholaõlemyhỹre. Tule awimy rarybeðhyylemyhỹre. Tahe rexitðenyrenyra Jesuisi-ò, tebò ityre ritidikemy.

33 Jesuisi tii ritare inysõwehekỹ-ribi tahe tebò ritidire tõhòti-ò. Tahe rarybexinyre tahe idi tòròtòbymy reare.

34 Tahe Jesuisi tarue ruwyre biu-txi, ele-di reare. Tahe rarybere: —Ebata. (Kia heka rybe riwiuròsòdỹỹmy rare, —Biraynyke.)

35 Aõwesele tõhòti riraynyre. Tòròtò riykoykonyre. Tii aõwesele awimy rarybere.

36 Jesuisi rarybere: —Uritere iny-ò ijyyõmykremy. Ihãrele tahe ibutumy kiamy iny-ò relyymyhỹre.

37 Idi bede riòtiinyrenyre. Tahe raryberenyre: —Ibutumy tii riteytenymyhỹre. Tii nohòtity aõwesele roholamyhỹre. Hãbu rybeõ aõwesele rirybedỹỹnymyhỹre.

8

1 Kia txuu ixityre iny sõwemy ributunyre. Kiau tule aõrỹsỹnamy ijõðhyllere. Jesuisi taerydỹỹna mahãdu ixidee ributunyre. Tahe tamyreny rarybere:

2 —Jiarỹ inysõwe rewotðenyre. Tiiboho txuu inataõ waki rỹireri byreõlemy.

3 Jiarỹ byreõlemy ariteðnyrenykeki, ryrowetyakile reserenykre iðderawyrinymy. Tule, iny sõwemy irehe-ribi nade.

⁴ Ierydỹna tamy dirawyònyde: –Tymyaka inyboho tamyreny orotxu rikiwahinyrenykre kabederahy-ki.

⁵ Tii ritỹraxyre: –Tiwesebo orotxu kai ijõdire. Tiiboho rarybere: –Debò inatxi reuròmy.

⁶ Jesuisi iny sòwemy risỹdỹnykremy sutyre-ò. Tii orotxu debòinatxi reuròmy rimyra. Tii rexitòenyreu tahe riorore. Tahe riwahinyre taerydỹna mahādu-ò riwykemy iny sòwe-ò.

⁷ Tule utura ibutemy rỹimyhỹ. Tahe rexitòenymy rahudi tahe taerydỹna-ò rarybere: –Kaa tule biwybenyke iny sòwe-ò.

⁸ Tiiboho riroxirenyremy tahe rihydymy ratximyhỹ. Iyre yre rauhenyre riwyrenyre weriri debò inatxi reuròmy riwyrenyre rỹximy.

⁹ Inaubiòwa mil iny iòhòmy rỹimyhỹ. Tahe Jesuisi rexideòwarinyre iny sòwe-ò.

¹⁰ Tii ralore hāworo-ò taerydỹna-wana. Tiiboho roire Damanuta hāwāreny-ò.

¹¹ Lahi rybe-di erydỹdu mahādu nade fariseu mahādu wahe. Tiiboho tamy nade rybe òbitidỹmy. Tiiboho rỹraxyrenyra bede erydỹnaò kiditeòsinykremy. Lahi rybe mahādu rierykemy tii inatyhy rare urenana.

¹² Tii raelewesenanyre tawo-ki rarybere: –Aõherekibo kaa iny mahādu rỹraxyre bede erydỹnamy. Inatyhymy jiarỹ ararybekre: –Bede erydỹna heka tamy rawahidỹõtyhy.

¹³ Tahe idi Jesuisi rexitare. Hāworo-ò ralore. Idi rohorere kanawe-ribi ijà-ò.

¹⁴ Ierydỹnaboho tahe tōhōti rosare orotxu wydysy-ribi. Sohojityhyle heka orotxu roimyhỹ hāworo-ki.

¹⁵ Jesuisi tamy ribedeerynyre: –Beteheiny, biyrubuny, lahi rybe mahādu, Herodi mahādu-wana wirỹsỹna uri-ribi.

¹⁶ Jesuisi erydỹna mahādu ixideele rarybere: –Aõherekibo Jesuisi kia rarybereri. Inyboho iorotxurenyõreriki òsana.

¹⁷ Jesuisi heka rieryra tahe rarybera: –Aõherekibo raryberemy orotxu ijõõremy. Kaiboho aõbo teerytenyõte. Kaiboho aõbo arawoxierynyrenyõre.

¹⁸ Kaiboho aõbo arueõrenyre. Tabiõletenyteri. Kaiboho aõbo itxi õhõtireny reaõlereri.

¹⁹ Jiarỹ 5000my iny-ò orotxu reareareu, tiwesebo weririmy orotxu yre yre-di ritỹxinyre. Tahe tiiboho rirawyònyre: –Waòinatxi reurò weririmy.

²⁰ Tahe debòinatxi reurò orotxumy reòròra 4000 inymy, tiwesebo weriri orotxu yre yre-di ritỹxinyre. Tiiboho rirawyònyre: –Debòinatxi reuròmy.

²¹ Tahe tamyreny rarybere: –Tymyrekibo tahe teerytenyõte.

²² Dehemynyde Besaida hāwā-ò. Tahe hābu ruetà-di tamy didydenyde. Rexitòenyrenyre tamy debò reakemy.

²³ Jesuisi tebòmy rimyre tahe ridyre hāwā-ribi bederahy-ò. Iruetyre rarybexinyre. Tebòmy tamy reare. Tahe ritỹraxyre: –Aõmybo aõbo tabiteri.

²⁴ Hābu tahe biu-txi tarue riukora, tahe rarybera: –Hābumy rabira, òwòru wese rỹireriò, rariareri.

²⁵ Ixityrele Jesuisi tebò reare irue-ò. Hābu heka irue reyteramy òbitilemy retehereri. Robire irehetyhy-ò itỹnyhỹkỹlemy.

²⁶ Tahe Jesuisi riteònyre isỹ-ò urile ihāwā-ribi ròðseõmykre.

²⁷ Jesuisi taerydỹna mahādu-wana ròhònyrenyre Sesaria Filipi hāwāreny-ò. Ryki taerydỹnareny-ò ritỹraxyre: –Mowe hābureny wamy raryberenyra jiarỹ raremy.

²⁸ Tiiboho rirawyònyra: –Joaõ Sebedỹdu riki, ijõ Eliasi riki, ijõ riki Deuxu rybedỹduõ.

²⁹ Tahe Jesuisi tamyreny ritỹřraxyryra: —Kaiboho, mobo tarybetenye jiarỹ raremy. Tahe Pedro rirawyònyre: —Kai Kristu atximahâte.

³⁰ Tii raraybinihikỹmy ixi-ki rarybera: —Inyko wamy ijyyõmykre.

³¹ Jesuisi rexiranyre erydỹřmy: —Deuxu Riòre Hãbutyhyhykỹ heka aõna aõnamy aõhõkỹmy rotỹřnyhikỹkre. Matuari mahãdu heka ixideramy ryanakre. Tule Deuxu aõmysỹdỹřdu wedu, Bede ywina erydỹř mahãdu ixideramy ryanakre. Jesuisi kudurukre idi tahe txu inataõ rỹidi kedexixakre rubu-ribi.

³² Idi tahe iòrurehekỹlemy tamy rarybere. Pedro iny-ribi Jesuisi ritare, tahe tamy rarybere: —Kawese rybeõmyreke.

³³ Jesuisi ròðsemy reare, retehemyhỹ taerydỹřna-ò tahe Pedro-ò rarybere: —Bexitake wako-ribi Satanasi. Kai dori Deuxu ijoi aõkõ atximahâte. Kai hãbu ijoi tate.

³⁴ Jesuisi ributunyre iny sõwehekỹ, taerydỹřna-wana tahe rarybere: —Inyõ wahemy kanakeki, ixideele rexirahĩke, tahe taitxeò rimyke riwaheludunykemy.

³⁵ Mobo taumy tarasamy rurukeki, riononykre. Tahe aõtxile iny waluukeki, Rybewihikỹ luukeki, taumy wadee riononykeki, kia heka taumy ritakre.

³⁶ Aõbo tahe awire, ibutumy aõna aõna bitake tai aumy biononyke.

³⁷ Aõbo tahe iny riwahinykre taumy wydyna òkesena aõbo.

³⁸ Kai wijinabòdu òrarudu mahãdu rare, òta òtadu rare. Aõtxile iny walau warybe lau raixỹrukeki, tule Deuxu Riòre Hãbutyhyhykỹ ilau kanaixỹrukre tii nadeu řjuwihikỹ-di boo wowydyna-ò.

9

¹ Tii tamyreny rarybere: —Inatyhymy adeereny ararybekre. Ijõõ kaki ratximyhỹre ruruòtyhy Deuxu Iòlòna taruru-di kedehemynykreu.

² Tahe debò sohoji txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire. Jesuisi tamyreny rexiwitxiranyre.

³ Ityy heka urile rabòtòranyre. Iurahakỹmy relere suròna ratyre heka rauranymy ritoosònyre.

⁴ Tahe tamyreny dexitỹnynde Eliasi, Moisesi-wana tahe rarybemyhỹre Jesuisi-wana.

⁵ Pedro rarybere Jesuisi-ò: —Wawedu, awityhymy inihe kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò.

⁶ Pedro rieryõlemyhỹre aõmybo rarybekemy ruberumyhỹremy.

⁷ Nonoe dobehede iubòròna bede ritòbònyre. Tahe rarybere reare rybeuni iy-ribi: —Kia heka wariòre waluu rare. Kaiboho tamy boholabenyke.

⁸ Tiiboho reteherenyre tahe inyõ robiòlerenyre. Jesuisilemy robirenyre.

⁹ Dohedeu tahe inydee Jesuisi rarybere: —Uritere inyõ-ò tuu ijyyõmykre aõmybo tobitemy. Uritere Deuxu Riòre Hãbutyhyhykỹ rubu-ribi rexixareu, tai tahe tuu belyybenykre.

¹⁰ Kia rybe wasimy riworenyre. Ixideerenyle wii ritỹřraxyryrenyre: —Aõmybo rarybereri, rubu-ribi rexixamy nade.

¹¹ Tiiboho tamy rỹřaxirenyre: —Aõherekibo bede ywina erydỹř mahãdu rarybere Eliasi juhu kanakremy.

¹² Tii rirawyònyre: —Inatyhymy, Eliasi juhu nade. Ibutumy aõna aõna riywinykremy. Tewesebo raritananyrỹreri: —Deuxu Riòre Hãbutyhyhykỹ aõna aõnamy aõhõkỹmy rotỹřnyhikỹre. Tahe tii inydee awiõhyykre.

¹³ Adeereny ararybekre: —Eliasi nade. Tule iny ixideewilemy tamy riwinyrenyre. Kaheka iaõmydỹřnana rirititananyrỹire.

14-15 Jesuisi dehemynydeu taerydỹna mahãdu-ò, tahe robire iny sõwehekỹmy tahe bede ywina erydỹ mahãdu taerydỹna-wana ritxiõnymyhỹre. Tahe Jesusimy robireu, tahe tiiboho riumysaõnyrenyre. Raõrunyrenyre irybedỹmy.

16 Tamy rỹraxire: –Aõmybo tamyreny tatỹraxinyteri.

17 Inyõ rirawyõnyre: –Erydỹdu, wariõre adee redyreri. Tii tyytybybina rybeõhõkỹ-di ratxireri.

18 Tyytybybina rimyreu tahe riatyre bede-ò. Idi tahe urile txuu riyiyinyre. Tahe tii rubureriwesele roire. Aerydỹna-ò jiarỹ rarybera tyytybybina riteranykremy, tahe tiiboho iruruõhyymyhỹ.

19 Jesuisi tamyreny rarybere: –Tiwesebededỹnanabo wijinabõdu ityhyõlemy rỹira. Tiwesebededỹnanabo awanareny ariijekemy. Wadee uladu bididyke.

20 Tahe didydenyde Jesuisi-ò. Jesusimy robireu tahe tyytybybina urile raitxỹteitxỹtenymy resere. Idi tahe urile bede-ki rara õhõremy raratymyhỹ rybexi irywomy rõhõnymyhỹ.

21 Jesuisi rỹraxire uladutyby-ò tiubedemybo taheka kaa binana tamy dehemynyde. Tii rarybere: –Uladuylale idi rõrarunyre.

22 Tiwese wese aõkõ idi rehure bera-ò, heõty-ò rahukemy. Aõ biwinykeki, jiarỹboho biwawiõhenanyke wijile. Kai biwaruxetõenybenyke.

23 Jesuisi rarybere: –Kai bityhynykeki, ibutumy aõna aõna rỹimyhỹre.

24 Aõwesele uladutyby ryryre idi tahe rarybere: –Jiarỹ retyhynyre, biwiõhenanykre aõbo rauhenyre.

25 Jesuisi iny sõwemy robire wii rotyrerimy, tahe riteranyre tyytybybina-ò: –Kai tyytyby rybeõ tule roholaõ iribi bõhõnykre, tiu ixityre malõõtyhy.

26 Tyytybybina ryryre. Uladu ritxỹtenyre idi tahe rõhõnyre. Uladu rubuwe-sele roire herimy. Tahe iny sõwemy rarybere: –Tii rurura.

27 Jesuisi rimyre tebò ritamadỹnyremy tahe uladu rỹire lamamy.

28 Heto ralorenreu ierydỹna mahãdu tamy rỹraxirenyre: –Aõherekibo jiarỹboho tyytybybina riteõnyõrenyra.

29 Tamyreny rarybere: –Kaiboho bexitõenybenykeki byreõna-di bonybenykeki, kiawesele heka rõhõnyke.

30 Iribi rõhõnyreu, Kalileia lowysy-di roirenre. Jesuisi heka inyerydỹderamyhỹ tai ratximyhỹki.

31 Taerydỹna mahãdu Jesuisi rierynanymyhỹre. Jesuisi tamyreny rarybere: –Deuxu Riõre Hãbutyhyhykỹ heka rawahidỹkre hãburenyõ-ò. Tii hãbureny rirubunykre. Idi tahe txu inataõ txuu rỹidi tahe kedexixakre rubu-ribi.

32 Tiiboho rierykõlere tahe ruberurenre tỹraxidỹki.

33 Idi tahe rehemynyre Kafanaõ-ò. Ralore heto-ò. Jesuisi tamyreny rỹraxire: –Aõmywe widee tarybetenyteri ryro-ki.

34 Tiiboho urile roholarenre rybeõlemy. Ryro-ki dori rarybemyhỹ mowexe wiribi aõnimy rõhõnykre.

35 Tahe Jesuisi ronyrenyredi, Jesuisi taerydỹna mahãdu ributunyre erydỹmy: –Inyõ juhuludumy rarekemy ratxikeki, tai heka tii ihewoludukre. Tule tii reakre ibutumy deõdumy.

36 Tahe Jesuisi uladuõ rimyre risỹnyre iubetya-txi tahe taerydỹna-ò rarybere:

37 –Moõ uladu kawese wadee riwiõhenanykeki, riwawiõhenanyre. Moõ riwawiõhenanykeki, tule wateõdỹdule riwiõhenanyre.

³⁸ Joaõ tamy rarybere: —Erydỹdu, jiarỹboho tuu rabirenyra inyõ tyytybybina-di ani-ò rehureriò. Tahe iny mahãdureny aõkõ rare. Tahe jiarỹboho tamy reijõnyrenyre iny mahãdureny dori aõkõ rare.

³⁹ Tahe Jesuisi rarybere: —Bijõnybenyõkre. Inyõ wani-di bedeòby riwinykeki, wanimy heka ibinamy rarybeòtyhy.

⁴⁰ Iny òluduõkeki, tii heka iny ijoi rare.

⁴¹ Inyõ beõ adeereny waninamy riwahinykre-wana, kai waerydỹna dori tate, inatyhymy adee ararybekre. Tii tawahidỹna ritakre.

⁴² Inyõ kaa uladu ityhydỹdu riatykre òraruna-txi, kia heka tamy awire tòti-ki myna ritaamy idi bera-txi rehure.

⁴³ Ebòle araatykeki òraruna-txi, juhuule adee awire ebò biòròke. Kia heka awityhykre iny welytyle ralokre biu-ò, tahe awiòtyhykre heòtytòteehekỹ-ò ralòkeki debò inatxi-di.

⁴⁴ [Tai mohõ ruruõtyhy. Heòty ruruõtyhy.]

⁴⁵ Awa araatykeki òraruna-txi, juhuule adee awire awa biòròke kia awire iny rariake awa sohojilemy, awiõre heka heòtytòteehekỹ-ò ralokre awa inatxi-di.

⁴⁶ [Tai mohõ ruruõtyhy. Heòty ruruõtyhy.]

⁴⁷ Arue araatykeki òraruna-txi, bitake idi behuke juhuule adee awire arue sohoji-di Deuxu Iòlò biu-ò ralokre, tahe awiõre heòtytòteehekỹ-ò ralokre arue inatxi-di.

⁴⁸ Tai mohõ ruruõtyhy. Heòty ruruõtyhy.

⁴⁹ Ibutumy iny heka heòty-di rijyyranykre.

⁵⁰ Jyyra heka awire, saa wahe. Urile taruru riononykeki, tiwesebo tarỹsỹna uri ixbyle tawo-ki bitidikre. Kaiboho ibutumy widee eysarenylere.

10

¹ Jesuisi iribi rexitare. Tahe rare Judeia bede bede-ò, tule Jordaõ kanawe-ribi ijà-ò. Iny sòwemy tamy ributunyre, tahe tiiboho Jesuisi rierynanyre. Tii reòarimy tuu ratximyhỹre.

² Tamy lahi rybe-di erydỹdu mahãdu dehemynydenyde irutaadỹrenymy. Tahe tamy rỹraxyre: —Hãbu aõbo tahãwyy ririleke, awire aõbo ibinare aõbo.

³ Tahe Jesuisi tamyreny rirawyònyre: —Aõrybe bede ywina-di Moisesi rierynanyre.

⁴ Tahe tiiboho Jesuisi-ò dirawyònydenyde: —Tii rierynanyre iny tahãwyy ririkemy. Urile juhoo hãwyy bede erydỹna rybe tyyriti riwinykemy, idi tahe tahãwyy ririkemy.

⁵ Jesuisi tamyreny rarybere: —Õhõtityre dori Moisesi kia rybe bede ywina adee riwahinyre.

⁶ Juhu bedeu Deuxu riwinyre hãbu, hãwyy-wana.

⁷ Iurenana tahe hãbu tadibohosỹ-ribi ròhònymyhỹre tai roimyhỹre hãwyy-wana.

⁸ Hãbu inatyhy hãwyy-wana roimyhỹreu, sohoji tyhylemy radenymyhỹre. Iny inatxi inymy aõkõ rỹimyhỹre, sohoji tyhylemy rỹimyhỹre.

⁹ Hãbu hãwyy-wana Deuxu ributunyre, iny iwitxira wiribi ritòhòrarienyòtyhy.

¹⁰ Hetowo-ki tahe ierydỹna ritỹraxyre kia rybe-ki.

¹¹ Jesuisi tamyreny rarybere: —Aõtxile hãbuõ tahãwyy ririkeki tahe ijõ-wana roiikeki, kia heka òtadu rare.

¹² Hãwyy tahãbu ririkeki tahe ijõ hãbu-wana roiikeki, kia heka wedena rare.

¹³ Tiiboho tamy didydenyde uladu tamy debò reakemy. Tahe ierydÿÿna riononymy rarybere tamy idyrenyõmykre.

¹⁴ Jesuisi kiamy robireu, rikyaranyre rarybere: –Txiò, kididyke uladu wadee. Uladu wese dori Deuxu Iòlòna rare.

¹⁵ Inatyhymy ararybekre: –Moõ heka uladuwesemy Deuxu Iòlòna ralòõkeki, kia heka Deuxu Iòlòna-ò ralòõtyhy.

¹⁶ Tahe Jesuisi rexiranyre uladu manamy taaxiò-ò rimyre. Tahe tebò iratyytyre ritidimy tamyreny rarybewihikÿre.

¹⁷ Tahe Jesuisi rydi raloreu, hãbuõ tamy reare. Tahe hãbu iko-txi resere tatiowotimy. Rarybere: –Erydÿÿdu wihikÿ, aõwexe ariwinykre biu-ò hena aritakremy tiiehyymy umywihikÿ-di ararekremy.

¹⁸ Jesuisi tamy rarybere: –Aõherekibo wihikÿmy wadee tarybeta. Hãbu awiõre. Deuxu sohojile tahe awire.

¹⁹ Bede ywina kai teeryte: rubudÿÿõmykemy, tule òta òtaõmykemy, wasiõmykemy, tule ruiõmykemy, iny wii itxenadÿÿõmykemy, adi bityhynykemy, boo tule.

²⁰ Hãbu tamy rarybere: –Erydÿÿdu, kia bede ywina rewinyhyylere, uladu-ule wiji-ò.

²¹ Jesuisi tamy retehere tuu reòarire tahe rarybere: –Kai sohoji aõmydÿÿnale aki nasiranyde. Kai makre, ibutumy aõna aõna-di bòhònykre, idi tahe idi biwahinykre iny aõkõ mahãdu-ò. Kia tahe aõmydÿÿnadikre biu-txi. Tahe manakre biwaheludunykre.

²² Kia rybe-ki heka hãbu rabadewore. Rexitare ibedewomy urile iaõna aõna sõwetyhyreki.

²³ Jesuisi retehemy iwerura-di tahe rarybera taerydÿÿna-ò: –Kia iny iaõna aõna sõwemy rÿireri, tamy Deuxu Iòlòna-ò ralòke isirare.

²⁴ Ierydÿÿna mahãdu bede ribedeòtiinyrenyire irybe-ki. Jesuisi ixityre rarybere: –Waexiboho, isiratyhy rare Deuxu Iòlòna-ò ralòkemy.

²⁵ Kamelo tyyrorenawo-di ralòkemy isirakeki, kia-ribe isiratyhyre iny iaõna aõnadikeki ralòke Deuxu Iòlòna-ò.

²⁶ Tiiboho bede ratiinyre sõwemy. Widee rarybere: –Mobo tahe iòraru-ribe iny ritakre.

²⁷ Jesuisi iwerora-di retehere tahe rarybera: –Inatyhymy kãaõboka hãbu-ò isiratyhyre. Deuxu-ò tahe ibutumy aõna aõna isiraõre.

²⁸ Pedro rexiranyre rarybere: –Boholake, jiarÿboho ibutumy rerirenyra araheludunykremy.

²⁹ Jesuisi rarybere tamy: –Inatyhymy adeereny ararybekre. Moõ waluukeki, rybewihikÿ luukeki, kia heka ririkre: heto, taseriõre, tyby tadi-wana, tariõre, tabede, ibutumy ririkre.

³⁰ Wijile itarasamy rarekre: 100 sÿmy, 100 seriõre, 100 tybyboho, 100 tadiboho, 100 tariõreboho, 100 tabede. Iny tamy rarybebinanykre tule. Ijõ bede kanakre tahe taumy tÿmyra-di tiemy rarekre.

³¹ Tahe sõwere juhu ludu ihewomy ròhònykre. Ihewo ludu ijõ iko-ò ròhònykre.

³² Tiiboho rydi raòwònyrenyire Jerusalẽ hãwã-ò. Jesuisi heka rare iko-renymy. Ierydÿÿna mahãdu bede ribedeòtiinyre. Tiiboho Jesuisi riheludunymy ihewo-ribe. Tahe Jesuisi reraòmyhÿ idi rare waòinatxi reurò taerydÿÿna mahãdu-wana. Tii relyyre ixityre aõbo ixidee kÿnyikremy.

³³ Boholabenyke inyboho roirenyreri Jerusalẽ-ò. Kowa, jiarÿ Deuxu Riòre Hãbutyhyhykÿ, inyõ riwawahinykre Deuxu aõmysÿdÿÿdu mahãdu wedu-ò, bede ywina erydÿÿ mahãdu-ò. Kia warubudÿÿmy riwawahinykre tori-ò.

³⁴ Tiiboho kidiwalahikre. Watyre kanarybexinykre. Òhòte-di kidiwahâtenykre. Idi tahe kidiwarubunykre inataõ txu-di. Tahe rubu-ribi adexixakre.

³⁵ Joaõ, ijõ Txiau, wii Zebedeu riòre, tamy nade. Tahe rarybere: —Erydỹỹdu, kai aõma aõ wadeereny biwahinykre.

³⁶ Jesuisi rarybere: —Aõbohe jiarỹ adeereny ariwahinykre.

³⁷ Tahe tamy rarybere: —Kai, aiòlõnasỹ-ò kedehemynykreu, aruruwe-ribi aronykre, waseriòre ahywewe-ribi ronykre.

³⁸ Tahe Jesuisi rarybere: —Kaiboho teeryõlemahâte aõmybo textitõenyteri. Kaiboho aõbohe wabemona-di biõbenyke idi Jerusalẽ-ò adiõkremy wahâredi. Kaiboho aõbohe wasebena-di mohõlebenyke idi jiarỹ anohõkremy wâhâredi.

³⁹ Tiiboho dirawyõnyde: —Kohe tulekre. Jesuisi tamyreny rarybere: —Bemona-di ariõkre kaiboho tule idi biõbenykre. Sebena-di jiarỹ adohõkremy, kaiboho tule idi mohõbenykre.

⁴⁰ Tahe mobo wabire ronykre ruruwe-ribi hywewe-ribi kia heka jiarỹle ariwahinyõkre. Kia tahe iyrubudỹỹmy rỹireri Deuxule kidiwahinykremy.

⁴¹ Tai debòwiò erydỹỹna mahâdu heka Joaõ-ò, Txiau-ò tamyreny iky reare.

⁴² Jesuisi tamyreny ryryre tamy kanakemy, tahe rarybere: —Kaiboho teerytenyete toriwedu irurusõwe dire. Iny nihikỹ heka inymy deòdu luure.

⁴³ Jesuisi kiamy rarybere: —Kia wese tahe aworeny-ki aõkõkre. Kaiboho aõtxile mobo bõityhynyhykre, ijõ iny deòdumy rarekre.

⁴⁴ Mobo juhutyhy rarelekre, deòdumy rarekre.

⁴⁵ Deuxu Riòre Hãbutyhyhykỹ nade teòdu sõwekemy aõkõ tahe ixilemy reòdunykemy. Nade taumy wahidỹỹmy sõwemy iny tarasamy.

⁴⁶ Idi tahe roire Ijeriò hãwã-ò. Jesuisi taerydỹỹna-wana iny sõwehekỹ-wana ròhõnyrenyra. Tahe rahare Bartimeu ruetâhâkỹ-ki. Bartimeu tahe Timeu riòre rare. Tii ronyre rywe-ribi aõna aõnamy rexitõenyteri.

⁴⁷ Tii roholare Jesuisi Nazare ludu kia rare tahe tamy ryryra: —Jesuisi, Davi riòre, wadee maruxetòekre.

⁴⁸ Sõwemy tamy rarybere: —Rybeõmyke. Tahe aõhe-wana tii rarybemyhỹre: —Davi riòre wadi mawotòeke.

⁴⁹ Jesuisi riyyryre tahe rarybere: —Tamy byryke wadee kodoikemy.

⁵⁰ Tahe rexitareu rỹire, wylemy nade Jesuisi-ò.

⁵¹ Jesuisi tamy rarybere: —Aõmybo kai taruteri adee ariwahinykremy. Tahe hãbu ruetâhâkỹ tamy rarybere: —Wawedu, ixityre arobikremy.

⁵² Jesuisi tamy rarybere: —Makre, atyhydỹỹna kai arateytenyra. Kialehe rare. Aõwesele ixityre tii robire. Tahe Jesuisihemy rare, ryki.

11

¹ Jerusalẽ iòhòmmy ritehemynyrenyreu, tahe inatxi taerydỹỹna riteònyra hãwã-ò. Inatxi hãwã-ò iòhòmmy, Betabaji, Betỹnia-wana. Kia-ò Oliveira hãwãlò roire.

² Jesuisi rarybere: —Kaiboho boikre kowa hãwã-ò. Kowa-ò birònykreu jumentinho mahabenykre. Moheka ityre rariaõlemy ratximyhỹre. Bieseke, wadee bididyke.

³ Inyõ adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrỹ tuu rurureri. Ixityre kaò kidiòkesedỹỹnykre.

⁴ Tahe hãbu roire. Jumentinho ryro hetoiõ-ki ritisanymy rỹimyhỹ. Tai riesere.

⁵ Kia hãwã mahâdu rarybere: —Aõherekibo jumentinho kaiboho tetatenyta.

⁶ Tai tiiboho Jesuisi rybe tamy riwahinyra. Tai hãwã mahâdu jumentinho riwahinyre.

7 Tahe ridyrenyreny jumentinho Jesuisi-ò. Tiiboho tatyreny ritidirenyreny jumentinho tyremy. Tiiboho risỹnyrenyreny Jesuisi ityre-ò.

8 Ijõboho tahe horerule ritidire ryromy, ijõ tahe tauwòhi ryromy ritidire ityre rariakemy.

9-10 Ihewo ludu, iko ludu rawyhyrarònyreri, tule ryryreri: —Tii heka wowy-dyna rare. Tii heka Wanyrỹ niwesekekemy naderi. Wowydyna rare iny labie Davi Iòlòna. Kai Iòlòna kanakre. Wyhyrarò biu-txi kodoholakre.

11 Kia wese Jesuisi ralore Jerusalẽ-ò. Dohodỹỹna heto-ò ralore, ibutumy retehere, idi tahe ròhònyreny txiorotyhyreki. Tahe Betỹnia-ò roirenyreny.

12 Ijõ txu biòwamy tahe Betỹnia-ribi rexitarenyreu tahe tii rama rahure.

13 Òwòru figueira rademy robirenymy irehe-ribi. Tahe tamy ritehemynyrenyre iraty-ki raharenyòlere, aõmyreki figueira raty bededỹỹnanamy aõkõ bede rỹimyhỹre urenana.

14 Òwòru figueira-ò Jesuisi rarybere: —Tiu heka moõ araty ritòòtyhy. Tahe ierydỹỹna roholare.

15 Tahe ritehemynyrenyre Jerusalẽ hãwã-ò. Tahe Jesuisi dohodỹỹna hetowo-ò ralore. Tahe kia-ribi aõna aõna-di rohonymyhỹre mahãdu, õbradu mahãdu diteònyde. Tahe nieru wibydyỹdu mahãdu, òwòrubesedyỹ-di Jesuisi rehure. Bòtòe dinodu mahãdu rynana-di Jesuisi rehure.

16 Inyõ heka ritxydyỹnyòlere dohodỹỹna hetowo-ki.

17 Rierynanymyhỹre tahe tamy rarybere: —Raritidyỹòlemy aõbo rỹireri:

Waheto kãaõboka inatyhymy ibutumy iny witxira witxira dee ixitòedỹỹna hetomy rỹirakre. Waheto tewinytenyteny wasidu hetowesele.

18 Bede ywina erydyỹ mahãdu, Deuxu aõmysdyỹdu wedu mahãdu roholarenyreu, ròhòtinyrenyre: —Timybo inyboho Jesuisi rubudyỹmy rokiwisỹnykre. Tiiboho ruberumyhỹrenyre iny sòwemy dori bede riòtiinymyhỹ ibedeerydyỹnareny-ki.

19 Txioromy dehemynydeu, tiiboho rexitarenymyhỹre hãwãhãkỹ-ribi.

20 Txu ròhòny-di, rehemynyrenyre òwòru figueira-ò. Tiiboho robirenyre rarubumy rỹireriò, taru-wana, tararoti-wana.

21 Pedro ixi-txi tõiòti reare tahe rarybere: —Erydyỹdu, betehe inihe aõma òwòru figueira rarubumy rỹire arybebina-di tamy tarybetaki.

22 Jesuisi dirawyònyde: —Kaiboho Deuxu bityhynymyhỹbeny.

23 Inyõ rarybekeki kaa bede ratòhòkỹ-ki: —Kai myike, adi adehu rỹikre berohokỹ-ki. Tahe irybe heka kedelekre. Tai inyõ rityhynykeki, tumy heka kedelekre. Tahe uritere iseòdyỹòmykre urile bityhynykre, irybe heka kedelekre.

24 Iurenana adee ararybekre: —Aõtxile aõ bexitòenykre, kia heka bitakre. Bityhynykeki, inatyhymy bitake.

25 Kaiboho texitòenytenyteri wana aõbo inydee aky reamyhỹre kia biixãwididyỹnymyhỹke ratximyhỹre, Deuxu dori riixãwididyỹnyke aòrarurenry-ribi.

26 Kai iny witxira òraru biixãwididyỹnyòkeki, boo biu-ki ratximyhỹre aòraru riixãwididyỹnyòkre.

27 Tiiboho ixityre doide Jerusalẽ hãwã-ò. Ririranymyhỹrenyreu dohodỹỹna hetowo-ki, bede ywina erydyỹ mahãdu, Deuxu aõmysdyỹdu wedu mahãdu, matuari mahãdu tamy doide.

28 Tiiboho tamy ritỹỹraxirenyre: —Mowe ateòdyỹdu kia aõna aõnamy tatỹỹnymyhỹte.

²⁹ Jesuisi dirawyònyde: —Adeereny tule arañraxikre. Kaiboho bidi-wawyònykeki, tahe jiarỹ akoreny ỹraxina arelyykre, aõrurudibo aõna aõna rewinyhỹre.

³⁰ Tahe Jesuisi ritỹỹraxinyre: —Ratysebedỹỹna, Joaõ hõrõ, kia heka tiribibo nade, biu-ribi ada hãbu mahãdu-ribi. Kia manarybeke.

³¹ Tiiboho widee rarybera: —Biu-ribi inyboho raryberenykeki, tai tii rarybekre: —Aõherekibo tahe tii tetyhynytenyõte.

³² Hãbu-ribi inyboho raryberenykeki, iny aruberumyhyrenykre. Ibutumy iny rityhynyre Joaõ heka Deuxu rybedu raremyhỹ.

³³ Tai tahe tiiboho raryberenyre: —Inyboho reeryõrenyre. Tai tahe Jesuisi rarybera: —Hebo, jiarỹ adee arelyyõtyhy modeòdỹỹdubo jiarỹ watzireri.

12

¹ Iribi tahe Jesuisi tamyreny ijyy-di rierynanymyhyre: —Hãbu uva oworuõ wese ròbròre. Tahe riòtitynyre. Tahe hãloo riare oworuubetya-ki, ruỹdỹỹnyny. Tahe utò riwinyre. Idi tahe rihuòtere hãbu mahãdu-ò. Tahe rexitare tasỹ-ribi ijõ bede-ò.

² Tahe bederatysiredemy bededỹỹnana rehemynyreu, iwedu teòdu riteònyre bederaty ritakemy.

³ Huòtedu mahãdu teòdu rimyreny, riheteny tahe riteònyre ixihyykemy.

⁴ Ixityre oworuwedu teòduõ riteònyre. Kia heka irati riheteny ta tamy rawobinarybeny.

⁵ Ijõ riteònyre. Kia heka rirubunynyre.

⁶ Tahe oworuwedu iriòre sohojilere, tahe iluumy raremyhỹ ihewomy tii riteònyre. tahe wedu rarybere: —Wariòrele heka tiiboho rityhynyrenykre.

⁷ Kia huòtedu mahãdu widee raryberenyre: —Kia heka wedu aõna aõna tarasadu rare. Rikirubunykre tahe iaõna aõna indeerenykre.

⁸ Tahe rimyrenyre idi rirubunynyre tahe idi rehurenynyre oworu-ribi.

⁹ Jesuisi ritỹỹraxinyre: —Aõhebo tahe oworuwedu rotỹỹnykre. Tii kodoikre huòtedu mahãdu hudumy, tai tahe oworu riwahinykre inywitxira-ò.

¹⁰⁻¹¹ Ritina-di aõbo tariaõletenyre kia ryberiti:

—Mana-di hetowidỹỹdu rehura. Kia mana heka hetohàtxi-ki ritidimy doide.

Kia heka Wanyrỹ riwinyre kia iny ruereny dee aõna aõna nihikỹ rare.

¹² Tai ijohonadu mahãdu Jesuisi mynyny ratximyhy tii dori rieryre ixidee lau Jesuisi ijyymy relymyhyre. Tiiboho ruberurenynyre iny sõwehekỹ lau. Tahe rexitarenynyre, rexixãwidinyre.

¹³ Idi riteònyrenynyre Lahi rybe-di erydỹỹdu mahãdu, Herodi mahãdu-wana tamy imynamy irybe-ki.

¹⁴ Tiiboho rarybere Jesuisi-ò: —Erydỹỹdu, jiarỹboho araerymy adi watxiwãhãrenynyre kai inatyhy hãbu tate. Iny ibutumy adee wiwese wiweselere. Inatyhynyre iny-ò Deuxurymy teerynanymahãte. Tahe tiiboho ritỹỹraxinyrenynyre: —Awire aõbo ada ibinare aõbo nieru rawahinyhỹre bede dinodu-ò.

¹⁵ Tĩmybo tahe, rikiòwyny aõbo ada aõkõre aõbo. Jesuisi rierymyhyre tõhõtinanarenynyre, tahe ritỹỹraxinyre: —Aõherekibo kaiboho tiwaurihitenyteri. Wade womati nieruõ bidiwy waitxerenamy.

¹⁶ Tahe tamy diwydenyde. Tahe tii ixityre ritỹỹraxinyre: —Kawe moõ tyytarasana rare, katahe moõ tyyritina rare. Tiiboho dirawyònyde: —Kiahe bede dinoduhõrõ rare.

¹⁷ Jesuisi rarybere: —Hỹdebo, bede dinoduhõrõ tahe tamy biwahinybeny tule tahe Deuxu aõna aõnahõrõ tamy biwahinybeny. Tiiboho bede riòtiynyrenynyre.

18 Saduseu mahādu tamy nade. Kia heka iny rubu-ribi rexixamy aōkōre-riki rierynanyhỹre. Tiiboho ritỹ̄raxinyre Jesuisi:

19 —Erydỹ̄du, Moisesi raritinyra bede ywina-di: —Hābuō rurukeki, tahāwyy iriōre ijōdiōkeki, tahe kia hāwyy tahābu seriōre-wana roike. Iriōredikre taseriōre rubuōwyy roikre.

20 Seriōre debōinatxi reurōmy raremyhỹ. Juhuu ijō roire hāwyy-wana. Tahe tii rurure iriōreōlemy.

21 Tahe ihewo ludu iseriōre wytese-wana roire. Tii rurure iriōreōlemy.

22 Ihewoludutyhy tule ibutumy roire wytese-wana, tahe ituerenyre iriōreōlemy. Irōōbomy tahe hāwyy tule rurure.

23 Ixixanau tahe mohābubo tuu rarekre. Ibutumy dori wytese-wana roire.

24 Tai tahe Jesuisi tamyreny rarybere: —Kaki kaiboho teōsamy toite aōma ritina teeryōtenyteki. Tule Deuxururu teeryōtenyte.

25 Ixixanau heka moō roiōtyhy. Ibutumy iny ŷju wese rarekre biu bede-txi.

26 Kaiboho aōbo tatyryritinytenyōta iny rubu-ribi kedexixakremy. Kia heka raritinyrỹ rỹire Moisesi tyyriti-ki, òwòrusōmo ijyy-ki rỹimyhỹ. Iwese Deuxu rarybere Moisesi-ò: —Jiarỹ heka Abraō Deuxu rare. Ijai Deuxu rare. Ijaò Deuxu jiarỹ rare.

27 Jiarỹ heka rubu mahādu Deuxu aōkō rare, tahe iru mahādu Deuxu jiarỹ rare. Kaiboho teōsamy toite.

28 Bede ywina erydỹ̄ mahāduō nade ijohonamy. Tahe tiiboho widee rarybereny roholareu, Jesuisi tamyreny rirawyònywihikỹreu, tahe tii Jesuisi-ò ritỹ̄raxinyre: —Tibo rybe bede ywina juhuure.

29 Jesuisi rirawyònyre: —Ka heka juhu ludu rare: —Boholake Israeli mahādu, judeu ijoī mahādu wahe. Wanyrỹ, iny Deuxu sohojile rare.

30 Kia aDeuxu luuke ibutumy awo-ribi, aumytytyby-ribi, ibutumy aruru-ribi.

31 Ka heka ihewo ludu rare: —Kai abireluduluuke iwese ixiluuke wese. Ijō bede ywina heka ka ratyreōre.

32 Tahe Bede ywina erydỹ̄ mahāduō rarybere: —Inatyhymy kai tarybeta. Deuxu heka sohojile ratximyhỹre.

33 Ibutumy awo-ribi iluukemy. Ibutumy aruru-wana iluukemy. Tule ibutumy aeryna-wana iluukemy. Iwese kai ixiluure wese, abire ludu mahādu luukemy. Kia heka ibutumy iròduxiwelloo ratyre rare. Ibutumy wahidỹ̄naloodỹ̄na ratyre rare.

34 Jesuisi rieryre kia hābu rirawyònywihikỹre tai tamy rarybere: —Kai heka Deuxu Iòlòna-ribi irehemy aōkō. Tai tahe ibutumy ilau ruberure tỹ̄raxidỹ̄ki.

35 Jesuisi dohodỹ̄na heto-ki rierynanyhỹ̄reu, rarybere: —Timybo Bede ywina erydỹ̄ mahādu rarybemyhỹ̄re Kristu Davi riōre raremy.

36 Davi rarybere aōmybo Deuxu Tyytybytyhy tamy narybedemy: —Wanyrỹ rarybere Wanyrỹ-ò: —Bodony warurunawe-ribi. Txiōhe rare, aòludu awarawo-txi aritidikre.

37 Tahe Davile Wanyrỹ rininire. Timybo tahe Davi iriōremykre. Tahe iny sōwemy deysana-di roholarenyre.

38 Tii rierynanyhỹ̄reu, rarybera: —Bexiemyhỹ̄beny bede ywina erydỹ̄ mahādu lau. Tiiboho heka tyyrehe-di riraluurenyre. Tiiboho heka rybedỹ̄luurenyre hāwāhākỹ riranaki.

39 Dohodỹ̄na heto-ki juhurnana luurenyre. Tule ta anarỹ̄ rỹiwana, juhu ryanadile tamyreny awire.

⁴⁰ Tiiboho tule wytese urimynydu aõna aõna ritarenyre. Ixitòedỹỹna re-hehekỹ rexitòenymyhỹrenyre. Tiiboho heka aõnihikỹmy aõhòkỹmy dỹỹnana riòwynyrenykre.

⁴¹ Jesuisi retehemy rỹimyhỹ dohodỹỹna heto nieruhyna ratya-txi. Tii retehere timybo iny sòwemy tanieru-di tamy rehumyhỹ. Tahe ityhynihikỹ tamy sòwemy nieru-di rehure.

⁴² Tahe nade wytese iaòkòdu mahãduõ tii rare. Tii inatxi nieru sòmo-di rehure. Tanieru tahe nierukonana rare.

⁴³ Jesuisi ryryre taerydỹỹna-ò: —Inatyhymy adee araybekre. Kowa heka wytese nieru-di rehure ibutumy iny wixira ratyre.

⁴⁴ Kaa mahãdu ibutumy nieru-di rehure rauhenyredile. Tahe wytese idi rehure ibutumy tanieru-di rexihumy taumy-ribi idi rehure.

13

¹ Dohodỹỹna heto-ribi ròhònnyreu, ierydỹỹna tamy rarybere: —Erydỹỹdu, beteheke inihe mana nihikỹ-ò, hetohokỹ-ò.

² Jesuisi rirawyònyre rarybere: —Kaiboho betehebennykre heto nihikỹ-ò. Kia heka mana ijõ wityre-ki rỹiòtyhy, ibutumy heka kedejuxunykre.

³ Oliveira bederatòhòkỹ-ki tii ronyreu dohodỹỹna hetoko-txi, tahe Pedro, Txiau, Joaõ, ibutumy tamy doide rỹỹraximy iny-ribi irehemy.

⁴ Wakoreny bedelyyke, tiubo kia kỹnyikre. Ibutumy aõna aõna kỹnyikre wana tibo iny bedeerynyrenykre.

⁵ Jesuisi rexiranyre tamyreny rarybere: —Kaiboho anaitxenanydenyheny lau bexiebenyke.

⁶ Sòwemy dori roikre wanimy rarybemy rarekre: —Jiarỹ dori Kristu rare. Tahe iny sòwemy anaitxenanykre.

⁷ Kaiboho wounarybe-ò, aõbinarybe-ò, boholakreu, breburenyõmykre. Kia heka kanakremy ratximyhỹre. Urile bededỹỹnana ikonanamy aõkòhyylemyhỹre.

⁸ Uritere inylahinareny, ijõlahinareny-wana wii kidiaõbinanykre. Tule iòlòna mahãdu ijõ iòlòna mahãdu-wana wii kidiaõbinanykre. Bede bedesu ijõ hãwã-ki kanamytatakre. Tahe aõkòre rama kedeakre. Kia heka juhu aõhòkỹmydỹỹnana rarekre.

⁹ Kai bexiekre anamydenyheny lau. Tiiboho anawahinydenykre aòludu wedu-ò, iòlò-ò. Tiiboho anahatenydenykre dohodỹỹna hetowo-ki. Kiabohoko-txi wadee kaiboho kedelyykre inatyhymy aõna aõna rỹiremy.

¹⁰ Rybewihikỹ juhuru ibutumy bede hãwã hãwã-ò kiditỹnydỹỹnykre.

¹¹ Tiubo aradyrenykeu, urile nohòtiõmy aõbo kaiboho marybebenykre. Kiautyhyle aõmybo rarybekremy bierykre. Kia tahe marybekre. Kai dori aõkò tarybemahãte, Deuxu Tytybytyhy tahe rarybemyhỹre.

¹² Seriore seriòrele wii kidirubunykre. Tyby heka tariòre kidirubunykre. Uladule tadi, tyby kidirubunykre.

¹³ Ibutumy heka iny iy kedeakre wani òraru-ki. Kia heka ikonana-ò riijekreu, taumy tarasanakre.

¹⁴ Aõna aõna binahakỹ kanakreu, ibutumy rahukemy. Tiiboho kanakeu itxinonana-txi aõkò rarekemy, kaiboho mahenybenykre bederatòhòkỹ-ò, Judeia hãwã hãwã-ki ratxikeki, mahenybenykre.

¹⁵ Inyõ hetotyre-ki ratxikeki, urile ròteõmy aõna aõna wydysymy.

¹⁶ Inyõ bedero-ki ratxirekeki, uritere òkeseõmy tyy òrysymy.

¹⁷ Kobexe heny hãwyy bòtòmny rỹira, tule hãwyy tariòre ritònny rỹira.

¹⁸ Bexitòenykre kia kanaheny bededỹỹnana sirau.

19 Aõhõkỹmydỹỹnana kanakre tiu heka tuuõre. Juhule Deuxu bede ri-winyreule wiji tuu yrubule bede roimyhỹre. Tiu heka kiamy bede roiõtyhy aõhõkỹmydỹỹnanamy.

20 Deuxu bede iõhõmy rirawetyyòròkeki, moheka irumy ròhònõtyhy.

21 Inyõ adee rarybekeki: –Kaki heka Kristu ratxireri. Kowa-ki ratxireri. Uritere ityhydỹỹõmy.

22 Sõwemy Kristu kanakre, urile Kristu inatyhy aõkõ rarekre. Tule Deuxu rybedỹỹdu kanakre. Kia Deuxu rybedỹỹdu inatyhy aõkõ rarekre. Tiiboho heka bedeòby riwinykre tule bede eryna. Deuxu hõrõ riitxenanykemy inatyhymy kõaõboka.

23 Kaiboho warybe biyrubunykre. Adee ibutumy juhuule reòbitinyre.

24 Idi webòhona rỹira txuu, aõhõkỹmydỹỹnana itue-di, txuu heka rurunykre. Ahãdu tule rurunykre.

25 Taina heka kedejuxunykre biu-ribi. Biururu raòweòwenykre.

26 Iny retehekre Deuxu Riòre dehemynyna-di. Biurawetyky-ribi kodobehekre. Kia heka lobixina kanabòtòranykre.

27 Tahe taỹju kiditeònykre tawedu ijoihõrõ butudỹỹmy.

Kidibutunykre ibutu bede bede konana-ribi, tule ibutu biukonana-ribi.

28 Tahe figueira òwòru-ribi erydỹỹna bierybenykre. Tahe iruru raixinykreu tahe, txiru ròhònýkreu, tai tahe bierybenykre wyra iòhòreri.

29 Tule kia aõna aõnamy bobibenykreu, tii iòhòlereri. Ijòkile wese nyide.

30 Inatyhymy adee ararybekre, kia wijinabòdu itueõtyhy aõna aõna rỹikre hãrele.

31 Biu, bede-wana ituekre, tahe warybe itueõtyhy.

32 Moõ heka rieryõtyhy tiubededỹỹnanamybo tii kòdòòsekre. Tule ýju biutxile rieryõre. Tule iriòre rieryõre. Tule tyby sohojile rieryre.

33 Kaiboho bexieke, beteheke. Kai dori teeryõtenyete tiubededỹỹnanamybo kòdòòsekre.

34 Kedehemynykremy dori iwese hãbu tỹimy rarewese tii rexitareu, ririre tadeòdu. Tadeòdulemy tule ridyre itxeredu retehemyhỹkemy.

35 Tahe betehe inihe teeryõteri dori tiubo kanakre heto wedu, txioromy ada ruwetya aõbo, ada hãnie hãbu rryry-di aõbo, ada txumy aõbo.

36 Betehe inihe iny araraòõlemy tii rehemynyreri aki rahakre atỹi-ò.

37 Aõna aõnamy jiarỹ rarybemyhỹre, rarybera ibutu-ò: –Biijebeny.

14

1 Kia-ribi inatxi txumy riuhenymy ratxireri anarỹỹ kodohònýkremy. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònýre. Tule Deuxu aõmysỹdỹỹdu wedu mahãdu tule bede erydỹỹdu mahãdu Jesuisi rimykyemy ratxireri idi rirubunykemy.

2 Tiiboho rarybemyhỹreny: –Kiahe aõkõre anarỹỹ rỹireriu, iny sõwemy inydeereny kana aõbinanyheny.

3 Jesuisi Betỹnia hãwã-ki ratximyhỹu, Simaõ tyybina heto-ki ratximyhỹre. Jesuisi òwòru besedỹỹbire-ki roimyhỹ. Tahe hãwyw aderòna òwynihikỹ-di lỹnyrena wihikỹ-di nade. Tai ihyna riwebòhònýra tahe Jesuisi ratityre-ò ritxiwira.

4 Inyõreny rexiykaranyke. Tahe widee rarybera: –Aõherekibo aderòna rahura.

5 Inywitzira tahe iòwynykewi sõwemy nierumy kia-ò. Kia nieru-di tahe iny aõkõdu-ò rawahidỹỹnykre. Tahe tiiboho rexibynyreri hãwyw dee.

6 Tahe Jesuisi rarybere: –Txìòhe rare, uritere ixibydỹỹõmyke. Tii heka aõwihikỹbo wadee riwinyra.

⁷ Kiamy aõu aõu iny aõkõdu rÿikremy. Aõule heka tamy aõwihikÿ biwiny-benyke. Jiarÿ tahe, aki aõu aõu aõkõlekre.

⁸ Tii heka rexikonananymy ròwidÿÿre. Aderòna-di watyre ritxiwire wabede-ò jiarÿ raõule.

⁹ Inatyhymy adeereny ararybekre. Aõtxile Deuxu Rybewihikÿ iny re-lyykre. Kia-ò kahãwyy ijyymy relyykre, ibutumy iny idi rõhõtinkyremy aõbo riwinyredi.

¹⁰ Tahe Judasi Isariò Deuxu aõmysÿdÿÿdu-ò rara Jesuisi tamy rawahidÿÿkemy.

¹¹ Tiiboho tamy roholarenyre, reysare. Tahe tamy nieru riwahinykemy riurenanyre. Tahe Judasi riijemyhÿre aõu aõu bedewihikÿ tamyreny riwahidÿÿnykemy.

¹² Juhu orotxu anarÿÿtxure budoeni xiweloo rirubuny rahudi tahe Jesuisi erydÿÿna mahãdu tamy rarybere: –Titxibo anarÿÿ rÿsÿnamy biroxikemy atxiteri. Jiarÿboho kowa-ò aroikre.

¹³ Tahe Jesuisi tamy rarybere: –Kaiboho boikre hãwãhãkÿ-ò. Tahe hãbu-wana wii biòbynykre butxi-di riwyreriò. Tahe tii biheludunybeny.

¹⁴ Aõtxile hetoõ-txi ralòke, kaiboho marybebenyke hetowedu-ò: –Waerydÿÿdu rarybera: –Titxiwexe anarÿÿ rÿsÿna arirÿsÿkre waerydÿÿna-wana.

¹⁵ Tii heka adee kiditeòsinykre hetowowitxiraõ biu-txi. Ibutumy rexihumy rÿire inydeereny. Kowa rÿsÿna inydeereny biywinykre.

¹⁶ Tahe ierydÿÿna rexitare. Roire hãwãhãkÿ-ò. Tahe ròhònnyre iwese Jesuisi relyyre wese. Tahe ibutumy rexihurennyre anarÿÿ-ò.

¹⁷ Txiorou Jesuisi nade taerydÿÿna waòinatxi reurò-wana.

¹⁸ Tiiboho òworubesedÿÿ riroximahãu, Jesuisi rarybere: –Kaiboho wawana teroxitenyteri sohojiõ biwawahinykre.

¹⁹ Tahe urihimyo rexiranyre rabadewomy. Tahe widee raryberenyre: –Jiarÿle heka ariwahinykre.

²⁰ Tii rirawyònyre: –Kaiboho, waòinatxi reurò mahãdu sohojiõ. Kia mahãduõ orotxu-di wawana rebenymyhÿ besero-ki.

²¹ Inatyhymy Deuxu Riòre Hãbutyhyhykÿ rakre iwese iritina rÿirewesele. Kobexeheny kowa hãbu heka kidiwahinykre. Tamy iny awire kedeaõlede.

²² Tiiboho riroxireriu, Jesuisi orotxu rimyre, raorore, rexitònyre, tahe tamyreny riwahinyre. Rarybere: –Ãhãxe, kia heka waumy wese rare.

²³ Tahe vÿhynamona rimyre, rexitònyre, tahe tamyreny riwahinyre. Ibutumy ibute bute iribi tuu riòrennyre.

²⁴ Tamyreny rarybere: –Kia wãhãlubu wese rare. Kia hãlubu heka rybe tÿmyra ywidÿÿna hãlubu rare. Kia inyboho kidinohõtijuadenykre. Wahãlubu heka kedexunykemy iny rabòrònihikÿ dee.

²⁵ Inatyhymy ararybekre: –Ariõõtyhy heka òtetibederatyrybe tÿmyra ihyy tahe tiutxumybo Deuxu Iòlòna-ki ariõkre.

²⁶ Deuxuwimy rawinyrennyre, tahe rexitarennyre Oliveira bederatòhòkÿ-ò.

²⁷ Jesuisi tamyreny rarybere: –Kaiboho ibutumy wijirumy biwaribenykre. Kia heka iritina rÿire.

Itxeredu tahe riròrennykeki, budoeni rahenykre.

²⁸ Tahe rubu-ribi adexixakreu, arakre akomy Kalileia-ò.

²⁹ Pedro rarybera Jesuisi-ò: –Ibutumy ararikeki, arariõtyhy.

³⁰ Jesuisi tamy rarybera: –Inatyhymy ararybekre. Wijirumy hãniehãbu inatxi kydrykreule, kai iny witxira-ò biwatxiõnykre inataõ bedemy.

31 Tahe Pedro rarybera tarurutyhymy: —Aôkôre, aratxiônyôtyhy, ihârele tahe awanale arurukre. Ijô mahâdu tule kia wese rarybera.

32 Tahe roire Kesemani hâwâmy ninadu-ò. Taerydÿÿna-ò rarybera: —Biwaraômy bonykre kakile. Kowa-ò arexitôenykre.

33 Tii ridyrenyrene Pedro, Txiau, Joaô-wana. Jesuisi rexiranyrene rabedewomy ihyy rexitôenyrene.

34 Tahe tamy rarybera: —Watytyby heka rabedewomy ratxireri rubuhyy-ò. Kaki bonykre biijemy.

35 Tahe iko-txi urihimyò rareu, resere. Rexitôenyrene: —Waha, adee arexitôenykre. Adee awikeki, kia ôraule tiu warôteôna.

36 Tii rarybere: —Waha, adee ibutumy isiraôre. Kia bemona inyhe waròbi bitake inihe. Tahe wadeewi wadeewi-ki aôkô watxireri, tahe adeewi-ki.

37 Tii rehemynyrene tai rahare rôrôrenymy roireriò. Rarybere Pedro-ò: —Simaô, Tarôteri aôbo. Biijeôtyhy sohoji ôramy bededÿÿnana.

38 Biijebenykre, bexitôenykre, uritere rutaanamy rôteômykre inatyhymy atytyby irurudire tahe ade iruruôre.

39 Tahe Jesuisi ixityrene rare rexitôenyrene ixiwesele.

40 Ròsereu, ijô-ki rahare rôrômy ixiwesele, irurureny rautxienymyhÿ dori. Tiiboho rierykôre idi rirawyônyrenyrene.

41 Tahe ixbyle ròsere tahe rarybere: —Morôbeny bexielehynybeny. Ôra iôhôreri. Kia heka Deuxu Riôre Hâbutyhyhykÿ kanawahidÿÿkre ôrarudu mahâdu-ò.

42 Bitÿmynybenyke, rokoireny, walòsedÿÿdu iôhômy rareri.

43 Tii rarybereriu, aôwesele Judasi nade. Kia heka waòinatxi reurò mahâduò rare. Tii-wana doide hâbu mahâdu mayrehe-di, ôhôtemy debôna. Kia heka hâbu mahâdu doide matuari mahâdu-ribi, Bede ywina erydÿÿ mahâdu-ribi, Deuxu aômÿsÿdÿÿdu wedu-ribi.

44 Lòsedu tamyreny juhuru bede eryna riwahinyrene. Kawese heka rarybere: —Kowa heka inyô-ò aruwokre, tii heka hâbu rare. Bimybonykre, birarenybonywihikÿkre.

45 Judasi rehemynyrenyrene, tahe rarybere: —Wedu, wedu. Tahe tamy ruwore.

46 Juda ijoï Jesuisi rimyra.

47 Kia ijoïô mayrehe ritare tahe Deuxu aômÿsÿdÿÿdu wedu deòdu nohôti riorore.

48 Tahe Jesuisi dirawyônyde: —Kaiboho mayrehe-di tiwaòrynyteri wasidu-wesemy aômy, ôhôte-di.

49 Jiarÿ tahe dohodÿÿna heto-ki watximyhÿ txuô txuôlemy adeereny araerynanywâhâdenyde. Kowa-ki heka tiwamyôlemyhÿtenyde. Tahe aôbo iritina-ki rÿireri, kia heka kÿnyikremy.

50 Ibutumy ierydÿÿna mahâdu ririrenyrene, rihenyrenyrene.

51 Kia heka hâbuô riheludunymyhÿ tyy tayredile rexitÿynymy tiiboho ridyrenyrene.

52 Tii tahe tyy ririre tahe rahenyrene tadelemy.

53 Deuxu aômÿsÿdÿÿdu wedu-ò tiiboho Jesuisi ridyre. Bede ywina erydÿÿ mahâdu, matuari mahâdu-wana ributunyre.

54 Pedro riheludunyre irehetyhytyhymy. Rehemynyrene Deuxu aômÿsÿdÿÿdu wedu heto-ò. Tai tahe ixitôteenymy heòtywera-ò rorukumyhÿ heto itxeredu mahâdu-wana.

55 Deuxu aômÿsÿdÿÿdu mahâdu wedu, tule dohodÿÿdu mahâdu alobixidu rijemyhÿre aôlemy Jesuisi ôludu relyymyhÿre, Kia ôraru-ki rirubunyrenykemy. Rahaôre.

⁵⁶ Sõwemy iny ruimy relyymy rÿimyhÿ. Iruinarenny wiribi hitxi hitxilera.

⁵⁷ Ijõ mahãdu rÿimyhÿre relyyrehãre ruimy rarybere:

⁵⁸ –Inyboho irybe-ò roholarenymy: Jiarÿ heka dohodÿÿna heto ari-ixãwididÿÿnykre kia heka hãbu iwidÿÿna rare. Txu inataõ-di ijõ ariwinykre iwidÿÿnaweseõre.

⁵⁹ Kia heka aõmybo tuu relyyrenyremy irybe wiribi hitxi hitxire.

⁶⁰ Deuxu aõmysÿdÿÿdu mahãdu rÿire inysõwetya-txi. Tii Jesuisi ritÿÿraxinyre: –Kai aõbo biwarawyõnykre aõmybo relyyrenyreri adee õludumy.

⁶¹ Tii rerawyõnyõlere ixyby tahe Deuxu aõmysÿdÿÿdu mahãdu ritÿÿraxinyre: –Kai aõbo Kristu tate, Deuxu wityhy riõre.

⁶² Jesuisi rarybera: –Jiarÿ heka. Kaiboho betehebennykre

Deuxu Riõre Hãbutyhyhykÿ Deuxu rurunaweribi-ò ronyreri. Kaiboho tii betehebennykre Deuxu Riõre Hãbutyhyhykÿ biuwetyky-ribi naderi.

⁶³ Deuxu aõmysÿdÿÿdu wedu ity riykara idi rarybera: –Aõherekibo ijõ alo-bixidumy iny rururenryeri.

⁶⁴ Kaiboho taholatenyta aõbina binalemy rarybereriõ aõmybohe kaiboho tahõtinyinmyhÿtenyete. Ibutumy heka tawo riraõhõrenyrya rubudukremy.

⁶⁵ Tahe ijõ ityre rybeximy rarutaara rexiruehetynyre tahe tule rihetenyre. Tahe rarybere: –Mota lähã arahãtenyrya. Idi tahe heto itxeredu tule rihetenyre.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deõdu.

⁶⁷ Pedro rexitõteenymyhÿ heõtywera-ò tahe ijadõma tamy retehere. Tahe rarybera: –Kai tule Jesuisi Nazare ludu-wana atximahãte.

⁶⁸ Tahe tii rexitxiõnyre: –Jiarÿ reeryõre aõmybo kai tarybeteri. Tahe Pedro hetowo-ribi rõhõnyre.

⁶⁹ Ijadõma ixyby ixyby itxeremy rarybere kowa ijoi-ò: –Kowa heka tii mahãduõ rare.

⁷⁰ Tahe tii ixityre rexitxiõnyre. Ixybyle kowa ijoiõ Pedro-ò rarybera: –Inatyhymy kai ijõ mahãduõle tate. Kai dori Kalileia mahãdu tate.

⁷¹ Tii inatyhytyhyrybemy rarybera: –Jiarÿ reerykõre hãbumy tarybetenyteri.

⁷² Tahe hãnie hãbu ryryra, inatxi hewoludumy. Ta Jesuisi rybe-txi Pedro tõhõti reare. Iwese Jesuisi rarybere: –Inatxi hãnie ryrykredi, ihewoludukomy ryrykre, wadee bedexitxiõnykre inataõmy. Pedro tahe iribi rexitareu, rahinyre.

15

¹ Txuu reareu, Deuxu aõmysÿdÿÿdu wedu, matuari mahãdu, Bede ywina erydÿÿ mahãdu ibutumy ributumy. Tahe Jesuisi ritaataare tahe ridyrenyrye Pilato-ò.

² Pilato Jesuisi-ò ritÿÿraxinyre: –Kai aõbo judeu iõlõ tate. Tii rirawyõnyre: –Kai ka tuu tarybeta.

³ Deuxu aõmysÿdÿÿdu mahãdu wedu rarybere Jesuisi aõna aõna awimy aõkõ riwinyre. Tahe Jesuisi riwawyõnyõhyllere.

⁴ Pilato ixybyle rÿÿraxire: –Kai birawyõnyõtyhy aõbo. Kai aõbo taholaleteri aõmybo tiiboho autedé-ò raryberenyryeri.

⁵ Tahe Jesuisi rarybeõhyllere tahe Pilato urile bede riõtinyinmyhÿre.

⁶ Kia heka juhUU iny deõwarixina rare hãbu rõteduõ ritakemy anarÿÿtxuu. Aõtxile iny tamy rexitõenyke.

7 Ròtenawo-ki raremyhỹ inyõ Barabamy ninadu-ki. Tii tahe inywitxira aõbinadu mahãdu-wana ratximyhỹ. Kiamy inydinodu òraru-ki aõbina rỹireki, tii iny rirubunyre.

8 Iny sõwehekỹky-ki doide, tahe rexiranyre ixitòedỹỹmy: iny deòwarixina kòdòhònykre.

9 Pilato dirawyònyde: –Adeereny ariòlòdỹỹnykekõ aõbo ka judeu iòlò.

10 Tii rierye dori Deuxu aõmysỹdỹỹdu mahãdu wedu tamy Jesuisi ridyrenyre iwobinanareny lau.

11 Deuxu aõmysỹdỹỹdu wedu inysõwe riixitòedỹỹnyre Baraba riòlòdỹỹnykemy.

12 Pilato rityỹraxinyre ixybyle: –Aõhebo tahe idi arotỹỹnykre. Kaiboho tuu teninimyhỹtenynte judeu iòlòmmy.

13 Tiiboho rirajuarenyre: –Bitamadỹỹnyke itxeò nihikỹ-ò.

14 Ta Pilato tamyreny rityỹraxinyre: –Aõbina taka riwinyre. Aõhe-wana ixityre rirajuamyhỹrenyre: –Bitamadỹỹnyke itxeònihikỹ-ò.

15 Pilato inydee aõ riwahinykemy rõhõtinyra, tai ta Baraba riòlòdỹỹnyre. Idi tahe Jesuisi riyhytanymy rahudi, riteònyre itxeònihikỹ-ò riukòrenykremy.

16 Soldado ridyrenyre heto woube-ò. Tai tahe ibutumy soldado ributumy.

17 Tahe tyysòborehekỹ-di rityynyrenyre. Tahe ede rataana ritidire ira-ò.

18 Tahe rirybenyrenyre: –Adee nihikỹre judeu iòlò.

19 Tahe rihetenyre bòtòre-di irati-ò, tahe ityre rarybexinyre tahe rỹire tatiowotimy rityhynykemy.

20 Tahe tyysòbore iribi ritara, tahe ityyle tamy ritidira. Inatyhymy ridyrenyre itxeònihikỹ-ò riukòrenykremy.

21 Kowa-di rekoarenyre hãbuõ. Simaõ Sireni inire. Kia heka Alexỹdre, Rufu-wana tyby rare. Tii nade bedero-ribi. Tiiboho tahe riitxyydỹỹnyre itxeò-di retyykemy.

22 Riwyrenyre bederahy-ò Kòkòta ninadu-ò. Kia heka iwitxira rybe rare. Kia heka rubu ratitybyho wese rare.

23 Tiiboho vỹ riurinyre òwòruburu-wana. Tahe tii tuu riõõlera.

24 Itxeònihikỹ-ò raukòrenymy rahudi tahe ityy wirarea riatyre, tahe ityy-di rarudeòsanyre tibo iny sohoji sohoji ityy riwykremy.

25 Biurasò txu Jesuisi itxeò-ki raukore.

26 Iratya-ki tahe ritina rỹire: JUDEU IÒLÒ. Kia heka iny tuu rarybemyhỹrenyre.

27 Tahe tii-wana inatxi wasidu itxeònihikỹ-ò riherinanyre, ijõ ruruweribi-ò, ijõ hyweweribi-ò.

28 Tahe rotỹỹnyre aõbo Deuxu ritina-ki rỹire wese: Tii ratximyhỹ òrarudu mahãdu-wana.

29 Iny reareare tara riohowimy rarybere aõbina binamy: –Kobe, kai korihe dohodỹỹna heto biatykemy inataõ txudile tahe ixityre bidiwinykre.

30 Kaile inyhe bexitakre itxeò-ribi.

31 Iwesehyyle Deuxu aõmysỹdỹỹdu wedu, bede ywina erydỹỹ mahãdu-wana widee raryberenyre. Jesuisinimy raujõmorenyreri: –Tii iny witxira ritare, tiile tahe rexitaõtyhy.

32 Kristu, judeu iòlò, bodobeheke itxeò-ribi jiarỹboho arobirenykremy, tai tahe aratyhynyrenykremy. Tule wasidu tii-wana raukòrenyre itxeò-ki Jesuisimy raujõmorenyre.

33 Txutyeyu ibutumy bede rurunyre. Tahe roire txu kaò resemy.

34 Kiaule tahe Jesuisi rarybeterenyre: –Elòi, Elòi, lema sabatani. Kia heka iwitxira tybe rare. Kia rare: –WaDeuxu waDeuxu, aõherekibo kai tiwarite.

³⁵ Ijoiõ heka tamy roholareu, rarybere: –Tii heka Eliasi-ò rryreri.

³⁶ Hãbuõ reare bexi ritỹxinyre vñ juberere-di idi tahe ritidire tabòtòrejura-ò. Riwahinyre Jesuisi ritòkemy. Tahe rarybere: –Deinyhe tamy inyhe reketehereny Eliasi kanakremy aõbo inyhe itarasamy.

³⁷ Jesuisi rryryre irariemy idi rurure.

³⁸ Dohodỹña hetowetyy raykare inatxi weryna tyymy, biu-ribi, bede-ò.

³⁹ Soldado dinodu Jesuisiko-txi ratximyhỹre. Tahe rurureu, irubumy robire. Tahe rarybere: –Ka heka inatyhymy Deuxu riòre rare.

⁴⁰ Tule hãwyy mahãduõ retehemy rỹimyhỹ irehe-ribi, tòwysyreny-ki, Marie Madalena, Marie (Txiause, Jyrese tii rare. Txiau heka Jyje hewoludumy rare.) Salome tule ihỹre ijõ-wana.

⁴¹ Kia heka Jesuisi Kalileia raremyhỹu, tiiboho tahe sõwemy iny-wana doide Jerusalẽ-ò.

⁴² Txioromyhe dehemynyde. Wirareasanatxu rare. Kia heka sabadotxukokile rare.

⁴³ Jyje Arimatea hãwã ludu dohodỹñdu nihikỹõ rare. Tule heka tii riraòmý ratximyhỹ Deuxu Iòlõna. Tii ruberuõlemy rare Pilato-ò Jesuisiumymy ix-itòedỹỹmy.

⁴⁴ Pilato rabedeòtiidỹñnanyre Jesuisi rurumy roimyhỹdi tai rryryre soldado dinodu-ò. Tai Pilato ritỹñraxinyre, Jesuisi rurumy roimyhỹdi.

⁴⁵ Soldado rarybereu Jesuisi rurumy roiremy tahe Pilato riteònyre Jesuisiumy Jyje-ò iwahidỹỹmy,

⁴⁶ Jyje ritare itxeònihikỹ-ribi tahe ritỹtenyrye tyyurahãkỹ-di. Idi tahe ritidirenyre mana hãloo wabedewo-ò. Tahe mananihikỹ-di riijòtòbònyra.

⁴⁷ Marie Madalena, ijõ Marie Jyrese reteherenyre titxibo tii ritidirenyreò.

16

¹ Tahe nobiutxu, Marie Madalena, ijõ Marie-wana ihewoludu Marie, Txiause, Salomese-wana rare. Tiiboho lỹnyrena riõbranyrenyrye. Tahe roire Jesuisibymy idi rekoakremy lỹnyrena-di.

² Juhutxu semana bededỹñnanau txuu deadeule roire wabede-ò.

³ Widee raryberenyrye: –Mowexe mana ritakre ijò-ribi.

⁴ Tahe tuu robirenyrye. Mana nihikỹ ritamy rỹire.

⁵ Wabede-ò rirònyrenyrye, robirenyrye weryrybòweselemy rononymhỹ ruruw-eribi-ò. Ityy urahakỹmy rononymhỹ. Tahe tiiboho bede riòtiinyrenyrye ruberurenymy.

⁶ Tii tamyreny rarybera: –Uritere breburenyõmy. Kaiboho aõbo teòrytenyta Jesuisi Nazare ludu. Kia itxe-ki rurure. Tii aõkõ kaki ratxireri. Rexixara rubu-ribi. Betehebeny inihe tai ritidiraò.

⁷ Makre. Marybekre ierydỹña-ò tule Pedro-ò. Tii rakre akorenymy Kalileia-ò kaiboho tuu lobiximy boikre tuu adeeremy raryberemy.

⁸ Tahe tiiboho rihenyrenyrye wylemy wabede-ribi ruberumy. Tiiboho moõ heka rarybeõhylerenyrye ruberumyhỹrenyky.

⁹ Juhutxu semana bededỹñnau Jesuisi rubu-ribi rexixare. Idi tahe juhuu àsitereribile rexitỹnyrye Marie Madalena dee. Kia-ribi heka juhuule ritare debò inatxi reurò tyytybybinamy.

¹⁰ Tii rare Jesuisi-wana raremyhỹ mahãdu-ò. Tiiboho rabedewomy ratximyhỹreny, rahinymyhỹreny.

¹¹ Tamyreny relyyreu iwese Jesuisi tamy rexitỹnyrye wese Jesuisi irulemy ratximyhỹmy tuu robireke, rityhynyõlerenyrye.

¹² Jesuisi rexixamy rahudi tahe, iwitxiramy rexisỹnomy inatxi erydỹỹna-ò. Tiiboho heka roimyhỹrenyre bedero-ò.

¹³ Tahe dòsede relyyrenyre taijoi-ò, tahe tule rityhynyõlerenyre.

¹⁴ Tahe waðsohoji reurò erydỹỹna-ò Jesuisi àsitereribile rexitỹnynyre. Tiiboho riroximyhỹrenyò rexitỹnynyre. Tahe Jesuisi tamyreny rarybera: – Aõherekibo kaiboho iny wamy robira mahãdu tetyhynyõteri.

¹⁵ Kaiboho boibenyke ibutumy bede bede-ò Rybewihikỹ bitỹnynykremy.

¹⁶ Inyõ Rybewihikỹ rityhynykeki, idi kidisebenykeki, tii Deuxu ritake. Inyõ rityhynyõkeki, Deuxu ixi-ribi riteònykre iòraru-ki.

¹⁷ Kia bede eryna ityhydỹỹdu kidiheludunykre. Tiiboho tyytybybina kiditeònykre wani-ki. Tule heka tiiboho itỹmyra rybe kanarybedenykre.

¹⁸ Hemylala rimyrenyreu, aõhe rotỹỹnyõlere tule rubuna monamy riõkeki, rotỹỹnyõlere. Tiiboho tebò ritidirenykre bina mahãdu-ò tahe riteytenykre.

¹⁹ Idi tahe Jesuisi tarybe rahuredi, Deuxu ridyre biu-ò. Tahe ronyre Deuxu ruruweribi-ò.

²⁰ Tahe tiiboho roire ibutumy bede bedemy tai bede ritỹnynyrenyre. Wanyrỹ riwiõhenanyrenyre tahe bede eryna-di irybe ixidee rimyrenyre ihe-lududỹỹdu mahãdu-ò.

Luka Deuxu Rybe Wihikỹ Tỹmyra, Luka Tyyritidỹđdu

1-3 Wyla, Teòfilo. Adee heka watyyriti ariwahinykre timybo Kristu rotỹđnyre. Tuu lobixidu mahādu tuu relyymyhỹre-ribi, jiarỹ ire ariòbitinytyhykre. Kia heka jiarỹ adee reritinymyhỹre, waiòlò, iwese ibutumy reeryrenyrehu bededỹđna-ribi. Aōma inatyhymy kia rotỹđnymy rare wahe.

4 Kia wese wahe. Iwese iny adee relyyre wese, jiarỹ adee arelyyre inatyhymy aōbo rotỹđnyre.

5 Zacaria heka Deuxu xiwe wahidỹđdu rare, Abia ijoiođ wahe. Iriòrese Isabeli tahe tule xiwe wahidỹđdu riokore mahāduō rare. Kiau heka Herodi judeu bedesỹ iòlòmy raremyhỹ, Araō riokore mahāduō wahe.

6 Wiwanale heka awirenyre Deuxuru-ò. Òbitihyy heka ratximyhỹrenyrehu ibutumy Deuxu bededỹđnanako-ò.

7 Tiiboho iriòreōhyyre. Ihāwyy Isabeli heka rasenadunyrehu, uladu herina dori awiòre. Ihābu tule ramatuarinyrehu.

8 Aōutxumy tahe Zacaria raaōmysỹđđnymyhỹre aōma templowo-ki. Kiatxu heka iròtenatxumy bedesỹ rỹimyhỹre templowo-ò. Tahe iwo-ki ratximyhỹre.

9 Hewydysi lỹnywi ritoonymyhỹ Deuxu kia deālānamy, iwese riwinymyhỹrewesehyyle.

10 Iu ahana-ki tahe sōwemy iny rexitòenymyhỹ.

11 Iu Zacaria xiwena ruruwe-ribi loosòna-ò rỹireu, hewydysi lỹnywi ritoonymyhỹre. Tahe aōwesele ýjuō rexitỹnyre Zacariako-ò.

12 Tii tuu robireu heka rexiraòmy ruberumy reare.

13 Ýju rarybere: —Brebuōmykre, Zacaria. Deuxu roholare aixitòedỹđna-ò. Tai heka adee ijyymy rareri. Ahāwyy Isabeli rariòrenykre. Kai heka Joaōmy bininikre.

14 Tai kaiboho heka iura heka beysabenyke sōwemy; ijō iny tule reysakre iòraru-ki.

15 Tii heka hābutyhyhykỹmy rarekre Deuxu dee tiu heka vỹ riòòtyhy mona hārihikỹ riòòtyhy. Deuxu Tyytybytyhy. Juaōtykymy ralokre tii reareu.

16 Sōwemy heka aōma Israeli mahādu Deuxu rityhynykre iòraru-ki wahe.

17 Tii heka hābutyhyhykỹmy rarekre Deuxu rybedumy Elia wesemy. Tii heka aōma Deuxu deòdỹđna juhūu rehemynymy reakre ikòlemy iny ywisidỹđnakre rehemynykre juhūu, aōma Deuxu Tyytybytyhy dehemynyna riijemy tuu rehemynymy rakre. Tii bedesỹ ywina riòbitinykre inyy-ki. Tyby tariòre-wana wii riwoxinykremy. Tii heka iny ribedeerynykre aōma òbitimy rỹirakremy. Deuxu luomy rỹirakre aōma ilahireny rỹira wesemy juhūu.

18 Zacaria rarybere ýju-ò: —Jiarỹ ramatuarinyrehu timykre heka? Hāwyy tule rasenadunyrehu ihārele òsana tukre.

19 Ýju rarybere: —Jiarỹ Gabrieli watxireri, Deuxu deòdutyhy wahe. Tii heka diwateònyde kaò adee rybemy wahe.

20 Kai tetyhynyōhyyteri tai kai marybeōkre uladu reakre xiery tahe marybekre. Kaa adee rarybereri dori òbitimy rarybereri warybemynamy ibutumy rỹikre.

21 Iny riraòmy rỹimyhỹ Zacaria òlòna, tahe raroorehenymyhỹ. Iroorehena rieryōhyyymyhỹreny. Dòhònydeu ta, rybe-ki rexisiranymy rarybeōhyyre.

²² Tii rehemynyreu tamy rybeõhykyre rahòra. Idi tebò-di raramynyre urile rybe riwisõnymy rarybeõhykymyhõre aõma timybo aõhebo rotõõnyrá heka riòbitinykemy heka rarybeõhyymyhe timyrabo.

²³ Tahe taaõmysõdõõna rihudi, taheto-ò ròsere ixyby.

²⁴ Idi tahe Isabeli rabòtonyru iruwyre ahådumy bede riijere rexiwòmy.

²⁵ Isabeli rarybere: –Deuxu awi heka rare, riwatare waixõruna-ribi. Kuladu wadeke riwahinyreri.

²⁶ Ijõ ahãdu tahe Deuxu Gabrieli riteõnyre Nazare hãwã-ò Kalileia bede-ò.

²⁷ Ýjuõ heka rybe-di ijadòma-ò. Kia ijadòma heka wii ritobinyomy rõireri tybyboho iseboho Jyje-wana roikremy. Jyje heka iòlò Davi kia mahãduõ rare. Ijadòma tahe Marie inire.

²⁸ Ýju heka kiamy rarybere: –Beysakre Marie! Inynyryõ heka awana ratxireri. Bedeõbyhykõ adee kidiwahinykre. Tii arãwowydynyre.

²⁹ Kia rybe-di tahe Marie rexiraykynyre. Tii rieryõmy aõmybo rare.

³⁰ Tahe ýju tamy rarybere: –Marie, Brebuõmy! Deuxu teteysanyte. Kai awi heka rare. Tii aõwihikõbo adee kidiwahinykre.

³¹ Kai heka mariòrekre, uladu heka Jesusimy raninikre.

³² Tii heka hãbu nihikõ rarekre. Tii Deuxu riòremy raninikre. Deuxu heka tii iòlòmy risõnykre, iwese Davi alabiehekõreny ronyre wese, tii ronykre.

³³ Tii heka ibutu Ijaò mahãdu iòlòmy rarekre. Iòlòna heka tiu itueõtyhy.

³⁴ Tai tahe Marie ýju-ò rarybere: –Jikarõ heka ijadòkòmatyhy watxireri. Timykibohe krabòtonykre.

³⁵ Tahe ýju rirawyònyre: –Tyytybytyhy adee kanalokre. Deuxu ruru heka adee kanakre. Tai heka kia uladu Deuxu òbiti riòremy raninikre.

³⁶ Nohõti lusaõmy anymy-ribi Isabeli riki bòtòkòmy rareke-ribi tahe bòtòmy ratxireri. Debò sohoji reurò ahådumy iahãdu.

³⁷ Deuxu dee heka tiu aõ isiraõre.

³⁸ Marie rarybera: –Jikarõ Wahõ dekòdu rare. Anomybo tarybeteri ka ibutummy rekyrubunyreri. Wadeke awire. Anowaxina tuukre irybemynamy karotõkõnykre. Idi ýju rikõmy reare.

³⁹ Idi ta tii heka Isabeli roramy rare. Zacaria sõmy Judeia bede hãwãlò hãwã bede-ki.

⁴⁰ Iu Marie rehemynyreu tahe wii rirybenyrenyru:

⁴¹ Tiu kia aõbo uladu Isabeli kia-ki iule rexiwatxinymyhõ Marie-ò. Isabeli heka tõxiykõle Deuxu Tyytybytyhy-di ratximyhõ.

⁴² Riajuamy rare deysana-di sõwere: –Kai hãwyy ibutu-ribi deysana rarekre. Auladu tule deysana rarekre.

⁴³ Anoherekibo Wahõse waroramy naderi. Jikarõ ano anakõ rare.

⁴⁴ Adeke rahokujareku, kuladu wawoku-ki rexilòrelòrenymyhõ tabedesa-di. Tai tahe Isabeli rõõraximy ratximyhõre Deuxu Tyytybytyhy-di.

⁴⁵ Kai bekysabenyke kia tetyhnyteki. Deuxu rybe dokuri adeke nade. Iwese tiki raryberewesele ibutummy rãikre.

⁴⁶ Marie rarybere: –Jikarõ wawoku-ribi Wahõ rewokuwydynyre.

⁴⁷ Wawokuribityhy wadekysareri Wahõ watarasadu dokuri rare.

⁴⁸ Ihyky tahe tiki tekòdu-ribi walanokonakona-ribi tõhõti rosakre. Tahe iny ibutummy hãwyky dekysanamy riwaninikre.

⁴⁹ Deuxu dokuri anomydõkõnana wiwihikõ wadeke riwahinyre. Tii tahe ityhy rare.

⁵⁰ Tikiemy inydeke ruxetòena riwahinymyhõre iny tamy wowydyna riwahinyrekí.

⁵¹ Ixityhy nohõtidu mahãdu tiki rehure.

52 Bede ikòlò sòwemy tiki rehure. Tule iny ianokò mahādu Deuxu ri-wikòhenanymhỹre.

53 Rama risamahādu deke rỹsỹna tiki riwahinyre.

54 Irybe tahe tiki rityhinyre anobo tiki inytybyreny deke tiki raryberemy. Tikiboho tahe Deuxu riwikòhenanyre.

55 Ruxetòena tahe Abraõ deke riwahinyre tule tikiemy iriokore deke ri-wahinymhỹre.

56 Marie tahe inataõ ahādu Isabeli-wana riwyrā. Idi tahe tasỹ-ò ròðsera.

57 Bededỹnana Isabeli-ò reheminyre. Iriòre reakremy ratxireriu, Iriòre reare.

58 Isỹ mahādu heka teysana-ò roholarenyre, iery mahādu tule rabe-desarenyre tamy Inynyrỹ raruxetòenyredi, Inynyrỹreny ruxetòena tamy ri-wahinyreki.

59 Tahe debò inataõ txu-di, uladu notyky resynamy bede rỹire. Zacaria raninykemyre.

60 Tai tahe ise rarybere: –Anokõre, Joaõmy rarekre.

61 Isỹ mahādu rarybere: –Joaõmy ninadu taheka ijòkõhykyre inysỹreny-ki. Anoherekibo tuukre? tai tuu raninike wahe.

62 Tuu Zacaria-ò rỹraxyreny: –Momybo raninykre?

63 Tahe Zacaria tababese riòreõ rimyre. Riritinyra kia: –Joaõ heka inikre. Tahe ijõ mahādu ibutumy ribedeòtiidỹnyre.

64 Iu tahe Zacaria rarybere Deuxu riwowydynyrene. Tahe ibutumy isỹ mahādu heka ruberure.

65 Ibutumy heka tii relyymy raremyhỹ Judeia mahādu hāwālò nihikỹmy.

66 Ibutumy tamy roholaré heka raryberenyre: –Timybo uladu rarekre? Inynyrỹ idi tarukimy iweribikre.

67 Tahe Deuxu Tyytybytyhy heka Zacariatykymy ralore. Tahe Deuxu aõmydỹnanamyhe relyyre timybo rabededỹnananykremy. Tii rarybere:

68 –Judeu mahādu Deuxu awi rare. Tii dori tajoi roramy nade.

69 Iwiòhedỹmy tulemy tarasadu tyhy Tii heka Iòlò Davi mahāduy rare.

70 Deuxu Rybedỹdu mahādu kia wesemy tuu raryberenyre.

71 Inydireny òludu mahādureny-ribi riki iny ritarenykre. Iny-di heka raruxetòerenyra.

72 Tahe iny-ribi tõihtireny rosaõhykyra. Tahe rarybekre timybo raryberemy inytybyrenymy.

73-75 Tii heka iny ritarenykemy inydireny ratxireri inyòludureny-ribi. Kia-ò heka rarybere inylabiereny Abraõ-ò. Tai heka rikiwiòhenanyrenyke brebuõlemy. Òbitimy iko-ò rakatxirenyhyykre.

76 Kai wariòre Deuxu rybedumy mabekre. Kai heka mabekre Deuxuhukỹ rybemy rybedumy. Kai heka bòhònykre

Inynyrỹ-kò iry biywinykremy.

77 Asỹ mahādu-ò marybekre biu-ò hena kanakremy ihỹre. Deuxu heka tõihti rosakre iòrarunareny-ribi.

78 Iny Deuxureny dori inydeereny ruxetòedu rare. Tii heka biu-ò hena ibutu-ò kidiõkre, tarasana wahe.

79 Kia bede lurumy rỹira mahādu biuloosònamy robikre.

Zacaria rybe tahe rikonananyre. Loosòna ywinary-ò tahe ritỹninykre.

80 Ihewo-ribi tahe uladu ratybieny taumy-di Deuxu tyhydỹna-ki tule. Tii heka bederahy-ki raremyhỹ. Tiutxumy rexitỹninykremy judeu mahādu-ò.

2

¹ Kia mahādu iòlò Augusto inire. Kia heka ibutumy bede-ki inyni rityyritinykemy bede riywinyre.

² Kurina heka Siria bede dinodu rare.

³⁻⁴ Jyje heka Nazare hāwā-ki rasŷnymy raremyhŷ. Tai tahe Kalileia bede-ribi tiiboho roirenykemy Judeia bede-ò. Iòlò Davi dori tai reare, Belē hāwā-ki.

⁵ Jyje tahe rare, tii dori Davi ijoimy rareki. Marie bòtòmŷ tii ridyre tai ihāwyy.

⁶ Tahe Belē hāwā-ò rehemynyre. Tahe herina roxina heto ihoõre herina tamynyre. Taihe awaru roxina heto-ò roire.

⁷ Tai hāwyy ratohouāsenyre. Idi rihetynyre awaru roxina hynaro-ò ritidikemy.

⁸ Iu tahe budoeni-di itxeredu mahādu bedero-ki ratximyhŷreny.

⁹ Idi tahe ŷjuõ tamy nade Deuxu-ribi. Deuxu loosõna tamy ritynyre. Ruberurenyre.

¹⁰ ŷju tamy rarybere: –Brebuõmyrenyke. Rybe wihikŷ-di adee rehe-mynyri. Ibutumy iny reysakre ka rybe-di.

¹¹ Atarasadu heka ratohouānyra Davi hāwā-ki, abiu-ò hedu wahe. Tii heka Kristu rare, Inynyrŷreny wahe.

¹² Kaiboho heka awaru roxinaõ-ò inihe bòike itxeremy. Tai heka tohouā roireri tyy-di rarahanany.

¹³ Iule tahe sōwemy ŷju widotyde Deuxu dee rawiunykemy, kiawese rawiunynyrenyre riwowydynyreny:

¹⁴ –Biu-ki Deuxu loosõna ratxihyymyhŷre.

¹⁵ Tahe ŷju ròðserenyre biu-ò. Budoeni-di itxeredu mahādu widee raryberenyre. Wylemy Belē-ò ròkòirenykre itxeremy kia aõmydŷŷnanamy Deuxu inydee riteòsinyrerì.

¹⁶ Tahe roirenyre idi tahe Marie, Jyje-txi rekoarenyre. Tuu robirenyre. Tahe broreni dòròtòhòhyna-ki uladu roire.

¹⁷ Tai tahe budoeni-di itxeredu mahādu timybo ŷju tamy raryberamy, rarybere.

¹⁸ Tai tahe ibutumy kia tamy roholaré ribedeòtiinymy rŷire.

¹⁹ Marie heka tōhōti itxi reare. Tahe sōwemy raraykywydynany ronyre.

²⁰ Budoeni-di itxeredu mahādu ròðserenyre rawiunynyreny Deuxu-ò Deuxumy reàlāre ibutu òraru-ki. Iwese ŷju raryberewesetyhyle heka ibutumy rŷire.

²¹ Iribi tahe txu rŷireu tahe rare Jesuisi notyky orokré. Debò inataõ reu-rotxu rŷireu Jesuisi notyky raorokremy raywire. Tahe rininirenyre Jesuisimy iwese ŷju rarybere myna.

²² Xiwena rŷikemy bede rŷire Moisesi bede ywidŷŷnamyna. Aõtxumy tahe dehemynde Marie Jyje-wana kia idi riwinyrenykemy. Tahe Jyje ridykemy Jerusalē-ò idi ratxireri. Tai uladu-di roirenyre Deuxu-ò riteòsinykemy.

²³ Kiamy heka Inynyrŷ Ritidŷŷna-ki roire.

Weryrykeki, Deuxu dee rawahidŷŷkre. Tii uladudelaa weryrykreki.

²⁴ Iwese tule bòtòe inatximy rawahidŷŷkre ada bòtòerurà inatxi heka xiwenamy reakre Moisesi bede ywidŷŷna myna.

²⁵ Hābuõ tai ratximyhŷre Simeaõ inire. Jerusalē hāwādu wahe. Deuxu rityhynymyhŷre hābuwi rare. Tii Kristu riraòmŷhŷre Deuxu deòdŷŷna wahe. Iijoi aõbina bina-ribi tarasadumy Deuxu Tyytybytyhy heka tai ratximyhŷre.

²⁶ Deuxu Tyytyby ihetxiu tamy rarybere: –Kai buruõtyhy Deuxu deòdŷŷnamy bobiõdi.

27 Iu Jesusise tyby-wana rehemynyreu Deuxu Tyytybytyhy heka Simeaõ riteònyre kowa-ò.

28 Simeaõ uladu taãxiò-ki rimyreu. Tahe Deuxu riwowydynyre:

29-31 —Kiamy heka Wanyrỹ Iòlò arybe retyhynyre timybo tarybete wahe. Ibutumy dorihe tewinyta. Tahe aõwaxinyhe arurukre. Abiuòhenamy heka rabira. Tii ibutu iny tarasadumy rarekre biu-ò hena wahidỹỹdu wahe.

32 Kia heka ibutumy iny-ò loosòna tewahinyta judeukõdu mahãdu-ò. Tai judeu mahãdu tahe wowydynamy tii rarekre.

33 Tai tahe Jyje Marie-wana bedede riòtiinyre aõmybo raryberekiki.

34 Simeaõ tahe Deuxu deysanamy tamyreny rarybere: —Deuxu biu-ò henamy heka kia uladu rare. Sõwemy judeu mahãdu tarasadumy rarekre, tule sõwemy tasỹ ituekre. Kia heka Deuxu deòsina rare. Sõwemy heka Jesusimy rakyararybenynykre.

35 Ibutumy iny rayky-ribi heka ibutumy ritỹnynynykre. Bederyry sõwemy bieryke tai aõhõkỹmy botỹỹnykre.

36 Tule Deuxu rybe erydỹỹnaõ rehemynyre. Ana inire. Hãwyy rare. Tii heka Fanueli riòre rare. Asere mahãdusỹõ rare. Tii heka rasenadunymy raremyhỹ. Ijadòmamy raremyhỹu heka roire hãbu-wana. Debò inatxi reurò beòralemy heka tii-wana raremyhỹ tahe tii rawytesenyre.

37 Tii 84 beòramy heka bedede idi rỹire wytesemy. Tii Deuxu dohodỹỹna heto-ribi ròhònyõhyymyhỹre. Tii heka rexitòenymyhỹre rummy txumy tabyreõ-di.

38 Tahe tii rehemynyre Deuxu dohodỹỹna heto-ò. Deuxumy reàlàre. Idi Jesusimy imahãdu-ò rarybere tii tarasadumy rarekremy.

39 Iu Marie, Jyje-wana ibutumy bedede ywidỹỹnamy ituereu, riòòserenyre tahãwã-ò Nazare-ò.

40 Jesusi raumynymyhỹre beòra beòramy. Iruru, ibede eryna sõwemy ijõdire Deuxu dori idi tarukimyhỹre.

41 Pascoa worana bedehesi riòlòdỹỹnyre Jerusalẽ hãwã-ki. Jesusi tyby heka iseboho roihyymyhỹreny tamy.

42 Tule Jesusi waòinatxi reurò beòra-di ridyreny tamy.

43 Worana bedehesi rexihureu kidiòkesedenykremy doide. Tahe Jesusi naride Jerusalẽkihikỹle. Tiiboho rieryrenyõhyyre naridemy.

44-46 Taijoiirenywanale ratxirerilemy idi rõhõtynyreny. Txusohojimy heka bedede idi rỹidi, riereny. Tai rahaõhyrenyra iijesemy diòkesedenyde Jerusalẽ-ò ixyby. Inataõ txu-di tahe tai nahadenyde, Deuxu dohodỹỹna hetowo-ki wahe. Tii heka bedede erydỹỹdu mahãdu-wana ronyre. Roholamymyhỹreny irybe-ò ronymyhỹreny. Tule rỹỹraximymyhỹreny.

47 Tii heka ibutumy rirawyònymyhỹre. Tii dori bedede ery nihikỹ rare.

48 Iseboho tahe bedede riòtiinyreny tai ronyreki wahe. Ise tamy rarybere: —Waritxòre, anoherekibo kai ikykyreny-ki tanyte. Anoherekibo tuu wadek-ereny tewinyteri aijesereny-di watxireri.

49 Tahe Jesusi rirawyònyre: —Waijeserenykõmyke. Waha heto-ki watxireri, Waha aõmysỹdỹỹnamy reywinyhyy watxireri. Kia aõbo teeryõhytyente.

50 Tiiboho rieryrenyõhyyre aõmybo Jesusi rarybereri.

51 Idi tahe dòòsedenyde Nazare-ò. Tahe Jesusi tyby rybe rityhynyhyymy raremyhỹ. Tahe Jesusise kia ibutumy riyrubunyhyymy raremyhỹ tarayky-ki.

52 Jesusi tahe raumynyre. Bedede erytyhymy relere. Ibutumy he iny iluure. Deuxu wowydyna-di ihỹre.

3

¹ Tiberiò heka waiyre beòramy iòlòmny raremyhỹ. Poncio Pilato heka Judeia bede dinodu. Ijõ heka Herodi inire. Inataõ inymy heka bede dinodumy raremy. Herodi heka Kalileia bede dinodu. Iseriòre, Filipi tahe Itureia bede, Traconite bede-wana dinodu rare. Ijõ iny tahe Lisỹnia inire. Tii Abileni bede dinodu rare.

² Anasi, Kaifa-wana heka inatxi hãbu roire. Tiiboho wiwana xiwena wahidỹydu wedu raremyhỹ. Kia bedeu heka Joaõ rehemynyre bedero-txi. Tii iny-ò Deuxu rybe tỹnydỹydu rare. Zacaria riòre rare.

³ Tii kia bede ibutumy rybe ritỹnyre, Jordaõ beroweramy ibutumy wahe. Kia wesemy rarybere: –Aòraru-ribi bòhònyke. Maratisebenyke. Tahe Deuxu aòraru riixãwididỹnykre.

⁴ Iwese Isaia ròritidỹre wesemy heka wiji rỹire. Inyõ heka ryrymyhỹ bedero-ki.

Kia:

–Inynyrỹry bexiywinybenyke. Ryòbitihikỹ biwinybenyke. Hãloo bitỹxinybenyke wimyny biijaranybenyke. Iry iòweòwena ramyhỹre heka, biòbitinybenyke.

⁵ Iratòratòkeki, wimyna biijaranybenyke.

⁶ Ibutumy iny heka Deuxu biu-ò henamy robirenykre.

⁷ Sõwemy iny nade riratisebenykremy Joaõ-ò. Tahe tii tamyreny rarybere:

–Kaiboho hemylalaweselemy toite. Deuxu ykarana-ribi bexitabenyke, aòwiwihikỹ.

⁸ Uritere kawese ryberenyõmykre: –Abraõ dori iny labiereny rare. Tai tahe ibutumy awityhy rare inydeereny.

Jiarỹ dori adeereny ararybekre: –Deuxudeewikeki, Tii kia manadile iny riwinyke. Abraõ dee ijõ riòreõmy kia manadile riwinyke.

⁹ Woma heka òwòruraruti riòròmnyhỹre. Kia raratynyõkeki heka, raòròkre. Heòty-di wòmny ririradỹỹnymyhỹke.

¹⁰ Tai tahe iny rỹraxyre Joaõ-ò: –Timybohe rakatxirenykre.

¹¹ Tai tahe rarybere: –Inyõ tõre inatximy ijõdikeki, sohoji iny ijõ-ò riwahinyke. Irỹsỹnadikeki, tule ritxuatxuake ijõkõ mahãdu-ò.

¹² Iny wixiraõ Joaõ-ò rehemynyre. Tiiboho nieru tarasadu mahãdu rare bede dinodu-ò. Tai rỹraxyreny: –Timybo aõhebo rokotỹnyrenykre.

¹³ Joaõ rirawyònyre: –Uritere aõnihikỹmy itarasarenyõmykre. Bede ywidỹỹna tyyriti myna ta tuukre.

¹⁴ Tai tahe soldado tamy rỹraxyre: –Inyboho tahe aõhebo rokotỹnyrenykre. Joaõ rirawyònyre: –Inyõ biteranyõtyhy adee nieru kanakemy. Inieru dori ahõrõ aõkõ rare. Beysake, adinodu-ribi tiwesebo nieru tetamahãte-di.

¹⁵ Tahe kia iny mahãdu raraykynyre Joaõ-di. Kowa aõbo hãbu Kristu ihỹre.

¹⁶ Tai heka Joaõ rarybere: –Jiarỹ heka bedi araratisebenyreni. Ijõ wahewo-ribi kanakre tahe woratyre inihikỹ rarekre. Tii heka awityhy rare. Jiarỹ heka raixỹruwãhãre iwataana aritake lau. Tii heka akanaratisebenykre Deuxu Tyytybytyhy-di. Heòty-di tule wahe.

¹⁷ Iti tebò-ki ratxireri. Maixõmo ruxity hitxina-di wahe. Tii heka ritakre. Maixõmo riyrubunykre ihyna-ò. Iruxyty tahe ritoonykre. Kia heòty heka tiu ruriõtyhy.

¹⁸ Aõ heka Joaõ rarybere. Sõwemy aõna aõnamy iwesele rarekemy. Dohodỹỹna wihikỹ-di tamyreny rarybera.

¹⁹ Bede dinodu Herodi heka taseriòre riòrese-wana roire. Aõbina binahakỹle riwinyre kia. Tai tahe Joaõ tamy rarybere: –Kia awi aõkõ rare. Ibina heka rare. Sõwemy aõna aõna bina tule tii riwinyre.

- 20 Tai Herodi heka Joaõ mynomy riteranyre ròtenawo-ki roikemy.
- 21 Joaõ ixiwesehyyle rexitỹmyranomy iny riratisebenyrene. Tahe tule iny witxi-rahe-ki Jesuisi riratisebenyrene, Jesuisi rexitòenyreu, biuwetyhy rarayre.
- 22 Biuwetyky-ribi tahe Deuxu Tyytybytyhyle dobehemy nade bòtòerurà wese-my. Biu-ribi rybeõ-ò iny roholare: —Kai heka Wariòre tate. Aluure heka jiarỹ wadeysatyhyre.
- 23 Jesuisi 30 beòramy raremy taaõmysỹdỹna tyhy ritelenyreu, iny heka Jyje riòrelemy rõhõtinyinmyhỹre.
- 24 Jyje heka Eli riòre rare. Matate, Levi, Maki, Janai, Jyje, ibutomy labiehekỹ Jyje rare.
- 25 Ijõ tahe Matatias, Amos, Naum, Esli, Nagai,
- 26 Maate, Matatias, Semei, Jyje, Joda,
- 27 Joana, Resa, Zorobabe, Salatieli, Neri,
- 28 Meki, Adi, Cosã, Elmadaõ, Er,
- 29 Josue, Eliézer, Jorim, Matate, Levi,
- 30 Simeaõ, Juda, Jyje, Jona, Eliaki,
- 31 Melea, Mena, Matata, Natã, Davi,
- 32 Ijese, Obede, Boasi, Sala, Nasaõ.
- 33 Aminadabe, Adimim, Arini, Esraõ, Peresi, Juda.
- 34 Ijaò, Ijai, Abraõ, Tera, Nakò,
- 35 Serui, Raau, Faleki, Eber, Sala,
- 36 Aina, Arfaxade, Sem, Noe, Lamei,
- 37 Metusalẽ, Enoi, Jarete, Maleleel, Aina,
- 38 Enosi, Sete, Adaõ. Tii tahe Deuxu juhuhu riwinyre iriòre wese.

4

- 1 Bero Jordaõ-ribi Deuxu Tyytybytyhy heka Jesuisi diòòsedỹnyde Tai heka tule bederò-ò rexiykynyra.
- 2 Tahe Satanasi Jesuisi riurihire, 40 txu-di wahe. Aõ heka rirỹsỹòhyyre Jesuisi kia itxumy txu rỹireu wahe. Idi tahe sòwemy rama risare.
- 3 Satanasi tamy rarybere: —Kai Deuxu Riòretyhy tate-wana heka, mana bitxienykre hinamy.
- 4 Tai Jesuisi dirawyònyde: —Deuxu Rybe tule kiamy rarybere. —Hãbu hewa byre sohojiribile aõkõ irumy rỹimyhỹre.
- 5 Tai Satanasi heka Jesuisi ridyre heto ratyti tyre. Ibutumy hãwãhãkỹ riteòsinyre bede bede rỹirá.
- 6 Tahe Jesuisi-ò rarybere: —Kai biwalàhànanykeki, ibutumy aõna aõna adee ariwahinykre, ibutumy hãwãhãkỹ dinodumy tule wahe.
- 7 Wahòrõ heka rare. Inyõ-ò aõtxile ariwahinykre.
- 8 Idi tahe Jesuisi dirawyònyde: —Deuxu-ò sohojile walàhàna biwahinykre. Kiamy Deuxu Rybe rarybere.
- 9 Idi Satanasi Jesuisi ridyre Jerusalẽ hãwã-ò. Biu-txi tahe rỹire, Deuxu dohodỹna heto tyre-ki wahe. Tii narybede, kai Deuxu Riòre tyhy tate wana heka bexiwatxixinyke inihe karibi hetoratyti-ribi.
- 10 Ÿju riki arayrubunykre wa. Deuxu taỹjuõ bede riywinyre aramykemy.
- 11 Tule kia rarybemyhỹre Deuxu Rybe.
- Awa riki manaõ riwotõmonyõtyhy.
- 12 Tahe Jesuisi dirawyònyde: —Tule Deuxu Rybe rarybere: —Inyõ heka Deuxu uri urihixiõtyhy.
- 13 Rexihure tahe Jesuisi urihixina. Tahe Satanasi heka Jesuisi ririre.

14 Idi tahe Jesuisi ròðsere Kalileia bede-ó. Deuxu Tyytybytyhy ruru tahe tii-wana ratximyhÿre. Ibutumy heka kia hãwã-ki ibededÿÿnana rierymy hÿreny.

15 Jesuisi heka dohodÿÿna heto-ki ròbedeerydÿÿmyhÿre. Ibutumy tuu rarybere. Tuu reàlãmy rarybemy rÿimyhÿ.

16 Iribi tahe Jesuisi ròðsere tai raumynyréò, Nazare hãwã-ò. Sabado txuu tahe dohodÿÿna heto-ò reamy raremy iwesehyyle. Tii tahe lamamy rÿire tyyriti-di rariakremy.

17 Tahe tamy Isaia tyyriti riwahinyreò. Tahe Jesuisi riijemyhÿre rybeò idi rariakemy. Tai idi rariare:

18 –Wanyrÿ Tyytybytyhy waki ratxireri. Rybe Tÿmyra wihikÿ inyko arotododÿÿkremy. Iny aòkò mahãdu-ò rybe wihikÿ ararybekemy riwatare. Tule iny ròtena-ki rÿira mahãdu, jiarÿ ariòlòdÿÿnykemy. Kiamy heka tamyreny ararybekre. Tule ruetÿmyra ariwahinykre ruetà mahãdu-ò. Iny idi rarÿÿnymyhÿre mahãdu-ribi, aritakre idi risinymyhÿreki. (Aõna aõnamy risÿnyrenymyhÿreki wahe.)

19 Tibedeubo Inynyrÿreny taijoi ritakremy ararybekre.

20 Idi tasÿ ixyby riwerasenyre. Tahe riwahinyre ixyby kia hãbu riyrubunymyhÿreò. Tii ronyre. Ibutumy kia dohodÿÿna mahãdu idi retehemy rÿimyhÿre.

21 Tahe Jesuisi ritelenymy rarybera: –Wiji idi rariará heka aõbo tamy ibededÿÿnanamy roire. Kia aõbo ritidÿÿna-ki roireri ihetxiu. Kaimy tahe wiji rarybereri, jiarÿ heka tii rare. Tii adeereny tyyriti rariará wahe.

22 Tai tahe bede riòtiinyrenyre. Kia tahe aõmybo raryberakí. Tahe widee raryberenyre. Kaa heka Jyje riðrele ratxireri.

23 Tahe Jesuisi ixityre tamyreny rarybere: –Aõu kaiboho wamy tarybetenyteri rybeòmy, myÿ manarybeke: Kai bexideytenyke, hàri, òhotibedu. Kiamy aõbohe wadee manarybebenykemy atxitenyteri:

Iwese Kafanaò bede-ki tewinyte wese ariwinyrenykemy wadi atxitenyteri, ahãwã-ki.

24 Adeereny inihe tuu ararybekre. Rybe tÿnydÿÿdu heka õmo rityhynyõtyhy ihãwãreny-ki.

25-26 Tahe iwitxiramy ararybekre. Ibedeu kia raremyhÿu, sõwemy heka rama reamy raremyhÿ judeu sÿ mahãdu. Sõwemy wytese mahãdu heka ramamy rurumyhÿre. Biu heka roaõhykyre tai inataò beòra weeremyhÿ wahe Sareta hãwã heka Sidò bede-ki tii rasÿnymyhÿre. Tahe Deuxu bede riywinyre Eliasi rakemy iny sohoji wytese-ò, rÿsÿna riwahinykelemy wahe.

27 Eliseu bedeu heka sõwemy tybinadu rÿimyhÿ. Sohoji inyle riteytenyre. Naamy heka inire. Tii heka Širia bede luduò rare.

28 Kia dohodÿÿna mahãdu heka ibutumy iu tamy rakyarananyre.

29 Rimyrenyre heka Jesuisi. Idi retÿhirenyre hãwãlò ratya-ò ridyrenyre. Idi rehurenkykemy riwisÿnyrenyre.

30 Tahe Jesuisi inysõwehekÿy-txi ralore. Idi rahenyre.

31 Iribi tahe Jesuisi rare Kafanaò-ò, Kalileia bede-ò. Sabado txuò txuõlemy heka Jesuisi iny ribedeerynymyhÿre.

32 Sõwemy heka iny ribedeerynymyhÿre mahãdu tamy awimy rÿira, irybe dori awireki wahe.

33 Hãbuò raremyhÿ dohodÿÿna hetowo-ki tyytybybinahakÿ-di tahe taumywo-ki ratximyhÿ. Tai tahe tii ryryre:

34 –Jesuisi, Nazareludu, aõhebohe ijoi bisÿnykremy atxiteri? Biwahubenykre aõbo? Jiarÿ heka araeryre mobo taté. Kai heka Deuxu deòdu atxiteri.

³⁵ Tai tahe Jesuisi tamy rarybere tyytybybina iumywo-ki riyrykemy. Iribi riòlòdỹnyre. Tahe idi rehure iutyde-ò idi iribi ròhònyre. Hãbu aõhe risỹnyõhyyre.

³⁶ Ibutumy heka iny ribedeòtiidỹnyre. Iny sohoji sohoji widee rarybere: —Aõrybemy aõwe tii rarybereri? Timybo iny-ribi tyytybybina riteònyke.

³⁷ Ibutumy timybo Jesuisi riwinyre, ijyynamy reare.

³⁸ Tahe Jesuisi ròhònyre Simaõ heto-ò idi rare. Simaõ riòrelahi webinadumy roire rubuna-di. Tai Jesuisi-ko tuu relyyreny.

³⁹ Tai Jesuisi ibireweribi-ò rare. Tahe irubuna iribi riòlòdỹnyre. Tahe tii ritamadỹnyre. Rỹsỹnaõ tamy riwahinyre.

⁴⁰ Ibutumy iny tawebinadu mahãdu didydenyde. Ibutumy Jesuisi riteytenyre tibò iratityre rilidimyhỹre. Sõwemy iny tyytybybina-di rỹireri mahãdu riòlòdỹnyre.

⁴¹ Iu tahe ryrymy reamy rỹimyhỹ: —Kai Deuxu Riòretyhy tate. Tii Jesuisi rierymyhỹ tii Deuxu deòdu raremy, tyytybybina wahe. Tai Jesuisi tamy rarybere rybeõkemy.

⁴² Txu ijiramy Jesuisi rare bedero-txi ixisohojile. Iny sõwemy riijemyhỹ. Itxi rearenyre, iatysy deramy rekoamyhỹreny.

⁴³ Tai Jesuisi rarybere tamyreny: —Jiarỹ heka Rybewihikỹ Tỹmyra arelyykre iwitxira hãwã Deuxu Òlòna Tỹmyramy arelyykre. Tuu Deuxu diwateònyde.

⁴⁴ Jesuisi ibutumy Judeia mahãdu bede bedemy dohodỹna rỹiraki rotohodỹmyhỹre.

5

¹ Jesuisi tahe aho ijà-ki rỹire Kenesare aho ijà-ki. Iny heka sõwemy Deuxu rybe-ò roholakemy iu rỹimyhỹ.

² Tii robire hãwòò inatximy roinyimyhỹre. Waxidumy mahãdu heka ri-rahure rià-di risuhòneri.

³ Idi tahe rimyre hãwòò. Simaõ hãwò heka rare. Tii tahe ixi-di ritaranyre beroro-ò. Tai tahe tii rexidelenymy relyyre. Kia iny rỹimyhỹ mahãdu heka ribedeernymy relyymyhỹre.

⁴ Rexihure rybe-ribi. Idi tahe Simaõ-ò rarybere: —Make wa bera-txi. Rià bitidike. Bimykemy utura.

⁵ Tahe Simaõ rirawyònyre: —Wanyrỹ, ruu wa wadireny aõkõhykylemy bedewadireny rareri, uturamy ho aõkõ. Tarybete urenana anakre. Aritidikre heka rià.

⁶ Tahe ritidireu tahe, rià utura sõwemy rimyre, kia rautxienyre. Tule riykamyhỹ rià.

⁷ Talawò biòwa mahãdu-ò ryryre: —Bòdòibedenyke bidi-wawiòhenanybenykemy. Inatxi hãwò heka rỹxire. Ritỹxinyre utura-di. Ihyy berahatxi-ò ijiramy riwisỹnymyhỹ ilawòreny.

⁸ Simaõ tuu robire. Tii Jesuisi ratximyhỹre tahe tatiowomy resere Jesuisiko-txi. Simaõ Pedro rarybere: —Wanyrỹ, aribi kỹny iòhòmy arỹiòtyhy. Jiarỹ heka waðrarudimy rare.

⁹ Simaõboho bede riòtiinymy rabadewore aõma utura sõwemy tamyreny riwahinyraki wahe. Tii tuu iximy rarybere.

¹⁰ Ibutumy tiibohe mahãdu ribedeòtiidỹnyrenyre Zebedeu riòre kia Txiau, Joaõ-wana. Jesuisi rarybere Simaõ-ò: —Brebuõmyke heka ikonana-ò heka utura bimyoõkre. Wadee dori maaõmysỹdỹnykre hãbu wadee bimykremy. Tamyreny biwatỹnynykre. Iwese utura temymyhỹte wese, wadee hãbu wiji bimykre waerydỹna mahãdumy rarekremy.

11 Tahe waxidumy mahādu ibutumy kaa tawaxi tarià iu ririra Jesuisi riheludunykremy.

12 Ròirenyre rirònyrenyrene ibutumy hāwā-ò. Idi tahe hābuõ rare ityyjyhykyle. Hābu Jesuisi robireu tahe resere iko-txi, rexitòenyre: –Wanyrỹ, adeewikeki biwateytenykre.

13 Jesuisi tamy tebò ritetemy rarybere: –Kohe, arateytenykre. Tii reytemy reare.

14 Tai Jesuisi rarybere tamy: –Inyõ-ò tahe ijyyõmykre. Xiwena wahidỹỹdu mahādu-ò make. Tai maxiwekre tuu Moisesi bedede riywinyre myna. Xiwenaõ heka biwinymy biwahinykre. Moisesi rarybere wese wahe. Iny mahādu-ò heka biteòsinykre. Kia riteòsinykre teytetamy.

15 Tahe ihārele Jesuisi ibutumy rieryre. Sõwemy iny heka wirotyre raho-lakremy. Ijõ nade aõma iwebinaduna ibina-ribi riteyteuykemy.

16 Tahe Jesuisi iribireny aõma rexitòenykremy rexitare.

17 Ijõ txuu ròbedeerydỹỹmyhỹu, fariseu mahādu, bedede ywina rybe bedede erydỹỹduõ-wana ronymyhỹreny. Ibutu hāwā hāwā-ribi dotydenyde wese tahe sõwerenyre, Kalileia bedede-ribi Judeia bedede-ribi, Jerusalẽ hāwā-ribi. Deuxu deytēna Jesuisi-ki ratximyhỹ. Jesuisi hāwālò-ribi dobehede tii-wana, taerydỹỹna mahādu-wana wahe. Tahe sõwemy iny iube-ki ributunymy ronymyhỹre.

18 Iny mahāduõ heka hābu iumymy manadu kididydenykemy ratxireri Jesuisiko-ò ritidirenykemy. Idi tahe hābu webinadu wahe Jesuisi-ò rakemy bedede riywinyre. Inatyhyle riathyhnyre.

19 Inysõwereki tahe tamy rehemynyrenyõtyhy. Tai tahe hetoratyti-ò raòwònyre hābu webinadu-di. Iribi tahe diberesedỹỹnyde reroti-di.

20 Jesuisi robire, rieryre aõma rityhynymy ratxirenryeri. Hābu-ò Jesuisi rarybere: –Wy, aõraru heka raixāwidỹỹnyra.

21 Tahe fariseu mahādu he widee raryberenyre: –Mobo kia hābu ratxireri, timyhe tu kia irybeõna rybe-di. Deuxu-ò kia rybe ibinatyhy rare. Deuxu sohojile òraru-ribi iny riixāwididỹỹnymyhỹre.

22 Tahe Jesuisi rierymyhỹ timybo rexinohõtinyinmyhỹreny. Tai rarybere: –Aõherekibo kia wesemy texiraykynytenyteri.

23 Tibohe irutaõre webinadu-ò rybe: –Aõraruna reixāwididỹỹnyra ada my-imy mariake aõbo.

24 Deuxu Riòre Hābutyhyhykỹ jiarỹ rare. Tai waruruna wadee Deuxu Riòre òraruna ixāwididỹỹnamy. Katahe bierybenykre inatyhymy aõbo rarybereri: –Myike, abyre biwymy asỹ-ò ta mahe.

25 Hābu tabyre rimymy tahe aõwesele tasỹ-ò rare. Deuxu riwowydynymy rare.

26 Sõwemy iny ribedeòtiidỹỹnyrenyrene. Riwowydynymy rỹimyhỹ. Tiiboho raryberenyre: –Aõwitxiramy wiji inyboho robirenyra. Tiu juhū tukõre-ribi wahe robirenyra.

27 Iribi tahe nieru bedede dinodu nieru mynydumy robire, Levi heka inire. Tii heka raaõmysỹdỹỹnymyhỹ titxibo nieru tarasana-ki. Jesuisi tamy rarybere: –Manakehe wawana.

28 Tahe taaõna ibutumy ririre, idi ihemy rare.

29 Levi tahe taheto-ki roxinaõ riòlòdỹỹnyre Jesuisi dee. Tamy rehemynyre nieru arisidu mahādu, tule fariseu mahādu. Ibutumy iny iarixina mahādu.

30 Kia fariseu mahādu kia bederydỹỹdumy mahādu tyyritirybedỹỹdu mahādu kie heka aõbina binahylemy rarybereri Jesuisimy. Jesuisi terydỹỹna mahādu-wana kiamy rarybereny: –Aõherekibo kaiboho teroxitenyteri, nieru arixidu-wana, iòrarudu sõwe mahādu-wana.

³¹ Jesuisi rirawyònyre: —Iny awimy ratxireri-wana, òhotibedumy reaòmyhÿre. Webinadu mahãdule ta tuu reamyhÿre.

³² Òbiti mahãdu-ò aòkò heka jiarÿ anade rybemy. Tiibohole heka ixi-txi tòhòti reakemy idi watxireri.

³³ Tahe tiiboho Jesuisi-ò rarybere: —Joaõ heludu mahãdu roxiõmy txumy rÿire. Tule tiiboho rexitòenyrenyrene. Sòwemy rexitòenymyÿre fariseu mahãdu erydÿÿna tule. Tahe aijoi tahe riroximyÿrenyrene riõmyÿrenyrene.

³⁴⁻³⁵ Tahe Jesuisi tamy rarybere: —Hãwyyemy heridu tÿmyra ijoi ratxikeki heka tiu itobidÿÿnana mahãdu wahe. Kia heka riroximyÿre. Kia tahe tÿmyra iribireny ratakreu, ijoi mahãdu renarehekre.

³⁶ Tyky tÿmyraõ tiu tykytyby dòbònamy iny ritidiõtyhy. Timyki dori wii wiòbydÿÿõna.

³⁷ Vii tÿmyra heka tiu aõiròdu tyky watxiwe yla tyby-ò rarareõmyhÿre, tukeki ta kia raykacre idi vii urile rejujukre.

³⁸ Vii tÿmyra heka hyna tÿmyra-ò rararemyhÿke.

³⁹ Inyõ vii tybyhykÿ riòkeki, itÿmyra rexitòenyõtyhy. Kiamyki rybe. Vii tyby dori itÿmyra-ribi awi rare.

6

¹ Judeu elehydÿÿnymyÿreny txu kia idi rekoarenyrene maixõmoho-di. Ierydÿÿna mahãdu rimyra maixõmo, maixõmo, debò-di riroxitytxiwimyhÿ riymy idi rare.

² Fariseu mahãdu tuu robire. Tamy rÿÿraxire: —Aõherekibo kia wese tewinyteri. Kiamy heka iwidÿÿõmyke bede ywina rybe rarybemyhÿre judeu elehydÿÿnymyÿrenytxumy.

³⁻⁴ Jesuisi tamyreny rarybere: —Ihetxiu Davi tamahãdu-wany rama risareu, Deuxu dohodÿÿna hetowo-ò rirònyre. Tai Davi xiwena rÿsÿnale taijoi-wana rirÿsÿre. Xiwena wahidÿÿdule heka irÿsÿdure, inywitxira ta aòkò.

⁵ Jesuisi ritÿnynyrene tamy: —Hãbutyhykÿ jiarÿ rare, Deuxu Riòre wahe. Kiata sabado wedu jiarÿ rare, elehydÿÿnymyÿrenytxu wedu wahe.

⁶ Ixityre ralore dohodÿÿna mahãdu heto-ò ròbedeerydÿÿkemy. Hãbuõ tai rare tebò rabinamy.

⁷ Tahe fariseu mahãdu Jesuisi-ò retehere. Riteyteynykemy kia hãbu webinadu judeu elehydÿÿnymyÿrenytxu. Rexiwodohonanyrene. Kiatxuu tii riwinyrekeki tahe ribinanyke judeu elehydÿÿnymyÿrenytxu, riwinykeki wahe.

⁸ Jesuisi rierymyÿre aõmybo tiiboho raraykynyrenyrenyri. Jesuisi tamy rryre, —Aõma hãbu debòbina-ò: —Mynyike ini, ityareny-txi.

⁹ Tahe fariseu mahãdu-ò Jesuisi rarybere: —Arÿÿraxikre inihe adeereny, awire adee ka hãbu debò ariteytenyke sabado txuu. Aõbo adeereny awire sabadotxu widÿÿ. Aõwihikÿwidÿÿmy aõbo ada aõbina widÿÿmy. Rubu-ò wahidÿÿ aõbo ada rubu-ribi itarasa aõbo.

¹⁰ Retehere! Ibutu-ò idi hãbu-ò rarybere: —Ebò inihe biditeòsinyke. Tiu hãbu tebò riteòsinyreu tahe, reytete.

¹¹ Reburerenyrene heka. Timybo Jesuisi risÿnyrenyrenyrenyreny.

¹² Idi tahe Jesuisi heka hãwãlòraty-ò rare igitòedÿÿmy Deuxu-ò. Rureherehemy heka tamy rexitòenymy bede idi rÿire.

¹³ Txuijaramy tahe ludu mahãdu-ribi waòinatxi reurò taheludutyhy mahãdu ritare. Tarybemy rybedumy rininirenyrene.

¹⁴ Sohoji ijõ heka, Simaõ inire, Pedromy idi ranire, ijõ tahe Andre rare, iseriòre. Idi Txiau, Joaõ, Filipi, Bartolomeu.

15 Mateu, Tome, Tadeu Txiau, (Kia Txiau heka Afeu riòre rare.) Ijõ Simaõ Kana bedeluduõ rare, tasubedeluudure.

16 Juda Txiau riòre, ijõ Juda Isariò tahe Jesuisi tyhedỹỹdu rare.

17-18 Jesuisi dobehede bedero-ò hãwãlò-ribi. Tahe sõwemy iny iheludu mahãdu tii-wana rỹimyhỹ. Judeia bede mahãdu Jerusalê hãwã mahãdu. Tule Kalileia bede, Tiro hãwã, Sidõ hãwã mahãdu. Tiibohe wii ributunymy hãwã mahãdu Jesuisi-ò roholakemy idi reytekemy. Kia tai ròteytedỹỹmyhỹ.

19 Ibutumy Jesuisi tyky-ò tamy adereximy risỹnymyhỹre adeytena iribi rõhõnymyhỹ.

20 Tamyreny retehere tai ibutumy rierynanyreny: –Kaibohe aõkõreny-ki, beysabenyke. Deuxu Òlona dori ahõrõreny rare.

21 Rama arasareri-wana beysabenyke. Bihydymy dori mabekre. Tule tahinyteri wana beysakre ihewo-ribi.

22-23 Beysamy butxuenyke, inyõ umy radõnykeki tule. Kaibohe dori Deuxu Riòre tetyhynytenyte jiarỹ tiire, Hãbutyhyhykỹ Riòre wahe. Kia mahãdu eramy ijira Riòre rỹikeki beysake. Beysa tyhyki tai. Biu-ki dori aõwiihikỹ bitakre. Deuxu rybemy rybedu mahãdu tule rotỹỹnyreny iòraru-ki.

24 Kobe làhãxe kaibohe ityhy mahãdu abedesanarenny dorihe rexihura.

25 Kobe làhãxe ahãdyreny mahãdu, aramasanarenny dori rehemynyre. Kobe làhãxe abedesarenny, ahinanarenny dori abrunarenny rehemynyre.

26 Kobe làhãxe atyhydỹỹ sõwereny tule dori. Ilabiereny rybemy rybedutyhy aõkõ rityhynyreny.

27 Warybe-ò taholatenyteriki inihe ararybekre. Aòludu luumy atxibenyke amykyaradurenny-di, awimy idi mabeke.

28 Ibinamy aõma umy rarybekeki aõbinahakỹ riwinykeki, tamy bexitõenykre Deuxu-ò.

29 Aõsỹny-ribi anahatenykeki iyre-ribi iwyòdỹỹmy tamy bexirahõreke. Inyõ atyky riwykeki tule tamy arahana biwahinyke.

30 Iwese aõtxiu aõna inyõ adee rexitõenykeki, tamy biwahinyke ixyby iribi iwydykõkemy.

31 Aõbina inyõ adee riwinykõkemy atximahãte. Iwese tiu kia aõhõkỹmy inyõ isỹdỹỹõmykre.

32 Kai aluu mahãdu sohojile iluuõmyke; òrarudu mahãdu dori tuu rỹimyhỹre.

33 Kai aery mahãduòle tawotõemahãte, timyki Deuxu-ribi aõ atarasaõna. Iny itxỹte iehehe mahãdu dori widee rawotõemyhỹre.

34-35 Òrarudu mahãdu heka widee rihuõtemyhỹre. Iribi tahe iwesele ixiby kidiwykemy idi riwisỹnymyhỹ. Kai ta buhuõtemyhỹke idi tehuõtete ixyby iraròsòkõmyke. Tukõkeki ta Deuxu-ribi aõ atarasaõna. Aòludu luumy atximahãbenyke. Tai Deuxu-ribi aõwiihikỹ bitakre. Tai Deuxu wihikỹ riõremy mabekre. Tii dori inywi-ò inybina-ò awire.

36 Awimy kaibohe boibeke, iwese boreny awimy biu-ki ratximyhỹre wese.

37 Inyõdee kyarakõmyke tai Deuxu adee rakyarananyheny. Inyõ taòraruna biixãwididỹỹnyõkeki, Deuxu tahe aòraruna riixãwididỹỹnyõkre.

38 Ainytyhyke inyõdee imyna Deuxu adee rainytyhynanyhyyke. Deuxu ibutumy aõwi adee riwahinykre. Tiwesebo tòwahite wesemyna idi Deuxu adee rõwahikre.

39 Aõmybo ribedeerynyre ijyyõmy relyyre: –Inyõ ruetã heka riwiòhenanyõtyhy iwitxira iny ruetã. Tukeki heka hãloo-txi wiwana resekre.

40 Ierysỹdỹỹ iòrmysydỹỹdu, kia ratyre aõkõ ratximyhỹ. Kia uladu ratyritinyre nihikỹmy tahe erysydu tiu taerysydỹỹdu ratyre ratxiõmyhỹre.

41-42 Òwòrukre nihikỹ aruety-ki roire. Aõherekibo aseriòre ruety-ribi òwòru rỹnysiõ tarasamy tewisỹnyteri. Kia heka itxenadỹỹdu tate. Juhuu òwòrukre aruewo-ribi bitakre. Idi tahe betehemy iruewo-ribi aõsõmo bitakre.

43-44 Òwòru wihikỹ tiu bederaty binaõ riwahinyõhyymyhỹre. Tule òwòru binahakỹ bederatywimy raratynyõmyhỹre. Òwòru raerymyhỹre iraty-ò itxere rỹimyhỹreu, beraty-ò retehemy awire ada ibinare aõbo beraty-ò retehemy awire ada ibinare aõbo. Figoraty uvaraty tiu iwitxira òwòru-ribi raheõmyhỹre.

45 Hãbuwi heka aõwimy rotỹỹnymyhỹre iwo-ki tuu rỹimyhỹremyna. Tule hãbu bina aõbinamy rotỹỹnymyhỹ iwomy tuu rỹimyhỹremyna aõbina bina. Inyõ dori aõmy raraykymyhỹremyna rarybemyhỹre.

46 Kai rarybere boholaõkeki aõbo biwinykeki. Uritere wanidỹỹõmy. Wanyrỹmy tiwaninimyhỹtenyte tahe warybemynamy atxõhyylemyhỹtenyte.

47 Tiwese hãbu warybe riwinyre wese adee ararybekre. Tiu heka ariteòsinykre.

48-49 Hãbuõmy akoreny arelyykre. Tii warybe-ò roholare idi imynany rotỹỹnyre. Tii kiata taheto riwinyre manadelemy ria-di. Beòra iheto reseõhyre manatyre-ki relereki wahe. Ikõmyta warybe-ò roholakõre, kawese rotỹỹnyre. Taheto uritere sukile riwinyre. Beòrau ta, urile resere. Ikyhy-nakõreki wahe. Kiamyta rotỹỹnyre warybe tyhydỹỹdu-ò idi ityhydỹỹdukõ-ò.

7

1 Jesuisi tarybe rahu-di tahe Kafanaõ hãwã-ò rare.

2 Tai Roma soldado dinoduõ tai ihỹmyhỹ. Teòduõ tahe binamy irubu iòhòmy roimyhỹ.

3 Soldado dinodu Jesusini-ò roholareu tahe, iòrysomy rarybere. Taita judeu mahãdu kia matuariõ rexitòenyre aõma kididykremy riteytenykremy kia webinadumy roireri.

4 Tahe Jesuisi nade juhu be kiamy Jesuisi rarybere: —Ka hãbu heka awi biwiòhenanykre heka.

5 Ka hãbu heka waijoi luu nihikỹ rare ihyymy ta dohodỹỹna hetoõ riwinyre waijoi-ò.

6-7 Tai tahe Jesuisi rare tiiboho-wana. Tehemyny sỹ iòhòmy rare. Idi tahe ryrowetyakile Jesuisi-wana wii riòbinyre. Aõma soldado dinodu kia biòwa-ò wahe. Rarybere he aõma soldado dinodu kiamy rarybereri: —Noõmy heka. Ihãrele teka awimy rareòle heka bedehe mynyke. Awi tate timy heka anaixiranyõtyhy dori raixỹruwỹhỹre alau adee igitòedỹỹ-ò aõma dori adee rybe rỹikekile aõweseleke wadeòdu kia reytemy reake.

8 Jiarỹ dori inydee radỹỹdu jiarỹ rare. Aõbo riwinykemy. Kia riwinyre warybemynale kia heka jiarỹ rare. Wadeòdu-ò rarybewãhãraki heka: —Kia biwinybenyke. Riwinymyhỹrenyre. Kai tule marybeke, beyteke. Tahe aõwese reytemy reake. Robedeòtiidỹỹnyre, kia tuu rarybereki wahe.

9 Jesuisi ròkesereri kia rarybemyhỹò wahe: —Jiarỹ ka tiu judeu mahãduy-ki. Hãbuõmy rabiõ watyhydỹỹnamy. Rabireri riwatyhynyreri rabireri.

10 Soldado dinodu deòdu ròkesereri. Ixyby reytereri idi ronyre.

11 Jesuisi rare terydỹỹna mahãdu-di ijõ hãwã-ò. Nã hãwã-ò heka rare. Kiemy rahyymy heka rahyire. Sõwemy iny iheki rare.

12 Hãwã ijò-ki rehemynyre tahe kia ibutumyle rehemynyre. Sõwemy iny rubudu rareò wabede-ò. Weryrybõò rurure. Ise, wytese, heka iriòre sohojihyylere. Iny sõwemy heka riheludunyre tahi-di taibru-di.

13 Tai Jesuisi tuu robireu, idi rexiwòtenymy kamy rarybere: —Ibrukõmyke!

14 Jesuisi debò ritidire caixaõ-ò. Iu idi itxyydu ruhurenyre. Idi tahe rarybere: –Weryrybò, bexixake wahe.

15 Weryrybò rexixamy reamy ronyre. Idi rarybere. Tai tahe Jesuisi ise-ò riwahinyre.

16 Ibutumy tasỹ mahãdu ribedeòtiidỹdunyre. Tai tahe Deuxu riwowy-dynymyhỹreny: –Ebe, aõherewe, Rybedu nihikỹ kỹnyhe witxijumy iny-deeremy rehemyre.

17 Kia taheka bede bede hãwãmy Jesuisini reare.

18 Joaõ heludu mahãdu ibutumy tuu relyyre iko.

19 Inatxinareny Joaõ riteònyre Jesuisi dỹraxyimy kamy wahe: –Kaiwe nodu aõbo tate, ada txiò aõbo ini nodutyhy ariraòrenykre?

20 Idi Jesuisi-ò ròirenyre tuu itỹraxyidỹmy; –Kai we nodutyhy tate? Ta txio aõbo ini ijõ ariraòrenykre?

21 (Iu ta Jesuisi yla aõkõ webinadu, binanamy binana mahãdu riteytenyra, tyytybybinamy ykydu mahãdu, iruetà mahãdu sõwemy tule.)

22 Irahudi ta Jesuisi rarybere Joaõ ijoi-ò: –Bòðsebenyke. Ibutumy kamy tabitenyta taholatenyta Joaõko-ò tuu belyybenyke: –Iny ruetà bina mahãdu retehererimy, Iny rutiãre mahãdu rariarerimy, tyybinamy binana mahãdu reytererimy, iny nohõtity mahãdu roholarerimy. Iny rubu mahãdu heka rubu-ribi rexixarerimy, urimynodu mahãdu heka Rybewihikỹ Tỹmyra-ò roholarerimy.

23 Iny bedesa heka rare, warybe tyhydỹdu mahãdu.

24 Joaõ heludu mahãdu iribi ròhònyreu tahe Jesuisi rarybere Joaõ bededỹnanamy: –Aõmybo wahe Joaõ-di tõhõtinytenyete aõmy tubedi nohõtinyrenyre tamy itxerena bederahy tõitenyteki wahe. Otxirarade wese yhy-ki idi tahõtinytenyete.

25 Aõma hãbu urimynodutyhy aõbo tahõtinytenyteri. Hãbu tyywihikỹdiremy tahe tahõtinytenyete. Iwese iòlò taheto wihikỹ-ki ratximyhỹre wesemy aõbo tahõtinytenyteri.

26 Wadee manarybeke aõbo betehékemy tahõtinytenyteri. Deuxu rybeduõmy aõbo tahõtinytenyete. Inatyhy tii rare. Kia ratyre heka tii rare.

27 Aõma dori tyyriti-ki rarybemyhỹre:

–Tii heka wakoki kadehemynykemý ratximyhỹre, tamy relyykemy, ryõ riywinymyhỹre.

28 Inatyhy kaa rare. Tie heka ibutu hãbu ratyre ratximyhỹre. Ihãrele tahe inyõ Deuxu Iòlòna-ki ratxikeki heka iratyre ratximyhỹre.

29 Tahe nieru butudỹdu mahãdu kia-ò roholare. Tule sõwemy iny kia-ò roholare. Tiiboho Deuxu bede ywina tyhydỹdu mahãdu roire. Tule Joaõ Sebedỹna mahãdu roire.

30 Fariseu mahãdu tahe, bede ywina erydỹdu mahãdu tahe Deuxudeewina dera rare. Tai Joaõ-ò ratisebemy roiõtyhy.

31 –Mowesebo heka wijinabòdu mahãdu wesemy ratxireri.

32 Uladu mahãdu wesemy tiiboho ratxireri. Tiiboho ijõ uladu mahãdu-ò ryrmyhỹre: –Inyboho rawiunyre, tahe kaiboho teseõtyhy. Wobina wiu rawiunyre tahe kaiboho tahinyõtyhy.

33 Joaõ Sebedỹdu renareherenyõmy rỹire, vỹ riõõre. Ihãre tahe kaiboho tarybete: –Tii tyytybybina-di ihỹre.

34 Hãbutyhyhỹki jiarỹ rare, Deuxu Riòre wahe. Jiarỹ reroximyhỹre tule reõmyhỹre. Tai tahe tarybemahãte jiarỹ wabyre nihikỹlemy wamomohõkỹremy. Jiarỹ riki òrarudu liinatyhy heka jiarỹ rare, nieru tarasadu liina wahe.

35 Ihāre tahe aōikōkōlemy heka taraykynymyh̄tenyte ihāre taheka òbitilemy ixi-di tahōtinymahātenyte.

36 Fariseu mahāduō heka Jesuisi ritobinyre taheto-ò roximy. Jesuisi tahe rare idi ronyre roximy.

37 Kia hāwā-ki tahe hāwyyō ras̄nyre, wydena wahe. Tii heka Fariseu heto-ki riroxirerimy roholareu, tii tule rare. Tahe hyna òwyhyk̄y rimyre. Alabastro aderònahynani rare.

38 Hāwyy tahe Jesuisi hewomy ronyre, iòhòmy. Tahe aderòna ritxiwire iwatyre. Tule iwa-ki ruworuwòmy ratximyh̄y irube-di iwa risuhòra idi irade-di rabunyre.

39 Fariseu kiamy robireu, ixideele rarybera: —Kia hābu Deuxu rybeduō aōkō rare. Tuukeki tii hāwyy rieryke aōhāwyybo tii ratxireri.

40 Jesuisi tahe fariseu-ò rarybere: —Simaō, adee ararybekemy watxireri. Simaō tahe rarybere: —Manarybeke Waeryd̄ȳdu!

41 Tahe Jesuisi rarybere: —Nieru huòteduō heka inatxi hābu-ò nieru riwahinyre. Ijō 500 rihuòtera, ijō tahe 50my rihuòtera.

42 Idi tahe hābu inatxi nieruōhyymy r̄yire òòsemy tanieru tamy. Tai tahe nieru huòtedu riwotòenyrenyre tahe ritusanyre, wiwana iòwy riixāwid̄ȳnyre. Tibo huòtedu ilāhānad̄ȳdu tyhyre.

43 Simaō dirawyònyde: —Kia òsana 500my rihuòtere. Tahe Jesuisi rarybere: —Inatyhy rare.

44 Jesuisi tahe hāwyy, riijemy, tahe Simaō-ò rarybere: —Kahāwyy ini bidijjeke. Jiar̄y nadehemynydeu, tii tarube-di wawa risuhòra. Kai beeō tadiwyòte. Tii tarube-di riwawasuhòra. Iu tarade-di riwawarabunya.

45 Kai tiwawehityhynanyòte rehemynyrau, tii tahe riwaatyōhyymy ratxireri.

46 Kai warade-ki òl̄yre tetxiwiòta tii tahe aderòna wawatyre-ki ritxiwire.

47 Tai tahe adee ararybekre. Tii inatyhymy waluure. Taòraruna ixāwid̄ȳna-ki. Inyō iòraruna ibutemy raixāwid̄ȳnymyh̄reki, tii inatyhymy aōkō taòraruna ixāwid̄ȳdu luure. Ijō tahe inatyhyhyk̄ylemy taòraruna ixāwid̄ȳdumy reamyh̄re.

48 Tai Jesuisi hāwyy-ò rarybere: —Aòraruna reixāwid̄ȳnyre.

49 Tai roxidu mahādu widee raryberenyre: —Mohābubo kia rare? Tii òraruna riixāwid̄ȳnyrerimy.

50 Tahe Jesuisi hāwyy-ò rarybere: —Atyhyd̄ȳnamy textitarasad̄ȳnyte aòraruna sōwe-ribi biu-ò hena tetateri. Mata h̄ny.

8

1 Rexideleny raremyh̄y ralòralòmy hāwā hāwā ikōkōmy reamy rare kia aōma Deuxu Rybewihik̄y T̄myra relyymy rare. Tai ierd̄ȳna mahādu waòinatxi reuròmy idi ròirenyre.

2 Tule hāwyyō tiiboho wana ròirenyre Ijōta Marie Madalena heka rare. Juhuu tahe tyytybybinahak̄y-di raremyh̄y. Idi debò inatxi reuròmy tyytybybina iribi riòlòd̄ȳnyre.

3 Ijōta Joana Kusa hāwyy rare. Tii iòlò Herodi heka aōmys̄d̄ȳdu heka rare. Tule ijō hāwyyō Susana inire. Idi tule ihona hona Jesuisi taijoi-wana ibutumy tanierureny-di riwiòhenyrenymyh̄re.

4 Idi iny sōwemy titxiribibo dirahude kia-ò. Kia mahādu-ò heka Jesuisi ribedeerynyre ijyyōmy.

⁵ Alòbòròna-di dehudu heka ròhònnyre taoworu-ò. Alòbòròna-di imahādu ijō ryro-txi resere. Tai heka iny rariamyhỹre alòbòròna tyre-ki. Nawii tule tuu riroximyhỹ.

⁶ Mana rotysu-txi ijō rejuxunyreri mana rotysu-txi suu dori ibututere tai tahe iraruxiòlemy raumynyre.

⁷ Ijō tahe edey-txi resere. Raumynyreu tahe edemy riòhỹtỹnyre.

⁸ Ijō resere suwi-txi. Tai ta raumynyre idi sohoji alòbòrònaty-ribi 100my ratatynyre. Jesuisi tamy rarybere: —Kaiboho òhòtirennydikeki heka inatyhymy warybe-ò bohohabenyke.

⁹ Tai tahe Jesuisi-ò rỹraxyrennyre: —Aòwe kaa tekewesenanyteri?

¹⁰ Jesuisi rirawyònyre: —Kaiboho heka teerytenyete aòbohe wasimy ijyy rare Deuxu dori adeereny ritỹnynnyre. Kia tahe rare, Deuxu Iòlòna aòmydỹỹnana wahe. Ijō iny-ò tahe rarybere ijyy-di relyyre.

Tai robikre tahe, rieryòtyhyke. Roholarennykre tahe rieryòtyhyke, timybo juhoo Deuxu rybemy rybedu mahādu rarybere wese.

¹¹ Aòmybo kia aòijyybo kia rare wahe. Alòbòròna heka Deuxu Rybewihikỹ wese rare.

¹² Ryro-txi resere heka ijohonadu wesemy rare. Deuxu ijyy heka resera ede sòwey-ki. Tii heka Deuxu Rybe-ò roholamyhỹre mahādu wese rare. Idi tahe Satanasi heka ritamyhỹre iworeny-ribi. Tai rityhynnyrennykòmy idi biu-ò rahenyòkremy.

¹³ Ijō tahe manasuò-txi resere heka, kia Deuxu Rybe-ò roholamyhỹre mahādu wese rare. Rybe-ò juhoo roholamyhỹre deysana-di rityhynnyhỹre. Kia manatyre resera heka irarutiòhykre. Iny mahādu wese heka rare. Idi ikyhynakòreki, iwodelòlòtòmoreki urile tatyhydỹỹna riatymyhỹre.

¹⁴ Ijō tahe edesuyky-txi resere heka, kia Deuxu rybe-ò roholamyhỹre, idi iworekena sòwemy, iaòdelòlòtòmomy, idi ityhyna wahe urile riòhòtỹnnyhỹre. Tai ròwiòhenadỹỹòhymyhỹre Deuxu tyhydỹỹna-ki. (Kia tahe alòbòrònaò ede yky-txi resera tahe iny umy witxira wesemy heka rare. Iny umy tyhyna idi ratxireri heka kia wesemy kia ede-txi iny reseremy. Aòma kia inytyhyna ratxireri. Tiu heka ityhydỹỹna riòlòdỹỹòtyhy. Kia alòbòròna tahe tai heka rokuòtyhy.)

¹⁵ Kia ijō alòbòròna suu witxi-txi reserá tasỹ iwitxira inywesemy rare. Kia ijohonadu aòma rierymyhỹre. Irayky-ò ralòmnyhỹre. Kia iwotyhywo-ò òbitimy ratxirerí tahe, òbitilemy aò riwinnyhỹre. Iwese kia alòbòròna sòwemy raty rawahynyre wese tahe tii rare.

¹⁶ Ijō ijyy tahe kiamy roire. Uritere inyò loosònaò rideòmykre butxi rawo-txi ada herina rawoò-txi aòbo. Loosòna bidekre bedewiò-ò. Tai tahe ibutumy bede ritoosònanykre.

¹⁷ Aò heka tai wasimy ratxiòhymyhỹre. Aòutxumy dori ibutumy erynamy rarekre.

¹⁸ Tahe bexijebenykre ijohona-ò. Kia sòwemy idi rỹirerimy ihỹre heka sòwemy rimykre. Kia urihimyò iwo-ki rỹireri heka iribi ritakre. Idi ibutumy rỹireri heka iribi ritakre. Urihimyò iribi iny ritakre. Urihimyò iwo-ki rỹireri heka hulemy iribi ratakre.

¹⁹ Jesuisise, tariòreboho tamy doide. Tii ròbedeerydỹỹmyhỹki isirare tamy dehemyỹ iny sòwe òraru-ki.

²⁰ Tai inyò Jesuisi-ò rarybere: —Adihe wa aseriòre boho hewa ahanakile ratxireri umy robikemy ratxirenyreri. Adeeranybekemy.

²¹ Tai Jesuisi rarybere: —Waseriòre wa kia Deuxu rybe erydỹỹnaò rare. Kia tamy roholamynyrele heka rityhynnyhỹrele heka nadi wesele rare. Tii-wana iwese waseriòre wesele rare.

22 Iribi tahe hãworo rorukurenyreu Jesuisi rarybere: –Ròkòireny kanawe-ribi ijà-ò. Idi tahe roirenyre.

23 Jesuisi ròrõmy tòru-ki. Idi tahe yhynihikỹ òbònihikỹ-wana tamyreny reare. Ruberurenyre tiiboho rỹmyrenyke lau.

24 Tai tahe wylemy riixixanyreny: –Erydỹỹdu, Erydỹỹdu rekekoarenykre berahatxi-ò. Idi Jesuisi donomy deademy tahe yhy dee rarybere: –Biyryke, Biyrykewa. Yhy ruhumy resere. Òbò tule ruhumy ibutumy riyryre, iny rurukre.

25 –Kaiboho tiwexe ainatyhynareny? Tiiboho rabedeòtidỹỹmy ruberumy widee raryberenyre: –Aõhãbuwe kaa rare. Yhyhykỹ dori òbò dori irybemy reòbyreri.

26 Kanawe-ribi ijà-ò rehemynyrenyre Kerase bede-ò kalileia aho weribi-ò.

27 Hãbuõ heka tamyreny dobehede hãwãhãkỹ-ribi tamyreny dobehede. Tiiboho riòtyrõny hãwãro-ribi iu ta tyytybybina-di ratximyhỹre hãbu tiu rexi-tyynyõhyymyhỹre taty-di hyymyhỹre. Kiamy wabedekihyyle ratximyhỹre.

28 Jesuisimỹ robireu tahe bedetxile resere tairy-di ryryre: –Aõhebo biwasỹnykre Jesuisi. Kai Deuxutyhy Riòre atxiteri. Uritere aõhõkỹmy wasỹdỹỹõmykre.

29 Tahe Jesuisi heka tyytybybina iribi riòlòdỹỹnyre. Sõwemy dori riuwinyre hãbu rimymyta. Riuwinyre idi rihure. Tai heka tii uritiere womati reroti-di ritaataamy riijemyhỹre. Ihãre tahe ixi-ribi riòròmehỹre. Tai bedero-txi reamyhỹre tyytybybinamy rawonomy.

30 Idi tahe Jesuisi rỹỹraxire tamy: –Mobo anire? –Sõwemy wanire. Tyytybybina sõwemy dori tuu rexiykynyreki.

31 Tiiboho raryberenyre: –Uritere bedebinahakỹ-ò wateòdỹỹrenyõmykre. Uritere sỹu-ò noõma rarekremy hãlootxi-ò.

32 Iu tahe ixỹni juramy riroximyhỹ hãwãlò-ki. Tai tyytybybina mahãdu Jesuisi-ò rarybere: –Biwateònyõke. Kowa ixỹnijura-ò biwateònybenyke aralorenkyre. Tai Jesuisi riròtenyreny.

33 Iu kia hãbu-ribi tyytybybina ròhõnyrenyreu tahe ixỹniwo-ò ralòreki wahe. Raòlõnyra ijò-di rejuxunyre taraò wahe. Ibutumy ahoro-txi rejuxunyre. Ibutumy rururenyre berahatximy.

34 Ixỹni-di itxeredu mahãdu ibutumy raijiranyra hãwã-ò tule relyyrenyre tuu iny rasỹnymyhỹre mahãdu-ò.

35 Tai iny dirahude tamy itxeremy. Idi tahe rare Jesuisi-ò. Hãbu robimyhỹrenyre tatyky-di rononymhỹ ibutumy rexiywinymy Jesuisi-ribi iòhòmnyrony. Kia iny mahãdu heka sõwemy ruberure rabedeòtidỹỹnymyhỹre.

36 Ibutumy relyyre. Kia tyytybybina timybo aõhebo rotỹỹnyremy.

37 Kia Kadara bede ludu kia mahãdu tahe rexitðenyre Jesuisi-ò iribi ròhõnykremy, ilau ruberurenyreki wahe. Idi tahe Jesuisi ròkòsere ixybyle reare hãworo-ò.

38 Hãbu tahe rexitðenyre Jesuisi-wana rakremy, kia tyytybybina-di iwo-ki ratximyhỹre wahe. Tamy rarybere:

39 –Aõkõre bøkese aheto-ò. Ibutumy belyyke aõbo adee Deuxu riwinyremy. Tai ta ibutumy hãwã hãwã-ò relyyre aõhebo Jesuisi risỹnyremy.

40 Kia iny sõwehekỹ mahãdu heka teysa-di rimyre ridyremyhỹre riraòhyymy ratximyhỹreny.

41 Kia hãbu dohodỹỹdu hetowo erydỹỹdu tahe nade Jesuisi-ò. Tii heka dohodỹỹnana dinoduõ rare. Ijairu inire Jesuisi-ò sutxi resere: –Mynake wasỹ Jesuisi

⁴² Jiarỹ wa wariòre sohojile rare waòinatxi reuròmý iwýra. Tii ka rukremý roireri. Idi ta Jesuisi rare isỹ-ò. Sòwemy iny Jesuisi riheludunýre.

⁴³ Hāwyyõ raremyhỹ heka hāwyy webinadu rare iòhò Jesuisi rexisỹny waòinatxi beòramý heka idi ròhònyre hykyky hālubu ratxireri. Tiu heka inyõ reteytenyõhyymyhỹre luahidỹỹdu, òhotibedu mahādu he risiranyre.

⁴⁴ Tai tahe Jesuisi tykysi-ò reare. Tai ta aõwesele reytemy reare.

⁴⁵ Jesuisi rarybere: –Mowe watxi reare? Ijõ rarybereri: –Erydỹỹ mahādu aõkõre, jiarỹboho aõkõre. Pedro rarybere: –Aõheta sòwe iny kaki rỹreri. Tímykibo tuu tỹỹrayiteri.

⁴⁶ –Jiarỹ dori reeryre. Mobo watxi rearaule reytera.

⁴⁷ Tiihe hāwyy ratxiremyhỹ ramýtatamy. Tamy ramýtatamy heka tamy rehemýnyre. Iòràò rexibedenýre. Ibutumý iko tuu relyyre. Aõherekibo itxi reriramy.

⁴⁸ Tai tahe Jesuisi tamy rarybere: –Lerỹ, atyhydỹỹna myna teyteta. Ta bexiywinýmytahỹny maa!

⁴⁹ Kie raryberemyhỹwanale tasỹ iny witxiraõle dehemýnyde. Kia aõma dohodỹỹna wedu heto-ribi dehemýnyde. Ijairu-ò rarybere: –Ariòre wa rurura. Uritere ta òhotibedu-ò ijiraõma ixinamy tii rakre.

⁵⁰ Jesuisi kia-ò roholareu tahe Ijairu-ò rarybere: –Urile bityhybenýkre. Breburenyõma tii reytekre.

⁵¹ Tii rehemýnyre heto-ò. Jesuisi ralòre iny deramy reare. Tii wana rake lau. Kia uladuse, uladutyby, Pedro, Txiau, Joaõ wana kiale ralòre tamy tiiboho wana.

⁵² Ibutumý rasỹbinamyhỹ Jesuisi rarybere: –Ibryrenyõmyke hewa rurumý aõbo roire, urile ròròmý roireri.

⁵³ Ibutumý rieryrenýreri tiiboho urile tai idi risinyrenýre rurumý roimyhỹki.

⁵⁴ Jesuisi ihāre ta hirari debò-ki rimýre. Tai tahe idi rarybere: –Hirari, bexixamy, bodonyke.

⁵⁵ Ityytyby aõwesele ixityre tamy ralore. Dexixade, donýde. Rỹsỹna hirari-ò riwahinykemy Jesuisi rarybere.

⁵⁶ Tai tahe tybyboho sòwemy rabedeòtidỹỹrenýre rabedesarenýre. Jesuisi rarybereri: –Urile wamý ijyyrenýkõmykre. Aõbo adeerený rewinyramý.

9

¹ Jesuisi tahe tawaòinatxi reurò taerydỹỹna mahādu ributunýre. Taruru tamy riwahinyre tytybybina iny-ribi ritakremý. Tule iny webinadu mahādu riteytenýkremý.

² Tule rarybere tamyrený: –Kaiboho belyybenýkre Deuxu kia Iòlònamý tule webinadu biteytenýbenýkre.

³ Aõ awanarený wydyrenýõmykre debòna aõkõ, aõna hyna tule aõkõre. Tule rysỹnake aõkõ, nieruke aõkõ. Ainatxityyke aõkõkre.

⁴ Hāwā-ki hetoõ-txi malòkeki taile bonykre. Hāwāribihyyle bòhònykreu, kia heto-ribi bexitakre.

⁵ Ibinamý aramyrenýkreki, urile bixitakre. Idi òlòna-ki, awa bitòtynýkre ibinamý tai tahatenýtaki.

⁶ Tiiboho ròirenyre hāwā sòmo sòmo-di Rybewihikỹ Tỹmyramý relyyrenýkemy ròirenyre. Tule iny webinadu ibutumý iteyteynyrenýre hāwā hāwā-di.

⁷ Idi tahe iòlò Herodi ibutumý heka aõna aõna rierymý ratximyhỹ. Tai tii bede ryy rieryõhyymý ratximyhỹ aõbo riwinykre. Roholamyhỹre heka iny rybe rybe-ò. Joaõ heka rexixamy ratxireri.

⁸ Ijõ tahe kiamy rarybereri: —Eliasile ratxireri. Ijõ rarybere Deuxu rybemy rybeduõ ratxireri.

⁹ Tai tahe Herodi kiamy rarybereri: —Jiarỹ heka Joaõra resymy re-wahinyre. Mobo ratxireri iwese Joaõ raremy wese he ratxireri. Moobo ta kiamy raholamy watxireri. Tai Herodi tuu robikemy riwisỹnymyhỹ.

¹⁰ Jesuisi eryna iko relyymyhỹreny ibutumy aõbo aõhebo rotỹỹnyrenyremy tabededỹỹnana. Jesuisi riòlõnyrenyre ijõ hãwã wixira-ò, Besaida hãwã-ò wahe.

¹¹ Tai iny sõwemy hekỹ rieryõlemy idi ta rieryreu tahe sõwemy ihemy rare roirehe. Jesuisi he ributumy ikole relyyre. Deuxu Iòlõmy relyymyhỹre. Tai ròteytedỹỹmyhỹ webinadu mahãdu.

¹² Aõtxu tahe katxioromy Jesuisi eryna mahãdu, waòinatxi reurò mahãdu tamy raryberenyre: —Bede biywinyke ibutumy iny rỹireri hãwã-ò tarỹsỹna õbradỹỹmy. Inyboho dori bedero-ki ratxirenyreri.

¹³ Tahe Jesuisi rarybere: —Kaibohole rỹsỹna biwahinybenyke. Ri-rasỹnyrenykeny ierydu mahãdu diwyònydenyde: —Aõheretahaka, iruyre orotxu idi inatxi uturale heka roireri. Aroikemy aõbo wadireny atxiteri rỹsỹna õbradỹỹmy inysõwe-ò.

¹⁴ Txibo 5000 hãbu sõwemy heka rỹimyhỹ. Jesuisi rarybere: — Bihitxinybenyke 50 iny heka iny bisỹnybisỹnybenyke.

¹⁵ Tii myna ieryna mahãdu rotỹtỹnyrenyre.

¹⁶ Idi tahe Jesuisi utura inatxi, orotxu iruyre rimyre. Biu-txi reteheremy rexitõenyre. Deuxu reàlãre tamy rexitõenymy riyreyrenymy riwahiny taery-dỹỹna mahãdu-ò. Riwyrenyre tahe riwahiriwahinyrenymy idi roire.

¹⁷ Ibutumy riroxirenyre idi rihydyrenyre. Ihãre ta waòinatxi reurõmy hyna ixyby rỹximy rauhenyre. Idi ierydỹỹna mahãdu ixyby ributumy.

¹⁸ Jesuisi heka ixisohojile rare ixitõedỹỹmy. Ierydỹỹna mahãdu heka irarò-ki rỹimyhỹ riijemy rỹimyhỹ. Idi tahe tamy nade tỹỹraximy: —Mobohe jiarỹ raremy wamy raryberenyre?

¹⁹ Tai narybedenyde: —Ijõ Joaõ Sebedỹỹnamy adireri. Ijõ ta Eliasimy adireri. Ijõ ta juhoo Deuxu rybedu mahãduõmy adireri.

²⁰ Jesuisi tamy rarybere: —Adeereny tahe. Mobo jiarỹ watxireri. Idi Pedro rirawyònyre: —Kai Kristu tate, Deuxu deòdỹỹna wahe.

²¹ Tahe Jesuisi tamy rarybereri: —Uritere tuu iny-ò ijyykõkremy.

²² Jiarỹ Hãbutyhyhykỹ, Deuxu Riòremy, aõhõkỹmy arotỹỹnykre. Judeu wedu mahãdu, xiwena wahidỹỹdu wedu mahãdu, bede ywina erydỹỹdu mahãdu waderamy reakre. Jiarỹ arurukre. Inataõna txu-di arexixakre.

²³ Idi ibutu-ò rarybere: —Wahemy kanake mahãdu urile ixi dee rexi-ijõnykre. Txuõ txuõlemy taitxeò rimymy kidiwaheludunykre.

²⁴ Waòrary-ki rubudu heka biu-ò hedukre. Tukõkeki urile ixinany inaty-hymy rurukre.

²⁵ Aõmydỹỹnanamy iny ritakeki, tahe taumy riõnonykeki, kia heka aõmy aõkõkre.

²⁶ Inyõ raixỹrukeki warybe lau tule jiarỹ Hãbutyhyhykỹ, Deuxu Riòre wahe, tai ilau araixỹrukre. Deuxuko-ò ýjuko-ò iu adehemynysỹu Deuxu Iòlõna-ki wahe.

²⁷ Inatyhymy heka adeereny ararybekre. Ijõ kaki rare. Deuxu Iòlõnamy robikre tarubukõtyre

²⁸ Tahe debò inataõ txuu rỹidi, Pedro, Txiau, Joaõ-wana Jesuisi ridyre. Tiibohe sohojile bederatò-ò roire Deuxu-ò rexitõenykeny.

²⁹ Jesuisi rexitõenyre tii tamyreny rexiwixiranyre iu rexitõenyreu ity heka urile rabòòranyre. Iurahakỹmy relere.

30-31 Tahe tamyreny dexit̃nynyde Eliasi, Moisesi-wana tahe rarybemyh̃yre Jesuisi-wana. Jesuisi rubunamy Jerusalē hāwā-ki widee rarybemyh̃yrenyre, kia Deuxu bedeywid̃ỹnana myna.

32 Pedroboho rōrōrenyleri. Idi tahe rexixarenyre, tiiboho Jesuisi loosōnamy robirenyre. Eliasi, Moisesi-wana tiiboho tuu robirenyre.

33 Rōireriu, Pedro rarybere Jesuisi-ò: –Wawedu, awityhymy inyhe inyboho kaki ratxirenryeri tahe rikiwinyrenykre inataō hetomy, ijō adee, ijō Moisesi-ò, ijō Eliasi-ò. Pedro rieryōlemyh̃yre aōmybo rarybemyh̃y.

34 Tai rarybereu Nonoe dobehede iubòròna bede ritòbònyre. Pedro, Txiau, Joaō-wana ruberumy h̃yrenyremy.

35 Tahe ròhònymy reare rybeuni iuribi: –Kia heka Wariòre waluu rare. Kaiboho tamy bohlabenyke.

36 Tiiboho reteherenyre tahe inyōmy robiōlerenyre Jesusilemy ta robirenyre. Tahe rybeōmy r̃yirenyre. Iu inyō-ò aōmy raryberenyōre tuu.

37 Tai tahe ijō txu ratò-ribi dehemynde iny sōwehek̃my Jesuisi-ò ròirenyre.

38 Inyō rarybere: –Eryd̃ỹdu, wariòre adee redyleri. Beteheke wariòre sohoji-ò.

39 Tyytybybina rimymy h̃yre tahe riatyre bede-ò. Idi tahe urile txuu riyiyid̃ỹnymy h̃yre.

40 Aeryd̃ỹna-ò jiar̃y rarybera tyytybybina riteònykremy, tahe tiiboho riixāwid̃ỹnyōhyyrenyre.

41 Jesuisi tamyreny rarybere: –Tiwesebeded̃ỹnanabo wijinabòdu ityhyōlemy r̃yira. Tiwesebeded̃ỹnanabo akyreny-ki ariijekemy. Wadee uladu bididyke.

42 Tahe didydenyde Jesuisi-ò. Tahe tyytybybina urile riitx̃ỹteitx̃ỹtenymy resere. Idi tahe urile bede-ki rexiraòhòhòremy sutxi resere. Idi rarybexinymy. Rybexi irywomy ròhònymy h̃y. Jesuisi tahe tyytybybina iribi riòlòd̃ỹnyre uladu riteyteyre. Idi uladu tyby-ò riwahinyre.

43 Ibutumy iny Deuxu aōwid̃ỹna-di bede riòtiinyre.

Jesuisi taeryd̃ỹ mahādu-ò rarybere:

44 –Boholatyhyki warybe-ò, Deuxu Riòre Hābutyhyhyk̃y heka rawahid̃ỹkre hābu mahādubinaō-ò.

45 Tiiboho rierykòlere. Kiamy dori ilaureny riwore. Tahe ruberurenyre t̃ỹraxid̃ỹki.

46 Ryro-ki ieryd̃ỹna mahādu widee rarybemyh̃yre: –Mowexe wiratyre ityhykremy.

47 Jesusireny rexiraykynymy h̃yreny rieryre. Idi tahe uladuō rimymy rarybere. Jesuisi uladuō wana ronyrenyra.

48 Tahe taeryd̃ỹna-ò rarybere: –Moō uladu ka wese wadee riwiòhenanykeki, riwawiòhenanyre. Moō riwawiòhenanykeki, tule waha riwiòhenanyre. Mobo deòdumy reakre, tii ibutu ratyrekre.

49 Joaō tamy rarybere: –Eryd̃ỹdu, jiar̃yboho riòlòd̃ỹnyrerimy tuu rabirenrya inyō tyytybybina-di animy rehureriò. Tahe iny mahādureny aōkō rare. Tahe jiar̃yboho tamy reijōnyrenyre iny inyijoiorenyre aōkōki.

50 Tahe Jesuisi rarybere: –Bijōnybenyōkre. Inyō inymyrenydòdukōkeki, inyweribirenry-ki tii rare.

51 Tahe Jesuisi beded̃ỹnana iixihidu iòhòmy idi biu-ò rakreu, tii Jerusalē hāwā-ò rakremy rexiwinyra.

52 Tahe takomy inybutu bede riywinyre. Tai it̃hinamy rutòmy Samaria hāwā-ò.

⁵³ Tai tahe Jesuisi deramy rekoarenyre Jerusalē-ò ramyhỹreki.

⁵⁴ Txiau Joaõ-wana kia rieremy tahe narybedenyde: –Wanyrỹhỹkỹ, adee wikeki heòty biu-ribi ityrereny kedesekey aritxuhorenykre risõrenykremy.

⁵⁵ Tahe Jesuisi irybereny-ki ibinamy rahare tahe reburemy taò riòòsere iribireny.

⁵⁶ Idi ta iwitxira hãwã-ò roire.

⁵⁷ Tahe Jesuisi taerydỹna mahãdu-wana roirenyreu, hãbuõ tamy rarybere: –Ihyymy awana arakre titxibo makreu, ahẽkile arakre.

⁵⁸ Tahe Jesuisi tamy rarybere: –Ijòrò heka ihãloo dire. Nawii týtỹ dire. Tahe jiarỹ, Deuxu Riòre wahetoõre, Hãbutyhyhỹkỹ rare hãrele.

⁵⁹ Tahe ijõ hãbu-ò rarybere: –Biwaheludunyke. Tahe tii dirawyònyde: –Wanyrỹ, Waha heka rurura. Tai tahe juhoo arituunykre.

⁶⁰ Jesuisi rarybere: –Txioinihe, rubu mahãdu wii rituunyke. Kai tahe makre Deuxu Iòlònamy belyyke.

⁶¹ Ijõ rarybere: –Wanyrỹ, araheludunykre. Urile juhoo wasỹ mahãdu arawehityhynanykre.

⁶² Tai Jesuisi dirawyònyde: –Inyõ ritelenykeki, tahe ixbyby òòsemy rexi-nohõtynykeki, tii waheludu mahãduõmy rareõtyhy.

10

¹ Jesuisi 72 hãbu heka ritare inatxi inatximy tako-ò tihãwãhãwãtxibo rakreò bedẽ riywinyre. Kiamy tamyreny rarybere: –Waijyymy rybemy boibenyke.

² Kiamy heka tamyreny rarybere: –Waaõmysỹdỹna heka inihikỹ-di isir-are. Iwese maixõmo iny riòròmyhỹre wese heka waaõmysỹdỹna rare. Maixõmo oworu heka inihikỹre, idi aõmysỹdỹdu heka ibutere. Tai oworuwedu-ò aõmysỹdỹdumy bexitòenybenyke, Deuxu-ò wahe.

³ Kiaboho heka budoeni wesemy iyreny-ki boibeke. Kia-ribi nohõti losaõmykre.

⁴⁻⁵ Tai heka bexiijebenykre anierureny wydyõmy. Aõna aõna renyhynykeõ aõkõ awareny wydyõmy iny-ò ryberenyõmy iny iny-ò ryberenyõmy, rywety-atyamy abededỹna nodỹmy. Inyheto-ò malokreu Deuxu deysanamy biry-benybenyke.

⁶ Tii adee awirenykre wana heka teysakre kahetoludu. Tai tahe ixibyle adee Deuxu deysana ròòsekre adee awiõhyykeki wahe.

⁷⁻⁹ Aõma hãwã-ò malò-wana uritere deuròsò deòròsòõmy matximahãke. Tai themynomy atxiterikile bexiijemahã tetxilemy. Uritere rỹsỹna òta òtaõ aubeò ritidi wana uritere rybeòlòõmy. Birỹsỹmy rybeõlemy. Awiòhedỹmy ruruke wana bimymyhỹ aõbo adee riwahinymyhỹre. Iny raaõmysỹdỹmyhỹre heka ròtamyhỹre. Kia wese heka biwinymyhỹke. Birỹsỹmahãke aõbo adee riwahinymyhỹke. Binaõ roiwana biteytenymahãbenyke. Kia wesemy tamy marybeke: –Deuxu Iòlòna heka iòhòmy ihỹre.

¹⁰⁻¹¹ Hãwã-ò birònykeki, inyõ aradyrenyõkeki, boibenyke hãwãky-di. Myỹ marybebenyke tamyreny: –Aõbo wawa-ki hãwã-ki rỹreri. Wawa ar-itòtynykre bryby iribi ròhònykremy. Adeereny ariteòsinykre nohõti ijaranamy tamyreny. Nohõti losarenymy Deuxu Iòlòna adeereny iòhòmy dehemynyde. Tahe kaiboho teramy tekoatenyde.

¹² Aõma ywisidỹnatxu heka tiiboho aõhòkỹmy rotỹnyrenykre. Jesuisi rarybere: –Tiro hãwã Sidõ hãwã heka awimy aribireny ròhònykre.

¹³ Kobe làhàxe kai Korasĩ hãwã, tule Besaida hãwã. Òhotibe ayreny-ki rỹre, kia heka Txiru hãwã, Sidõ hãwã tule kire-wana taõ òta òtareny-ribi rexiatyrenyre. Tiiboho tykysausuhukỹtyre rexisỹnyre bryby-di rexierenyre.

14-15 Òhotibetxumy heka Deuxu raruxetòenykre Txiru hãwã mahãdu, Sidõ hãwã mahãdu! Kaiboho tahe aõkore. Deuxu araruxetòenyõkre. Kai Kafanaõ hãwã yludu mahãdu aõbo adeereny rotỹnykre. Biu-ò aõbo bõibenykre. Aõkõ heka heòtybina bede-txi heka boibenyke.

16 Tahe Jesuisi taerydỹna mahãdu-ò ixyby rarybere: –Inyõ aradyrenykre wana tasỹ-ò. Iwese riwadymyhỹre wesele, aradyrenykre. Moo adeereny roholamyhỹre iyubu wadee roholamyhỹre. Wana tahe waderalemy reamyhỹre. Waderamy reamyhỹre tahe tule Waha deramy reamyhỹre. Deuxu wateòdỹdu wahe.

17 Tanonanareny-ribi iribi tahe kia erydỹna mahãdu ibutumy dòosedenyde. Tiiboho heka teysa nihikỹmy dòidenyde. Tybybinanahakỹ heka irybe-ki ròhònyhỹre irybereny-ki. Riòlòdỹnymyhỹreny wana Jesuisini-di heka ròhònymyhỹre kiamy Jesuisiko-ò tuu relyrenyde.

18 Tii rarybere tamyreny: –Bexiijebenyke jiarỹ dori Satanasimy biu-ribi rabire, biudelaa wesemy reseremy tuu rabire.

19 Inatyhy rare waruruke nyderi rewahinyre. Tai hemylala tyre-ki mari-abenykeki. Tiu inyõ ruruòtyhy itytibòrò nihikỹ arawerenykeki, tiu buruòtyhy. Tule kai aòludu rururatyre arurureny-di boibekre.

20 Ihãrele tahe uritere deysarenykõmy atxibenyke ka ruru òraru-ki tyyty-bybina deòdỹna, ruru wahe. Kaiboho dori anireny raritinymy roimyhỹre biu-ki kia ta ateysanarenykre.

21 Iule tahe Jesuisi reysare heka Deuxu Tyytybytyhy iwomy reareu. Kiamy rexitòenyre: –Waha, kai wa biuwedu tate ibutu bede wedu tate. Umy reàlàmy watzireri tamy retòenyre. Wadeksamy watzireri ka aõma dỹna bederaremy nihikỹ iribi tewòmy atxiteriki wahe. Tamy hete iwese iny uladu wesemy rityhynymyhỹre heka. Tai tahe tamy ritỹnynymyhỹre. Kia adeewimy tuu rare.

22 Jiarỹ heka ibutumy Waha wadee riwahinyre. Inyõ rieryõhyymyhỹre Waha wahe. Waòrarukile tahe iny rierymyhỹre. Mobo Waha rare wahe. Waòrarukile dori rierymyhỹre. Ijõ aritỹnykemy watzireri. Tai tahe tiki tule riery iruru. Taile rierykre.

23 Rexitòenymy rahudi tahe wasimy iwòtemy heka rarybere taerydỹna mahãdu-ò: –Kaiboho heka sõwemy aõwiwihikỹmy tabimyhỹtenyde. Tai kaiboho beysabenyke.

24 Ihetxiu heka Deuxu rybedỹdu wana kia aõmysỹnanamy iòlò mahãdu wana. Kaireny aõmydỹnanamy robikemy risỹnyre, tahe aõkõhyre. Wijile heka tuu robireri aòrarureny-ki. Tule tabitenyteri kaiboho ratximyhỹ inatyhymy aõbo òbitimy Jesuisi ijyy-ò roholarenykemy tahe aõkõhyre.

25 Moisesi bede ywina rybe-di rãire Jesuisi lỹraxidỹmy. Iwese kai ixiluure wese, iny wixira luuke! Tii tahe Jesuisi rihixidỹmy rarybere: –Aõhebo arotỹnyke biu-ò arahenykemy.

26 Jesuisi dirawyònyde: –Timybo kỹnyhe Moisesi bede ywina tyyriti-ki roimyhỹre? Timybo tuu manarybekre.

27 Tii tahe diwyònyde timybo tyyriti-ki roimyhỹre myna:

–Deuxu adinodureny, ibutumy awo-ribi iluuke, ibutumy arayky-ribi aru-runar-ribi, ayky-ribi heka iluuke. Tule ibutumy iny ixiwesemy idi atximahãke.

28 Tai tahe Jesuisi tamy rarybere:

–Kai inatyhymy tarybeteri tai inatyhymy mahenykre biu-ò.

29 Kia hãbu heka rexiòbitinykemy idi ratxireri. Taita rarybere Jesuisi-ò: –Mobota waeryre?

³⁰ Tahe Jesuisi ikò relyyre ijyymy. —Judeu mahādu hābu heka ratyīnamyhỹ Jerusalē hāwā-ribi, Ijeriò hāwā-ò. Iribi tahe kia wasidu mahādu rimiryreny. Inieru ibutumy iribi ritareny. Ityy hỹre raòhòtere irubudỹỹle rasiranyre ririre. Tahe ruruòki rỹimyhỹ.

³¹ Aōma judeu xiwenawahidỹỹduò heka idi rare. Tahe hābumy robire. Idi hābu-ribi irehemy rexiemy reare. Tahe tỹtxi rerikòle rare raty resere.

³² Hābuò rehemynyrene tiie-ki dohodỹỹna wiòhedỹỹduò rare, Levita wahe. Tule ratyresemy ririre.

³³ Tahe ijò nade Samaria bede hāwā luduò heka rare. Judeu mahādu heka Samaria mahādu luukòre. Idi tahe kia judeu mahādu roimyhỹ. Tahe Samaria mahādu hābu sòwemy riruxetòenyre.

³⁴ Idi tahe tamy rexitỹmynymy tahe iwotòmona rituahinymy ritaataamy iwotòmona. Idi tahe ka hābu relyymy idi rare. Aōma ijumenta tyre-ò ritidimy. Idi rare rirarehu tahe heto-ò ritidikremy ririkremy ridymy heka idi rare. Rummy heka ritòenyre hykyky idi bede nade awimy risỹnykemy.

³⁵⁻³⁷ Rudile heka heto òwy-di iwedu-ò heka nieru riwahinyre riòwynyrene inatxi womati nieru. Tamy rarybere: —Biwiòhenanyre idi mabekre adòòsekre riròkre. Moma arỹnaderenykre Arỹnadebenykre heka adiòwynykre adòòsekreu wahe. Ka hābuhe rarybere: —Hābu bireludu ratxireri. Kia taruxetòenyreni tiòsinyre waha tieka idi hābubireludu ratxireri. Wimyy raòludumyhỹre hārele taheka riwiòhenanyre. Jesuisi tamy rarybereri. —Iwesele biwinykre iweseke hābu riwinyra weselemy biwinykre. Kai aòhebo botỹỹtyhy mahake. Iwesele wahe. Jesuisi rỹỹraxire: —Mobo hābu aòtxino biòwa rare? Mobo ibireludu wahe? Bede ywina erydu tai rirawyònyre: —Iwiòhedỹỹdu wahe.

³⁸ Jesuisi, ijò mahādu-wana ròirenyre. Hāwā-ò rirònyrenyrene. Hāwyyò rare Marta inire. Tahe ridyre tasỹ-ò tai ratxirenykemy.

³⁹ Tahe Marta heka iseriòre dire. Marie inire. Marie urile ibire-txi ronyra aòbo tarybeke roholakelemy.

⁴⁰ Marta heka raelelemy ratxireri. Aōna aònale rotỹỹnymyhỹle riwinymy taile rare ratximyhỹ. Tai tahe nade Jesuisi-ò rarybere: —Jikarỹ sohojile wa watxireri waseritxòre riwawikòhenanykòhykyreri. Kai anobohe kòbitimy tai tahateri. Tamy marybeke riwawikòhenykeny.

⁴¹ Tai tahe Jesuisi he tamy rarybereri: —Marta, Marta, aòherekibo kai taelelemy teamy atxiteri?

⁴² Sohoji aòmydỹỹnale heka awire. Marie awityhy aòmydỹỹnana ixidee rimyre. Kia moo iribi ritaòtyhy. Riwinymyhỹ awityhyreki wahe. Tamy rarybeòtyhyò wadee roholarereri iribi ariòlòdỹỹnyke wahe.

11

¹ Tiutxubo Jesuisi rexitòenyrenyrehỹre, iny rieryòlemyhỹre. Jesuisi rexihudi, ijoi rarybera: —Biwaerynanybenykre iwese texitòenyteri wese, Joaò tahe tajoi rierynanyre.

² Tai rierynanyre. Kai bexitòenykeki, kawese marybekre: —Waha, ani ibutumy tamywimy. Wylemy mynake iny òlòdỹỹmy.

³ Rỹsỹna txuò txuòlemy biwahinybenykre.

⁴ Inyòraruna biixāwidinykre, iny iwitxira-dori taòraruna ariixāwidinykre. Waatysyrenyòmy òraruna-txi.

⁵ Jesuisi heka taerydỹỹna mahādu rierynanyre ijyy-di: —Kai arỹsỹnaòmy bonykeki, abiòwa-ò make ruetya rexitòedỹỹmy rỹsỹnaò huòtemy bidiwykemy: —Wy, ahina inataò wadee bidihuòteke.

⁶ Wabiòwa rehemynyreri bedetỹi-ribi. Aò heka wawahisidỹỹkònare.

⁷ Tii òsana myĩ adee rarybekre: –Wadee ixitòedỹỹõmyke ruetyahakỹmy. Arỹiõtyhy waherina-ribi rexiyrubunomy heka rãireri. Ibutumy iny heka rõrõmy rỹireri. Uladu, tule iumy rõrõmy rỹireri. Wadee ixitòedỹỹõmyke.

⁸ Rexitòenyhyhyhy tai hyhyhy rỹikeki tai ihãrele rỹike. Abiòwatòenamy aõkõ kỹnyhe rỹike. Texitòenyterikile rỹike.

⁹ Tai heka adeeremy rarybereri. Bexitòenykeki, biwyke. Biijeke aõbo teijeteri, tai tahe mahake. Ijòtòbòna bihetenyke tahe adee riraynomy tahe malòke. Tai tahe adeeremy rarybera. Ibutumy rexitòenymahãke, tamy riwahinymahãke. Ibutumy iny riijemahãke, tai rahake. Iny rihetenymahãke riraynyke.

¹⁰ Tai adeeremy rarybere: –Ixitòedỹỹki iny aõ rimymyhỹre. Aõitxe-ki aõtxi ijara rỹimyhỹ. Ijò-di ròtemy ijara-ki iny ralòmymhỹre. Ijò-di ròtemy ijara-ki, iny ralòmymhỹre.

¹¹ Uladuõ tyby-ò uturamy rexitòenykeki aõbo, hemylalaõ tyby tamy riwahinyke irỹsỹnamy? Timyki tuukõna! Kaiboho kiamy aõbo botỹỹnybenyke? Timyki tuukõna!

¹² Uladuõ tyby-ò hãniesimy rexitòenykeki aõbo, itytibòrò tamy riõkre. Timyki tuukõna!

¹³ Kaiboho aõbina binahakỹdile tahõtinyinmahãtenyté, aõwihikỹ aõbohe ariòreremy-ò biwahinyke. Boreny aratyre heka bede rieryke, Deuxu wahe. Tamy bexitòenybenykeki, tii Deuxu Tyytybytyhy adeeremy riwahinyke.

¹⁴ Ixityre tasỹ hãbuõ raremyhỹ irybeõmy. Jesuisi taile ratximyhỹ tahe tyytybybina riòlòdỹỹnyre iribi. Iu tyytybybina iribi rohonyreu tahe, hãbu rarybere kia rybeõmy ratximyhỹré wahe. Tahe iny sõwehekỹ mahãdu sõwemy idi rabedeòtiimy rỹire.

¹⁵ Inyõ tahe, insõwehekỹ yluduõ tahe kiamy rarybere: –Kia diabo ruru-di, Belisibu ruru-di heka iribi riòlòdỹỹnyre. Tii tyytybybina mahãdu wedu rare.

¹⁶ Ijõ tamy rarybere: –Jesuisi, araeryrenyke inihe aõ biditeòsinykre wadeeremy. Inatyhy aruru biuludu ratximyhỹre. Widỹỹnaõ inihe wadeeremy bitỹnykye kialemy heka rarybemyhỹre urile riurihimy tamy aõ itxerenamy riwinykelemy.

¹⁷ Jesuisi tahe rierymyhỹ aõmybo raraykynymyhỹreny. Tai heka tamy tuu rarybere: –Kia iny mahãdu wiribi hitximy raraykywydykyeki, tii tahe rexihuke itueke, sỹ mahãdu tule wahe.

¹⁸ Timybo Satanasiboho bede widee ribinanymyhỹrenykeki, awityhymy roirekre. Jiarỹ araeryrenykeri timybo taraykynytenyteri. Aõma Satanasiruru-di tyytybybina ariòlòdỹỹnykemy tarybetenyteri heka reeryeri.

¹⁹ Kia riki ariwinykeki, kaiboho tule wawesele tewinytenyter. Timybo? Mobo awiòhedỹỹdureny rare? Satanasiruru-di aõbo? Kaiboho boibenyke ixitòedỹỹmy awiòhedỹỹdureny-ò.

²⁰ Jiarỹ Deuxu ruru-di ariòlòdỹỹnykeki, kaiboho bexiijebenyke, Deuxu Iòlòna tahe adeeremy iòhòra.

²¹ Hãbu deburehekỹ tadebòna-di taheto riyrubunykeki, rexytyhynomy ronyke. Iaõmydỹỹna ibutumy iyrubudỹỹnamy rỹike.

²² Tahe ijõ kedehemynyke iratyre teburetyhy, tahe iaõmydỹỹna ibutumy iribi riwyke.

²³ Iny wawana aõkõ ratxirerimy ihỹre, tii heka waribi hitximy ratixmyhỹre. Iny wawana aõkõ ratxireri, tii tahe aõtxile ramyhỹre ixideòna.

²⁴ Jesuisi ijõ ijyy relyyre: –Iny-ribi tyytybybina ròhònymyhỹreu, tii heka rake ixitawo-di rake titxibo. Rubumy rarunomy rake. Bedeõ-ki rahakeki tahe, rõhõtinyke. Aròòsekre, tikibo rarawãhãðle.

25 Ixyby kòdòòsekeu tahe, isy ibutumy, tytymy roi ke iruxeraõ.

26 Idi ixityre ijõ rimyke debò inatxi reurò tyytybybinaõ. Idi tahe tamy rasỹnyrenyke. Iratyre tyhy wahe ibina. Iu kia ixisohojimy tyytybybina-di aõmysỹdỹỹmy raremyhỹu tahe, ihewo-ribi rimyra tahe iroona-ribi tahe aõnityhymy releke. Ibinatyhymy tamy rare.

27 Iribi tahe hãwyyõ rryre ibutu ijohonamy: –Hãwky heka aratxurananyre, aratibienyre heka iny bedekòby rare.

28 Tahe Jesuisi rarybere: –Deuxu Rybe tyhydỹỹdumy iratyre wadee awire. Deuxu deysanamy tamy kanakemy idi watzireri.

29 Idi tahe inysõwetyhymy dehemynyde Jesuisi-ò. Jesuisi kiamy rarybere: –Iny heka kia mahãdu ibinatyhymy rỹire aõwihikỹle heka riijemy rỹire. Itxerenaõmy robikre ratxireri tahe itxerena Jonasi-ribi nadelemy tahe robikre.

30 Jonasi heka Ninive hãwã mahãdu-ò itxerenaõ heka tii rare. Tule jiarỹ heka Deuxu Riõre Hãbutyhyhykỹ rare wijinabòdu mahãdu dee itxerenaõ jiarỹ rare.

31 Ibòò mahãdu bede konana-ribi iòlò hãwyy Salomaõ bede eryhykỹ-ò ijõhonamy irehe-ribi nade. Wijinabòdu mahãdu taheka naõhyymahãde wadee ijohonamy. Salomaõ ratyre heka jiarỹ watzireri. Ikonana txu tahe ibòò iòlòhãwyy rỹikre rarybekremy. Tii rarybekre: –Anoherekibo Jesuisi deramy teakamahãtenyete wahe. Timykibohe irybe bedekeryna-kò ijohokuna rỹikõmyhỹreki wahe.

32 Ninive hãwã mahãdu tule rỹikre rarybekremy iwesele. Jonasi rybe tỹnydỹỹna-ki rexirãhĩrenyete. Kaki heka Jonasi ratyre hãbuõ ratximyhỹre, jiarỹ wahe. Wadee ijohonadu aõkõ heka toite.

33 Moheka loosõnaõ rideõhyymyhỹre herinarawo-txi toosò iwasihiikỹmy roosõmyhỹkemy. Tiiemy heka biuõhyy rademyhỹre ibutumy bede ratỹnymyhỹkemy.

34 Arue umy dori itỹnymy roimyhỹre. Arue awikeki heka ibutumy aumy awikre. Arue ibinakeki tasỹ aumy heka bedelorokile rỹimyhỹkre.

35 Awo toosõmy ratximyhỹre wana, bexiijemahãke. Aumy biemahãke bedeloro-ki rurunyheny.

36 Bedelorohokỹ aumy-ki rỹiõmyhỹre wana, tai tahe boosokre ibutumy titxibo bede-txi mamahãkre wana.

37 Jesuisi kiamy rarybereu tahe, fariseu mahãduõ tamy rarybere: –Manake wasỹ-ki rikiroxikremy. Tai tahe Jesuisi rare, ralore, ronyre roximy.

38-39 Jesuisi ronyreu, tebò risuhõõre. Tai tahe idi bede riõtiinyre. Jesuisi rarybere: –Kaiboho fariseu mahãdu, ibutumy heka texisuhõsuhõmahãtenyete. Ebò tesuhõmahãte, aumy ibutumy tesuhõmahãtenyete. Webòròsityyludu wahe. Kaiboho heka isuhukỹlemy toimyhỹte ibutu aõikõkõ-di isumy roimyhỹre aworeny-ki.

40 Iu heka òbitimy taraykynytenyõhyymahãtenyete. Deuxu heka iwebro ludu riwinyre, inatyhy? Tule aworeny, araykyreny wana riwinyre.

41 Iny aõkõ mahãdu-ò maruxetõemyhỹbenyke. Tai tahe byranybenyke heka. Ibutumy awo-ki, ahana-ribi tule ryranykre.

42 Kobe làhàxe kaiboho fariseu mahãdu. Kaiboho Deuxu dee tewahinymahãtenyete uriõno. Debòwiò aõ tetatenywana heka, sohoji tewahinymahãtenyete. Tule aõmydỹỹnareny aoworoludurenyõ tewyteny wana, tule tewahinymahãtenyete. Kia awire, biwahinymahãbenyke. Urile tahe teerytenyõhyymahãtenyete Deuxu luuna, Deuxu òbitina. Biwahinymahãbenyke heka Deuxu dee aõmydỹỹnaõ. Tii tahe awire. Tule nohõti losarenyõmyke, luuna, òbitina.

⁴³ Kobe làhàxe kaiboho fariseu mahādu. Dohodỹỹna heto luureny ikòhòkỹle heka torokomahātenyete. Kaiboho arybedỹỹnareny-ki awimy tahamyhỹtenyete.

⁴⁴ Kaiboho kobe làhàxe. Wobrona wesemy toite. Iwese iny rubuhāloo tyremy iny rariamyhỹre wese ierykōnamy, kiawesele toite.

⁴⁵ Bede ywina bede erydỹỹduō heka tai ratximyhỹ. Tii tahe Jesuisi-ò rarybere: –Erydỹỹdu, kai heka aōbinahakỹlemy wamyreny tarybeteri, kia wese rybe-ki.

⁴⁶ Inatyhy rare. My tahe Jesuisi risỹnyre: –Inatyhy dori tule birony-benyke aōhòkỹmydỹỹnana. Iny dori adeeremy rarybemyhỹre iny rybe bity-hynymyhỹbenykemy tahe ihārele tetyhynyōhyymahātenyete. Bede ywina ritidỹỹna tewinymahātenyete, ihārele tahe tiu heka tetyhynyōhyymahātenyete.

⁴⁷ Kobe làhàxe kaiboho, alahireny, alabiereny wese toite. Iwese tiiboho Deuxu rybedu rirubunyre wese kaiboho toite.

⁴⁸ Kaiboho rubudỹỹdumy toite. Òbitile tewinymahātenyetelemy ixidee tahōtinymahātenyete.

⁴⁹ Deuxu tahe rarybere umyrenymy wahe: –Tahe jiarỹ aditeònykre heka Deuxu rybedỹỹduō tule Deuxu deòdỹỹnaō heka aditeònykre. Imahāduō birubunybenykre ihona tahe biteònybenykre.

⁵⁰ Kaiboho heka bede òrarumy boibekre kia rubudỹỹ òraru erydumy wahe.

⁵¹ Abeli hālubu txiwina tahe xiwena hure rubuna. Idi tule Zacaria hālubu txiwina wahidỹỹna bire-ki heka Deuxu hetobire-ki. Kohe, ihure rubureny òraru-ki aōhòkỹhỹkỹmy biòwynybenykre.

⁵² Kobe làhàxe, kaiboho bede ywina erydỹỹdu mahādu, bedeeryna ijò rayna dinoduboho wahe. Kaiboho tahe terònyōmy bede eryny heto-ò. Tule inywitxiraō tetòenytenyete iròte lau.

⁵³ Jesuisi ròhònyreu, teburemy tiiboho ritỹỹraxinymyhỹre aōna aōnamy.

⁵⁴ Tuu ròtỹỹraxidỹỹmyhỹre timykibo rirutaōnyrenykemy.

12

¹ Sōwemy iny tahe ributunyre. Ube tahe rỹximy ratxireri. Tahe juhūu Jesuisi taerydỹỹdu mahādu-ò rarybere: –Fariseu mahādu, saduceu mahādu urina biebenyke. Tiiboho dori ruidu mahādu roire.

² Wasimy wiji adeeremy relyyre. Tiu ta ibutumy iyyynamy rỹikre

³ Aōbo wasimy wiji taholate heka ibutumy biurasòmy ratỹnykre.

⁴ Uritere iny lau brebuōmyke. Aumyle tii rirubunykre. Ijò ibinamy adee aōkō tii rotỹỹnykre.

⁵ Iny lau sohojile breburenyōmykre. Deuxu lau ta buberukre. Tii dori atyytyby bede bina-ò rahuke ixideewikeki.

⁶ Nawiiō kaiboho bidymyhỹbenyke iòwy riòre iny heka riwymyhỹrekre. Ibutumy heka Deuxu nawii rieryre sohoji sohojimy.

⁷ Deuxu ara erymy heka aōma arati-ki tiwesebo aradeti rỹimyhỹre rierymyhỹre. Brebuōmyke, aōma Deuxu heka anaerymyhỹre nawii sōmo ratyre heka rierymyhỹ.

⁸ Kai marybeke: –Jiarỹ Deuxu retyhynyre dori tahe umy arelyyke Deuxu ýjukomy rarybeke biu-ki wahe, jiarỹ Deuxu Riòre Hābutyhyhykỹ wahe.

⁹ Iny sōwehekỹy-ki riwatxiònykeki tule aritxiònykre jiarỹ Deuxu ýjuko-ò.

¹⁰ Inyō Deuxu Riòremy aōbina binamy rarybekeki, irybe-ribi nohòtilosa rỹikre. Deuxu Tyytybytyhymy tahe inyō ibinabinamy rarybekreki tahe, aōhòkỹmy rotỹỹnykre irybe òraru-ki.

11 Aramykeu heka uritere nohōtiōmyke aōmobo marybekremy ywisidỹna-ki. Bede heka ariwahinykre rybedỹnanau. Rybeōmyke ikotyre.

12 Kai ixiwanaale aōkōre marybeke. Deuxu Tyytybytyhy arāwiōhenanymyhỹreny.

13 Hābuō inysōwey-ki tahe Jesuisi-ò rarybere: –Wanyrỹ, Waha rurura. Waseriòre tahe ibutumy waha aōna aōna riwyraxixidee sohojile. Tamy marybeke wadee ritxuranykemy.

14 Jesuisi tamy rarybere: –Hābu, kia waaōmydỹna aōkō rare. Timybo ayreny-ki araywisidỹnyke?

15 Tahe Jesuisi ibutumy iny-ò rarybere: –Warybe-ò bodoholabedenyke. Ixityhyōmy! Arutyhy heka aaōna aōna-ki aōkō rare aōna aōna sōwerekare.

16 Tahe Jesuisi ijyymy ròkewesenadỹre: –Hābutyhy riki ioworu nihikỹre. Tahe sōwemy rỹsỹna ributunyre.

17-18 Iheto tahe iyjare ibutumy ributunykemy. Tahe ixidee rarybere: –Aōhebo arotỹnykre? Waaōnaheto butumy aritxiwikre. Ijō iribi inihikỹmy ariwinykre. Tai ibutumy waaōwiwi. tamy aridekre.

19 Tai tahe ibutumy waōwiwi-di areysakre. Arexielehinykre, ariroxikre, ariōkre. Waruhyy areysakre.

20 Deuxu tahe kia hābu-ò rarybekre: –Hābu itxỹtere. Kai wijirulemy burukre. Tai tahe mobo aōna rimykre.

21 Jesuisi taijyy rihure rexirybenymy. Kia heka aōhebo rotỹnyre iny ityhy mahādu. Tiiboho dori Deuxuòle ityhymy aōkō ihỹrenyre.

22 Kia heka Jesuisi taerydỹna mahādu-ò rarybereri. Uritere nohōtiōlemy arỹsỹna tule atyymy, idi matykynykemy.

23 Aumy heka rỹsỹna ratyre aōnityhy ratximyhỹre. Aumy heka atyky ratyre aōnityhy ratximyhỹre.

24 Nawii-di betehemy. Tiiboho heka ioworuōrenyre. Tarỹsỹna riyrubunyōhyymyhỹrenyre. Deuxu heka nawii riyrubunymyhỹre, irỹsỹna tamy riwahinymyhỹre. Kaiboho tahe nawii ratyretyhy toite Deuxu dee.

25 Sōwetyhymy maraykywydynanykeki aōbo arumy arirarehemy mariake? Aōkōre!

26 Kia aō iyjare tahe Deuxu-ò. Kia biwinybenyōkeki, aōherekibo ijō aōna aōna nihikỹ-di tahōtinymyhỹte?

27 Betehemy inihe noijasa-di. Aōma tiiboho raaōmysỹdỹōhyymyhỹrenyre. Ihāre tahe iruxerarenyre ityy wiwihikỹrenyre wese. Tyy ixidee riwinyōtyhy Deuxu rityyny wihikỹ heka tyy wihikỹ tamy riwahinyreri. Salomaō heka ityynihikỹ rare. Ihāre tahe ityy heka awityhymy aōkō noiròsò wese.

28 Deuxu heka noijasa rityynymyhỹre kia wijilemy idi ihỹre. Biurasòmy tahe ixāwimy reamyhỹre. Tii heka tyy adee kidiwahinykre. Tai tii atyrenyre. Tai ta ixinohōtiyredỹrenyōmy. Aōherekibo ainatyhyna ibutere?

29 Tahe raykyōmy nohōtiōmy titxiribibo arỹsỹna adee kanakredi.

30 Tyhydỹdukōdu mahādu heka tuure. Inytybyrenyre heka rierymyhỹre aōmybo tarumahāte. Ibutumy heka arerymyhỹre aōmybo teamyhỹte.

31 Tii Deuxu aōmy dỹnana sohojidile maraykynykeki heka tii ibutumy adee riwahinykre.

32 Brebuōmy ahābenyke wariòreboho. Deuxu Iòlòna adee kanakemy, Deuxudeewina wahe.

33 Aaōna aōna-di bohonybenyke. Iòwy tahe iaōkōdu mahādu-ò biwahinyke. Anieruhyna wiwihikỹdile boibeke. Kaki ibutudỹlemy heka biu-ò bibutunykemy. Tai heka judòera aō riròōtyhy tule rararyōtyhy. Tule tai wasidu ralòōtyhy.

34 Tikibo aōwireny rỹikeki, tai heka araykyrenyre ratximyhỹre.

³⁵ Ijõ tahe Jesuisi rarybere: —Kaiboho bexiywinybenyke, ibutumy aõhebo rotÿÿnykremy bexiywinyke. Awereysanareny-di atyky beximyke. Aloosõna bitoonyke.

³⁶ Deòdu mahãdu wesemy boibenyke. Bexiywinybenyke awedu dehemynyna-ò, tii worana bedehesi-ribe rehemynyremy wahe. Iu rehemynyreu, teòdu mahãdu heka ijõ riraynyke.

³⁷ Tiiboho riraòrenykeki, deysamy rÿikre. Iwedu dori reximykre ityky wereysana-di tahe rÿsÿna teòdu mahãdu-ò riwahinykre.

³⁸ Tii ruwetyakile rehemynykeki, deòdu mahãdu reysakre. Tiiboho dori rexiraòmy rÿimyhÿrenyre.

³⁹ Tai heka iny rexiywiny my rÿimyhÿkemy rybe roimyhÿre awedureny kanakreki. Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy.

⁴⁰ Kaiboho tule bexiywinybenyke wadehemynyna txu heka biijemy bonymyhÿbenyke.

⁴¹ Tahe Pedro rarybere: —Wanyrÿ, kai wadeerenyle ijyymy telyyte ada ibutumy iny-ò aõbo telyyte?

⁴²⁻⁴⁴ Tahe Jesuisi riwyònyre: —Aõtxile inyõdee, tibo deòdu taaõmysÿdÿÿna riywinymyhÿre, kia idinodu tai awimy rahamyhÿre tii dori rÿsÿna òbitimy riõriõmyhÿre. Idi tamy aõwiwi riwahinykre taaõna aõna-di itxeredumy tule risÿnykre.

⁴⁵ Tii iwitxiramy rexiraykynykeki tahe, ijõ teòdumy raòhòtemy urile idi risinymy kamy rexirybenymy: —Wawedu dori wiji aõkõ rarerikre.

⁴⁶ Tai ierykõna-di iwedu kedehemynykre. Tuu rierymy iaõmysÿdÿÿna-ribe ritamy aõhõkÿmy risÿnykre ityhydÿÿdukõdu mahãdu wese.

⁴⁷ Deòdu tawedudeewi rierymyhÿre. Tai heka tuu rotÿÿnyõkeki, tii tahe sõwemy aõhõkÿmy rotÿÿnykre, òhòtemy wahe, tamy riywinyõreki.

⁴⁸ Ijõ deòdu tahe tii iwedudeewimy rieryõkeki, tii tahe aõbinamy riwinykeki, tamy tahe urihimyò òhòte tai rÿikre. Inyõ sõwemy ityhykeki, sõwemy ijõ iny tamy rexitòenykre.

⁴⁹ Jesuisi ijõ rarybere: —Heòty-di bede ariworonykemy heka jiarÿ anade. Tii òte raworonykremy idi watxireri.

⁵⁰ Jiarÿ ratisebenaõwesemy aralokre. Arurukre dori. Ele elemy rÿikemy ixi-di watxireri.

⁵¹ Kaiboho tahõtinyte wadehemynyna-di. Ywina adiwydemy wadi tahõtinyte. Aõkõrehe, bede jei jeidÿÿmy anade iribi widee rahitxihitximy rÿikremy.

⁵² Iruyre inysÿ mahãdu heka widee rahitxihitximy rÿikre. Inataõ iny iuhe òludumy rÿikre.

⁵³ Hãbu mahãdu heka tyby òludumy rarekre. Hãwyy tule tadi òludumy rarekre. Iriokorese heka tariòrelahi òludumy rarekre.

⁵⁴ Ijõmy Jesuisi rarybere: —Iu biuwetyky biura-ribe ròhònyreu, Kaiboho kia rybemy tarybemahãtenynte biu kòdòakre. Inatyhymy biu ròamyhÿre.

⁵⁵ Tule tarybemahãte. Yhy ibòò-ribe rebonyreu, bede ratòteekre. Inatyhymy tuu ratòteemyhÿre.

⁵⁶ Itxenadÿÿdu mahãdu! Kaiboho kia terymahãtenynte bede, biu aõmydÿÿna tule iwitxira aõmydÿÿnana teerytenykõlemahãtenynte, bededÿÿnana konana eryna wahe.

⁵⁷ Ijõ Jesuisi rarybere: —Kaibohole teywinyõmyhÿtenynte, aõòbitinamy wahe.

⁵⁸ Aõðrarumy heka aòludu umy rarybekeki, idi ywisidỹỹna ube-ò aradykemy ratxireri, tii-wana widee marybeke idi widi bede biòbitinykemy. Aõkõkeki, tii aradykre ywisidỹỹdu-ò idi ròtenawo-ò soldado mahãdu araròtenykre.

⁵⁹ Tiu heka aòlòkõmy heka mabekre. Ibutumy iòwy biòwinyke xiery bõhònyke.

13

¹ Tahe inyõ Jesuisi-ò relyyre: –Pilato rybemynamy Kalileia mahãdu ruru-ruenyre Deuxu-ò raxiwerenyreerìò.

² Kia ta Jesuisi narybede: –Kaiboho timybo irubureny-di texi-nohòtinytenyteri. Ijõ wiratyre raðrarunanyrenyreki aõbo?

³ Ture aõkõ, kaiboho be-xirãhĩõbenykeki tule burubenykre irubureny wese.

⁴ Iasỹse ijõ. Iu Silòe hãwã mahãdu tyre heka heto rarie resereu 18 iny sõwe rirubunyunyrene. Arãỹỹraxikre Jerusalẽ hãwã mahãdu ratyre raðrarunanyrenyreki aõbo? Aõbo tahòtinytenyteri?

⁵ Kaiboho be-xirãhĩõbenykeki tule burubenykre irubureny wese.

⁶ Tahe Jesuisi kaa ijyy-wana rikewesenanyre, Figoratyò wese heka. Tahe Jesuisi kaa ijyy my delyyde: –Hãbu oworu-ki figoòõ rỹimyhỹre. Tii iraty dilawijunyde tiubo. Tahe iraty-txi reakõre.

⁷ Tahe hãbu taoworu-di itxeredu-ò narybede: –Inataõ wyramy relawijunyre tahe aõkõhyra. Urile ta biòròkre. Iraty ihoõreki, awi aõkõ rare.

⁸ Tahe oworu-di itxeredu dirawyònyde: –Wawedu, txioini kawyramy idi warukikre, isu ariywinykre.

⁹ Aõkõhykreki tahe urile raorokre ijõ wyrau.

¹⁰ Judeu mahãdu elehyrna txuu Jesuisi rotohodỹỹmyhỹ judeu mahãdu dohodỹỹna heto-ki.

¹¹ Tai ta hãwyyõ ratximyhỹ. Tii 18 beòra webinadumy ratximyhỹ tyytybybina òraru-ki. Tii iumy rarabunymy rariamyhỹre. Ixitaradỹỹ risiranymyhỹre.

¹² Jesuisi tuu robireu, tamy narybede: –Hãwyy, kai heka teytemy tate.

¹³ Tahe Jesuisi tebòm y rimyre iuleta reytere. Tai tahe hãwyy heka Deuxu riwowydynyre.

¹⁴ Dohodỹỹna heto wedu tahe ibinamy Jesuisi-ki rahare, judeu mahãdu elehynatxureki wahe. Takamy inyreny-ò narybede: –Debò sohoji reurò txumy aõmysỹdỹỹnamy rỹimyhỹre iu heka adeytemy ixi-di bòdòimyhỹke, judeu mahãdu elehynatxu ta aõkõre.

¹⁵ Tahe Jesuisi dirawyònyde: –Kai, itxenadỹỹdu tate uriteremy iximy rybedu. Kaiboho judeu mahãdu elehynatxu dorì abroreni, aawaru heto-ò toimahãte tuu teesenymahãtenynte, tedymahãtemy idi ibemomodỹỹmy bidy-benykremy.

¹⁶ Kaa heka Abraõ riore riòreõ heka Satanasi 18 beòramy rimyre. Aõherekibo ta iribi retaraki sabadotxu ibinamy tahateri.

¹⁷ Tahe Jesuisi òludu mahãdu raixỹrurennyre Jesuisi rybe òraru-ki. Tahe ixỹ mahãdu awityhymy tai rahamyhỹ iòraru-ki. Ibutumy reysarennyre.

¹⁸⁻¹⁹ Tii rarybera: –Deuxu Iòlòna wexe aõwesere. Aõ-ò wexe rikiwesenananyrennykre. Tiwexe ijyy kawesere? Deuxu Iòlòna heka alòbòròna sõmo sõmo wesemy ratximyhỹre. Raumynyre heka òwòru rariwesese relemyhỹre. Nawiile tuu rỹtỹnymyhỹre kia òwòru-ò.

²⁰ Ixityre tamy rarybere: –Aõ ijyy wese heka Deuxu Iòlòna rare. Aõwexe rikiwesenananyrennykre.

21 Paõ ixiòlòdỹna wese rare, iuri rare. Hãwyy paõ riwinymyhỹreu, inataõ urihixina-ki iuribemy riurinymyhỹre. Tai tahe raubỹtỹmyhỹre, rexiòlònymyhỹre.

22 Jesuisi tahe Jerusalẽ hãwã-ò rareu, hãwã hãwãmy rotohodỹmy.

23 Iu inyõ ritỹyraxinyre: –Wanyrỹ, Hedu mahãdu we sõwekre aõbo?

24 Jesuisi tamyreny narybede: –Bexityhynybenyke ijòyja-di birònybenykemy. Sõwemy iny tahe ròtemy reakre tahe ralòõhyykre.

25 Hãbuõ kie taheto ijòtòbòna ritòbònyre. Iu kaiboho uritere bydyrydenykre: –Wanyrỹ, aralòrenyke ini. Kiata tii anawyònydenykre: –Tiludubo toite, araeryrenyõre.

26 Kamy ta bidiwyònydenykre: –Inybohòle riroximy roiremyhỹ. Wahãwãreny-ki tòbedeerydỹmyhỹ.

27 Ixityre anawyònydenykre:
–Boibenyke aõbina bina widỹỹdu.
Tiludubo toite dori reerykõre.

28 Deuxu iòlò-ki Abraõmy, Ijaimy, Ijaòmy, tule ibutumy Deuxumy rybedu mahãdumy bobibenykreu, kaiboho malòbenyõtyhy. Tai hii, ibru, jumytata rỹikre.

29 Iny ibutu bede bede-ribi, Ibòò-ribi, Iraru-ribi, Biura-ribi, Beà-ribi Deuxu iòlò-ò hãwãmy.

30 Kiaremy ta, koludu mahãdu heka ibutuhewomy kedeakre. Ikõmyta, hewoludu mahãdu, koludumy kedeakre.

31 Iu ta fariseu mahãdu Jesuisi-ò narybedenyde: –Mahenyke, Herodi dori arubudỹmy araijereri.

32 Jesuisi dirawyònyde: –Bòòsebenyke kamy ijòrò-ò marybebenykre: –Jiarỹ tyytybybina iny-ribi retareri, tule ròteytedỹreri wiji biurasòmmy. Ijõ txumy ta waaõmysỹdỹna arihukre.

33 Kiaremy ta kia rewinyreri arihukre. Deuxumy rybedu dori Jerusalẽ hãwã-ki sohojile rurukre, iwitxira hãwã-ki ta aõkõre.

34 Jerusalẽ, Jerusalẽ hãwã, amahãdu heka rirubunyrenyre Deuxu rybedu mahãdu wahe. Iwese hãnie tariòre ributunymyhỹre wese terawo-ò, kia wesele arayrubunykemy rexinohõtynyre tahe kaiboho terarenyre.

35 Aheto-ribi heka Deuxu rexitakre. Kaheka ararybekre adeereny: –Wamy heka bobiõtyhy ixityre. Tiutxumy kamy bexirybenykre bede-ò, myỹ: –Deuxunimy nodu awityhy heka rare. Kiaule wamy bobikre.

14

1 Sabadoõu Jesuisi heka fariseu mahãdu wedu mahãduõ heto-ò ralore roximy. Tahe iny idi retehemyhỹreny.

2 Iu inyõ taruti, tadera-di taritari-di tamy dehemynyde.

3 Tahe Jesuisi narybede bede ywina erydỹỹdu-ò, fariseu mahãdu-ò: –Sabado txuu deytedỹỹwe awire aõbo, aõkõre aõbo.

4 Tiiboho rirawyònyõhyre. Tahe Jesuisi hãbu riteytenymy bede riywinyre iribi tahe riòlòdỹnyre.

5 Ixyby narybede Jesuisi: –Txibo kaiboho ariòreõ ada abroreniõ hãloo-txi resekeki, bitabenyke Sabadotxu hãrele. Aõhe inatyhy.

6 Tiiboho rirawyonyõhyre.

7 Tahe Jesuisi roxidu mahãdu-di retehemyhỹre. Tiiboho dori rynana wihikỹ-txi ronymyhỹreny. Tai kamy tamyreny rarybere:

8 –Txibo inyõ bedesanaõ araarikeki. Uritere rynanawi-ò rỹõmykre. Txibo dori inyõ aratyre ityhy kanake lau.

⁹ Tukeki bedesa dinodu inyõ aratyre-ò arynana-txi ronykemy adee kanarybekre. Tai tahe maixyrumy rynana bina-ò bonykre.

¹⁰ Kialemyta inyõ araarikeki, rynana bina-txi bonykre. Tahe bedesa dinodu adee kanarybekre: –Wy, katxi bodonyke ryanawihikỹ-ò. Tai tahe kai mabedesakre ibutuko-ò.

¹¹ Tahe ixityhydỹdu mahãdu uritere reakre. Kõmyta uriixi dinodu mahãdu rawowydykre.

¹² Tahe Jesuisi bedesa dinodu-ò rarybere: –Txibo roxina biwahinykeki, uritere asỹ mahãdu, aery mahãdu, ityhy mahãdu aarixiõmykre. Urikõ-ribi iwese teariteri wese araariheny.

¹³ Tukõmyta roxi biwahinykeki, uriteremy rỹira mahãdu, iny tiere mahãdu, iny ruetã mahãdu biarikre.

¹⁴ Tai adeysatyhymy mabekre. Tiibocho dori tiu ixiwesemy araariõtyhy. Deuxu tahe aõwydỹdukre iu bede awikreu.

¹⁵ Ijõ roholare Jesuisi rybe tai tamy rarybere: –Deuxu Iòlõna-ki, òwòrubese rỹdu mahãdu reysamy rarekre.

¹⁶ Tahe Jesuisi rarybere: –Inyõ roxina nihikỹõ riwinykemy ratxireri. Sõwemy iny ritobinyre.

¹⁷ Rexihumy rỹireu, teòdu mahãdu bede riywinyre iny kididykremy.

¹⁸ Sohoji sohoji tahe tarybe tamy riwahinyre. Ijõ taoworu tỹmyra-ò reteheke. Ijõ kanaõtyhy heka.

¹⁹ Ijõ tahe broreni debòitue riõbranyre tai riurihikreki kanaõke.

²⁰ Ijõ tahe hãwyy herinamy rexihumy rỹire tai kanaõke.

²¹ Teòdu tahe ròðsera tawedu-ò tamy relyyre. Tii reburere tahe rarybere: –Wylemy makre ibutury-di hãwã-ki. Ibutumy iny witxira witxira bididyke, iaõkõ mahãdu, itiere mahãdu, ruetã mahãdu wahe.

²² Iribi tahe teòdu ròðsera rarybere: –Ibutumy rewinyre wawedu, tahe heto rỹxiõmy rỹire.

²³ Tahe iwedu ixybymy bede riywinyre hãwã-ribi ibryrany-ò iny kididykemy: –Aruru-di bididyke, waheto dori rỹximy rỹirakremy idi watxireri.

²⁴ Juhuu watobidỹna mahãdu warỹsỹna riurihiõtyhy.

²⁵ Iu sõwemy iny Jesuisi heludumy roire. Tai Jesuisi tamyreny rarybere:

²⁶ –Kaiboho aõbo inatyhymy waluu mahãdumy toite. Tuu tarybeta. Tahe boluu, adiluu, ahãwyyluu, ariòreluu, aseriòreluu, ixiluu ratyre waluuõkeki, wamahãdumy aõkõ boibeke.

²⁷ Inyõ riwaheludunykemy ratxireri, tii juhuu taitxeò riwykre. Kialemy tahe riwaheludunykemy inatyhymy.

²⁸ Inyõ heto rare riwinykemy ratxikeki, juhuu iòwy-di rõhõtinkyre. Inieru rinykeki tahe riwinyke, aõkõkeki tahe riwinyõtyhy.

²⁹ Tii tuu rõhõtinyõkeki, tii ibutelemy riwinykre tahe inieru ituereu, ibutumy iny idi risinykre:

³⁰ –Tii taheto rarei riteleny tahe rexihuõtyhy.

³¹ Iòlõõ wou riwinykeki, juhuu taaõbinadu mahãdu-di rariamyhỹre. Idi rõhõtinyre. Ijõ iòlõ wawio mil soldadomy ijõdikeki, tahe tii debòwio mil ijõdikeki, tahe wou riwinyõtyhy.

³² Juhuu tahe teòdu riteõnyre ijõ iòlõ-ò ireheribile tii-wana wou ixãwidỹmy rarybekemy.

³³ Akireny tule iweselere. Ibutumy aõna aõna biriõbenykeki, waheludu mahãduõmy boibeõtyhy.

³⁴ Saa heka aõni awi rare. Tatxuberere rexihukeki tahe turibi ixãwike.

³⁵ Tai tahe suurina-ki ahirana silŷna binakōki awiōhōtidirenykeki bohohabenyke warybe-ò. Suò awiōre, tule ahirana bitòbònykemy awiōre. Urile idi behuke. Kaiboho òhōtidirenykeki, bohohabenyke!

15

¹ Idi nieru tarasadu mahādu sōwemy tamy roholamy doide. Tule ijō iny òrarudu mahādu rehemynyre.

² Fariseu mahādu, tule bede ywina erydu mahādu kawesemy rarybere: —Kahābu ibinare. Tii òrarudu mahādu-wana riroximyhŷre, iny iehehe-wana.

³ Idi Jesuisi rierynanyre ijyy-di rawesenanyre.

⁴ Kaiboho òsana 100 budoeni ijōdire. Sohoji heka iy-ribi iōre. Kai aōbo makre ijesemy? Kohe, iuhe, 99, birike bedero-ki tahe biòryhyyke. Aōhe inatyhy?

⁵ Mahakre wana tahe eysamy atxikre. Tahe bidyke iuhe-ò.

⁶ Taheto-ò rehemynyre, tasŷ mahādu-ò tahe ritobinyre: —Wawana ini kŷny bedesabedenyke. Wabudoeni-ki rahara, iōreō wahe.

⁷ Iwesetyhylemy taheka adee reerymahāre iny òrarudu mahādumy. Iu sohoji iny rexirahīkeki, biu-ki deysana sōwemy rŷikre. Iny òbiti 99my tahe urihimyo biu-ki deysana rŷikre.

⁸ Ijō Jesuisi relyyre: —Hāwyyō òsŷny womati ura nieru debòwiò dire. Sohoji iōre-wana, tii riijeke inatyhy? Loosōna ritoonyre, iube riwysynyre, sōwemy riijeke ihyymy tahe tai rahara.

⁹ Tii itxi reakre, reysamy rŷira. Iu tasŷ mahādu ritobinyre: —Wawana inihe bedesabedenyke. Wanieru-txi dokuri rahara.

¹⁰ Jesuisi tahe ritŷnynyre: —Iwesetyhyle biu-ki rare. Deuxu ŷju mahādu reysamy roirenyre, sohoji òrarudu rexirahīreu.

¹¹ Ixyby tahe Jesuisi narybede: —Hābuō iriòre inatxire.

¹² Tiutxumyta ihelŷŷna tyby-ò rarybere: —Waha, ibutumy aōna aōna bu-rukru wadee rawahikre, wijile bidiwahinykre. Tyby tahe iaōna aōna jura tamy riwahinyre.

¹³ Iriòre helŷŷna tahe ibutumy taaōna aōna-di rare irehe-ò, iwitxira behēhāwā-ò. Tai aōbina binale riwinymyhŷre. Ibutumy tanieru tai rahure.

¹⁴ Taaōwiwi rahu-di ta, tai rama ibede mahādu rahumyhŷre. Tii uritere reamyhŷ wahe.

¹⁵ Tahe aōmysŷdŷŷnamy rarunyre. Hāwāduō tahe taixŷniòwedŷŷdumy bederiywinyre taoworu-ò.

¹⁶ Tai rama risamy ta ixŷni rŷsŷna rŷsŷmy rexinohōtinyre. Tahe aōkōre.

¹⁷ Kia tahe tōhōti deade. Kamy dexinohōtinyde: —Yla aōkō waha aōmysŷdŷŷdu mahādu irŷsŷnadireri iwana jiarŷ kaki rama warubudŷŷmyreri.

¹⁸ Ixyby aròðekre. Kamy Waha-ò arexirybenymy: —Waha, Deuxuko-ò ako-ò rexiiixŷtenyrene jiarŷ raòrarunyrene wahe.

¹⁹ Ariòre wese aōkōmy wadi mabeke, waitxŷte òraru-ki. Aaōmysŷdŷŷdu mahādu wese ta ararekre myŷ tii rōhōtiny.

²⁰ Tii tahe tyby heto-ò rare. Irehemy nadeò, tyby tuu dobide. Idi rexiiwo-brunymy tamy raijaranyrene iwehityhydŷŷmy.

²¹ Tahe tii narybede: —Waha, Deuxuko-ò, ako-ò rexiiixŷtenyrene jiarŷ, raòrarunyrene wahe. Ariòre wese aōkōmy wadi mabeke, waitxŷte òraru-ki.

²² Iule ta tyby teòdu mahādu-ò rarybere: —Wylemy tyywihikŷ tymyra-di bityynybenyke. Debò tebò-ò roikre. Waō-di rawanykre.

²³ Tasŷse broreni riòre dedi birubunybenyke. Idi rikiroxirenykemy rekeysarenykre dori.

²⁴ Wariòre dori rubu-ribi wese rexixara. Ikõ-ribi itxi ijara rÿira. Tahe rawobedesarenyre.

²⁵ Iwana ta iumydela tahetoreny-ò dehemynymy nade taaõmysÿdÿÿna-ribi. Tahe wobedesana-ò roholamy.

²⁶ Tahe deòduõ-ò narybede: —Aõhereriwe.

²⁷ Dirawyònyde: —Ahelÿÿna kie ròðsereri aõhe rotÿÿnyõhyylemy. Tai boo broreni rirubunya.

²⁸ Iumydela tai reburere ròte deramy reare. Idi tyby tamy nade riròtenykemy.

²⁹ Tahe iriòre dirawyònyde: —Aõhe òhòkõ adee raaõmysÿdÿÿnymyhÿre. Ibutumy arybe retyhynymy watzimahãre. Ihãreta budoeni wadee tewahinyõhyymyhÿte, waijoi mahãdu-wana idi arexideysanykemy.

³⁰ Katahe ariòre urile aõnawiji rahura wedena mahãdu-wana. Ròðsemyta kai broreni riòrede tamy terubunya.

³¹ Tai tyby dirawyònyde: —Wariòre iny ratximyhÿre kiaremyta ibutumy waaõwiwi heka ahõrõle rare.

³² Iny bedesarenymy heka kawese rewinyre, wadee awireki. Ahelÿÿna dori ruruwese-ribi rexixara. Ikõ-ribi itxi ijara rÿira. Tahe rawobedesarenyre.

16

¹ Jesuisi taerydÿÿna mahãdu-ò relyyre ijyyõ: —Hãbuõ inieru sõwere. Tamy deòduõ ibutumy inieru-di raaõmysÿdÿÿre ijõ nieru ributunykemy. Ijõtxu tahe inyõ rarybere: —Eòdu riki heka anieru-di òbitimy aõkõ raaõmysÿdÿÿmyhÿre. Anieru sõwemy rexihumyhÿre.

² Tahe didyde ixidee taconta retehekemy. Tamy rarybere: —Inatyhymy aõbo umy iny rarybemyhÿre? Wanierumy tyriti aretehekemy watzireri. Òbitimy aõkõkeki, waribi arateònyke. Wanieru-di tiu maaõmysÿdÿÿnyõkre.

³ Tahe teòdu iximy rexiraykynyre: —Wadinodu riwateònyke. Aõhebo arotÿÿnyke? Warurukõre dori tahe aõmysÿdÿÿsira ariwinyõtyhy. Tule ijõ iny-ribi iixitòedÿÿna riwaixÿrure.

⁴ Reeryre tahe, aõhebo arotÿÿnykremy. Aõwiwihikÿ wabiòwa dee ariwinykre. Riwateònykeki tahe wabiòwasÿ-ò arakre.

⁵ Ibutumy nieru huòtedu mahãdu-wana rarybere, tawedu-ribi huòtedu wahe. Tamyreny rarybere: —Tiwesebo tewyta wawedu-ribi?

⁶ Tahe diwyònyde: —Adÿÿ rehuòtera, 100 hynamy wahe. Tai tahe rarybere ijõ: —Iwekre tahe wylemy biritinyke, 50 wahe.

⁷ Ijõ-ò tahe rarybere: —Tiwesebo adeve? Diwyònyde: —Trigo rehuòtera, 1000 prato wahe. Tai tamy rarybere: —Kai 800my biritinyke.

⁸ Iribi tahe hãbu ityhy heka teòdumy rarybere: —Tii inatyhy nieru erydu ratzireri. Tahe Jesuisi rarybere: —Kabede wijinabòdu mahãdu heka aõmydÿÿnana erydutyhy rare, ityhydÿÿdu mahãdu ratyre wahe.

⁹ Tai tahe adee ararybekre. Kabede mahãdu biòwamy boibeke, anieru-di. Tahe anieru ituekeki, Deuxu taheto wiwihikÿ-ò aradykre, biu-ò heto wiwihikÿ wahe.

¹⁰ Aõmydÿÿnana aõ aõkõmy kai òbitimy masÿnykeki, tule aõ nihikÿmy kai iweselemy mabeke. Inyõ heka ibutemy wasikeki, tii tule aõ nihikÿmy rawasinykre.

¹¹ Kaiboho heka kabede nieru-di òbitimy aõkõ atxibenykeki, tule biu-ki araròsòna bitaõtyhy, aõ wiwihikÿ inatyhy wahe.

¹² Iny witxira nieru-di heka òbitimy boibe benyòkeki, timybo anieru tyhy-di òbitimy boibeke.

¹³ Inyō iny inatxi deòdumy aōkō rarekre. Inatxinaō dori iluukre, ijō ta iluukōkre. Deuxu dee maaōmysydyōtyhy. Tiu nierurahi inatyhymy teamyhỹteki.

¹⁴ Fariseu mahādu tamy roholareu, urile idi nierurahi risinyrenyreny, tiiboho ire nieru ributunymyhỹrenyreny bōdyỹluurennyreny.

¹⁵ Tahe Jesuisi tamyreny rarybere: —Kaiboho heka òbitimy inyko-ò ixidi atximahātenyete. Ihāre tahe Deuxu timybo toimahāte rierymyhỹre aōna aōnarenny bina. Aōmy hābu rexinohōtinymyhỹre, aōtxi-ki Deuxu-ò awiōhyre.

¹⁶ Moisesi bedeywina rybe tahe tule Deuxu Rybedu mahādu awi rare, Joaō Sebedyỹdu rehemynyreny tahe ixāwire. Iu tahe Deuxu Iòlòna Rybe wihikỹ tamyra rōhōnyreny. Kia tahe iny ritohodỹnyreny. Ibutumy iny kia-ò ralokremy idi ratxireri.

¹⁷ Biu, bedeyrexi huke tahe isiraōre. Deuxu rybe tahe rexihuōtyhy. Kia isiratyhy rare. Ityryiti rybe wedenaō riōnonyōtyhy.

¹⁸ Hābuō tahāwyy-ribi ixāwikeki, idi iwitxira-wana roikeki, tii òtadu rare. Hāwyy ixedu-wana tii roikeki, òtadu rare.

¹⁹ Ityhy mahāduō riki tyy òwyhykỹwiwi-di rexityynymyhỹre. Tii idi rexirabedesirananyymyhỹre. Awimyhỹre tuu ratximyhỹre.

²⁰ Tahe urimynodu tyy my binadumy iijō-ki ixyby ixyby ratximyhỹre. Lazaru inire.

²¹ Tii ityhy rỹsỹnauhe rirỹsỹkemy raòbirenymyhỹre. Ijòròsa dori itybybinatòmny dirahumyhỹde.

²² Lazaru rurureu, yju mahādu ridyrenyreny biu-ò ilabiereny rora-ò, Abraō wahe. Tule ityhy rurure idi rituunynyrenyreny.

²³ Tahe rubu-ki rubu mahādu bedebina-ribi aōhōkỹmy dỹnyana ityhy Abraōmy robire irehe-ò Lazaru tule irora-ki.

²⁴ Tahe ityhy dyryde: —Abraō, walabie, wadi inihe bedexiwoboronyke. Lazaru ini wadee tebō-ki beruty-di kanake wadòròtò elehynamy. Jiarỹ dori raòhỹtỹhỹtỹreri kaheòtywo-ki.

²⁵ Tukōleta, Abraō narybede: —Dàa aōwihikỹ-di tatemyhỹ-di bexinohōtinyke. Tukōlemyta Lazaru aōbina binahakỹle rimyre. Tahe kaki aōwimy Lazaru ratxireri. Tukōmyta kai ibymy atxiteri.

²⁶ Ihāre ta hāloohukỹ inyko-ki rỹire. Timyki kaludu kia-ò iòhòreseōna. Tule kia ludu kaò iòhòreseōna.

²⁷ Hebose, Abraō walabie, kamy ityhy narybede, Urile Lazaru wasỹ-ò biteònykekō aōbo. Waseriòrebobo deòwarisidỹny.

²⁸ Waseriòrenny dori iruyrennyreny urikō-ribi kabedebina-ò kòdòiheny.

²⁹ Tahe Abraō diwyònyde: —Tiiboho dori Moisesi tyyryiti, Deuxu rybedu mahādu tyyryiti dire. Tii tahe tamy roholarenymy rityhynyrenyke.

³⁰ Ityhy narybede: —Aōkōre Abraō walabie. Kia inyō tarubu-ribi rexixamy ròðsekeki xiery ta, taòrarunarenny-ribi rexirahĩrenyke.

³¹ Tahe Abraō dirawyònyde ixyby. —Moisesi tyyryiti rybe-ò, Deuxumy rybedu mahādu rybe-ò roholaōkeki, tii mobo rexixake tule ityhydỹny.

17

¹ Tahe Jesuisi taerydỹny mahādu-ò rarybere: —Kiemy inyō wodohonadỹny aradykre òraruna-ò besekemy. Kobe làhàxe tii kiawesemy rotỹnykreki.

² Tii dori ibinatyhy rare. Wadee heka kabera-txi mana-di rataataamy sỹ-ò reakenawi rare. Tukōmy uri-ribi watyhydỹnydu tỹmyraō riòrarudỹnyheny.

³ Bexiijebeny ta. Aityhydÿÿdu seriòre rexìòrarunanykeki, tamy marâhîke. Tii rexirâhîkeki, iaõna aõna bina-ribi bexinohõtìlosanyke.

⁴ Txu sohojiõmy adee rexibinanykeki, kai tule ibinamy tai mahamy. Tii ixi-di rexiwotòenymy adee nakeki, tule idi bexiwobrunymy bexinohõtìlosanyke iaõna aõna-di.

⁵ Jesuisi erydÿÿna mahãdu dexitòenydenyde: —Wanyrÿreny, wainatyhynareny ini bisòwedÿÿnyke.

⁶ Jesuisi dirawyònyde: —Ainatyhynareny heka sunyisõmo wesekeki, kamy bederarade-ò marybebenyke: —Bexitake inihe idi bera-txi myike. Tahe tii aratyhynykre.

⁷ Titxibo kaibohoõ eòdudirenykeki aoworu-di itxeredu ada budoeni-di itxeredu wahe. Tii taaõmysÿdÿÿna-ribi kanalokreu, kawesemy aõbo tamy manarybekre? Wy, wylemy rikiroxikre dori.

⁸ Timyki kawese tamy arybeõna. Tukõmyta tamy marybeke: —Warÿsÿna biywinnyke idi wadee, idi manakre. Ariroxikre dori. Wabyre arihu-di ta bexiòenykre.

⁹ Teòdu deòdumy rearahu-di aõbo, txiòtòetuukemy tamy rarybere aõbo. Timyki tukõna. Kiemy dori taaõmysÿdÿÿnale riwinyre.

¹⁰ Iu aõmysÿdÿÿnareny bihudi, iwese heka atximahãbenyke kamy bexirybenymyhÿbenyke: Inyboho deòdule roire, aõtyhy aõkõ mynodu, iny aõmysÿdÿÿnarenyle heka inyboho riwinyrenyke.

¹¹ Jesuisi Jerusalê hãwã-ò ramyhÿreu, Samaria bede, Kalileia bede wotya-di rare.

¹² Iu hãwã-ò-txi raloreu, debo ituemy sòwereny tyymy binamy mahãdu iry-ò doide, tahe irehemy rexierenyke.

¹³ Iribi tamy dryydenyde: —Jesuisi, Erydÿÿdu, wadireny ini bexiwobrunnyke.

¹⁴ Tureny robireu, narybede Jesuisi-ò: —Xiwena wahidÿÿna mahãdu-ò ixi-di itxerenamy bòike. Kia-ò rariamy roirennyre, tahe reyterenyyre.

¹⁵⁻¹⁶ Ijõreny Samaria ludu mahãduõ reytemy iximy robireu, Deuxu riwowydÿÿnymy tamy dòòsede, rawiunymy. Tatiowomy Jesusiko-ò resere. Tahe rarybere: —Txiòtòetuuke.

¹⁷ Tahe Jesuisi ritÿÿraxinyre: —Debò itue wese, asòwerenyre? Titxibo ta debò inaubiòwaboho roire?

¹⁸ Aõherekiwe kaa iny witxira sohojile Deuxu wowydÿÿmy dòòsede, Samaria luduõ wahe?

¹⁹ Tahe Jesuisi tamy rarybere: —Mynyike, idi makre. Atyhydÿÿna òraru-ki dori teyteta.

²⁰ Idi fariseu mahãdu Jesuisi-ò rÿÿraxirennyre: —Tiubo Deuxu Iòlòna kanakre? Tii diwyònyde: —Timyki Deuxu Iòlòna dehemy nysÿnamy inyõ robiòtyhy.

²¹ Tule inyõ kiau rarybeòtyhy: —Betehebeny inihe ka-ò: —Tukõmy aõbo: —Kowaki heka rare? Deuxu Iòlòna dori aworeny-ki rare.

²² Tahe taerydÿÿna mahãdu-ò rarybere: —Tiutxumy heka Deuxu Riòre Hãbutyhyhykÿ txumy bobibenykemy tahe bobibenyòtyhy.

²³ Tahe ijõ adeereny kanarybekre: —Bedetehebeny inihe kaò ada kowa-ò. Tahe iitxerenyõmykre.

²⁴ Iwese tiribi tiò biu relaany myhÿre wese heka Deuxu Riòre Hãbutyhyhykÿ txu kÿnykre.

²⁵ Delemy tahe tii aõhòkÿmy rotÿÿnykre. Wijinabòdu mahãdu teramy reakre.

²⁶ Noe bededỹnana wesemy heka rỹimyhỹkre. Iu beòra rariareu. Tahe Deuxu Riòre Hãbutyhyhykỹ kedehemynykre iu.

²⁷ Ibutumy heka worana bedehesi rỹire. Lisisò tahe rỹire. Hãwyy herina lisina rỹire iu. Iu tahe beòra rariare. Ibutumy ituere.

²⁸ Lòò bededỹnana tule iwesere. Tiiboho worana bedehesidile rỹire. Tiiboho rityhynyòtyhy. Urile hetomy riwinymyhỹre, oworumy riwinymyhỹre, aõna-di rohonymyhỹre.

²⁹ Iu tahe Lòò ihãwã-ribi ròhònyreu, Deuxu heòty ityre riteònyre. Biu-ribi heòty ityre resere enxofre-wana.

³⁰ Iwesele txu tii heka rarekre heka, Wadehemynyna Deuxu Riòre Hãbutyhyhykỹ wahe.

³¹ Kiau tahe inyõ ihetotyre heka rỹire. Malòkekõ heka ahetowo-ò aõnamynamy. Inyõ tule oworu-ki rỹire, taheto-ò aõkõ ròðseke.

³² Lòò hãwyy-di mohòtinyke.

³³ Inyõ taumy riyrubunyekiki, tii ruruke. Ijõ tahe wadeewimy rurukeki, tii taumy rayrubukre.

³⁴ Adee rarybere: –Bede rurureu heka inatxi hãbu rõrõreri. Ijõ heka rakre dynamy reakre. Ijõ tahe rarikre.

³⁵ Inatxi hãwyy heka rỹsỹna-di raaõmysỹdỹnyny heto-ki ratxikre. Ijõ heka dynamy reakre, ijõ heka rarikre.

³⁶ Inatxi hãbu heka oworu-ki raaõmysỹdỹỹkre. Ijõ heka rakre dynamy reakre, Ijõ tahe ririkre.

³⁷ Ierydỹna mahãdu rỹrãxire. Titxibo rỹikre, Wanyrỹ? Tii rirawyònyre: –Titxibo iumy rubu roire-wana, rara tai wii ributunyre.

18

¹ Jesuisi heka ròkewesenanyre ribedeerynyreu. Kia wese heka tii ijyymy relyyre. Rexitòenyhykemy tii ribedeerynyre tule ixitòedỹ-ò ixirarenyõmy.

² Hãwãõ-ki tahe hãbu matuariõ rare, tii tahe ibinare. Juizimy heka ratximyhỹre ywisidỹdu wahe. Tii iny rityhynyòtyhy, Deuxu lau ruberuõmyhỹre.

³ Tule heka hãwyy wyteseõ tai rasỹnymyhỹre. Kia tamy ramyhỹre sòwemy. Tamy rarybera: –Biwawikòhenakykre wahe. Wakòludu tahe riwahureri. Kywisidỹkỹdu kai atxiteri. Anoherekibo tiwawokutòenykòteri.

⁴⁻⁵ Aõhòkõmy hãbu iaõna aõna òbitidỹ deramy reamyhỹre. Tahe Hãbu ixidee rarybehyra. Inatyhymy jiarỹ inyõ retyhynyòtyhy. Tahe hãwyy wytese sòwemy wadee rarybereki, jiarỹ ariòbitinykre iaõna aõna ibutumy iòludu-wana. Aõkõkeki tiemy kidiwarulòlòenyke.

⁶ Tahe Jesuisi ritỹnyre: –Juizi bina rybe-ò kaiboho boholabenyke. My wahe.

⁷ Deuxu heka tajoi mahãdu-ò roholake. Òbitimy iòludu-di riywisinykre. Tajoi mahãdu dori tamy rexitòenyre. Tii wymy riwiòhenanyke.

⁸ Tii inatyhymy tajoi mahãdu riwiòhenanykre. Jiarỹ, Deuxu Riòre Hãbutyhyhykỹ wymy adehemynykre, watyhydỹdu-txi aõbo areakre.

⁹ Tule Jesuisi kia ijyy relyyre, iny ixityhymy ixi-di ratxityhymy kia ijõ inymy kiale radònymyhỹre. Kia tahe rikewesenanyre.

¹⁰ –Iny inatxi hãbumy heka templo-ò ròirenyre rexitòenykemy. Ijõ fariseu rare, ijõ tahe nieru arisidu rare.

¹¹ Fariseu tahe rỹimy rexitòenykemy ixidee. My wahe: –Deuxu, jiarỹ aõhãubina aõkõ rare. Tai tahe umy realàmy wahãre. Jiarỹ aõwasidu aõkõ, aõòrarudu aõkõ, aõòtadu aõkõ. Iwese kowa nieru arisidu wese aõkõ jiarỹ rare. Txiòtòetuuke tai.

¹² Semana sohoji heka wabyreõ-di inatxixumy rewymyhÿre. Tule waaõna aõna ibutumy ijura adee rewahinyre. Debòwiõna-ribi sohoji rewahinymyhÿre wahe.

¹³ Nieru arisidu tahe irehemy rÿire. Biu-ò aõkõ retehere, tahe rexihetenyre rexitõenyrerimy Deuxu-ò. My wahe: —Deuxu, biwawotõenyke. Jiarÿ òrarudu rare.

¹⁴ Jesuisi ijyy ritÿnynyre: —Adee ararybekre. Mobo teysamy taheto-ò nade? Ixityhydÿÿdu aõbo ada ijõ aõbo. Kohe ijõ tuure, ixityhydÿÿdukõ wahe.

¹⁵ Tiiboho heka uladu tamy didydenyde. Iu Jesuisi tebò iratityre ritidimy ritxuhore awimy roirekemy. Tahe ierydÿÿna mahãdu tamy idyrenyõkremy raryberenyre.

¹⁶ Jesuisi rarybere: —Txìò, kididyke uladu wadee. Uladu wese dori Deuxu Iòlõna rare.

¹⁷ Inatyhymy ararybekre: —Moõ heka uladu wesemy Deuxu Iòlõna rityhynyõkeki kia heka Deuxu Iòlõna-ò ralõõtyhy.

¹⁸ Idi tahe iweduõ rarybere: —Erydÿÿdu wihikÿ, aõwexe ariwinykre idi biu-ò arahenykemy.

¹⁹ Jesuisi tamy rarybere: —Aõbo wa wihikÿmy wadee tarybeta. Hãbuõ tiu awiõre. Deuxu sohojile tahe awira.

²⁰ Bede ywina tyyriti kai teeryte:
—Rubudÿÿõmykemy, tule òta òtaõmykemy, wasiõmykemy, tule ruiõmykemy, iny wii itxenadÿÿõmykemy, adi biywinykemy, boo tule.

²¹ Hãbu tamy rarybere. —Kia bede ywina rybe retyhynyhyylere, uladudi-hyyle wahe.

²² Jesuisi rarybere: —Kai sohoji aõmydÿÿnale aki nasiranyde. Kai makre, ibutumy aõna aõna-di bohonykre, idi tahe kia nieru biwahinykre iny aõkõdu mahãdu-ò. Kia tahe aõmydÿÿnadikre biu-ki. Tahe manakre biwaheludunykre.

²³ Kia rybe-ki heka hãbu rabadewore. Rexitare ibedewomy iaõna aõna sõwetyhyreki.

²⁴ Jesuisi retehemy ibederyry-di tahe rarybera taerydÿÿna-ò: —Kia iny iaõna aõna sõwemy rÿireri, Deuxu Iòlõna-ò ralõke isirare.

²⁵ Kamelo tyyrorenawo-di ralõkemy isirakeki, kia-ribi isiratyhyre iny iaõna aõnadikeki ralõke Deuxu Iòlõna-ò.

²⁶ Ijohonadu tahe widee rarybere: —Mobo tai biu-ò hedukre.

²⁷ Jesuisi rarybera: —Inatyhymy kõaõboka hãbu-ò isiratyhyre. Deuxu-ò tahe ibutumy aõna aõna isiraõre.

²⁸ Pedro rarybere: —Boholake, jiarÿboho ibutumy rerirenyra araheludunykremy.

²⁹ Jesuisi rarybere tamy: —Inatyhymy adeereny ararybekre. Moõ waluukeki, rybewihikÿ luukeki, kia heka ririkre: heto, taseriõre, tyby tadi-wana, tariõre, tabede, ibutumy waòraru-ki, Deuxu Iòlõna òraru-ki, ririkre.

³⁰ Ka bedekile ritakre sõwetyhymy ibutumy aõna aõna. Ihãreta biu-ò rahenykre Deuxu-wana rasÿnykemy.

³¹ Jesuisi taerydÿÿna mahãdu ridyre inysõwe-ribi tamyreny rarybekemy: —Boholabenyke waijoi! Jerusalẽ-ò rokoirenykre. Tai iny riwarubunykre jiarÿ Hãbutyhy rarehãre, Deuxu Riõre rarehãre wahe. Iwese Deuxu Rybemy rybedu mahãdu rarybere wese.

³² Tiiboho riwawahinykre judeukõdu mahãdu-ò. Tiiboho riwabinabinadÿÿnykre, riwalahikre, watyre rarybexinykre.

³³ Riwahetenykre òhõte-di, idi riwarubunykre. Ihãre tahe inataõ txu-di tahe adexixakre rubu-ribi.

³⁴ Jesuisi erydỹyna mahādu urile bedede riòtiinyrenyrene. Aõmybo tii rarybere rierytyhyõrenyrene. Irybe tamyreny dori ierynatyhykõreri.

³⁵ Iu Ijeriò hāwā-ribi iòhòmy roirenyreu, inatxi iny ruetāmy heka rononymhỹ Jesuisi ibire-di rareu. Tiiboho nierumy rexitòenymyhỹrenyrene.

³⁶ Inysõwe-ò roholarenyreu tahe, tii rỹraxyrenyrene: –Aõhereriwe.

³⁷ Tahe tamy rarybere: –Jesuisi wa rareri Nazare hāwā ludu wahe.

³⁸ Tahe ruetāõ rryrene: –Jesuisi, Davi riokore! Biwatòenyke hewa! Wadi làhà inihe bexiruxetòenyke.

³⁹ Iny sõwemy tamy rarybere: –Iryõmyke! Ihāre ta tii rryrymyhỹrene: –Davi riokore, wadi mawotòeke!

⁴⁰ Jesuisi rryryrene tahe rarybere: –Tamy byryke wadee kanakemy.

⁴¹ Jesuisi tamy rarybere: –Aõmybo kai taruteri adee arutỹnykremy. Tahe hābu ruetāhākỹ tamy rarybere: –Wawedu, ixityre arobikremy.

⁴² Jesuisi tahe tamy rarybere: –Makre, atyhydỹyna kai arateytenyra. Kialehe rare.

⁴³ Aõwesele ixityrele tii robire. Tahe Jesuisihemy rare rry-di. Taihe ibutumy iny heka Deuxu riwowydynymyhỹ.

19

¹ Ijeriò hāwā-ki Jesuisi rehemynyrene. Idi rariareri.

² Tahe hābuõ tahe Jesuisi riere. Zaqueu inire. Inieru sõwere. Tii nieru tarasadu weduõ rare. Inieru sõwere. Tii heka iyjare tahe Jesuisimy robiõtyhy. Raòwònyrene tahe òwòru-txi.

³ Tii Jesuisimy robikemy risỹnymyhỹ, tiu tuu robiõhyymyhỹreki. Iyjare-ki tahe rexisiranyrene. Kiemy dori iny rarie rarie iko-ki rỹimyhỹ.

⁴ Tahe ijoiko-ò rexiraòre tai òwòruõ-ò raòwònyrene Jesuisimy robikemy iribi idi kanakreò.

⁵ Iu Jesuisi tamy rehemynyreu, biu-txi retehemy Zaqueu-ò. Narybede: –Wylemy bedeseke Zaqueu. Wiji dori aheto-ki bede wadi rỹike.

⁶ Tahe rabedesamy wymy resere. Awimy Jesuisi rybe-ki rahare.

⁷ Tahe inyõ mahādu iòraru-ki kamy rexirybenyrenyrene: –Aõhewe Jesuisi iheto-ò rara? Tii iny òbikõmy nodu hārele wahe.

⁸ Zaqueu tahe Jesuisi rarybere: –Bodoholake ini, Wanyrỹ. Tahe waaõna aõna iwekre iaõkõdu mahādu-ò ariwahinymy ararekre. Tule txibo inyõ-ribi rowasire inaubiòwa wawasi ratyre tamy ariwahinykre.

⁹ Tai Jesuisi narybede: –Wijityhyle kahābu sỹmahādu-ò henana rehemynyra. Kahābu tule Abraõ riore riòrele rare.

¹⁰ Deuxu Riòre Hābutyhyhykỹ dori iny òraranamy resere mahādu òrysomy itarasamy nade. Jiarỹ tiire.

¹¹ Jesuisi tamyreny rawesenanyrene timybo Deuxu Iòlòna raremy. Jerusalẽ hāwā-ò iòhòmy ratximyhỹrene. Tai tahe Deuxu Iòlòna iòhòmy ratximyhỹremy roholare.

¹² Tahe Jesuisi rarybere iny ityhyõ heka: –Inyõ nihikỹ heka rakemy ratximyhỹrene ijõ bedede-ò ratỹnykemy. Tai iòlòmy ronykremy rare. Iribi tahe ròsere.

¹³ Tii tahe taaõmydỹynana ririre teòdu mahādu-ki. Teòdu mahādu debòwiòmy heka womati tỹrỹrỹhỹkỹ nieruõ sohoji sohoji tamyreny riwahinyrene. Tamyreny rarybere: –Nieru bitakre, idi bibutunybenykre adireny watxireri adooskreu.

¹⁴ Tahe kia bedede ludu mahādu iòlò deramy ratximyhỹrene tai tahe tamy rybemy iny mahāduõ riteònyrene: –Kahābu aõkõ iny iòlòreny ronykre.

15 Ihāre tahe iòlòmý ronyre. Idi tahe tanieru wedu mahādu-ò rarariòwýre. Tiwesebo teòdu mahādu nieru ritare rierykemy.

16 Juhuludu tahe rehemynyre: –Wawedu, betehe inihe ijõ debòwiò anieru ratyre rebutunýre.

17 Tahe iòlò sòwemy riwowydynyre: –Awityhymýhe taaòmýsýdýýtá. Kai heka deòdu wihiký tate. Kai ibutedile sòwemy tewinyte tahe debòwiò hāwā adee ariwahinykre.

18 Ijõ tahe rehemynyre: –Wawedu, betehe iny iruyre anieru tyre rebutunýre.

19 Tahe iòlò tamy rarybere: –Kai sý iruyre hāwāmy dinodu mabekre.

20 Ijõ deòdu rehemynyre: –Wawedu, ahāxe anieru. Jiarý tyky-di reraserasenymý rerarenýre.

21 Jiarý alau raberure. Kai dori hābu nieru tarasaery heka tate. Aõ taaòmýsýdýýtãri-ribi aõkõ heka nieru tetamahāte.

22 –Kai heka deòdu awi aõkõ heka tate. Arybe xiery waribi arateònykre. Kai tiwaeryte jiarý nieru tarasaery heka watxireri. Aõ raaòmýsýdýýtãri-ribi aõkõ nieru retamahāre.

23 Aõherekibo. Kia nieru yrubuna heto-ki terikõte. Tai iximyna ratyre ini iribi ratare.

24 Iòlò teòdu inatxi-ò rarybere: –Wanieru iribi bitabenyke. Ijõ hābu sòwemy ròtareò rawahikre.

25 Ijõ raryberenyre: –Tii heka debòwiò nieru ijõdire.

26 Adee ararybekre: –Inyõ òbitimý raaòmýsýdýýtãkeki, tii sòwetyhymý ritakre. Tule inyõ òbitimý raaòmýsýdýýtãkeki, tii ibutumý ròònodýýtãke.

27 Iwedu rarybekre: –Waòludu mahādu tahe wadee bididybedenyke. Wadera mahādu wahe. Wako-ki birubunybenyke.

28 Tarybe rahudi tahe Jesuisi rare Jerusalē hāwā-ò.

29 Jerusalē iòhòmý ritehemynyrenýreu, tahe inatxi taerydýýtãna bede riywinyra hāwā-ò roikemy. Inatxi hāwā iòhòmý roire, Betabaji, Betýnia-wana. Kia-ò Oliveira hāwālò roire.

30 Jesuisi rarybere: –Kaiboho boikre kowa hāwā-ò. Kowa-ò birònykreu jumenta riòre mahabenykre. Moheka ityre rariaòlemý ratximyhýre. Biesemy, wadee bididybedenyke.

31 Inyõ adeerený rarybekeki: –Aõhekremýbo idi atxitenýteri. Tahe tamy marybebenýkre: –Wanyrý tuu rurureri. Ixityre kaò kidiòkesedýýtãnykre.

32 Tahe hābu roire. Iwese Jesuisi rarybere wese ibutumý rýire. Jumenta riòre ryro hetoijò-ki ritananyimý rýimyhý.

33 Tai riesereu, iwedu rarybere: –Aõherekibo teeseteri.

34 Tai tiiboho Jesuisi rybe myna tamy raryberenyre: –Inynyrý tuu rurureri.

35 Tahe ridyrenýre jumenta riòre Jesuisi-ò. Tiiboho tatyrený ritidirenyre jumenta riòre tyremý. Tiiboho risýnyrenýre Jesuisi ityre-ò.

36 Jesuisi rehemynyreu, ijõboho tahe tauwòhi ryromý ritidire ityre rariakemy.

37 Jerusalē iòhòmý rehemynyreu, Oliveira hāwālò-ribi, ierydýýtãna mahādu rawyhyrarònyreri, tule ryryreri.

38 Tii heka wowydyna rare. Tii heka Wanyrý niwesekekemy naderi. Wowydyna rare Deuxu Iòlòna. Kai Iòlòna kanakre. Wyhyrarò biu-txi kodoholakre.

39 Ijõ fariseu mahādu rarybere Jesuisi-ò: –Marybeke aerydýýtãna mahādu-ò tiiboho riyrykemy.

40 Jesuisi tamy rirawyònyre: –Tiiboho riryrykeki, manale wowodynamy riryryke.

41 Jesuisi Jerusalē hāwā-ò iòhòmy rehemynyreu, rahinyre.

42 Tii rarybere: –Kaiboho ywinatyhy teeryòte. Inatyhymy teeryte wana wadee awire, tahe aòkòre.

43 Ijō txu kanakre. Ahāwā ibutumy rirurawonykre aòbina mahādu, aòludu.

44 Ibutumy hāwā ituekre. Iny iwo-ki tule rurukre. Mana ibutumy kedesekre. Rierykòre dori tiubo jiarỹ ahedỹỹrenymy nanade.

45 Tahe Jesuisi dohodỹỹna hetowo-ò ralore. Tahe kia-ribi aòna aòna-di rohonomyhỹre mahādu, òbradu mahādu diteònyde.

46 Rierynanomyhỹre tahe tamy rarybere:

–Raridỹỹòlemy aòbo rỹireri: –Waheto kōaòboka inatyhymy ixitòedỹỹna hetomy rỹirakre. Idi kaiboho tewinytenynte wasidu hetowesele.

47 Txu ibutumy Jesuisi dohodỹỹna heto-ki ròbedeerydỹỹmyhỹ. Xiwe wedu mahādu, Deuxu aòmỹsỹdỹỹdu wedu mahādu roholarenynyreu, rōhòtinyrenyrene: –Timybo inyboho Jesuisi rubudỹỹmy rikiwisỹnyrenykre.

48 Tiiboho tahe aòkòhykyre iny sòwemy dori bede riòtiinomyhỹ ibedeerynadỹỹna-ki.

20

1 Ijō txu tahe Jesuisi ròbedeerydỹỹmy, Ijyy Tỹmyra Wihikỹ wahe. Riri-ranomyhỹrenyreu dohodỹỹna hetowo-ki, bede ywina erydỹỹna mahādu, Deuxu xiwena wahidỹỹdu mahādu wedu, tule matuari mahādu tamy doide.

2 Tiiboho tamy rỹỹraxirenyre: –Mowe ateòdỹỹdure kia aòna aònamy tatỹỹnomyhỹtemy.

3 Jesuisi dirawyònyde: –Adeereny tule araỹraxikre. Kaiboho bidi-wawyònykeki, tahe jiarỹ akoreny ỹraxina ariwyòkre aòrurudibo aòna aòna rewinyomyhỹre.

4 Tahe Jesuisi ritỹỹraxinyre: –Mobo Joaò ratisebedỹỹmy riteranyre? Deuxu aòbo ada iny aòbo?

5 Tiiboho widee rarybera: –Deuxu riteranyremy inyboho rakaryberenykeki, tai tii rarybekre: –Aòherekibo tahe tii tetyhynytenyòte.

6 Inyò riteranyremy rakaryberenykeki, iny aruberuwỹhỹrenykre. Ibutumy iny dori Joaò rityhynyre tii Deuxu rybe-di rybedumy. Ijō ijoi mahādu urile inyreny kidihetenykre.

7 Tai tahe tiiboho raryberenyre: –Jiarỹboho reeryòrenyrene. Tai tahe Jesuisi rarybere:

8 –Hebo, jiarỹ adeereny iximy ararybeòtyhy modeòdỹỹnamy jiarỹ tuu watxirerimy.

9 Iribi tahe Jesuisi tamyreny ijyy-di rierynanomyhỹre: –Hābu uva oworuò wese ròbròre. Tahe riòtitynyre. Tahe hāloo riare oworu ubetya-ki, ruỹdỹỹnomy. Tahe utò riwinyre. Idi tahe rityhere hābu mahādu-ò. Tahe rexitare tasỹ-ribi ijō bede-ò.

10 Tahe bederaty siredeemy bededỹỹnana rehemynyreu, iwedu teòdu riteònyre bederaty ritakemy. Tahe oworu-di itxeredu oworu wedu deòdu rimyrenyrene, rihetenyrenyrene idi riteònyrenyrene ixihyylemy.

11 Ixityre oworu wedu teòduò riteònyrene. Kia heka irati rihetenyrene ta tamy rawobinarybenyrene.

12 Ijō riteònyrene. Kia heka rirubunyrenyrene.

13 Iwedu ixi dee rarybere: –Aòhebo arotỹỹnykre. Tahe oworu wedu iriòre sohojilere, wariòre kie kie sohojile ariteònykre. Tai tiiboho rityhynyrenyrene.

¹⁴ Kia oworu-di itxeredu mahādu widee raryberenyre: —Kia heka wedu aōna aōna tarasadu rare. Rurukre, idi tahe iaōna aōna inydeerenykre.

¹⁵ Tahe rimyrenyre idi rirubunynyrenyre tahe idi rehurennyre oworu-ribi. Jesuisi ritỹỹraxinyre: —Aōhebo tahe oworu wedu rotỹỹnykre. Tai Jesuisi ixityre narybede:

¹⁶ —Tii kanakre oworu-di itxeredu mahādu hudumy, tai tahe oworu rityhekrekre iny wixiraō-ò. Kia-ò tiiboho roholareu, tahe raryberenyre. Timyki tukōna.

¹⁷ Jesuisi idi reny retehemy tahe rarybere: —Ritina-di aōbo tariaōletenyte kia ryberiti:

—Mana-di hetowidỹỹdu rehura. Kia mana heka hetohàtxi-ki heridu rare.

¹⁸ Inyō kia manatyre resekeki, kia urile raoroorokre. Mana tahe inytyre resekeki, kia urile risyrisynykre.

¹⁹ Bede ywina erydỹỹna mahādu, tule xiwena wahidỹỹna mahādu wedu rimykeny riwisỹnyre kiaule. Brebumy ta turennykōre.

²⁰ Tiiboho hābubinaō riōwynyrene tamy imynamy irybe-ki. Tai tahe Dinodu-ò riwahinykremy aōsirakōmy timykibo irutaōmy rirybewitxiranyrennykeny.

²¹ Tiiboho rarybere Jesuisi-ò: —Erydỹỹdu, jiarỹboho araerymy adi watximahārennyre kai inatyhy hābu tate. Iny ibutumy adee wiwese wiweselere. Inatyhymy iny-ò Deuxurymy teerynanyamahāte. Tahe tiiboho ritỹỹraxirenyre:

²² —Awire aōbo ada ibinare aōbo nieru rawahinymyhỹre bede dinodu-ò. Timybo tahe, imposto raōwymy aōbo ada aōkōre aōbo.

²³ Jesuisi rierymyhỹre tōhōtinanarenny, tahe ritỹỹraxinyra: —Aōherekibo kai-boho tiwaurihitenyteri.

²⁴ Wadee womati nieruō bidiwy waitxerenamy. —Kawe moō tyytarasana rare, katahe moō tyyritina rare. Tiiboho dirawyōnyde: —Kiahe bede dinodu hōrō rare.

²⁵ Jesuisi rarybere: —Hỹdebo, bede dinodu hōrō tahe tamy biwahinybeny, tule tahe Deuxu aōna aōnahōrō Deuxu-ò biwahinybeny.

²⁶ Tiiboho aōkōre. Irybe-ki rimynamy aōkō. Urile ribedeòtiinyre.

²⁷ Saduseu mahādu tamy nade. Kia heka iny rubu-ribi rexixamy aōkōre-riki rierynanymyhỹre. Tiiboho ritỹỹraxinyre Jesuisi:

²⁸ —Erydỹỹdu, Moisesi raritinyre bede ywina-ò, kaimy:

—Hābuō rurukeki, tahāwyw iriōre ijōdiōkeki, tahe kia hāwyw tahābu seriōre-wana roike. Iriōredikre taseriōre rubuōwymy roikre.

²⁹ Seriōre debōinatxi reurōmy raremyhỹ. Juhuu ijō roire hāwyw-wana. Tahe tii rurure iriōreōlemy.

³⁰ Tahe ihewoludu iseriōre wytese-wana roire. Tii rurure iriōreōlemy.

³¹ Ihewoludutyhy tule ibutumy roire wytese-wana, tahe ituerenyre iriōreōlemy.

³² Iròòbymy tahe hāwyw tule rurure.

³³ Ixixanau tahe mohābubo tii-wana rarekre. Ibutumy dori wytese-wana roire.

³⁴ Jesuisi rirawyōnyre: —Kabede-ki hāwywmy iny roimyhỹre.

³⁵ Ixixanabedeu heka moō roiōtyhy, inyō dori bede kia riòbynykreu.

³⁶ Ibutumy iny ŷju wese rarekre biu bede-txi.

³⁷ Moisesi tatyryiti itỹnyhỹkỹlemy rarybere: —Iny rubu-ribi kedexixakremy. Tai ta heōty òwòru sōmo riworonymyhỹki ixybylesỹ rarybera:

—Deuxu heka Abraō, Ijai, Ijaò kia Deuxu rare.

³⁸ Tai Deuxu inyru mahādu Deuxu dori rare. Iny rubu mahādu ta aōkōre.

³⁹ Inyõ rarybere: –Arawyònakyhyna, Wanyrỹ Tate. Bede ywina tabohe teerytyhyte!

⁴⁰ Tai tahe ixyby rỹraxyõhyyrenyre.

⁴¹ Jesuisi rarybere: –Timybo bede ywina erydỹdu mahãdu rarybemyhỹre Kristu Davi riõre raremy.

⁴² Davi rarybere aõmybo Deuxu Tyytybytyhy tamy narybedemy iwiuna-ki: –Wanyrỹ rarybere Wanyrỹ-ò:

–Bodony warurunawe-ribi.

⁴³ Txiõhe inihe, aõludu awarawo-txi aritidikre.

⁴⁴ Tahe Davile tanyrỹmy rininire. Timyki tahe Davi itybymykre.

⁴⁵ Tii taerydỹna mahãdu rierynamyhỹreu.

⁴⁶ Tii rarybera: –Bexiemyhỹbeny bede ywina erydỹdu mahãdu lau. Tiiboho heka tyyrehetyhywidihikỹle rexytynymyhỹrenyre. Tiiboho heka ixi rybedỹlluurenyre hãwã riraki. Dohodỹna heto-ki ryanawi luurenyre. Tule ta anarỹ rỹi-wana, tyhytyrekile ryanana tamynyre awire.

⁴⁷ Tiiboho tule wytese aõ aõkõ mahãdu aõna aõna ritamymyhỹrenyre. Ix-itiõedỹna rehehekỹ rexitõenymyhỹrenyre. Tiiboho heka aõnihikỹmy aõhõkỹmy dỹnany rotỹnyrenykre.

21

¹ Jesuisi retehemy rỹimyhỹ dohodỹna heto nieruhyna-txi. Tii retehere tibo iny tanieru-di rehumyhỹdi. Tai inieru sõwe mahãdu nieru sõwemy ritidimyhỹ.

² Tule tahe nade wytese aõ aõkõ mahãduõ. Tii inatxi nieru sõmo-di rehure.

³ Tai Jesuisi rarybere: –Kowa heka wytese nieru-di rehure ibutumy iny wixira ratyre.

⁴ Ijõ mahãdu tanieru uhedile rehumyhỹ. Tahe wytese idi rehure ibutumy tanieru-di rexihumy taumy-ribi idi rehure.

⁵ Dohodỹna hetomy ierydỹna tamy rarybere: –Erydỹdu, beteheke mana wihikỹ ruxera ruxera-di eryna heto riruxeranyreridi.

⁶ Jesuisi rirawyõnyre: –Kaiboho betehebennykre hetonihikỹ-ò. Kia heka mana ijõ wityre-ki rỹiõtyhy, ibutumy heka kedexunykre.

⁷ Tiiboho ritỹraxyre. Tiubohe ibutumy kidiixixãwididỹnykre. Tiiboho ibutumy bede konanadỹnany reakre. Timybohe arieryrenykre, aõma bede ibutumy rexihukre.

⁸ Jesuisi tamynyre rarybere: –Kaiboho anaitxenanydenyheny lau bexiebenyke. Sõwemy dori rỹikre wanymy rarybemy rarekre: –Jiarỹ dori Kristu rare. Tahe iny sõwemy itxenadỹny reakre.

⁹ Kaiboho wounarybe-ò, aõbina rybe-ò, boholakreu, breburenyõmykre. Kia heka kanakremy ratximyhỹre. Urile bededỹnana ikonanytyhy aõkõ rare.

¹⁰ Tii tamynyre rarybere: –Uritere iny lahinaryny, ijõ lahinaryny widee kanaaõbinanykre. Tule iõlõna mahãdu, ijõ iõlõna mahãdu-wana widee kanaaõbinanykre.

¹¹ Bede bedesu ijõ hãwã-ki kanamytatakre. Tahe aõkõre rama kedekre. Kia heka juhu aõhõkỹmydỹnana rarekre. Aõbrebuna brebuna kỹnyikre. Idi biu-ki aõwixira kỹnyikre.

¹² Tiiboho arawahinyrenykre aõludu wedu-ò, iõlõ-ò. Kaiboho heka aõhõkỹmy iu botỹnybenykre, watyhydỹ õraru-ki. Tiiboho arahatenyrenykre dohodỹna hetowo-ki. Kiabohoko-txi wadee kaiboho kedelyykre inatyhymy aõna aõna rỹiremy.

¹³ Rybewihikỹmy ibutumy bede bede hãwã hãwã-ò belyybenykre.

¹⁴ Tiubo aradyrenykeu, urile nohõtiõmy aõmybo kaiboho marybebenykre.

¹⁵ Kiautyhyle aõmybo marybebenykremy bierykre. Kia tahe marybekre. Kai aõkõ dori marybekre, Deuxu Tyytybytyhy tahe rybedukre.

¹⁶ Asỹreny dori ròtenawo-ò araròtenyrenykre. Seriore seriòrele wii kidirubunykre. Tyby heka tariòre kidirubunykre. Uladule tadi, tyby kidirubunykre.

¹⁷ Ibutumy heka iny iy kedeakre wani òraru-ki adeereny.

¹⁸ Ibedeu araderenytiõ reseõtyhy.

¹⁹ Bexityhymy ta tai ixiery dori biu-ò mahenybenykre.

²⁰ Ijõ tahe Jesuisi rarybere: –Woudu mahãdu Jerusalẽ rirurawonykreu heka bierybenykre aõhuluhudunamy bede rỹirerimy.

²¹ Judeia hãwã hãwã-ki ratxikeki, mahenybenykre bederatòhòkỹ-ò. Inyõ Judeia hãwãkikeki, iribi òlò rỹikre. Idi inyõ bederokeki ixyby Jerusalẽ-ò ròteõmykre.

²² Kia txuu heka òwynatxumy rare. Ibutumy rybe tyyriti myna heka bede rỹikre.

²³ Kobexe heny hãwyy bõtòmỹ rỹira, tule hãwyy tariòre ritònymy rỹira. Aõhòkỹmydỹỹnana kanakre tiu heka tuuõre. Debure nihikỹ heka kanake kia iny tyre-ki. Tiu heka kiamy bede roiõtyhy aõhòkỹmydỹỹnanamy.

²⁴ Sõwemy iny rurukre mayrehe-di. Iny sõwemy radykre ijõ bede-ò aõhòkỹmy tai rotỹỹnykremy. Ityhydỹỹdukõdu mahãdu rasỹnykre Jerusalẽ hãwã-ki iu.

²⁵ Ixityre tahe Jesuisi rarybere: –Idi webòhòna rỹira txuu, aõhòkỹmydỹỹnana itue-di, txuu heka rurunykre. Ahãdu tule rurunykre, tule taina. Beòbò lau iwodỹỹ lau ibutumy iny ruberukre inihikỹ òraru-ki.

²⁶ Iu bede bede iny mahãdu aõhebo rotỹỹnymy, tatõhõtibre-di tiiboho reserenyre sutyre-ki tai.

²⁷ Iny retehekre

Deuxu Riòre, Hãbutyhyhykỹ dehemynyna-di. Biurawetyky-ribi kodobehekre tatyhy-di.

²⁸ Tahe kia aõmydỹỹnana rỹikre, ywinamy bõibenykeu, iòhòlereri.

²⁹⁻³⁰ Tai tahe Jesuisi figueiraò-wana tahe bede ròkewesenanyre: –Figueiraò-di ini bexinohõtinybenyke. Tii heka tairu-txi, tanoiròsò ritỹmyranymyhỹreu, tai tahe bierybenykre wyra iòhòlereri.

³¹ Tule kia aõna aõnamy bobibenykreu, tii iòhòlereri. Ijò-ki iòhòwesele rỹire.

³² Inatyhymy adee ararybekre, kia wijinabòdu itueõtyhy aõna aõna rỹikre hãrele.

³³ Biu, bede-wana ituekre, tahe warybe itueõtyhy.

³⁴ Tahe Jesuisi tarybe rihumy rarybere: –Kaiboho bexiebenyke, betehebennykre ixinohõtityỹrenytyhykõmy. Roxina worana bedehesi-di timybo kaiboho atximyhỹtenytedi. Mona juberere biõbenykeny mohõtinyõke. Kaiboho dori teeryõtenyete tiubedemybo addòsekre.

³⁵ Kiatxu kanakre tahe iwese nawii mynyna wese aõwesele rimumy ibutumy bede iny mahãdu rimumy.

³⁶ Biebenyke tahe, Deuxu-ò bexitòenybenyke. Kia tahe aõhebo rotỹỹnykre-ribi mahenyke. Bityhynyke Deuxu Riòre, Hãbutyhyhykỹ, jiarỹ wahe.

³⁷ Txuõ txuõlemy tii Dohodỹỹna heto-ki ribedeerynyre ihãre tahe rummy Oliveira hãwãlò-ò rara.

³⁸ Rudile tahe sõwemy iny dohodỹỹna heto-ò rehemynymyhỹre Jesuisi rybe-ò ijohomy.

22

¹ Iòhòmy ratxireri Pascoa worana bedehesi kodohònykremy. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònyre.

² Deuxu aõmysỹdỹỹdu wedu mahãdu, tule bede erydỹỹdu mahãdu Jesuisi rimyky ratxireri idi rirubunykemy.

³ Satanasi heka Judasi Isariòwo-ki ralore, tii Jesuisi erydỹỹnaõ ihỹre.

⁴ Juda Isariò heka Deuxu aõmysỹdỹỹdu-ò rara Jesuisi riwahinykemy.

⁵ Tiiboho tamy roholarenyreu, reysare. Tahe tamy nieru riwahinykemy riurenanyre.

⁶ Tahe Juda riijemyhỹre aõu aõu bedewihikỹ tamyreny riwahinykemy. Wasimy riwahinykemy tii roholare.

⁷ Juhu orotxu anarỹỹtxure budoeni xiweloo rirubuny rahudi tahe Jesuisi erydỹỹna mahãdu tamy rarybere: –Titxibo anarỹỹ rỹsỹnamy biroxikey atxiteri.

⁸ Tahe Jesuisi heka Pedro, Joaõ-wana riteònyre: –Kaiboho boike iny rỹsỹnareny ywidỹỹmy.

⁹ Tiiboho rỹỹraxire. Titxibo ariywinyrenykre?

¹⁰ Jesuisi tamy rarybere: –Kaiboho boikre hãwãhãkỹ-ò. Tahe hãbu-wana wii biòbinykre butxi-di retyreriò. Tahe tii biheludunybenny. Titxibo heto-txi ralokreò, kaiboho tule bironybenymy bitỹỹraxinybenykre heto wedu:

¹¹ –Wawedureny rarybera: –Titxiwexe anarỹỹ rỹsỹna arirỹsỹkre waerydỹỹna mahãdu-wana.

¹² Tii heka adee kiditeòsinykre hetowoõ-txi biu-ki. Ibutumy rexihumy rỹire inydeereny. Tai rỹsỹna inydeereny biywinybenykre.

¹³ Tahe ierydỹỹna rexitare. Roire hãwãhãkỹ-ò. Tahe rotỹỹnyrenyre Jesuisi rybe myna. Tahe ibutumy rexihurenyre anarỹỹ-ò.

¹⁴ Kia txu rimyreu tahe Jesuisi nade taerydỹỹna waòinatxi reurò-wana byremy ronyrenykre.

¹⁵ Tii tamyreny rarybere: –Jiarỹ awanareny ariroxikemy watxiwãhãre. Karibi dori warubuna-ò arakre.

¹⁶ Inatyhymy ararybekre: –Jiarỹ konanamy ayreny-ki ariroxikre. Ixyby ta Deuxu Iòlònakile tahe rikiroxirenykre.

¹⁷ Tahe vỹi mona hyna rimyre, rexitònyre, tahe tamyreny riwahinyre. Ibutumy ibute bute iribi tuu riòrenyre.

¹⁸ Inatyhymy ararybekre: –Tiu ixyby tuu ariòòtyhy Deuxu Iòlòna-ki kotyre.

¹⁹ Tiiboho riroxireriu, Jesuisi orotxu rimyreu, raorore, rexitònyre, tahe tamyreny riwahinyre. Rarybere: –Ahãxe, kia heka waumy wese rare. Iu biroxikey, warubuna-di mohòtinybenyky.

²⁰ Biòbenyke! Kaa dori wahãlubu wesemy ratxireri. Tahe tamy riwahinyre riòrenyky. Tai sòwemy iny ròhònyke biu-ò hena-ò ibutumy òraruna ixãwididỹỹmy. Tuu ròhònyra. Kia heka wadeewimy iny Deuxu-wana ratxi-inyhỹre, wahãlubu òraru-ki.

²¹ Boholabeny inihe watyhedỹỹdu inykyrenyky ronyre.

²² Iwese tyyriti-ki roire wese heka arurukremy, Deuxu Riòre, Hãbutyhyhykỹ, jiarỹ wahe. Kobe làhãxe watyhedỹỹdu.

²³ Tiiboho tahe widee rarybere: –Mobo tahe rare? Mobo Jesuisi riwahinykre.

²⁴ Iribi tahe widee raryberenyre, mobo wiratyreremy?

²⁵ Tahe Jesuisi tamyreny rarybere: –Kabede iòlò mahãduy-ki iruru dire. Bede dinodu tahe iny rininire: Iny biòwa.

26 Tahe ayreny-ki kawese aōkō ihỹre. Inihikỹtyhy inyō ratxikeki, tii inyuhe deòdumy ratxikre.

27 Tibo inytyhy rare? Roxidu mahādu ada deòdu mahādu? Roxidu mahādu, aōhe inatyhy? Jiarỹ tahe ayreny-ki deòdu wesemy jiarỹ rare.

28 Kaiboho heka wawanahyy atxitenyte aōhōkỹmy ratỹỹnymyhỹreu.

29 Tai tahe adee ruruna ariwahinykre. Iwese Waha wadee riwahinyre wese, adee ariwahinykre.

30 Waiòlòna-ki kaiboho wawana biroxibenykre, biōbenykre. Tule rynana wiwihikỹ tyre-ki rỹdu mahādumy bonybenyke. Israeli iny mahādu heka kaiboho biòbitinybenykre, ibutumy judeu mahādu wahe.

31 Jesuisi ijō rarybere: –Simaō, Simaō, wadee bohولاتyhyke. Satanasi araurihirenykemy wadee rexitòenyre. Tahe adeereny kanake arauri-hidỹỹmy.

32 Dori rexitòenymyhỹre, Simaō, kai bityhynyhykemy. Wadee bòdòòsekeu, abiòwa mahādu biwiòhenanyke.

33 Tahe Pedro diwyònyde: –Awanahyy arakre, wanyrỹ, arurukre hāre, ròtenawo-ò arakre hāre.

34 Jesuisi tamy rarybere: –Pedro, kai biwatxiònyke, hānie hābu ryrykòule biwatxiònyke inataōmy.

35 Jesuisi tamyreny rỹỹraxire: –Juhu arateònyrenyreu anieruhynakōmy, asaurenkōmy, awarenyōmy, adeereny aōbo aō rasiranyre? Tiiboho di-rawyòmy: –Aōkō, aō rasiranyōhyre.

36 Tahe Jesuisi narybere: –Wiji tahe txibo inyō inieruhynadikeki, saudikeki, biwykre. Txibo inyō imayrehedikōkeki tayhyitxena-di rohonykre iòwy-di tahe tii riòbranykremy.

37 Kamy dori Deuxu rybe tyyriti-ki roire:
–Òbitikōmy nodu mahādu-wana tii rỹire.

Ibutumy timybo tyyriti wamy rarybere heka rỹikre.

38 Tamy ierydỹỹna mahādu rarybere: –Wanyrỹ, kaa inatxi mayrehe rỹire. Tahe Jesuisi rỹire rarybere: –Awire kia.

39 Tahe Oliveira hāwālò-ò roirenyre, taerydỹỹna mahādu-wana.

40 Tiiboho kowa-ò rehemynyreu, Jesuisi rarybere: Bexitòenyke! Tai tahe òraruna-txi beseōke.

41 Tahe iko-txi urihimyo rareu, taowotimy resemu. Rexitòenyre:

42 –Waha, adee arexitòenykre. Adee awikeki, aōhōkỹmy dỹỹnana waribi biixāwidỹỹnyke. Tahe adeewikomykre, wadeewi ta aōkōre.

43 Ỹjuō tamy nade biu-ribi tamy ruru riwahinyre.

44 Sōwemy tahe rexitòenyre, iòsana-ribi resere bee wahe. Hālubu wese heka ihỹre resereri bede-ò.

45 Tii rehemynyre tai rahare rōrōrenymy roireriò. Tiiboho ele risarenyre sōwemy rabadeworenyreki.

46 Tamyreny rarybere: –Aōherekibo tarōtenyteri? Biijebenykre, bexitòenykre.

47 Tii rarybereriu, aōwesele Judasi nade. Tii-wana doide hābu mahādu.

48 Jesuisi rarybere Judasi-ò: –Judasi, Deuxu Riòre bityhenykre aōbo, jiarỹ hābutyhyhykỹ wahe? Waòbuò-di aōbo biwatyhenykre?

49 Jesuisi erydỹỹna mahādu tuu robireu, tamy rarybere: –Iny mayrehe-di araaòbinanyrenykre, Wanyrỹ.

50 Kia ijoiò mayrehe ritare tahe Deuxu aōmysỹdỹỹdu wedu deòdu nohōti riorore.

51 Tahe Jesuisi rarybere: –Ixāwike. Tahe hābu nohōti riteytenyre.

⁵² Tahe Jesuisi dirawyònyde tamyreny, Xiwe wahidỹỹdu mahãdu-ò, dohodỹỹna heto itxedu wedu-ò, matuari mahãdu-ò: —Kaiboho mayrehe-di, òhòte-di tiwaòrytenyteri jiarỹ wasiduòrysya wese.

⁵³ Jiarỹ tahe dohodỹỹna heto-ki watzimyhỹ txeõ txeõlemy adeereny anaerynanymahãdenyde. Kowa-ki heka tiwamyõlemyhỹtenyde. Kia heka bededỹỹnana rexihure. Bede luru ruru roirerimy. Tahe aõbo iritina-ki rỹireri, kia heka kỹnyikremy.

⁵⁴ Xiwena wahidỹỹdu mahãdu dinodutyhy-ò wedu-ò tiiboho Jesuisi ridyrenyde. Pedro riheludunyde ireheriòremy.

⁵⁵ Rehemynyre tai Pedro ixitòteenymy heòtywera-ò ronyre heto itxeredu mahãdu-wana.

⁵⁶ Pedro ratximyhỹ-ò tahe deòduõ rehemynyre, ijadòma wahe. Pedro-di ijadòma retehemy ta rarybere: —Tii tule Jesuisi Nazareludu-wana ratximyhỹre.

⁵⁷ Tahe tii rexitxiõnyre: —Jiarỹ reeryõre aõmyboho kai tarybeteri.

⁵⁸ Ixybyle kowa ijoiõ Pedro-ò rarybera: —Inatyhymy kai ijõ mahãduõ tate. Tii inatyhytyhyrybemy rarybera: —Jiarỹ reerykõre hãbumy tarybetenyteri.

⁵⁹ Ijõ òrau tahe ijõ rarybere: —Inatyhy rare kai Jesuisi-wana ahãte, Kalileia mahãduõreki.

⁶⁰ Tahe Pedro rarybere: —Hãbu, reeryõre aõmyboho tarybeteri! Tahe hãnie hãbu robura.

⁶¹ Jesuisi heka Pedro-ò retehere. Tahe Jesuisi rybe-txi Pedro tõhõti reare. Iwese Jesuisi rarybere: —Hãnie inataõmy robukre myna, kai waheludumy bedexitxiõnykre.

⁶² Pedro tahe iribi rexitareu, ixidee icy reamy rahinyre.

⁶³ Tahe hãbu mahãdu Jesuisi rihetenymy, rilahirenymyhỹre.

⁶⁴⁻⁶⁵ Tiiboho riruehetynymy rihetenymy idi ritỹỹraxinymyhỹre: —Mowe arahãtenyra. Idi tahe sòwemy idi risinymyhỹreny.

⁶⁶ Rudile tahe judeu wedu mahãdu ributunyde xiwena wahidỹỹna mahãdu-wana. Jesuisi ridyrenykemy raryberenyde dohodỹỹna mahãdu-ò.

⁶⁷ Tamy ritỹỹraxinyre: —Kai aõbo Kristu tate, Deuxu Riòretyhy. Jesuisi rarybera: —Jiarỹ heka kohemy ararybekeki, kaiboho biwatyhynyòtyhy.

⁶⁸ Adeereny arỹỹraxikeki, kaiboho biwawyònybenyòtyhy.

⁶⁹ Kaiboho bierybenykre

Deuxu Riòre heka jiarỹ rare. Idi Waha rurunaweribi-ò aronykremy.

⁷⁰ Ibutumy tahe tamy rarybere: —Kai aõbo Deuxu Riòre tate? Tii rirawyònyre: —Iwese kaiboho tarybetenyteri wese jiarỹ inatyhy rare.

⁷¹ Tahe tiiboho raryberenyre: —Inyõ urybe-ò ijohoke heka aõkõre, inybohore dori tuu roholarenyde.

23

¹ Kia iny ka ibutumy Jesuisi ridyrenyde Pilato-ò, bede dinodu-ò wahe.

² Idi tahe aõbina binahakỹmy tuu raryberenyre: —Kahãbu heka bede rijeijeinyreri iòlòmy ijoi radònykemy. Iribi iòlò-ò òwydỹỹ rỹiòmyhỹkemy rarybere. Ihãreta Deuxu Deòdỹỹnany raremy idi iòlòmy rexininimyhỹre.

³ Tahe Pilato rỹỹraxire Jesuisi-ò: —Inatyhywe kai Deuxu mahãdu iòlòtyhy tate? Tai tahe Jesuisi riwyònyre: —Kai tuu tarybeteri, Wanyrỹ.

⁴ Tai tahe Pilato rarybere xiwe wahidỹỹdu mahãdu dinodu-ò, tule inysòwe mahãdu-ò: —Timyki kahãbu aõhòkỹmy wasỹdỹỹõna, aõõ bina dori riwinyòlere.

⁵ Tai ixyby idi risỹnyrenyde: —Kahãbu heka Kalileia bede-ribi bede rijeijeinymy rareri, idi Judeia bede-di tule katahe kakile tuu rotỹỹnyre.

⁶ Taita Pilato rÿÿraxire: —Tii aõbohe Kalileia mahãduõ ratxireri?

⁷ —Tii Kalileia mahãdu rare. Kia Pilato rieryreu, Herodi-ò riteònykemy rexinohõtinyre. Tii kia dinodureki. Ihãreta Herodi Jerusalê hãwã-ki iu ratximyhÿ.

⁸ Herodi Jesuisi robireu heka reysare. Jesuisimy robikemy riwisÿnymyhÿre sõwemy. Idi tahe tuu robireke, reòsare. Tai tahe reysare. Ini-ò roholahyymyhÿre. Tule aõwihikÿ wixira riwinykemy idi riwisÿnymyhÿre.

⁹ Idi tahe Herodi sõwemy rÿÿraximyhÿre. Jesuisi tahe rirawyònyõhyyre.

¹⁰ Aõbo xiwena wahidÿÿdu mahãdu wedu, tule bede ywina erÿdÿÿdu mahãdu sõwemy aõna aõna binamy tuu raryberenyre.

¹¹ Herodi tasoldado-wana tuu raòhòtemy idi risinymyhÿreny. Tyywihikÿ-di rirahananyreny. Iribi riòkesedÿÿnyre Pilato-ò.

¹² Juhuu heka Herodi Pilato òludumy widi raremyhÿ. Kia txule tahe widee rowoixirenyre.

¹³ Idi tahe Pilato tahe ibutumy xiwena wahidÿÿdu wedu, tule matuari mahãdu tule ijõ iny mahãdu ributunyenye.

¹⁴ Tamyreny rarybere: —Kaiboho heka wadee tedytenyteri bede jei jeiwidÿÿdumy tuu tarybetenyte tebutenyteri heka. Jiarÿ akoreny-ò retÿÿraxinyre idi aõhe tai ibinamy rahaõhyyre.

¹⁵ Tule iòlò Herodi tai ibinamy rahaõhyyre. Tai diòkesedÿÿnyde. Tai iurenana ta aõhereki timyki irubuõna.

¹⁶ Urile raòhòtedÿÿkemy bede reywinyre idi ta ixinamy rakre.

¹⁷ Kiemy dori worana bedehesiu, ròtena-ribi inyõ heka ròhònymyhÿke.

¹⁸⁻¹⁹ Sõwemy iny heka rirajuare: —Aõkõre uritere ta Baraba biteònyke. Kia hãbu urile ruruke. (Baraba inyrubudÿÿdure. Bede jei jeidÿÿ-ki heka ròtena-ò ralore.)

²⁰ Tai Pilato Jesuisi òlòdÿÿmy riwisÿnymyhÿ tai ixyby rarybere: —Aõkõre Jesuisile ariteònykre.

²¹ Sõwemy iny ixyby ryryre: —Aõkõre, itxeò-ki bitamadÿÿnyke!

²² Tahe Pilato tainatãõnamy narybede: —Aõherewe, aõwe tii ibinamy riwinyre. Aõheka tai ibinaõhyreri rubu-ò rawahikemy. Òhòteòle ta arawahinykre idi ariteònykre.

²³ Ihãre ta iny sõwe mahãdu ire rirajuamyhÿreny itxeò nihikÿ-ò rurukemy. Ixierya iryreny-ò roholare idi tukremy.

²⁴ Iu Pilato heka Jesuisi riwahinyre rubu-ò tumyna rexitòenymyhÿrenymy.

²⁵ Ijõ hãbuõ ta ròtenawo-ribi riòlòdÿÿnyre, iixitòedÿÿreny myna wahe. Tii hãbu aleerydu rare, tahe bede jei jeidÿÿdu tule. Iwana ta Jesuisi rawahire irybemynarenymy aõhebo rotÿÿnykremy.

²⁶ Tahe Jesuisi ridyreny. Ryki tahe hãbuõ iutedereny-ò nade, Simaõ inire, Sireni hãwã ludu wahe. Nohõtìòlemy ta ityre itxeò nihikÿ ritidirenyre, iherenymy idi kanakremy.

²⁷ Sõwemy ihemy nodu sõwe. Iy-ki hãwyy mahãdu Jesuisi-di robumyhÿreny.

²⁸ Tii tahe tamyreny rexiòkesemy narybede: —Jerusalê hãwã ludu hãwyy mahãdu! Ixirahi bobubenyke ariòre rahi tule warahi ta aõkõre.

²⁹ Tiutxumybo bexirybenybenykre: —Hãwyky bedekòby heka raritxòrenykõre mahãdu rare, tohokuã ritònykõre mahãdu tiku kuladu-di tarukikõre mahãdu.

³⁰ Tiutxumybo

bexirybenybenykre hãwãlò-ò: —Watyreny bedeseke tule hãwãlò riòre-ò bexirybenybenykre: —Biwawòbenykre.

³¹ Wiji kawesemyhÿre hee itukure hãre. Timykrebo tahe hee irubukreu.

³² Ihāre tasŷse iny inatxi hābu òbitimy nodu aōkō ridyrenyre Jesuisi-wana rururenykremy.

³³ Tahe hāwālò riòre-ò ratitybymy ninadu-ò ritehemynyrenyre. Tahe tii-wana inatxi wasidu itxeò nihikŷ-ò rilamadŷŷnyrenyre. Ijō ruruweribi-ò ijō hyweweribi-ò.

³⁴ –Waha, idireny beXiruxetòenyke rieryōhyyrenyreri dori aōmybo ro-todŷŷnyreri.

Tai tahe ityy wimy ritxuatxuakremy dado-di rehumyhŷreny tibo iwydydukremy.

³⁵ Iny retehemy rŷimyhŷ taile wahe. Judeu wedu mahādu tule Jesuisimy rarybere: –Tii iny sōwemy rihedŷŷnyre, kia aōherekibo tii rexitaōreri rubu-ribi, tii Deuxu deòdŷŷna rarehāre.

³⁶ Tule soldado mahādu rarybere aōbina binahakŷlemy. Diwyde tii aōna ta iny kremy rirahòreny tamy idi reare rijeny:

³⁷ –Kai inatyhymy judeu mahādu iòlòmy atxiteri wana heka kaa bexitakre iribi.

³⁸ Itxeò ratya-ki tahe aōma timy roire tyyritidŷŷna.

–Kaa Heka judeu Mahādu Iòlò Rare.

³⁹ Ijō heka rarybereri Jesuisibire-ki roireriōle tamy rarybereri: –Deuxu deòdŷŷna tateki, bexitake tule biwatabenyke.

⁴⁰ –Wy, Deuxu lau taberuōlemahāte aōbo tule dori iny aōhōkŷmy rokotŷŷnykrelemy iny roireri.

⁴¹ Lòwudu tamy rarybereri: –Iny heka rurureri, aōbina binahakŷ iny riwinyre òraru-ki. Iny rurureri. Kaa hābu rŷire tiu aōbina riwinyōhykyre.

⁴² Jesuisi-ò rarybere: –Jesuisi, watxi òhōti beakre Iòlòmy bonykreu.

⁴³ Jesuisi tamy rarybere: –Wijile heka biu-ò heka rakakre.

⁴⁴⁻⁴⁵ Txutyemy bedè roronyre idi txioro txu rehehekŷ-ò bedè tuu rŷire. Inataō òramy bedè rybinyre, rŷire. Heto-ki rahanaheridu urile raykare templo-ki wahe.

⁴⁶ Tahe Jesuisi rirajuare: –Waha, watyytyby adee rawahinyreri. Iu irybe rexihureu rurure.

⁴⁷ Soldado mahādu wedu tuu robire kia aōhebo rotŷŷnara tuu rarybere: –Kia inatyhymy hābu òbitityhy rare.

⁴⁸ Ibutumy iny kia robire Jesuisi rubu-ò rahinymy ròsere rexihetenyrenymy tabreti-ò.

⁴⁹ Ibutumy tii mahādumy ratximyhŷre iribi ireheriòremy rexiijemyhŷ.

⁵⁰⁻⁵¹ Tii judeu bedè mahāduō rare. Jyjemy inire. Tahe Kristu rubuna-ki awimy rahaōhŷŷre taijoi mahādu-ribi. Tii dori Deuxu Iòlòna riraòmyhŷre. Ihāwā Arimatea inire.

⁵² Tai ta rare ixitòedŷŷmy Pilato-ò, Jesuisi umy kidiwahinykremy.

⁵³⁻⁵⁴ Tai tahe ritare itxeò-ribi tyy ura nihikŷ-di tyy-di ritŷtetŷtenyre. Man-awabedewo-ò ritidire. Tai tiu iny rahāloonaōmyhŷre. Aōma judeu mahādu elehyna txu wahe ixiywidŷŷnatxumy txu rŷireu heka aōma worana bedehesi txu.

⁵⁵ Hāwyy mahādu Kalileia-ribi Jesuisi-wana. Tiiboho doide Jyje-wana Jesuisi hāloo-ò itxeremy.

⁵⁶ Tahe timybo roimyhŷ riòtudunyrenyre. Dòòsedenyde iribi aderòna lŷnyre ywidŷŷmy iumy tŷnyrenamy.

Kia rexielehynyrenyre sabado txu bedè ywidŷŷna myna-di.

24

1 Juhu txu semana bededỹnanau txuu deadeu hãwyy roire wabede-ò. Tiiboho riwyyre lỹnyrena.

2-3 Rehemynyrenyreu, mana nihikỹ tahe ijò-ribi ratamy rỹire. Tahe ralòrenyreu, Jesuisiumy ihoõhyyre.

4 Wabede-ò rirònyrenyreu, robirenyre inatxi hãbu. Ityy urahakỹmy rononymhỹre tai.

5 Tahe tiiboho bede riòtiinyrenyre idi tabrebu-di suò reserenyre. Ýjyõ tamyreny rarybere:

6 –Iny irumy kaiboho tejjeteri kaki wabede-ki aõbo? Tii kaki ratxireri. Tii rexixara rubu-ribi adeereny rarybere wese Kalileia bede-ki:

7 –Inyõ riwawahinykre inybina-ò Deuxu Riòre Hãbutyhyhykỹ. Itxeòtyre-ki arỹikre tai arurukre. Inataõ txu-di tahe rubu-ribi arexixakre.

8 Tahe hãwyy irybe-di røhõtinyrenyre.

9 Wabede-ribi raijaranyrenyre Jesuisi erydỹna mahãdu-ò ijyymy.

10 Kia tiibohore: –Marie Madalena, Joana, Marie Txiause. Ijõ hãwyy tule tii-wana roirenyre.

11 Iu tamy relyyreu, rityhynyõlerenyre.

12 Pedro tahe rỹimy reare idi raijaranyre wabede-ò. Urile tykylemy robire tahe dòðsede, rexiòtiinyre.

13 Itxuleu ta iny inatxi hãbu Jesuisi tyhydỹdu mahãdu tahe roirenyre Emau hãwã-ò. Jerusalẽ hãwã-ribi txibo 10 km wese irehere.

14 Ibutumy aõhebo rotỹnyramy wiko relyymy ròimyhỹre.

15 Iuleta Jesuisi tamyreny dehemynyde idi tiiboho-wana roire.

16 Tiiboho tuu robirehãre timykibo rierykøhykyrenyre.

17 Tahe Jesuisi ròtỹraxire: –Aõmywe widee tarybetenyteri.

18 Iijõreny Klopamy nidu narybede: –Kai sohojilewe Jerusalẽ-ki aõhebo bede rỹira teerykøte.

19 Tii dotỹraxide: –Aõherabo ta. Tiiboho tuu relyyre: –Jesuisi Nazare ludu kie. Tii Deuxumy rybedu nihikỹ heka rare, Deuxu-ò dori ibutu iny-ò heka rybe-ki aõni heka aõmywidỹ-ki heka ihỹna rare.

20 Waxiwenareny wahidỹdu wedu tahe wadinodureny itxeò nihikỹ-ò rurukremy riwahinyrenyre.

21 Tule judeu mahãdu tarasadukresỹna raholarenyre. Ihãreta tukølemyta inataõ txumy rubu-ki bede idi rỹira.

22 Bederarasò-di waijoireny hãwyyõ ihãloo-ò roire.

23 Tai itxi rekoaõhyyre. Dòðsedenydeki tahe Ýjummy riki robirenyremy delyydenyde. Tii Jesuisi rubu-ribi rexixamy tamyreny rarybere riki.

24 Waijoirenyõ tule ihãloo-ò roirenyre. Inatyhy rikihe rare. Urileta riki Jesuisimy robiõrenyre.

25 Tahe Jesuisi tyhy Klopaboho-ò narybede: –Aõherewexe Deuxu Rybedu mahãdu rybe awo-ki teximyyenyteri tetyhynykøtenyteriki wahe.

26 Kialemy dori Kristu dori aõna aõnamy rotỹnykremy tai Deuxu riwowy-dynykremy.

27 Tahe Jesuisi rexidelenyre aõbo rybe ritina roiremy. Moisesi ryberiti juhumy ritỹnynyreny. Timybo Deuxu rybe ritidỹdu raremy. Tiiemy heka iximyyhylye rarybere.

28 Ibutumy tamy relyyhyre ramyhỹrehy tahe ritehemyny Emau hãwã-ò, tai inatxi hãbu rarikreò wahe. Tahe Jesuisi rarybere: –Aõkø arexinoranykre.

29 Tai ta tamy ihãrele rarybemyhỹre: –Txioinihe bodonyke kakile. Aõma bede ratxinyra ratxioronytyhyra. Taile tiiboho-wana rare ihetoreny-ò.

³⁰ Rorukurenyre riroxirenykremy. Tahe Jesuisi orotxu rimyre rexitòenyre Deuxu-ò. Tahe orotxu riororiorore imynareny.

³¹ Iu tahe aõwesele rierymy reare Jesuisi. Tai iruereny raraymy rieryrenyre. Tahe aõwesele iõmy iribi reny reare.

³² Tai widee raryberenyre kiamy. Iu tii Ryberitimy inydeereny rydi relyyreu, urile wawo ratooteemy. Kai tahe. Ijõ diwyònyde: –Kohe jiarỹ tulere.

³³ Iribi tahe ritamanyrenyre. Diòòsedenyde ixyby Jerusalē hāwā-ò. Tiu waòsohoji reurò erydỹña itxi rekoarenyre. Tai tiibohe narybedenyde:

³⁴ Inynyrỹrenyhe rexixara. Pedro heka tuu robira:

³⁵ –Jiarỹboho tulerenyra wawanale ròirenyra rydi. Tule wadeereny orotxu riirenyra. Taile reeryrenyre.

³⁶ Iu kiamy relyymyhỹrele, Jesuisi dehemynymy deade ityareny-txi. Riryberenyre ibutumy: –Ywina heka akirenyke!

³⁷ Ibutumy ruberurenyre ilau. Urile raresỹny tamy raholarenyre.

³⁸ Jesuisi rarybere: –Aõhebo taberutenyteri. Breburenyõmyke hewa biwatyhynybenyke.

³⁹ Jiarỹle ratxireri. Wadebò-di bedetehebedenyke, wawa-ò tule. Jiarỹ karare wadee inihe bideribedeny. Jiarỹ uni aõkõ watzireri. Uni dori idedire aõkõ wawese aõkõre bedetehebedeny inihe.

⁴⁰ Tai tahe tebò wotõ mona, tawa wotõmona, riteòsinyre tamyreny.

⁴¹ Ihārele tahe rityhynyrenyõre, ibedesamy bede riòtinymyhỹreny. Jesuisi tahe rexitòenyre tamyreny aõ rirỹsỹkemy.

⁴² Tamy riwahinyrenyre utura wòsi deyreõ.

⁴³ Rirasỹre ikorenyòle.

⁴⁴ Idi tamyreny rarybere: –Aõma wawanale ratximahāre, õhõtireny itxi rera. Aõma wawana atximahātenyete juhū. Ibutumy heka adeereny retỹnynymy rarybere aõmybo wamy rybe roimyhỹremy. Ibutumy heka Moisesi rybedu ritidỹñaki iritina-ki roimyhỹre. Wiuna tule wamy riritinyre.

⁴⁵ Tai tahe ritỹnynyre òbitimy irakyreny riraynyre.

⁴⁶ Ihetxiu rybe wāhā aõma Deuxu Deòdỹña rurukre heka aõhõkỹmy rotỹñnykremy. Ruru-ribi inataõ txu-di rexixakremy bede roire.

⁴⁷ Kaa rybe wihikỹ ritidỹña heka kaa Jerusalē bede-ki robỹtỹkre ihāreta ibutumy iny iny kõkõmy bede bedemy robỹtỹkre. Kiamy heka ibutumy inydee marybebenykre. Iny riwatyhynymy rỹirakre heka ibutumy iòraru-ribi ariixāwididỹnyke.

⁴⁸ Tule terytenyteri ibutumy aõhebo rotỹñnykremy.

⁴⁹ Tahe adee ariwahinykre iwese Deuxu rarybere wesemy heka adee ariwahinykre. Kaki hewa matxibenykre hāwā-ki. Tahe kanakre heka adee ruruõ biu-ribi. Iribi tahe bõhònykre karibi.

⁵⁰ Iribi tahe Jesuisi ridyrenyre Betỹniary-ò. Tai tahe rilàhànananyrenyre tuu tamy rexitòenyrenyre ibutumy tamyreny. Tamy rexitòenyreu heka ilàhànany tamy rexitòenyre biutxile ire rexidymy ramyhỹre ryanany ramyhỹre.

⁵¹ Iu rilàhànanyrenyrenyu, biu-ò rare.

⁵² Tamy rexitòenyra aõma làhànany, wowodynamy rexitòenymyhỹre Deuxu-ò. Tai riwowodynamyhỹreny. Teysa-di diòkesedenyde Jerusalē-ò ixyby.

⁵³ Tai tahe Deuxu dohodỹña heto-ki ixyby ixyby rowowydynanyrenyrenyre.

Joaõ

Deuxu Rybe Wihikỹ Tỹmyra, Joaõ Tyyritidỹdu

¹⁻² Ibutu aõna aõnakõu, Jesuisi rarehyymy raremyhỹ. Tii rybehyymy raninira. Tii Deuxu-wana ihỹre. Ihãre tahe tii Deuxule rare.

³ Tii ibutuhukỹlemy riwinyre. Tiiõhyykeki tahe, aõ releõtyhy.

⁴ Umytuedeõna wahidỹdu tii ihỹre kia-di iny mahãdu rayky ritoosõnymyhỹre ritỹnynymyhỹre wahe. Kia loosõna heka bede luru ludu loosõna rare.

⁵ Bede luru tỹnyna loosõna rare. Loosõna rõtamyhỹre, bede luru tahe rõanodỹmyhỹre.

⁶ Deuxu teõduõ diteõnyde, Joaõ inire.

⁷ Tii loosõnamy rarybekremy nade. Kia rybe-di roholamyhỹreki, ibutumy iny rityhynyrenykremy.

⁸ Joaõ loosõna aõkõ rare. Urile tuu rarybekemy nade.

⁹ Jesuisile loosõnatyhy rare. Tii bede-õ nadeu, ibutumy iny rayky ritoosõnyre.

¹⁰ Tii bede-ki raremyhỹ, bede widỹdu rare, ihãre tahe iny rieryõhyyre mobo tii ihỹre.

¹¹ Tasỹ mahãdu-õ dehemynyde, judeu mahãdu-õ wahe. Ihãre tahe ridyõhyyre, rityhynyõhyyre urile teramy reare.

¹² Iu inyõ Jesuisi rityhynymy ridyreu. Deuxu riõreõlemy risỹdỹnyre inimy rityhynyreki. Kia-õ tahe ruru tamy riwahinyre.

¹³ Kia ityhydỹdu tahe Deuxudeewilemy tule iriõreõmy roirekemy. Hãlubu-ribi aõkõ ratybienyre, uraribike aõkõ, hãbudeewike aõkõ. Deuxudeewilemy iny ihỹmyhỹrenyre.

¹⁴ Rybe tahe umyõ rimyre, demy rexiijenyre, inyyreny-ki rasỹnymyhỹre. Tii tỹxihikỹlemy Deuxu loosõna-di ratximyhỹre, ruxetõena-di inatyhyna-di nade. Inyboho tuu robirenyre. Deuxu Riõre delamy ratximyhỹre, sohojihyyre.

¹⁵ Joaõ Jesuisimy rarybere kia wese: —Kiamy heka adeereny rarybere. Tii wahewomy kanakre heka waratyre awityhyre. Tii dori wako-ki rarehyymyhỹ waribi juhuutyhy wahe.

¹⁶ Inyboho dori sõwemy ruxetõena iribi ritarenyre. Luuna sõwetyhymy tawo-ribi Jesuisi inydeereny diwahinyde.

¹⁷ Deuxu bede ywina tahe Moisesi õraru-ki nade inydeereny. Ruxetõenamy tahe inatyhyna Jesuisi Kristu õraru-ki nade.

¹⁸ Inyõ heka tiu Deuxumy robiõtyhy. Deuxuriõre delale heka itỹnydỹdu rare. Tuunatyhy-di taãxiõti-ki rimyre. Tiile iny-õ Deuxu ditỹnynde.

¹⁹ Judeu mahãdu Jerusalẽ-ribi xiwena wahidỹdu mahãduõ diteõnyde Joaõ dỹraxidỹmy. Levita mahãduõ tule diteõnyde. Tahe roirenyre ritỹraxynekemy mobo tii raremy.

²⁰ Tahe Joaõ-õ rỹraxyrenyre aõhereriwe mobo atxiteri. Joaõ dirawyõnyde inatyhymy rexitxiõnyleri: —Jiarỹ Kristu Deuxu deõdỹna aõkõ jiarỹ rare.

²¹ Tai tahe ixityre tamy rarybere: —Mobo tahe atxiteri, Elia aõbo. Aõkõre, Joaõ rarybere. Tahe Deuxu dee rybedu atxiteri inyboho riraõrenyleriõ wahe? Joaõ rarybere aõkõremy.

²² Tamy tahe ixityre raryberenyre: —Wakoreny bedelyyke mobo atxiterimy. Tai iny deõdỹdu mahãdu-õ arelyyrenykre. Aõmybo iximy manarybeke?

²³ Tahe Joaõ rarybere: —Jiarỹ Isaia Deuxumy rybedu wesele adeereny ararybekre. Jiarỹ rybeterenaduõ jiarỹ rare. Jiarỹ bederahy-ki iny-ò rarywãhã.

Inynyrỹ-ò ryõ biòbitinyke.

²⁴ Fariseu mahãdu-ribi kia mahãdu roirenyre.

²⁵ Tai tamy rarybere: —Kai Kristu aõbo tate? —Aõkõre. Elia aõbo? —Aõkõre. Deuxu dee rybedu aõbo? —Aõkõre. —Aõhereki tahaka iny teratysebenyteri?

²⁶ Joaõ dirawyònyde: —Jiarỹ bedi iny reratysebenyteri. Inyõ tahe ayrenykyte ratxireri. Tii tahe teeryõmahãtenyke.

²⁷ Tii wahewo-ribi kanakre. Jiarỹ raixỹrumy watxireri iwataana ese-ki, tii waratyrereki.

²⁸ Kia ibutumy aõhebo rotỹnyre Betỹnia hãwã bedeki. Jordaõ bero kowa weribi ijã-ki ihỹre. Tai iule Joaõ iny riratysybenymyhỹre.

²⁹ Txubiòwau tahe Jesuisi Joaõ-ò kedehemynykemy nade. Tahe rarybere: —Beteheke, kowa Deuxu budoeni naderi. Tii õraru-ribi iny ritakremynade.

³⁰ Tuu jiarỹ rarybereu, inyõ wahewomy kanakre. Tii waratyre awityhy rare. Tii dori wako-ki rarehyymyhỹ waribi juhuure. Kia rarybereu tule jiarỹ tuurarybemahã.

³¹ Reeryõre heka tii, ihãre tahe anade tii aritỹnykemy judeu mahãdu-ò. Tai tahe anade iny bedi reratysebenymahãremy.

³² Tahe Joaõ tamyreny relyyre: —Jiarỹ Deuxu Tyytybytyhymy rabire tamy dobehede-ò. Bõtòe wesemy ityre-ò desede.

³³ Deuxu riwateònyre bedi iny ariratysybenykyte. Tahe riwateònyre tahe wadee rarybere: —Aõmy kai bobikre? Deuxu Tyytybytyhy ronony resekele inyõtyre-ò. Tii sohojile tahe Deuxu Tyytybytyhy-di iny riratysybenykyte.

³⁴ Jiarỹ tuu rabire, tai tahe reeryre, tule taheka relyywãhãre, tii inatyhymy Deuxu Riòre raremy.

³⁵ Itxubiòwau tahe Joaõ taerydỹna inatxiõ-wana raremyhỹ.

³⁶ Tahe Jesuisi nadeò tuu robire. Tahe tamahãdu-ò rarybere: —Kowa tahe Deuxu Budoeni naderi.

³⁷ Kia rybe-ò tiibohe roholareu, tahe ròirenyre Jesuisi riheludun-nyrenykyte.

³⁸ Jesuisi tahe tuu robire ihemy roirerimy. Tahe tamyreny rarybere: —Aõbo teijetenyteri. Tahe dirawyònyde: —Rabi (kia rybe tahe irybereny-ki, erydỹdu rare), titxibo kai tasỹnymahãte.

³⁹ Jesuisi rirawyònyre: —Bòdòibenykyte betehebennykyte. Tahe tii-wana roirenyre, tamy reteherenyre. Tahe txioromy tii-wana ihỹmyhỹ.

⁴⁰ Joaõ rybe-ò ijohonaduõ, Jesuisi helududỹduõ, Andre rare. Tii Simaõ Pedro seriòre rare.

⁴¹ Andre tahe taseriòre Simaõ aõwesele rioryre. Tahe tamy rarybere: —Mesia-ki inybohe rahamy ratximyhỹrenyre. (Ka rybe, Mesia, heka. Kristumy rare, Deuxu deòdỹna rare.)

⁴² Tahe Andre Jesuisi-ò Simaõ didyde. Jesuisi Simaõ-ò retehere urihimyo idi tamy rarybere: —Kai Simaõ tate, Joaõ riòrere. Iribi tahe ani Sefamy rarekre (Kani heka Pedro rare.)

⁴³ Itxubiòwau Jesuisi Kalileia-ò rakremy ixi-di rõhõtinyre. Tahe Filipi riijere. Tamy rarybere: —Wahemy manakekõ aõbo.

⁴⁴ (Filipi tahe Besaida hãwã luduõ rare Pedro, Andre-wana ihãwãluduõle rare.)

⁴⁵ Filipi tahe Natanaeli witxi reare. Tamy rarybere: —Moisesi bede ywina tyyriti-ki inyõmy rarybere: —Tule Deuxu dee rybedu tyyriti-ki rarybere. Taile rahare. Jesuisi ihỹre. Nazare hãwã luduõ rare. Jyje riòre rare.

⁴⁶ Tahe Natanaeli ritÿÿraxinyre: –Aõwihikÿ aõkàbo Nazare hãwã-ribi kadòhònykre. Filipi rirawyònyre: –Manake betehékemy.

⁴⁷ Jesuisi Natanaelimy robire naderimy tahe tuu rarybere: –Kowa judeu mahãduõ inatyhy rare. Tii hãbu òbiti rare.

⁴⁸ Tahe Natanaeli rarybere: –Timykibo tiwaeryteri. Jesuisi rirawyònyre: –Figueira òra-ki tanyteò, umy rabire. Filipi aòrysomy raõreule, umy rabire.

⁴⁹ Natanaeli rimasajuamy rirawyònyre: –Kai Deuxu Riòre tate Inyerydÿÿdu tate. Kai judeu mahãdu Iòlò tate.

⁵⁰ Jiarÿ adee rarybera: –Figueira òra-ki umy rabireki. Kiakile aõbo, tiwaty-hynyteri. Iratyre aõna aõna wiwihikÿ adee ariteòsinykre.

⁵¹ Inatyhytyhymy adee araybekre: –Biuwetyy riranykre. Jiarÿ biuloosòna hãbu jiarÿ rare. ÿjuboho Deuxu-ribi wadee doideò kai bobikre. Idi waribi roireò bobikre.

2

¹ Inataõ txu-di tÿmyra herina txumy reare. Kana hãwã-ki Kalileia bedeki. Jesuisise tai ratximyhÿre.

² Jesuisi tule ritobinyre tamy rakremy taerydÿÿna mahãdu-wana.

³ Lisinaube tya-ki vÿi mona ituere. Tai Jesuisise Jesuisi-ò rarybere: –Vÿi mona ituere, imona kòre.

⁴ Jesuisi rarybere: –Nadi, aõhebo arotÿÿnykre. Aõka wawidÿÿkõna wabed-edÿÿnanamy aõkõka bedeki rÿireri.

⁵ Tahe Jesuisise deòdu mahãdu-ò rarybere: –Anowidÿÿkÿmy adekereny tiki rarybekeki, ibutumy biwinybenyke.

⁶ Debòsohoji reurò mana butxi nihikÿ tai rÿimyhÿ judeu mahãdu ibe-di brebu òraru-ki aõna aõna risuhòmymhÿre worana bedehesinau. Mana butxi sohoji sohoji 80 urihixina ratyre rimonyre.

⁷ Jesuisi tamyreny rarybere: –Ibutumy bedi bitÿxinybenyke. Tahe ibutumy ijà ratyre ritÿxinyreny.

⁸ Katahe iribi bitake. Worana bedehesi wedu-ò biwybenyke imona. Tahe riwyreny.

⁹ Kia bee heka Jesuisi riwixiranyre vÿi monamy. Tahe iwedu riurihire, rieryòre tiribibo nade. Deòdu tahe rieryre juhoo bee rare. Tahe iwedu rarybere weryrybò heridu-ò:

¹⁰ –Katahe awityhyre. Kai ijò-ribi iwixiratyhymy tewinyteri. Ijò iny heka awityhy iko-ò ritxiwimyhÿ. Ihewomy tahe awiriòre ritxiwimyhÿre. Kai tahe awityhy ikonana-ò teyrubunyta.

¹¹ Katahe aõna aõna wiwihikÿ iny itxerenamy juhu ludu rare. Kana hãwã-ki Kalileia bedeki ihÿre. Tii tarurutere riteòsinymhÿre taerydÿÿna mahãdu-ò. Tai ierydÿÿna mahãdu rityhinyre.

¹² Iribi tahe Kafanaõ hãwã-ò Jesuisi dobehede tadi, taseriòre, taerydÿÿna mahãdu tii-wana roirenyre. Ijòtxumy tahe tai bedeki tÿnyna rÿira.

¹³ Pascoa worana bedehesi iòhòmym rÿireu, Jerusalẽ rotuore kia tahe judeu mahãdu worana bedehesina rare.

¹⁴ Tai Jesuisi Deuxu dohodÿÿna hetowo-ò ralore. Tahe iwo-ki itxi reare sòwemy aõna aõna-di rohonyreriò, broreni-di ijohodu-txi, budoeni-di ijohodu-txi, bòtòe-di ijohodu-txi, tule nieru wixira wixira wibydyÿÿdu mahãdu-txi reare tai ronymyhÿki.

¹⁵ Jesuisi reroti awaru hãtena wesemy riwinyre. Idi tahe dohodÿÿna hetowo-ribi ibutumy riòlòdÿÿre, budoeni, broreni-wana, tahe nieru wibydyÿÿdu mahãdu oworubesedyÿÿ-di Jesuisi rehure, tai nieru rejuxunyre.

¹⁶ Tahe rare bòtòe-di ijohodu-ò. Tamy rarybere: —Biòlòdỹnyke wa. Waha heto dori aõ-di ijohona aõkõ rare.

¹⁷ Tahe Jesuisi erydỹna mahãdu tõhõti-txi reare aõbo Deuxu Tyyriti-ki roiretxi:

—Waha heto yrubudỹna-ki dori riwasamyhỹre. Ariyrubunykemy dori watxireri, tai riwasareri.

¹⁸ Judeu mahãdu Jesuisi-ò rỹraxire: —Aõherekibo kai teòlòdỹnyteri. Mobo he arateranyreri tuu biwinykemy.

¹⁹ Tahe Jesuisi rirawyònyre: —Deuxusỹ-di behuke tahe inataõ txu-di aditamadỹnykre.

²⁰ Tahe judeu mahãdu rarybere: —Ka heto 46 beòra-di relere, timykibo kai inatãõ txu-di biwinykemy.

²¹ Jesuisi tahe Deuxusỹmy taumylemy rarybere.

²² Iribi tahe iu rubu-ribi iixixana-txi tõhõtireny reare, kia tuu rarybere-txi. Tai heka iritina rityhynyre, tule Jesuisi rybe rityhynyre.

²³ Jerusalê-ki Jesuisi Pascoa worana bedehesidỹna riwyre. Aõna aõna wiwihikỹ inyy-ki ritxienyre riwinyre. Tai sõwemy iny inityhy rityhynyre.

²⁴ Jesuisi tahe urihimyòle iny rityhynyre.

²⁵ Tii dori ibutumy iny rayky rierymyhỹre. Inyõ timy iny raremy tiu tamy aõna relyyòtyhy tii ibutumy aõerydu rareki.

3

¹ Nikodema fariseu mahãduõ rare. Tii judeu mahãdu weduõ rare.

² Tii rudimy Jesuisi roramy rara. Tahe tamy rarybere: —Wanyrỹ, reeryrenyre kai Deuxu-ribi erydỹdu tate. Inyõ Deuxu-diòkeki tii aõ wiwihikỹ riwinyòtyhy. Iwese aõ wiwihikỹ kai tewinyte wese.

³ Tahe Jesuisi rirawyònyre: —Inatyhytyhymy adee ararybekre: —Inyõ ixityre reakõkeki, tiu Deuxu Òlònasỹmy robiòtyhy.

⁴ Nikodema rỹraxire: —Timykibo matuari ixityre reakemy. Timyrabo, ixyby tadiwo-ò iny ralòkeki aõbo ixyby iny raumynyke.

⁵ Tahe Jesuisi rirawyònyre. Inatyhytyhymy rarybere. Inyõ bera-ribi ratybienyòkeki Deuxu Tyytybytyhy-ribi ratybienyòkeki, tiu ralòòtyhy Deuxu Òlòna-ò.

⁶ Deribi tybie heka dee rare. Deuxu Tyytybytyhy-ribi tybie tasỹ tyytyby rare.

⁷ Idi wanaòtaõmy aõmybo rarybereridi ixityre ijiranamy.

⁸ Tiò tiò yhy ribonymyhỹre: —Iwodỹ taholate, tahe tiribibo namyhỹde teeryõmahãte tiòhe ramyhỹre teeryòte, kia wesele iny Deuxu Tyytybytyhy-ribi tybie iny rỹire.

⁹ Tahe Nikodema rỹraxire: —Timyrebohe kia ratxike.

¹⁰ Jesuisi dirawyònyde: —Kai judeu bede erysydỹdu tate ihãrele teeryòte aõbo.

¹¹ Inatyhytyhymy adee rarybere aõmybo reeryre, aõmybo rabire. Ihãrele tahe kia tetyhynyòte.

¹² Bede aõmydỹnanamy rarybere tahe tetyhynyòte. Timybo bityhynyke biu aõmydỹnanamy ararybekeki.

¹³ Iny sohojile biu-ò raòwònyre, Deuxu Riòre Hãbutyhyhykỹ rare. Tiile iribi juhu dobehede. (Tiile isỹre. Taile isỹ roire.)

¹⁴ Iwese Moisesi bederahy-ki womati hemylala ritamadỹnyre wese, Kiawesele jiarỹ, Deuxu Riòre Hãbutyhyhykỹ, wadi kidiwatamadỹnykre.

¹⁵ Tahe inyõ wadi rityhynykeki, umyuedeòna tuu ritamy rỹihy rakre.

¹⁶ Deuxu Riõre sohojihyyle rare. Deuxu bede ludu mahãdu ibutumy iluutyhyre. Tai tahe tariõre diteõnyde iny rityhynykremy. Inyõ tii rityhynyre-wana, umytueõnahakỹ ritakre. Tii ruruõtyhy rubu bina bede-ò.

¹⁷ Deuxu taRiõre bede-ò diteõnyde bede iny mahãdu tarasadumy rarekemy. Aõ iny ywisidỹỹna-ò rirutykemy aõkõ.

¹⁸ Inyõ rityhynymyhỹreki, tii ywisidỹỹdu idi rehuõtyhy. Iny rityhynyõmyhỹreki tihe aõhõkỹmy dỹỹnana-txi riteõnykremy Deuxu idi ratximyhỹre, tii dori Jesuisi rityhynyõhyymyhỹre, Deuxu Riõre dela wahe.

¹⁹ Ibinatyhymy iny aõmydỹỹnana bede bedemy rỹira, tai bede luru-ki rira tamy awira. Tuu loosõna nadeu, tamy ibinare. Tai tahe Deuxu riteõnykemy idi ratximyhỹre.

²⁰ Inyõ aõbinahakỹ rotỹỹnymyhỹre, loosõna dera heka tuu rỹira; loosõna-ò rehemynyõtyhy, rehemynyre-wana, iny taaõbina bina rierymyhỹre.

²¹ Iny tahe awiwihikỹle rotỹỹnymyhỹre-wana tii tahe loosõna-ò rehemynykremy rỹira, taaõmydỹỹnana dori Deuxudeewimy ririmyhỹre, ibutu iny rierykremy ririre.

²² Iribi tahe Jesuisi taerydỹỹna mahãdu-wana Judeia bede-ò ròirenyre. Tai heka bededỹỹnanaõ riwyre. Tiibohe iny ityhydỹỹdu mahãduõ tai riratysebenyrenyre.

²³ Joaõ iribi iõhõmy ratxireri. Iny riratysebenymyhỹre. Tii Eno hãwã-ki Salĩ hãwã-ribi iõhõmy roire. Tai riratysebenyre sõwemy bee tai roimyhỹreki. Sõwemy iny tamy ratysebenymy rare.

²⁴ (Joaõ iu rotenamy ralõõlemy ratximyhỹ.)

²⁵ Judeu mahãduõ, Joaõ erydỹỹna mahãdu-wana rybetere txiõdỹỹna rõhõnyra, bede ywina õbiti aõmydỹỹnanamy wahe.

²⁶ Tahe Joaõ erydỹỹna Joaõ-ò doidenyde rarybekremy: –Waerydỹỹdureny. Kai hãbumy telyymy tatemahã, kia Jordaõ kanawe-ribi ijã-ki umy-wana raremyhỹ, tii ròratysebenyreri. Sõwemy iny tamy wirotyre.

²⁷ Tahe Joaõ tamy rarybere: –Kia wadee awire aõ aõkõ iny ritamyhỹre, biu-ribi kanakẽkile tahe iny aõ ritake.

²⁸ Jiarỹ heka Jesuisi nonanamy ijyymy diwateõnyde wahewo-ribi kanakremy. Jiarỹ tii aõkõ rare. Tii tahe Kristu tyhy rare. Jiarỹ kiamy juhuu rarybewãhãre: –Kia tahe teerytenyte.

²⁹ Inatyhymy tahe hãbumy heridu wesemy Jesuisi rare. Ibutumy iny tuu robikemy tamy wirotyre. Ibiõwa weselemy jiarỹ rare. Tahe irybe-õ raholareu, reysamy rarewãhã.

³⁰ Tai wadee awire iny tii rieryreki, waribi tahe nohõti rosakemy idi watxiwãhãre.

³¹ Tii biujuxahakỹ-ribi nadeki ibutu ratyremy ratximyhỹre. Bede-ribi jiarỹ anadeki, tahe bede ludu jiarỹ rare, bede aõmydỹỹnanamy rarybewãhãre.

³² Tii rarybere aõmybo roholare, robire, tahe ijõ iny rityhynyõhyre irybe.

³³ Inyõ tahe rityhynykeki, tii tule ijõ-ò rarybere, Deuxu inatyhy rare wahe.

³⁴ Deuxu deõdỹỹna heka irybelemy rarybere Deuxu dori Tatytybytyhy ibutumy tamy diwahinyde.

³⁵ Tyby taRiõre luure, tai tahe ibutu aõmydỹỹnana ywisidỹỹmy tamy diwahinyde diteõnyde.

³⁶ Iny Jesuisi rityhynymyhỹreki, umytuedeõnahakỹ-di iny rỹira. Inyõ tamy ratxiõkeki, tiu umytuedeõna robiõtyhy, Deuxu ykarana dori tii-wana ratximyhỹre.

4

1-4 Inyõ fariseu mahãdu-ò rarybere: –Jesuisi Joaõ-ribi iny sõwemy diratysebenymyhỹde. Sõwemy iny ritamyhỹre ierydỹỹmy. Tahe Jesuisi aõkõ ròratysebedỹỹmyhỹre, ierydỹỹnale tahe riratysebenymyhỹre. Iu Jesuisi ki-amy rieryreu tahe, Judeia-ribi rexitare. Roirenyre Kalileia bede-ò ritehemynkemy. Roirenyreu tahe Samaria bededihyyle riòhòrenyre.

5 Samaria bede hãwãõ-ò tahe ritehemynyre. Sika inire. Ijaò riòresu-ribi iòhòmry ròira, tariòre Jyje-ò riwahinyre wahe. Ijaò behãloo tai rỹimyhỹ.

6 Txutyeyu tahe Jesuisi elerihynomy rononymhỹ tatilemy nadeki berysyna werora-ki.

7 Tahe Samaria mahãdu hãwyyõ dobehede beixemy. Jesuisi tamy rarybere: –Beõ inihe wadee bidiõke.

8 Jesuisi erydỹỹna mahãdu tahe juhoo roirenyre hãwã-ò rỹsỹna itxemy. Tai Jesuisi riraòmry rononymhỹ.

9 Tahe hãwyy rarybere: –Kai judeu mahãdu tate, jikarỹ samaria mahãdu rare. Anoherekibo wadeke texitòenyteri bemomomy. (Judeu mahãdu Samaria mahãdu-wana wiymy reaõhyymyhỹre. Widi òludu wesemy rare.)

10 Tahe Jesuisi rirawyonyre: –Kai heka teeryõhyteri mobo jiarỹ rare wahe. Tule, Deuxu wahisidỹỹna teeryõte. Tiwaeryteriwana kai bedexitòenyke, tahe bee irumy ihỹre adee ariwahinyke.

11 Hãwyy rarybere: –Wahĩ, timybo bee irumy ihỹre wadeke kanakre. Kai ahynakõre, hãloko heka behekyre bee irehere. Timybo bee iru kumy-wana ratxireri.

12 Kai anobohe inytyby Ijaò ratyrere. Tiki heka behãloko wedu juhuku rare; idi riwahinyre inydekereny. Iribile iritxiòre riõmyhỹre tiki-wana, ibroneni riõmyhỹre.

13 Jesuisi tahe tarybetyhy-di rarybere: –Inyõ kahãloobemy riõkeki, ixityre bemomomy ruruke.

14 Jiarỹ bee ariwahinyke. Inyõ tahe kiabemy riõke-wana, tiu bemy tamy umytuedeõnahakỹ riwahinyhyymyhỹre.

15 Tahe hãwyy rarybere: –Wahĩ bee tuedekõdu ikuny tuu kariõke. Tai kakõ kanakõtyhy berysomy.

16 Tahe Jesuisi rarybere: –Maa hỹny, ahãbu biòryke, tahe manake.

17 Hãwyy dirawyonryde: –Anokõre, wahãbukõre. Jesuisi rarybere: –Inatyhymy tarybeteri ahãbuõremy.

18 Kai heka iruyre ahãbu tate. Wijina tahe ahãbu aõkõ rare atỹhibiòwale wahe. Kia tahe inatyhymy tarybeteri.

19 Wahĩ, wiji tahe arakeryra, kai Deuxu rybeduõ tate.

20 Wahareny Deuxumy reàlãmehỹre kahãwãlò-ki. Amahãdu anokõ, tamy tahe Jerusalẽ Deuxu deàlana rare.

21 Tahe Jesuisi rarybere: –Lerỹ, warybe bityhinyke. Kanakre itxu kahãwãlò-ki aõkõ, Jerusalẽ-ki aõkõ Waha Deuxu deàlana rarekre.

22 Kaiboho aõmybo tealate teeryõtenyete. Jiarỹboho tahe aõmybo reàlare, reeryrenyre, tarasana dori judeu mahãdu-ribi nade.

23 Kia bededỹỹnanamy reara. Inyõ Waha Deuxu àlãnany ratximyhỹreki Deuxu Tyytybytyhy-di, inatyhyna-di reàlãmehỹke. Tuu deàlana mahãdu Deuxu riijemyhỹre.

24 Deuxu Tyytyby rare: –Tai tahe tudeàlanadu tatytyby-ki inatyhyna-ki tuu reàlãmehỹre.

25 Kia tahe jikarỹ rekeryre, Mesia kanakre, Deuxu dekòdỹkỹnany wahe, Kristu inire. Tiki kanakreku wahe, ibutumy inydekereny anona anonamy relykykre.

26 Jesuisi rarybere: —Jiarỹ tahe tiire, umy-wana wiji rarybereri wahe.

27 Tahe Jesuisi erydỹna mahãdu rehemynyre. Hãwyy-wana rarybereriki tahe ribedeõtiidỹnyrenyre. Tahe inyõ tamy rỹraxiõhyyre. Aõmybo tamy rỹraxire, ada aõherekibo tamy rarybereriki.

28 Iu tahe hãwyy tabutxi ririre, hãwã-ò rara. Tahe tahãwã mahãdu-ò rarybere:

29 —Bodoibedenyke wahemy. Betehebenykemy hãbu-kò. Tiki wakoku relykyre ibutumy anohebo ratỹkỹnymahãremy. Tiki kòsana Kristu ratxireri. Deuxu dekòdỹkỹna rare.

30 Hãwã-ribi roirenyre Jesuisi-ò.

31 Iu hãwyy hãwã-ki rareamyhỹreu, tahe ierydỹna Jesuisi-ò rarybere: —Iny erydỹdureny rỹsỹnaõ birỹsỹke.

32 Tahe Jesuisi rarybere: —Warỹsỹnadire wahe. Kaiboho heka kia rỹsỹna teeryõtenyete.

33 Tahe widee raryberenyre: —Inyõ kãaõboka tamy rỹsỹnaõ riwyreri.

34 Jesuisi rarybere: —Wadeòdỹdu deewimy ariwinykemy idi watxireri. Kia tahe warỹsỹnare, iaõmysỹdỹna arihukemy wahe.

35 Maixõmo butuna inaubiõwa ahãdu-di bidiòrarunybenykremy kaiboho tahõtintytenyteri. Tahe aõkõre adeeremy ararybekre. Betehebenyke bedero-ò. Maixõmo redenamy rỹre.

36 Kia maixõmo butudỹdu iòwy ritake, tahe umytuedeõnahakỹ-ò iny ributunyre. Tahe wiwanale riwodeysanymhỹre ibròdỹdu ibutudỹdu-wana.

37 Iwese inyõ rarybere wese, inatyhy rare. Ijõ tahe ibòròdỹdu rare. Iwixira tahe ibutudỹna rare.

38 Jiarỹ kaiboho arateònymahãre. Aõbo tebòrònyõtenyete tahe bibutunyke. Juhuu inyõ raaõmysỹdỹre: —Kaiboho tahe iraty temytenyete.

39 Tahe hãwyy òraru-ki sòwemy Samaria hãwã mahãdu rityhynyre. Hãwyy rarybere juhoo: —Tiki wakoku relykyre ibutumy anohebo ratỹkỹnymahãre walananonanamy relykyre. Kia rybe òraru-ki tahe rityhynyrenyre.

40 Samaria hãwã mahãdu tahe Jesuisi-ò rexitònyre tii-wana roirekemy. Tahe Jesuisi tii-wana inatxi txumy riwyyre.

41 Sòwemy tahe rityhynyre Jesuisi Rybe òraru-ki.

42 Tahe hãwyy-ò rarybere. Wiji tahe arybe òraru-ki aõkõ retyhynyreri. Tamy tyhy-ò jiarỹle raholare, tahe reeryre tii bede iny tarasadu tyhymy raremy.

43 Inatxitxu-di tahe Samaria-ribi rare Kalileia bede-ò.

44 Jesuisile dori rarybere: —Deuxu rybeduõ uladumy ijirana bede-ki iny rityhynyõhymyhỹ. Tiu tamy wowydynaõ riwahinyõtyhy.

45 Kalileia mahãdu juhoo Jerusalẽ-ò tule roirenyre, worana bedehesi rỹimyhỹraò. Ibutumy aõbo Jesuisi riwinyra heka tiiboho reteherenyre. Tai Jesuisi tasubede-ò rehemynyre tiiboho awimy ridyrenyre.

46 Tahe ixityre Jesuisi rehemynyre Kana hãwã-ò. Juhoo tai bee riwitxi-ranyre vỹ monamy wahe. Bede dinodu aõmysỹdỹdu Kafanaõ-ki rasỹnyre.

47 Jesuisi Kana hãwã-ki ratxirerimy hãbu roholareu, tamy rara. Tariòre dori ibinamy roire taheto-ki. Jesuisi-ò hãbu rarybere: —Manakekõ aõbo waheto-ò wariòre biteytekemy.

48 Jesuisi rirawyònyre: —Kaiboho bede aõmydỹnana wiwihikỹ tetehteny-teule tetyhynytenyete.

49 Hãbu heka Jesuisi-ò rarybere: —Wanyrỹ, wylemy manake wariòre rukreko-txi.

50 Jesuisi rarybere: —Bòòseke, ariòre dori awimy relera.

⁵¹ Tahe tii Jesuisi rybe rityhynyra tai ròsere taheto-ò rakemy. Ijõ txu tahe ryro-ki teòdu-wana witxi reare. Tii rarybere: —Ariòre reytera ahatokile.

⁵² Hãbu ritÿÿraxinyre tiubo reytera. Tahe relyyre. Kaule, txutyeyu reytera.

⁵³ Jesuisi rarybereu, kiaule iriòre reytera. Hãbu rieryre. Tai tahe idi ibutumy hãbu sÿmahãdu Jesuisi rityhynyre.

⁵⁴ Kia tahe Jesuisi inatxina aõna aõna wiwihikÿ iny itxeranamy riwinyre Kalileia bedeki.

5

¹ Iribi tahe judeu mahãdu worana bedehesimy rÿimyhÿ. Tai tahe Jesuisi rare Jerusalẽ-ò.

² Hãwã-ki tahe hãloo ibedÿÿ roimyhÿ budoeni ryijò iòhò-ki rÿimyhÿ. Beteta inire, hebraika rybe ini rare, judeu rybe wahe. Iruyre iwòtena ube iwerora-ki rÿire.

³ Sõwemy webinadu ube-ò wii rotyre, iny ruetà ijõre, iny tiere ijõre, inytibina ijõre.

⁴ Tiiboho ÿjuõ riraòmyhÿre. ÿju beò rerireu tahe raukÿre. Mobo juhu itxi resekeki tahe, tii reytemyhÿre.

⁵ Hãbuõ 38 beòramy ibinamy roimy raremyhÿ.

⁶ Jesuisi tamy retehereu, rieryre tiwesebeòrabo ibinamy roimy rare myhÿ. Tahe tamy rarybere: —Kai aõbohe beytekekõ.

⁷ Hãbu dirawyònyde: —Aõkõre Wanyrÿ, wawiòhedÿÿduõre. Bee rex-iukÿnyrau, ijõ wako-ò ralòmyhÿre.

⁸ Jesuisi tamy rarybere: —Myikewa, abyre bimyeke, mariake.

⁹ Aõwesele hãbu rÿimy reare, awimy. Tabyre rimyre tahe rariare. Kia txu tahe sabado txu rare. Kia txu tahe judeu aõmysÿdÿÿna txu aõkõ rare.

¹⁰ Tai tahe judeu mahãduõ tamy rarybere: —Abyre-di riraõmy, sabado txu dori òbiti aõkõ rareki.

¹¹ Tahe dirawyònyde: —Wadeytedÿÿdu wadee rarybere wabyre arimykemy.

¹² Tahe tamy rÿÿraxire: —Mobo adee rarybere abyre bimykemy idi mariakemy.

¹³ Tahe hãbu deytedu rieryõre mobo rare. Jesuisi dori dexitade iribi. Sõwemy iny tai rÿimyhÿ.

¹⁴ Deuxu dohodÿÿna heto-ki Jesuisi idi hãbu-ki rahara. Tamy rarybere: —Kai teyteta, inatyhy. Tai tahe aòraruna biixãwidinyke, aõbinatyhy aõhe adee rotÿÿnyheny.

¹⁵ Hãbu tahe rare. Judeu mahãdu-ò rarybere, mobo teytedÿÿdu raremy, Jesuisi wahe.

¹⁶ Tai tahe judeu mahãdu Jesuisi ibinamy rexidelenymy rarybere, sabado txuu kia riwinyreki.

¹⁷ Jesuisi tahe rarybere tamyreny: —Waha, Deuxu aõu raaõmysÿdÿÿre, jiarÿ tulere.

¹⁸ Tai tahe sõwemy irubudÿÿmy rurumyhÿre. Sabado txu bedeki ywina-ribi tii riwinyõre. Tule Jesuisi Deuxu wesemy rexioire, Wahamy dori rarybemihÿreki.

¹⁹ Tai tahe Jesuisi tamyreny rarybere: —Jiarÿ ixi-di aõkõ aõmydÿÿnanamy ratÿÿnymahãre aõbo Waha riwinymyhÿre, jiarÿ tule rewinywãhãre iweselemy.

²⁰ Waha Deuxu dori waluure. Aõbo riwinyre wadee riteòsinyre, tai tahe aõruxerahakÿtyhymybo bobibenykre, idi bedeki biòtiinybenykre.

21 Waha Deuxu dori rubu-ribi iny riixixanymyhÿre. Tai tule jiarÿ iny areixixanyke ixideewikeki.

22-23 Ibutumy iny hitxidÿÿna Waha wadee tuu rarybera, tii dori iny rihitxidÿÿnyõtyhy. Jiarÿle tahe iny ywisidÿÿdumy aròhònykre, tai iwese Deuxu iny riwowydynymyhÿre wesele iny riwawowydynymyhÿkre. Adeereny Deuxu diwateònyde. Tai inyõ riwawowydynyòkeki, tii Deuxu riwowydynyòreri.

24 Inatyhytyhymy adeereny ararybekre. Inyõ warybe roholakeki, wa-teòdÿÿdu rityhynykeki, tii wijityhyle umytuedeõna ritake, ywisidÿÿduko-ò ròhònyõtyhy, rubu ryribi ròhònyre umy irumy ihÿre ryò iny ralòmehÿre.

25 Inatyhytyhymy adee arelyykre: –Bedeÿÿnana-ki kòhòra, bede dÿÿnanamy reara. Tahe rubu mahãdu Deuxu Riòre rybe-ò roholakre. Roholamy rÿikeu tahe irumy rÿike.

26 Tyby dori iumyõnanaõhyyre wese tule iRiòre rare. Umytuedeõna wedu rare.

27 IRiòre heka hitxidÿÿna wedumy relere. Tii dori Deuxu Riòre Hãbutyhyhykÿ tii rare, jiarÿ wahe.

28 Bedeòtiidÿÿõmy tahe bededÿÿnanamy he reare. Rubu mahãdu wabedey-ki warybe-ò roholakre, tai iribi ròhònykre.

29 Ibutumy aõwibo riwinyre mahãdu kedexixakre umytuedeõnahakÿ-di. Kia ibinamy riwinymyhÿre mahãdu ywisidÿÿdu-ò rexixakre.

30 Jiarÿ ixi-di aõkõ aõmydÿÿnanamy ratÿÿnywãhãre. Iwese Waha-ò raholare wese iny ywisidÿÿmy aròhònykre. Waywisidÿÿna heka òbiti rare. Wadee wimy aõkõ dori tuu watxiwãhãre. Waha wadeòdudeewimy tuu watxiwãhãre.

31 Iximy ararybekeki, inyõ riwatyhynyõtyhy.

32 Iwixira heka tuu rarybereri wamy wahe. Reeryre inatyhy raremy.

33 Kaiboho inywixira teteònytenyete. Joaõ ratysebedÿÿdu-ò rÿÿraxikemy ibutumy kia wamy rarybere inatyhy rare jiarÿ inatyhy rare.

34 Iny wamy rarybemyhÿre, tahe jiarÿle kia reijeõhyymahãre inyle rieryõre wamy rybe, wahe. Tahe kiamy adee relyywãhãre kaiboho ritamy rÿikemy.

35 Joaõ tahe loosòna wesemy raremyhÿ. Tii urihimyò bededÿÿnana ri-toosònymy raremyhÿwesemy tahe kaiboho atximahãtenyete. Idi urihimy-ò teysatenyete iloosòna-di, idi iribi kaiboho terarenyre.

36 Jiarÿ Waha òraru-ki aõmydÿÿnana wiwihikÿ, rewinyamahãre. Kaheka inatyhymy urihixina rare. Joaõ wamy rarybere ratyre heka kaa roire, Deuxu Waha inatyhymy wadeòdu raremy riteòsinyre.

37 Waha wadeòdu wamy tule relyyre. Kaiboho irybe-ò taholaõtenyete tule tii tabiõtenyta.

38 Kaiboho tamy taholaõhyymahãtenyete, tiwatyhynyòteki, jiarÿ dori iteòdÿÿna rare.

39 Tyyriti-ò tetehtenyete iwo-ki dori umytuedeõna-ki mahakemy tahòtinytenyete. Ritidÿÿnakile wamy relyymyhÿre.

40 Ihãrele tahe wadee taõmahãte adeereny umytuedeõna ariwahinykemy.

41-42 Aõmybo wamy iny rarybemahãkeki, aõ aõkõ rare wadee, jiarÿ dori reeryre Deuxu luuna-di aõkõ atxitenyteri.

43 Jiarÿ Wahani-di anade, tahe kaiboho tiwatyhynyõmy wadi ahãte. Inyõ ixideewilemy kanakeki, kaiboho bityhynybenykre.

44 Tai heka tetyhynyõmahãtenyete. Widee dori kaiboho tewowydynymahãtenyete, tahe Deuxu-ribi wowydyna ritakemy terarenyre, sohojihyyre heka Deuxu.

45 Kiamy tahe Waha-ò arelyyòkre, Moisesi tahe relyykre. Moisesi bede ywina dori, araròsònyreny rare.

⁴⁶ Inatyhymy Moisesi tetyhynmahãte-wana tule jiarỹ biwaty-hynymahãke, wamy dori Moisesi ròratidỹre.

⁴⁷ Irybe bityhynyõkeki, timybo warybe bityhynyke.

6

¹ Iribi tahe Jesuisi Kalileia aho-ki ixyby reurore, Teberiaide ahoniõre.

² Tahe sõwemy iny riheludunyre tuu robireki, aõna aõna wiwihikỹ, deyt-edỹna wiwihikỹ robireki.

³ Tahe hãwãlòratyy-ò Jesuisi raòwònyre taerydỹna mahãdu-wana – rorukurenyre tai.

⁴ Judeu mahãdu worana bedehesi rexidelenykemy iòhòre.

⁵⁻⁶ Tahe Jesuisi retehere inysõwehekỹ-ò, tamy rehemynyreriò. Tai Filipi-ò riurihimy rarybere: –Tikibo orotxu tamyreny rikiõbranyke riyrenykemy. Jesuisi rierymyhỹre aõbo riwinykremy ratxireri ihãrele tahe Filipi-ò kia rarybere.

⁷ Filipi tahe dirawyònyde: –Inyõ sohoji sohoji orotxu yre sohoji riykeki, 200 prata womati nieru rakahurenyke ihãre rimoõtyhy.

⁸ Andre Jesuisi erydỹna-ò rare, Simaõ Pedro seriòre rare. Tii tahe Jesuisi-ò rarybere:

⁹ –Weryryboõ kaki ihỹmyhỹ. Iruyre cevada orotxu idi ratximyhỹ, utura inatxi. Kia tahe aõ aõkõ rare inysõwe-ò.

¹⁰ Tahe Jesuisi taerydỹna-ò rarybere: –Tamy marybebenyke ranyrenykemy asityrekile. Tahe rorukurenyre ibutumy. Hãbu 5000 ronyre ijõ inyõ tahe sõwetyhymy rorukure.

¹¹ Jesuisi orotxu rimyre. Deuxumy reàlàre, idi tahe tamyreny riwahinyre. Tule utura-wana wiwesele risỹnomy. Tuu rotỹnyre. Ibutumy heka ix-ideewina rirỹsỹrenyre.

¹² Rihydyrenyre, Jesuisi rarybere taerydỹna mahãdu-ò: –Bibutunybenyke rauhenyra uritere ixinamy itxiwixirenyõkemy idi watxireri. Uritere idi dehurenyõmy.

¹³ Tahe ributunyrenyre iuhe waòinatxi reuròmý weriri ritỹxinyre orotxu yrere-di.

¹⁴ Jesuisi aõwiwihikỹ widỹnamy robirenyreu kiamy tahe raryberenyre. Tii inatyhymy Deuxu Rybedutyhy rare. Juhuu dori tuu rarybere kabede-ò kanakemy. Inyboho tii riraòmýhỹre.

¹⁵ Rõhõtynyrenyre: –Jesuisi inyiòlòrenomy rikimyrenykre. Tamy ròkòirenykre. Iu Jesuisi kia rieryreu, ixisohojilemy rexitare ixyby, hãwãlò-ò.

¹⁶⁻¹⁷ Ibedesou aho ijà-ò ierydỹna mahãdu riberenyre riraòkemy. Bede rurunyre tahe Jesuisi rehemynyõhyre. Tai hãwòõ rimyrenyre idi reuròkemy ijõwe-ribi ijà-ò, Kafanaõ hãwã-ò.

¹⁸ Tahe yhy deborehekỹ tiribi tiribi rebonymyhỹ. Òbò tahe resemyhỹ.

¹⁹ Sohoji urihixina iòhòmý ròireny tahe Jesuisimý robirenyre. Tii betyredile tamyreny nariamý nade. Tiibohe ruberunihikỹrenyre.

²⁰ Jesuisi tamyreny rarybere: –Jiarỹle wa rare, breburenyõmyke.

²¹ Tai tahe hãworo-ò Jesuisi ronykemy tiibohe disỹnydenyde. Aõ wesele tahe rehemynyrenyre tiòbo ròirenyraò.

²² Itxubiòwamy sõwemy iny wii ributunyre aho kanawe-ribi ijà-ki. Hãwò sohojile tahe tai roire aho-ki. Jesuisi erydỹna mahãdu roirenyremý rieryrenyre. Tahe Jesuisi aõkõ idi rare.

23 Tahe hãwòò dehemynydenyde. Teberjade hãwã-ribi Jesuisi tai ratx-
imyhỹ iòhò-ò. Tai juhu Jesuisi rexitòenymy rỹimyhỹ tahe orotxu tamy ri-
wahinyre.

24 Jesuisi iõre tai, ierydỹna mahãdu iõre. Kia tahe iny sówemy robirau,
hãwò-ò rimyrenyde. Iòrysomy roirenyde, Kafanaõ-ò.

25 Kanawe-ribi ijà-ò rehemynyreu, tii-wana witxi reare. Tahe tamy
rỹrãxire. Waerydỹdureny, tiubo kaò tadehemynyte.

26 Aõwihikỹ rewinyremy aõkõ tiwaijetyteri, rỹsỹna adeereny re-
wahinyrakile, tehydymy terỹsỹtenytakile.

27 Rỹsỹna tyhy ituemyhỹre kiaòle aõkõ maaõmysdỹdỹbenyke, tahe iwitxira
rỹsỹnaõ-ò maaõmysdỹdỹbenyke, kia ituedeõna-di aõkõ rare. Deuxu Riòre
Habutyhyhỹ dori adee riwahinykre. Kia rỹsỹna umytuedeõnahakỹ wesemy
rare. Taile tahe Deuxu Waha riwateònyteri.

28 Tahe Jesuisi-ò rỹrãxire: —Timybo iny Deuxudeewimy arotỹnyrenykemy.

29 Jesuisi dirawyònyde: —Kialemy, biwatyhybenyke: —Deuxu dori wa-
teòdỹdumy rare.

30 Tahe raryberenyre tamy: —Aõwihikỹbo inyko-ò biitxeredỹnyke.
Aõhebo botỹnykre, iny aratyhynykre.

31 Inytybyreny orotxu riyrenyde bederaky-ki. Kia wese Tyyriti-ki roire:
—Moisesi tamy orotxu riwahinyre biu-ribi.

32 Jesuisi rirawyònyde: —Inatyhy tyhymy Moisesi aõkõ tamy riwahinyre.
Waha dori biu-ribi orotxu tyhy adee riwahinyre.

33 Deuxu orotxu tahe irutyhymy inydee riwahinyhỹre, biu-ribi di-
wahinyhỹde.

34 Tahe raryberenyre: —Wanyrỹ, tiu kia orotxu bidiwahinymahãkre.

35 Jesuisi iximy rarybere: —Jiarỹ orotxu irutyhymy rare. Inyõ wadee
kanakeki, tiu rama risaõtyhy. Inyõ riwatyhynykeki, tiu bee risaõtyhy.

36 Adeereny heka rarybere: —Wamy tabitenyde, ihãrele tiwatyhynyõtenyde.

37 Ibutumy iny Waha wadee riwahinyhỹre wadee kanakre. Tiu ixi-ribi
ariteònyõtyhy.

38 Adobehede dori aõ ixideewimy aõma arotỹnyrenykemy aõkõ.
Wadeòdỹdumy arotỹnyrenykemy watxiwãhãre.

39 Tiu ariõnonyõtyhy wadee diwahinydeò kiaboho ibutumy ikonana txuu
rubu-ribi ariixixanykre. Kia tahe wadeòdỹdumy deewimy rare.

40 Inatyhymy Waha deewimy kia rare. Iny iRiòremy robireu, rityhynykeu,
umy tuedeõna ritake. Ikonana txuu tahe rubu-ribi ariixixanykre.

41 Jesuisi rarybere: —Jiarỹ biu ludu orotxu rare. Tai tahe judeu mahãdu
aõbina binahakỹlemy rarybemyhỹre.

42 Kia wese rarybemyhỹre: —Kaa Jesusile rare. Jyje riòre rare. Tyby he ijoi
eryna rare ise tule. Aõherekibo tii rarybereri biu-rubu nademy.

43 Tahe Jesuisi dirawyònyde: —Tuu wamy ryberenyõmyke ayludurenymy.

44 Wadeòdỹdumy iny wadee rayky-ò rarybemyhỹre namyhỹde. Kia wesele
iny wadee kedehemynykre, ikonana txuu tiiboho rubu-ribi ariixixanykre.

45 Deuxu rybedu Tyyriti-ki kia rybe rỹire:

—Deuxu ibutumy iny ribedeerydỹnykre.

Tai tahe Waha-ribi iny rierymy roholamyhỹre, tii tahe wadee rehemynykre.

46 Inyõ Wahamy robiõhymyhỹre jiarỹle tahe tuu rabimahãre, iribi anadeki.

47 Inatyhytyhymy adee rarybemahãre. Inyõ riwatyhynykeki, umy
tuedeõnahakỹ tiwanale ratxireri.

48 Jiarỹ orotxu wesemy jiarỹ rare. Umytuedeõna wahidỹdumy jiarỹ rare.

49 Boreny dori biu-ribi orotxu riyre bederahy-ki. Irabihyy ibutumy tiiboho ituerenyre.

50-51 Jiarỹ tahe biu ludu orotxu wese rare, inyõ tahe kia orotxu riykeki, tiu ruruõtyhy. Waumy ariwahinykre rubu-õ ibutumy iny òraruna òwydỹỹmy. Tamyreny umytuedeõna riwahinykre rubu-õ ibutumy iny òraruna òwydỹỹmy. Tamyreny umytuedeõna riwahinykre.

52 Judeu mahãdu tahe txiõdỹỹna rybemy widee raryberenyre: –Timybo tadelemy inyboho riõwenyrenykemy wahe.

53 Jesuisi rirawyõnyre: –Inatyhytyhymy adee ararybekre. Kaiboho Deuxu Riõre Hãbutyhyhykỹde birõõbenykeki, umytuedeõna bitabenyõtyhy. Ihãlubu biõbenykeki, umytuedeõna-di aõkõ atxitenyteri.

54 Inyõ waderòdu wahãlubumy momodu tii umytuedeõna-di ratxireri. Tii tahe ikonana txuu rubu-ribi adiixixanykre.

55 Wade heka juhu irònatyhy rare, wahãlubu tu monatyhy rare.

56 Inyõ wade rirokeki, wahãlubu riõkeki, wawana tiuhyy ratxireri. Jiarỹ tule tii-wana watxihyyreri.

57 Waha irumy ratxireri. Tii wadeòdỹỹdu rare iòraru-ki warumy watxireri. Tule waderòdu irumy ratxike waòraru-ki.

58 Jiarỹ biu ludu orotxu inatyhy jiarỹ rare. Iwese bederahy orotxu heka boreny riyrewesemy aõkõ jiarỹ rare. Ihãrele tahe ituerenyre. Inyõ riwaykeki, rexixahyymy rarekre.

59 Kia ibutumy Jesuisi rarybere Kafanaõ judeu dohodỹỹna-ki, riery-nanymyhỹreu.

60 Iribi tahe Jesuisi-ò ijohona mahãdu rarybere:

–Kia isira tyhyre iny rieryke. Inyõ heka kia rityhynyõtyhy.

61 Jesuisile heka rexierymyhỹre tiiboho tuu rarybemyhỹreki, tahe tamy rỹỹraxire:

–Kaa aõbohe arabinadỹỹnyrenyke.

62 Tahe jiarỹ Deuxu Riõre Hãbutyhyhykỹ, ixyby biu-ò aròðsekeki, timybo marybebenyke, kaiboho wamy bobibenykeki.

63 Deuxu Tyytybytyhyle umytuedeõna riwahinyhỹre. Umydetyhy umytuedeõna-di aõkõ rare. Urile adee rarybemahãre Deuxu Tyytybytyhymy rybena rare, adeereny umytuedeõna rare.

64 Tahe inyõ ayreny ludu riwatyhynyõreri. Jesuisi tahe juhoo-ribi rierymyhỹre mobo rityhynyõmyhỹre, tule mobo tatxiõdỹỹdumy rarekremy.

65 Jesuisi raryberehyymy tii-wana: –Jiarỹ juhoo rarybewãhãre. Inyõ Waha wadee riteònyõkeki tiu wadee kanaõtyhy. Tai heka tuu adee jiarỹ rarybere.

66 Kia rybe òraru-ki sõwemy taerydỹỹna mahãdu ririrenyre. Tahe roirenyre.

67 Tahe Jesuisi rỹỹraxire taerydỹỹna waòinatxi reurò mahãdu-ò. Ka bexe boibenyõkre aõbo biwaribenyõkre aõbohe.

68 Tahe Simaõ Pedro rirawyõnyre. Wanyrỹ moobo aròirenykre. Kaile heka umytuedeõna rybe-di atxiteri.

69 Jiarỹboho ka aratyhynymahãrenyre. Araeryrenyre ka, kai Deuxu-ribi hãbu òbitityhymy atximahãte.

70 Jiarỹ aratarenyre waòinatxi reurò inymy erydỹỹna mahãdumy. Ihãre tahe inyõ ratximyhỹre diaboõ heka tii rare.

71 Jesuisi tahe Judasi Isariòmy rarybereri. Iwò inatxinamy wahe. Simaõ-Isariò riõre tii rare. Judasi dori Jesuisi riwahinykremy ratxireri iòludu mahãdu-ò.

7

¹ Judeu mahãdu Jesuisi rubudÿÿmy rurumyhÿre. Tai tahe Judeia bedede ludu hãwã-ò ralòomyhÿre. Kalileia bedede hãwãdile rariamyhÿre.

² Tahe judeu mahãdu worana bedehesi iòhòmy rÿimyhÿ. Kiani tahe heto riòre worana bedehesi rare.

³ Tahe Jesuisi seriòreboho tamy rarybere: —Make wa karibi Judeia mahãdu bedede-ò aerydÿÿna mahãdu dori aõwiihikÿ kai tewinyteò tuu robikemy.

⁴ Aõwiihikÿmy tewinyteri, tai tahe ixinamy iny tuu ibutumy robikre. Ibutumy iny ixierysymy tahòtinyteri-wana urile iny lau iwòteòmy aõna aõna wiihikÿ.

⁵ Jesuisi seriòre mahãdu tule rityhynyòre.

⁶ Jesuisi tahe dirawyònyde: —Wiji araòkre wabededÿÿnanamy dori tuu reaòmy ratxireri. Kaiboho tahe adohotalemy bòike.

⁷ Bedede ludu mahãdu iny dori aluurenyre, tahe waderamy rekoarenyre. Iòrarunamy dori jiarÿ tamy rarybemahãre, ibinatyhyremy.

⁸ Kaiboho boibenyke worana bedehesi-ò. Jiarÿ tahe wiji araòkre, wabededÿÿnanamy reaòmy doimyhÿde.

⁹ Kia tahe Jesuisi tamyreny rarybere. Tahe Kalileia-ribi Jesuisi ròhònyòmy rÿimyhÿre.

¹⁰ Tahe iseriòre roirenyre worana bedehesi-ò. Idi tahe tule tii rare iherenymy itÿnymy aòkò wahe, wasimy inyò tuu robiheny.

¹¹ Judeu mahãdu tahe Jesuisi riijemyhÿre worana bedehesi òrake-ò. Rarybemyhÿre: —Titxibo tahe tii ratximyhÿre.

¹² Jesuisimy rybe ixitxiòdÿÿna ròhònyre inysòwehekÿy-ki. Inyò heka awimy tuu rarybemyhÿre. Ijò tahe ibinamy tuu rarybemyhÿre, tii iny itxenadÿÿdu raremy.

¹³ Inyò tuu rarybeòhyymyhÿre ibutumy ijohonamy judeu mahãdu lau ru-berureki.

¹⁴ Worana bedehesi tya-ki Jesuisi Deuxu dohodÿÿna heto-ò ralore ribedeerynykemy.

¹⁵ Ribedeerynyre tahe judeu mahãduò ijò-ò rarybere: —Timykibo he kia ritidÿÿna rierymy tuu rarybemyhÿre. Rierykò ihãrele iny rierynanyimyhÿre.

¹⁶ Tahe Jesuisi dirawyònyde: Waerydÿÿna-di aòkò rebedeeryre, Deuxu wateòdÿÿdu rybe-di wahe.

¹⁷ Inyò Deuxudeewimy ratxikeki, tii rierykre aòerydÿÿnabo òbitimy ratxireri. Tii rierykre Deuxu-ribi aòbo rarybereri ada ixi-ribi rarybereri.

¹⁸ Iny ixi-ribi rarybekeki, tiile rexiloosònanyke. Tahe iny iteòdÿÿdumy rarybekeki, tii tahe inatyhy rare. Tii inatyhymy òbiti rare.

¹⁹ Moisesi adee bedede ywina riwahinyre: —Tahe kaibohoò tetyhynyòhyymahãtenyte. Tai tahe aòherekibo biwarubunyky atxitenyteri.

²⁰ Tamy inyò dirawyònyde. Kaita itxÿteteri. Inyò ka ararubunyky aòkò ratxireri.

²¹ Jiarÿ inyò reteytenyre sabado txuu tahe kaiboho wadi bedede teòtiinytenyte.

²² Boholake, Moisesi bedede ywina arateònyke ariòre ritòtyky aròkemy resynanykemy. (Boboho tahe kia tuu ritelenyre Moisesi aòkò.) Tahe notyky resyna txu rÿikeki, tuu tewinyte sabado txu hãrele.

²³ Kia sabado txu biwinybenykeki Moisesi bedede ywina riywinykemy, tahe aòherekibo wadee taykarananyteri hãbu sabado txu reteytenykeki.

²⁴ Aò òbitimy aòkò rare, òbitimy tahòtinyterikile. Òbitinale-di maraykynybenyke.

²⁵ Ijò Jerusalẽ hãwã ludu mahãduò rarybere:

26 –Kia rarybemy rÿirerile, tii irubudÿÿmy rexinohõtinyreri. Beteheke. Butumy ijohonanamy kia rarybemyhÿre. Ihãrele taheka inyõ tamy rarybeõhyymyhÿre. Wedu mahãdu rõhõtinymyhÿre: –Ina aõkãbo Kristumy inatyhymy tii rare.

27 Inyboho tahe rierymyhÿre titxiribibo tiò namyhÿde. Kristu Deuxu deòdÿÿna tahe kanakeu, inyõ tahe rieryõtyhy titxiribibo kanake.

28 Jesuisi tahe Deuxu dohodÿÿna heto-ki ribideerynymyhÿreu rarybere: –Kaiboho tiwaerytenynte, titxiribibo anade tule teerytenynte. Tahe wateòdÿÿdu teeryõtenynte. Teròwumy heka jiarÿ anade. Tule tii inatyhytyhymy rare.

29 Iribi jiarÿ anade Tii riwateònyre, tai jiarÿ tii reeryre.

30 Inyõ riijemyhÿ riròtenykemy. Tahe rimyõhyre ruberureki, ibededÿÿnanamy aõkõ bede rÿireki.

31 Iny sõwehekÿ-ribi sõwemy iny rityhynyre. Tahe inyõ rarybere: –Kristu Deuxu deòdÿÿna iratyre aõna aõna wiwihikÿ riwinykemy tahõtinyteri. Aõkõre, tii dori inatyhymy Kristu rare.

32 Fariseu mahãdu kia-ò roholareu, tahe wii ributunyre xiwe wahidÿÿdu wedu mahãdu-wana. Tahe tiiboho soldadu mahãduõ riteònyrenyre Jesuisi rinykemy.

33 Jesuisi tahe tamyreny rarybere: –Urihimyò umyreny-wana watzikre, idi ta aròðsekre wateòdÿÿdu-ò ixbyby.

34 Kiaboho biwaijebenykre, waki mahabenyõtyhy. Titxibo watzireri kia-ò heka bitehemynyõtyhy.

35 Judeu mahãdu tahe widee rarybere: –Titxiwexe tii rakremy ihÿre, tuu rokobirenyõtyhy tai rakaharenyõtyhy, myÿ rarybemyhÿre wahe: judeukõdu mahãdu bede-ò aõbo rakremy ixi-di ratxireri. Tai ribedeerynykemy, judeu mahãdu-wana rasÿnykremy.

36 Timybohe rarybere: –Waki mahabenyõtyhy, titxibo watzireri-ò behe-myhyõtyhy, myÿ rarybereri.

37 Ihewotxu worana bedehesi aõnihikÿtyhy rare. Jesuisi iu rexiukÿnyre rarybekemy: –Inyõ bemomy risakeki, wadee kanake, riõke.

38 Inyõ riwatyhynykeki, Tyyritina-ki kia wese rybe rÿire:

–Iwo-ribi benihikÿ iru ròhònyke.

39 Iu Jesuisi kia rarybereu, Deuxu Tyytybytyhy aõmy dÿÿnanamy rarybere. Iny dori rityhynykeki, iwo-ò Deuxu Tyytybytyhy ralõke. Urile tahe Deuxu Tyytybytyhy riwahinyõmy rÿire. Jesuisi dori ròðseõre biu-ò.

40 Tahe roholare mahãdu tahe rarybere: –Ka heka hãbu Deuxu Rybedutyhy rare.

41 Ijõ tahe rarybere: –Tii Kristu rare. Ijõ tahe rarybere: –Kristu aõkõ Kalileia bede-ribi dori tii rareri.

42 Tyyritina rybe-ki roire: –Kristu, Davi sÿ-mahãdu ribi kanakremy. Belẽ hãwã-ribi; titxibo Davi rasÿnyre-ribi.

43 Tai tahe wiwese wese aõkõ rõhõtinyrenyre Jesuisi-di.

44 Inyõ riròtenykemy ixi-di ratximyhÿ, ihãrele tahe inyõ rimyõhyre.

45 Tahe soldado mahãdu ròðsemy rare rimyõhyylemy fariseu mahãdu-ò xiwewahidÿÿdu mahãdu wedu-ò. Tahe soldado-ò rÿÿraxirenyre: –Aõherekibo tedyõteri.

46 Tahe dirawyònyde: –Timybo inyõ kowa hãbu wesemy rarybeõhyre rybe iwitxira wihikÿmy tii rarybere.

47 Tahe fariseu mahãdu rarybere: –Kaiboho aõbo tule araitxenanyrenyra.

48 Inyboho mahãdu reny-ribi moõ rityhynyõhyymyhÿre, fariseu mahãdu wahe, wedu mahãdu wahe.

⁴⁹ Inyõ rityhynyre, tahe tiiboho Moisesi bede ywina rieryõre tai Deuxu aõhõkỹmydỹnana-txi idi rehukre. Aõhõkỹmydỹnana-ò ritamadỹnykre.

⁵⁰ Nikodema iyreny-ki ratximyhỹ. Fariseu mahãduõ tii rare, juhoo Jesuisi raraõ rare wahe. Tii heka rarybere imahãdu-ò.

⁵¹ Juhoo roholamyhỹre aõhebo rotỹnyraò wahe idi tahe ibinakeki riròtenykremy riijemyhỹre. Kia tahe iny bede ywinareny rare.

⁵²⁻⁵³ Tahe rirawyònyreny: —Kai wa tule Kalileia mahãduõ atxiteri. Tyyriti-ò beteheke timybo rarybereriò: —Kalileia-ribi rybeduõ ròhònyõtyhy wahe.

8

¹ [Tahe ibutumy he tasỹ-ò reareare. Iu tahe Jesuisi rare Oliveira hãwãlò-ò.

² Biura-di tahe dòsede Deuxu dohodỹna heto-ò ixiby. Sõwemy iny tamy rare; Jesuisi ronyre; ribedeerynyre.

³ Hãwyyõ ratximyhỹ hãbu wixiraõ-wana wasimy ratximyhỹ. Tahe in-wixiraõ itxireny reare. Tai tahe Deuxu rybe erydỹdu mahãdu fariseu mahãdu-wana hãwyy didyde Jesuisi-ò. Tahe hãwyy-ò rarybere rỹkemy iny sõwehekỹ-ki.

⁴ Tahe raryberenyre Jesuisi-ò: —Bede erydu: —Kahãwyy tỹwe rare inyõ itxi reara.

⁵ Iny bede ywina Moisesi riwawahinyré tahe rarybere mana-di rummyhỹkemy. Tahe aõmybo kai mynarybeke.

⁶ Tiiboho kiamy rarybere Jesuisi riurihire timybo rarybekemy. Tai tahe ib-inamy tamy rarybekemy idi ratxireri. Jesuisi tahe suò resera ròritidỹkremy tebò-di suki riritinyra.

⁷ Tahe ritỹraxinyhy ihỹmyhỹ. Tahe Jesuisi rỹire; rarybere: —Inyõ òrarukõmy ratxirerile, tii mana-di juhoo tamy rehukre.

⁸ Ixityrele sỹ Jesuisi ròritidỹre suò.

⁹ Kia rybe-ò roholarenyre, tahe rexitarenyre sohoji sohojilemy, tarayky dori ribinadỹnyrenyra. Matuari mahãdu tahe juhoo rexitare. Ikonanatyhy dori rare, tahe Jesuisi hãwyywanale tai rỹire.

¹⁰ Jesuisi retehere: —Hãwyy sohojilemy robire rỹraxire tamy: —Hãwyy, titxibo mana-di arubudỹmy rybedu mahãdu rirahura. Inyõ aõhe arasỹnyõhyra.

¹¹ Tahe dirawyònyde: —Anokõre, Wahĩ. Tahe Jesuisi rarybere: —Jiarỹ tulere! Mahe, òraruna-txi tahe ixiby ixeyõmy.]

¹² Ixityre Jesuisi rarybere tamy: —Jiarỹ wabede loosõna rare. Inyõ wahemy kanakeki, bede luru-ki rariaõtyhy. Tii heka loosõna-di tarayky-ki rarekre.

¹³ Tahe fariseu mahãdu tamy rarybere: —Aõkõre, kai wa iximy tarybeteri tai tahe arybe inatyhymy aõkõ rare.

¹⁴ Jesuisi dirawyònyde: —Inatyhymy iximy rarybereri jiarỹ, tahe warybe inatyhy rare, jiarỹ dori reeryre titxiribibo anade, tule tiobo arakre reeryre. Kaiboho tahe kia teeryõtenyte.

¹⁵ Kaiboho waywisidỹmy tadiòlònyte, ihãre tahe òbitimy tiwaywinytenyõte tiwaerytenykõteki. Tahe jiarỹ inyõ reywinyõreri.

¹⁶ Jiarỹ inyõ ariwinykeki, waywisidỹna tahe òbiti rare. Jiarỹ dori ixi-wanale aõkõ rare. Waha, wadeòdỹdu wawana raremyhỹ.

¹⁷ Abede ywina-ki kia rybe riritinymy rỹimyhỹre: —Inatxi hãbumy wiwesehyylemy rarybekeki kia tahe inatyhy rare.

¹⁸ Jiarỹ iximy rarybemahãre tule Waha wadeòdỹdu wamy adeereny rarybemyhỹre.

19 Tahe tiiboho Jesuisi-ò rỹraxyrenyre: –Titxibo boo ratximyhỹre. Jesuisi rarybere: –Kaiboho tiwaerykõmahãtenyte, Waha tule teeryõmahãtenyte. Kai biwaerybenyõkeki, tule Waha bierybenyõtyhy.

20 Kia Jesuisi rarybere Deuxu dohodỹna hetowo-ki, iubeweri yrubudỹna ube-ki. Tahe inyõ rimyõhyre, ibededỹnanamy aõkõ bede rỹireki.

21 Iribi tahe ixityre tamy rarybere: –Jiarỹ he arakre karibi. Kaiboho biwaijebenkyre tahe aõrarurenydile burubenykre. Boiõtyhy titxibo arakre-ò.

22 Tai tahe judeu mahãdu widee raryberenyre: –Inatyhymy aõbo tii rexirubunykre. Tii raryberaki: –Titxibo arakremy boiõtyhy, myki tuu idi rõhõtinyrenyre.

23 Tahe Jesuisi rarybere: –Kaiboho kaludu toite; jiarỹ aõkõre, biu ludu rare. Kaiboho bede ludu toite, jiarỹ tahe kabede ludu aõkõ jiarỹ rare.

24 Tai heka adeereny rarybereri aõrarureny-di burubenykremy. Inatyhymy jiarỹ tii rare: –Iwese rarybere wesemy. Tahe kia warybe bityhynyõbenykeki, aõrarureny-di burubenykre.

25 Tahe tiiboho rỹraxyrenyre Jesuisi-ò: –Mobo he tate. Jesuisi dirawyõnyde: –Timybo adeereny rarybewãhãre, juhoo wahe.

26 Jiarỹ sõwemy rỹire aõna aõnamy umyreny ararybeke umyreny ariywinyke ta ararybekre Waha tuu wadee rarybelemy. Tii diwateõnyte tii inatyhymy rare. Irybelemy bede iny-ò ararybekre.

27 Rieryõhyre tamyreny rarybere, tybymy.

28 Kaiboho heka biwatamadỹnybenykreu, bierybenybenykre mobo jiarỹ rare. Tule ixi-ribi aõkõ aõna aõna rewinywãhãre bierybenykre; tule iwese Waha riwaerynanymyhỹre wese, rarybemahãre. Kia tule bierybenykre.

29 Wateõdỹdu wawana raremyhỹ. Iximy riwariõtyhy, jiarỹ tamy wimy rewinyhyymahãreki.

30 Kiamy tarybe rahudi tahe, sõwemy iny rityhynyre.

31 Judeu ityhydỹdu mahãdu-ò Jesuisi rarybere: –Kaiboho warybe tyhy-di mohõtinybenyhyykeki, inatyhymy watyhydỹdu waheludumy boibekre.

32 Inatyhyna tahe bierybenykre. Kia dori aratarenyke, deõdumy aõkõ boibekre.

33 Dirawyõnydenyde aõkõre inyboho Abraõ riòkõre roire, tiu heka modeõdumy roirekõmahãre. Timybo tarybeta: –Deõdu-ribi riwatakemy.

34 Tahe Jesuisi tamy rarybere inyõ õraru-di hyy rexiõrarunykkeki, tii õraruna deõdu wese hyyle rare.

35 Deõdu heka heto wedu ijoihyymy aõkõ rarekre. Iwedu ixinamy rakre. Riõre tahe ijoihyymy rare.

36 Tahe Deuxu Riõre heka ixinamy arateõnykeki, tiu õraruna deõdu wesemy ixyby bonybenyõtyhy.

37 Abraõ riòkõre inatyhymy toite. Kia tahe reeryre. Ihãrele tahe biwarubunybenykemy atxitenyteri warybe dori araykywo-di aõkõ ratxireri.

38 Waha-wana ranymahãu, aõmybo rabire, wiji tuu rarybereri. Kaiboho tule boo-ribi tabitenyte tuu tewinytenyteri.

39 Rirawyõnyrenyre: –Wahareny heka Abraõ rare. Jesuisi rarybere: –Abraõ riõremy inatyhymy toite-wana, Abraõ aõmydỹnana iwesemy biwinybenyke.

40 Katahe warubudỹmy wadi atxitenyteri. Inatyhyna Deuxu-ribi raholarem, adeereny rarybemahãre, tai tahe warubudỹmy atxitenyteri. Abraõ tahe tiu tahe tuu rotỹnyõtyhy.

41 Kaiboho heka borenityhy wesele tatỹnymahãtenyte. Dirawyõnyde: –Aõkõre, jiarỹboho waxiriõre aõkõ roire. Deuxuhyyle iny tybyreny rare.

⁴² Tahe Jesuisi rerawyònyre: —Deuxu boo inatyhymy rare-wana inihe kaiboho waluurenyre. Jiarỹ dori Deuxu-ribi anade. Ixidee wimy aõkõ anade tii diwateònyde.

⁴³ Aõherekibo teerytenyõte warybe. Isiratyhyre aõbo ijohona. Aõkõre, ityhydỹ isirare adeereny.

⁴⁴ Kaiboho Diabo riòre toite tamywimy biwinykemy atxitenyteri. Tii juhoo rubudỹdu hyy rare. Tii heka raruireri inatyhywesehekỹle wahe. Tii ruidu rare. Ruiwedu tii rare.

⁴⁵ Kaiboho heka tiwatyhynyõhyymahãtenyete inatyhyna dori jiarỹ rarybe-mahãre.

⁴⁶ Inyõ inihe wamy rarybeõtyhy jiarỹ òrarudu raremy. Adeereny inatyhynamy rarybereri. Aõherekibo tiwatyhynyõteri.

⁴⁷ Iny Deuxu-ribi ratxireri, Deuxu rybe roholamyhỹre. Kaiboho Deuxuhõrõ aõkõ toite. Teòdu aõkõ toite. Taita warybe-ò taholaõteri.

⁴⁸ Jesuisi-ò tiiboho dirawyònydenyde: —Inatyhymy rarybewãhãreny. Kai Samaria mahãdu tate. Kaludu mahãdu aõkõ tate. Kai tyytybybina dire.

⁴⁹ Jesuisi rirawyònyre: —Aõkõre, tyytybybina-di aõkõ watxireri. Waha tahe rewowydynywãhãre. Kaibohole tiwabinadỹỹnymahãtenyete.

⁵⁰ Wowydyna ixi-di aõkõ reijereri. Waha tahe kia aõmydỹỹnanamy riywinykre, tii rierymyhỹre.

⁵¹ Inatyhytyhymy adee ararybekre: —Inyõ warybemy reòbykeki, tiu rubumy tii robiõtyhy.

⁵² Tai judeu mahãdu rarybere: —Katahe inatyhymyhe inydeereny aerysydỹna rỹira tyytybybina-di tate wahe. Abraõ tahe rurure; Deuxu rybedu tule. Tahe timybo kai tarybeta: —Inyõ warybemy reòbykeki tiu rubu urihixinamy roiõtyhy tamy.

⁵³ Kai aõbo inytybyreny Abraõ ratyre awikemy aõbo ixi-di tahõtinyinmahãte. Abraõ rurure Deuxu rybemy rybenadu amahãdu tule rurure. Mobo raremy he tahõtinyinmahãte.

⁵⁴ Tahe Jesuisi rirawyònyre: —Jiarỹ ixi-di wowydyna ariijekeki, tahe wawowydyna aõ aõkõmy rareke. Waha tahe riwawowydynymyhỹke aDeuxumy raremy tu tarybeteri.

⁵⁵ Tahe aõkõ teeryõtenyete. Jiarỹ tate reerymahãre. Jiarỹ reeryõmahãremy ararybekeki, tai ruidumy rareki, iwese kaiboho toite wesele wahe. Tahe reerywãhãre, tule irybemy reòbymahãre.

⁵⁶ Boreny Abraõ, wamy dobide, wabededỹỹnana kanakremy tuu dobide, wabededỹỹnana kanakremy tuu dobide tai tahe reysatyhymy rare.

⁵⁷ Tahe judeu wedu mahãdu rarybere: —Kai 50 beòramy aõkõ atxiteri timyreki tarybeta Abraõ tabitemy.

⁵⁸ Jesuisi dirawyònyde: —Abraõ reaõule, Jiarỹ rarehyymahã.

⁵⁹ Tahe manadile rimymy resereny idile rirabunyky. Jesuisi tahe rexiwòm y iribi ròhònymy rare, dohodỹỹna heto-ribi.

9

¹ Jesuisi rariamy rareu, tii robimy rare hãbu ruetàm y. Tii iruetàhàkỹmy ratohouãm y herinanyre.

² Ierydỹỹna mahãdu rỹỹraxire tamy. Erydỹỹdu, aõherekibo hãbu ratohouãn yruetymy, ise tyby iòrarudireki aõbo ada taòrarumy aõbo.

³ Tahe Jesuisi rirawyònyre: —Tahe aõkõre tyby ise-ke aõkõ tiike aõkõ. Deuxu ruru wiji riteòsinykremy tahe tii kiawesemy rohonyre.

⁴ Wateòdỹỹdu aõmydỹỹnanamy arotỹỹnyrenykemy watxiwãhãrenyre. Iny-boho rikiwinyrenyke ibededỹỹnanamy rỹikreu, iwese txumy rỹikre wese tahe rummy heka kanakre tai raaõmysỹdỹỹõmyhỹre.

⁵ Kabede-ki watxiwãhãreòle tahe jiarỹ bede ludu mahãdu loosõnatyhymy jiarỹ rare.

⁶ Tarybe rahudi tahe rarybexinyre suò idi tahe subororomy ritxienyre. Idi ta hãbu rueyre-ò subororo ritidire.

⁷ Tahe hãbu ruetà-ò rarybere: —Make wa bexisuhòke Silòe ahobe-di. Silòemy ninadu heka iny rybe-ki deòdỹỹna wesemy rare. Hãbu tahe rare, risuhore, dòòsede robimy.

⁸ Tahe ierydu mahãdu, tuu robire idi itxeredu mahãdu raryberenyre widee: —Kabe hãbu ixitòedỹỹdu rare, nierumy kowa-ki rexitòenymy rononymhỹre rare.

⁹ Ijõ rarybere tule rare. Ijõ rarybere: —Aõkõre, iwesele tahe iwitxirari.

¹⁰ Rỹỹraxirenyre tamy: —Timykibo arue reytera.

¹¹ Rirawyònyre: —Hãbuõ Jesuisi inire. Tii tahe suboro borole riwinyra warue-ò ritidire. Tahe wadee rarybera: —Make Silòe ahobe-ò aõ bisuhòke. Tahe rare, resuhore, tai rabimy watxireri.

¹² Rỹỹraxirenyre titxibo tahe tii rara. Rirawyònyra: —Reeryõre.

¹³⁻¹⁴ Kia ruedeytena Jesuisi riwinyre sabado txuu, judeu aõmysỹdỹỹna txu aõkõ. Tahe tiiboho hãbu ridyrenyre fariseu mahãdu-ò.

¹⁵ Ixityre hãbu-ò rỹỹraxirenyre: —Timykibo riteytenyra. Tahe rirawyònyre: —Subororole waruetyre-ò ritidira, idi resuhòra, iule tahe retehera.

¹⁶ Tai tahe fariseu mahãdu-ò narybede: —Ka hãbu Deuxu-ribi aõkõ nade. Kakỹny sabadotxu bede ywina riywinyõhyyre. Tahe ijõ imahãduõ rarybere: —Hãbu òraruduõ tiu deytenuwihikỹõ kia wesemy riwinyõtyhy. Tai tahe wiribi hitximy raraykynyrenyre.

¹⁷ Tahe ixityre hãbu-ò rỹỹraxire: —Tii arue arue riteytenyra: —Tai tahe timybo tuu marybekre. Hãbu rarybere: —Tii Deuxu rybemy rybeduõ rare.

¹⁸ Tahe judeu mahãduõ rarybere: —Ise-wana tybywana widee ararybekekile, arityhynkre. Tai riteònyre tybybohoòrysmy.

¹⁹ Rehemynyreu, tahe tamy rarybere: —Kaa aõbo ariòre rare. Inatyhymy aõbo iruetãmy reare. Timykibo tahe wiji robira.

²⁰ Tahe tybyboho rirawyònyre. Inatyhymy wariòreony rare. Iruetãlemy ka reare.

²¹ Reerykõrenyre timykibo retehera. Irueriraynyre dori, reeryõhyyre. Tamy marybebenyke. Ibeòra dire ka, iximy relyyleke.

²²⁻²³ Tybyboho ruberumyhỹrenyre judeu mahãdu lau. Judeu mahãdu dori, rarybemyhỹre: —Inyõ Jesuisimy rarybekeki, tii Kristu Deuxu deòdỹỹna raremy rarybekeki, tahe dohodỹỹnawo-ribi riteònykemy idi rỹira. Tai tahe hãbutybyboho kia wesemy raryberenyre. Tii ibeòra dire: —Tamy marybebenyke.

²⁴ Juhuu iruetãmy raremyhỹò ixityre ròtedỹỹmy rarybere. Òbiti rybe-di marybeke. Inydeereny tahe ka dori òrarudu rare. Tai tahe Deuxu biwowodynyke. Tahe tii rarybere:

²⁵ —Tii òrarudu rare, reerykõre. Sohoji aõmydỹỹnana reeryre. Juhuu waruetãle heka reeryre, wiji tahe retehereri.

²⁶ Tahe ixityre tamy rỹỹraxire: —Aõbo tii riwinyre. Timybo arue roire.

²⁷ Hãbu rarybere: —Adeereny tuu rarybere tahe taholaõhyytenyta. Aõherekibo ixityre ijohonamy tarybetenyteri. Ierydỹỹnamy boibekemy aõbo atxitenyteri.

²⁸ Tuu raryberenyre aõbina binalemy. Kai heka iijoiõ atxiteri. Jiarỹboho Moisesi erydỹña jiarỹboho roire.

²⁹ Deuxu Moisesi-ò rarybemyhỹre. Kiamy reeryreny. Ka hãbumy tahe aõmy raholaõmahãreny, tiludubo rare.

³⁰ Kia wa riwateytenyra bededõidỹña urenana tii rare. Ihãrele tahe kaiboho teeryõmy tuu tarybetenyteri. Wadee kia ajuedena rare.

³¹ Deuxu wa òrarudu ixitòedỹña-ò roholaõtyhy. Kia reeryreny. Tahe inyõ Deuxu rityhynykeki tamywimy rỹirakeki, kia-ò Deuxu roholakre.

³² Bede rexidelenyreu, inyõ roholatyhy iruetãmy raumynyre heka reyttere. Inyõ tiu riwinyõre, wiji tahe diwinyde.

³³ Kia hãbu Deuxu-ribi nokõduõ aõkõkeki tiu aõ riwinyõtyhy.

³⁴ Tahe fariseu mahãdu aõbinahakỹlemy tuu rarybere: –Kai uladumy tea-teu, òrarudutyhymy tate. Kai aõmybo biwabedeerynybenykremy aõbo wadireny tahõtynyteri. Tahe riteõnyre dohodỹña heto-ribi. Ihymy riteõnyre.

³⁵ Kia-ò Jesuisi roholareu hãbu riijere tahe rỹrãxire tuu: –Kai Deuxu Riòre Hãbutyhyhỹ aõbo tetyhynyte.

³⁶ Hãbu rarybere: –Mobo tii rare, Wanyrỹ, arityhynykemy watzireri.

³⁷ Wamy wa tabita, jiarỹleheka watzireri. Adee rarybererile watzireri.

³⁸ Tahe rarybere: –Wanyrỹ aratyhynyra he. Tahe hãbu Jesuisi riwowodynyre.

³⁹ Jesuisi rarybehyra: –Jiarỹ anade kabede-ò iny ruetã aritobixidỹnykemy; tule robimyhỹre mahãdu ariruetãdỹnykre. Iny òwydỹnyamy anade.

⁴⁰ Fariseu iòhõmy iribi rỹimyhỹ roholare irybe-ò. Tahe tamy rỹrãxire. Inatyhykõ aõbo ka jiarỹboho tule waruetãreny.

⁴¹ Jesuisi rarybere: –Aruetãmy ahãtenyteki, aòraruna-di aõkõ toite. Tahe tarybetenyte reerywãhã, rabiwãhãre. Tai aòraruhyy-di toite.

10

¹ Inatyhytyhymy adeereny ararybekre: –Inyõ budoeni yrubudỹña ijõtòbõna-di, ralòõkeki, tii tahe wasidu ixiwatxidỹnydumy rare, raòwõnymy heka ralòmehỹre.

² Ijõtòbõna-di ròtedu, tii budoeni-di itxeredutyhy rare.

³ Iu ijõtòbõna-ò rehemynymyhỹreu, ijõtòbõna ludu tamy riraynymyhỹre. Tule budoeni irybe rierymyhỹre. Sohoji sohoji-ò ininimy tamy rryrymyhỹre, tahe idi ròhõnymy ridymyhỹre.

⁴ Ihõrõ ahana-ò ridyreu, tii iko-ò rỹimy idi ramyhỹre. Riheludunymy idi raremyhỹ rierymyhỹreki irybe.

⁵ Budoeni ieryõdu riheludunyõtyhy, irybe rieryõreki. Iny ieryõdu-ribi rahenykre.

⁶ Jesuisi tamy kia bede eryna ijyymy relyyre. Tiiboho tahe rieryõhyreny titybo ibede erydỹnyamy rororerimy.

⁷ Tahe Jesuisi ritỹnyreny tamyreny: –Jiarỹ budoeni ijõtòbõna wesemy rãimahãre.

⁸ Ibutumy iny wakõule rehemynyre wasidu ixiwatxidỹnydumy rỹiramyhỹ. Wabudoeni ityhydỹnydu wesemy rỹirerimy ihỹre. Tiiboho wasidurybe-ò roholaõhyymyhỹreny.

⁹ Jiarỹ ijõtòbõna wesemy rãiwãhãre. Inyõ wamy ralòõkeki, tii heka tarasanaõmy rarekre. Iwese wabudoeni ralòmehỹre idi ròhõnymyhỹre asi wiwihikỹmy riroximyhỹre wesemy, tule ityhydỹnydu mahãdu rỹirakre, bededõbyna wiwihikỹ ritakremy.

¹⁰ Wasidu heka rubudỹỹmy nade, bedehudumy wasimy, jiarỹ tahe anade inyõ umytuedeõna ariwahinykremy, irutyhytyhy wihikỹmy wiji rỹirakremy.

¹¹ Jiarỹ budoeni-di itxeredu wihikỹ rare. Ihy ta waumy ariwahinykre terõwrenymy.

¹² Inyõ budoeni-di itxeredumy deõdumy risỹnykeki, tii riwisinanyõtyhy, tii dori budoeni wedu aõkõ rare, deõdule rareki. Tahe irõdu brebunaõ tamy kanakeki tahe rahenyke iribi, tai ijõ rimyke, ihona tahe raõrunyke.

¹³ Deõdu heka rahenyke tii iwedu aõkõ rareki, tii aõmy aõkõ idi rõhõtinyinmyhỹre, iõwydimy aõkõ.

¹⁴⁻¹⁵ Jiarỹ heka itxeredu wihikỹ rare wabudoeni riwaerymyhỹre. Jiarỹ tule tii mahãdu reerywãhãre. Waha riwaeryre, tule tii reeryre. Iwesetyhyle wabudoeni-wana wii reerynyre. Iõraru-ki tahe waumy ariwahinykemy idi wãhãre.

¹⁶ Jiarỹ wabudoeniõ-di watxiwãhãre. Aõ kabede-ki aõkõ. Ibutumy aributunykemy idi watxireri. Tai tahe sohoji ijoihyylemy heka roikre. Ibutu-di itxeredumy ararekre.

¹⁷ Tai heka Waha waluure, waumy ariwahinykreki wahe. Ihãrele tahe ixbyby idi arexiumpydỹỹnykre.

¹⁸ Inyõ heka ixideewiõkeki riwarubunyõtyhy. Arexiwahinykre tamyreny riwarubunyrenykre. Ixideewikreu, arexiwahinykre, tule waumy arimymy arexiixixanykre. Waha dori wadee rarybere tii ariwinykremy.

¹⁹ Kia rybe õraru-ki judeu mahãdu rybe rexijeijeinyre.

²⁰ Sõwemy iny ritxiõnymy rarybere: –Tii tyytybybina-di ratximyhỹre ada raitxỹtemy aõbo ihỹre. Aõherekibo tamy taholamahãtenyete.

²¹ Ijõ tahe rarybere: –Aõ tyytybybina-di aõkõ rarybemyhỹre. Tyytybybina aõbo hãbu ruetã riruedỹỹnyõtyhy.

²² Jerusalẽ hãwã-ki heka beõrahyy rare. Worana bedehesi hetxina Tỹmyradỹỹna rỹire.

²³ Salomaõ Ube-ki, Deuxu dohodỹỹna heto ubeõ-ki.

²⁴ Jesuisi rariamy ihỹmyhỹ. Tahe judeu mahãdu rirurawonyre itỹỹraxidỹỹmy. Tiwese bededỹỹnanymybo nohõtidihiyy bede ariwyrenykre. Kai inatyhymy Kristumy tate-wana, tahe manarybeke itỹnmy.

²⁵ Jesuisi dirawyõnyde: –Rarybere wahe, tahe kaiboho tiwatyhynytenyõhyete. Inatyhymy ierysmy mohõtinybenykeki, waaõmydỹỹnana wiwihikỹ rewinyamahãre-di betehibenyke. Wahani-di kia rewinyamahãre.

²⁶ Kaiboho tahe tiwatyhynyõlemahãtenyete, wabudoeni wesemy aõkõ toite.

²⁷ Wabudoeni warybe rierymyhỹre, riwaheludunymyhỹre; jiarỹ heka ibutumy wabudoeni reerymahãre.

²⁸ Tamy umytuedeõna rewahinywãhãre tiu heka ruruõtyhy. Inyõ waribi ridyõtyhy.

²⁹ Waha wadee riwahinyre. Tii heka ibuturatyre rare. Inyõ iribi ritaõtyhy.

³⁰ Jiarỹ Waha-wana sohojihyyle watxiwãhãre.

³¹ Ixityre tahe judeu mahãdu mana-di rirubunykre idi rỹire.

³² Tahe Jesuisi tamyreny rarybere: –Jiarỹ sõwemy bedebõbyna inydee rewinywãhãre Waha ruru-di. Aõõrarakibo biwarubunybenykre.

³³ Tahe judeu mahãdu rirawyõnyre: –Kai aõmydỹỹnana wiwihikỹle tewinyte. Kia õraru-ki aõkõ ijoi adi rỹireri mana-di arubudỹỹmy Deuxumy binatyhymy tarybeteriki. Kai dori hãbu tate, ihãrele Deuxumy texininiteri.

³⁴⁻³⁵ Jesuisi rarybere: –Abede ywina-ki ryberiti rỹire. Deuxu Rybe õbitihymy raritinymy rỹire. Kiamy: –Jiarỹ rarybere: –Kaiboho Deuxu toite. Deuxu Rybe heka inyõ-õ diteõnyde. Kia mahãdu tahe Deuxulemy rininire.

³⁶ Deuxumy tiiboho rininirenyre-wana, aõherekibo wadee takyarananyteri jiarỹ tule Deuxu Riõrelemy rexininireki. Waha dori, riwatamy diwateõnyde. Timykibo kaiboho tarybetenyteri Deuxumy ibinamy jiarỹ rarybererimy

³⁷⁻³⁸ Waha-ribi bedeõbyna ariwinyõkeki, biwatyhynybenyõtyhy. Tahe ariwinykeki, aõbo rewinyre-wana bityhynybenyke, biwatyhynybenyõke hãrele. Tai tahe bityhynybenymy boibeke jiarỹ Waha-wana wãhãre tule Waha wawana ratximyhỹre.

³⁹ Kabedeu ixityre riijere Jesuisi rimyky tii rexitamy rexihedỹnyre.

⁴⁰ Jesuisi ixityre Jordaõ bero kowa weribi-õ reurore. Joaõ juhuu rõsebedỹnyhỹõ rare. Taile tahe tii raremyhỹ.

⁴¹ Tahe sõwemy iny tamy roirenyre. Tamy rarybere: –Inatyhymy Joaõ bedeõby iny itxerenamy riwinyõre. Tahe ibutumy tii Jesuisimy rarybemyhỹre, inatyhy rare.

⁴² Sõwemy heka taile Jesuisimy rityhynymyhỹre.

11

¹⁻² Lazaru ibinamy roimyhỹ Betỹnia hãwã-ki. Marie, Marta-wana iseriõrereny rare. Juhuu Marie Jesuisi-wana raremyhỹu, tii Jesuisiwa tyre-õ tarinalỹnyrehekỹõ ritxiwire, idi tahe tarade-di rirubudỹnyre.

³ Lazaru ibinamy roimyhỹki tahe tiiboho riteõnyre Jesuisi-õ rarybekremy: –Wahĩ, abiõwa tyhy binanidikỹmy roireri.

⁴ Jesuisi kiamy roholareu rarybere: –Kabinana hãwã Deuxu wowydy-namy tamy nade. Tule riwawowydynykemy jiarỹ dori Deuxu Riõre rare. Kabinina tahe rubuhyymy aõkõ tamy rỹike.

⁵ Jesuisi heka ibutumy iluurenyre, Marta, Marie, Lazaru-wana.

⁶ Iu Jesuisi rieryreu Lazaru webinaduna, tahe taile ratximyhỹre, reriãrele inatxixumy.

⁷ Iribi tahe rarybere taerydỹna mahãdu-õ: –Rõkõirenyke ixyby Judeia bede-õ.

⁸ Tahe ierydỹna mahãdu tamy rarybere: –Erydỹdu aõherekibo ixyby-nomy tamy tarybeteri judeu mahãdu adi heka riwisỹnymy rỹimyhỹ mana-di arubudỹny.

⁹ Jesuisi dirawyõnyde: –Txu heka waõinatxi õra bededỹnanamy rare. Aõhe inatyhy. Inyõ txumy rariakeki, tiu aõ õraru-ki reseõtyhy loosõnamy dori ibutumy robimyhỹre.

¹⁰ Bede lurumy rariakeki tahe, aõ õraru-ki reseke, loosõna dori ihoõreki wahe.

¹¹ Tahe ijõmy Jesuisi tamyreny rarybere: –Iny biõwareny rõrõmy roireri. Tamy arakre ariixixanykremy.

¹² Tahe imahãdu rarybere: –Wanyrỹ tii rõrõmy roireri-wana bohe, reytekre.

¹³ Jesuisi heka rarybemyhỹ Lazaru rubumy roirerimy. Tiiboho tahe rõhõninyreny urile rõrõmy roirerimy.

¹⁴ Tahe Jesuisi ritỹnytyhyra tamyreny: –Lazaru rurure.

¹⁵ Jiarỹ wa aõrarureny-ki wadeysamy watxireri tai watxiõraki. Ka tahe biwatyhynybenykre. Rõkõirenykre tamy.

¹⁶ Tome ierydỹna mahãduõ rare. Didimomy iniõre. Tamahãduõ rarybere: –Rõkõirenyke, tule tii-wana rukururenykremy.

¹⁷ Jesuisi rehemynyreu, Lazaru inaubiõwatxumy hãloo iwõdỹwo-ki roimyhỹ.

¹⁸ Betỹnia Jerusalẽ hãwã-ribi sohoji urihixinamy roire.

19 Judeu mahãduy-ribi sôwemy doidenyde Marta Marieboho wotôenamy, iseriôreneny rurureki.

20 Marta Jesuisi kanakre rieryreu, tahe rôhònyre tii-wana witxi reakemy. Marie tahe tahetokile rononymhỹ.

21 Tahe Jesuisi-ò Marta rarybere: –Wahĩ, kakile atxiberi-wana waseritxòre rurukôhykyra ikuny.

22 Ihãrele tahe rekeryre ibutumy Deuxu-kò bexitôenykeki, tiki adeke kidi-wahinykre.

23 Jesuisi tahe tamy rarybere: –Aseriôre wa rubu-ribi kedexixakre.

24 Tahe Marta rarybere: –Rekeryre jikarỹ ikokunanatxu-ku rubu-ribi rexixakre, ibutumy ixixanatxu-ku.

25 Jesuisi rarybere: –Jiarỹ waixixanadỹỹdu rare, umytuedeõna wahidỹỹdu rare. Inyô riwatyhynykeki, tii rubu-ki roire hãrele, kedexixakre.

26 Ibutumy irumy roirekeki, tiu rururenyôtyhy, tii dori riwatyhynyreki. Kai aõbohe kia tetyhynyteri.

27 Tii dirawyònyde: –Kohe, Wahĩ, aratyhynywãhãre. Kai Kristu tate, Deuxu ritxòretyhy. Deuxu tuu rarybereki, bede-kò kanatekònyde wahe.

28 Tahe Marta ròðsere Marie taseriôre-ò rarybere: –Inyhĩ rehemynyteri, kai makremy rarybereri.

29 Kiamy roholareu, tahe, wylemy rỹimy reare tamy rare.

30 Jesuisi dori hãwã-ò ralòõlemy raremyhỹ Marta tamy raryberékile raremyhỹ.

31 Tii rỹimy rôhònyreu, judeu mahãdu tuu robire. Tahe riheludunyre, wabede-ò robukremy raresỹny tamy roholare.

32 Marie rehemynyre Jesuisi-ò. Tahe tii tuu robireu, resere iko-ò, tahe rarybere: –Wahĩ, kaki atxiberi-wana ikuny waseritxòre rurukôhykyra.

33 Jesuisi Marta ibru-di tule judeu mahãduhi-di retehereu tule tii rabede-wonihikỹre.

34 Iule Jesuisi rỹỹraxire: –Titxiwexe tii tetiditenyte. Tiiboho rirawyònyre: –Wanyrỹ, manake itxeremy.

35 Jesuisi tahe rahinyre.

36 Tai tahe judeu mahãduõ rarybere: –Betehebenyke sôwemy heka tii Lazaru luure.

37 Ijô tahe rarybere: –Tii iny ruetà riteytenyre. Aõherekibo Lazaru irumy ratxireriule riteytenyõra.

38 Jesuisi ixyby tawo-ki bederiòtiinyre. Tahe rariamy rare wabede-ò Lazaru suiwodỹỹwo-ò roire. Mana-di tahe ritxiotòbònyre.

39 Tahe Jesuisi rarybere: –Mana bitake Marta tahe iseriôre rarybere: –Wahĩ, rarònyteri wahe inakubikòwa txumy dokuri txuu idi rỹira.

40 Tahe Jesuisi rarybere: –Rarybere taheka, bityhynykeki, Deuxu rurumy bobike.

41 Tahe mana iribi ritarenyre. Jesuisi retehere biu-ò rexitôenyre: –Umy reàlàmy wahe watxireri kai wadee taholataki.

42 Wadee taholahyy atxiteri mahãte: –Kia reeryre, kata inysõwehekỹ òraru-ki kiamy rarybera adee, tai tiiboho rityhynyrenykemy wahe, kai tiwa-teònyteki.

43 Kia rexihureu tahe ryryre: –Lazaru, bodohonyke wa ahana-ò.

44 Kia rurumy roimyhỹ-ribi tahe dòhònyde. Iwa heka tebò-wana widee ritỹtenylemy roimyhỹ. Irati tahe tyybese-di ritỹtenymy ihỹmyhỹ. Jesuisi rarybere: –Biesebenyke wa ixinamy rake.

⁴⁵ Tahe judeu mahãduy-ribi, Marie Martaboho roraludu mahãdu, aõbo Jesuisi riwinyremy robireu tahe, rityhynyre.

⁴⁶ Ijõ tahe fariseu mahãdu-ò roirenyre tamy relyykemy aõbo Jesuisi riwinyremy.

⁴⁷ Iribi tahe xiwe wahidỹỹdu wedu, fariseu wedu mahãdu-wana heka ywisidỹỹna mahãdu ributunyre. Dohodỹỹna mahãdu wedu heka imahãduni rare. Tahe inyõ rarybere: —Ka hãbu heka aõwiwihikỹ sõwemy diwinymyhỹde. Aõhebo he rokotỹỹnyrenykre.

⁴⁸ Tiihyyle riwinymy rarekeki, heka ibutumy rityhynykre. Idi tahe Roma hãwã mahãdu soldadu kanakre iny riòlòdỹỹnyke inysỹ rahurenykre.

⁴⁹⁻⁵⁰ Kaifa imahãduõ rare. Kabeõrau tahe tii ibutu xiwena wahidỹỹdu wedu rare. Tahe tii rarybere: —Kaiboho aõ teeryõhytyente. Hãbuõ tahe rurukre ibutu inydee. Tai tahe ibutu iny itueõtyhy.

⁵¹ Kia heka irayky-ribi aõkõ ròhònyre. Deuxu irayky-ò ritidire, tii dori xiwena wedu tyhy rare kabeõrau.

⁵² Kiamy rarybereu, tahe Jesuisi rubunamy rarybereri. Jesuisi dori ibutumy judeu mahãdu dee rurukre. Tamy sohojile aõkõ rurukre. Tahe sohoji mahãduòle rabutukre Deuxu riòre bede bedemy rỹira mahãdu wahe.

⁵³ Itxuule tahe Jesuisi rubudỹỹmy rõhõtynyrenyre.

⁵⁴ Tai tahe ihãwãy-ki rariaõre, Judeia mahãduy-ki. Tahe iribi rexitare beder-ahy-ò iòhòmý. Hãwãõ-ò heka rare, Efraĩ heka inire. Taile taery mahãdu-wana ihỹmyhỹ.

⁵⁵ Judeu mahãdu worana bedehesi iòhòmý rỹimyhỹ Pascoa heka inire. Rite-lynykõule heka sõwemy roirenyre Jerusalê hãwã-ò, tai rexiwinyrenyremy iwese bede ywina rarybere wese Pascoakomy wahe.

⁵⁶ Sõwemy iny Jesusimy robikemy rỹimyhỹ. Tahe Deuxu dohodỹỹna het-owo-ki widee rarybemyhỹre tahe rarybere: —Kanakre aõbo Jesuisi worana bedehesi-ò.

⁵⁷ Xiwena wedu fariseu-wana juhuu inyõ rarybemahãre: —Inyõ Jesusimy robikeki, tuu wadeereny kanarybekre, tii ramykremy wahe.

12

¹ Jesuisi rare Betỹnia hãwã-ò Pascoa worana bedehesi rỹikrekoki. Debòsohoji txumy rauhenymy rỹimyhỹ tamy. Tai heka Lazaru rasỹnymyhỹre rubu-ribi rexixare-ribi wahe.

² Martaboho tahe rỹsỹna wiutàdàna riwinyrenyre Jesuisideewina. Lazaru Jesuisi-wana riroxikremy ronymyhỹ. Tahe Marta tamyreny rỹsỹna riwymyhỹ.

³ Marie tahe sõwemy aderòna lỹnyre-di ratximyhỹ, iòwyhykỹre heka. Tahe tii Jesuisiwatyre ritxiwire idi tahe taradedile risuhore. Heto tahe tỹnyrehekỹlemy roire.

⁴ Judasi Isariò tule Jesuisi erydỹỹnaõ rare tii tai ratximyhỹ. Tii Jesuisi rityhenykre tii raremyhỹ ihewo-ribi. Tii tahe rarybere:

⁵ —Kaa aderòna heka iòwyhykỹ rare. Aõherekibo idi tahonyõte nieru idi bitakemy iny aõkõ mahãdu-ò nieru biwahinykemy.

⁶ (Judasi heka iny aõkõ mahãdu luu aõkõ rare. Erydỹỹna mahãdu nieru rubudỹỹdu tii rare. Kia nieruõ tahe ixideele ritosinymyhỹre. Tai tahe aderòna òwy ixidee ributunyremy idi ratximyhỹ).

⁷ Tahe Jesuisi rarybere: —Ixinamy wawatyre ritxiwike, wahãloo-ò wahe-rina heka riryrymy tuu ritxiwireri.

⁸ Kaiboho heka aõu biwiòhenanymy ahãbenyke iny aõkõ mahãdu awanareny dori rarehyymy rarekre. Jiarỹ tahe kaki aratxihyyke aõkõ rare.

⁹ Judeu mahãdu Jesuisi rehemynryeriò roholare. Tahe sówemy iny tamyreny nade itxeremy. Tule Lazaru-ò itxeremy nade rubu-ribi rexixareki.

¹⁰ Tai tahe xiwewahidỹỹdu mahãdu wedu tule Lazaru rubudỹỹmy rarybere.

¹¹ Lazaru òraru-ki dori sówemy judeu wedu Jesuisi rityhynyre.

¹² Itxubiòwau tahe Jesuisi nade Jerusalẽ-ò kia-ò tahe roholare ibutumy worana bedehesi ludu mahãdu.

¹³ Tai tahe roirenyre tii-wana witxi reakemy horeru riwyre ityre-di kanakre. Ryryrenyre Jesuisi-ò: –Waiòlòreny, kai arawowydynryeri, kai bededỹỹdu tateki! Kai Deuxuni-di tateri. Kai judeu Iòlòtyhy tate.

¹⁴ Jesuisi nade jumenta riòre tyre-ki, tuu dori ihetxina tyyriti-ki roire wesemy.

¹⁵ Kiamy wahe roire:

–Judeu riòre mahãdu uritere brebuõmy atximahãbeny aiòlòreny dori kanakre jumenta riòre tyre-ki.

¹⁶ Iery mahãdu kia rieryòhyre juhúu.

¹⁷ Iribi tahe tõihti itxi reare ritidỹỹna hetxina-ki roiremy, Jesuisi biu-txi ròðemy rareu wahe tõihtireny itxi reare. Tule sówemy iaõmydỹỹnana rybe hetxina-ki riritinymy rỹimyhỹre. Kia-di tahe idi tõihtireny reare.

¹⁸ Inyõ itxeredu heka Lazaru ixixanamy relyyre. Tai tule iny sówemy doidenyde. Kia Jesuisi riwinyreò heka roholarenyre.

¹⁹ Tai tahe fariseu mahãdu widee raryberenyre: –Ibutumy ihemy roirenyre. Timyõre, aõhe heka rikisỹnyrenyõtyhy.

²⁰ Inyõ worana bedehesi-ki grego rybedu mahãduõ ratximyhỹ. Tii tai Deuxu reàlakemy ratximyhỹ. Tii Besaida hãwã ludu-ò Kalileia bede luduõ ratximyhỹ.

²¹ Tahe grego rybe mahãdu tamy rarybere: –Wanyrỹ, jiarỹboho, Jesuisimy arobikemy watzirenyreri.

²² Filipi tahe Andre-ko relyyre. Ta wiwana roirenyre Jesuisi-ò.

²³ Jesuisi rarybere: –Aõkõra, Wabededỹỹnana iòhòra Deuxu Riòre Hãbutyhyhykỹ rubuna-ò, wahe.

²⁴ Inatyhymy adeereny ararybekre: –Jiarỹ alòbòròna rijuxunymyhỹre wesemy aresekre suò, arurukremy. Aruruõkeki ixiwanahyyle ararekre. Arurukre-wana sówemy araratynykre.

²⁵ Inyõ ixiluukeki heka, ruruke. Kabede-ki tahe ixiluuõkeki, tii rexiywinymy umytuedeõna-ò ratxike.

²⁶ Inyõ wadeòdumy ratximyhỹkeki, tii riwaheludunyke. Tai titxibo aratxikeò tii wawana ratximyhỹke. Inyõ wadeòdumy rareke-wana, tii Waha riwowydynykre.

²⁷ Katahe wabedewonihikỹmy watzireri. Timybo ararybekre, Waha, kia rubu aõmydỹỹnana-ribi biwatake. My òsana arexitòenykre. Aõkõre, kiaòle heka kabede-ò anade.

²⁸ Waha, anityhy-ò iny riwowydynykemy watzireri. Iule tahe rybeò-ò roholarenyre: –Kia rotỹỹnyre ihãre ta ixityre tuu rotỹỹnykre.

²⁹ Tahe iny sówehékỹ kia rybe-ò roholare. Tahe rarybere: –Biumytxyle rare. Tahe ijõ rarybere. Aõkõre ýju rare.

³⁰ Tahe Jesuisi rarybere: –Waòraru-ki aõkõ kia rybe rỹireri, aõrarureny-ki, tamy boholabenykemy.

³¹ Wiji tahe ywisidỹỹna kỹnyikre, bedemy iny rỹira mahãdu-ò. Kia mahãdu iòlò, Satanasi, kanahitxidỹỹkre.

³² Iu jiarỹ itxeò-ki riwaukokreu, ibutumy iny heka ixidee adiwitadànykre riwatyhynykremy.

³³ Iu tii kia rarybereu, tarubuna ritỹnynyre timybo rurukre.

³⁴ Iny sōwehekỹ dirawyònyde: —Jiarỹboho raholarenyre bede ywina-ò. Tii rarybere: —Tiiemy Kristu rarehyymy rarekre. Timybo kai tarybeteri: —Biwaukokremy. Mobo tahe Deuxu Riòre Hãbutyhyhykỹmy tuu tarybeteri.

³⁵ Tahe Jesuisi dirawyònyde: —Urihimyòle loosòna awana rariamy ratxireri. Idi atxiteriule idi mariake, bede luru atxi kanakelau. Inyò bede luruki rariakeki, tiobo rake rieryòhyyre.

³⁶ Waloosòna atxiteriule, biwatyhynyke waloosònamy, taile waloosòna mahãduòmy boibeke. Kiarybe rahu-di tahe Jesuisi iribi rexitamy rexiwore.

³⁷ Tii sōwemy bedeòtiidỹỹna ikoreny-txi riwinyre. Ihãrele tahe sōwemy rityhynyòre.

³⁸ Kia tahe Isaia tyyriti-ki roire, tahe iwesele tuu rarybere wese wiji rỹira rotỹỹnyre:

—Wanyrỹ, Iny rybe tỹnydỹỹnareny tiibohe rityhynyòhyyre, Deuxu taruru tamy riteòsinyrehãrele rityhynyòre.

³⁹ Tai rityhynyòhyyre. Isaia, Deuxu rybedu ijòmy ròritidỹỹre:

⁴⁰ —Deuxu riruetànnyre, irayky riteredỹỹnyre. Tai rieryòhyymy robiòhyymyhỹre. Tiu heka Deuxu rityhynyòhyyre. Tiu riteytenyòhyyre.

⁴¹ Isaia Jesuisi loosònamy robire. Tai tahe tuu ròritidỹỹre.

⁴² Ihãrele tahe dohodỹỹna mahãdu wedule sōwemy rityhynyre. Urile fariseu mahãdu òrarukile, ijò-ò tuu rarybeòre, dohodỹỹna mahãduy-ribi riòlòdỹỹnyheny.

⁴³ Tiibohe dori Deuxu wowydyna luurenyòre inywowydynale luurenyre.

⁴⁴ —Iny riwatyhynymyhỹkeki, wadeòdỹỹdule rityhynymyhỹre.

⁴⁵ Inyò wamy robikeki, iule wadeòdỹỹdumy robike.

⁴⁶ Jiarỹ loosòna wesemy anade bede-ò. Tai tahe iny riwatyhynykeki, bede luru ribi ròhònyke. Tai heka anade.

⁴⁷ Inyò warybe-ò roholake hãrele riywinyòkeki, tahe jiarỹ tii wiji ariywidỹỹnyòke. Jiarỹ dori tarasaduhyylemy anade.

⁴⁸ Inyò riwatyhynyòkeki, warybe-ò roholaòkeki, ikonana txuu tahe ywisidỹỹna-ò ralòke, warybe-ò rityhynyòmyhyreki aòhòkỹmy dỹỹnana-ò heka kia ralokre.

⁴⁹ Jiarỹ ixi rayky-ribi aòkò rarybemahãre. Wahale rybe wadee riwahnymyhỹre. Kia wesele relymahãre.

⁵⁰ Deuxu rybe bede ywina-di diwateònyde umytuedeòna wahidỹỹna kia rare. Kiale heka reeryre.

13

¹⁻³ Pascoa worana bedehesi txummy txuu rỹire. Tahe Jesuisi rexieryre ixyby tyby-ò ròðsekremy ihỹre, ibededỹỹnana iòhòmy roireki. Tule rexieryre tyby ibutumy tamy riwahinyremy. Tii tyby-ribi nade tule ixybyle tamy rakemy. Txioro roxinau Jesuisi taerydỹỹna mahãdu-wana riroximyhỹreny. Judasi Isariò (Simaò riòre) taile ratximyhỹ. Juhuu diabo tamy rarybere iruule Jesuisi rityhenykemy.

⁴ Jesuisi sōwemy taerydỹỹna mahãdu luure. Tai tahe rỹire, tatyytyre ludu ritare òsuròna rimyre, idi rexiwetyataare.

⁵ Hynaro-ò bee ritxiwire taerydỹỹna mahãduwaa risuhokremy tahe òsuròna-di tawetya-ki ihỹmyhỹ-di iwa rirubudỹỹnyre.

⁶ Tahe Jesuisi rehemynyre Simaò Pedro-ò, Pedro rarybere: —Aòkòre kai wawareny suròdòòmyke.

⁷ Jesuisi rirawyònyre: —Kai heka teeryòte aòherekibo resuhòreri. Ihewo-ribi tahe bierykre.

⁸ Pedro rarybere: —Aòkòre, wawasuròdòdỹõmy. Jesuisi rirawyònyre: —Arisuhòòkeki wawanahyy aòkò mabeke.

⁹ Pedro rarybere: —Wawasohojile aòkò bisuhokre, wadebò warati-wana tule wahe.

¹⁰ Tahe ritỹnynyre Jesuisi; inyò ròhòre-wana iwale rasuhòke. Iuhe ibutumy tyralemy rỹimyhỹre. Kaiboho yralemy toite. Sohoji tahe aòkòre.

¹¹ Jesuisi tatyhedỹdu rayky rierymyhỹre. Tai tahe rarybera, ibutumy aòkò tyraremy.

¹² Jesuisi iwasuròdò rexihureu, tatytyre ludu retyynyra roxina-ò ròsere. Tamyreny rỹraxire: —Kaiboho teerytenyte. Aòhebo jiarỹ kia ratỹnyra.

¹³ Adeereny aritỹnynykre. Kaiboho tiwaninitenyte anyrỹmy, aòhe inatyhy? Aerydỹdumy, inatyhy heka jiarỹ rare tahe òbitimy tarybetenyte.

¹⁴ Jiarỹ aerydỹdureny anyrỹreny heka awareny resuhore. Tai tahe kaiboho wiwa bisuhòbenykre.

¹⁵ Iwese jiarỹ rexideòsinyre wese kaiboho biwinybenyke.

¹⁶ Inatyhymy adeereny ararybekre. Deòdu dori tawedu ratyre aòkò rare. Rybe-ò ijohonadu dori rybedutyhy ratyre aòkò rare.

¹⁷ Kia warybe teerytenyte. Tahe biwinybenykeki bedèòbynatyhy adeereny kanakre.

¹⁸ Ibutumy umyreny aòkò rarybereri jiarỹ araeryreny, aratarenyeki, wahe. Rybe tyyriti-ki roire kiamy:

—Kia wawana riroximyhỹrele heka riwatyhenykre. Ele elemy tuu rotỹnykre.

¹⁹ Wiji rarybereri heka wylemy kia tuu rotỹnykre. Tuu rotỹnykreule, kaiboho bierybenykre òbitimy raryberé wahe; jiarỹ biwatyhynybenykemy wahe.

²⁰ Inatyhytyhymy ararybekre: —Inyò adee aditeònykre. Inyò tii rityhynymy kididykeki, tii riwadymyhỹre. Inyò kidiwadykeki wadeòdỹdu ridymyhỹre, Deuxu rityhynymyhỹre wahe.

²¹ Tahe Jesuisi rabadewonihikỹmy rononymhỹ. Tahe rarybera: —Iny sohojiò ayreny-ribi riwatyhenykre.

²² Tahe wii riijerijereny. Mokobo rarekremy ròhòtinyreny.

²³ Jiarỹ, Joaõ Jesuisi weribi ranywỹhỹ, tii dori sòwemy waluure.

²⁴ Tahe Pedro wadee narybewasidi: —Tamy inihe myraxike mobo raremy.

²⁵ Tahe jiarỹ retorunyre: —Wanyrỹ, mowexe ratxireri.

²⁶ Jesuisi rarybere wadee: —Kia orotxu ituudỹ tamy ariwahinykrele tiikre. Tahe Jesuisi orotxu yre rituunyre idi tahe Judasi Isariò-ò riwahinyre. Tii Simaõ riòre rare.

²⁷ Tahe Judasi riyre. Iribi tahe Satanasi aòwesele tamy ralore. Jesuisi heka Judasi-ò rarybere: —Aòhebo botỹnykre wylemy makre biwinykremy.

²⁸ Tahe riroximy rỹimyhỹ mahãdu rieryòre aòmybo Jesuisi rarybemyhỹ.

²⁹ Judasi Isariò dori nieru hyna yrubudỹdu heka rare. Tai tahe ròhòtinyreny Jesuisi worana bedehesi aòna aòna riwykemy riteònyre, ada iny aokòdu mahãdu-ò nieruò riwahinykemy.

³⁰ Judasi orotxu yre riymy rahudi tahe ròhònymy rare bedè luru-txi.

³¹ Judasi ròhònymy rahudi tahe Jesuisi rarybere: —Wiji tahe Deuxu Riòre Hãbutyhykykỹ loosònamy iny robimyhỹre taraykywo-ki. Tii heka jiarỹ rare. Deuxu-ò waòraru-ki wowydyna riwahinykre.

³² Deuxu loosònamy tahe waki iny robikeki, Deuxu riwatoosònyreri aòwesele ibutumy iny tuu robike.

³³ Waluudu mahãdu wariõre wesemy atximahãtenyete, umywanareny uri-himyõle ararekre, idi tahe arakre. Tahe biwaijebenyhãrele waki mahabenyõtyhy. Iwese judeu mahãdu-ò rarybere wesele adeereny ararybekre: –Tixibo arakre-ò kaiboho boibenyõke.

³⁴ Bede ywina tÿmyra wese adeereny ariwahinykre kiamy wahe: –Wiluurenykemy wahe: –Iwese jiarÿ aluurenyre wese tule kaiboho wiluurenyke.

³⁵ Wiluurenykeki ibutumy iny rieryrenykre kai waerydÿÿna mahãdumy tate.

³⁶ Tahe Simaõ Pedro ritÿÿraxinyre: –Wanyrÿ, tixibo kai makre. Jesuisi dirawyõnyde: –Tixibo arakre-ò wiji kaiboho boibenyõke, iribi tahe wahemy bodoikre.

³⁷ Tahe Pedro rarybere: –Wanyrÿ aõherekibo araõkre wiji ahemy waumy kie aõraru-ki ariwahinykemy watxireri.

³⁸ Inatyhymy aõbo aumy biwahinykre waõraru-ki. Inatyhytyhymy ararybekre: –Hãnie hãbu robukõule kai biwatxiõnykre inataõmy.

14

¹ Kaiboho bedeõtidiÿÿrenyõmyke bedewona-ki. Kaiboho Deuxu tetyhynytenyete, tai tahe biwatyhynykre.

² Wahasÿ-ki sõwemy sÿÿ rÿimyhÿre kialemyre heka tai. Kaweseõkeki adee inatyhymy rarybemahãre. Jiarÿ tahe arakre sÿÿ adeereny ariwinykemy.

³ Ariwinymy arahudi tahe ixbyble aõrysmy adõõsekre. Tahe aradyrenykre tixibo-txi aratxireriõ kaiboho tule matxibenykre.

⁴ Kaiboho dori teerytenyete tixibo wasÿry roire.

⁵ Tahe Tome rarybere tamy: –Wanyrÿ, tixibo makreò reerykõrenyre. Tai tahe timykibo asÿry reeryrenykre.

⁶ Jesuisi dirawyõnyde: –Jiarÿ wa ryy rare. Deuxu inatyhyna jiarÿ rare. Umytuedeõna wahidÿÿdu jiarÿ rare. Inyõ waõrarukile Waha dee rakre.

⁷ Kaiboho tiwaerytenyete-wana tule Waha teerytenyete. Wiji tyhyule Deuxu teerytenyete, tuu tabitenyete.

⁸ Idi Filipi rarybere: –Wanyrÿ, boo inydee biteõsinyke, tai tahe awike.

⁹ Tahe Jesuisi rarybere: –Filipi, sõwemy bededÿÿnana umy-wana rewyre. Ihãrele tahe tiwaeryõte. Inyõ wadee kanakeki, Wahamy robike. Aõherekibo wadee tarybeta boo wadee biteõsinykemy.

¹⁰ Jiarÿ Waha-ki watxiwãhãre tule Waha waki ihÿre. Kia aõbohe tetyhynyõte rarybewãhãre, kia iximy aõkõ rarybewãhãre. Waha waki ratximyhy tii taõmydÿÿnanamy rotÿÿnyre waumy-ribi.

¹¹ Waha-ki watxiwãhãre, tule tii waki ihÿre, kia bityhynybenyke. Aõwiwihikÿ rewinywãhãre òraru-ki biwatyhynybenyke.

¹² Inatyhytyhymy adee ararybekre: –Inyõ riwatyhynykeki, wawesele aõwiwihikÿ riwinykre. Tahe watyreleaõ riwinykre. Jiarÿ dori Waha-ò arakre.

¹³ Tai wanimy aõmy bexitõenybenykeki, tii tahe ariwinykre. Iny Waha-ò wowydyna riwahinykemy idi watxireri, iRiõre wahe jiarÿ rare.

¹⁴ Tai aõma wani-ò bexitõenybenykeki, tii tahe riwinykreadeereny.

¹⁵ Inyõ waluukeki tii wabede ywina riywinytyhyke.

¹⁶ Waha-ò arexitõenykre ijõ wiõhedÿÿdu adeereny kiditeõnykremy waderõwymy. Tii aõu aõu adeereny hyyle rarekre.

¹⁷ Tii Deuxu Tyytybytyhy rare. Tii inatyhynamy rieryrenyre, iny bede bede mahãdu wahe. Deuxu Tyytybytyhy ixidee ridykemy. Tuu dori robiõtyhy rieryõtyhy. Kaiboho tahe teerytenyete. Tii dori umywanareny ratximyhÿre, aworeny-ki ratxikremy.

18 Jiarỹ heka ixisohojimy ararisidỹnyõtyhy. Jiarỹle adee adoosekre.

19 Wijile arurumy arakre bede-ribi. Bede bede mahãdu tiu wamy robiõtyhy. Kaiboho tahe wamy bobilebenykre, jiarỹ dori ixityre rubu-ribi adexixamy ararekre. Tai tahe tule kaiboho rubu-ribi bexixamy boibekre.

20 Kia txuu kaiboho bierybenykre jiarỹ heka Waha-ki watxiwãhãremy. Kaiboho tasỹ waki ahãtenyete. Jiarỹ tule akireny watxiwãhãre.

21 Inyõ wabede ywinareny dikeki tahe, riywinykeki, waluudu rare. Waha tule iluukre. Jiarỹ tule iluutyhyre. Tamy tule arexideõsinykre.

22 Judasi tamy rarybere: (aõ Isariò aõkõ kỹny, iwitxiraõ.) –Wanyrỹ, aõhekremybo wadeereny bedexideõsinykre tahe bede bede ludu mahãdu-ò aõkõ wahe.

23 Jesuisi rarybere: –Inyõ waluukeki, wabede ywina riywinytyhyke. Waha, heka iluutyhykre. Jiarỹboho tamy adoidenykre tamysỹmy.

24 Iny waluuõkeki, warybe tiu rityhynyõtyhy. Aõ warybe-di aõkõ heka rarybereri. Waha wadee riwahinyredi heka rarybereri.

25 Tai arakrekoki tuu rarybereri adeereny.

26 Tahe Deuxu Tyytybytyhy, awiõhedỹỹdu, tii araerynanykre ibutumy aõna aõnamy. Timybo jiarỹ adeereny raryberemy akananohõtiijaranydenykre.

27 Ywina adeereny adiwahinykre waywina wahe. Iwese bede bede ludu mahãdu riwahinyhỹre wese aõkõ ariwahinykre. Uritere nohõtiryõmy brebuõmy.

28 Rarybere dori arakremy tule adoosekremy. Waha waratyre rare. Tamy he arakre. Kaiboho waluukeki, beysabenykre tamy arakreu.

29 Kaa bede reakoki tuu rarybereri. Tuu reakreu tahe, kaiboho biwatyhynybenykre.

30 Sõwemy heka adeereny ararybeõkre, bede dinodu dori tehemyrysỹ iõhõmy ihỹre, Satanasi wahe. Tii heka wadee iruruõhyyre, riwateõnyõtyhy.

31 Jiarỹ Waha luure. Rewinywãhãre aõbo Waha ariwinykemy riwateranyhỹre. Botamanyke: –Ròkòirenyke.

15

1 Hãjutò òwòna wese wihikỹ jiarỹ rare. Waha tahe bede rade wysydỹỹdu wese rare. Bede òbebure iratyõkeki iò riòròke. Iratydikeki iòsõmo iribi risihere. Tai tahe sõwetyhymy nihikỹmy raratynyke.

2 Kaiboho bede rade-ò wesemy toite. Warybe-di aòsõmoreny aribireny resihemahãre. Katahe òbitimy toite bederatymy raratynykemy.

3-4 Kaiboho biwamymy wadi myikre. Iwese bede radeõ raòròõmyhỹkeki irulemy rỹikre raratynyke. Aõkõkeki ruruke. Kaiboho iwesele toite. Waki beàrenyõbenymyhỹkeki, tiu Deuxudeewimy atxibenyõtyhy.

5 Jiarỹ hãjutò òwòna wese rare. Kaiboho ibede radeò wese toite. Waki beerenybenykeki, jiarỹ aki ararike, tai bederaty wese sõwemy maratynyke. Wahoõkeki tiu aõ biwinybenyõtyhy.

6 Inyõ waki rariõkeki, iwese iny bede rade rubu-di rahuleke, tii iwesele inyõ rahukre. Juhuu rimyre, idi heõty-ò rehure, tai roomyhỹre.

7 Kaiboho waribi boibenyõkeki, warybe õhõtí-ribi rosaõtyhykeki, aõtaxina wadee bexitõenybenykre, tai ibutumy adee ariwahinykre.

8 Iwese bede rade sõwemy raratynymyhỹre wese, kaiboho, aõna aõna wiwihikỹ biwinybenyke Deuxu dee. Kiakeki tahe Deuxu deàlana sõwemy ritakre.

9 Iwese Waha waluure wese jiarỹ aluurenre waluuna-ribi boibenyõke.

¹⁰ Wabede ywina inyõ riywinykeki, tii waluuna-ribi raõtyhy. Iwese Waha bede ywina reywinymyhÿre wese tahe Waha luuna-ribi jiarÿ tiu rahõnyõhyyre.

¹¹ Wadeysana awo-ki ratxikemy jiarÿ adi watzireri. Eysana sõwemy mabekemy adi watxiwãhã. Tai tahe warybe adee rarybere.

¹² Wabede ywina heka kaa rare: –Wiluukemy. Iwese jiarÿ aluure wese wiluurenykemy.

¹³ Inyõ taery dee rurukeki taluunadireki, tii luunatyhy ijõdire.

¹⁴ Kaiboho wadeewi biwinybenykewana tai inatyhymy wabiõwa toite.

¹⁵ Tahe aõ wadeõdumy aõkõhe araninirenykre. Kaiboho wabiõwa toite jiarÿ dori Waha-ribi raholare adee tuu relyywãhãre.

¹⁶ Kaiboho tahe tiwatatenyõhyyte, jiarÿ tahe aratarenyre kaiboho boibenykemy. Sõwemy aõna aõna wiwihikÿ botÿÿnybenyke. Tule kia aõna aõnamy tule roihyykemy. Tai tahe aõmy Waha-ribi wani-di bexitõenybenykeki, adee riwahinyhyy rareke.

¹⁷ Wiluubenyeke: –Kia tahe wabede ywina adeereny adiwahinyde.

¹⁸ Bede ludu iny mahãdu eramy reakeki myÿ uritere nohõtiõmy juhUU dori waderamy waluuõre.

¹⁹ Kai bede ludu iny tate-wana iny aluuke, tahe aõkõre. Tai tahe iny eramy reamyhÿre. Bede ludu mahãdu ribi jiarÿ aratara. Bede ludu mahãdu aõkõ tate urenana.

²⁰ Adee heka rarybere aõmybo. Uritere iribi nohõti lusaõmy kia wahe: –Deõdu tawedu ratyre aõkõ rare. Tai wadee aõbina binamy iny rotÿÿnymyhÿre. Adeereny tule aõmy rotÿÿnykremy wahe. Tiiboho warybe riywinyrenykeki, arybe tule tiiboho riywinyrenykre.

²¹ Kia tahe adee ratÿÿnymyhÿre wanimy rybe òraru-ki, tiiboho dori wadeõdÿÿna rieryõreki.

²² Tuu ararybeõre wana inihe tiiboho òrarudiõhyyrenyre. Katahe rarybere tai tahe tiiboho rarybeõtyhy rieryõremy.

²³ Inyõ waluuõkeki, tule Waha luuõtyhy.

²⁴ Jiarÿ heka ibutuko-ò wowydyna iitxerenarenymy rewinyõrewana, tiiboho òrarudiõhyyre inihe. Tahe rewinyamahãre, tuu robimyhÿrenyre, ihãrele tahe waluuõre tule Waha luuõre.

²⁵ Kiamy heka rotÿÿnyre bede ywina ritidÿÿna-ki roireki. Tai heka tuu rotÿÿnymyhÿre. Kiamy wahe ritidÿÿna-ki roire:

–Tii heka bede òraru aõkõ rare, ihãrele tahe iluuõrenyre.

²⁶ Deuxu Tyytybytyhy adee ariteõnykre. Tii, wiõhedÿÿdu rarekre inatyhynamy rierynanykre. Tahe, tii kedehemynykreu wamy rarybekre.

²⁷ Tule kaiboho wamy marybebenykre, wawana hyy ahãtenyteki.

16

¹ Kiamy adee rarybemahãre òraruna-txi ixekemy.

² Tiiboho heka anatakre tohodÿÿna hetowo-ribi. Kobe, bede dÿÿnana iõhõmy kadeakreu inyõ anarubunykeki, kia Deuxudeewimy tuu konohõtinykre. Tii Deuxu wiõhedÿÿdu raremy ixi-di kõnohõtinykre.

³ Tiiboho Waha rieryõhyyimyhÿrenyre tule riwaeryõmyhÿre. Tai tahe kiamy adeereny rotÿÿnymyhÿrenyre.

⁴ Iu adeereny aõmydÿÿnana kedehemynykreu, õhõtireny itxi reake timybo adeereny relyyretxi. Tiu heka tuu rarybeõhyyre, umywanarenhyhy dori wãhãre.

⁵ Katahe arakre wadeõdÿÿdu-ò. Kaiboho bÿÿraxibenyekõ aõbo tiobo arakre-ò.

⁶ Kaiboho heka tabedewomy toite kamy rarybereriki.

⁷ Ihãrele tahe inatyhymy adeeremy ararybekre: –Adeeremy awikre arakreki wahe. Jiarỹ araõkeki awiõhedỹỹdu, Deuxu Tyytybytyhy kanaõkre. Arakeki tahe tii aditeõnykre adeeremy.

⁸ Iu kanakreu, tii inydee kiditeõsinykre irayky binadiremy, iõbitina-di aõkõremy, iõrarunadiremy. Deuxu dori õrarudu riywisidỹỹnykre.

⁹ Taõraruna ixidee kiditeõsinykre tiiboho riwatyhynyõrenyriki.

¹⁰ Tahe ixidee kiditeõsinykre. Jiarỹ iratyre waõbitina direki. Waha-õ dori arakre, wamy bobibenyõtyhykemy.

¹¹ Deuxu ixiywisidỹỹna ixidee kiditeõsinykre kabede dinodu dee rarybere tii rexihukremy.

¹² Jiarỹ heka sõwemy adee ararybekemy watzireri, ibutumy tahe isiramy ixidee boholabenyke.

¹³ Txiõhe rare. Deuxu Tyytybytyhy kanakreu, inatyhymy adeeremy rarybekre inatyhyna-di ibutumy. Tarybe-di tahe rarybeõkre. Deuxu-ribi aõmybo roholaremy tahe rarybekre. Tule timybo aõna aõna rarekremy kanarybekre.

¹⁴ Tii waaõmydỹỹnana adeeremy ritỹnynykre. Tai kidiwatoosõnanykre.

¹⁵ Ibutumy Wahahõrõ heka wahõrõ rare. Tai heka tuu adeeremy rarybereri waaõmydỹỹnana adeeremy kiditỹnynykremy.

¹⁶ Urihimyõ riõre heka waõkre, idi tahe ixityre wamy bobibenykre.

¹⁷ Tahe ijõ ierydỹỹna mahãduõ widee rarybere: –Timybo tii rarybere: –Urihimyõ iõkremy tii rarybereri, tule ixiryre wamy bobibenykremy. Tule Waha-õ arakre. Timybo heka rieryrenyõhyyre aõmybo rarybera.

¹⁸⁻¹⁹ Tiiboho Jesuisi-õ rỹrãxirenykremy ratxirenyreri. Tahe Jesuisi rierymyhỹre tuu rỹrãxikre. Tahe Jesuisi tamyreny rỹrãxire: –Kaimy ixidee tỹrãxitenyteri. Wananamy waõkesenalemy.

²⁰ Inatyhymy adeeremy ararybekre: –Iny bede mahãdu urile reysakre, kaiboho tahe araeryrenyra urile mahinybenykre, birajuabenykre, mabedewobenykre. Idi tahe kaiboho beysabenykre.

²¹ Iwese hãwyy iijera iõhõreki, rabadewomyhỹre, taaõhõkỹmydỹỹnana-di rõhõtinyinmyhỹre. Idi tahe reamyhỹre. Iu tahe tõhõti rosamyhỹre tohouã tỹmyradile reysamyhỹre.

²² Iwesele kaiboho mabedewobenykre, ixityre wamy bobebenykre tahe, kaiboho beysabenykre. Inyõ heka deysana aribireny ritaõtyhy.

²³ Kiatxu tahe uritere watỹrãxidỹỹõmykre inatyhymy adeeremy rarybereri. Waha-ribi aõmy bexitõenybenykeki. Tii adeeremy kidiwahinykre wani õraru-ki.

²⁴ Tiu heka aõmy textitõenytenyõmahãte wani-di. Bexitõenybenyke, tai bitabenykre. Tai tahe kaiboho beysabenykre.

²⁵ Ibutumy rybewõtemy adeeremy rarybewãhãre wahe. Idi tahe tuu adeeremy ararybeõkre. Idi tahe itỹnytyhymy Waha aritỹnynykre adeeremy.

²⁶ Kiatxu tahe bexitõenybenykre wani-di jiarỹ ararybeõkre umyreny Waha-õ.

²⁷ Waha dori aluurenyre, kaiboho waluurenyreki, Deuxu-ribi anade tetyhynytenyteki.

²⁸ Waha-ribi anade, bede-õ adehemynyde ihãrele bede-ribi arakremy Waha-õ.

²⁹ Jesuisi ierydỹỹna mahãdu rarybere: –Wiji tahe itỹnytyhymy tarybeteri. Rybewõte-di aõkõ tarybeteri.

³⁰ Kai ibutumy teeryte. Inyõ dỹrãxiõmy adee. Kai inatyhymy Deuxu-di tanate. Kia jiarỹboho retyhynyrenyre.

³¹ Tahe Jesuisi tamy rỹrãxire. Inatyhymy wijityhyle tetyhynytenyta.

³² Wabededỹnanamy heka reara. Kaibohoõ sohoji sohojimy tasỹ tasỹ-ò rakre. Biwaribenykre ixi sohojilemy arỹikre. Tahe ixi-wana aõkõ watzikre, Wahawanale arỹikre.

³³ Kaheka aõna aõnamy adeereny rarybere ywina-di araykyreny-ki boibekre. Bede-ki kaiboho aõhõkỹmy botỹnybenykre. Ihãrele beysabenyke, Jiarỹ heka Deuxu òludu mahãdu-di ròtara.

17

¹ Jesuisi rarybemy rahudi tahe retehere biu-ò rarybere: –Waha, wabededỹnanamyhe reara. Ariòre watxiwãhãre. Wowydyna wadee biwahinyke tai tahe adee wowydyna adee ariwahinykre.

² Kai, Waha, ibutumy wadee ruruna tewahinyta iny deòdỹnamy. Tai umytuedeõna ariwahinykre biu-ò hedu mahãdu-ò.

³ Kia heka umytuedeõna rare: –Deuxu inatyhy tate sohojihyy tate. Tii araerynykeki tahe eòdỹna Jesuisi Kristu rierynykeki. Kia umytuedeõna rare tamyreny.

⁴ Aõ aõmysỹdỹnabo wadee tewahinyte, ibutumy adee rewinyre. Tai heka arawowydynyra kabede-ki.

⁵ Iu bede rexidelenyreu umywanahyy rarewãhã. Sõwemy loosõna nihikỹ-di rawãhãre. Tahe wiji, Waha, kia loosõnale ixityre bìdiwahinykre umywanahyy ararekre.

⁶ Kai iny mahãduõ wadee tewahinyte bede mahãdu-ribi. Tamyreny umy rarybemahãre. Juhu tiiboho ahõrõ roire. Idi wadee tewahinyte. Tiiboho arybe riywinymyhỹre.

⁷ Ibutumy waaõmydỹna aribi retamahãre. Kia heka wiji tiiboho rierynyra ibutumy aribi nade.

⁸ Aõrybebo wadee tewahinytamy tamy rarybemahãre. Tiiboho rityhinyreny, rierynyre aribi jiarỹ anade, kai wateòdỹdu tate.

⁹ Iòraru-ki adee rexitòenyre. Tiiboho amahãdu roire. Wadee tewahinyte, bede mahãdu-ò raru-ki aõkõ adee rexitòenyre.

¹⁰ Ibutumy wahõrõ, ahõrõ rare. Tule ahõrõ, wahõrõ rare. Tai heka iny mahãdu riwatoosõnanymyhỹre.

¹¹ Jiarỹ adee arakre tai kaki arareõkre. Tiiboho heka kaki rarirenykre. Tiiboho biyrubunykre, Waha, ani òbiti-di biyrubunykre, wadee tewahinyteki. Tai tahe iraykyreny wiwesehyymy roirekre.

¹² Tiiboho-wana rarewãhãu ani òraru-ki reyruibunymahãre, wadee tewahinyteki. Timy heka reõnonyõhyre ijõ, sohojile tahe reõnonyre. Juhuu dori Ritidỹna roire ijõ sohojiõ ariõnonykremy. Ihyy tahe reõnonyre, Judasi Isariò õnodỹduhyymy rarekre.

¹³ Ka tahe arakre arora-ò. Tii heka inyõ rarybemahãre ibutumy wadeysana iworeny-ò ralòmhyhkemy.

¹⁴ Jiarỹ arybe tamyreny rewahinymahãre. Bede mahãdu iny dori terareny, tiiboho bede mahãdu iny aõkõ roireki. Iwese jiarỹ bede ludu hãbu aõkõ rare wese.

¹⁵ Bede-ribi tarasamy aõkõ heka adee rexitòenyre. Urile ibina bina widỹ-ribi biyrubunykemy.

¹⁶ Tiiboho tahe wiji ijõ bede witxira ludu roire, iwese jiarỹ rare wese, wahe.

¹⁷ Arybe-di tiiboho biòbitinyke, tai ahõrõ mahãdumy rarekre. Arybe dori òbitityhy rare.

¹⁸ Iwese bede iny-ò tadiwateònyte wesemy, Jiarỹ tiiboho reteònyre bede ludu mahãdu-ò rarybekremy.

¹⁹ Tamyreny xiwena wesemy adee arexiwahinykre. Òbitihyomy ararekre, tai tiiboho òbitihyomy roirekremy inatyhyna-di.

²⁰ Aõ tamy sohojile aõkõ heka rexitòenyneri. Ibutumy kia rityhynymy rỹirakre-ò dori rexitòenyneri.

²¹ Tai tahe ibutumy wiwese wesemy rõhõtinyrenykre. Iwese, Waha, kai waki atxiteri wesemy tule aki watzireri wesemy tiiboho iny-ki roirekre. Tai bede iny mahãdu rityhynykre ateòdỹyna watzireri urenana.

²² Kai loosõna wadee tadiwahinyte, tahe tamyreny rewahinyre. Tiiboho sohojihyy weselemy roirekremy, iwese iny sohojihyy rare wesemy.

²³ Jiarỹ taireny wãhãre, kai waki ahãte. Tai tahe inyboho butuhyomy rokoirekre. Wii riòbitinyhỹrenykre. Tai bede mahãdu rierykre tadiwateònyteki. Tule wamahãdu luu tate urenana Waha, iwese waluure wese.

²⁴ Waha, titxibo ararekre, tiiboho wawanahyomy roirekre, wamahãdumy wadee tewahinyteki. Tai tiiboho waloosõnamy robikre. Kai dori bede ihokõule waluure, tahe loosõna wadee tewahinyte.

²⁵ Waha òbiti, bede mahãdu araeryõre Jesuisi tahe araeryre. Wamahãdu tule rieryre tadiwateònyte.

²⁶ Jiarỹ tiiboho reerynanyre ani-di. Ihãre ta arierynanykre. Tai aluuna iwese waki ratxireri wesemy taireny rarekre, tule jiarỹ taireny ararekre.

18

¹ Jesuisi rexitòenymy rahudi tahe roirenyre taerydỹyna mahãdu-wana Cedrõ beàwe-ribi kowa ijà-ò heka reuròenyre, tahe bederaty oworuro-ò rirònyrenyre.

² Judasi heka Jesuisi tyhedỹydu heka ibede rieryre, Jesuisi dori taerydỹyna mahãdu-di tamy rahyymyhỹre.

³ Tahe Judasi, soldado mahãduõ tadinodu-wana ributumy. Fariseu mahãdu-ribi xiwena wedu wahidỹydu-ribi Judasi soldado yrubudỹydu mahãdu rihitxinyre tule xiwena deòdu mahãduõ rihitxinyre tii-wana rakremy roirenyre. Tahe tamy ritehemynyrenyre tòbõra heòty-wana.

⁴ Jesuisi rexieryre ibutumy aõmybo tamy kodotỹnykre. Tahe iny mahãdu-ò rexidorunyre. Tahe rỹraxire tamy: —Mowe teijetyneri.

⁵ Tahe dirawyònyde: —Jesuisi Nazare hãwã ludu reijereri. Tahe Jesuisi rarybere: —Jiarỹ wa tiile rare. Tahe Judasi ityhedỹydu tii mahãdu wanale nade.

⁶ Jesuisi tamyreny rarybereu, tahe rexilòhòrarienyre iribi, tahe suòle re-serenyre.

⁷ Ixityre Jesuisi tamy rỹraxire: —Mowe teijeteri.

⁸ —Jesuisi Nazare hãwã ludu, tiiboho dirawyònyde. —Rarybera tahe jiarỹ raremy wahe. Tiwajeteri-wana tahe biwadyke urile ixinamy waijoi rirahuke.

⁹ Kawesemy wahe irybe hitxina wadee tewahinyteõ heka tiu reõnonyõhywãhãre. Jesuisi, kiamy rarybere tamyreny irybe hitxina wesemy ibutumy tuu rotỹnykremy.

¹⁰ Tahe Pedro tamaydese ritamy reare tahe xiwena wedu deòdu riwotõmonyre. Malòò heka inire. Pedro Malòò nohõti riorore ruruwe-ribi ludu wahe.

¹¹ Jesuisi rarybere Pedro-ò: —Amaydese birutyke. Jiarỹ Waha deewimy aõhebo arotỹnykrekõ aõbo wadi tahõtinyteri. Aõhõkỹmy arotỹnyõkemy aõbo wadi tahõtinyteri.

¹² Tahe soldadu, tadinodu-wana, judeu yrubudỹydu-wana Jesuisi rimyre ritaataamy ridyre.

¹³ Kia beòra Kaifa xiwena wedu tyhy rare. Anasi iriòre labie rare. Tai tahe juhuu Ana-ò ridyre.

¹⁴ Kaifa tahe juhuu judeu mahãdu-ò rarybere: –Wiji beòramy hãbuõ iny mahãdu òraru-ki rurukremy rahõtinyreri.

¹⁵ Simaõ Pedro inyõ-wana rare Jesuisi hewomy. Kia Pedro-wana rare, kia xiwena wedutyhy eryna rare. Tai tahe ralore òtity ijòrore-di.

¹⁶ Pedro tahe ahanakile rÿire. Kia Pedro-wana rare. Rohonyre hetowo-ribi hetoijø-di itxeredu-ò rarybere, tahe Pedro ridyre hetowo-ò.

¹⁷ Kia ijadòma, heto ijò-di itxeredu rarybere Pedro-ò: –Kai Jesuisi erydÿkÿna mahãdunokõ anobo tate. Tahe Pedro dirawyònyde: –Aõkõre.

¹⁸ Tahe soldado yrubudÿÿdu tai rahetòmÿ rÿimyhÿ, heto ludu deòdu mahãdu-wana txutàtà riki. Pedro iyrenykile rÿimyhÿ rahetòmÿ.

¹⁹ Tahe xiwena wedu tahe Jesuisi-ò rÿÿraxire. Aõhebohe aerydÿÿna mahãdu-wana tadotÿÿnymahãte. Timybohe tebedeerynymahãte.

²⁰ Tahe Jesuisi ritÿnynyre: –Ibutumy inyko relyymahãre iwasimy aõkõ heka relyymahãre. Judeu dohodÿÿna hetokile relyymahãre Deuxu dohodÿÿna heto-wana. Titxibo judeu mahãdu ributunymyhÿremy relyywãhãre.

²¹ Tai aõherekibo wadeele tÿÿraxiteri. Myÿraxike wadee ijohonadu-ò. Tii-boho ka rieryrenyryre aõmybo rarybere.

²² Jesuisi kia rarybereu, soldadu itxereduõ rihetenyryre. Tahe rarybere: –Tu heka rybeòmÿke xiwena wedutyhy-ò.

²³ Jesuisi dirawyònyde: –Jiarÿ ibinamy aõmybo rarybera-wana, manary-beke tuu. Aõkõkeki, awimy rarybera-wana aõherekibo tiwahetenyryte.

²⁴ Anasi tahe Jesuisi ridykemy riteònyre tataanadihyyle Kaifa-ò, xiwena wedutyhy wahe.

²⁵ Kowa tahe Simaõ Pedro ratximyhÿre rahetòmÿ rÿimyhÿ. Inyõ rÿÿraxire: –Kai aõbo ierydÿÿna mahãduõ tate. Tahe rexitxiõnyre. Jiarÿ ijõ aõkõ rare.

²⁶ Xiwena wedu deòduõ Pedro-ò rÿÿraxire: –Tii heka Pedro ritõhõtiorore ijoiõ rare. Tahe tamy rarybere: –Umy taheka rabire tii-wana bederatÿ oworuro-ki atximahã-ò.

²⁷ Pedro ixityre rexitxiõnyre. Aõwesele tahe hãnie hãbu robure.

²⁸ Idi tahe Kaifa heto-ribi Jesuisi ridyrenyryre ywisidÿÿna-ò bede din-odu heto-ò rudiulere. Tiiboho rirònyõhyryre brebuna-di rexisunyrenyheny. Rirònyrenykeki, tahe Pascoa worana bedehesi rÿsÿnaõ rirÿsÿõtÿhy. Tiiboho dori rõtõtinyre rirònykeki, brebuna raremy.

²⁹ Tahe Pilato ròhònyre tamy rarybekremy: –Tahe Jesusimÿ tamy rÿÿraxire kia hãbumy terajuatenyryteri aõhebohe rotÿÿnyra.

³⁰ Tahe dirawyònyde: –Aõbibina binamy rotÿÿnykõhyryra wana inihe aridyrenyõhyryeri.

³¹ Tahe Pilato rirawyònyre: –Bidyke abede ywina rybe-di biywinyke. Tahe judeu mahãdu rarybere: –Wabede ywina rybe warubudÿÿmy rybe aõkõ rare. Inyõ heka arirubunyrenyõtÿhy.

³² Kia rybe tahe Jesuisi rybe wesemy rare. Tii dori iximy rarybere timybo rurukremy. Tai timybo irybe hitxina wesemy raryberemy ibutumy rarekre.

³³ Ixityre Pilato ralore ywisidÿÿna-ò Jesuisi-ò rÿÿraxire: –Kai aõbo judeu mahãdu Iòlò tate.

³⁴ Jesuisi ritÿÿraxinyre: –ÿraxina aõbo ahòrõ rare ada ijõ aõbo wamy kia rarybere.

³⁵ Tahe Pilato rarybere: –Jiarÿ wa judeu mahãdu aõkõ wãhãre. Aõbinatyhÿmy aõbo he tewinyte. Judeu mahãdu wadee tiwadyte.

³⁶ Jesuisi dirawyònyde: —Waiòlòna hãwã bedede ludu aõkõ rare. Waiòlòna kaki ratxikeki wamahãdu wadee raaõbinanyke. Tai tahe judeu mahãdu-ò riwawahinykemy aõkõ watxiwãhãre. Tahe aõkõre kabede ludu aõkõ Waiòlòna rare.

³⁷ Pilato tahe rarybere: —Kai aõbo inatyhy iòlòmý tate. Tahe Jesuisi dirawyònyde: —Kai ka wamy tarybeta. Kia-ò uludumy anade. Kia-ò anade, inatyhynamy arelyykemy. Inyõ inatyhynamy luukeki warybe-ò roholamyhýre.

³⁸ Tahe Pilato rýÿraxire: —Aõbo inatyhyna rare. Ta rybe rahudi tahe judeu mahãdu-ò rarybekemy rare. Tiu kýny kahãbu-ki aõ ibinamy tai rahaõhyra.

³⁹ Inyõ ariteònykemy watxireri kaiboho wadi tõhõtynyhytyntereri ka woranabedehesi-ki. Tahe judeu Iòlò aõbohe ka ribi ariteònykre ywihyyle.

⁴⁰ Tahe ixityre ibutumy ryryrenyre: —Kia hãbu aõkõre, Baraba biteònyke (Baraba heka hãbu debore wasidu rare.)

19

¹ Idi tahe Pilato Jesusimý rerotiyhyta-di raòhòtekremy soldado mahãdu riteranyre.

² Soldado mahãdu edehéký rataanadile ira-ò ritidire, iumy tahe tylýreheký-di rityynyre iòlòtywesekekemy.

³ Tamy rehemynymyhýre: —Aõherebo iòlòtyhy wesena, tahe rihetenrenyre.

⁴ Pilato tahe ixityre ròhònymy iny-ò rarybekemy: —Ixityresý adeereny redyreni. Bierybenyke. Aõ heka tai ibinaõhyymy idi retehewãhãre.

⁵ Tahe Jesuisi ròhònyre ede rataana-di tylýreheký-di. Tahe Pilato tamy rarybere: —Kakýnyhe tiire.

⁶ Tahe xiwena wedu mahãdu, yrubudýÿdu mahãdu tuu robireu, ryryrenyre birubunybenyke, itxeò dee bitamadýÿnyke. Pilato rarybere: —Kaibohole itxeò-di bitamadýÿnybenyke. Jiarý tahe tai ibinamy aõki rahaõhyymahãre.

⁷ Tahe judeu mahãdu rarybere: —Jiarýboho kýny wabede ywina renydire. Rurukemy heka tuu bedede ywina roireri, tii dori Deuxu Riòremy rexininimyhýre.

⁸ Pilato kia-ò roholareu tahe, ruberutyhyre.

⁹ Ixityre ralore ywysidýÿna heto-ò: —Rarybere Jesuisi-ò, tiribi wexe tanate. Jesuisi rirawyònyõhyre.

¹⁰ Tahe Pilato rarybere: —Bidiwarawyònyõkre aõbo. Jiarý warurudire anarubunyke aõbo ada arateònyke aõbo.

¹¹ Jesuisi rirawyònyre: —Aruru-di aõkõ tate. Deuxu kidiwahinykekile tahe biwateònyke ada biwarubunyke. Tai tahe adee wawahidýÿdu aratyre iòraru dire.

¹² Tai tahe Pilato iteòdýÿmy rurure. Tahe judeu mahãdu tamy ryryre: —Kai biteònykeki tahe, Iòlò Cesar biòwa aõkõ tate.

¹³ Kiarybe-ò Pilato roholareu tahe, Jesuisi diòlòdýÿnyde ahana-ò. Pilato tahe ywisidýÿna ryna-ò rexisýnyre. Kia ubeni heka Rirana Ijàti inire. Tahe judeu rybe-ki heka Kabata inire.

¹⁴ Pascoa worana bedehesitxu sexta feira rýire. Txutyte iòhòmý tahe bedede rýire. Tahe Pilato rarybere judeu mahãdu-ò: —Betehebennyke aiòlòreny-ò.

¹⁵ Tahe tiiboho ryryrenyre. Bidybenyke! Itxeònihiký-ò birubunybenyke. Pilato tahe tamy rarybere: —Aiòlò aõbo, birubunybeny. Tahe xiwena wedu rirawyònyre: —Iny iòlòreny sohojile wa rare: —Cesar heka inire.

¹⁶ Tahe Pilato Jesuisi tamyreny riwahinyre rirubunyrenykemy.

¹⁷ Tiiboho heka Jesuisi ridyrenyre. Iitxeò tamy riwahinyre idi retyykremy. Tahe Kalvariu-ò idi ridymy rare. Kalvariu heka Kòkòta inire judeu rybe-ki.

¹⁸ Tai itxeò nihikỹ dee ritamadỹnyre ijõ hãbu inatxiõ-wana Jesuisi itxeònihikỹ itya-ki rỹire. Hãbu wiò wiòmy idi rỹire.

¹⁹ Pilato riritinyre ritidỹna-ò Jesuisi tyre-ò ritidire. Kawesemy ritidỹna roire: –JESUISI, NAZARE HÃWÃ LUDU, JUDEU MAHÃDU IÒLÒ.

²⁰ Hãwã-ribi ireheriòremy roire. Tai tahe sòwemy judeu mahãdu tuu robire iritidỹnamy. Inataõ rybemy wixira riti heka inataõmy roire. Judeu rybe ijõre, latim rybe ijõre, grego rybe ijõre.

²¹ Judeu xiwena wedu mahãdu Pilato-ò rarybere: –Judeu mahãdu Iòlò rarybere: –Iritidỹõmyke wa. Kawesemy biritinyke: –Tii rarybere judeu mahãdu Iòlò raremy.

²² Tahe Pilato dirawyònyde: –Iwese reritinyre wesemy rarehykre.

²³ Soldado Jesuisi itxeònihikỹ-ò ritamadỹnymy rahudi tahe, ityy ritxuatx-uakremy diwyde. Inaubiòwa heka riywinyra. Wirarea riwykremy soldado mahãdu idi rỹireri. Iyhyitxena tahe iretydyna-di aõkõ rare.

²⁴ Tahe ijõ widee rarybere: –Iyredỹrenyõmyke wa urile ta idi riki-hurenykre mobo ritakremy. Kia ryberiti-ki tuhy roire:

–Watyy ritxuatxware ijõ yre wimy riywinyrenyre. Tule wayhyitxena tyre-ki rehurenyre mobo ritakremy. Tahe iwese Tyyriti rarybere wese, soldadu mahãdu ibutumy aõhebo risỹnyre.

²⁵ Inaubiòwa hãwyy retehemy rỹimyhỹ Jesuisi itxeònihikỹ iòhòmy. Jesuisise taseriòre-wana, Marie Madalena ijõre, Klopa hãwyy ijõre.

²⁶ Jesuisi tadimy robireu, Joaõ, taerydỹna luunadu bire-ki, tahe rarybere: –Nadi beteheke wa kowa ariòre rare.

²⁷ Tahe Joaõ-ò rarybere: –Kaa adi rare. Ierydỹna Joaõ tahe ridyre taheto-ò tai rasỹnykemy.

²⁸ Jesuisi tahe rieryre ibutumy rexihuramy tahe rarybere: –Ariòkemy watxireri. Kaimy heka rarybere aõbo Ritidỹna-ki roire riwinykemy.

²⁹ Tai tahe vỹ mona silỹnyhỹki-ki raharenyre. Tahe Jesuisi-ò iwereheni wese-ò rituumy idi riteònyre iry-ò teòdimy.

³⁰ Jesuisi tuu riòre idi tahe rarybere: –Ibutumy Waha aõmysỹdỹna rexi-humy roire. Tahe ròtiòromy resere iule ta rurure.

³¹ Kia sabadotxu heka worana bedehesitxu nihikỹõ rare, brebuna rare. Tai tahe hãbu rubu itxeò-ki ririkòkemy tuu rarybemyhỹre. Tai Pilato-ò judeu mahãdu rexitòenyre hãbuti riòromy riteònykemy, itxeò-ribi ritakemy.

³² Tahe soldado mahãdu hãbuti wiòle riorore.

³³ Jesuisi tahe rurumy roireki iti riòròre.

³⁴ Soldadoõ tahe Jesuisi-ki rojyre iweki tahe hãlubule rohonyre bewana.

³⁵ Kia tuu rabire tahe òbitimy tuu jiarỹ rarybere, Joaõ wahe. Waritidỹna inatyhy raremy, reeryre. Kaiboho bityhynybenykeny, adireny watxireri.

³⁶ Kaheka ibutumy iritina hetxina tuu rarybere heka ibutumy tuu rotỹyre. Kia wesemy roire: –Iti riòròõkre, sohoji aõkõ.

³⁷ Ijõ iritinaõ kawesemy roire:

–Rirorenykre tònori-di idi reteherenykre tamy.

³⁸ Jyje heka Arimatea hãwã luduõ rare. Idi tahe tii Pilato-ò rexitòenyre Jesuisi umy rituumykeny. Tii heka Jesuisi heluduõ rare. Judeu mahãdu lau ruberumyhỹ tai Pilato-ò rare wasimy.

³⁹ Pilato tahe awiremy rarybere. Tahe Jesuisi umy riwyre. Nikodema tule rare Jyje-wana. Tii juhule rummy Jesuisi-wana widee raryberele rare. Tii

òwòrutyby òwòruòbru-wana aderòna wesemy diwyde sòwemy, 45 urihixinamy riutxienanyre.

⁴⁰ Tahe Jesuisi umy tyky jurarehe-wana ritỹtenyre aderòna wanahyyle. Kawesemy dori judeu mahãdu iny rituunymyhỹre.

⁴¹ Itxeòalamana-ribi bederaty oworu iòhòmý roire. Ityi-ki tahe wabede tamyra roire. Mana hãloo rỹire tai heka moo rawabedenyõhyyre.

⁴² Tai tahe rawabedenyre iòhòreki, tule judeu worana bedehesina txumy roireki.

20

¹ Semana juhu ludu txu Marie Madalena rehemynyre wabede-ò, rudile wahe. Mana ijòtòbòna iraylemy rỹiremy idi retehere.

² Tahe raijaranyre Simaõ Pedro-ò, ijõ Jesuisi luunaduõ wahe, Joaõ-ò, jiarỹle wahe. Tahe wadeereny rarybere: –Wahĩ tahe hãlokowoku-ribi ritakarenyra. Titxibo ritidira, rekerykõre.

³ Pedro tahe ròhònýre, Joaõ-wana wabede-ò roire.

⁴ Wiwana raijaranyre tahe jiarỹ Pedro ratyre raijaranyre tamy. Jiarỹle heka juhu tamy rehemynyre.

⁵ Tahe rawebesere iwo-ò itxeremy. Irahanalemy rabire. Ta ralòõhyyre tamy.

⁶ Idi Pedro rehemynyre ralore tamy. Tule irahanamy robire.

⁷ Jesuisi rati rasirahana rihitxinymy roire ixiwanale.

⁸ Tahe jiarỹ juhu rehemynyre tahe Pedro hewomy ralore. Tuu robire, retyhynyre.

⁹ Tiiboho dori ritina rieryrenyre ihãre tahe rierytyhykõlerenyre. Jesuisi rubu-ribi rexiixixanykemy ritina roire. Tii tahe rierytyhykõlerenyre. Tahe wiji rieryrenyra.

¹⁰ Tahe ixiby raòkeserenyre inyhetoreny-ò.

¹¹⁻¹² Marie tahe robumy wabede-ribi iòhòmý rỹire. Rawebesere tahe wabedewo-ò itxeremy. Inatxi ýjummy robire iwo-ki itykyuramy roimyhỹ. Ijõ heka rỹmy ronymyhỹ Jesuisi ratiherina tyre-ki. Ijõ tahe iwaherina-ki ronymyhỹ. Jesuisi umy tahe iõre.

¹³ Tahe ýju Marie-ò rỹýraxire: –Hãwyy, aõherekibo tabureri. Rirawyònyre: –Wahĩ kumy dokuri riwymy ramyhỹre. Rekerykõre titxibo ritidira.

¹⁴ Iu rarybereu tahe tahewoòle roosere. Jesusimy robire rỹimyhỹò. Tii heka rieryõhyymyhỹ tii Jesuisi raremy.

¹⁵ Tahe Jesuisi rỹýraxire: –Hãwyy aõmybo tabuteri, mobo teijeteri. Bederaty oworu ywidỹýdu raremy heka tii ròhòtynyre: –Tahe dirawyònyde: –Wahĩ, kai anobo karibi tetakata-wana wakoku tuu belykyke. Tahe jikarỹ karikorykremy.

¹⁶ Tahe Jesuisi tamy ryryre: –Marie! Marie rokesemy reare riijemy: –Wahĩ, erydỹkỹdu! (Tii hebraika rybe tuu rarybere: –Raboni, wahe.)

¹⁷ Jesuisi rarybere tamy: –Waroorehedỹýõmyke wa. Waha-ò dori raõlemy wãhãre tahe arakre. Kai tyhydỹýdu seriòre-ò makre tamy rybemy. Jesuisi rarybere kawesemy: –Arakre inytybyreny-ò, iny Deuxurený-ò.

¹⁸ Idi tahe rarybere erydỹýna mahãdu-ò Wanyrỹmy rabira. Marie Madalena relyyre timybo raryberamy.

¹⁹ Semana juhu ludu txuu, txioromy heka Jesuisi erydỹýna mahãdu wii ributunymy rỹimyhỹ hetowoõ-ki. Ibutumy ijò ritòbòtòbònyra judeu mahãdu lau brebumy. Jesuisi tahe nade iyreny-ò rexitỹnynyre. Rarybere: –Ywina araykywo-ki atxikemy idi watxireri.

²⁰ Kia rarybereu tahe tebò rurena riteòsinyre, tawerurena tule riteòsinyre tamy. Iule tahe reysarenynre Jesusimy robireki wahe.

²¹ Ixyby tamy Jesusi rarybere: —Ywina araykywo-ki rarekemy idi watzireri. Iwese Waha diwateònyde wese tule arateònykre.

²² Iu tahe ribunymy rarybere: —Deuxu Tyytybytyhy tetateri.

²³ Inyòrarunaõ biixãwididỹnykeki tule kia òraruna ariixãwidinyke. Tule aòkòkeki, ijõ òraruna biixãwididỹnyòkeki, kia tule ariixãwididỹnyòke.

²⁴ Tome (Inatxina iniõre) tii waòinatxi reurò mahãduõ rare, tahe tairenyõre heka Jesusi nadeu.

²⁵ Jesusi erydỹnaõ rarybere: —Wanyrỹmy rabirenyra. Tahe Tome tamyreny rarybere: —Retyhynyõre kỹnyhe.

²⁶ Semana sohoji bededỹnanamy idi rỹire, ixyby wii ributunynre Jesusi erydỹna mahãdu. Iu tahe Tome tii mahãdu-wana ratximyhỹ. Ijò ritòbòtòbònymy rỹimyhỹ. Tahe Jesusi nade iyreny-ò. Tamyreny rarybere: —Ywina-di araykywo-ki atxikemy idi watzireri.

²⁷ Tahe Jesusi Tome-ò rarybere: —Betehe inihe wadebòrurena-ò ebò inihe tamy biditidike. Tule wawerurena-ò ebò biditidikre. Itxiòdỹỹomyke wa, bityhynyke.

²⁸ Tome tai dirawyònyde: —Wanyrỹ, waDeuxu.

²⁹ Tahe Jesusi rarybere: —Tome, kai aõbo biwatyhynykre wamy tabiterikile. Sòwemy deysana inyõ kanakemy wãhãre tiiboho dori wamy robiõre hãrele riwatyhynyreny.

³⁰ Jesusi heka sòwemy aõwiihikỹbo riwinyre. Ierydỹna mahãdu heka kia aõmybo robire. Kia aõmydỹnana heka ihoõre kaki iritina-ki.

³¹ Kaa ritidỹna reritinyre Jesusi Kristumy rare. Deuxu deòdỹna rare. Kia bityhynybenykemy wahe, Deuxu Riõre wahe tetyhynyteri-wana tahe umyuedeõna bitakre, ini òraru-ki wahe.

21

¹ Iribi tahe Jesusi rexitỹnynre Tiberiade ahohokỹ ijà-ki. Kia wesemyre heka.

² Ibutumy heka juhu rỹimyhỹ: —Simaõ Pedro, Tome Didimo iniõre, Natanaeli. Tii Kana hãwã ludu rare, Kalileia bede-ki. Zebedeu riõreboho ijõre, inatxi Jesusi ierydỹnaõ ijõre. Rarekie.

³ Tahe Simaõ Pedro rarybere tamyreny: —Rià teredỹmy arakre. Imahãdu rarybere: —Jiarỹboho aroirenykre ahemy. Tahe roirenyre hãwò-di. Aõhomy aòkò ruu idireny nade.

⁴ Tahe bede ratỹnyrau heki Jesusi ãnyrakile ratximyhỹ. Ierydỹna mahãdu tahe rieryõhyymyhỹre.

⁵ Jesusi ryryre tamyreny rỹraxyre: —Ijoi moõ rokoreny. Utura aõbo temytenyta? Rirawyònyre: —Aòkòre wa.

⁶ Kaiboho biterebenyke rurunawe-ribi taita bimybenykre. Tahe riterenyre sòwemy rautxienyre irià heka ritusinyõhyymyhỹreny utura sòwerekiki.

⁷ Kia ierydỹnaõ Jesusi luunaduõ rare jiarỹ, Joaõ wahe. Jiarỹ tahe Pedro-ò rarybere: —Inynrỹle wa rare. Pedro Jesusi raramy roholareu, tatyky tawetyamy ritaamy tamy resere, tade hekỹlemy rareki. Tahe resere bera-txi tamy rakremy.

⁸ Ijoi mahãdu rià-di narurunymy nade utura sòwerekiki. Tahe 100 urihixi-namy ãnyra-ribi ratximyhỹreny.

⁹ ãnyra-ò rejuxunyre tahe, robirenyre heòtymy obiurawo-ki. Orotxu tule tai rỹire.

¹⁰ Jesuisi tamy rarybere: –Uturaõ bidiwybedenyke wiji temytenytaõ. Simaõ Pedro hãwororibile rià-di rarurunyre. Sõwemy heka tai utura nihikỹ rỹimyhỹ, 153 wahe. Ihãre tahe rià raòrõõhyyre.

¹¹ Tahe Jesuisi rarybere: –Manake hewa biroxiবেনyke.

¹² Ibutumy ierydỹỹna mahãdu rieryre tii inynyrỹreny raremy. Tai tahe inyõ rỹỹraxiõhyyre: –Mobo tii raremy.

¹³ Tahe Jesuisi orotxu rimyre. Tamy riwahinyre. Ixiyrubule utura tamy riwahinyre.

¹⁴ Kia tahe ihewotyhymy Jesuisi rexideòsinyre taerydỹỹna mahãdu-ò, rubu-ribi dexixade hewomy wahe.

¹⁵ Riroximy rahudi tahe Jesuisi Pedro-ò rỹỹraxire: –Simaõ, Joaõ riòre, kahãbu mahãdu waluure. Kai tahe iratyre aõbo waluure. Tii rirawyònyre: –Kai tiwaeryte, aluure. Tahe Jesuisi rarybere: –Wabudoeni riòre bidiòwenyke.

¹⁶ Ixityre rỹỹraxire: –Simaõ, Joaõ riòre, kai aõbo waluure. Tahe Pedro rirawyònyre: –Kohe, Wanyrỹ aluure jiarỹ, tiwaeryta. Tahe Jesuisi rarybere: –Bidyke wabudoeni biòwenykemy.

¹⁷ Ihewotyhymy tahe Jesuisi rỹỹraxire: –Simaõ, Joaõ riòre, kai aõbo waluure. Iu tahe Pedro rabadewomy ronyre, ixityremy rỹỹraxireki. Tahe dirawyònyde: –Wanyrỹ, ibutumy teeryte aõna aõna. Aluure heka, tiwaeryta. Tahe Jesuisi rarybere: Wabudoeni biòwenyke.

¹⁸ Inatyhymy adee ararybekre. Iu ijoi morõkõmy tatemahãu, ixiwanaletextiynymahãte ixidee wimy titxibo tamahãte. Iu tahe mamatuarinykre iny-witxira aratyynykre, Ebò biteòsinykre iny arataataanykre tahe inyõ aradykre titxibo noderamý beakreò.

¹⁹ Kiamy heka Jesuisi rarybere ritỹnynykremy timybo Pedro rubu-ò rỹikremy. Tai Deuxu riwowydynykre. Idi tahe Jesuisi rarybere: –Biwaheludunyke wa.

²⁰ Tahe Pedro retehere Joaõ Jesuisi hemy rareriò, Joaõ Jesuisi luumy raremyhỹ. Joaõ ihetxiu Jesuisi-ò iòhòmy rỹỹraxire jiarỹ wahe: –Mobo iwahisidỹỹdukremy, ihewo ludu roxina rỹireu.

²¹ Tahe Pedro Joaõmy robireu, rỹỹraxire Jesuisi-ò Joaõmy. Aõbo he tamy rotỹỹnykre.

²² Tahe Jesuisi rirawyònyre: –Tii rurukõlemy adòòsekemy idi watxikeki, timybo tahõtinyte. Adee tahe biwaheludunykekile awike.

²³ Ierydỹỹna mahãdu rarybemy raremyhỹ: –Kiamy wahe Joaõ rurukõlemy Jesuisi rarybere. Tahe kiamy aõkõ Jesuisi rarybere. Jesuisi juhoo rarybere: –Tii rurukõle adoosekre-wana, timybo tahõtinytenyteri.

²⁴ Jiarỹ tahe kia aõmydỹỹnanamy relyymahãre, Joaõ wahe, reritinymahãre. Inatyhymy kia tuu rare, jiarỹ tuu relyymahãre.

²⁵ Sõwemy aõmydỹỹnanamy tahe Jesuisi riwinyre. Inyõ ibutumy riritinykeki, iritina heka bederitỹxinykre tyyriti sõwekre-wana.

Aõhebo Rotÿÿnyre Aõhebo Rotÿÿnyre Jesuisi Erydÿÿna Mahãdu

¹ Juhuu adee ratyyritinyreu, Teòfilo, relyyre ibutumy Jesuisi aõbo riwinyré, aõmybo bedede rierynanyrémy.

² Deuxu Tyytybytyhy bedede erydÿÿnamy taerydÿÿna woludu mahãdu rierynanyre. Tahe taerydÿÿna mahãdu-ò bedede ywina riwahinyre. Iribi tahe Jesuisi ròsere biu-ò. Kia ibutumy juhuu adee relyyre.

³ Iribi itxeònihikÿ-ki rurureu, taerydÿÿna woludu mahãdu-ò rexitÿnynyre hãbu irudilemy. Tamyreny rexideòsinyre sòwetxu-di rulemy ratximyhÿmy. Inatyhy wa warybetyhy rare, tamyreny rarybere. Rexitÿnynyreu, tamyreny rierynanyre Deuxu Iòlònamy. Txuõ txuõlemy iny inatxiwaitue txumy rierynanyrhÿre.

⁴ Tiiboho-wana riroximy raremyhÿu, Jesuisi tamyreny rarybere: – Uritere Jerusalë-ribi ixitarasarenyòmy. Urile Deuxu Tyytybytyhy awo-ò kanakre xiery, Jerusalë-ribi boibenyke. Deuxu rarybere Tatytybytyhy kiditeònykremy. Tule juhuu Jesuisi kia rarybere.

⁵ Deuxu Tyytybytyhy aworeny-ò kanalokre. Kia ratisebenaõ wesele rare, Deuxu Tyytybytyhy ratisebena. Iwese Joaõ juhuu bero-ki iny risebenyre wese, kia rare. Kia-txu tahe, iòhòmy roire.

⁶ Tahe, juhuu ibutumy wirotynyreu, Jesuisi dee rÿÿraxirenyre: –Wanyrÿ, kai aõbo wiji iny Iòlòreny bediwahinyleke inywedureny wesemy ixybyronykemy.

⁷ Tahe Jesuisi dirawyònyde: –Waha-ki ywisidÿÿnatxu doimyhÿde. Tiile rierymyhÿre. Kai aõkòhÿykre.

⁸ Tahe Deuxu Tyytybytyhy aworeny-ò kanalokre, rurunatyhy arayky-ò bitabenyke. Kia tahe warubu-ribi waixixanamy belyykre ibutumy Jerusalë hãwã mahãdu-ò, Judeia hãwã bedede mahãdu-ò, Samaria hãwã bedede mahãdu-ò, iribi tahe ibutumy bedekonana bedede iny-ò.

⁹ Tarybe rahudi tahe Jesuisi ixihyy rexidymy raòwònyre biu-txi. Iõre biuwetyky-txi. Tiiboho rarirenyre bedede-ribi idi reteherenyre.

¹⁰ Idi retehemyhÿ iòtududÿÿtyhymy. Inatxi hãbumy ityy uramy aõwesele rÿimy reamyhÿre hãbu mahãduko-txi.

¹¹ Tahe tiiboho raryberenyre: –Hãbu, Kalileia bedede mahãdu, itxereõmahãbenyke. Jesuisi ka ramyramyhÿre biu-ò, Deuxu sÿ-ò. Iwese rarawesele ka ixybykòdòòsekre.

¹² Jesuisi erydÿÿna mahãdu ratximyhÿrenyre Oliveira òwòruraty hãwãlò-ki. Tahe dòsedenyde Jerusalë hãwã-ò. Jerusalë rehe iribi doide sohoji urihixina rehemymyrimyõlemy.

¹³ Tahe wii rotyrenyre rorukure ixitòedÿÿmy hetoratyawo-ki. Kahekani-di rirana rarekre tai rÿimyhÿrenyre: Pedro, Joaõ, Txiau, Andre, Filipi, Tome, Bartolomeu, Mateu, ijõ Txiau (tii Afeu riòre rare), Simaõ Zelòte, Judasi (ijõ Txiau iwitxira, kia riòre rare).

¹⁴ Ijõ iny tule tai rononymhÿ, Jesuisise, hãwyy ijõ rononymhÿ, Jesuisi seriòre mahãdu tule rorukumyhÿrenyre. Ibutumy rexitòenymyhÿrenyre wiwese wiweselemy ròhòtinymyhÿrenyre.

¹⁵⁻¹⁶ Ijõ txubiòwamy 120 inymy wii ributumy ixybyle. Tahe Pedro rÿire kiamy tamyreny rarybere: –Waityhydÿÿdu seriòre mahãdu, iwese Judasi

aõhebo rotÿÿnyre wesemy Davi tyyritinamy roimyhÿre. Kiamy wahe: — Jesuisi taòluduboho-ò ròhònyreu, Judasi tiiboho riwiòhenanyre. Iwese ka tyyritina-ki roire wesele, inatyhymy ibutumy rotÿÿnyre.

¹⁷ Judasi inybohoõmy raremyhÿ. Tii nieruõ ritare Jesuisi òludu-ribi tamyreny ridyrekì. Tahe kia nieru-di subutebedeõ riwyre.

¹⁸ Tahe idi Judasi rexibòtòtaara. Idi tahe tasubute bedero-txi taratyti-hikÿle-ribi resere. Tahe iumy ruare iwona rejuxunyre.

¹⁹ Iribi ijyy heka ibutumy Jerusalẽ mahãdu-ò tuu ijyy rÿire. Tahe kia subutebede rininirenyre hãlubu bederomy.

²⁰ Iòlò Davi kia wese riritinyre tawiunatyriti-ki:

—Ixinamy iheto rÿike, inyõ taisÿõmy.

Ijõ:

—Inywitxiraõ teròwymy tai rarekre iaõmysÿdÿÿna rimykremy.

²¹⁻²² Inyõ tahe teròwymy iaõmysÿdÿÿna rimykremy. Tule rikimyrenyke Jesuisi ixixanamy ijyyduõ inywanahyy rybe ritÿnynykemy. Inyõ Jesuisi sebedÿÿna-di itxereduõ rikimyrenykre, inyõ tuu robire Jesuisi nonanamy tule rikimyrenyke.

²³ Tahe inatxi hãbumy ritarenyre: Jyje (Basaba inire) Justu iniòrysina rare, ijõ hãbu tahe Matxia rare.

²⁴ Iribi tahe rexitònyre: —Kiamy heka Deuxu dee raryberenyre:

Kai Wanynyrÿreny, ibutumy inyrayky teeryte, Deuxu. Biteòsinyke tibo rik-itarenykemy.

²⁵ Tii ritÿxinykre ixihyymy ratximyhÿre mahãdu. Judasi deròwymy rarekemy, Judasi dori iny-ribi ròhònyre taòrarunaòwydÿÿnamy rare aõhòkÿmy rotÿÿnykemy. Tahe rare tiobo rareò.

²⁶ Wyhy raheto lisina wesemy idi rehure. Kiamy heka riwinyre tibo ròtakemy. Matxia tahe iribi ròtare. Tii tahe ralore waòsohoji reurò erydÿÿnaky-txi.

2

¹ Pentecostemy ninadu lisina kia txumy txuu rÿireu, ibutumy iny rorukurenyre tarynanakile.

² Aõwesele biu-ribi wodÿÿõ nade yhynihikÿwesele ibutumy heto-ò ralore tai rorukumyhÿrenyrewo-ò.

³ Heòty helÿÿresi wesemy nade. Iny sohoji sohoji tyre resere.

⁴ Ibutumy iny tykymy heka Deuxu Tyytybytyhy ralòmy rÿire. Ta raryberenyre iwitxira rybemy. Deuxu Tyytybytyhy tamy rybe riwahinyre wese tahe raryberenyre.

⁵ Deuxu dee òbitimy hãbu mahãdu noduõ rasÿnymy raremyhÿ Jerusalẽ hãwã-ki. Judeu mahãduõ ihÿre. Ibutumy bede bede hãwã hãwã-ribi nade.

⁶ Kia-ò roholareu, wii ributunyre ijohonamy. Tahe rexieryòhykyre aõmybo ròhòtynrè tahe widi bede riòtiinyre iny sohoji sohoji tarybe tarybeòlemy roholareki.

⁷ Urile bede riòtiinytyhyrenyre. Tahe raryberenyre deysana-di:

—Betehebenny iny, kowa rybedu Kalileia bede ludu mahãdu ratxireri.

⁸ Timykibo iny ryberenymy rarybereri. Iny sohoji sohoji tarybeòle raholareri.

⁹⁻¹⁰ Kaheka inyboho bede bede ludu roire: Partia mahãdu, Media mahãdu, Elaõ mahãdu, tule ka bede ludu mahãdu: Mesopotamia, Judeia, Kapadosia, Ponto, Asia, Frigia, Panfilia, Egito, Libia Sireni-wana iòhòre, Roma hãwã luduõ tule kaki ihÿre.

11 Timybo inyrybereny wixira wixira-ò iny roholarenryeri. Deuxu rybemy rarybereri ibutumy inyryberenymy. Ibutumy inyboho: Judeu, Judeuery-dÿÿna ityhydÿÿdu, tule Kreta mahãdu, Arabia mahãdu, Deuxu aõmydÿÿnana wihikÿ-ò raholarenryeri.

12 Tahe bede riòtiinyrenyre. Rieryõrenyre aõbo rare. Tahe widee rÿÿraxirenyre iny sohoji sohoji-ò aõbo raremy.

13 Ijõ tahe tawobinarybe rarybere:

–Tiiboho rururenryeri, itxÿtemonamy riõreri.

14 Tahe Pedro rÿire waðsohoji erydÿÿna-di, tahe tii rexidelenyre rarybekemy:

–Boholake inihe, ibutumy kaiboho, Judeia mahãdu, Jerusalẽ sÿludu-wana –kia bierybenykemy.

15 Inyõ rarybereri itxÿtemonamy riõrerimy. Tahe inatyhymy aõkõ rare. Txuu rati rariarerile heka rudiletyhyre.

16 Joel juhoo Deuxu rybeduõ rare. Tii narybede wijitxumy. Tahe iwese tii rarybere wesele, wiji ratximyhÿre. Tii rarybere:

17 –Kiamy Deuxu rarybere:

–Ikonanatxuu watyytybytyhyhykÿ aditeònykre ibutumy inydee. Ariòreny, hãwyy hãbu-wana, warybe rierynanykre. Weryrybò tahe matu-ari-wana rarasinytyhykre.

18 Ibutumy wadeòdu-ò, lerÿ, hãbu, ibutuwo-ò Deuxu Tyytybytyhy kanalokre. Tuu raryberenykre, ritÿnynyrenykre.

19 Aõ tÿmyra ariteòsinykre biu-ki, bede-ki. Hãlubu, heòty, worona-wana ròhònykre.

20 Txuu heka ilybyhykÿlemy relekre. Ahãdu isòhòkÿlemy relekre. Iribi tahe Inynyrÿtxu-ò rehemynykre. Kia txu awimy roikre. Inynyrÿ kòdòhònykre.

21 Kia bedeu, inyõ Inynyrÿnimy rexitòenykeki, tii jiarÿ aritakre iòraru-ribi. Kia Deuxu rybe rare.

22 Judeu mahãdu, Israeli mahãdu, boholabenyke warybe-ò: Deuxu sòwemy aõna aõna wixira wixira-di, bedeòby-di riwahinyre. Inatyhymy Jesuisi Nazare hãwã ludu mahãduõ riteòsinyre. Inatyhymy rare. Kaiboho heka teerytenyete.

23 Kaiboho Jesuisi temyteu, Deuxu juhoo rimykremy rierymyhÿre. Rexierymy ròhòtynyre kawesemy bede roimy rarekre. Kaiboho Jesuisi terubun-tytenyete. Kaiboho itxeò nihikÿ-ki tetamadÿÿnytenyete hãubina debòreny-di.

24 Tahe Deuxu ritare rubu-ribi riixixadÿÿnyre. Wabede Deuxu ribòhònyre. Iribi Jesuisi riòlòdÿÿnyre. Rubu heto tii rimyòtyhy.

25 Davi juhoo rarybere iwese Jesuisi rarybekremy:

–Wanyrÿ wawana ratxireri, brebu-di watxiòkre. Tii riwawiòhenanymyhÿre. Tai wawo deysana-di ritÿxinymyhÿre.

26 Wadòròtò wowydyna tamy rewahinymyhÿre. Reeryre ibutumy rubuhetowo-ki awityhymy wãhãré, iribi dori aròhònykre.

27 Kai watyytyby teriòte rubuheto-ki. Jiarÿ ariòre òbitityhy rare, tai waumyde rasunyòtyhy.

28 Kai tiwaeryte ibutumy umytÿmyra aõmydÿÿnana awana aratxikreu, deysana-di tÿximy biwasÿnykre.

[Kia ibutumy Jesuisi rarybekremy Davi rarybere.]

29 Pedro ijõ rarybemyhÿre: –Tahe kiamy heka mohòtynybenyke, Waseriòreboho. Davi heka aõ iximy aõkõ rarybereri. Tii tahe hãloowo-ò roire. Itityby heka kakile iny-wana ihÿre.

³⁰ Tahe Davi Inynyrÿ deròwomy rybeduõ raremyhÿ. Deuxu inatyhyna rybe-di Davi-ò narybede. Kia tahe: Iriòre riòreõ bede dinodumy kodonykremy taiòlò ryna-ki. Kia iòlò Davi rierye.

³¹ Davi tahe Kristu ixixanamy juhoo narybede. Kristu umy dori rubu-ki rariòhyre. Iumyde rarònyõre.

³² Jesuisi Kristu, Deuxu riixixanyre. Ibutumy inyboho tuu robirenyre.

³³ Jesuisi ronymyhÿre Deuxu rurunawe-ribi. Iwese rarybere wese Deuxu Tatytybytyhy tamy diteònyde. Tii adee diwyde. Kiamy tahe wiji tabitenyteri, taholatenyteri.

³⁴ Davi raòwònyõre biu-ò. Tahe kiamy rarybere:

Deuxu rarybere Inynyrÿ-ò:

—Bodonyke katxi warurunawe-ribi.

³⁵ Aòludu awarawo-ki arisÿnykre. Aòludu-di arehukre.

Kiamy tahe Deuxu Jesuisi-ò rarybere.

³⁶ Boholake judeu mahãdu. Kaa inatyhy hyy rare. Itxeònihikÿ-ki Jesuisi terubunytyente. Deuxu tahe Jesuisi ritidire ibutu-ò wedumy, ibutu-ò Kristumy, aõma, Deuxu deòdÿÿna.

³⁷ Tahe Pedro rybe-ki urile ròhòtinyrenyrene. Tai tahe Pedro-ò ijò erydÿÿna-ò rÿÿraxirenyre:

—Waseriòreboho, aõhebo rokotÿÿnyrenykre.

³⁸ Tahe Pedro dirawyònyde: —Bòòsebenyke aòrarureny-ribi ixyby Deuxu-ò. Idi tahe Jesuisini-di maratysebekemy aòraru ritakemy. Tai bimykre Deuxu Tyytybytyhy wahidÿÿna wesemy awo-ki rarekremy.

³⁹ Kristu juhoo rarybere:

—Ibutumy heka Deuxu Tyytybytyhy bimybennykre, ariòre rimykre, iny hãwã wixira ludu rimyke. Ibutumy Deuxu dee wimy tahe rimykre.

⁴⁰ Pedro relyymy raremyhÿ. Tamyreny rarybere tarasamy roikemy:

—Iny bina binahakÿ-ribi bexitabennykre.

⁴¹ Kia rityhynyré heka tahe ratisebedumy roiremyhÿ. Ralore kiatrixoo 3000 iny iòhòmy Jesuisi tyhydÿÿdu mahãdu-ò.

⁴² Tahe Jesuisi erydÿÿna mahãdu rierynanomyhÿre, wii ributunomy roiremyhÿ, paõ rioroororenyre wideereny: rexitòenymy roiremyhÿ.

⁴³ Iny sohoji sohoji bede riòtiinymy rabrebumy hitxinomyhÿre. Jesuisi erydÿÿna mahãdu bedeòby sòwemy riwinomyhÿre. Aõna aõna wiwihikÿmy riwinomyhÿre.

⁴⁴ Ibutumy rityhynomyhÿre mahãdu, sòwemy wii riwiutyre. Ibutumy aõna aõna wimy riywinyre.

⁴⁵ Taaõmydÿÿna, tasu-wana idi rohonyre. Wimy tahe ritxuatxquare. Ibutumy ityhydÿÿdu iaòkõ mahãdu dee riwahiriwahinyre. Inyõ aõna aõna rauhennykeki, tamy riwahinyre.

⁴⁶ Deuxu dohodÿÿna heto-ki txuõ txuõlemy wii ributunyre. Tahe tota hetomy paõ riyreiryrenyrene. Riroxirenyre ibutumy teysarenymy wii wese ròhòtinyrenyrene.

⁴⁷ Tuu reàlàrenyrene Deuxumy. Ibutumy iny hãwãhakÿ mahãdu awimy tai raharenyrene. Deuxu rimyre txuõ txuõ lemy ralore mahãdu kia ritakemy.

3

¹ Pedro, Joaõ-wana rare Deuxu dohodÿÿna heto-ò rexitòenykemy, inataõ òra bedeu.

² Deuxu dohodÿÿna heto ijò inyõ rininire, ijò ruxerahakÿ. Txuõ txuõlemy hãbu tibina ridyhyhyymy iny tamy reamyhÿre. Tamy iny ralòmyhÿkeò tamy nierumy rexitòenykemy. Tii tuu hyy uladumy reareu ihyy itibinare.

³ Pedroboho rirònyrenyreu, hãbu tibina tuureny robire. Nierumy tahe tamyreny rexitòenyre.

⁴ Pedro juhu tamy retehere idi rarybere:

—Bedeteheke wadireny.

⁵ Tai hãbu retehemu ronyre, nieruõ iribi riwykemy ròhòtinyre.

⁶ Pedro rarybere:

—Aõ ijòkõre, womati tÿrÿrÿhÿkÿ ijòkõ, pratakõ. Tahe aõbo idi watzirerile ta adee ariwahinykre. Jesuisi Nazare hãwãludunimy adee ararybekremy idi mariakremy. Kia deytana adee ariwahinykre.

⁷ Pedro, hãbu debò rimymy ritamadÿÿnyre. Aõwesele iruru iti-ò ralore.

⁸ Hãbu rexiwatxinymy tahe, ririradÿÿnyre. Ihyy ralore dohodÿÿna heto-ò. Deuxu dee deysamy rexiwatxinymy ralore.

⁹ Ibutumy iny idi retehere rariarerimy, Deuxumy reàlärerimy.

¹⁰ Inyõ rarybere: —Tii ijò ruxerahakÿ-ki nierumy rexitòenymyhyremy, inyboho tii reeryrenyre. Tai tahe idi bede riòtiinyreri timykibo aõna aõnamy rotÿÿnyramy.

¹¹ Hãbu ta Pedro, Joaõboho werora-ki xiery. Idi tahe ibutumy ributumy Salomaõ heto ijò ahanawo-ò.

¹² Pedro kia robireu tahe, tamy rarybere: —Judeu mahãdu, wadireny itxereõmy, bededÿÿõmy. Jiarÿboho inyruru-di aõkõ ka hãbu reteytenyrenyra, Deuxu rurudile wahe.

¹³ Abraõ, Ijai, Ijaõ kiaboho Deuxu heka hãbu riteytenyra. Tybyreny Deuxu kia heka riwinyra. Deuxu, Kristunimy riwowydinyre, rubu-ribi riixixanyraki. Kaiboho tahe Jesuisi Kristu tedytenynte Pilato-ò. Pilato tii riteònykemy ratxireriu, kaiboho tamy rarybere: —Aõkõre, tii deòdÿÿõmy. Ijõ biteònyke. Tai tahe rubudÿÿduõ riteònyre.

¹⁴ Jesuisi òraru widÿÿdu aõkõ rarehyymy raremyhÿ, ityhydÿÿdu ihÿre, òbiti widÿÿdu ihÿre. Kaiboho tii tetxiònytenynte, tewahinytenynte.

¹⁵ Umytuedeõna wahidÿÿdu tii rare. Kaiboho tahe terubunyte. Deuxu tahe tii riixixanyre rubu-ribi. Inyboho ierydu, iitxeredu ratximyhyrenyre.

¹⁶ Rityhynyrekile hãbu tibina reytemyhyre. Kia hãbu teerytenynte. Jesuisini tyhyna kia riwinyre. Hãbu ibuturu-ò reytera, tai òbitimy raramy ratximyhyre.

¹⁷ Jiarÿ reeryre kaiboho teeryõte aõbo tewinytemy. Tule adinodu rierykõlemy kia riwinyre.

¹⁸ Tahe Deuxu tarybe riwahinyre ihetxiu rybedu mahãdu-ò kia wahe tii rarybere Jesuisi rurukremy. Idi tahe irybe uludumy Jesuisi rurure. Iwese Deuxu rarybere wesemy heka irybe uludumy ròhònyre.

¹⁹ Kaiboho ixi-txi òhòti reakemy Deuxu-ò biòòsekemy. Tai tahe aòraru aribi tii ritakre. Inynyrÿ adeereny kiditeònyke aõwihikÿmy Deuxu-ribi, biu-ribi.

²⁰ Jesuisi Kristu wijityhyle kanaõkre. Aõna aõna juhu rÿimy rareke rexihudi, tahe kanakre.

²¹ Tii biukile rarekre wiji. Ijõ bede tÿmyra wihikÿkre iòhòmy rahudi tahe kanakre. Kia bededÿÿnanau tahe rarybere ihetxiu rybedu mahãdu.

²² Tahe Moisesi ijõmy rarybere: —Deuxu rybeduõ kedelekre asÿ, aijoi-ribi tii rarekre. Iwese Deuxu riwatara wese rybeduõmy ararekremy, iwesele tii Inynyrÿ kiditakre. Tamy bohohabenykre irybe aõmybo kanarybekremy.

²³ Kia, Deuxu rybedu rybe-ò inyõ roholakõkre-wana, Deuxu tii kanahukre. Kia Moisesi rybe rare, Pedro rarybere.

²⁴ Deuxu rybedu sòwemy kia bededÿÿnanamy rarybere. Samueli juhuy rarybere. Idi sòwemy ijõ kiamy rarybere. Ihyymy ta wiji kabededÿÿnana roimyhÿre.

²⁵ Kaiboho Deuxu ihetxiu rybedu roire atximahãtenyteri Deuxu juhuu rarybere Abraõ-ò. Ariòre-ribi iny sòwemy ruaruakre. Kia ibutumy ariòre hãwã hãwã-ki rasÿnykre. Kia iny-ribi inyõ ròhònykre ibutumy iny wiòhedÿÿdumy rarekre.

²⁶ Deuxu tariòre Jesuisi adeereny riteònyre aòraru-ribi arahitxinykemy, arawiòhenanykemy. Kia tahe Pedro tamyreny rarybere.

4

¹ Pedroboho tamyreny rarybereu, tamyreny rehemynyre Deuxu heto dohodÿÿna mahãduõ, ijõ tahe kia heto itxeredu dinoduõ, ijõ, saduseu mahãduõ. Inataõ ijoi tamy rehemynyre.

² Pedro, Joaõ-wana iny-ò relyymy raremyhÿ: –Inyõ Jesuisimy rityhynykeki, tii tule rubu-ribi riixixanykre. Jesuisi dori riixixanyre. Tahe Jesuisi ixixanamy tiiboho relyymyhyreki, kia hãbu mahãdu riykaranyrenyre.

³ Taita rimyre, Pedro, Joaõ-wana. Ròtena-ò ridyre. Wijile tahe tamy ixidee roholaõrenyra, txiorotyhyreki. Biurasou tahe roholakremy riòlòdÿÿnykre.

⁴ Iny sòwemy Deuxu rybe-ò kia txuu roholare. 5000 hãbumy, ijõ iny tule. Tiiboho Pedroboho-ò roholare. Tahe sòwemy rityhynyrenyre.

⁵ Itxu biòwamy tahe Jerusalẽ-ò rehemynyre dinodu mahãdu, matuari mahãdu, judeu bede ywina erydÿÿna mahãdu. Kia ijoi mahãdu ibutumy rehemynyre.

⁶ Anasi tule rehemynyre. Deuxu-ò xiwena wahidÿÿdu mahãdu wedu tii ratximyhyre. Tule Kaifa ijõ, Joaõ ijõ, Alexÿdre ijõre. Anasi sÿ mahãdu tule ijõre.

⁷ Tahe dinodu mahãduõ Pedroboho ritamadÿÿnyre ibutu kia mahãdu koò. Tahe ritÿÿraxinyre: –Aòrurudibo iny teteytedÿÿnymahãte. Monidibo kia tewinytenyte.

⁸ Ta Pedro tykemy heka Deuxu Tyytybytyhy ralore. Idi tamyreny rarybere: –Iny dinodu mahãdu, matuari mahãdu, adeereny ararybekre.

⁹ Hãbu tibina aõmydÿÿnanamy tiwatÿÿraxinyte-wana, adeereny kiamy ari-rawyònykre.

¹⁰ Jesuisi Kristu Nazare hãwã luduni-di kia rybe ruru-di rewinyrenyre. Kia tahe bierybenyke. Kaiboho dorikÿhe Jesuisi itxeò nihikÿ-ò teukotenyte. Deuxu tahe riixixanyre rubu-ribi. Tai tahe ka hãbu reytemy rÿimyhÿre.

¹¹ Jesuisi manaõ wesemy ratxireri. Kia-di rehure heto widÿÿduõ. Wiji tahe heto idile rÿimyhÿre. Kaiboho Jesuisi-di tehute heto widÿÿdu mana-di rehure wese. Wiji tahe Jesuisi Deuxu heto dinodu rarekre.

¹² Tamy inyõ rityhynyòkeki, òraru-ribi ritaòtyhy. Ijõni aòkõ iny rityhynyke, Jesuisi nile iny rityhynymy rÿikrele, òraru-ribi ritamy rÿirakre.

¹³ Pedro, Joaõ-wana brebuõ-di kia rybe ritÿnyrenyre. Tai iny bede riòtiinyrenyre, tiiboho dori tyyriti erydu aòkõ roire. Urile Jesuisi-wana roire-myhÿ, kiale iny rieryrenyre.

¹⁴ Hãbumy inyboho robirenyra juhuu itibinamy. Tai tahe inyõ aõbinamy tamyreny rybedu aòkõ rare, hãbu tibina riteytenyrenyraki.

¹⁵ Tahe ibutumy iny dohodÿÿna heto wo-ribi riteònyre. Tahe wimy rarybere:

¹⁶ –Aõhebo rokotÿÿnyrenykre kia hãbu-di. Inatyhymy tiiboho aõwiihikÿ riwinyrenyre. Kia rikixiònyrenyòtyhy. Ibutumy Jerusalẽ hãwã mahãdu kia rieryre.

¹⁷ Tai kiamy rokotÿÿnykre. Tamy rakarybekre tiu Jesuisimy ixyby rybeòmykremy. Tai Jesuisimy rybe-di rikixiãwãdidÿÿnykemy. Inyõ-ò kiamy rarybeòtyhy. Kiawese raryberenyre rybe ywidÿÿdu mahãdu.

¹⁸ Idi tahe rarariòwre Pedro Joaõ-wana tamyreny rarybere: —Jesuisi nimy rybeõmy, bibedeerynyõtyhy irybemy.

¹⁹ Tahe Pedro, Joaõ-wana tamyreny dirawyònyde: —Aõbo awityhyre. Iny-boho arybe arityhynkre aõbo ada Deuxu rybe aõbo arityhynkre.

²⁰ Aõbo jiarÿboho rabirenyré, raholarenyré, kialemy araryberenykre. Inyõ riwarybebinanyõtyhy.

²¹ Idi ta ixityre tamyreny raryberenyre, rybedÿÿõkemy. Tahe riteònyreny. Tamy aõwidÿÿõmy rÿimyhÿ hãwã mahãdu dee ruberurenkyreki. Hãwã mahãdu dori Deuxu reàlàmyhÿre hãbu riteytenyraki.

²² Kia hãbu dori 40 beòra ratyremy tabeòra-di ratximyhÿre riteytenyrau.

²³ Pedroboho rexitamy roirenyreu, ityhydÿÿdu seriòre òrysymy roirenyre. Tahe tiiboho tamyreny relyyrenyre iwese dohodÿÿna heto wedu matuari mahãdu-wana tamy rarybere wesemy.

²⁴ Tahe wiwese wesele rõhõtinyreri wese, Deuxu-ò rexitòenyreny: —Kai, Waha, inyIòlòreny atximahãte.

²⁵ Kai, ibutuwidÿÿdu tarybete: Davi, inytybyreny-di tarybete Atytybytyhy tamy ritÿnyre, iwese tii rarybekemy. Davi eòdumy raremyhÿ. Irybe tyyriti-ki roimyhÿre kiamy:

—Judeukõdu mahãdu raykarananyreri. Kia awimy aõkõ ihÿre. Waijoi aõ òbitinadibo aõkõ rõhõtinyreri.

²⁶ Dinodu mahãdu wiributunyre Deuxuòludumy rÿikremy. Tule Kristu, kia Deuxu deòdÿÿna òludumy rÿikremy.

²⁷ Arybe-ki, Waha, kia ritidÿÿna roire. Tule Waha, inatyhy rare. Ka hãwã-ki, Herodi, Poncio Pilato, Judeu mahãdu, Judeukõdu mahãdu, kia ibutumy ributunyre ariòre Jesuisi òludu rÿirakremy.

²⁸ Tiiboho riwinyre iwese kai tarybete wese, Waha, kia aõmydÿÿnanamy rÿirakremy.

²⁹ Kai, Waha, teeryte iwese tiiboho raryberemy, aõma, rybeõmykemy. Tahe eòdu biwiòhenanykre arybe-di ihãrele rarybekemy brebuõ-di.

³⁰ Biwiòhenanykre, Waha, eòdu mahãdu, webinadu mahãdu riteytenykemy. Tule aõna aõna wiwihikÿ riwinykremy, Jesuisi, Ariòreni òraru-ki kia riwinykremy.

³¹ Tahe ixitòedÿÿna rexihureu, heto ramytatamy. Deuxu Tyytybytyhy ibutumy iny tykumy ralore. Tai tahe Deuxu rybe rarybemyhÿre. Brebumy aõkõ tiiboho relymyhÿreny.

³² Ityhydÿÿdu mahãdu iaõna aõna-di wii riwiòhenanyre. Inyõ rarybeõhyra: —Kaa wahõrõ sohojile rare. Ibutu aõna aõna ibutu hõrõmy rÿimy raremyhÿ.

³³ Deuxu Jesuisi erydÿÿna mahãdu riwiòhenanytyhyre irybemy relyyrenyreu, kia Jesuisi rubu-ribi ixixana rybemy. Deuxu teysana tamy riwahinyre tule iny sòwemy iluurennyre.

³⁴⁻³⁵ Tai tahe ityhydÿÿdu mahãdu aõna aõnamy rasiranyõhyra. Ityhydÿÿduõ ityhymy rÿirakeki, taheto, tasubede rohonyre tahe nieru Jesuisi erydÿÿna mahãdu-ò diwyde. Idi tahe tii ritxuatxuamy riwahinyre ibutu-ò timybo iny sohoji sohoji tuu rurumy rÿiramy.

³⁶⁻³⁷ Jyje tule kiawesele riwinyre. Tasubedeõ-di rohonyreu, idi iòwy nieru diwyde Jesuisi erydÿÿna mahãdu-ò. Jesuisi erydÿÿna mahãdu Jyje rininire, Banabemy. Kiani inyrybe-ò riwiurònanyre, rybe-di wiòhedÿÿdu kiani rare. Tii Levi mahãduõ rare, Xibri bedebutesÿdu tii raremyhÿ.

5

¹ Idi tahe tule ijõ hãbu, Anania ninadu, tahãwyy Safira-wana tasubed-erenyõ-di rohonyrenyre.

² Iõwy tahe txuralemy diwyde Jesuisi erydÿÿna mahãdu-ò tasubede òwyreny ibutumy risÿnyrenyneri.

³ Tahe Pedro tamy rarybere: —Aõherekibo Satanasi-ò taholamy araykywo-ki atxiteri Deuxu Tyytybytyhy-ò taruiteri. Aõherekibo iõwyjura-di atxiteri.

⁴ Juhuu asubede tahonyõteu, ahõrõ rare. Aõhe, inatyhy? Inyõ adee rarybeõre idi bohonykemy. Idi tahonyteu, tahe, nieru ahõrõ rare, aõhe inatyhy. Aõherekibo aõbinahãkÿmy tahõtinyteri. Hãbu-ò aõkõ heka taruiteri Deuxu dee.

⁵ Kia-ò Anania roholareu, rurulemy resere. Tai ibutumy iny ruberutyhyre.

⁶ Weryrybò tahe iumy rihetynyre. Tahe ritamadÿÿnymy riwyre rihãloonykremy.

⁷ Inataõ òra bededÿÿnanamy reare tahe Safira, Anania hãwyy rehemynyre. Aõ heka rieryõhyre tahãbu rubuna rieryõhyre.

⁸ Pedro tamy rÿÿraxire: —Tiwesemybo asu teòwynyta —ahãbu rarybere wesele aõbo. Tahe tii dirawyònyde: —Kohe, iwesele rakòwònyre.

⁹ Ixityre Pedro rarybere: —Aõherekibo ahãbu-wana kai taruiteri. Tii teurihite aõbo riwinykeò. Beteheke, weryrybò ahãbu loodÿÿ-ribi rehemynyneri. Tule tii aradykre rubumy.

¹⁰ Tule tii aõwesele rurulemy resere. Weryrybò mahãdu ralore. Tai riwyre ritoonykre tahãbu biremy roikremy.

¹¹ Tai tahe ibutumy ityhydÿÿdu mahãdu ruberure. Ibutumy kia-ò roholareu, tule ruberumyhÿre.

¹² Jesuisi erydÿÿna mahãdu sòwemy wowydyna aõmydÿÿnana riwinyrenyre. Tule deytanawiwihikÿtyhy sòwemy riwinyrenyre. Ityhydÿÿdu mahãdu wii ributunymyhÿre Deuxu dohodÿÿna heto ube-ò. Salomaõ ubetyhy inire.

¹³ Kaa hãwã mahãdu dori sòwemy ruberumyhÿre Jesuisi erydÿÿna mahãdu-ò wiutadà lau. Tamy rabutuõhyre ijohonamy. Ihãrele tahe ijõ rityhynymyhÿre, ityhydÿÿdu mahãdumy ralokemy. Aõbinatyhymy heka inyõ ityhydÿÿdu mahãdu dee raryberenyõhyre.

¹⁴ Ityhydÿÿdu mahãdu rasòwerenymyhÿre. Hãbu, hãwyy tule ralòmehÿre Inynyrÿtyhy-ò.

¹⁵ Webinadu mahãdu iny ridymyhÿre ryò, hãwã hãwã-ribi. Tai Pedro nonana-ki riraòmymy roimyhÿ byretyre-ki, herina tyre-ki. Pedro ubòrò webinadu-txi reakemy tai riteytenykemy rexinohõtinyre.

¹⁶ Ibutumy Jerusalẽ-ribi iòhòmymy rÿira mahãdu nade webinadu-di, tule iny tyytybybina-di didyde. Tai tahe ibutumy reytere.

¹⁷ Xiwenawidÿÿdu wedu mahãdu, Jesuisi erydÿÿna mahãdu-ò rexinaanymyhÿre. Tule kiawedu eryna mahãdu riwiòhenanyre. Saduseu imahãdu ni rare.

¹⁸⁻²⁰ Tai tahe xiwe wedu mahãdu, Jesuisi erydÿÿna mahãdu rimumyrenyre idi rehurenyre hãwã ròtenawo-ki. Rummy tahe Inynyrÿ ÿjuõ riraynyre ijõ, tahe ridyre ahana-ò. Tamyreny rarybere: —Boibenyke Deuxu àlana heto-ò. Bexideòsinybenyke iny sòwehekÿ-ò. Tamyreny bitÿnybenyke timybo Jesuisi umytÿmyra inydee riwahinymyhÿre.

²¹ Iwese ÿju rarybere wese, txuu ratÿnyreu, dohodÿÿna heto-ò ralomyhÿre. Tai rierynarenymyhÿre. Tahe xiwena mahãdu wedu dehemynyde, tii-wana ratximyhÿ-wana. Israeli nohòti juradÿÿdu mahãdu ributudÿÿnyre. Ibutumy

judeu mahãdu, matuari mahãdu bedeerytyhy mahãduõ rare. Tahe soldado itxeredu-ò riteònyre ròtena-ò iòrysyrenymy.

22-23 Tahe roirenyre. Ròtena-ki tai rahaõre. Ròsere tamy relyyre: –Ròtena-ò rehemynyra. Txiòtòbòhòkÿlemy rÿire. Tahe reraynyreu, aõho aõkõ rare.

24 Dohodÿÿna wedu xiwena wedu-wana kia roholareu, tiiboho rexieryrenyõhyre aõbo riwinyrenykemy, aõhebo rotÿÿnyrenykemy.

25 Iwesemy ròhòtynyrenikõnalemy, inyõ dehemynyde. Tai rarybere: –Ròtena-ki tetidite mahãduõ, dohodÿÿna heto-ki ratxireri. Iny kowa ritohonyreri.

26 Tai tahe soldado dinodu, soldado itxeredu-wana riòryre ta didydenyde ywilemy. Tamy heka aõhe risÿnyõhyre mana hunadi tamyreny kedehukemy heka soldado ròhòtynyre.

27-28 Tahe dehemynyde ritamadÿÿnyre inysõwe weduko-txi. Tahe wedutyhy rybe ritelenyre: –Jiarÿboho heka juhu adeereny rarybere uritere Jesuisi nimy bede erydÿÿrenykõmykemy. Ihãrele tahe tuu tebedeerynytenyta ibutumu Jerusalẽ hãwã iny-ò. Ibutu-ò aeryna-di tariate. Wamy tarybetenyteri jiarÿboho Jesuisi rerubunyrenyramy.

29 Tahe Pedro tajoi-wana rarybere: –Iwese Deuxu wadeereny rarybere wese, arityhynyrenykre. Hãbuõ iwitxiramy wadeereny rarybekeki, tiu arityhynyõtyhy.

30 Kaiboho inatyhymy Jesuisi terubunytenyde. Òwòru nihikÿ itxe-ò teta-madÿÿnytenyde. Inybyby Deuxu tahe rubu-ribi riixixadÿÿnyre.

31 Deuxu tarurunawe-ribi debò-di biu-ò ritamadÿÿnyre ibutu iòlòmý rarekemy, ibutu tarasadumy rarekemy. Tai ibutu Israeli ijoi mahãdu-ò òraru bedewona ixãwina riwahinykemy.

32 Inyboho heka kia aõmydÿÿnamy robimyhÿrenyre, tai heka reerymahãrenyre inatyhy raremy. Inyõ Deuxu rityhykeki, tii Tatytybytyhy tamy kidiwahinyke. Tii tule kia aõmydÿÿnamy rarybemyhÿre.

33 Xiwena wahidÿÿdu mahãdu wedu tamy roholarenyre, rakyarananyrenyre, irubudÿÿmy idi ratximyhÿ.

34 Tahe fariseu mahãduõ lamamy rÿire. Ònosõna erydÿÿduõ tii ihÿre. Ibutumy iny tii riijemyhÿre rityhynymyhÿreki. Kamalie heka inire. Tahe tii rarybere: –Jesuisi erydÿÿna mahãdu-di biòlònyke urihimyo ahana-ò.

35 Idi tahe tajoi-ò rarybere: –Hãbu, Israeli mahãdu, bexiijebynyke kia hãbu-ò, aõhebo botÿÿnybenykre.

36 Kaiboho dori òhòtirený beabenyke Teudani-txi. Juhuu dori dinoduõmy tii raremyhÿ. Tii ixiòlòdÿÿnihikÿmy iximý rarybere. Sõwemy heka iny tii-wana raremyhÿ tahe 400 hãbumy ihemy rare. Inyõ tahe rirubunyre rityhynymyhÿre mahãdu tahe iribi raubÿtÿre. Tahe aõ heka rimyõhyre, ibutumy iõre.

37 Iwitxirau ijõ-txi òhòtirený rearenýke. Judasi inire. Tii Kalileia mahãduõ rare. Iu bede dinodu iny-di rariareu tahe, tii rexiòlòdÿÿnyre. Sõwemy iny riheludunyre. Tii tule rurure. Taityhydÿÿdu mahãdu tule raubÿtÿre.

38 Tule wahe kahãbu mahãdu rare ixinamy biteònyke. Hãbu kia aõmydÿÿnana dinodukeki, aõmy aõkõ relekre.

39 Deuxu tahe idinodukeki, tiu heka idi behuõtyhy. Deuxu òludu wesemy heka kai tesumahãte. Tai tahe Kamalie rybe-ò ibutumy rityhynyrenyre.

40 Didyde he Jesuisi erydÿÿna. Rihetenyre. Idi tamyreny rarybere: –Rybeõmyke Jesuisi nimy. Tahe ixinamy riteònyre.

41 Tiiboho iribi rexitarenyre, reysatyhymy ratximyhÿ, Jesuisini òraru-ki dorikÿhe tiiboho aõhòkÿmy rotÿÿnyrenyraki.

⁴² Txuõ txuõlemy Rybewihikÿ ritÿnynymyhÿrenyre dohodÿÿna hetomy dori, heto hetomy tiiboho rarybehymy rÿimyhÿre: —Jesuisi inatyhymy Kristu rare, Deuxu deòdÿÿnamy nade.

6

¹ Tahe ityhydÿÿdu rasõwetyhynymy rÿiramyhÿ. Iu ityhydÿÿdu wytese mahãdu-ò rÿsÿna riwahinymyhÿreu, grego rybedu rexinaanymyhÿre rÿsÿna wahidÿÿdu mahãdu dee. Judeu mahãdu wytese sõwemy rÿsÿna ritamyhÿrenyre waratyrereny. Kia wesemy heka judeukõdu mahãdu rarybere.

² Jesuisi erydÿÿna waò inatxi reurò mahãdu, ibutumy ityhydÿÿdu didydenyde kia aõmydÿÿnana-ò roholakemy. Tahe raryberenyre: —Deuxu rybe erydÿÿ rikiixãwidinyrenykeki, wytese rÿsÿna ariwahinyrenykemy, kia heka òbiti aõkõ rare.

³ Tai tahe kaiboho hãbu mahãduõ bitabenyke ayreny-ribi debò inatxi reurò hãbumy bitabenyke. Hãbu tyhydÿÿnale, Deuxu Tyytybytyhy-di tÿximy rÿiralemy, iny bedeeryhykÿle, kiaweselemy hãbu bitake. Tiiboho dori aõna aõna ywisidÿÿdumy roirekre, kiawesemy iaõmysÿdÿÿnarenykre.

⁴ Tai jiarÿboho arexitòenywãhãrenykemy watxiwãhãrenyre. Deuxu rybemy arierynanmahãrenyke. Kiawese Jesuisi erydÿÿna mahãdu rarybere.

⁵ Ibutumy heka tuu raryberé, tamyreny awire. Tai tahe hãbu mahãdu ritarenyre. Estevaõ ijõre, tii Deuxu Tyytybytyhy-di tÿximy rÿira, tatyhyna-ki tÿximy rÿira. Filipi ijõre, Prokoro ijõre, Nikanu ijõre, Timaõ ijõre, Parmena ijõre, Niolau ijõre, Niolau tahe Atxiòkia mahãdu juhUU rare. Judeu bede erydÿÿna tyhydÿÿdu juhUU tii rare.

⁶ Ityhydÿÿdu mahãdu tiiboho didydenyde Jesuisi erydÿÿna mahãdu-ò. Deuxu-ò rexitòenyrenyre tahe Jesuisi erydÿÿna ityre tebò ritidirenyre.

⁷ Deuxu rybe heka ibutu ijohonanamy rÿire. Ityhydÿÿdu mahãdu-ò sõwetyhymy tamy ralõmyhÿre Jerusalê hãwã-ki. Xiwena widÿÿdu tule sõwemy Jesuisi rityhynyre.

⁸ Estevaõ heka Deuxu luuna sõwemy ratximyhÿre. Sõwemy Deuxu ruru-di ratximyhÿre. Deuxu urihixina nihikÿmy inyko-ò riwinymy raremyhÿ. Aõdeytenawihikÿ wesemy tule riwinyre.

⁹ Kowa hãwã-ki tahe judeu dohodÿÿna heto iwitxira rÿimyhÿre. Libertu mahãdumy rexininire taijoi. Imahãduõ Sireneu ludu rare, ijõ Alexÿdria hãwã luduõ rare. Tiiboho doidenyde Estevaõ-wana rybe ritxiõnykemy. Silisia bede luduõ-ribi, Afia bede luduõ-ribi tii-wana doidenyde.

¹⁰ Estevaõ rarybere bedeerynihikÿ-di. Kia mahãdu tahe irybe weseõre. Estevaõ dori, Deuxu Tyytybytyhy-di ihÿre.

¹¹ Tai tahe hãbuõ-ò raryberenyre: —Kaiboho heka Estevaõ dee maruibenykre. Jiarÿboho dori araòwynyrenykre. Kawesemy maruibenykre, my: —Jiarÿboho Estevaõ rybe-ò raholamy rãiwãhãrenyre. Tii Deuxumy aõbinahakÿlemy rarybemyhÿre, Moisesimy tule.

¹² Kia-ki heka Estevaõ dee iny raykarananyre, judeu matuari mahãdu tule tamy raykarananyre. Ibutumy Estevaõ òrysomy roirenyre tahe rinyrenyre, ridyrenyre rybe ywisidÿÿna-ò.

¹³⁻¹⁴ Tahe ruidu mahãdu didydenyde. Tahe tiiboho raryberenyre, my: —Ka hãbu heka Deuxu dohodÿÿna hetomy ibinamy narybede. Tii rarybere Jesuisi Nazare ludu iny dohodÿÿna heto kidibòhònykre. Jesuisi iny aõmydÿÿnana kidiwitxiranykre, ibutumy Moisesi inydeereny rierynanyre.

¹⁵ Ibutumy iny ywisidÿÿna mahãdu Estevaõ-ò retehere. Iòsana, ÿju òsÿnÿwesehekÿlemy tamy rõhõtynyrenyre.

7

¹ Tahe xiwe wedu Estevaõ-ò rÿÿraxire: —Kia aõbohe inatyhy rare.

² Estevaõ tahe dirawyònyde. Wanyrÿboho, Wahaboho, Ijyymy adeereny arelyykre. Warybe-ò boholabenyke. Mesopotamia bedeki Deuxu biu-ribi rexitÿnynyre Abraõ-ò, inytybyreny-ò, Harã hãwã-ki rasÿnyõreu.

³ Tamy Deuxu rarybere: —Abede-ribi boibenykre. Alahi riòkòre mahãduy-ribi makre. Manakre ijõ bedeki adee dori asÿbede ariurihikre.

⁴ Iribi tahe Abraõ Kadeu mahãdu bedeki roirenyre Harã hãwã-ò tai rasÿnykemy. Iribi tahe tyby rurureu, Deuxu kaò didyde ka bedeki titxibo kaiboho wiji tasÿnymahãtemy.

⁵ Abraõ-ò sÿõ riwahinyõre timy urihimyòõhy. Tahe idi tamy riwahinykemy, iriõre-ò riwahinykemy Deuxu tamy rarybere. Abraõ iriõreõre, ihãrele Deuxu tusÿmy tamy rarybere.

⁶ Tule Deuxu tamy rarybere: —Ariòkòre ijõ bedeki rasÿnykre 400 beòramy. Kowa ariòkòre heka deòdu wesemy raaõmysÿdÿÿkre. Iwedu mahãdu heka ibinamy idi rarekre.

⁷ Jiarÿ tahe iny ariòwynykre, Deuxu rarybere, ibinamy widi rÿira mahãdu. Iribi ka bedeki kòdòhònykre wamy kaki reàlãmhyÿkemy.

⁸ Idi urihixinaõ Abraõ-ò Deuxu riwahinyre, tõhòti itxi reakemy. Uladu notyyresyna aõmydÿÿnana tamy riwahinyre. Idi tahe Ijai reareu, Abraõ Ijai notyy riorore debò inataõ reurò txu-di. Iribi tahe Ijai tariõre Ijaò ritõtykyorore. Iribi tahe Ijaò tariõre notyky riorore. Tiiboho waò inatximy riòrenaduõ roire. Inatyhymy tiiboho inytybyreny rare.

⁹ Idi waòsohoji inytybyreny mahãdu Jyje dee rexiwobinanymyhyre. Idi rohonyre Egito-ò ramyhyre mahãdu-ò. Tahe Deuxu tii-wana raremyhÿ.

¹⁰ Iaõhòkÿmy dÿÿnana-ribi Deuxu ritamyhyre. Egito iòlò, Faraòmy ninadu rare. Deuxu heka Jyje luomy Faraò risÿnyre. Faraò rue-ò heka Jyje be-deerydÿÿna sòwemy ratximyhyre. Faraò ibutu dinodumy Jyje risÿnyre. Tule Iòlòheto-di itxeredu tyhymy Jyje ronyre.

¹¹ Ramamy rubu nihikÿ dehemynde ibutusu-ò, Egito-ki, Kanaã bedeki. Sòwemy iny aõhòkÿmy rotÿÿnyre. Inytybyreny rÿsÿnaõ-ki rahaõhyre.

¹² Egito maixòmo rÿimyhÿreò, Ijaò roholare. Tahe inytybyreny riteònyre iòrysmy.

¹³ Idi tahe ixityre iòrysmy riteònyre, Jyje tamyreny rexideòsinyre. Tai tahe Faraò Jyje sÿmahãdu rieryre.

¹⁴ Tahe tyby-ò Jyje tarybe riwahinyre tamy sÿmy kanakemy ibutu imahãdureny-wana. Tiiboho 75 inymy rimyre ibutumy.

¹⁵ Tai tahe Egito bedeki Ijaòboho roirenyre. Iribi tahe Ijaò rurure. Idi tahe ibutumy inytybyreny rurure.

¹⁶ Tahe iumyreny diwyde ritoonyre wabede-ò, Sikenì hãwã-ò. Abraõ kia wabede juhoo riwyre nieru-di, Emo riõre-ribi.

¹⁷ Deuxusÿ-õ wahidÿÿna juhoo rarybere Abraõ-ò. Ibededÿÿnana iòhòre Deuxu tamy riwahinykemy. Inyboho Egito-ki rasòwemyhyre.

¹⁸ Ikonanau tahe iòlò iwitxiramy ròhònyre Egito bedeki iòlòmy. Tii Jyje rieryõre.

¹⁹ Tii iny ijoi riitxenanymyhyre. Tii heka ibinatyhyre inytybyreny-ò. Uladu-di heto-ribi rehukemy riteònyre. Tai iny riòrereny ituerenyre.

²⁰⁻²¹ Iu tahe Moisesi reare. Tii uladu ruxeratyhyre. Tii tahetotyhykile raumyreny inataõ ahãdumy idi rÿire. Heto-ribi dòhònydeu, Faraò riõre rimyre itibiedÿÿmy tariõre wesemy.

22 Ibutumy Egito bedeerydÿÿnana tamy rierynanyre. Tii heka rexiòlònnyre rybedunihikÿmy aõmydÿÿna widÿÿdu nihikÿmy.

23 Moisesi iny inatxiwa itue beòra-di rÿireu, tamahãdu, Israeli mahãdu roramy nade.

24-25 Egito mahãduõ Israeli mahãduõ rihetenyre, Moisesi tuu robire. Tahe Moisesi tii rirubunyre, Israeli mahãduõ riwiòhenanykemy, Egito mahãduõ rexiòwynymy. Deuxu Moisesi debò-di iny ritakre. Kiamy tahe Moisesi mahãdu rierykremy Moisesi ròhòtinyre. Tahe aõkõre rieryòhyre.

26 Ijõ txu biòwamy tahe Israeli hãbu inatximy wiwana ròrenymyhyÿ. Moisesi ronyre iyreny-txi riixãwididÿÿnykemy. Rarybere: –Kaiboho seriòre toite, aõherekibo wii tehetenytenyteri.

27 Kia òhòtedu Moisesi ritorunyre rarybere: –Mobo he wawedurenymy arasÿnyra, awaywisidÿÿdu renymy.

28 Kai biwarubunyekõ aõbo, iwese kau Egito mahãduõ terubunyte wesemy.

29 Kiarybe-ò roholareu, Moisesi rahenyre Midiã bede-ò rasÿnykemy. Idi tahe inatxi Moisesi riòremy kowa reare.

30 Iny inatxiwaituemy beòra-di bededÿÿnana riwyre. Tahe Sinai hãwãlò bederahy-ki raremyhÿu, ÿjuõ tamy rexitÿnynyre bede rade tòbòhòkÿy-ki tamy roomyhÿre.

31 Moisesi kiamy dobideu, bede riòtiinyre. Tamy itxeremy rehemynyre. Tahe Deuxu rybe-ò roholare.

32 Jiarÿ boreny Deuxu watzireri, Abraõ Deuxu, Ijai Deuxu, Ijaò Deuxu. Tahe Moisesi ruberutyhyre, timy heka tamy reteheòhyre.

33 Tahe Deuxu tamy rarybere: –Awa bitake, suu awarawo ludu dori, brebuna rare. Jiarÿ heka Deuxu watzireriki, biwatyhynyke.

34 Wiji tahe waijoimy rabireri Egito-ki. Tiiboho aõhòkÿmy rotÿÿnyrenyre. Ibru-ò raholareri, iohitxi-ò raholareri. Jiarÿ heka aditadenykre iribi. Manake, Egito-ò arateònykre. Kia heka Deuxu rarybere Moisesi-ò.

35 Ka Moisesi heka Israeli mahãdu juhoo teramy reare. Tamy rarybere juhoo mobo wawedurenymy arasÿnyra, waywisidÿÿdurenymy. Tiile heka Deuxu riteònyre idinodumy rarekemy, tarasadumy rarekemy. Bederade tòbòhòkÿ ÿju, heòtywoludu, iwiòhedÿÿdure.

36 Tahe Moisesi Egito-ribi iny ritamyhÿre. Egito bede-ki bedeeryna aõna aõna wiwihikÿ-wana. Iwese ahohokÿbesò-ki tule bederahy-ki iny inatxiwaitue beòramy aõmydÿÿnana wiwihikÿ riwinyre.

37 Kaa Moisesi heka rarybere Israeli mahãdu-ò: –Ayreny-ribi, amahãdu-ribi rybedu nihikÿmy Deuxu kiditamadÿÿnykre iwese riwatamadÿÿnyre wese.

38 Kaa Moisesi taijoi-di wii ributunyre, bederahy-ki ihÿmyhÿ inytybyreny-wana heka ratximyhÿ. ÿju-wana tii ratximyhÿ Sinai hãwãlò-ki iu tamy rarybere. Deuxu rybe tyhy iru-di ratximyhÿ. Tahe rybe bede ywina heka Moisesi-ò Deuxu riwahinyre inydeereny kidiwahinykemy.

39 Tahe inytybyreny ityhydÿÿ deramy rare. Reòbyòrenyre. Ixybyle Egito-ò ròðsekemy ròhòtinyre.

40 Tahe iny Araõ-ò rarybere: –Ritxoo deouxõ inydeereny biwinyke inkorenymy rakemy. Moisesi, Egito-ribi iny ritarenyre, tahe titxibo ihÿre reeryrenyòre.

41 Kiatxu tahe broreni riòreõ riwinyre. Tahe xiwemy ritoonyrenyre iko-ò, ritxooko-ò. Rexideysanyrenyre aõbo tebò-di riwinyrenyeki.

42 Tai tahe Deuxu rexitare iribi, taina rityhynkemy. Iwese rybeduõ iu tyyriti-ki riritinyre wese:

–Israeli mahãdu, kaiboho xiwena tetoonytenynte, iròdu xiwena tetoonytenyta. Wadee aõkõ tahe kia tetoonytenyta 40 beõramy bederahy-ki.

43 Kaiboho tewytenyta ritxoohetero riòre. Mòlòki inire, aritxoo deuxuni. Tule Renifa taina ijõ aritxoonire. Kia tewinytenynte, tetyhynytenynte wahe. Tai tahe arateõnyrenykre Babilonia weribihikÿ-ò wahe.

44 Inytybyreny heka Deuxu rybe bede ywina tyky heto riwinymyhÿre bederahy-ki. Iwese Moisesi-ò Deuxu riteõnyre wesemy kia riwinymyhÿrenynte.

45 Iribi tahe inytybyreny tatyby-ribi tyky heto ritare, tii-wana riwymyhÿre kabede-ò, Josue tadinodu-wana. Iu Deuxu iko-ribi riteõnyre, ibutumy tai sÿ mahãdu tii-wana riwymyhÿre, ihyy tahe Davi reare.

46 Deuxu heka sõwemy Davi luure. Davi heka rexitõenyre Ijaò Deuxu dee heto riwinykemy.

47 Tahe tii aõkõ riwinyre, Salomaõ iwidÿÿdure.

48-49 Deuxu biukisÿdu tahe hãbu widÿÿna heto-ki rasÿnyõmyhÿre. Iwese Deuxu rybeduõ rarybere wese:

–Biu tahe warynana rare, bede tahe wawa elehyna rare. Timybo inyõ wadee heto riwinyke, Inynyrÿ rarybere. Iwo-ki tahe waelehyna arihynyõkre.

50 Deuxu rarybere:

–Ibutumy aõna aõna jiarÿ rewinyre.

51 Tahe Estevaõ rakonananyre he tamyreny rybena heka ròhõnyre: –Kaiboho araykytererenynte. Deuxu Tyytybytyhy rybe-ò taho-laõhyymahãtenynte. Iwese iny tybyreny riwinyrenynte wesemy.

52 Ibutumy Deuxu rybedu mahãdu-ò ibinamy iny tybyreny riwinymyhÿrenynte. Tiu ihetxiu Deuxu òbiti hãbu kanakèò, tiiboho raryberenyre, rirubunyre irybedu. Kaiboho tahe Deuxu òbiti hãbu-di ijõ-ò tewahinytenynte, terubunytenynte.

53 Deuxu bede ywina ÿju mahãduõ adeereny diwahinydenyde, kia bede ywina kaiboho tetatenynte, tahe tetyhynyõhyymahãtenynte.

54 Tahe kiamy Estevaõ rarybereu, tiiboho heka rebure nihikÿre. Urile txyde-ki ruruamyhÿre tamy.

55 Estevaõ tahe Deuxu Tyytybytyhy-di iwoki ratximyhÿre. Tahe biu-ò retehere: Deuxu loosõnamy robire. Jesusimy robire lamamy rÿire Deuxu rurunawe-ribi.

56 Tahe Estevaõ rarybere: –Jiarÿ wa rabireri biu juxahakÿmy. Jesusimy rabireri Deuxu deòdÿÿna. Lamamy heka rare Deuxu rurunawe-ribi.

57 Tahe ryrymyhÿre, tõhõti ritòbõnymyhÿrenynte, raijeranyre tamy.

58 Ridyre hãwã-ribi, mana-di tahe tamy rehumyhÿre, rirubunyrenynte. Erydÿÿna ijyydu tahe taderamy ririrenyre Saluko-txi tamy riyrubunykeny.

59 Iu mana-di rehureu, Estevaõ rexitõenyre: –Wanyrÿ, Jesusi, watyytyby kai bimyleke awana ararekemy.

60 Tahe tatiowotimy resere, ryryre: –Wanyrÿ, kia òraruna iòwydÿÿomyke. Idi tahe rurure.

8

1 Salu tahe kia òbitimy raremyhÿ rõhõtinyre, Estevaõ rurureu.

2 Iribi tahe ityhydÿÿdu mahãdu aõhõkÿmy rotÿÿnymyhÿre. Judeia wedu mahãdu dori, iòludumy rÿimyhÿre. Tai tahe ityhydÿÿdu sohoji sohoji Jerusalè hãwã-ribi ròhõnyre. Urile Jesusi erydÿÿna mahãdu sohojile rÿire. Judeia

bede hãwã mynamyna robÿtÿre, Samaria bede-ò tule. Tahe hãbu ityhydÿduõ Estevaõ umy riwyrenyre rihãloonykremy. Tahe rahinymyhÿrenyre, rirajuamyhÿrenyre.

³ Salu tahe ityhydÿdu mahãdu hudumy. Wii risÿnymyhÿre. Ihetorenywo-ò ralòmyhÿre tahe ridymyhÿre hãwyy, hãbu, ròtenawo-ò riròtenykemy.

⁴ Iu tahe ityhydÿdu mahãdu ijõ bede-ò roire mahãdu Deuxu rybemy relyymyhÿre ibutu hãwã-ki.

⁵ Filipi ijõ raremyhÿ. Tii Samaria hãwã-ò rehemynyre. Tahe Kristumy tamyrenyre relyyre.

⁶ Iny sówemy rityhynyrenyre aõmybo Filipi rarybemyhÿremy. Tahe deyt-edÿÿna wiwihikÿmy iny robimyhÿrenyre, tyytybybina deòdÿÿnamy tule ro-birenyre.

⁷ Tahe riteònyreu, tyytybybina iny-ribi ròhònyre, rirajuamyhÿre. Tule iny webinadu raraserasemy roimyhÿre, tule inytiere-wana. Tahe ibutumy riteytenymyhÿre.

⁸ Tai tahe ka hãwã-ki deysana nihikÿ rÿire.

⁹ Samaria hãwã-ki tahe hãbuõ raremyhÿ. Simaõ inire. Tii wodohonana widÿÿdu ihÿre. Iny riitxenanyamyhÿre. Tahe riòtiinyrenyre. Tii iximy rarybemyhÿre moõ wiwihikÿmy raremyhÿmy.

¹⁰ Ibutumy iny tii rityhynyrenyre, hãbu wedu mahãdu tule, hãbu aõtxile mahãdu tule. Tiiboho raryberenyre: –Simaõ Deuxu ruruna rare. Ruruna nihikÿ inire.

¹¹ Tiu bedeu aõkõ iny riitxenanyamyhÿ, riòtiinyrenyre. Tai tahe rityhynymyhÿrenyre.

¹² Iu tahe Filipi Jesuisi Kristunimy, Deuxu òlònamy tamy relyymyhÿre. Tai tahe rityhynymyhÿre, raratysebemyhÿrenyre.

¹³ Iribi tahe Simaõ itxenadÿÿdu tule Jesuisimy reòbyre, raratysebenyre. Tahe Filipi-wana ihyy ròirenyre bede òtiidÿÿna-di retehemyhÿre aõbo Filipi riwinyremy.

¹⁴ Samaria hãwã mahãdu tahe Deuxu rityhynyre. Kia-ò Jesuisi erydÿÿna mahãdu roholare Jerusalẽ-ki. Tai tahe Pedro Juaõ-wana riteònyrenyre kowa-ò.

¹⁵ Rehemynyrenyre, Deuxu-ò rexitòenyrenyre Deuxu Tyytybytyhy tamy kanakemy.

¹⁶ Inyõ dori Deuxu Tyytybytyhy-di rÿiõmyhÿ. Urile Jesuisi Inynyrÿni-di raratisebedÿÿmy rÿiramyhÿ.

¹⁷ Tahe Pedro Juaõ-wana tebòreny ityrereny ritidire. Tahe Deuxu Tyytybytyhy tamy nade.

¹⁸ Kiamy Simaõ robire, aõma, debòtidina-di Deuxu Tyytybytyhy nade.

¹⁹ Tai tahe tamy rexitòenyre: –Ka heka wanieru rare. Bidiwahinyke kia ruruna. Tahe inyõ tyre wadebò aritidikeki, tamy Deuxu Tyytybytyhy kanakemy.

²⁰ Tahe Pedro tamy dirawyònyde: –Aõkõre, anieru rakemy watxireri awanale rububede-ò. Deuxu ruruna dori anieru-di biwykemy mohòtinyke.

²¹ Kia heka aõmysÿdÿÿnakõre wayreny-ki. Arayky, awo, òbitimy aõkõ ratximyhÿre Deuxu dee.

²² Mabedewomy atximahãke aòraruna-ki, aõbo tahòtinyte. Bexitòenyke Inynyrÿ-ò tii òsana aòraruna-ribi araixãwididÿÿnykre.

²³ Kai dori texiwaritinymahãte. Aòraruna adi nararotinymyhÿde.

²⁴ Tahe Simaõ tamy rarybere: –Wadee bexitòenybenyke Inynyrÿ-ò, kia aõkõ waki kÿnyikemy, aõmybo tarybetenyteki aõbo.

²⁵ Iribi tahe, Pedro Juaõ-wana Inynyrÿ rybemy rarybemyhÿrenyre, relymyhÿrenyre tai. Sõwemy Samaria bedede hãwã hãwã-ki Rybewihikÿ relymyhÿre, Jerusalẽ-ò ròðserenyreu.

²⁶ Filipi Samaria hãwã-ki raremyhÿ. Tahe Inynyrÿ ÿjuõ tamy rarybere: — Bexiywinyke, make ibò-ò. Kasa hãwã ryhykÿ bimyke. Jerusalẽ-ribi ryy rare, bederahy-ki rare. Tahe Filipi rare.

²⁷⁻²⁸ Tahe inyõ-wana wibymy reare. Tii Etiopia bedede luduõ rare. Etiopia bedede iòlò hãwyyõ rare. Kanasi inire. Inieru-di itxeredu kahãbu rare. Tii enuku rare. Tii ròðsereri Jerusalẽ-ribi. Kowa Deuxu reàlãmy rare, tahe tasÿ-ò ròðsere iawarutewedile. Isaia Deuxu rybedu tyyriti-dí rariamy tii ronymyhyre.

²⁹ Deuxu Tyytybytyhy Filipi-ò rarybere: —Make, awarutewe-ò, mariake ibire-di.

³⁰ Tahe Filipi tamy raijaranyra. Roholare tyyriti-di rariareriò. Tahe Filipi rÿÿraxire: —Kai aõbo teeryte aõbo rare, aõdibo tariateri.

³¹ Tahe dirawyònyde: —Aõkõre, inyõ dori wadee ritÿnynyõre. Timybo arierykremy. Manaòwònyke wabire-ò bodonyke. Tahe Filipi raòwònyre.

³² Tii kia-di rariareri tyyriti-ki:

—Iwese iny budoeni rubudÿÿdu-ò riwyre wese, tii iwesele ridyrenyre. Budoeni-ribi iny isira riororeu, rirajuaõlere. Iwesetyhyle Tii rarybeõlere.

³³ Iehehenamy tamy raryberenyre wese hãbu ehehe wesena, òbitimy aõkõ idi riywinyrenyre. Inyõ rarybeõtyhy iriòkòremy, iumy dori bede-ribi ituera.

³⁴ Tahe tii Filipi-ò rarybere: —Wadee manarybeke momybo rybedÿÿdu rarybereri, iximy aõbo ada ijõmy aõbo.

³⁵ Tahe Filipi kia Tyyritidile rexidelenymy relyyre. Jesusimy Rybewihikÿ Tÿmyramy tamy relyyre.

³⁶ Rydi rariamyhyre idi rehemynyrenyre beõ-ò. Tahe tii Filipi-ò rarybere: —Kowa bera rare. Biwaratisebenyekõ aõbo, adee awikeki.

³⁷⁻³⁸ Tahe Filipi dirawyònyde: —Awire wadee. Inatyhymy arayky-ki tetyhynyte-wana, aratisebenykre. Tahe rarybere: —Retyhynyre, inatyhymy Jesuisi Kristu Deuxu Riòre raremy. Tahe tewe irira riixãwidinykemy riteònyre. Tahe itewe-ribi ròhònyra, bera-ò riberenyre. Tahe riratisebenyre.

³⁹ Bera-ribi rotuoreu, Filipi aõwesele iõmy reare. Inynyrÿ Deuxu Tyytybytyhy ridyre. Hãbu ixyby Filipimy robiõhyre. Tahe tary-di rariamy rare. Teysanatyhy-di tÿximy rare.

⁴⁰ Idi tahe Filipi rexieryre, Asoto hãwã-ki rehemynymy raremyhÿ. Iribi tahe Rybewihikÿ-di relyyre ibutumy hãwã hãwã-ki. Ikonana tahe Sesaria hãwã-ò rehemynyre.

9

¹ Salu rarybemy raremyhÿ, Inynyrÿ Jesuisi ityhydÿÿdu mahãdu rubudÿÿmy. Tii rarybemy raremyhÿ Deuxu dohodÿÿna heto wedu-ò.

² Tamy rexitònyre: —Arybe tyyriti ariwykremy watzireri Damas hãwã dohodÿÿna heto wedu-ò. Tai tahe kowa-ki ityhydÿÿduõ-txi areakeki, aõtxile hãbu hãwyy aõbo, aridykemy Jerusalẽ hãwã-ò, ariròtenykemy.

³ Tahe iòhòmy Salu rare Damas hãwã iròte iòhò-dí, idi tahe loosònahakÿ Salu tyre resere.

⁴ Tahe bede-txi resere, tahe rybeõ roholare: —Salu, Salu, aõherekibo aõna aõnamy ibinamy wadee tatÿÿnymahãte.

⁵ Tahe tamy rarybere: —Mowexe, Wanyrÿ atxiteri. Tahe rirawyònyre. —Jiarÿ Jesuisi watzireri, aõna aõnabina binamy wadee tadotÿÿnymahãte wahe.

6 Myike, mariamy tahe hãwãhãkÿ-ò malokre. Taita inyõ adee rarybekre aõhebo botÿÿnykremy.

7 Tahe Salu ijoi riòryre rybeòhyy rÿimyhÿ. Rybe-ò roholare, tahe tuu robiòhyyre.

8 Salu suribi rÿireu, iruetà wesele heka ratximyhÿ. Tahe hãbu tii-wana ihÿmyhÿ heka iaxiò-ki idi rimymy idi rare Damasu hãwã-ò.

9 Tahe hãwãhãkÿ-ki txu inataõ txu idi rÿire aõmy robiòhyyre, riroxiòhyyre, bemy riòòhyyre.

10 Damasu hãwã-ki ityhydÿÿdu wihikÿ rasÿnyre. Anania inire. Wanyrÿ Jesuisi tamy rarybere rasi weselemy: —Anania. Tahe rirawyònyre: —Aõbo rare, Wanyrÿ, kakile watxireri.

11 Tahe Jesuisi riteònymy rarybere: —Myike, make òbitiry-ò, Judasisÿ heto-ò. Tai bitÿÿraxinyke titxibo Salu ratxirerimy. Tarso hãwãludu tule rininire. Tii wiji wadee rexitòenyre.

12 Tii umy robireri tarasi-ki. Kai tehemynteri wese, irue-ò ebò bitidikemy, biteytenykemy.

13 Anania Jesuisi-ò rirawyònyre: —Wanyrÿ, sòwemy kia hãbumy rybe-ò raholara. Aõbina binamy ityhydÿÿdu-ò risÿnymy raremyhÿ Jerusalẽ-ki.

14 Deuxu dohodÿÿna heto wedu tyriti diwyde kaki ityhydÿÿdu rutysÿny rirutekemy.

15 Tahe Inynyrÿ tamy rarybere: —Aõwaxina tamy makre, Jiarÿ dori, kia retara wadee aõmysÿdÿÿdu nihikÿmy rarekemy, judeukòdu mahãduko, iòlòrenyko, tule Israeli mahãduko wanimy rarybekre, aõma, warybetÿmyra wihikÿmy.

16 Tamy aritÿnynykre tiwesebo aõhòkÿmy rotÿÿnykre wanimy rybeòraru-ki. Kia ibutumy Jesuisi rarybere Anania-ò.

17 Idi ta Anania rare tamy Judasi heto-ki. Ralòmmy rahudi, tahe, tebò ityre ritidira. Tahe rarybera: —Salu, waseriòre, Inynyrÿ adee riwateònyre. Tiile, Jesusile heka ryro-ki adee rexitÿnyre. Tiile heka riwateònyre arue ritxuakemy, tule Deuxu Tytybytyhy atykmy ralòkemy.

18 Tahe aõwesele irue-ribe rejujura aõ yjy wesele. Tahe ixityre robira. Idi rÿimy rahudi tahe, Anania riratysebenyre.

19 Idi riroximy rahudi tahe, inatyhymy raruruterenyre. Tahe Damasu hãwã-ki tiwese txubo idi rÿire kia erydÿÿna mahãduy-ki.

20 Idi dohodÿÿna heto-ki rybe ritÿnyre. Rarybere: —Jesuisi heka Deuxu Riòrele rare. Kiawesele rybe-di ritynynymyhÿre.

21 Tahe uri ijohonadu mahãdu urile bedè riòtinymy rÿimyhÿ. Tahe inyõ rarybere: —Kia aõ heka ityhydÿÿdu rubudÿÿdule ratxireri, Jerusalẽ-ki. Kiale heka kaò nade ityhydÿÿdu ritaataamy ridykemy dohodÿÿna heto wedu-ò.

22 Salu tahe ire riixiòlòdÿÿnymyhÿhyyre. Judeu Damasu hãwã ludu rieryòhyymyhÿ aõmybo rarybemy. Tii rarybere: —Jesuisi Kristule rare, Deuxu deòdÿÿna rare.

23 Tiwese txubo txu idi rÿidi tahe judeu mahãdu rarybere irubudÿÿmy.

24 Tahe Salu rierymy rÿimyhÿ tahe inonana-ò rexiywinymy rÿimyhÿ. Rummy tahe, txumy hãwã ijò-ki rirubunykemy retehemy rÿimyhÿ.

25 Tahe ijò erydÿÿna mahãdu weriri nihikÿ riwinyre. Rummy tahe Salu riòlòdÿÿnyre òtity nihikÿ kanaweribi-ò, hãwã ahanaube-ò.

26 Salu Jerusalẽ-ò rehemynyreu, ityhydÿÿduky-ò ralòkemy ratxireri, tahe urile ilau ruberumy rÿimyhÿ. Erydÿÿna mahãdu ròhòtinyre: —Tii ityhydÿÿdu inatyhy aõkò ratximyhÿremy.

²⁷ Banabe tahe rityhynomy ridyre Jesuisi erydÿÿna mahãdu-ò. Tahe relyyre iwese Jesuisi Salu-ò ryki rexitÿnynomy tamy raryberemy. Tule relyyre iwese Jesuisinomy Salu rybe ritÿnydÿÿnomyhÿremy, Damasu hãwã-ki.

²⁸ Tahe taihy Salu ratximyhÿre. Tiò tiòle reamy ratximyhÿre rybe ritÿnydÿÿnyrerimy ihÿre, ruberumy aõkõ.

²⁹ Salu rarybera grego rybe heka erydÿÿna mahãdu-ò. Widee rarybe-hyymyhÿreny. Idi tahe kia mahãdu Salu rubudÿÿmy roromyhÿre.

³⁰ Ityhydÿÿdu seriòre kia rieryreu, tahe Salu ridyrenyre Sesaria hãwã-ò. Iribi tahe Tarso hãwã-ò riteònyre.

³¹ Idi tahe ywina reare ityhydÿÿdu mahãduy-ki. Ibutumy hãwã bedemy, Judeia, Kalileia, Samaria, ityhydÿÿdu mahãdu iruruteremy relere. Ibutumy Inynyrÿ dee òbitina-ki rariamyhÿre, rityhynomyhÿre. Deuxu Tyytybytyhy teysatyhomy tamy riwahinyre. Sõwemy tahe ralore iheki ityhydÿÿmy.

³² Ibutumy hãwã hãwãmy Pedro rariamyhÿre. Tule robehere Lida hãwã-ò ijõ ityhydÿÿdu mahãdusÿ-ò.

³³ Tai Eniamy ninadu-txi Pedro reare heka rare. Iumy heka imyremyrehÿ heka rare. Debò inataõ reurò beòramy heka herina-ki bede idi rÿire

³⁴ Pedro rarybere tamy: –Enia, Jesuisi Kristu arateytenykre. Myike, aherina biyrubunyke. Aõwesele hãbu rÿira.

³⁵ Ibutumy Lida hãwã mahãdu Saronu hãwã mahãdu tuu robire, tai Inynyrÿ rityhynyreny.

³⁶ Jòpe hãwã-ki hãwyy ityhydÿÿdu rasÿnyre. Tabita inire. Kiani riwiurònyre, watxi wese heka rare. Kia heka aõwiihikÿ widÿÿdu heka rare. Aõna aõna sõwemy iny-ò riwahinomyhÿre.

³⁷ Ijõtxu heka webinadumy resere, ihyy ta, rurure. Risuhòmny rahudi tahe, ritidire hetowo ratyaluduwo-ò.

³⁸ Laida hãwã iòhòmny rÿire, Jòpe hãwã-ribi, Ityhydÿÿdu roholare Pedro Lida hãwã-ki ratximyhÿreò, tahe hãbu inatxi diteònyde Pedro òrysomy. Uritere eleõkõmy kanakemy tii-wana.

³⁹ Pedro tahe tii-wana rare. Rehemynyrenyreu, tahe ridyre hetoratya ludu wo-ò. Ibutumy wytese mahãdu robumy rÿimyhÿre, rubuweroramy. Tahety, tattyboho ritxeredÿÿnomy tamy riwinyreò.

⁴⁰ Tahe Pedro rarybere ibutumy rexitakemy. Tahe rexitòenyre taowotimy resem. Tahe rexiòkesere rubu-ò rarybekemy: –Tabita, myike. Tahe irue raraynyre tahe Pedromy robire, tahe ronyre.

⁴¹ Pedro tebò tamy riwainyre tahe rÿire. Tahe wytese-ò, ityhydÿÿdu-ò rryre. Tamy riteòsinyre hãwyy irulemy roirerimy ihÿremy.

⁴² Jòpe hãwã mahãdu ibutumy kia rieryre. Sõwemy iny tahe Inynyrÿ rybe rityhynyre.,

⁴³ Txu sõwemy Pedro Jòpe hãwã-ki ihÿmyhÿ Simaõmy ninadu heto-ki. Simaõ heka iròduty wysydÿÿdu rare.

10

¹ Italia soldado mahãdu dinodumy raremyhÿ. Oreniliu inire. Sesaria-ki rasÿnyre. Tii òbitimy nodu rare, isÿ mahãdu-wana.

² Tii uriwahidÿÿna diwahinyde tule sõwemy rexitòenyre Deuxu-ò.

³ Aõutxu inataõ òra bedeu iòhòmny, rasina wesemy Deuxu ÿjumy tii robira, tamy rehemynyre. Tahe tamy rryre:

⁴ –Oreniliu, rimasajuare-ribi riwawyònyre: –Aõherekibo, Wanyrÿ. Tahe ÿju rarybere Oreniliu-ò: –Aexitòedÿÿnamy Deuxu rierymyhÿre. Tule ijõ-ò awahisina Deuxu rierymyhÿre.

- ⁵ Biteònyke eòdubohoõ Jòpe hãwã-ò Simaõ Pedro òryssymy.
- ⁶ Tii Simaõ iròdutyky iyxidÿÿdusÿ-ki ihÿre, bera ijà iòhò-ki.
- ⁷ Ýju rybedu rexitareu, teòdu inatxi-ò rryryre. Tule tasoldado mahãduy-ribi inyòwihikÿ rihitxinyre.
- ⁸ Kia ibutu-ò relyymy rahudi tahe riteònyre Jòpe hãwã-ò.
- ⁹ Ijòtxu txutyetxuu, tiiboho hãwã-ò iòhòmy ròire. Kiaule Pedro raòwònymy rÿimyhÿ hetotyre-ò rexitòenykemy.
- ¹⁰ Rama risamy ratximyhÿ tahe riroxikemy ixi-di ihÿmyhÿ. Rÿsÿna riraòmymy rÿimyhÿ. Idi rasi wesemy ròhòtinymy rÿire.
- ¹¹ Tahe robire: biuwetyy ruamyhÿre wese tuu robire. Rià wesemy aõna tamy dobehede.
- ¹² Rià wo-ki ibutumy iròdu, nawii, hemylala, aõbo dòkõnakõnale.
- ¹³ Rybeò-ò roholare: —Myike, Pedro, birubunyeke, biroxike.
- ¹⁴ Pedro rirawyònrya: —Aõkõre, Wanyrÿ. Kia dòkõna reròkõhywãhãre, isuisure dori. Ixityre tamy rarybere:
- ¹⁵ —Aõbo Deuxu risuhore wese isuisumy rybeòmyke.
- ¹⁶ Ixityre narybede. Iu tahe aõwesele ridyre biu-ò.
- ¹⁷ Tahe Pedro kia aõbo raredi heka ròhòtinyreu, Oreniliu-ribi hãbu mahãdu rehemynyre. Simaõ heto riijemyhÿ tahe ijòhòkÿkile rahare.
- ¹⁸ Tahe rryryrenyre: —Simaõ Pedro aõbo kakile ratxireri.
- ¹⁹ Pedro, tatxuu rasina-di ròhòtinyreu. Deuxu Tyytybytyhy tamy narybede:
- ²⁰ —Myike tahe, bobeheke. Inataõ hãbu dori araijereri. Tii-wana makre adee dori aditeònyde.
- ²¹ Tai Pedro robehere. Tamy rarybere: —Jiarÿ aòrysydu rare. Aõherekibo tòitenyte.
- ²² Tahe rirawyònrye: —Oreniliu hãbu òbiti rare. Tii Deuxu dee ijohonaduõ rare. Ibutumy judeu bede mahãdu awiremy tuu rarybemyhÿre. Ýjuõ tamy rarybere aòryssymy kiditeònykremy, adee roholakremy.
- ²³ Tahe Pedro tamyreny rarybere: —Kakile inyboho ròkõrõrenykre. Ihewoludu txu, rÿidi tahe Pedro tiiboho-wana ròirenyra. Ijõ ityhydÿÿdu seriòre tule roirenyra.
- ²⁴ Ijõ hewo ludu txu Sesaria-ò rehemynyrenyre. Oreniliu tii riraòmymhÿre. Taijoi mahãdu tabiòwawoludu mahãdu-wana ributunymy rÿimyhÿre.
- ²⁵ Pedro rehemynymy raloreu, Oreniliu ròhònyra heto-ribi tahe tatiowotimy iko-txi resere riwowydynykemy.
- ²⁶ Tahe Pedro ritamadÿÿnyre. Rarybere: —Mynyike wahe. Jiarÿ hãbule watxireri.
- ²⁷ Tahe rarybemy ralòmymhÿ, sòwemy wii ributunyreriò itxi reare.
- ²⁸ Ta Pedro tamyreny rarybere: —Judeu mahãdu iny witxira mahãdu-wana wibutudÿÿõmy, iòhòmymy wiribi riraòmymy. Kia teerytenyte. Deuxu dori ri-waerynadÿÿnyre kia wese aròhòtinykre. Iny wiwese wiwesele raremy aròhòtinykemy.
- ²⁹ Tahe tai waòryssymy teteònyteu, aõtaximy anademy wanohòti rÿire. Tai tahe adeereny arÿÿraxikre. Aõherekibo waòryssymy aõtaxina teteònyte.
- ³⁰ Ta Oreniliu rirawyònrye: —Inaubiòwa txumy txu rÿire tahe hãbu tyky tÿrÿrÿhÿkÿ-di wako-txi rexitÿnyryra. Iule wesemy tahe waheto-ki rexitòenywãhãre.
- ³¹ Tahe wadee rarybera: —Oreniliu aexitòedÿÿna-ò Deuxu roholara, ijõ-ò awahisina rieryra.
- ³² Biteònyke Jòpe hãwã-ò Simaõ Pedro òryssymy. Simaõ, iròdutyky iyx-idÿÿdusÿ-ki ihÿre bera ijà iòhò-ki.

³³ Aõwesele tahe, aõrysomy reteònyre. Awimy tahe tateriki rahara. Inyboho kakile ributunymy ihÿreny, aroholakemy ibutumy Deuxu-ribi aõmybo manarybekemy.

³⁴ Tahe Pedro rarybere: —Deuxu dee iny ibutumy wiwese wiwesele rare. Kia reeryre.

³⁵ Ibutumy bedede hãwã ludu Deuxu rityhynykeki, aõbo tamy òbiti riwinykeki, tii Deuxu ixidee rimyke.

³⁶ Kia rybe tahe Deuxu riwahinyre judeu mahãdu-ò. Rybewihikÿywina kia diwyde inydeereny bedeerynamy. Kia Jesuisi Kristumy rarybere ibutunyrÿna kia rare.

³⁷ Joaõ ijõ ratyusebenamy rarybere, idi tahe kia rybe hãletedÿÿmy rexideny Kalileia-ki. Tahe ibutu judeu mahãdu bedemy rarybere. Kia kaiboho teeryteny.

³⁸ Iwese Deuxu Tyytybytyhy, taruru-wana Jesuisi Nazare ludu tyre-ki ditxiwide wesemy relymyhÿre. Iwese Jesuisi reamy raremyhÿ wesemy aõwihikÿ riwinymyremy, tule iny Diabo rururawo-ki ratxirerimy ihÿre Jesuisi iribi riteònyre, ta retytenymyremy. Deuxu dori Jesuisi-wana ihÿre. Ibutumy kia teeryteny.

³⁹ Tahe ibutumy judeu mahãdu hãwã-ki riwinymyremy, idi itxeredumy inyboho roiremyremy. Ihãre tahe tii Jesuisi rirubunynyre, òwòru itxeò nihikÿ-ki ritòhãletenymy ritamadÿÿnyre.

⁴⁰ Inataõ txu-di tahe Deuxu rubu-ribi riixixanyre, tahe tii riteòsinyre inyõ-ò.

⁴¹ Tatarasanaõòle Deuxu Jesuisi ritÿnydÿÿnyre. Kia heka inyboho roire tii-wana riroxirenyreki, riõrenyreki, iixixana hewomy.

⁴² Deuxu rarybere: —Jesuisi hitxidÿÿdu iny wiribi ywisijuradÿÿdu rareke, iru mahãdu dee, rubu mahãdu dee. Kiamy heka Deuxu iny-ò ritÿnytedÿÿmy, ta inyboho rokoirekemy diwahinyde.

⁴³ Ibutumy iny Jesuisinimy tamy rityhynykeki, iòraru-ribi iny riixãwididÿÿnyke. Kia ibutumy ihetxiu rybedu mahãdu rÿimy rarybemy raremyremy. Kia heka Pedro tamyreny rarybere.

⁴⁴ Pedro rarybemy raremyhÿu, Deuxu Tyytybytyhy ibutu rybe-ò ijohonadu tyre-ki resemý ralore.

⁴⁵ Pedro-wana rare mahãdu, judeu mahãdu òbiti, tahe riòtiinyre judeukõdu mahãdu-ki Deuxu Tyytybytyhy ralõmy rareki.

⁴⁶ Raholare dori rybe witxira-di raryberenyreò, tiiboho Deuxumy heka realãmymyremy. Tahe Pedro tamyreny rarybere:

⁴⁷ —Inyõ rarybeõkre, iratysebedÿÿõmykemy, tiiboho dori Deuxu Tyytybytyhy-di ratxirenyre inywesereny.

⁴⁸ Tahe Jesuisi Kristu nimy iratysebenyky riteònyre. Tahe rexitòrenyryre Pedro idi iyreny-ki ijõ txumy ramyremy.

11

¹ Judeukõdu mahãdu Deuxu rybe roholamy rityhynymyremy. Kia-ò tahe Jesuisi erydÿÿna mahãdu roholare kiamy ityhydÿÿdu seriòre mahãdu tule roholare. Judeia bedede ludu ratximyremy mahãdu ibutumy kia rare.

² Pedro ixityre Jerusalẽ-ò rehemynyre, tahe judeu ityhydÿÿdu mahãdu tuu tamy narybede.

³ Kia heka, Pedro, judeukõdu mahãdu-wana wiwo-ki atxiteri, tii-wana teroxiteri. Tai tahe ibinamy rahareny.

⁴ Iribi tahe Pedro ikoreny relyre ibutumy taaõna aõnamy. Kia wesemy Pedro rarybere:

⁵ —Jòpe hãwã-ki watxiwãhã. Tahe rabire rasinawesemy rià nihikÿ biu-ribi robehere-ò. Iwese inyò iòhòti inaubiòwa-ki rimymyhÿre wesemy wadee robehemymy roimyhÿre.

⁶ Tahe aõbo heka iwo-ki ratximyhÿdi, retehenihikÿmy rãiwãhã iròdu deborehekÿ wesemy ratximyhÿ iwo-ki. Abòròrò wesemy tai ratximyhÿ, iròdu wese, nawii wese tai ratximyhÿ, inyboho rirÿsÿõmyhÿre wesemy.

⁷ Iribi raholare rybeõ-ò: —Myike, Pedro, birubunykewewa aõtxile birubunykewewa tibo biròkemy. Aõkõrewa Wanyrÿ, tiu heka reròõwãhãre. Judeu mahãdu bedewina heka tiu iny kia riròõtyhy.

⁸⁻⁹ Tahe ixityre rybeõ tamy rarybere: —Marybeõke kia ibinamy. Aõbo Deuxu awimymy rarybere, kia wiji tahe ibinamy aõkõ rare. Deuxu dee awikeki, kia awi rare.

¹⁰ Inataõ heka tuu rotÿÿnyre. Iribi tahe kia rià, ibutu-wana iõre biuribihymy heka iõre.

¹¹ Iribi tahe hãbu inataõ dehemynymy deade tai watxiwãhã-ò. Tii diwaòryde riwadykremy Sesaria hãwã-ò.

¹² Tahe Deuxu Tyytybytyhy wadee rarybere tii-wana arakremy. Nohòtiõmy heka aõbo judeukõdu mahãdu raremy. Tii-wana makre ele elemy. Tahe kia debò sohoji reurò seriòremy wahemy rare. Tahe retehemynymyrenyriewewa wadòrysymy riteònyrenyriewewa heto-ò tahe ralòrenyriewewa Oreniliu heto-ò.

¹³ Iribi tahe Oreniliu rarybere iwese ÿju ihetowo-ki tamy rexitÿnyrenymy rarybereri: —Oreniliu, inyò biteònykewewa Simaõ Pedro òrÿsymy Jòpe hãwã-ki.

¹⁴ Tii rybe tÿmyraõmy adeerenymy kanarybekre. Tai tahe ibutumymy asÿijoi-wana aòraru-ribi kanatakre. Kia Oreniliu inydee rarybere.

¹⁵ Iribi tahe jiarÿ Rybewihikÿmy rexidelenymy rarybere tamy. Pedro rarybere. Urile tahe roholare, tahe aõwesele Deuxu Tyytybytyhy ityrenymy resere iwo-ò ralòkemy iwese watyrerenymy resere wesele juhuu.

¹⁶ Tahe Jesuisi rybe wanohòti itxi reare tiubo raryberemy: —Joaõ heka inatyhymy bedi iny ratisebenyriewewa, kaiboho tahe Deuxu Tyytybytyhy-di akanasebedÿÿdenykre.

¹⁷ Judeukõdu mahãdu Inynyrÿ Jesuisi Kristu rityhynymyhÿre. Tai Deuxu tamy diwahinyde iwese wadeerenymy juhu riwahinyriewewa wesetyhyle. Deuxu Tyytybytyhy uriõno wesele tamyrenymy diwahinyde. Mobo jiarÿ raremy wahe tuu Deuxu dee aõmy ararybekemy.

¹⁸ Iribi Pedro rybe-ò roholare tahe timyhe tamy irybekõna. Tule Deuxu riwowydynyriewewa: —Inatyhy wa rare Deuxu heka judeukõdu mahãdu-ò heka umytuedeõna riwahinyriewewa. Inyò rityhynykeki, ixirahìkeki, tarasana rimyrenykre.

¹⁹ Iu tahe Estevaõ rurureu, ityhydÿÿdu aõhòkÿmy rotÿÿnyriewewa tahe, ityhydÿÿdu mahãdu Jerusalê-ribi ròhònyriewewa. Tii heka relyymyhÿre Rybewihikÿmy judeu mahãduòle kÿny wahe, iwitxira witxira-ò aõkõre. Tahe ibutu bedewina ritelenymy ròrenyriewewa. Senisia-ki relyriewewa. Xibri bedebute-ki tule relyriewewa, Atxiòkia hãwã-ki tule relyriewewa.

²⁰ Ijò ityhydÿÿdu mahãdu Jesuisi Rybewihikÿ tÿmyra rarybere. Tiiboho Xibri bedebute-ribi ròhònyriewewa, Sireni-ribi ijò rybedu ròhònyriewewa Atxiòkia-ò. Tiiboho relyriewewa judeukõdu mahãdu-ò tule.

²¹ Deuxu riwiòhenanyriewewa sòwemy iny rityhynyriewewa, Jesuisi ryò ralòrenyriewewa.

²² Jerusalê ityhydÿÿdu mahãdu kiamy roholare. Tai tahe Banabe riteònyriewewa Atxiòkia-ò.

²³ Banabe rehemynyriewewa tahe, tuu robire aõbo Deuxu kowa riwinyrerimymy. Tai tahe reysare. Tahe ityhydÿÿdu tÿmyra-ò dohodÿÿmy, riwiòhenanykremymy:

—Iòhòtyhymy Deuxu-ribi atximahãbenyke, aworibityhy Deuxu bityhyny-benyke.

²⁴ Banabe heka hãbu wihikÿ rare. Tÿxihikÿlemy Deuxu Tyytybytyhy-di ratximyhÿre. Ibutumy ratximyhÿre tyhydÿÿna-di. Sõwemy iny rexiròtenyrene Inynyrÿ mahãdu-ò.

²⁵ Idi tahe Banabe rare Tarso hãwã-ò Salu ijeseemy.

²⁶ Tai rahareu tahe, didymyhe dòòsemy nade Atxiòkia-ò. Sohoji beòramy idi bede rierenyrene. Sõwemy iny ribedeerynymyhÿrenyrene. Atxiòkia hãwã-ki ityhydÿÿdu mahãdumy raninira Kristu wese mahãdumy. Kiani tamyreny riwahinyrene.

²⁷ Aõutxu tahe dehemynyde Deuxu rybedu mahãduõ Jerusalẽ-ribi Atxiòkia-ò.

²⁸ Ijõ Abusi inire. Iribi tahe tii rarybere Deuxu Tyytybytyhy rybemy. Ramamy rubu nihikÿ kanakremy raxireri, ibutu suò. Laujiu iòlòmý raremyhÿu, kiamy rotÿÿmyhÿre.

²⁹ Tai tahe ityhydÿÿdu mahãdu he nieru riwahinykremy rÿire Judeia bede sÿdu ityhydÿÿdu riwiòhenanykremy. Tahe nieru riwahinyrene tiwesebo idi ratximyhÿre wesemy tamy riwahinyrene.

³⁰ Tahe nieru riteònyrene, moma-wana Banabe Salu-wana Jerusalẽ dohodÿÿna heto matuari mahãdu-ò riwyrene.

12

¹ Kia bededÿÿnanamy heka Herodi judeu iòlòmý raremyhÿ. Iribi tahe rexidelenymy riwinyrene heka ityhydÿÿdu mahãdu kia òludumy risÿnykre myhÿ. Tii riteònyrene aõna aõnamy risÿnykemý ityhydÿÿdu mahãdu-ò.

² Tii mayrehe-di rubudÿÿmy riteònyrene Joaõ seriòre wahe, Txiau wahe.

³ Tai tahe judeu wedu mahãdu heka tamy wihikÿlemy tuu rotÿÿnyrene. Herodi rierymy raremyhÿ idi Pedro rimyrene. Tahe worana bedehesi rÿire. Paõ taurina ihoõ inire. Kia ibutumy rotÿÿnyrene kia bedehesi rÿireu.

⁴ Tahe Pedro riròtenyrene, ròtenawomy wirutyrene. Aõmamy soldado mahãdu inaubiòwamy iitxeredumy rÿimyhÿre. Pascoa kia worana bedehesi konana txu rexihumy rÿireu tahe, judeu mahãdu-ò riwahinykre. Kia Herodi rexi-nohòtidÿÿnyrene.

⁵ Ròtenawo-ki tahe Pedro ratximyhÿre. Ityhydÿÿdu mahãdu tahe Deuxu-ò rexitòenyhyymyhÿre Pedro tòenamý.

⁶ Txubiòwamy tahe itxu riwinyrenyrene iny sõwehekÿ-ò Pedro riwahinykemý. Kiamy Herodi ròhòtinyrene. Ruu tahe Pedro ròròmý roimyhÿ. Inatxi soldado heka idile ratximyhÿre. Pedro womati reroti inatxi-di ratisamy roimyhÿre. Ijõ soldado rotena ijò-ki ratximyhÿre.

⁷ Inynyrÿ ÿju heka Pedro weribi rihetenyrene riixixanykemý. Loosòna itÿnyhÿkÿlemy ròtena ritoosònyrene. Tamy rarybere: —Wylemy wa rexiukÿnyke. Tahe aõwesele Pedro axiò-ribi womati rerotihikÿ rejuxunyrene.

⁸ Tahe ÿju tamy rarybere: —Awamy birutyke, bexityynyke. Kiamy riwinyra. Ijõ arahana birutyke tahe biwaheludunyke.

⁹ Iribi ròhònyra he tai ròròreri-ribi wahe. Kia ibutumy heka rasi weselemy Pedro ròhòtinyrene rieryòre inatyhy aõbo ada rasi aõbo.

¹⁰ Juhu heka ikoludu soldado mahãdumy reare idi ihewoludumy reare iribi rehemynymy rÿire ahana ijòtyhy-ò. Womatilere heka iijòtòbònare. Ixiwanale heka rarayre ijòtòbòna. Iribi tahe roirenyrene hãwãry-di ririranyrenyrene. Idi tahe ÿjuhe iõre iribi.

11 Tahe Pedro rhtinyre, rieryre heka ahebo rotÿÿnyra. Wanyrÿ ÿju ritenyre riwatara Herodi-ribi judeu mahdu-ribi. Katahe wadee ahe rotÿÿnyrenytyhy.

12 Rhtinyry rÿire juhuu urihimy idi tahe rare Marie heto-. Joa Markuse heka tii rare. Tai ityhydÿÿdu mahdu rÿimyhÿ tahe rexitenyneri Pedro tamy rehemynyre.

13 Tahe ij he rihetenyre. Ijtbna- nade mobo raremy rierykemy ijadma dedu. Rode inire.

14 Tahe Pedro rybe rieryra. Reysamy raijaranyre iwo-. Pedro tahe rallemy rÿire. Tahe relyyre Pedro heto ij-ki rÿimyhÿmy.

15 Tiiboho raryberenyre: –Kai tabinamy atxiteri. Ixityre rarybere: –Akre tii taile naderi. Tahe raryberenyre: –Pedro ak rare, taÿjulemy tahe rare.

16 Tahe Pedro riheterihetenymy rÿimyhÿre. Idi riraynyrenyre. Pedromy robirenyrau, bede ritiinyrenyre.

17 Pedro tahe tamyreny teb reara roholarenykemy. Tahe tamyreny relyyre timybo Inynyrÿ rtena-ribi rexildÿÿnyramy. Tule tamy ritenyre: –Kiamy belyyke Txiau- tule inyserire-. Tahe rexitare, rare ijsÿ-.

18 Txuu ratÿnyreu, soldado mahdu ierysomy wii risÿnyre timybo Pedro ahebo rotÿÿnyramy. Tahe jei jei anire.

19 Herodi iijesemy ritenyre tai mo tai rahahyllera. Tai soldado itxeredu sohoji sohoji dÿÿraximy ritenyra. Idi irubudÿÿmy ritenyra. Iribi tahe Herodi Judeia bede-ribi rhnyra. Sesaria hw- bededÿÿnana riwyrta.

20 Tiro hw mahdu Sidoma be hw mahdu-wana Herodi derarenyre. Tahe tiiboho ributunyrenyre tamy rirenykemy rybe-di. Il heto-di itxeredu Blastu inire. Tahe iny mahdu Blastu rtarenyre iwe-ribi mahdureny. Tahe rirenyre Herodi- tamy rexitenyrenyre, tamy ykaramykemy. Tarÿsÿna dori diwyde il bede-ribi, Herodi bede-ribi.

21 Herodi tahe itxu riwinyre. Kia txuu tahe rhnyre tamy. Rexityynyre tailtyrehe-di tahe tarynana tyre- ronyre, tamy Rybewihikÿmy rarybere. Tai tahe iny rirajuare: –Katahe hbu ak rarybereri, Deuxu wahe.

22-23 Awesele Deuxu ÿju heka Herodi rirubunyre, tii Deuxutyhymy relreki. Woud rubudÿÿnamy rurure.

24 Deuxu rybe tahe ibutumy roholare. Swemy iny tahe rityhynyre.

25 Banabe Salu-wana nieru riwahinymy rahudi tahe, disede Jerusal-ribi Atxikia-. Joa Marku tii-wana ridyre.

13

1 Atxikia dohodÿÿna heto mahdu-ki rybe tÿnydÿÿdu mahdu, bede erydÿÿdu mahdu rÿimyhÿre. Kaheka inireny rare: Banabe, Sima, inirarsna Nike rare. Lusu ijre, tii Sireni hw ludu rare. Manaÿ ijre, tii Herodisÿ-ki ratibienyre, Salu ijre.

2 Ibutumy tahe Inynyrÿmy relre, riroxihy heka bede riemyhÿ. Tahe Deuxu Tyytybytyhy tamyreny rarybere: –Jiarÿ waamysÿdÿÿna dire Banabe-, Salu-. Kaiboho heka bitenybenykre kia riwinykemy.

3 Tahe roxihyymy bede riemy, rexitenyrenyre. Tebreny iratytyre ritidirenyry, idi ritenyrenyre tabede tÿina-.

4 Deuxu Tyytybytyhy tahe tiiboho ritenyrenyre. Selusia hw- tamy riberenyre. Tahe hw rimyrenyre Xibri bedebute-.

5 Tahe rehemynyrenyre Salamina hw-. Tai judeu dohodÿÿna heto-ki Deuxu rybemy raryberenyre. Tule Jua Marku rare tii-wana wihedÿÿdu wese heka rare.

⁶ Tahe ibutumy bedebutemy rekoarenyre. Ritehemynyrenyre hãwã-ò Pafumy ninadu-ò. Tai tahe judeu mahãdu witxi deade, Bajesuisi heka inire.

⁷ Tii Deuxu rybeduõmy raremyhÿmy iximy rarybere tahe aõkõre, raruire, riitxenanyre. Tii bedebute hãwã dinodu-wana rare. Kadinoduni tahe Sergio-Paulo inire. Tii hãbu bedeery nihikÿ rare. Tii Deuxu rybe-ò roholakemy ratxireri. Tahe didyde Salu, Banabe-wana tamy roholakemy.

⁸ Bajesuisi, Elimasi ijõ ini rare. Tahe tii bedebute dinodu-ò rarybere uritere Salu rybe-ò, Banabe rybe-ò ijohonakõmykemy. Wanyrÿ tyhydÿÿkõmykemy dori tuu risÿnyre.

⁹ Salu tahe, Paulo ijõ ini rare. Deuxu Tyytybytyhy heka itykumy ralõmy rÿimyhÿre. Tahe Paulo retehere Elimasi-ò tamy rarybere:

¹⁰ –Kai Satanasi riõre tate. Kai heka ibutu itxenadÿÿ-di tÿxihikÿlemy ahãte. Kai heka awihikÿ òludu tate. Tiubo heka bexihukre Inynyrÿ-ribi iny riixãwididÿÿnyre.

¹¹ Deuxu heka wiji araõwynykre, aõhõkÿmy arasÿnykre, aruetãmy bonykre. Txu bobioõkre bede biwyke. Iule tahe aõwesele bede torohokÿlemy reare. Robioõhyumy reare. Urile riemy ratximyhÿre, iny riwiõhenanykemy, ryy tamy ritÿnykemy.

¹² Tahe kia bedebute dinodu tuu robire aõhebo rotÿÿnyramy, tai bede riõtiinymy ronymyhÿ tahe tii Inynyrÿ rityhynyre.

¹³ Iribi tahe Paulo ròhõnyra taijoi-wana Pafu hãwã-ribi. Rakremy riberenyra hãwã nihikÿ-ki Panfilia bede-ò, Peke hãwã-ò. Juaõ Marku iribireny rexitara, dòõsede Jerusalê-ò.

¹⁴ Tahe Paulo Banabe-wana roirenyre. Peke-ribi riòlõnyre tahe rekoarenyre Atxiòkia-ò. Kaa iwitxira Atxiòkia hãwã rare, Pisidia bede-ki ratxireri. Tahe rirõnyrenyre judeu mahãdu dohodÿÿna heto-ò. Sabado txu rÿire. Ronymyhÿre ijohonamy.

¹⁵ Kia hãbu mahãdu heka Moisesi bede ywina tyyriti-di, Deuxu rybemy rybedu mahãdu tyyriti-di rariamyhÿre. Tahe dohodÿÿna heto wedu Pauloboho-ò raryberenykemy rarybere: –Waseriõre, arybemy idi atxiteri-wana marybeke aõwaxiny bitÿnyke.

¹⁶ Tahe Paulo rÿire lamamy. Iwese rybedÿÿmy ròteòsidÿÿmyhÿre wese rÿire. Tahe rexidelenyre: –Hãbu, Israeli mahãdu, tule ibutumy Deuxu rityhynymy rÿira mahãdu, bodoholabedenyke kaa ijyy-ò.

¹⁷ Israeli mahãdu Egito-ki rasÿnyreu, taDeuxu iribi ritare, moma, inytybyreny Deuxu, Israeli mahãdu tybyreny wahe. Deuxu rasõwedÿÿnyre. Iribi tahe Deuxu Egito-ribi ritarenyre tebò ruruteretyhy-di.

¹⁸ Tiiboho bederahy-ki 40 beõramy bede riereu, Deuxu taaõbina bina riòludunyre.

¹⁹ Kanaã bede-ki debò inatxi reurõmy ixÿju ixÿju mahãdumy rahure. Idi tamyreny riwahinyre bede, isÿhyumy rarekemy. Idi tahe rybe ywisidÿÿdu mahãdu tamy riwahinyre. 450 beõra rahureu, tahe Samueli Deuxu rybeduõmy raremyhÿ.

²⁰ Idi tahe rybe ywisidÿÿdu mahãdu tamy riwahinyre. Tahe 450 beõra rahureu, Samueli Deuxu rybeduõmy raremyhÿ.

²¹ Iribi iny Deuxu-ò rexitõnyre iòlõmy tamy kadiwahinykemy. Tahe Deuxu Salu tamy riwahinyre, iòlõmy. Salu tahe Kixi riõre rare. Benjami mahãdu rare. Tahe 40 beõramy iòlõmy ronyre.

²² Salu iribi ritareu, tahe Davi, Deuxu ritamadÿÿnyre iòlõmy. Deuxu Davimy rarybere: –Davi Ijese riõre rare. Jiarÿ iluure. Tii ibutu wadee wimy riwinykre.

23 Tahe Davi riòkòre-ribi Jesusi ròhònnyre, Israeli tarasadumy rarekemy. Iwese juhoo Deuxu rarybere wese.

24 Jesusi naõdeu, Juaõ ritÿÿnyre Israeli mahãdu-ò iòrarureny ririkemy idi raratisebenykemy.

25 Juaõ rybe tÿnydÿÿna kònana, tamyreny rarebere: –Jiarÿ wa iwese tahõtintytenyteri wese aõkõ jiarÿ rare. Kaiboho tiwaraòõhyymahãtenyete. Betehebennyke, tii, wahewomy kanakre. Jiarÿ aõ aõkõ rare, iwatisana arieseõtyhy iwa ritakemy, tii dori waratyre wihikÿreki.

26 Waseriòreboho, Abraõ riòre riòremy ibutumy inyboho roire, tule Deuxu reàlàmy rÿira mahãdu kaki ratximyhÿ. Deuxu inydeereny biu-ò hedu rybe diwahinyde.

27 Jerusalẽ mahãdu, iwedureny-wana raeryõhyre tii tarasadu rare. Ibutumy sabado txu rybedu tyyriti-di rariamyhÿre tohodÿÿna heto-ki, tahe aõbo rare rieryõhyre. Jesusi rubudÿÿmy raryberenyre, iwese rybeduõ rarybere wese, tiiboho rotÿÿnymyhÿre.

28 Tiiboho aõbina bina-ki tai rahaõhyra, ihãrele irubudÿÿmy rexitòenyre Pilato-ò.

29 Iwese ibutumy Jesusimy riritinymy roireri wese, ibutumy tuu ròhònnyre. Tahe itxeò nihikÿ tyre-ribi ritarennyre. Tahe mana hãloo rawo-ò ritidirenyre.

30 Tahe Deuxu rubu-ribi riixixadÿÿnyre.

31 Tii-wana iny mahãduõ roirenyre juhoo Kalileia-ribi Jerusalẽ-ò. Rexixamy rahudi tahe, tii mahãdule tuu robihyymy txuu widireny rÿire. Kia mahãdule inysõwey-ki relyymyhÿre.

32-33 Deuxu juhoo rarybere inytybyreny-ò aõhebo rotÿÿnykemy. Inydeereny tahe tii riwinyre Jesusi riixixanyreki. Kia Rybewihikÿmy adeereny relyymahãrennyre. Iwese inatxi wiuna ritidÿÿna-ki roire wese:

–Kai waRiòre tate. Wiji tahe bomy watxiwãhãre.

34 Kiamy heka Deuxu rarybere Jesusimy: –Rubu-ribi ariixixanykemy, tii rasunymyhÿre bede-ò ròõseõtyhy. Iwese Davi-ò jiarÿ rarybere wesemy ibutumy adee bede ariywinykre.

35 Deuxu ijõ wiuna Ritidÿÿna-ki tule rarybere. Iwese Jesusile rarybere wese, kiamy roire:

–Eòdutyhy umy rasÿnyõtyhy kai dori waumysudÿÿ-ò teijemahãte.

36 Iu Davi Deuxu dee taijoi riwiòhenanymy rahudi tahe, rurure. Tybyreny-ò tii rara. Iumy tahe rasunyyre.

37 Jesusi umy tahe rasunyõre Deuxu dori rubu-ribi riixixadÿÿnyreki.

38-39 Jesusi bityhynybenykeki, aòraru riixãwidinyke. Kiamy Moisesi bede ywina ihoõhyre adeereny. Kia bierybenyke waseriòreboho, tiile, Jesusi, adeereny relyywãhãrennyre.

40 Bexiijebynyke, kiamy adeereny rotÿÿnyke lau iwese rybedu ritina-ki roire wese:

41 –Kaiboho inatyhy derare. Betehebennyke, burubennyke, bede biòtiinybenyke, aõbo jiarÿ rewinyreriò. Inyõ adeereny ritÿÿnyke ihãrele. Tii heka bityhynybenyõtyhy.

42 Tahe Paulo irybe rexihura. Iribi ròhònnyre Banabe-wana. Rexitòenyrennyre ijõ sabado biòwau tarybetybydile ixbyle relyykemy.

43 Iny ritobinymy rahudi, judeu mahãduõ, judeu bede erydÿÿna ityhydÿÿdu mahãduõ tule Banabe Paulo-wana riheludunyyre. Tahe tamyreny raryberenyre: –Deuxu ruxetòena-ki idi mariahyymyhÿkemy.

44 Ijõ sabado rehemynyre, ibutu iny hãwã-ribi doimyhÿdenyde Deuxu rybe-ò ijohonamy.

⁴⁵ Judeu mahãdu tahe inysõwemy robireu, tiiboho rexiwaritinymyhÿrenyre. Tiiboho raryberenyre aõbinahãkÿlemy Deuxuru-ò. Paulo riki inatyhymy aõkõ tii rarybemyhÿre.

⁴⁶ Paulo Banabe-wana ihãrele brebuõlemy raryberenyre: —Juhuu adeereny Deuxu rybe dobehede. Tahe kaiboho tetyhynyõtenyte, tai judeukõdu mahãdu-ò aroirenykre. Kaiboho Deuxu rybe terarenyreki, ixi sohojile tahe tetaõte adeereny aõ aõkõreki.

⁴⁷ Kia Inynyrÿ bede ywina wadeereny riwahinyre: —Kai loosõna wesemy atxikre judeukõdu mahãdu-ò. Kai tarasanary ritÿnynykre ibutu inyko-ò.

⁴⁸ Judeukõdu mahãdu kia-ò roholareu, tahe reysarenyre. Deuxu rybe riwowydynyrenyre tai. Tahe rityhynyre, timybo Deuxu juhuu ritare wesele tamyreny umytuedeõna riwahinyremy.

⁴⁹ Inynyrÿ rybemy kia bede-ki ibutumy relyyre.

⁵⁰ Tahe judeu mahãdu rarybere hãwyywihikÿ ityhy-ò, tule hãwã wedu-ò. Tai tahe Paulo Banabe-ò òludu sõwemy resere. Tahe isubede-ribi riteõnyrenyre.

⁵¹ Paulo Banabe-wana tawa-ribi bryby riòhòwirenyre tamyreny tiiboho ibinareki. Tahe Ionio hãwã-ò roirenyre.

⁵² Atxiòkia ityhydÿÿdu mahãdu tahe reysamy rÿimyhÿre. Deuxu Tyytybytyhy-di tÿximy ihÿre.

14

¹ Ionio hãwã-ò Paulo Banabe-wana rare. Judeu mahãdu dohodÿÿna heto-ò. Tahe rybe ritÿnyrenyre, tarurumy he relyyrenyre. Sõwemy judeu mahãdu, judeukõdu mahãdu-wana rityhynyrenyre ijyy.

² Tahe ijõ judeu mahãduõ rityhynyõre. Ijyy deramy reamyhÿre, tule ijõ-ò tule rarybere ityhynyõkemy. Tahe Paulomy, Banabemy aõ òta òtalemy rarybemyhÿrenyre.

³ Ihãrele tahe Paulo Banabe-wana bede nihikÿ riwyrenyre tai. Tamy rybe ritÿnyhy roiremyhÿ ibrebuõlemy. Inynyrÿ taruxetõena rybetyhydÿÿnamy riwiõhenanyre tiiboho bedeõbyna widÿÿdu renyreki.

⁴ Hãwã mahãdu ritxware. Ijõ heka judeu wedu mahãdu rityhynymyhÿre, ijõ tahe Paulo Banabeboho rityhynymyhÿre.

⁵ Judeukõdu mahãdu, judeu mahãdu, tawedureny-wana widee rarybere Paulo Banabe-wana riòkòrõrenykemy tamy mana-di rehurenkemy.

⁶ Tahe tiiboho rexieryrenyre tahe rihenyrenyre. Tahe ròirenyre Listra hãwã-ò, Debi hãwã-ò, kia Laonia hãwã hãwã-ò rare. Tule rariarenyre kowa bedewo-ki.

⁷ Tahe kowa tiemy ritÿnyhy roiremyhÿ Rybe tÿmyra wihikÿ-di.

⁸ Listra hãwã-ki heka hãbuõ-txi rekoarenyre, itierere heka. Taihy heka ronymyhÿre. Tuuhyy heka ratohouãmy ijarananyre.

⁹ Tii tahe Paulo rybe-ò roholare. Paulo tamy retehere. Kia tahe Paulo rieryre hãbu teytetyhynadire Paulo riteytenykemy.

¹⁰ Tai tahe tamy rarybere tarybe riterenymy: —Mynyike, òbitimy. Ta hãbu rexiwatxinyre, rariare.

¹¹ Ijohona mahãdumy robireu, aõbo Paulo riwinyremy tahe rirajuare tarybe-di, Laonia rybe-di: —Ka hãbu mahãdu heka deuxu wesemy idi rexi-nohõtidiÿÿnymyhÿre. Inydeereny deuxu wesemy dobehede. Iumyreny tahe hãbu wesemy rare.

¹² Banabe heka, Jupitemy tadeuxurenyniõmy rininire. Paulo tahe ijõnimy, Meuriumy rininirenyre irybe sõwetyhyreki, tii rybedureki.

¹³ Jupite xiwena wydydu horeru bederade-di dehemynyde. TohodÏÏna heto hãwã ahana ube-ki rÏire. Broreni xiwe wesena tamyreny hãwã mahãdu riworonykemy, riwahinykemy.

¹⁴ Kiamy roholareu, Paulo Banabe-wana tatykyreny riykaranyre idi rihurenire. Tahe ralòmy reare inysòwey-txi rarybekemy.

¹⁵ Tamy ryryre: –Aõhebo tatÏÏnytenyteri. JiarÏÏboho hãbulemy watxirenyreri. Kialemy adeereny rarybewãhãre, Deuxu rybetÏÏmyra wihikÏ. Adeuxureny-di nohòtirenÏmy. BedewidÏÏdu ta mohòtynybenyke. Tii dori benihikÏ riwinyre, ibutumy biu-ki riwinyre, tahe Deuxutyhy-di mohòtynybenyke.

¹⁶ Ihetxiu Deuxu ibutumy bede bedemy sÏdu ririre ixidee wimy aõna aõnamy rotÏÏnykemy.

¹⁷ Urile tahe tamy rexideòsinyre tamy biu riwahinyre taoworumy raratynykemy. Tai tahe kaiboho arÏsÏna dire, Deuxu debò-ribi, awo-ki eysanadire.

¹⁸ Ihãrele iny tamy xiwe wesena tamy riwahinykemy ratxireri. Paulo tamyreny rarybere: –Aõkò, inydeereny bidiwahinyòke.

¹⁹ Iribi tahe judeu mahãdu-ò Atxiòkia-ribi, Ionio-ribi tamyreny raryberenyre Paulo rubudÏÏmy. Hãwã òtityube-ò Paulo ridyreny. Mana-di tamy rehumyhy. Tahe rubu wesemy ririrenyre.

²⁰ Idi tahe ityhydÏÏduò tamy wirotyre. Paulo tahe suribi rÏire tahe tii-wana nalòde hãwã-ò. Ijòtxu biòwamy tahe Banabe-wana Paulo rexitare ijò hãwã-ò, Debi hãwã-ò.

²¹ Ka hãwã-ki tahe Paulo rybe tÏmyra wihikÏ ritÏnynyre. Sòwemy tai rityhynyreu, Pauloboho ròòserenyre Listra hãwã-ò, Ionio hãwã-ò, Atxiòkia-ò.

²² Ibutumy hãwã-ki Pauloboho ityhydÏÏdu mahãdu riwiòhenanyreny, tiiboho rityhynyhyemy ratximyhykemy. Tamyreny rarybere: –Kaiboho aõhòkÏmy botÏÏnybenyke, ihãrele malòkemy titxibo Deuxu Iòlò ratximyhyre-ò.

²³ Ibutu ityhydÏÏdu mahãduy ribi ritamy rÏimyhÏ rarekemy, idinodumy. Matuari mahãdu-ribi tii ritare. Iu ritareu tahe, rexitòenyre Deuxu-ò tule byreòhy txuò riwyreny. InynyrÏ-ò rexitòenyre: –Kia ibutumy aratyhynyre, tai tahe biywinymy ahãke.

²⁴⁻²⁵ Pisidia bede-ki rekoamyhyreny Panfilia bede-ò. Kowa-ò RybewihikÏ tÏmyramy relymy rahudi Peke-ki, Atalia hãwã-ò dobehede.

²⁶ Tai hãwò nihikÏ welòdi-di rimyreny. Tahe Atxiòkia-ò rorore. Kowa-ribi juhuule rybe tÏmyra wihikÏ ijyy-di dòhònyde. Kowa juhuu rexitòenyre tamyreny Deuxu ruxetòena-wana rarekemy.

²⁷ Atxiòkia-ò rehemynyreu, Paulo, ibutumy ityhydÏÏdu mahãdu ditonyde. Tai heka tamyreny rarybere iwese Deuxu riwiòhenanyre wese ibutumy iaòmydÏÏnana-di. Iwese judeukòdu mahãdu rityhynykemy. Deuxu tamy ityhyna ijòtòbòna riraynyre wese.

²⁸ Idi bededÏÏnana riwynihikÏre ityhydÏÏdu mahãdu-wana.

15

¹ Hãbuò Judeia mahãduò ditehemynydenyde ta teòsamy ribedeerynyreny. Kawese ribedeerynyre: –Moisesi Tyyriti bede ywina, notykyresynamy, rityhynyòkeki, iny rataòtyhy.

² Iribi tahe Paulo Banabe-wana tamyreny rarybehyy rare. Tai tahe inyò tamy rarybere Jerusalè matuari mahãdu-ò roirenykemy aòmydÏÏnana rexiòbitynyreny. Iny wixira-ò Jesuisi erydÏÏna mahãdu-ò rarybekemy heka tamy, Pauloboho iteòdÏÏmy rarybere. Tahe ijò hãbu mahãduò tule tiiboho-wana riteònyreny.

³ Dÿÿraximy heka tamy ròirenyre, aõ aõmydÿÿnabo ratxirerímy wahe. Sõwemy dohodÿÿna mahãdu ihemy roirenyre urihimyò, tai tahe ririrenyre. Tahe Senisia bedede bedemy, Samaria bedede bedemy riòhòrerenyire. Relyyre judeukõdu mahãdu tule ityhydÿÿdu mahãdu-ki rÿirerimy. Tai ibutumy ityhydÿÿdu mahãdu reysare.

⁴ Tahe ritehemynyrenyire Jerusalẽ-ò. Wihe ritotynyrenyire ityhydÿÿdu dinodu-wana, tule matuari mahãdu-wana, Jesuisi erydÿÿdu mahãdu-wana. Tiiboho relyyrenyire aõmybo Deuxu rotÿÿnyire iyreny-ki, timybo riwiòhenanyré.

⁵ Tahe hãbu mahãduõ tai raremyhÿ heka. Juhuu heka fariseu mahãdumy ihÿre, idi tahe ityhydÿÿdumy ralore. Imahãdu-ribi ijõ rÿire ribedeerynykremy. Tahe rarybere: —Inydeereny kia wese rare. Judeukõdu tyhydÿÿdu ibutumy notyyresyna-di ròhònyke. Tule ibutumy Moisesi bedede ywina ibutumy rityhynykemy. Kawesemy tamy ribedeerynyire òbitimy aõkõ watxireri.

⁶ Idi tahe Jesuisi erydÿÿna, matuari mahãdu-wana wii ributumyrybe òbitidÿÿmy.

⁷ Rybe sõwemy rahude tahe, Pedro rÿire tamyreny rarybekemy: —Waseriòreboho, Deuxu juhu riwatare Rybewihikÿ rybedumy judeukõdu mahãdu-ò tuu aritÿÿnynykremy, tiiboho tule rityhynyrenyikremy. Tai rarewãhã. Kaiboho kia ibutumy teerytenyete.

⁸ Iwese inydeereny riwahinyre wese, Deuxu Tyytybytyhy tamyreny tule riwahinyre. Judeukõdu mahãduõ tule ixidee rimykemy. Kia wese tuu riteòsinyre inydeereny.

⁹ Deuxu wiribi lahitximy aõkõ iny riwinyrenyire. Wiwesehyyle ihÿre. Tiiboho inywesele ihÿrenyire. Tiiboho rityhynyrenyireu, heka irayky rityranyrenyikemy ritarenyke.

¹⁰ Kia wese Deuxu teurihitenyteri. Kia bedede ywina itxyynautxiehekÿ wesere ityhydÿÿdu mahãdu tyre-ki tetiditenyteri. Inytybyreny tiu retyyõre tule inyboho idi retyyõre.

¹¹ Inynyrÿ, ruxetòenale-di iny ritamyhÿre. Tule judeukõdu mahãdu kia weselere ritamyhÿre.

¹² Tahe aõmy rarybeõhyrenyire. Ibutumy he Paulo Banabeboho rarybereò, roholarenyire. Tiiboho heka relyyrenyire tule bededeòby wihikÿ aõna aõna-wana Deuxu riwinyremy tadebò-di wahe.

¹³⁻¹⁴ Iribi tahe rexihurenireu tasÿ, Txiau rÿire rarybekremy: —Waseriòreboho, bodoholabedenykre inihe warybe-ò: —Pedro kÿny adeereny rarybere, timybo Deuxu judeukõdu mahãdu roramy rare iny mahãduõ ixidee ritakremy tanityhy-ò.

¹⁵ Kiawesemy he tule ihetxiu Deuxu rybemy rybedu mahãdu riritinyre, kamy wahe:

¹⁶ —Wanyrÿ heka rarybera: —Adòòsekre, ixyby ariwinymy aritamadÿÿnykre aõdohodÿÿna heto Davi juhUU riwinyre. Idi tahe resere. Ixyby ariwinykre.

¹⁷ Tai tahe judeukõdu mahãdu-ribi iuhe riwaòrykre wamy rityhynykemy. Wanyrÿ, Deuxu, kiamy heka tiiboho rarybekre, ibutumy jiarÿ retarenyreki.

¹⁸ Kawesemy Wanyrÿ tuhyy rarybemy raremyhÿ, tule wiji ihÿre.

¹⁹ Tai heka kiawidÿÿõmy rakatximyhÿrenykre. Tamyreny rybeõmy rakatximyhÿrenyke. Judeukõdu mahãdu Deuxumy rityhynyrenyireu, iny bedede ywina reny tyhydÿÿmy tamyreny rybeõmy.

²⁰ Kialemy heka tamyreny rakaryberenykre: Suritxoo xiwe-ribi iròdude ròrenyõmy. Tule òta òta òraruna widÿÿõmy, iròdu hãlubu-di ròrenyõmy, ihãlubu

rejuxunyõmyhÿre-wana.

²¹ Kiamy heka rakatximyhÿrenyke. Moisesi bede ywina-di dori ibutu hãwã-ki judeu dohodÿÿna heto-ki rariamy raremyhÿ. Sabadotxu ihyymy aõkõ kia ritÿnynymy raremyhÿ.

²² Tahe kiamy heka rahõtinyrenyreny, Jesuisi erydÿÿna mahãdu, ibutumy dohodÿÿna mahãdu-wana, hãbuõ ayreny-ribi rikítakre. Tai Atxiòkia-ò riteònyrenykemy Paulo Banabe-wana. Tahe Judasi ritarenyreny tule iniòrysna Basaba rare. Ijõ tasÿ Sila inire. Ka hãbuboho ityhydÿÿdu mahãdu awimy tai raharenyreny.

²³ Katyyriti tiiboho-wana rakre. Kawesemy tyriti rare: –Jiarÿboho, erydÿÿna, matuari, seriòre mahãdu adeereny rybe wehityhyna rewahinyreri. Ibutumy judeukõdu mahãdu ityhydÿÿdu-ò ka tyriti rakre Atxiòkia hãwã-ò, Siria bede-ò, Silisia bede-ò.

²⁴ Inyõ rare wayreny-ribi adeereny notykyresymy rybemy. Tai tahe araykyreny riwerydÿÿnyre. Jiarÿboho reteònyrenyõhyre. Kia reerymy watxirenyreri.

²⁵ Tahe wiwesele rahõtinyrenyreny riki, hãbubohoõ Paulo Banabe inlyudu-wana reteònyrenyreny.

²⁶ Kia hãbu Paulo Banabe-wana hãwã binahakÿ-ò roimyhÿrenyreny Jesuisi Kristu Inynyrÿni-di. Ixi-txi rõhõtinyõlere, brebumy.

²⁷ Judasi-wana tule adee raryberenykre kia aõmydÿÿnanamy, katyyriti rewahinyrenyreny wese.

²⁸ Kawese inyboho rõhõtinyrenyreny, Deuxu Tyytybytyhy dori inyrayky rewiòhenanyre. Kia bede ywinalemy adeereny rarybereri biywinybenykemy.

²⁹ Uritere, suritxoo xiwe-ribi iròdude ròrenyõmy iròdu, ihãlubu-di ròrenyõmy, ihãlubu rejuxunyõmyhÿre-wana. Tule òta òtana òraruna widÿÿõmy. Ka bede ywina biywinybenykeki, awimy boibeke. Deuxu deysana tahe adeereny kanakemy watxiwãhãre.

³⁰ Tahe hãbuõ iny inaubiòwamy Atxiòkia hãwã-ò ròrenyreny. Tahe Atxiòkia tyhydÿÿdu mahãdu ributunyreny. Iu tahe tamyreny tyriti riwahinyre.

³¹ Tahe idi rariarenyre, ritÿnynymy tamyreny. Ribedeerynyrenyreny. Tai tahe reysarenyre.

³² Judasi Silaboho tule Deuxu dee rybeduwihikÿ roire. Sõwemy dohodÿÿna-ki seriòre mahãdu-wana rohonymyhÿre. Tai tahe rirurudÿÿnymyhÿre.

³³ Aõutxumy raroorehenyreny, tahe seriòre mahãdu tamyreny rarybere: –Bòibenyke he ateòdÿÿdu mahãdu-ò. Biòkeseke wowina-di Jerusalẽ hãwã-ò.

³⁴ Tahe Sila rõhõtinyreny rarikremy Atxiòkia-ki.

³⁵ Tahe Paulo Banabe-wana naride Atxiòkiakile. Inynyrÿ rybemy rierynanyrenyrenyreny, ritÿnynyrenyrenyreny, ijõ seriòreõ-wana.

³⁶ Aõutxumy tahe Paulo rarybere Banabe-ò: –Ròkòðsekre kÿnyhe, ibutumy hãwã hãwã-di tai juhoo Inynyrÿ rybemy ritÿnynymahãreò wahe, rikiwehityhynanykremy timybo ityhydÿÿdu mahãdu nyimyhÿde-ò.

³⁷ Tahe Banabe Joaõ-Marku ridykemy tamy reare.

³⁸ Paulo heka Joaõ-Marku ridyòkemy ratxireri, Panfilia hãwã-ki dori iribireny ròhònyreki, riwiòhenanyòreki.

³⁹ Marku ridykemy wiwese wesemy aõkõ rõhõtinyrenyreny teratyhylemy ratximyhÿ. Tai tahe wiribi rexihitxinyrenyreny, Banabe Paulo-ribi. Banabe Marku ridyra Xibri bedebute-ò, hãwò-di ròira.

⁴⁰ Paulo tahe Sila ridyra. Seriore mahãdu tahe Pauloboho riixitødÿÿnyre, Inynyrÿ ruxetøena tamyreny kanakemy.

⁴¹ Tahe Siria bede werawo-di, Silisia bede werawo-di, ririranyre dohodÿÿna mahãdu riwiøhenanykemy, rirurudÿÿnymyhÿkemy.

16

¹ Pauloboho tahe Debi hãwã-ò rehemynyre. Ihy tahe Listra hãwã-ò rare. Tai tahe Tximòtxi-wana witxi rekoare. Tximòtxise judea tyhydÿÿduø rare. Tyby tahe grego mahãduø rare.

² Listra, Ionio ityhydÿÿdu seriore Tximòtxi luure. Tximòtximy widee rarybere: —Tii iny hãbu tyhy rare.

³ Tahe Paulo Tximòtxi-wana rakemy rexiwinymy raremyhÿ. Tahe rexitarenykre kotyreu, Paulo, Tximòtxi notykyresymy riteønyre, kowa judeu mahãdu øraru-ki wahe. Tyby dorihe ibutumy iny rieryre tii grego mahãdu raremy. Notykyresykømy rake tahe judeu mahãdu dee kia ibinare.

⁴ Iribi tahe ròirenyre hãwã hãwã-di, ityhydÿÿdu seriore mahãdu ribedeerydÿÿnykemy, timybo Jerusalë mahãdu røhøtinymyhÿremy.

⁵ Tai tahe ibutumy dohodÿÿna heto mahãdu tii rirurudÿÿnymyhÿre ityhydÿÿna-di. Tule ijø rityhynymyhÿre txuø txuølemy ralokemy ityhydÿÿduømy rarekemy.

⁶ Pauloboho Asia bede-ò ròirenyøre rybe ritÿnynykemy, Deuxu Tyytybytyhy ritirÿreki. Tahe Frigia-Alatxia bedemy rekoamyhÿreny.

⁷ Misia bede-ò rehemynyreu, Bitinia bede-ò ròirenykemy riwisÿnyreny. Tahe Jesuisi Tyytyby tamy riteønyøhyre, ritirÿmyhÿre.

⁸ Tahe Misia bedemy rekoare, tahe Troaji hãwã-ò robehere.

⁹ Tahe Paulo hãbuø wesemy robire rasina weselemy. Hãbu, Macedonia bede ludu lamamy rÿimyhÿø, tuu robire. Tahe hãbu ryrymyhÿ tamy: —Manake Macedonia-ø, biwawiøhenanykemy. Kia Paulo rasi-ki tuu robire wese.

¹⁰ Tahe tarasi rahureu, tamyhe wylemy aroikemy watxiwãhãreny. Jiarÿ, Luka, Paulo-wana. Deuxu dori inydeereny rarybereri Macedonia-ø ròkøirenykemy, Rybewehikÿ rikiubÿtÿnyreny. Kialemy røkøhøtinynyreny.

¹¹ Tahe Troaji hãwã-ribi røhønyre hãwø yhywydynamaworo-ki. Samotrasia hãwã-ò imynahyy riøhøre. Ijø txu tahe Niapoli hãwã-ò riøhøre.

¹² Iribi tahe Filiposi hãwã-ò roirenyre. Juhuludu hãwã rare Macedonia bede-ki. Roma hãwã mahãduø tule tai rasÿnymyhÿre. Tai txuø rewyreny.

¹³ Sabadotxu tahe hãwã-ribi reølønyrenyre bero ijà-ø. Rahøtinynyre tai ixitødÿÿna-ø rÿimyhÿremy. Tai tahe hãwyø rexibutunymy rÿimyhÿ. Tahe rorokorenyre tamyreny raryberenykemy.

¹⁴ Hãwyø Lidia inire, inyrybe-ø tahe roholatyhymyhÿre. Tii Txiatira hãwã luduø rare. Tii tylÿre ijohodure, tule Deuxu tyhydÿÿdure. Inynyrÿ irayky riywinyre Paulo rybe rityhynykemy.

¹⁵ Tahe ibutumy isÿmahãdu-wana riratysebeny. Tai tahe tamy Lidia rarybere: —Inaanokãbo ityhydÿÿkÿdumy watxiwãhãre-wana, wahetoku-kø manakre. Tai tahe iheto-ò ròirenyre irybe-ki.

¹⁶ Aøutxumy tahe riberenyre ixitødÿÿna-ø. Itxi rekoarenyre ijadømaø-txi, deødu rare. Iwo-ki tyytybybina ralømy rÿire. Tai ijadøma relyre inyko aøhebo iny-ø rotÿÿnykemy. Tai søwemy nieru ritare tawedu-ø.

¹⁷ Tahe waherenymy dyrymy nade: —Deuxu ibuturatyre rare. Iteødÿÿkÿna mahãdu kia mahãdu rare. Tikiboho rarybemyhÿre timybo iny taøraru-ribi ratakemy.

18 Tuheka rarybehyy raremyhÿ. Aõutxumy tahe Paulo tai rexirare, tamy ròõsemy reare. Rarybere tyytybybina tai ratxirerìò: —Jesuisi Kristu nimy iribi arateònykre. Bexitakre. Tahe aõwesele iribi ròhònymy reare.

19 Iwedu tahe rieryre nieru idi ritaõkre ta rimyreny Paulo Sila-wana. Retÿhimy rare ywisidÿÿdu-ò, hãwã elehyna ube-ò.

20 Tahe ijadòma wedu rarybere ywisidÿÿdu mahãdu-ò: —Kaa judeu mahãdu iny hãwãreny dibinadÿÿnymyhÿde.

21 Tiiboho iny ribedeernymyhÿre aõ iny bede ywinareny-di aõkõ. Inyboho Roma hãwã mahãdu rare. Tai kia-ki aõhe arotÿÿnyõtyhy.

22 Tai tahe sõwemy iny Paulo Sila radònyre. Ywisidÿÿdu mahãdu tahe ityy ibòrò-ribo ritxuahakÿre idi tahe rityhenymy tuu raòhòtere.

23 Tuu raòhòtere, tuu raòhòtere, idi tahe ròtenawo-ò idi rehurenyre. Ròtena-di itxeredu-ò rarybere: —Kaa rahenykre-wana, kaile budurukre.

24 Tai rirutere iraru-txi rarutxi-ò iwa ritidire òwòru iwodÿÿwomy raraty-heny.

25 Ruetya tahe Paulo Sila-wana rexitòenymy roimyhÿ Deuxu dee. Ijò ròtenawoludu mahãdu roholamy rÿimyhÿ tai.

26 Aõwese bede ramytatare. Ròtena ijòtòbòna rirayre hãbu mynyna iribi rejuxunyre.

27 Tai tahe itxeredu ijò iraymy idi retehereu, rexirubunykemy tamaydese ritare. Ròtena woludu mahãdu rahenyramy tii rexinohòtinyra.

28 Paulo tahe tamy ryryre: —Ixirubudÿÿõmyke, kakile watzirenyreri, ibutuhukÿlemy.

29 Itxeredu ryryre loosòna kidiwykemy tahe ralore ramytatamy brebumy. Paulobohoko-ò resere tatiòhomy.

30 Tahe itxeredu diòlòdÿÿnyde irarutxira-ribo, tamyreny rarybere: —Wanyrÿboho timybohe aratamy arÿike. Aõhebohe arotÿÿnyke.

31 Tahe rirawyònyre: —Inynyrÿ Jesuisi bityhynykre kile, tarasanamy myikre, asÿ mahãdu-wana.

32 Tahe tamy Deuxu Rybe-di ritÿnydÿÿre ibutumy isÿ mahãdu-ò.

33 Iruule tahe riwisinanyrenyra ibrò wotòmona risuhòra. Idi tahe itxeredu raratysebenyre tasÿ mahãdu-wana ibutumy.

34 Iribo tahe itxeredu ridyrenyre taheto-ò riroxikemy tahe ibutumy reysanihikÿrenyre, Deuxu rityhynyrenyraki.

35 Txu deadeu tahe ywisidÿÿna dinodu ijò ywisidÿÿna mahãdu riteònyre, ròtena-ribo Pauloboho riteònykre.

36 Itxeredu tahe Pauloboho-ò rarybere: —Ywisidÿÿna mahãdu arateònykre riwateònyreri. Bòibenyhe, wowina-di, biòlònybenyke.

37 Paulo tahe rirawyònyre: —Aõkõre, araõtyhy. Jiarÿboho Roma hãwãhãkÿ mahãdu kaa watzirenyreri. Tii riwayhytanyrenyra idi ròtenawo-ki riwasÿnyrenyra. Ywisidÿÿdu mahãdu wii rotykòhyre riwaròtenyrenyra. Wasimy ka tiu ariòlònyõtyhy. Tiiboho kodoikreule tahe ariòlònykre. Tii he riwaòlòdÿÿnykre.

38 Tahe ywisidÿÿna mahãdu tawedu-ò rarybere. Tahe tiiboho ruberurenyre Pauloboho Roma hãwã mahãdu roireki wahe.

39 Tai tahe dòidenyde tamyreny, aõwaxina riòlònykre. Tahe làhàmy tamy rexitòenyre. Tutyhy-ki aõkõ làhà ararutara. Tai riteònyrenyre, hãwã-ribo rexitarenykemy tamy rexitòenyra.

40 Rexitarenyreu, Pauloboho tahe Lidia heto-ò ròsere. Ibutumy ityhydÿÿdu tahe wii ritotynyre, wii riwiòhenanykemy. Idi tahe riòlònyre kia hãwã-ribo.

17

1-2 Tiiboho rekoarenyre Afipoli hãwãmy, Apòlonia hãwãmy tahe rehemynyre Tesalonia hãwã-ò. Judeu dohodÏÏna hetoõ tai rÏimyhÏreò. Paulo, iwese aõu riwinymyhÏre wesele rare tamy. Ralore rybe-di rarybekemy. Inataõ sabadomy tai riraynyre tyyriti ritidÏÏna tamy ritÏÏnykemy.

3 Rybe hitxina rurukremy tuu relyyre. Tahe Paulo tamynyre ritÏÏnyre iwese Kristu durudemy idi dexiixixanyde rubu-ribi. Kia iny rityhynyra Jesuisi inatyhymy Deuxu deòdÏÏna rare.

4 Tahe ijohonadu mahãduõ rityhynyre. Tule ijõ judeukõdu mahãdu rityhynyre. Tule ijõ hãwyy wihikÏ mahãduõ rityhynyre sõwemy.

5 Tahe judeu mahãdu dinodu tuu ròhãrumyhÏre. Tiiboho tahe hãbu binahakÏ mahãduõ wii rotyre aõbina ritelenykremy. Tahe ròirenyre Ijasõ heto-ò Pauloboho rimyrenykremy, ywisidÏÏna-ò idi retÏÏhikremy.

6 Tai tahe rahaõhyyre tai. Tahe Ijasõ ritarenyre ijõ ityhydÏÏduõ-wana. Tahe ridyrenyre ywisidÏÏna-ò. Tahe raryberenyre ywisedÏÏdu mahãdu-ò: –Paulo, Silamy urile bedede diòtanymyhÏdenyde, aõna aõna binahakÏlemy rotÏÏnymyhÏre.

7 Ijasõ tahe ritirÏÏmyhÏre taheto-ki. Tiiboho iny òludu roire. Iny iòlòreny rityhynyõtyhy. Jesuisi ka iòlòrenyre.

8-9 Ibutumy iny idi ròhõtynyre, tule ywisidÏÏna mahãdu rexitòenyre nieru ririkemy. Tai xiery tahe ròhònyke. Tai tahe ririrenyre nieruõ.

10 Kiaru tahe ityhydÏÏduõ Pauloboho riwiòhenanymy iribi riòlònykemy Bereia hãwã-ò. Tahe rehemyhÏreu, dohodÏÏna-ò ròirenyre.

11 Kia hãwã-ki judeu mahãdu iny awi rare, Tesalonia hãwã mahãdu wese aõkõre. Teysamy tamy roholarenyra. Idi heka rariara Tyyriti-di, òbitimy Paulo rybe aõbo roirerimy rierykemy.

12 Tahe sõwemy judeu iny rityhynyre. Judeukõdu mahãduy-ribi sõwemy rityhynyrenyre, hãwyy wihikÏ, hãbu-wana tule rityhynyrenyre.

13 Bereia hãwã-ki Paulo Deuxu rybe ritÏÏnynymy raremy. Judeia mahãdu dinodu Tesalonia hãwã-ki roholareu, tahe doidenyde. Iny sõwe-ò raryberenyre: –Pauloboho bibinadÏÏnyke.

14 Tahe ityhydÏÏdu seriòre mahãdu aõwesele Paulo riteònyrenyre ahohokÏry-di. Sila, Tximòtxi taile rarire.

15 Hãbuõ rare Paulo-wana Atena hãwã-ò. Iribi tahe dòòsede hãbuõ. Paulo tamy tarybe riwahynyra Tximòtxi Sila-ò, wylemy kanakremy.

16 Paulo Atena hãwã-ki riraòreu, tahe robire suritxoole rityhynymyhÏreò. Tai tahe tii rabadewore.

17 Idi tahe Paulo ralore dohodÏÏna mahãdu heto-ò judeu dee rarybekemy, tule judeukõdu ityhydÏÏdu dee rarybekemy. Tahe rarybemyhÏre txuõ txuõlemy. Tule hãwã ube-ki rarybemyhÏre hãwã-di reamyhÏre mahãdu-ò.

18 Aõutxumy tahe Epikuriu mahãdu Paulo-txi nade. Estòiku mahãdu ijõre. Tiiboho, aõbo rybe rare kia erydu roire. Tiiboho he Paulo raujõmorenyre: –Aõmy aõkõ, kiarybedu rarybereri. Ijõ tahe rarybere: –Tii Deuxu tÏmyramy rarybereri. Paulo dori juhuru Jesuisi ixixanamy relyymy raremyhÏ. Tai kiamy raryberenyre.

19 Paulo tahe ridyrenyre. Tai iny roholamy rÏimyhÏreò ridyrenyre: –Rybe tÏmyramy telymahãtemy inihe bedelyyke wakoreny. Tamy kia rarybere.

20 Aõkõre inihe aõna aõnamy tarybemy atxiteri, aõwitxira witxiramy. Tai aroholarenykemy watxirenyre.

21 Atena hãwã mahãdu, tule iwitxira bedede luduõ tai rasÏÏnymyhÏre, aõ tÏmyraõòle roholarenykemy ratxirenyre.

22 Tahe Paulo rÿire rybenatya-ki. Rexiòrarunymy rarybere: —Atena hãwã mahãdu, kaiboho Deuxu rybe hyky tahòtinymahãtenyte.

23 Jiarÿ hãwãymy rariamy watzireriu, sòwemy xiwena-di retehera. Ijò-di kiamy retehera iritina-di: Kaa Deuxu heka inyò rieryòhyymyhÿre. Ka Deuxumy kÿny heka akoreny arelyykre, teerymahãtenyte-di aòkò tuu tealàmahãtenyte.

24 Ka Deuxu ibutumy bede riwinyre. Ibutumy tuu rÿira tii riwinyre. Tii heka biuwetyy wedu rare, su wedu rare. Aõ hãbu widÿÿna heto-ki aòkò tii rasÿnymyhÿre.

25 Tiu heka tii aõmy reaõtyhy hãbu aõ tamy riwahinyõtyhy. Tule tahe inydee ibutumy aõna aõna riwahinymyhÿre, ele wesena, umy, ibutumy inydee riwahinyre.

26 Hãbu sohojiò-ribi ibutumy iny ròhònyre iriòre riòremy bede witxira witxiramy rasÿnymy rÿirakemy. Urile wiribi rihitxihitxinyre. Tiu tamy riteòsinyre, tikibo rasÿnymy rÿirakemy.

27 Ibutumy Deuxu rajemyhÿkemy, raerykemy. Tii dori irehemy aòkò ihÿre iny-ribi. Iny sohoji sohojiò-ribi iòhòmy ratximyhÿre.

28 Deuxu òraru-ki inyboho ibutumy irumy ratximyhÿreny, ririranymyhÿre, ihoòkeki tahe aõ rikiwinyrenyõtyhy. Atyyriti widÿÿduò kiamy rarybere: —Inyboho heka Deuxu riòre.

29 Inyboho Deuxu riòre rareki, urile nohòtiòmy womati tÿrÿrÿÿ ritxoo wesemy, womatiura wesemy, manaritxoo wesemy Deuxu-di nohòtiòmahãbeny. Hãbu rayky-ribi, hãbu debò Deuxu releremy nohòtiòmahãbeny.

30 Ihetxiu tii Deuxu rieryòhyreny. Tai tahe iòrarunareny aõnihikÿmy aòkò Deuxu dee ihÿre. Wiji bededÿÿnana tahe, ibutumy taòraru-txi ixi-txi nohòti ijaranamy, tai tahe rabadewomyhÿkemy. Kia tahe ibutu iny-ò rarybereri, iny taòraru ririkemy.

31 Deuxu Jesuisi riixixanyre rubu-ribi. Tai tahe ibutumy tii rityhynyrenyemy ihÿre. Aõtxumy tahe ibutumy iny ywisidÿÿdumy kanakremy ijÿre. Òbitina-di Jesuisi iny ritxuarenkyre kia wiribi hitxi hitxina txuu.

32 Paulo Jesuisi ixixanamy rarybereu, inyò tuu rirajuare. Ijò tahe rarybere Paulo-ò: —Ijò txuu arybe ini aroholatyhykemy watzireri.

33 Idi tahe Paulo rare iribireny.

34 Ijò iny tahe Jesuisi rityhynyre, Paulo-ò tahe rixibutunyre. Ijò Dionisiu inire, Areòpolo heto ube-ki tii iny mahãduò roholamyhÿre. Ijò, hãwyyò rityhynyre, Damari inire, tule ijò mahãduò rityhynyre.

18

1 Paulo tahe Atena hãwã-ribi ròhònyre Oritxi hãwã-ò.

2 Kia-ki tahe judeu mahãduò-wana witxi reare. Ini heka Akila inire. Tii Ponto hãwã-ki raumynyre. Urihimyòle Italia bede-ribi dehemynyde. Prisila ihãwyynire. Iòlò Laujiu Roma hãwã-ribi ibutumy judeu mahãdu diteònyde. Tai heka nade kaweribi-ò.

3 Paulo iaòmysÿdÿÿna rierymyhÿre, tyyheto widÿÿ. Tai tahe tiiboho-wana raijoinymyhÿre wiwana raaòmysÿdÿÿrenyemy.

4 Sabado txuò txuòlemy tamy reamyhÿre judeu mahãdu dohodÿÿna heto-ò. Tahe ritohonymyhÿre, judeu mahãdu judeukòdu mahãdu tule. Tamy rarybere tii Rybewihikÿ òbitimy rierykemy.

5 Sila tahe Macedonia bedewe-ribi rehemynyre, Tximòtxi-wana. Paulo tai rybe ritÿnynymyhÿhy raremyhÿ. Aõu Paulo rarybere: —Inatyhymy Jesuisi Deuxu deòdÿÿna rare, Kristu rare.

⁶ Katahe judeu mahãdu tamy raykarananymy raremyhÿ. Aõbinahakÿlemy Jesusimy rarybere. Tahe Paulo taty riohowire iixãwidinykemy riteòsinykemy. Tahe tamyreny rarybere: —Jiarÿ aõkõ bede òrarure. Kai aòraruna-di burukre-wana, ahãlubureny waki aõkõ rare, adeereny dori Deuxu rybemy rarybere. Tahe judeukõdu mahãdu-ò sohojile tuu arelyykre.

⁷ Iribi tahe inyõ heto-ò Paulo rare. Txisiu Justu inire. Tii judeukõdu mahãduõ rare, tahe Deuxu rityhynymyhÿre. Judeu dohodÿÿna heto bire-ki iheto rÿire.

⁸ Krispu judeu dohodÿÿna heto weduni rare. Tii tasÿreny ibutumy Inynyrÿ rityhynymyhÿre. Tule sówemy Oritxi hãwã mahãdu rityhynymyhÿre. Paulo riratysebedÿÿrenyre.

⁹ Paulo tahe rummy rõrõmy roire. Tai tahe rasina wesemy robire. Inynyrÿ tamy narybede: —Brebuõmy, Paulo. Marybeke aõmybo rybemy adee re-wahinyré. Rybe tÿnydÿÿ lau brebuõmy.

¹⁰ Jiarÿ adi watxiwãhãre urenana. Inyõ adee aõhe rotÿÿnyõtyhy. Sówemy iny rÿire kaki watyhydÿÿdu. Kia Jesuisi tamy rarybere.

¹¹ Tai he Paulo bede riijere sohoji beòra weeremy tai bede riere. Ribedeerynymyhÿre Deuxu rybemy.

¹² Roma dinodu tÿmyraõ ronyre Grecia bede-ki. Ini heka Kalio inire. Dinodumy ronyrau tahe, judeu mahãdu wii dotyde. Wii ritobinyre Paulo dee aõbinabinahãkÿ riwinykremy. Tahe tiiboho Paulo rimyrenyre idi kanakremy ywisidÿÿdu dinodu-ò.

¹³ Kiamy raryberenyre: —Paulo, Deuxu deàlanamy iny dibedeerynymyhÿde. Tai bede ywina rityhynyõhyymyhÿre.

¹⁴ Tahe Paulo ixideele rarybekemy ratxireri, tahe Kalio judeu mahãdu-ò rarybere: —Kia rubudÿÿdu ada aõ ibinatyhymy ratxikeki, tai idi arohonykre, ariywisidÿÿnanyke.

¹⁵ Tahe aõkõre, urile abede ywina rybedile rarybemyhÿre, tai ywisidÿÿnamy idi araõkre. Kaibohole biywisidÿÿnanybenyke.

¹⁶ Tahe Kalio ibutumy diteònyde ywisidÿÿna hetoube-ribi.

¹⁷ Tai tahe judeu mahãdu dohodÿÿna heto wedu rimyrenyre. Sòteni inire. Tule raòhòterenyre ywisidÿÿna heto ube-ki. Kalio tahe kia òhòtena-ò aõhe rotÿÿnyõhyylere.

¹⁸ Oritxi hãwã-ki Paulo rare myhÿre sówemy he tai txu riwyre. Idi tahe seriòre mahãdu-ò rarybere: —Arakre. Tahe hãwòõ-di he rare, reuròkemy Siria bede-ò. Tahe Prisila Akila-wana tii-wana ròirenyre. Paulo Deuxu-ò rarybere aõmybo rotÿÿnykremy. Idi tahe rexihumy kia rÿire. Tai tahe tarade risyre nohòti ijerana wesemy. Sekrea hãwã-ki tarade risyre.

¹⁹ Tahe ritehemynyre Efesu bede-ò. Prisila Akila-wana ririre. Iribi tahe rare tyyriti ritÿnynyremy judeu mahãdu dohodÿÿna heto-ò.

²⁰ Tii mahãdu tahe Paulo rexitòenyre tai aõtxumy tai ratxunykemy. Tahe rarikòkemy ratxireri.

²¹ Karibi ròhònyreu, tamy rarybere: —Deuxudeewikeki, ixyby adòòsekre. Efesu-ribi ròhònyreu, yhydynamawòò rimyre.

²² Ritehemynyre Cesaria bede-ò. Iribi resereu, Jerusalẽ hãwã-ò rare. Tahe rarybere riwehityhynanyre dohodÿÿna mahãdu. Iribi tahe Atxiòkia hãwã-ò rare.

²³ Tai bededÿÿnana riijere idi tahe rara. Rariamy rare hãwã hãwã-di, Alaxia bede-di, Frigia bede-di. Ibutu hãwã-ki ityhydÿÿdu rotohodÿÿnymyhÿre, riwiòhenanymyhÿre.

²⁴ Iu tahe inyõ judeu mahãduõ dehemynyde Alexÿdria hãwã-ribi. Apòlo inire. Tii ribedeeryny wihikÿmyhÿre tyyriti, tarybe-di rotohononymhÿre, Deuxu rybe rieryeki.

²⁵ Inyõ Apòlo rierynanyre timybo Inynyrÿ Jesuisi aõmydÿÿnana raremy. Tai Jesuisimy ribedeerynymy raremyhÿ, deysanatyhy-di rarybemyhÿre. Tii tahe Joaõ ratysebenale rieryre.

²⁶ Apòlo rexidelenymy relyyre judeu mahãdu dohodÿÿna heto-ki. Prisila Akila-wana tai roholamy rononymhÿre. Idi tahe tiiboho Apòlo ridyrenyre ibutumy Jesuisi aõmydÿÿnanamy tamy ritÿnykemy.

²⁷ Iribi tahe Apòlo ratÿnykemy rexiwonyre Grecia bedey-ki. Ityhydÿÿdu seriõre tamy rybe riwahinyre, Grecia ludu seriõre mahãdu-õ, aõma, riry-ludonykemy, rehemynykeu. Tahe rehemynyreu, sõwemy riwiõhenanyre kia tyhydÿÿdu seriõre, Deuxu ruxetõena ityhydÿÿdu mahãdu.

²⁸ Tii dori judeu mahãdu raykyrybe itxÿte riwitxiradÿÿnyre iny sõwe hekÿy-ki. Rybetyyriti ritina-di riurihimy rarybere iwese Kristu Jesuisi raremyhÿ wese, Deuxu deõdÿÿna wahe.

19

¹ Apòlo, Oritxi hãwã-ki rareu, Paulo rabetetÿinyre kabedey-ki idi rehemynyre Efesu hãwã-õ. Kowa ityhydÿÿdu mahãduõ-ki he rahare.

² Tamy Paulo ritÿÿraxinyre: —Tetyhynyteu, Deuxu Tyytybytyhy ixidee aõbo temytenyte. Tahe rirawyõnyre: —Aõkõre he, aõmybo tarybeteri. Deuxu Tyytybytyhy reeryõrenyre.

³ Paulo rÿÿraxire: —Taratysebetenyteu, mobohe tetyhynytenyte. Tahe rirawyõnyrenyre ixityre: —Retyhynyrenyre ibutumy Joaõ Sebedÿÿdu riwabe-deerynyremy.

⁴ Paulo tahe tamyreny ritÿnynyre: —Joaõ sebedÿÿna urihimyõ iwitxi rare. Tii kiawese rybe ritÿnynyre: iny taõraru-txi tõhõti reakemy. Tahe Jesuisi Juaõ hewo-ribi kanakreu, tii tahe inatyhymy kanatyhydÿÿkre. Paulo kia tamyreny rarybere.

⁵ Kia-õ roholareu tahe, raratysebenyre Inynyrÿ Jesuisi nimy.

⁶ Paulo iratytyre tebò ritidire, tai Deuxu Tyytybytyhy tamyreny ralore. Tahe Deuxu rybemy raryberenyre, tule iwitxira rybemy raryberenyre.

⁷ Waõinatxi reurõ hãbumy rÿiramy.

⁸ Inataõ ahãdumy Paulo reamy raremyhÿ judeu dohodÿÿna heto-õ. Tiiemy rarybehymyhyre, riõbitinymyhyre, Deuxu Iòlõnamy ritÿnynymyhyre.

⁹ Paulo-õ ijohonaduõ rityhynyõhyymyhyre, teramy reamyhyre. Deuxu aõmydÿÿnanamy ibinamy rarybemyhyrenyre iny sõwey-ki. Tai tahe Paulo rexihitxinyre judeu dohodÿÿna heto-ribi. Txirano kia tyyriti rybena heto-õ txuõ txuõlemy ralõmyhyre taerydÿÿna-wana. Tahe rabe-deerynymyhyre.

¹⁰ Tahe bedey riere inatxi beõramy. Tai tahe ibutumy iny Asia bedey ludu mahãdu Inynyrÿ rybe-õ roholamyhyre, judeu mahãdu, tule judeukõdu mahãdu.

¹¹ Deuxu aõna aõna wiwihikÿ riwinyre Paulo debò rihuõtere.

¹² Paulo tykyyre riwyrenyre webinadutyre ritidirenykemy. Tyky õsurõna wesemy ijõmy riwyre. Tai tahe webinadu riteytenymyhyre. Tule tyytybybinahakÿ iny-ki raremyhÿu, aõwesele iribireny rõhõnymy reare tykyyre õraru-ki.

¹³ Ijõ judeu mahãduõ ratÿinyre hãwã hãwã-di inyõ ribi tyytybybina ritakemy. Tiiboho tyytybybina riteõnykemy idi ratxireri. Tai tahe Inynyrÿ Jesuisini-di riteõnyre. Kia wesemy rarybere: —Paulo, Jesuisi rybe ritÿnynymyhyre, tai Jesuisini õraru-ki iribi bòhõnykre.

14 Debòinatxi seriòre kia riwinyre. Sewa tybynire, judeu xiwena widÿÿdu kia wedu tii rare.

15 Tahe Jesuisi ni-di tyytybybina-ò rarybereu, tyytybybinaõ dirawyònyde: –Jesuisi reeryre, Paulo reeryre, tahe mobò atxiteri.

16 Tahe hãbu tyytybybina-di ratxirerí, ityrehekÿle dexiwatxinyde, ri-hetenyre, ibutumy riwotòmonyre ityky ritare tai hetowo-ribi hãbu mahãdu tadehekÿlemy rahenyre.

17 Ibutumy Efesu hãwã mahãdu kia rieryrenyre, judeu mahãdu, judeukõdu mahãdu. Tahe ibutumy ruberure, Jesuisi ni nityhydÿÿhÿkÿmy ini raremyhÿki.

18 Sòwemy ityhydÿÿdu taòrarureny riixitòedÿÿnymyhÿre, dohodÿÿna mahãduy-ki.

19 Ijò ityhydÿÿdu juhúu tyytybybina rierymyhÿrenyre, tiiboho tahe tatyyriti diwyde itxenadÿÿmy rybetyyriti, òwòruwidÿÿ kia tyyriti. Tahe iny retehemyhÿreruki kia tyyriti sòwemy ritoonyre. Idi ibutu tyyriti juhúu òwy wese inyò riritinyre. Iòwy tahe 50 mil womati ura nieru juhúu iòwyre. Ihãrele tahe idi rahure.

20 Ibutumy kia bede mahãdu Deuxu rybe-di ròhòtinihikÿrenyre.

21 Idi tahe Paulo tarayky-ki ròhòtinyre: –Judeukõdu mahãdu bede-ò arakremy ixi-di watxiwãhãre. Juhúu Jerusalè-ò arakre Macedonia bede-di Akaia bede-di arariamy arakre. Adòòsekreu, tahe Roma hãwã-ò arakre.

22 Tai tahe tawiòhedÿÿdu Tximòtxi, Erasto-wana Macedonia bede-ò riteònyre. Tai Paulo Asia bede-ki naride. Bededÿÿnanaõ riwyre.

23 Kia bededÿÿnanau aòbina nihikÿ rÿikemy riwisÿnyre Deuxury òbitina òraru-ki.

24 Dimitiu heka womati tÿrÿrÿ ura ritxoo widÿÿdu rare. Hãwyy ritxoo ihãwãreny deuxu rare. Diana inire. Nieru sòwemy ritamy raremy idi riwinymyhÿreki.

25 Dimitiu ributunyre ibutumy womati ritxoo widÿÿdu, tamahãdu-wana. Tamyreny rarybere: –Wanyrÿboho adeereny ararybekre. Inyboho nieru ritamyhÿrenyre kaa aòmÿsÿdÿÿ-ki. Kia tahe teerytenyte.

26 Paulo rarybemyhÿre kaa inywidÿÿnareny deuxu aòkò rare. Tai tahe sòwemy iny tamy nariade irybe-di. Efesu hãwã sohojile-ki aòkò, ibutumy Asia bede-ki irybe rityhynymyhÿre.

27 Iny aòmÿsÿdÿÿna òsana riixãwididÿÿnykre, ideuxu dohodÿÿna heto-wana, iny deuxu reny riixãwididÿÿnykre. Diana inyluure. Kaki sohojile aòkò inyluure, ibutumy Asia bede-ki, tule bede bede ludu iluu inihikÿmy awireki. Paulo heka kia ibutumy rahukre.

28 Kia roholareu tahe, raykarananyrenyre. Ryryrenyre: –Diana awi rare inydeereny. Tii Efesu hãwã deuxu rare.

29 Rirajuamy rÿimyhÿ hãwã-ki. Hãwã mahãdu, Kaio Aristarku-wana rimyrenyre tahe ridyrenyre butunaube-ò. Tiiboho Paulo tÿimahãdu rare, Macedonia hãwã mahãdu rare.

30 Tahe Paulo ralòkemy rexiwonyre tatÿi mahãduhe-ki, iny sòwey-ki tahe taerydÿÿna ijoi ritirÿre.

31 Tule ijò bededinoduõ, Paulo wiòhedÿÿmy ratxireri. Tai tarybereny Paulo-ò riwahinyre ibutunaube-ò raòkemy, brebunamy roireriki.

32 Tiilemy ijò rarybemyhÿre. Ijò iwitxiramy rirajuamyhÿre. Urile wimy rauriurire. Aòherekibo ibutumy rÿirerí, iny rieryòhyre.

33 Alexÿdre iny sòwey-ribi rimyrenyre tahe, idi retÿhire, ritamadÿÿnyre iny rudera-ò. Alexÿdre debò riteòsinyre tamahãdumy rarybekemy.

³⁴ Iny swemy idi retehereu, judeu mahdu raremy rieryreu tahe riraju-
atyhyre. Tahe inatxi ramy rirajuahyy rÿimyhÿ: –Diana awi rare. Tii heka
Efesu deuxu rare. Kiamy ryryrenyre.

³⁵ Idi tahe hw wedu riixawididÿÿnyre. Tahe rarybere: –Hbu,
Efesu hw mahdu. Ka hw Diana hw rare. Kaki tohodÿÿna heto
reyrubuwhhrenyre. Kaki biu-ribi mana ritxoo desede. Ibutumy kia
reeryrenyre.

³⁶ Kia inatyhy rare. Tai tahe rikiryrymy rokorokorenykre. Awesele
awidÿÿmy.

³⁷ Kaa hbu tedytenyteri. Ahe rotÿÿnyreri. A-di rawasinyhyreri do-
hodÿÿna heto-ribi. Abinahakÿ iny hwyy deuxumy raryberenyhyreri.

³⁸ Dimitiu tamahdu-wana abo tai reny ibinamy ihÿrenykeki, ywisidÿÿdu-
idi rakre. Tiiboho heka wii ributunymy rÿireri.

³⁹ Ij rybe tahe atxibenykeki, ijohonadu mahdu adibutunykre arybe-
aroholarenykemy. Iwese inyboho rotÿÿnymyhÿre wese arieryrenykre.

⁴⁰ Roma hw dinodu sana amybo inymyreny kanarybekre. Wiji inyboho
ahebo rotÿÿnyrenyrerimy. A kÿnyhe i-ki ka wiji jei jei rÿireri wahe. Roma
hw dinodu tarybe kidiwahinykre-wana wahe, timyhe warybena.

⁴¹ Tahe riixawididÿÿnyre. Rsere ibutumy.

20

¹ Kia jei jei rybe rexihureu, Paulo tahe taerydÿÿna mahdu- tarybe
ritenyre tiiboho kanakemy. Tahe rakrekou tyremy tamyreny Deuxu rybe-di
rotohonyrenyre Deuxudeewimy rierykemy. Idi tahe ritobinyrenyre. Rare
heka Macedonia bede-.

² Ibutumy titxibo rexitomonymyhÿ ritohodÿÿnymyhÿre ityhydÿÿdu
mahdu-.

³ Tahe Akaia bede-ki heka bede riijere inata ahdu. Tahe rexiy-
winymyhÿre ratximyhÿ Siria bede- rakremy hw-di ridymyhÿredi heka
rakremy rexiywinyre. Idi tahe judeu mahdu irubudÿÿmy rarybemy ny-
imyhÿ. Iny Paulo rierydÿÿmy, tai ta Macedonia bede-di rsere Siria bede-
rakemy.

⁴ Hbu ramyhÿre tii-wana Jerusal-, ta kamahdu Asia bedele he
roirenyre. Sapatu ijnire, tii heka Bereia hw mahdu rare, Biru heka Sapatu
tybyni rare. Aristarku ijre, adelahelÿÿna ijni rare, tiiboho Tesalonia hw
mahdu rare. Ij Kaio inire, tii Debi hw mahdu rare, Tximtxi ij rare. Tule
ij Asia bede ludu rare, Txitxi ij, Trofimo ijre. Rarekie.

⁵ Kiaboho juhutyhy rexiramy roirenyre. Paulo riramy Troaji hw-ki.
Tule riwaraokre –Luka jiarÿ ka tyyriti widÿÿdure.

⁶ Worana bedehesi ituereu tahe, jiarÿ Paulo-wana roirenyre heka hw-di
Filiposi hw-ribi. Iruyre txu rÿidi tahe rehemynyre. Troaji hw-. Taita
sohoji semanamy rewyrenyre.

⁷ Tahe nobiutxu ityhydÿÿdu mahdu iny wi ributunyre, Inynyrÿ mona,
rÿsÿna-wana tuu rihitxinymy rirÿsÿkemy.

⁸ Tahe Paulo iu rybe ritÿnynyre itxu biwamy rexiywinymy rÿimyhÿ
tahe rakremy. Urile tahe rarybereri hyky tahe ruetya he wihe rito-
tynymyhÿrenyre. Hetoranoa-ki biu-ki rÿimyhÿre. Kanotyhy-ki rabuturenyre.
Tiu Paulo rarybemy rarybemy rexihukhyre, biurasmy rakreki. Tahe
swemy heka lamparina rÿimyhÿre.

⁹ Ronymyhÿ, moma inire, Otxiu. Ama-ki ronymyhÿ, heto janela tyre-ki
biu-ki. Ta thti rosare, rrmy resere. Iribi reare, biuribihikÿle resere su.
Rurure.

10 Tahe Paulo robehe my rare tamy. Tatiowotimy resere weryrybò rimykremy iwetya-ki. Paulo rarybere: –Bedeòtiidÿÿõmyke irulemy roire. Deuxu ixyby iumy tamy riwahinyre.

11-12 Weryrybòmy irumy robirenyreu tahe, ibutumy reysarenyre. Tai tahe Inynyrÿ bemona, rÿsÿna-wana tuu rirÿsÿrenyrene biu-ki wahe. Paulo ixityre rarybere. Txu iòlò iòlòmy rareri-wana tahe rarybere. Tahe Paulo rare. Tatilemy rare Aso hãwã-ò. Tii tamy tarybe ririrehe: –Kowa ayhywydyna lawò arimykre.

13 Tahe jiarÿ, Luka, wamahãdu-wana roirenyre yhywydynalawò-di Aso hãwã-ò Paulo-wana rekoarenykemy.

14 Rehemynyrenyreu tahe, Paulo ralòmy yhywydyna laworo-ki.

15 Imytxubiòwa tahe Kio hãwãko-txi rehemynyre. ijõ txu tahe Samosi hãwã-ki rehemynyre. Ijõ tahe rehemynyre Mitilene-ò.

16 Paulo ixitamadÿÿ deramy reare Efesu hãwã-ò. Raeleemy ratximyhÿ Jerusalẽ-ò rehemynykemy, aõma, Pentecoste kia judeu worana bedehesi-ò raeleelere.

17 Tahe Miletu hãwã-ki rehemynyreu, dohodÿÿna matuari mahãdu tamy he rarariòwyre tamy rarybekremy hãwò-ò kedehemynykemy. Tahe Efesu-ribi ditehemynydeu, kia tamy rarybere:

18-19 –Tahe tiiemy Asia bedeki Inynyrÿ-ò raaõmysÿdÿÿhyy watxiwãhãre. Aõmy aõkõ ixidee rahõtinywãhãre. Rahiny mahãre, Inynyrÿ dee rybe retÿnynmahãre. Warube resehy watxiwãhãre. Tai ta brebuna nihikÿ waumy-di rarewãhã. Judeu mahãdu heka sõwemy wamy rarybemy riwarubunyky. Kia ibutumy aõmydÿÿnana teerytenyte.

20 Tiu raberuõhywãhãre Inynyrÿ nimy rybemy. Ibutumy rarybewãhãre iny sõwey-ki tule heto hetowomy relymahãre.

21 Judeu mahãdu-ò retÿnynyre tule judeukõdu mahãdu-ò taòraru ririkemy Deuxu dee taòraru-txi tõhõti reakemy rabadewokemy. Tule Jesuisi Kristu rityhynyky.

22-23 Katahe wiji arakre karibi Jerusalẽ hãwã-ò. Deuxu Tyytybytyhy heka wadee dyrymyhÿde. Aõhebo arotÿÿnykre, reerykõre. Kiale reerywãhãre, aõma, Deuxu Tyytybytyhy wadee rarybemyhÿre ibutu hãwã-ki, aõma, aõhõkÿmy arotÿÿnykre kowa. Rotenawo-ki aroikre. Myle reeryre.

24 Tiiemy tamy raaõmysÿdÿÿmahãre. Kiale wadee Inynyrÿ Jesuisi re-wahinyre urenana. Kia ariwinyõkeki, aõ aõkõ heka jiarÿ waumy-ki. Tii arelyywãhãke inyko-ò rybe tÿmyra wihikÿ, tynybo Deuxu inyluurenyre.

25 Araerynanywÿhÿrenyrene Deuxu Iòlònamy, wamy tahe bobibenyõtyhy ixityre. Kia reerywãhãre. Jiarÿ tule umyreny arobiõtyhy.

26 Tahe adeeremy aõmybo ararybekre. Ryranymy heka watxiwãhãre ibutu hãlubu-ribi. Kaiboho aòraru-di burubenykeki, jiarÿ aõkõ tuure. Inyõ wamy rarybeõtyhy aõma Rybewihikÿ-di jiarÿ itÿnynyõmahãremy.

27 Tiiemy rarybehyy rarewãhã ibutumy Deuxu bede ywinamy.

28 Tai tahe ixidi awimy boibekre. Iwese budoeni itxeredu tamy rÿsÿna riwahinyre wese, kaiboho ityhydÿÿdu mahãdu-ò Deuxu rybe tamyreny biwahinybenykre. Deuxu dohodÿÿna mahãdu tii rare. Jesuisi tahãlubu-di tii riwyre. Tai tahe ityhydÿÿdu mahãdu wiòhedÿÿdumy kaiboho toite.

29 Karibi arohonykre, aitxeredu mahãdu kanakre. K reeryre. Adeeremy òbitimy aõkõ rierynanykre. Tiiboho aholo wesemy ratximyhÿrenyrene. Iwese budoeni-ò imynymy ròsemy ramyhÿre wese heka kedehemynykre.

30 Inyõ heka aityhydÿÿdu seriòre yribi iwitxira aõna aõnamy kidierynanymyhÿkre. Taijoi kididymyhÿkre tarybe-ò ijohonamy.

³¹ Tahe biijemy boibekre. Inataõ beòramy awana rarewãhã. Kiamy rarybereri, iribi nohõtilosarenyõmy. Txu-wana, ruwana adireny ròrenywãhãre. Rahinymy heka aòrarureny-ki watxiwãhãre.

³² Tahe ararirenykre Deuxu-wana ix-di he awimy renykre. Tii heka adireny rarekre. Tii tahe nohõtilosarenyõmy, boibekre Deuxu rybe-di. Tii heka riwiòhenanykre atyhyna raumynykremy. Deuxu riywinyre wahe adee reny aõna aõna wiwihikÿ riwahinykre òbiti mahãdu-wana kia bitabenykre.

³³ Tiu heka jiarÿ ijò hãbu-ribi nieru tarasamy rahõtinyõhyymahãre tyy wiwihikÿ tarasamy raruõhyymahãre.

³⁴ Tiiemy wadebò-ribi hyy hyy raaõmysÿdÿÿmy rarewãhã waaõmydÿÿnana òwydÿÿmy. Tule rewiòhenanywãhãre tii-wana watxiwãhãre mahãdu. Kaiboho teerytenyete kia.

³⁵ Ibutumy rewiòhenanywãhãre iaõkõ mahãdu kia heka tuu tabitenyete kia rewinyamahãremy. Teerytenyete timybo Jesuisi rarybere: –Biwahinybenyke, kia dori iny-ribi ritamyhÿre ratyre awi rare.

³⁶ Tahe rybe-ribi rexihureu, tatiowotimy rotamanyrenyrene wiwana rex-itòenyrenykre.

³⁷ Tahe rahinyrenyrene, rimyrenyrene tamy wòrenyrene, aõna rakreki, kia-ki rexityhenyrenyrene tamyrenyrene.

³⁸ Tiiemy rabadeworenyrene tiu tuu robirenyõkremy. Tahe hãworo-ò tii-boho-wana roirenyrene.

21

¹ Iribi ròhònyrene tahe, òbitihyy rare Kòsi hãwã-ò. Ijõ txu tahe Rodesi hãwã-ò ritehemynyrene. Iribi tahe Patara hãwã-ò ritehemynyrenyrene.

² Tai tahe rahare hãwò-ki, Senisia hãwã-ò rakremy rexiwinyrenyrene. Roirenyrene kia zhywydynalawò-di tahe rorukurenymy ròirenyrene tamy.

³ Xibri bedebute weribi-ò reurore, inyhywenawe-ribi Siria bede weribi-ò. Tahe ritehemynyrene Tiro hãwã-ki. Tai tahe hãwò-ribi aõna aõna-di rekoarenyrene.

⁴ Tamy roirenyrene tahe, rÿÿraxirenyrene kahãwã ityhydÿÿdu mahãdumy. Tai raharenyrene. Sohoji semanamy bede tiiboho-wana wadireny rÿire. Kiaerydÿÿna mahãdu heka Paulo dee raryberenyrene: –Aõma noõmykre Jerusalẽ-ò. Deuxu Tyytybytyhy tuu tamyreny rarybemyhÿre.

⁵ Tahe semana ituereu, diòòsedenyde ixby hãworo-ò. Ibutumy diberenydenyde ityhydÿÿdu mahãdu tiiboho-wana ÿnyra-ò, hãwyy, uladu, ibutumy. Tahe rexitòenyrenyrene.

⁶ Ritobinyrenyrene tahe, riòòserenyrene heto-ò ixby.

⁷ Idi tahe Tiro hãwã-ribi rare. Tahe Tolimaida hãwã-ki ityhydÿÿdu mahãdu rerybewãhãrenyrene txu sohojilemy bede reijerenyrene tai.

⁸ Ijõ txu biòwamy tahe roirenyrene Cesaria hãwã-ò. Tahe Filipisÿ-ki rasÿnyreny Rybewihikÿ-di tÿnydÿÿdusÿ-ki wahe. Tii juhuru aõma ityhydÿÿdu mahãdu wiòhedÿÿduò juhutyhy rare.

⁹ Tii heka inaubiòwa iriòre rare. Tahe heridu aõkõ ijadòma mahãdu rare. Ijadòma mahãdu heka Rybewihikÿmy rybeduòle rare.

¹⁰ Tahe aõutxu taile watxiwãhãrenyrene. Tahe hãbuõ dehemynyde Judeia bede-ribi, moma inire Abusi. Tii tule Deuxu rybe-di rarybemyhÿre.

¹¹ Idi tahe nade inyorarenymy. Tahe rimyre tii Paulo wereysana. Tawahe idile rimyre rexitaare tebò-wana. Idi tahe rarybere: –Deuxu Tyytybytyhy wa kiamy rarybere: –Kia wereysana wedu heka iwese rataataamy rãire

wesele heka tule rataataamy rÿikre Jerusalë-ki judeu mahãdu heka kia ri-winykre ta riwahinykre judeukõdu mahãdu-ò.

¹² Tamy raholarenyre tahe, raryberenyre Paulo dee raõkremy Jerusalë-ò. Jiarÿboho raryberenyre tamy tule ijõ tule tamy raryberenyre.

¹³ Tahe Paulo rarybere: –Hirenyõmyke, tiwabedewodÿÿnytenyteri. Rexiy-winy my watzireri Jerusalë ròtena-ò aralòkemy. Tamy sohojile aõkõ kÿny, tule Deuxu dee wikeki tahe arurukre Inynyrÿni òraru-ki.

¹⁴ Tamy heka Paulo nohõti rareadÿÿrenyõke tiemy tanonanamy rara. Tahe rarybemy rahudi kiamy tarybe-ò resere Deuxudeewilemy rotÿÿnyny ratxike.

¹⁵⁻¹⁶ Iribi tahe iny aõna aõna rexiywinyny Jerusalë-ò roirenykemy. Ijõ ityhydÿÿduõ Cesaria-ribi iny-wana roirenyre. Tahe retehemynyrenyre, Menasõ heto-ki rasÿnyrenykemy ityhydÿÿdu riwadyrenyre. Menasõ heka juhutyhy ityhydÿÿdumy ralòmny raremyhÿ. Juhuu tii Xibri bedebute-ki rasÿnyny raremyhÿ.

¹⁷⁻¹⁸ Jerusalë ityhydÿÿdu mahãdu ibutumy awimy riwamyrenyre. Jiarÿ, Luka wahe, Paulo-wana, ijõ ityhydÿÿdu-wana. Ijõ txu biòwamy tahe Paulo riwadyrenyre Txiaumy robikremy. Tule ijõ Jerusalë dohodÿÿna matuari mahãduõ tai ronyre.

¹⁹ Wirirybenyny rahudi tahe, Paulo tamy relyyre aõhebo Deuxu tamy rotÿÿnyremy. Tamybo judeukõdu mahãdu Deuxu rityhynyremy.

²⁰ Kiamy roholareu, Deuxumy reàlàrenyre ibrò-kí. Tai tahe inyõ rarybere: –Paulo, sòwemy judeu mahãdu rityhynyre. Kai teeryte, inyseriòre, ibutumy judeu mahãdu bede ywina riywinyny ratximyhÿhy.

²¹ Inyõ umy rarybere, raroimyhÿre kaki Jerusalë-ki. Judeu ityhydÿÿdu mahãdu-ò rarybere: –Paulo he Moisesi bede ywina-ribi nohõtirosakemy tii riteònyre. Paulo rierynanyreri judeu ityhydÿÿdu mahãdu-ò kia judeukõduy-ki rasÿnyre mahãdu-ò. Kia inyõ riki rarybere, Paulo uladunotyky resyna riteòdÿÿòreki riki.

²² Tii kÿnyhe roholarenykre kaò tehemynterimy.

²³ Tai kiamy rikiwinyrenykre. Inaubiòwa hãbu katxi rare tarade ri-wysynykremy. Deuxu-ò tarybetyhy riwahinyrenyre, tai tahe tarade ri-wysynykremy.

²⁴ Kai tule makre iwesele arade riwysynykre Deuxu dohodÿÿna heto-ò. Tahe iradereny synaòwumy biòwynykre. Tai tahe ibutumy aluukre judeu mahãdu bede ywina tetyhynmahãteki wahe.

²⁵ Aõ inyboho ka judeukõdu mahãdu. Ka bede ywinaõ rityhynykemy aõkõ tuu iny ratxirenyre. Kaa adeereny tuu rarybewãhãrele rityhynyrenykemy: –Ka aõma rÿsÿna ritxoo rÿsÿnamy iwahidÿÿnalemy irÿsÿõmy, tule iròdude ihãlubu iijeradÿÿòreri, uritere irÿsÿõmy, tule òta òta òraru widÿÿõmy.

²⁶ Tai tahe Paulo rarybere: –Hÿde, tii ariwinykre. Tahe Paulo rare Deuxu dohodÿÿna heto-ò kia hãbuõ-wana. Tahe ibutumy iny rieryre xiwenaõ riwinykre wahe, tamy dori raryberenyre.

²⁷ Tahe debòinatxi reurò txu-di riwinykremy. Idi ka debòinatxi reurò txu rexihudi tahe iòhòmny. Tahe Asia bede ludu judeu mahãduõ tuu robira. Tiibohe iny-ò rarybere Paulo rimykremy.

²⁸ Sòwemy iny tamy wi rotyre Paulo òludumy. Tiibohe kiamy rirajuarenyre: –Haeli mahãdu, wylemy bodoike. Biwawiòhenanybenyke. Ka hãbu ratxireri iny bede ywinareny òludumy ritÿnynyny rÿimyhÿre. Iny dee narybemyhÿde judeu mahãdu bede ywina rityhynyõkemy, tule iny Deuxu dohodÿÿna hetomy, judeukõdu kawo-ò didyde tai tuu ribinadÿÿnyreri.

²⁹ Juhuu tahe ijõmy robire hãbuõmy hãwãhãkÿ-ki Paulo-wana ratxirerimy. Trofimo inire. Tii heka Efesu hãwã mahãduõ ityhydÿÿduõ rare, judeukõdu mahãdu aõkõ tii ihÿre. Tahe judeu mahãdu rõhõtinyre Paulo dohodÿÿnahetowo-ò Trofimo ridyramy. Tahe Paulo ridyõlere.

³⁰ Tahe sõwemy iny rakyarananyre tamy, aõma kia hãwã hãkÿludu mahãdu. Sõwemy iny rarybemy rÿimyhÿ, rajeijeimy rÿimyhÿ. Paulo tahe retÿhirenyre dohodÿÿna hetowo-ribi, ijõtòbòna riratòbònyre.

³¹ Tahe rirubunykeny ritelenyre heka. Tahe soldado dinodu tyhy roholare aõma ibutumy Jerusalẽ hãwã-ki jei jei-di rÿireri.

³² Tai tahe soldado tawedu diteõnyde kia tai jei jei mahãdu rÿireriò. Tahe soldado robirenyrau, riixãwidinyrenyre, Paulo òhòtedÿÿ-ribi.

³³ Kia soldado wedu tyhy Paulo mynymy riteõnyre. Tahe ritaataarennyre womati reroti-di. Tahe rexitòenyre kia inydee mobo he ratxireri. Aõhebo he tii rotÿÿnyrerimy.

³⁴ Ijõ heka iwitxiramy rarybemyhÿre, ijõ tiilemy rarybere. Tai tahe soldado dinodu bede rieryõhyra timyrebomy, ibutumy iny rirajuareki. Tahe ridykemy riteõnyre. Tahe soldado heto-ò Paulo-di roiremyre.

³⁵ Ryòwòna-di rotuòrau tahe, hãwã mahãdu aõkõre he reburera. Soldado mahãdu Paulo taaxiò tyre ritidimy idi rara iny rimyheny.

³⁶ Iny he rirajuamy rarybemyhÿre: –Bidybenyke, birubunybenyke wahe. Myhe soldado mahãdu hewomy rirahumyhÿre.

³⁷ Tahe rirònykremy roirau tahe, Paulo soldado dinodu-ò rarybera: –Adee inihe wanyrÿ, ararybekemy watxireri. Tahe soldado dinodu ritÿÿraxinyre: –Kai aõbo kreku mahãdu rybe teeryte.

³⁸ Kai jiarÿ araeryre. Kai Egito mahãdu dinoduõ tate, ibutudÿÿdu wedu tate. Kai 4000 iny aõbina widÿÿdu tedyte bederahy-ò.

³⁹ Aõkõre, Paulo dirawyònyde, tii aõkõ watxire. Jiarÿ Roma hãwã mahãdu tyhyre jiarÿ rare. Wahãwã, Tarso hãwã rare, hãwã riòre aõkõ Silisia bede-ki. Judeu mahãdu tule jiarÿ rare. Kaki iny mahãdu-ò ararybekemy watxiwãhãre.

⁴⁰ Tahe soldado Paulo –ò rarybere: –Tahe marybeke. Tahe lamamy rÿire inydee rarybekemy. Paulo tebò riteòsinyre riihonadÿÿnykemy. Tai ibutumy iny riyrymy rÿirenyre. Judeu mahãdu rybe-di tamyreny rarybere.

22

¹ Kawese Paulo tamyreny rarybere: –Waseriòre, waluuboho, wabed-edÿÿnanamy adee arelyykre. Wamy bohولاتyhyke.

² Judeu mahãdu rybe-ò roholareu tahe, riyrytyhymy rorukurenyre. Tii heka rarybere: –Jiarÿ judeu mahãdu jiarÿ rare. Raumynyre Tarso hãwã-ki. Kia Silisia bede-ki rare.

³ Kaki Jerusalẽ-ki ratyyritinymy rarewãhã, Kamalie ninadu tyritina-ki. Ibutu Judeu mahãdu bede ywina bede reeryre Kamalie-wana. Ibutumy Moisesi bede ywina-di riwaerynanymyhÿre. Tii tahe reywinywãhãre, retyhynytyhywÿhÿre. Ibutumy Deuxu bede ywina ariwinykemy ixi-di rahõtinywãhãre iwese wiji iwidÿÿmy tarutenyteri wesele wahe.

⁴ Jiarÿ ka ityhydÿÿdu mahãdu aõhòkÿmy rotÿÿnymyhÿremy reteòwãhãre ihyyle ijõ rubudÿÿmy reteònywãhãre. Hãbu hãwy-wana reròtenywãhãre ròtenawo-ò.

⁵ Waaõmydÿÿnanamy bierybenykre-wana, tamy marybeke dohodÿÿna wedu-ò, matuari mahãdu-ò. Dohodÿÿna wedu tyriti rewyre Damasus hãwã dohodÿÿna heto-ò. Tai tahe tyriti-di risÿnyre ibutumy ityhydÿÿdu mahãdu aõhòkÿmy rotÿÿnykemy, tule womati reroti-di rataatakemy Jerusalẽ-ò ki-didykemy.

6-7 Iòhòmy txutyemy iijira-ò, Damasu hãwãry-ki watxiwãhã. Tahe loosòna itÿnyhÿkÿmy wadee dehemynyde. Bedetxile resere. Tahe rybeõ raholare: — Salu, Salu, aõherekiwexe aõbina binahakÿle wadee tadiwinymahãte.

8 Tahe jiarÿ rarybere. Mowexe wadee rarybereri, Wanyrÿ. Tii rarybere: —Jiarÿ Nazare ludu watzireri, Jesuisi. Kai aõbina binale wadee tadiwinymahãte.

9 Hãbu wawana rÿimyhÿ, aõ rieryõhyre aõmybo wadee rarybemyhÿre tahe loosònamy he robirenyre.

10 Tai tahe rarybere jiarÿ: —Aõwexe ariwinykre, Wanyrÿ. Rarybere: —Myike wahe, make Damasu hãwã-ò. Tai tahe inyõ adee kanarybeke aõbo biwinykremy.

11 Tai tahe rabiõmy rãiwãhã kia loosòna ritÿrÿrÿhÿkÿreki. Tai wabiòwa ryy wadee ritÿnyre wadebò-ki riwamymy Damasu-ò arehemynykemy.

12 Tai tahe hãbuõ wadee rehemynyre, Ananiamy ninadu. Tii heka Deuxu tyhydÿÿduõ rare, bede ywina rityhynymyhÿre, ibutumy Judeia mahãdu, Damasu hãwã-ki heka tuure.

13 Tii tahe wadee rarybere: —Waseriõre, Salu, aruebimyke ixityre bobikemy. Aõwesele tahe rabimy reare. Ananiamy rabire.

14 Tahe ixityre wadee narybede: —Inytyby Deuxu juhoo aratare, aõbo tanywimy bierykemy. Tule Jesuisimy bobikemy, Deuxu õbiti hãbu. Tule bohoolakemy aõbo tii adee kanarybekeõ.

15 Tai tahe biwykre irybewihikÿ tÿmyra ibutu bede bede iny-ò. Belyyke timybo taholatemy, tabitemy.

16 Tai tahe rooreheõmykre. Wijile makre maratysebekre. Aõraru-ribi yrahakÿlemy mabekre, Wanyrÿnimy tetyhynyte xiery.

17-18 Idi tahe Jerusalẽ-ò rehemynyreu wahe, aõutxumy ixitòenymy rarewÿhÿ Deuxu dohodÿÿna heto-ki. Tai raholarerasina wese-ki aõma Deuxu wadee rarybererimy: —Wylemy bõhònykre Jerusalẽ-ribi. Warybemy tany marybekre, rityhynyrenyõtyhy.

19 Tahe Inynyry-ò rarybere: —Ibutumy hãwã-ki aityhydÿÿdu mahãdu rehãtenyrene, rewotomonyre, reròtedÿÿnyre. Ibutumy kaki kia rierymy roimyhÿre.

20 Arybe tÿnydÿÿdu rirubunyreu, moma Estevaõ, jiarÿ taile watxiwãhãre. Rewiõhenanywÿhÿ irubudÿÿdu mahãdu tyy reyrubunyre aõma mana-di rihurenyreu wahe.

21 Tahe Deuxu wadee rarybere: —Bõhònyke wa Jerusalẽ-ribi. Irehetyhymy arateõkre judeukõdu mahãdu-ò. Kia Paulo tanyreny rarybere.

22 Tahe kia iny roholamy rÿimyhÿre kia Paulo iximy relyyreò. Tahe raykaranany ryryre: —Bidyke karibi ahana-ò, birubunyke. Irumy rareõkre idi watxiwãhãrenyrene.

23 Tatyky riohowire, brybysi-di biu-txi rehure, ryrymyhÿrenyrene.

24 Soldado dinodu tahe riteõnyre iwo-ò ridyrenykemy awaru õhòtenahãkÿ-di tuu raõhòtekemy. Soldado dinodu rierykemy ratzireri aõherekibo iny tany rakyarananyraki wahe. Tii rarybekre õsana tuu raõhòtekeki. Kia soldado dinodu rõhòtinyre.

25 Tahe Paulo ritaataarenyrene. Imy rahudi tahe Paulo rarybere soldado dinodu-ò: —Jiarÿ Roma hãwã mahãduõ rare. Wamy maõhòtebenyõtyhy, aywisidÿÿna mahãdu wadee roholaõre tebutunyõteki. Kia riwadÿÿkõkemy roimy rare. Abede ywinareny adee rarybere kia widÿÿõmy.

26 Tai tahe kia soldado dinodu tadinodu-ò rare. Tahe tany rarybere: —Kowa hãbu, Roma hãwã mahãduõ rare. Tai tahe aõbina bina tany iwidÿÿõmy.

²⁷ Kia roholareu, tii rara Paulo-ò tamy rÿÿraxikemy: –Inatyhybe Roma hãwã mahãduõ aõbo atxiteri. Paulo tahe narybede: –Kohe, jiarÿ, kia mahãduõ watzireri.

²⁸ Tai tahe soldado dinodu narybede: –Jiarÿ tule watzireri. Nieru sõwe-di reòwynyrene tuu aronykremy. Tahe Paulo rirawyònyre: –Jiarÿ tiu kia watzireri. Waha dori Roma mahãduõ raremyhÿ.

²⁹ Tai he soldado mahãdu iribi ròhònyre aõwesele tii Roma mahãdu ratxire riki. Soldado dinodu tule ruberure tii dori rataataamy riteònyreki.

³⁰ Txu biòwamy ritare ròtena-ribi ròhònykemy. Judeu xiwewahidÿÿna dinodu inyõ ributunyrene ywisidÿÿdu mahãdu-wana. Tahe Paulo ridyre tamy. Tii dori rierykremy ratxireri aõherekibo judeu mahãdu Paulo deramy rÿireri.

23

¹ Paulo tamyreny retehere, dinodu mahãdu-ò wahe. Tahe rarybere: –Waseriòreboho, Deuxudile watzimy ramahãre. Tiiemy aõbina binamy aõkõ watzireri, tamy iluuna-di tyhy watxiwãhãre.

² Anania hãbu-ò rarybere, iòhòmy Paulo-ribi rÿireriò: –Iry-ò bihetenybenyke.

³ Paulo tahe tamy narybede: –Kai wa aõ aõkõ tate. Hetotira ura wese tate, awo arayky isuisure. Waywisidÿÿdu wesemy talòmy atxiteri, tahe wahetedÿÿmy tarybeta. Kia bede ywina rarybera wesemy aõkõ tewisÿnyteri.

⁴ Tahe iòhòmy Paulo-ribi rÿireri, tamy rarybere: –Kia wesemy rybeõmy Deuxu xiwe wahidÿÿdu wedu-ò.

⁵ Tahe Paulo rarybere: –Aõkõre, reeryõhyyre aõxiwe wedubo ratxireri. Tyyriti kiamy rarybemyhÿre: Tiu riki wedumy aõmy rybebinamy aõkõke.

⁶ Idi tahe Paulo rexierymy resere. Tahe ixidee ròhòtinyre. Ka iny sõweyre fariseu mahãdu heka rare. Iyrejura tasÿ saduseu mahãdu rare. Tai tahe Paulo ryryre: –Waseriòre mahãdu, jiarÿ fariseu mahãduõ rare. Waha, wylabieboho ibutumy fariseu roire. Rubu-ribi ixixana retyhynywãhãre. Tai tyhy tahe kia-ò, ywisidÿÿdu-ò wiji diwadyde.

⁷ Imy rahudi tahe fariseu mahãdu saduseu mahãdu-wana wiribi ri-hitxinyre.

⁸ Saduseu dori rubu-ribi ixixana rityhynyõhyymyhÿrenyrene, tule ÿju, tyytyby-wana rityhynyõre. Fariseu mahãdu tahe, kia ibutumy rityhynymyhÿre.

⁹ Tai tahe sõwemy rajei jeimy rÿimyhÿ. Tahe fariseuõ rarybere Paulo òbitimy ratximyhÿ. Aõ teòsamy tai tuu arobirenyke kÿnyhe aõkõre. ÿjuõ òsana tamy rarybera ada tyytyby aõbo.

¹⁰ Tai ta tarurutyhymy ryryrenyrene. Tai tahe soldado dinodu ruberure aõma Paulo riykaykaketxi roholare. Tai rarybere tamy: –Iribi bitake, idi boibenyke ixbyby soldado heto-ò.

¹¹ Rummy tahe Paulo weribi Inynyryÿ tamy narybede: –Brebuõmy aõ-di nohòtiõmyke ixi-di. Iwese kaki Jerusalẽ hãwã-ki wamy tarybete wesele heka Roma hãwã-ki wamy marybekre.

¹²⁻¹³ Tahe biurasòtxu he judeu mahãduõ wi dotyde Paulo rubudÿÿmy. Iny inatxiwa ituemy hãbu kia wese raryberenyrene: Rikiroxirenyõtyhy bemy rikiõrenyõtyhy. Paulo rurukeki xiery ta rikiroxirenykre.

¹⁴ Tahe xiwe wedu mahãdu-ò tiiboho roirenyrene. Judeu matuari mahãdu-ò tule kia ibutumy relyyrenyrene iwese Paulo rubudÿÿmy ratxireri wese.

¹⁵ Tule tamyreny rarybere: –Kaiboho ixityre marybebenyke soldado dinodu-ò manakremy Paulo-di ywisidÿÿdu-ò. Tamy dÿÿraximy idi ratxireri

tiiboho rhtinykre. Tai tahe ry kana- rearaki tahe ijoi rikirubunykre. Kia judeu mahdu xiwe wedu- rarybere.

¹⁶ Tahe Paulo serire woludu, ilana rubudÿÿmy rarybere roholare. Tahe ralore soldado heto- tahe tuu Pauloko relyykemy. Tahe relyyre.

¹⁷ Kia roholamy rahudi ta Paulo rariwyre soldado dinodu tamy kanalokremy. Kiamy rarybere: –Ka weryry bidykre adinodutyhy-, ama, ijyy-di ratxirerimy tamy relyykemy.

¹⁸ Tahe ridyre soldado dinodu tyhy- tahe rarybere: –Paulo kÿny ka weryry-di riwatenyreri amybo ako relyykemy.

¹⁹ Tahe dinodu weryry axi iyre ribi rimyre, tahe iny-ribi rirehenyre rarybekemy: –Abo wexe wako belyykre, weryry. Tahe relyyre:

²⁰ –Wylana Paulo ridykremy judeu mahdu adee rexitenykremy ratxirenyre. Tiiboho adee raryberenykre: –Rikitÿÿraxinykre ij amydÿÿnana.

²¹ Uritere tamy boholakre, weryry rarybere, idyomykre tamy. Hw mahdu swere rexiwmy rÿikre, iny inatxi wa itue hbumy, wylana rubudÿÿmy. Tii rurukeki, riroxityhy, bemy rityhy. Kiawese ka hbu mahdu rarybemy ramyhÿre. Ahana sana iny rÿireri wylana ridykremy adee kedexitenykremy. Wylana ludu tahe ryijti-ki rexiwmy rÿireri.

²² Tai soldado dinodutyhy weryry- rarybere: –Uritere iny ierysyomykre wadee tuu telyyteri.

²³ Tahe inatxi soldado dinodu rarariwyre, tahe tamy rarybere soldado dinodu tyhy: –Ama, 200 soldado widotykre inata ra txu dhny-ribi, ij 70 soldado awarutyre-ki, ij 200 soldado tnori-di.

²⁴ Kia ibutu-wana Paulo bidybenykre awarutyre-ki Cesaria hw-. Biyrubunymy boibenyke Feli, kia bededinodu-.

²⁵ Tahe tyyriti riwinyre kia wese:

²⁶ –Jiarÿ Laujiu Lucio, warybe reritinyreri. Warybe wehityhyna re-wahinyreri Feli-, Wanyrÿtyhy, bede dinodu- rewahinyre.

²⁷ Hbu adee retenyreri. Tii judeu mahdu rimyre tahe rirubudÿÿmy riwisÿnyre. Tahe soldado retenyre ritakremy rubu-ribi, tii Roma hw mahdumy rareki.

²⁸ Redyra heka ywisidÿÿna mahdu-. Aherekibo rimyrenyremy ari-erykemy.

²⁹ Tabede ywina rarukile teramy tamy reare, kia reerymy rawhre. Iny bede ywina raru-ki a ak tii riwinyre. Tai rurukemy ak idi rewisÿnyre.

³⁰ Judeu mahdu rarybemy ramyhÿre irubudÿÿmy. Kiamy raholareu tahe, adee retenykemy resere. Tule irubudÿÿmy rhtinyra mahdu adee rarybekemy retenyre. Tiiboho abo raremy rarybekre. My kie warybe rewahinyre.

³¹ Idi tahe soldado mahdu Paulo ridyre, iwese idinodu ritenyre wese. Rudile ridyre Atxipatxi hw-.

³² Tahe biurastxumy tahe tatilemy rare mahdu rsere soldado heto-. Ij soldado awarutyre ludu Paulo iridyre Sesaria-.

³³ Tahe rehemynyre Cesaria hw-ki. Rare he bede dinodu-. Paulo tamy riwahinyre tyyriti-wana.

³⁴ Kia tyyriti-di tii rariareu tahe, tamy ritÿÿraxinyre: –Tiribibo tate Paulo. Tahe Paulo dirawynyde: –Jiarÿ, Silisia hw mahdu rare.

³⁵ Tahe bede dinodu narybede: –Kaa hbu mahdu wii kodotykreu, kedehemyntykreu, aroholakre inihe arybe-. Tahe iyrubudÿÿ idi risÿnyre Herodi ywisidÿÿna heto-, Pretriu ninadu-.

24

¹ Iruyre txu reare rexihudi tahe, Anania, xiwena wedu tyhy, judeu mahãdu matuari-wana rehemynyre, ywisidÿÿna mahãduõ-wana rehemynyre, moma, Tertuliu inire. Paulomy aõbinabinahãkÿ rybemy rareri bedede dinodu-ò.

² Tahe Paulo didyde. Tertuliu rarybere Paulomy. Awiõmy rybe tahe ròhõnyre. Juhuu Feli-ò rarybere: –Kai Wanyrÿ tyhy, awihyymy heka atximahãte wadeereny. Tiiemy bedede ywina inydee tewahinymahãte. Ibutumy iny bedede hãwã hãwã-ki iny tewiõhenanymahãte.

³ Tai tahe omy reàlãtyhymy he watxiwãhãre. Urihimyòle adee Paulo aõmydÿÿnanamy ararybekre.

⁴ Txioi inihe làhà, boholabeny.

⁵ Tiiemy jei jeihyy ratximyhÿre Paulo òraru-ki. Tiiemy judeu mahãdu, my heka rarybehyy ratximyhÿre. Tii Nazare hãwã dohodÿÿna mahãduõ rare, kia weduõ rare. Tii Jesuisi rityhynyre.

⁶⁻⁷ Aõkõre, iny Deuxu dohodÿÿna heto ribinadÿÿnyre, brebuna rÿirerimy ihÿre Paulo òraru-ki. Remyrenyre tahe, ywisidÿÿmy watxiwãhãre iny bedede ywinareny rarybere wesemy. Tahe aõkõre, Lisiu soldado dinodu tyhy ritare iny-ribi wotõmona-di.

⁸ Tahe inydee rarybere: –Boibenykre Feli-ò. Tii adee roholakre. Kia tahe Lisiu rarybere. Tahe jiarÿ tule rarybere. Boibenyke Paulo dÿÿraximy kia inatyhy aõbo ada aõkõre aõbo. Tertuliu kia ibutumy rarybere.

⁹ Ijõ judeu mahãduõ rarybere: –Kia inatyhy ibutumy inatyhyle ratxireri, aõmybo Tertuliu raryberemy.

¹⁰⁻¹¹ Tahe bedede dinodu Paulo-ò riteòsinyre rÿikemy, rarybekemy. Paulo tahe tamy rarybere: –Wanyrÿ bedede dinodu tyhy, sõwe beõra aõmydÿÿnana-di ywisidÿÿna-di atximahãte. Jiarÿ kia reeryre. Tai reysawãhãre adee ararybekremy. Waò inatxi reuròtxumy heka Jerusalẽ-ò adehemynyde. Iny-ò bitÿÿraxinykeki, wylemy ka bieryke inatyhy raremy. Jiarÿ Deuxu dohodÿÿna heto-ò rehemynyre Deuxu reàlakemy.

¹² Tiu heka jei jei rewinyõhywãhãre dohodÿÿnaõ-ki aõkõ, hãwã-ki aõkõ.

¹³ Aõmybo wamy rarybemy rÿireri heka, aõ inatyhy aõkõ.

¹⁴ Sohoji aõmydÿÿnanamy tahe akoreny arelyykre, inatyhy rare. Retyhynywãhãre heka aõbo Jesuisi rierynanymyhÿremy. Tiiboho watyhydÿÿna rininirenyre dohodÿÿna mahãdu iwitxira. Kia hãbu rityhynymyhÿre wesele jiarÿ tule Deuxu inytyby retyhynymyhÿre. Ibutumy bedede ywina tyyriti-ki riritinymy rÿimyhÿremy retyhynywãhãre.

¹⁵ Iny, òrarudu mahãdu, ityhydÿÿdu mahãdu kedeixixakremy rubu-ribi. Kia retyhynywãhãre.

¹⁶ Tiu ibutumy òbiti widÿÿmy raruwãhãre. Deuxu-txi tule ibutu hãbu rue-ki.

¹⁷ Jerusalẽ-ribi rarewãhãu, tiwese beõra rewyre tahe ixyby dòsede Jerusalẽ-ò aõkõ mahãdu wahidÿÿna wesemy ariwahinykremy xiwena wese Deuxu-ò.

¹⁸ Deuxu dohodÿÿna heto-ki watxiwãhã, òbitimy rãire, ibutu bedede ywina reywinymy rawãhãre. Tahe waxiwenadi waòludu wamy robire. Iny sõwemy weroramy watxiwãhã. Rybe jei jei rarybeõhyre. Tahe Asia bedede judeu mahãdu tai rÿimyhÿ. Tiibohole rybe jei jei riwinymyhÿrenyre.

¹⁹ Wamy aõmydÿÿnana rarybekremy ijõdikeki, rokoholakre. Kaki aõkõ ratximyhÿrenyre.

²⁰ Aõbo waki teòsamy rahare ywisidÿÿna mahãdu-ko rãireu, tamy rokoholakre.

21 Sohoji aõmydÏÏnanalemy rarybere teòsamy. Kiamy rarybere: — Retyhynyre rubu ixyby kedexixakre. Tai ywisidÏÏna mahãduko-ki watxiwãhã.

22 Feli bede dinodu rierymy ratxireri aõmybo ityhydÏÏdu mahãdu rityhynyre. Tai rarybere judeu mahãdu-ò: —Lisiu, aõma, soldado dinodu tyhy rehemynyreu, bede rikerydÏÏnanykre.

23 Tahe Paulo ròtena heto wese-ò ratximyhÏreki, riòòsedÏÏnyre. Ta rarybere he soldado dinodu-ò: —Ywimy idi ratximyhÏkemy. Tule rarybere: —Iò ixinamy terina mahãdu iroramy kanakre. Ixinamy uriõnomy tamy kidiwahinykre awityhy roimyhÏkemy.

24 Iribi nade Feli tahãwyy-wana Drusila. Ihãwyy heka judeu mahãduõ rare. Riteònyre Paulo-ò tamy kanakremy, tamy kanarybekremy. Paulo rarybere tamy: —Jesuisi Kristu kia tyhydÏÏnamy. Tii òbiti-di iny rõhõtinky tule ywisidÏÏna txumy Deuxu kanakremy ritÏnyre.

25 Tahe Feli ruberure. Makre, tamy rarybere, aõwaxiny tiubo wabededÏÏnana-di my kÏnyikreu, ixyby adee ararãriòwykre.

26 Tule Feli ijõ nieru Paulo-ribi ritakemy ratxireri, tai rarariòwyre ijõttxu ijõttxu tii-wana rarybekremy.

27 Inatxi beòramy bede idi rÏire. Iwitxira bede dinodu ralore Feli deròwy. Porsiu Festu inire. Feli tahe judeu mahãdu tuure tamyreny aõõ riwinykemy ratxireri tahe Paulo ririre ròtenawo-ki.

25

1 Cesaria hãwã-ki bede dinodu tÏmyraõ ronyre. Festu inire. Inataõ txu-di tahe iribi rõhònyre Jerusalẽ-ò rakemy.

2 Tahe xiwe dinoduõ, judeu mahãdu dinoduõ tamy rarybere Paulo aõmydÏÏnanamy.

3 Tamy rexitòenyre Paulo-di wylemy kanakremy. Kiamy heka rexi-nohõtidiÏÏnyre ryrowetya-ki rirubunyrenykre.

4 Aõkõre, Paulo ratxirekre Sesaria-ki, Festu rarybere, jiarÏ tahe aròòsekre ele elemy kowa-ò. Kaiboho adinodu mahãdu wadi roikre kowa-ò. Rokoholarenykre ywisidÏÏna-ò.

5 Tule kaiboho aõrybedikeki, Paulomy, kowa-ò rarybekremy.

6 Iribi tahe debòwiò txu òsÏny txu idi rÏidi tahe ixyby Festu dòòsede Cesaria-ò. Irootxu tahe Paulo ywisidÏÏna rõhònyre. Tahe Paulo ridykemy riteònyre ywisidÏÏna butuna-ò.

7 Tahe judeu ywisidÏÏna mahãdu heka sòwemy tuu aõbina binahakÏmy Paulomy rarybemyhÏre, Jerusalẽ-ribi rehemynyreu. Aõ inatyhymy aõkõ.

8 Paulo tahe rexitxiònyre: —JiarÏ kÏny kia-di aõkõ watxiwãhãre. Tii rarybere: —Tiu heka judeu mahãdu bede ywina ratyre aõna aõnamy ratÏÏkõre. Tiu heka Deuxu dohodÏÏna hetomy rewinyòwãhãre, tiu Roma dinodu bede ywina ratyre aõhe ratÏÏnyòwãhãre.

9 Idi tahe Festu rÏÏraxire Paulo-ò: —Kawexe texiywinymy atxiteri Jerusalẽ-ò makremy. Kowa ywisidÏÏna ariwinykemy adee roholakremy. Kiamy Festu rarybere aõwiwihikÏmy riwinykemy ratxireri judeu mahãdu dee.

10 Tahe Paulo rirawyònyre: —Aõkõre, arakre he Iòlò tyhyòhòkÏle arehemynykre. Tii wadee roholakre. —JiarÏ dori ixiywinyhy tamy arakre. Kai teeryte jiarÏ aõkõ tudÏÏduramy.

11 Aõma aõbo waki binamy relera-wana heka arurukre. Aõkõkeki tahe aõbo awihykyle rewinyre-wana heka timy inihe warubudÏÏõmy. Iòlò tyhyle wadee roholakemy he ixide rahõtinyreri.

¹² Festu tawiòhedÿÿdu-ò rarybere. Idi ta dirawyònyde: –Awire, iòlò tyhy-ò atxiteri urenana kÿnyhe aõwaxiny makre.

¹³ Iribi tahe aõutxumy tahe iòlò Agripa dehemynyde, Benise tariòrese-wana. Festu roramy rareri.

¹⁴ Tahe tii-wana rarybemyhÿre aõutxu, Festu-wana. Idi tahe Paulo aõmydÿÿnanamy iòlò-ò rarybere: –Ròtenawoluduõ roireri ròtenawo-ki. Tai he Feli ririre jiarÿ iaõmydÿÿnana arierykremy.

¹⁵ Aõma Jerusalē-ki watxiwāhāu, dohodÿÿna wedu mahāduõ wadee heka rarybere: –Tii arirubunykemy heka wadee rityhenymy hÿre. Judeu mahādu matuariõ tule kia rarybere.

¹⁶ Tahe tamy jiarÿ rarybere: –Aõkõre, aõma Roma mahādu kia bede ywina dori tuu aõkõ roimyhÿre. Juhu heka rakre ywisidÿÿna-ò tahe relyykre heka iximy, taðludu mahāduko-ki.

¹⁷ Kaò juhu ditehemynydenydeu, tamy rarybere. Ijõ txu he reyrubunyre ywisidÿÿna-ò roholakremy tahe Paulo ridykemy aditeònyde.

¹⁸ Tahe aõmybo tamy rarybere heka, iwese rahõtinyre wese aõkõ tii riwinyre.

¹⁹ Aõbo ityhynareki heka tuheka rÿire. Inyõ heka tii rarybemyhÿre Jesuisi rurulemy. Tahe Paulo rarybemyhÿre irulemy ihÿre. Tai kÿnyhe rimymy ramyhÿre. Riròtenymyhÿre.

²⁰ Tai tahe tiemy rahõtinyre: Timy taheka aõhe arotÿÿnykre ka aõmydÿÿnana-di. Paulo-ò retÿÿraxire aõma Jerusalē-ò aõbo rakemy ywisidÿÿna-ò.

²¹ Tahe Paulo rarybere: –Iòlòle rakremy aõbo. Tii wamy roholakeki, teòdu waòrysmy ariraokre. Tai tahe ròtena-ò ixybyle rerutyre.

²² Tahe iòlò Agripa rarybere: –Jiarÿ aroholakre inihe kia hābumy. Tahe Festu dirawyònyde: –Biurasòmy tamy bodoholakre.

²³ Idi tahe itxu biòwamy dehemynyde, iòlò, Benise-wana, ywisidÿÿna heto-ò. Ibutumy he iny ralore, soldado wedu mahādu, iny ityhymy rÿira mahādu, ibutumy raloralore. Tai tahe Festu Paulo didyde. Tahe rarybere:

²⁴ –Iòlò Agripa, ibutumy ka wadee ijohonadu-wana, ka hābu heka ibutumy iny he irubudÿÿmy he idi rÿireri, judeu mahādu kaki tule Jerusalē mahādu.

²⁵ Jiarÿ rahõtinyreri aõ heka riwinyõhyre tai rurukre wahe. Tai iòlòtyhy-ò rakremy heka ratxireri. Ariteònykre nomy dori tii ratxireri.

²⁶ Aõbo tamy ariritinykre. Aõ heka waritidÿÿkõnare. Aõ dori riwinykõre. Tai redyreri adee iòlò Agripa. Tamy juhu boholakre. Iribi tahe wadee manarybekre aõbo ariritinykremy.

²⁷ Timy kÿny wateòdÿÿkõna uritere òhynaòhòkÿle Iòlòtyhy-ò ariteònyõtyhy.

26

¹ Tahe Agripa Paulo-ò rarybere: –Aõwaxiny belyykre aijjymy. Paulo he tebò riukore he rarybekremy.

² Wadeysamy he watxireri, Iòlò Agripa. Jiarÿ dori iximy arelyykre ako.

³ Tule kai dori ibutu judeu bede ywina teeryte. Ibutu lahi rybe teeryte. Bodoholakre inihe wadee, ywina-di.

⁴ Tiiemy uladule aratyryritinyde aõma judeu òbitina-di.

⁵ Judeu mahādu kia rieryre. Txu rexidelenyre juhu judeu mahāduy-ki, idi tahe Jerusalē-ki ratyryritinyre. Jiarÿ fariseu mahāduõ òbiti jiarÿ rare.

⁶ Kia rybe òraru-ki wiji ywisidÿÿna-ki rāire. Jiarÿ dori retyhynywāhāre aõbo Deuxu inytyby-ò rarybere.

⁷ Jiarÿ Deuxu rybe òlòna reraòwãhãre. Tule judeu ijoi riraòmyhÿre, waòinatxi reurò ijoi mahãdu. Tiibohe Deuxumy reàlàmy raremyhÿ, rummy, txumy. Iòlò Agripa, kia raròsòna òraru-ki judeu mahãdu wadee aõbina binamy rarybemyhÿre.

⁸ Rubu-ribi ixixana jiarÿ retyhynymyhÿre. Araÿraxikre iòlò. Kia aõbohe wadeòsana raremy kaibohe tahòtinytenytere. Deuxu heka ixyby iny kidiòkesedÿÿnykre taumy tuedeòna-ò.

⁹ Jiarÿ heka juhuhu awimy heka aõbina binahakÿ widÿÿ dee rahòtinyre, Jesuisi Nazare hãwã ludu dee.

¹⁰ Sõwemy ityhydÿÿdu mahãdu reròtenyrene ròtenawo-ò Jerusalẽ-ki. Dohodÿÿna heto wedu rewawiòhenanyre tyyriti riwahinyreki. Kia irubudÿÿmy wi risÿnyrenyreu, jiarÿ rarybere: —Awire heka birubunybenyke.

¹¹ Jiarÿ heka ityhydÿÿdu mahãdu aõhòkÿmy rotÿÿnykemy wi resÿnyre bede bede-ki. Aõbinabinahãkÿlemy ityhydÿÿdu rerybedÿÿnywãhãre. Jiarÿ aõnimy reburemy rawãhãre. Resÿbinanyre tahe tii rahenyre irehetyhytyhy-ò iwitxira hãwã-ò.

¹² Rare heka Damasu hãwã-ò ityhydÿÿdu òrysymy. Jiarÿ tyyritidi rare, dohodÿÿna wedu ritina-di. Tule ibede ywina-di rare.

¹³ Tahe Damasu iòhòmy rareu, loosònaò diwatoosònyde, txu loosòna ratyre ihÿre.

¹⁴ Jiarÿbohe rejuxunyrenyrene tahe raholare rybeò-ò judeu mahãdu rybe-di rarybereri: —Salu, Salu, aõhereki wexe aõbina binahakÿ tadiwinymahãte wadee wimy aõkò. Aõbina binahakÿle ixidee tadiwinymyhÿte.

¹⁵ Jiarÿ rarybere: —Mowe, Wanyrÿ Tate. Tahe dirawyònyde: —Jiarÿ wa, Jesuisi rare. Wadi aõbina bina tewisÿnyte.

¹⁶ Katahe myikre. Adee rehemynyreri, aratara ixidee, wadeòdumy mabekremy. Warybeduò mabekre. Ibutumy wamy belyymy mabekre aõhebo adee wiji rotÿÿnyreri. Iribi tasÿ ixityre adee adehemynykre. Tule kia-di marybekre.

¹⁷ Ibutumy asÿ-wana arayrubunykre. Tai ta judeu mahãdu-ò arateònykremy watxireri, judeu mahãdu-ò tule.

¹⁸ Iwese iny ruetà-di rÿira wese tii ihÿre. Kai tamy bitÿnynykre Deuxu aõmydÿÿnana. Tai biruejuakre, rierykremy. Biòbitinykre tamyreny òrarudu roire aõma ixi-txi tòhòti reakremy loosòna-ki rariakremy, Satanasi bedeloro-hokÿ-ki aõkò, kia ryki aõkò rariakremy. Deuxu uri bede ywina rimymyhÿkre ixidee. Ibutu bede bedemy rÿira waijoimykre. Tyramy taòraru-ribi rÿira, ritamy rÿira, riwatyhynymy rÿira.

¹⁹⁻²⁰ Tai, Iòlò Agripa, iwese warasina-ki riwateònyrene wese, retyhynyhyre. Juhuhu Damasu hãwã-ki jiarÿ ròhãletere, iribi Jerusalẽ-ò, tule Judeia bede-ki, ibutu judeukòdu mahãdu-ò ròhãletere. Tamy rarybere taòraru ririkemy Deuxu dee kòdòòsekemy. Ixi-txi tòhòti reakremy inatyhymy aõna aõna wiwihikÿ riwinykemy Deuxu dee.

²¹ Tai judeu mahãdu riwamyre Deuxu dohodÿÿna heto-ki, warubudÿÿmy ròhòtinyre.

²² Deuxu tahe wawiòhedÿÿdu ratximyhÿre. Tai he rãire wiji ibutu-ò ararybekemy watxiwãhãre, aõma aõbo Deuxu rybedu mahãdu iwese Moisesi rarybere wese tamyreny rarybewãhãre kia ibutumy kanakremy. Kia sohojilemy rarybewãhãre.

²³ Juhutyhy rarybere: —Kristu, rurukremy iribi tahe kedexiakremy rybe loosòna kidiwykremy judeu mahãdu-ò, tule judeukòdu mahãdu-ò.

²⁴ Tahe Paulo iximy rarybereu, Festu ryryre: —Paulo, kai wa itxÿtere.

Aõnityhymy tatyryritinymahâte. Tai arayky tebinanyta.

²⁵ Tahe Paulo rirawyònyre: —Aõkõre wa, wanyrÿ Festu, bededinodu tyhy. Jiarÿ itxÿte aõkõre. Inatyhyrybemy rarybewãhãre. Warybe awi heka rare.

²⁶ Tule Iòlò Agripa rieryre ibutumy tuu tamy rarybere. Aõ wasina aõkõ rarybere. Iòlò Agripa.

²⁷ Aõbo Deuxu rybedu mahãdu riritinyre aõbo, kai tetyhynymahâte. Reeryre jiarÿ, kai tetyhynymahâte.

²⁸ Tahe Agripa riixãwididÿÿnyre rybe-ribi: —Kai, aõbo, Paulo, aõwesele ityhydÿÿdumy aronykemy wadi tahõtinyte, wadee tarybeteki.

²⁹ Paulo rirawyònyre: —Kohe, wadee awire, kai tulekemy. Ibutumy kaki wawesekemy adi rahõtinyre. Kai tule warybe sõwemy aõbo ada aõkõre aõbo Deuxu bityhynybenykemy watxiwãhãre tule waijohonana-wana. Aõna sohojidile taanamy aõkõ watxireri, wawomati reroti-di taanamy atxiteri.

³⁰ Idi tahe bede dinodu, iòlò, Benise, ibutumy he rÿire ròirenyre.

³¹ Widee reny wiwesele rõhõtinyrenyrene. Ka hãbu timyhe rubudÿÿona he ròtena-ki irutysÿona he, tii dori aõhe rotÿÿnyõtyhy aõna aõnamy.

³² Tahe Agripa Festu-ò rarybere: —Rikiteònyrenyke idi watxireri, tahe tii inihe iòlòtyhyle rarybekemy ixidi ratxireri. Tai kÿnyhe, txioinihe, aõkõre.

27

¹ Tahe rexiywinymy rexihurennyre Italia bede-ò, Roma hãwã-ò aroirenykremy hãwò-di. Tahe ròtenayrubudÿÿduõ tii-wana rakre, irubudÿÿdu renymy. Julio inire. Tii iòlò yrubudÿÿdu mahãdu dinoduõ rare. Ridyrennyre Paulo ròtena woludu mahãdu-wana. Jiarÿ, Luka tule ihemy rare.

² Tahe rerònyre yhywydyna lawò-ò. Adrÿmitxiludu tahe kia lawò rare. Tule hãbuõ wawana rare. Aristarku inire. Tii Macedonia bede luduõ rare. Tesalonia ihãwã rare. Tahe hãwò rexihynnyrennyre adòikemy Asia bede-ò. Tahe ròirenyre. Ijõttxu biòwa Sidoma beàbeà-ò rehemynyre.

³ Paulo taery mahãdu roramy rakemy ratximyhÿre. Tahe Julio Paulo-di itxeredu ririra. Tai tahe Julio awi heka rare Paulo dee. Julio Paulo riywiwinymy idi ratxirerimy ihÿre. Julio Paulo riteònyre titxibo rakelemy. Paulo ery mahãdu aõna aõna tamy riwahinyre.

⁴⁻⁵ Tahe iribi ròhònyrennyre. Xibri bedebute roosibymy ralore yhy dori tiribi tiribi reamyhÿreki. Tahe iribi riòlònyre. Tahe Silisia bede-ribi riòlònyre, tule Panfilia bede-ribi ijõ bede-ò reronyre. Tahe Miha hãwã-ò ritehemynyre Lisia bede-ki.

⁶ Tai soldado dinodu hãwò nihikÿ riijemyhÿu, ihe-ki roikemy, tahe ijõ-ki rahare Alexÿdria luduõ-ò. Hãwò tahe rexiywinymyhÿre rakremy Italia bede-ò. Tahe wadeereny rarybere: —Borukubenyke yhywydyna lawòro-ò. Tahe ixityre roirenyre.

⁷ Sõwemy heka txuu wadireny rÿire. Urihimyòle rexihelijiwãhãrennyre. Isirare heka Kinidu hãwã-ò dehemynysÿ. Ihãrele tahe rethemynyre Samona hãwã mynatyhyle raròrennyre. Iribi Kreta bedebute roosibymy ralore yhydori tiribi tiribi reamyhÿreki.

⁸ Tahe ywimy suò iòlò iòlò adoiwãhãdenyde ihyy tahe rethemynyre Rywihikÿmy ninadu-ò. Kia heka Laseia hãwã-ribi iòhòre.

⁹ Sõwetyhymy txuu wadireny rÿire yhynihikÿ bina òraru-ki. Inarehe lisina txu-ribi ròhònyre. Tai tahe bededÿÿnana ibutumy roimyhÿre. Tai brebunamy bede roimyhÿre.

¹⁰ Paulo tahe tamyrenny rarybere: —Wanyrÿboho, ka tÿina isiratyhykre inydeereny. Inynonanareny iòhãrure aõna aõna ibutumy inyribireny ituekre, hãwò rabohokre ada ijõ aõbo rikururenykre.

11 Tahe soldado dinodu Paulo rybe rityhynyõhyyre. Yhylawò wedu tòruludu-wana tii rityhynyre.

12 Yhylawò wedu, tòruludu-wana iwitxiramy rõhõtynyhyyre, beòra tai riekõkemy beà dori ibinareki. Ijõ tule tahe roirenykemy ixide ihyyrenyre rehemynykemy Fenisia beà-ò. Kia heka Kreta bedebute beàõ rare. Biuw-eribitya-txi ròrõmyhyyre, tai awire kia beà, beòra bede riwykemy.

13 Ijõ rarybere: –Rikoirenyke, yhy dori rebonyreri, tamy rekehemynyrenykemy. Tahe womatisana riukore. Roirenyre yhy-di. Tahe iòhòmý Kreta bedebute rotÿÿnyra.

14 Aõwesele heka yhy nihikÿ dehemynyde bedebrò-ribi. Kia yhy nihikÿ iraro bedebrò ludu inire.

15 Ka yhy nihikÿ taruru-di riwyre hãwò nihikÿ. Juhu yhynonana weribi-ò riwisÿnyre. Idi iwo rexieryre ixinamy riwyre yhyòkesena-ò.

16 Tahe rehemyyhyyre Lauda bedebute-ò iroosibymy tahe ralore. Tai hãwò nihikÿwo-ki hãwòriõre riwyre.

17 Idi tahe rõhõtynyre hãwò nihikÿ rabòhòke-txi roholarenyre, tai tahe ritaarenyre iwetya-txi. Tahe ruberurenyre, Libiamy ninadu beòlau, tahe welòhòkÿ ritare iribi rexitarenykemy.

18 Ijõtxu roirenyre yhynihikÿ tamy realemy iu, tai tahe aõna aõna-di rehure ibutemy rawetarikemy.

19 Tasÿ txuõ idireny reare. Idi rehurenyre aõmybo rekoakõmyhyyrenyredi rawetarityhykemy.

20 Txu sõwemy rewyrenyre txumy, tainamy ribi renyõhyyre. Yhynihikÿ reamyhÿ. Tai sõwemy ruberumy rÿimyyhÿ rubu lau.

21 Sõwemy heka bededÿÿnana riwyre roxiõhyy. Tahe Paulo iyreny-ki rÿire, tahe tamyreny rarybere: –Wanyrÿboho, warybe-ò taholaõhytyentye Kreta-ribi ròhònnyrenyre. Aratohonyrenyre iribi inyboho kodoikõkemy. Boholabenybe-wana ta inihe aõna itueõhyyre.

22 Ihãrele tahe deysana-di adeereny ararybekre. Inyõ ruruõtyhy, hãwò nihikÿ sohojile rabohokre.

23 Jiarÿ dori Deuxu deòdu rare. Kaurumy dori Deuxu ÿju wadee nade.

24 Tahe rarybere: –Paulo, brebuõmy. Kai iòlòko-ò makre. Deuxu dori ruxetòena kidiwahinykre. Tiu heka aruburenyno aijoi-wana.

25 Tahe wanyrÿboho, brebuõmyreny. Jiarÿ dori Deuxu retyhynyre, iwese wadee rarybere wese, rarekre.

26 Urile tahe inyboho kiditehemynydenykre bedebuteõ-ò. Kia tahe Paulo rarybere.

27 Waòinaubiòwa rummy beronihikÿ tya-ki bede riijemy roiremyhÿ. Adria beronihikÿ-ki roirenyreu, tahe rutya-txi hãwò nihikÿ aõna hydÿÿdu su iòhòmý roholarenyre.

28 Tahe beõ urihixina-di riurihire, wawiò dera urihixinamy beõ riurihire. Idi iko-txi ixityre riurihire tai waiyre dera urihixinamy rimyre.

29 Tahe rahõtynyrenyre manale tai roimyyhyyremy. Tai tahe manatisana-di inaubiòwa lòru ludu-ribi rehurenyre. Iribi rexitòenyre wylemy txuu kanatÿnykemy.

30 Hãwò aõna hydÿÿdu mahãdu hãwò riòre riwesere bera-ò. Idi risÿnyre ijõ manatisana ritidikremy hãwò jura-ribi. Urile tahe rahenykremy rõhõtynyre.

31 Paulo tahe rierymyyhÿ tahe soldado wedu-ò rarybere: –Soldado mahãdu tule roholare:

32 –Hãwò aõnahydÿÿdu mahãdu hãwò nihikÿkÿro-ki rariõrenykeki, kaiboho atuerenyke. Tai tahe soldado hãwò riòre reroti riàrore tahe resere bera-txi

rahenyre.

³³ Txuu iòhòmý natÿnyde, tahe Paulo tamy rarybere: –Wiji waò inaubiòwa txumy kaiboho teraòtenyde tabyretenyòhyy.

³⁴ Ijõ birÿsÿbenyke, arurureny rexiòlònykemy, kaibohoõ dori burubenyòtyhy. Aradeti sohojiõ tiu iòòtyhy.

³⁵ Rarybemy rahudi tahe, paõ sohoji Paulo rimyre. Ibutura-ò Deuxumy reàlàre. Idi tahe paõ riorore, riyre.

³⁶ Ijõ reny reysarenyre, taita tule riyrenyre.

³⁷ Tahe 276 iny hãworo-ki roirenyre.

³⁸ Tahe ibutumy iwo rihyrenyre tahe maixõmo wesena-di rehurenyre hãwò nihikÿ rawetarinykemy.

³⁹ Bede ratÿnyreu, inyõ rieryòhyyre titxiribibo nade. Tuu robirenyre iworywo-ki ÿnyra tai roimyhÿremy tahe inyõ rieryòlemyhÿre. Widee raryberenyre: –Rikirònyrenyke hãwò-di iwo-txi.

⁴⁰⁻⁴¹ Tahe manatisana riukòrenyre tahe welò riderenyra hãwojura-ò iraròsòna riesere. Tahe ritelenyre ralòkemy. Urile esetere tiò tiòle hãwò ridymyhÿ beõ òhòkÿle idi rehure rorokòòhòkÿle, rimyre taile òbò hãwòlòru ribohonyre.

⁴² Soldado mahãdu ròhòtinyre ròtena mahãdu rahenyketxi. Tai rirubunykemy ròhòtinyre bede-ò robunyke lau.

⁴³ Soldado wedu tahe Paulo ritòenyre rubu lau, tai tahe riteònyre rirubunyòhyyre: –Tibo alobueryre, juhoo suò rakemy, soldado wedu kia rarybere.

⁴⁴ Tibo alobueryòke tahe òwòru àre hãwò-ribi rimymy idi rakre. Kiamy heka ibutumy retehemynyre su-ò, inyõ ruruòhyyre.

28

¹ Tai tahe taisÿdu mahãdu-txi rekoare. Tii bedebutenimy inydee relyyre. Malta heka inire.

² Biu riwasebenyrenyre yhyjutyty riwasarenyre. Tai tahe tiiboho heòty riwornyrenyre wahetònarenymy. Tiiboho riwawisinanyrenyre awimy wadi-reny roiremyhÿ.

³ Paulo hee ributunyre heòtywornamy. Idi rehureu, hemylala he wo-ribi heòty lau ròhònyre, tai ruruare Paulo debò-ki.

⁴ Tusÿdu mahãdu tuu robire tahe rarybere: –Ka hãbu rubudÿÿdu òsÿny rare. Tii heka ruruòre bera-ò, ka tahe kidiòwynykre inyõ òsÿny rirubunyreki wahe, rurokre heka.

⁵ Paulo tahe hemylala tebò-ribi riatyre heòtyru-txi. Ta aòhòkÿmy rotÿÿnyòhyyre.

⁶ Tahe imahãdu idi retehemy rÿimyhÿ tarubulemy resekeò, ada tebò ratarinybohokeò aòbo. Sòwemy riraòre, aòhebo rotÿÿnyke, tahe aòkòhyyre. Tai tahe iwitxiramy ròhòtinyrenyre: –Tii deuxuòle òsÿny ratxireri. Tiiboho raryberenyre kia.

⁷⁻⁸ Hetoõ tai iòhòmý rÿire, Publio iwedure. Tii heka ityhy rare iwedu rare kabedebute-ki, tii bedeòtiidÿÿna rare. Tai taheto-ò riwadyrenyre. Awihyye wadireny raremyhÿ. Publio tyby tahe rubunamy rurumyhÿ. Busu-di ratximyhÿ. Tai tahe Paulo iroramy rare. Tebò ityre ritidire, rexitòenyre, tahe riteytenyre.

⁹ Tai tahe ibutumy bedebute ludu webinadu Paulo dee wii rotyre. Ibutumy reyterenyre.

¹⁰ Tai tahe uriiòno inydeereny riwahinyre aòna aòna. Sòwemy rÿsÿna hãworo-ò rahyre inydeereny. Kia hãwò beòra bede kia beà-ki riwyre.

11 Txuòkuro hãwò ni rare. Kia ni ihiju rare. Ideuxu ritxoo inatxi rare. Hãwò Alexÿdria hãwã ludu rare. Tahe rahònyrenyre. Inataõ ahãdumy bede wadireny rÿidi.

12 Sirausa hãwã-ò retehemynyre. Tai tahe inataõ txumy wadireny rÿire.

13 Iribi tahe Rejio hãwãmy rekoarenyre. IjõtXu tahe Pozuli-ò reòlònyre. Inatxi txu-di retehemynyre yhy ibòò-ribi debonydeki.

14 Tai seriòreõ ratximyhÿ. Tiiboho rexitòenyrenyre tii-wana ratxikemy debòinatxi reurò txumy. Kiamy heka Roma hãwã-ò roirenyre.

15 Roma ityhydÿÿdu mahãdu roholare jiarÿboho retehemynyrerimy. Tai tahe doidenyde Apio hãwã ube-ò. Tule aõ-di ijohona Heto Inataõ hãwã-ò doidenyde. Paulo tiiboho robireu, Deuxu reàlàmyhÿ, reysamyhÿre.

16 Tahe Roma hãwã-ki Paulo ixideewimy rasÿnyre. Urile soldadoõ aõu aõu tii-wana ratximyhÿ.

17 Inataõ txumy bede idi rÿidi, Paulo ributunyre judeu mahãdu dinodu. Wii ributunyreu, tamyreny rarybere: —Wanyrÿboho, waseriòreboho, jiarÿ aõ rewinykõre waijoi Judeu mahãdu dee. Tule lahirybe õnosõna ratyre aõ rewinyõhyre. Ihãre judeu dinodu riwamyre. Tahe diwahinyde Roma dinodu mahãdu-ò.

18 Tiiboho heka riwatÿÿraxinyre ibutumy. aõ heka waki ibinamy rahaõhyre. Tai tahe riwateònyrenykemy ratxirenryeri.

19 Waijoi tahe Judeu ijoi heka waòludureri. Tai tahe Iòlò-ò jiarÿ rarybere arakemy. Aõ dori waijoi dee waòraruõre.

20 Tai heka arabutunynyre, warybe-ò boholabenykemy, wadi retehekemy womati reroti-di riwataataara. Judeu mahãdu raròsòna òraru-ki kawesemy watzireri.

21 Tahe judeu dinodu mahãdu rirawyònyre: —Aõkõre, inyõ rehemynyõre Judeia bede-ribi. Ijyybinamy umy relyyõre. Inyseriòre mahãduõ kaò dehemynyõde.

22 Aroholarenykemy timybo tahòtinymahãte-ò. Ityhydÿÿdu mahãdumy dori ibutumy aõbinahakÿlemy rarybereri. Kia judeu mahãdu dinodu raryberenyre.

23 Tahe riywinyre itxu Paulo rybe-ò ijohonamy. Idi tahe Paulo heto-ò sõwemy iny doidenyde tamy roholakemy. Tii Deuxu ijyy ritÿnynyre rudiu rexidelenyre, txioromy rexihure Moisesi Tyyriti ritÿnynyre tule ijõ rybedu Tyyriti-di ritÿnynyre, iwese Jesuisi Iòlòtyhy kanatzikre wese kabede-ki. Kia Jesuisi aõmydÿÿnanamy ritÿnynyre.

24 Ijõ roholare aõmybo Paulo rarybereò, Jesuisi rityhynynyre. Ijõ tahe aõkõre, rityhynyõre.

25 Ijõ teramy reare. Rÿire, ròhònykremy. Tahe Paulo tamyreny rarybere: —Deuxu Tyytybytyhy booreny dee rarybere Isaia tyyriti-ki. Awimy rare. Kawese roire:

26-27 —Makre tamy marybekre: —Boholabenyke, ta tiu aerysyrenyõna. Betehekre arue-di, ihãre tahe aerysyrenyõna. Iruereny, iraykyreny, tõhòtirenny ritòbònymahãrenyre. Tai tiu tiiboho robirenyõtyhy, riryrenyõtyhy, roholarennyõtyhy. Tai diwatyhynyõhyymyhÿde. Tai heka iòraru-ribi ariteytenyõkre.

28 Bierymy boibeke Deuxu tarasana judeukõdu mahãdu-ò rare. Tiiboho dori roholarennykre.

29 Paulo tarybe rahudi tahe, judeu mahãdu ròhònyrenny sõwemy widee rarybemyhÿrenyre.

³⁰ Roma hãwã-ki Paulo rasÿnyre inatxi beòramy tahetohuòtenawo-ki. Ibutumy heka dÿÿraximy iheto-ò rehemynyrenyreu, Paulo ridyre tamy rarybekremy.

³¹ Deuxu Iòlònamy Paulo iruru-di relyyhyymyhÿre. Inynyrÿ Jesuisi Kristu aõna aõnamy rierynanymyhÿre. Tiu inyõ aõhõkÿmy risÿnyõmyhÿre Paulo rybe xãwikemy.

Roma Paulo Ryberiti Roma mahãdu-ò

¹ Paulo jiarỹ rare, tyyritiwidỹdure wahe. Jiarỹ heka Jesuisi Kristu deòdu rare. Tii riwatare rybe tỹnydỹdumy ararekremy. Deuxu Rybewihikỹ wahidỹdumy ararekremy.

² Juhuu dori Deuxu rarybere Rybewihikỹ riwahinykemy. Deuxu rybedu mahãdu kia rybe riritinyre, Ritidỹỹnatyhy-ki.

³ Kiamy heka Deuxu Riòre rybe tyhydỹỹnamy rarybere, Davi riòre riòkòreõ wahe.

⁴ Deuxu Jesuisi Kristu rubu-ribi riixixadỹỹnyreu, tariòremy tahe riteòsinyre rurunatyhy-di. Jesuisi tahe inatyhymy Inynyrỹ ihỹre.

⁵ Tii ruxetòena inydeereny riwahinyre. Irybe òraru-ki, jiarỹboho aròirenykemy watzireri. Ityhyna aritỹnynykemy judeukòdu mahãdu-ò, tai tiiboho rityhynyrenyremy.

⁶ Kaiboho tule judeukòdu mahãdu atxitenyteri. Tahe Deuxu ityhydỹỹna mahãdu atxitenyteri, Jesuisi Kristu ijoimy rỹrakemy adeereny rarybereki.

⁷ Ibutumy adeereny warybe rewahinyre, Kia Deuxu taijoimy remyremy mahãdu wahe. Ruxetòena, ywina-wana adeereny-ò kanakemy watzireri, Deuxu inytyby-ribi tule Jesuisi Kristu iny wedu-ribi. Tii dori adeereny irybe riwahinyreki.

⁸ Umyreny Deuxu-ò reàlamahãre, atyhynareny-ò iny ibutumy roholamyhỹreki.

⁹ Deuxu-ò rexitòenymahãreu, anirenymy rarybehyymy watziwãhãre. Kia heka Deuxu rieryre, waworibityhy tahe jiarỹ Deuxu deòdumy rare. Iriòre Rybewihikỹ-di wahe.

¹⁰ Jiarỹ rexitòenyhy watziwãhãre arorarenymy arakemy Deuxu-deewikeki.

¹¹ Umyreny arobikemy watzireri, tai adeereny arelyykemy aõmydỹỹ wihikỹõ Deuxu Tyytybytyhy. Tule kaiboho wadee tuu belyybenykre. Tai tahe atyhynareny-ki ityhymy relekre.

¹² Jiarỹ arawiòhenanykemy watzireri, tule kai biwawiòhenanykemy watzireri. Tai rikexideysanytyhykemy inatyhyna-ò.

¹³ Sõwemy heka arahyykemy watziwãhãre arorarenymy. Iribi nohõti losaõmy tahe wadi rarurunymyhỹre aõbo, riwateònyõhyymyhỹre heka. Jiarỹ Deuxu dee waaõmysỹdỹỹna awikemy watzireri ayreny-ki. Tai kaiboho ako-ò boikemy wadee awire, iwese ijõ judeukòdu mahãduko-ò ararybekremy watzireri wese.

¹⁴⁻¹⁵ Tuheka ibutu iny-ò ararybekremy watzireri, hãwã witzira witzira mahãdu-ò, tule. Iny mahãdu-ò aõkõre mahãdu-ò tule. Tuu ariwinykre ibutumy iny-ò, iny bedeeryrenyõ mahãdu-ò tule. Adeereny tule Rybewihikỹmy arelyykemy watzireri Roma hãwã ludu mahãdu-ò.

¹⁶ Jiarỹ dori Kristu Rybewihikỹ-ki araixỹruõtyhy. Irybe dori Deuxu ruru rare. Ibutumy iny rityhynykeki ritakemy ratzikre. Judeu mahãdu-ò juhUU nade tai tahe iuhe-ò judeukòdu mahãdu-ò.

¹⁷ Deuxu òbitina ratỹnynymy namyhỹde Rybewihikỹwo-ribi. Tyhyna-di rite-lenyre tule tyhyna-di ihỹmyhỹre. Inyõ tyhyna-di òbitimy rỹikeki, tii ruruõtyhy, idi awimy rareki.

18 Deuxu yarana biu-ribi namyhÿde ibutu òraruna hudunamy. Iwidÿÿdu hudunamy. Bina widÿÿdu dori inatyhyna ribinanymyhÿre, raruinymyhÿre Deuxu rybe ribynymyhÿre?

19 Deuxu eryna ibutomy iny-ò riwahinyre. Deuxule tamy riwahinyre. Tai timybo Deuxu raremy tahe tiiboho rieryhyymyhÿre. Tai Deuxu aõhõkÿmy risÿnymyhÿrenyre.

20 Juhuhukÿle heka Deuxu aõmydÿÿnanamy iny robimyhÿre idi tii tyhynamy tule rierymyhÿre itÿnyhÿkÿlemy, irurunahyy wahe. Aõu aõu kia ibutomy iny rierymyhÿre, Deuxu widÿÿnamy iny robireki wahe. Tai tiu iny ixitxiõdÿÿna.

21 Rieryrenyre tii Deuxumy raremy. Tahe rexiwowydynyõhyyre timybo iny Deuxu dee rexiwowydynymyhÿkemy wahe. Tamy àlànatyhy riwahinyõhyymyhÿre. Idi rõhõtinyinymyhÿrenyre Deuxu irayky rõhõtinyinymyhÿre wesemy idi rõhõtinyinymyhÿre. Irayky tahe reõsamy ratximahãre.

22 Tiibohole bedeerityhymy ixidi rõhõtinyinrenyra. Tahe itxÿtele roire.

23 Deuxu rubutere rityhynykenawi tahe tiiboho heka ritxoo deuxuõ ireije riwinymyhÿrenyre tatyhydÿÿnamy. Ibinamy heka mywese riwinymyhÿre, nawii wesemy, irõdu wesemy, irõdu bedemy riradu-wesemy. Rexiõkamy riramy riradu wesemy tahe rityhynymyhÿrenyre.

24 Deuxu heka òraruna-ò riwahinyrenyre, itxÿtenareny òraru-ki. Iny òta òtadu mahãdu heka wiwanale aõða ixÿruna riwinymyhÿrenyre.

25 Deuxu inatyhyna dori tiiboho riwiurõnyra ruina-ò. Ritxoo dee rex-itõenyrenyre, aõbo Deuxu riwinyre, kia. Deuxule iny reàlãkõmyta ratximyhÿrenyre.

26 Deuxutyhy tahe rityhynyõhyyre, Deuxu ibutu widÿÿdu tiu riteàlãnymy rakonananyõtyhy. Kia òraru-ki òtaõtana nade. Hãwyy, hãbu-wana aõkõ roimyhÿre wideele heka aõhebo rotÿÿnymyhÿre. Kia heka òbiti aõkõ rare.

27 Tule hãbu, hãwyy-wana aõkõ rõimyhÿre, wiwanale aõhebo rotÿÿnymyhÿre. Òbiti aõkõ heka kia rare. Riwyrenykre kia òraru òwydÿÿna, aõhõkÿmy dÿÿnana wahe. Iny sohoji sohoji taaõbina ixÿruna òraru-ki ixidee rimykre.

28 Tõhõti heka Deuxu-txi reaõhyymyhÿre. Tai tahe timybo ixideewimy riwinyrenykre roirenyre Deuxu-ribi. Tahe riwinyrenyre ibutomy aõbina binahakÿle.

29 Aõimy aõko ratximyhÿre aõbina bina-di roiremyhÿ: òtaõtana-di, aõbina binahakÿ-di, aõikõkõ-di, rarekemy ixidee ririmyhÿre, teramy heka rÿira. Ihãru-di rÿira iny rubudÿÿmy dori rõhõtinyinymyhÿre, rarybehymy ratxirerimy ihÿre, ruidu nihikÿ ihÿre, ujõmo-di rÿira.

30 Aõbinamy inymy rarybemyhÿre, Deuxu derare, ixiluulerenyre, rexytyhynymyhÿre, òraru tÿmyra riwinyrenyre, tyby tadi-wana rityhynyõhyyre.

31 Irybe sohoji aõkõ heka rare. Iluunaõre, ibinatyhyre, inydee iruxetõeõre.

32 Deuxu rarybere: inyõ kia riwinykeki heka ruruke. Tiiboho kia rieryrenyre. Ihãre tahe aõhebo rotÿÿnyre. Kia sohojile aõkõ. Reysarenymyhÿre iny wixira iherenyki aõhe rutÿÿnykreki.

2

1 Tutyhy-ki aõkõramy rybeõmy. Kai dori tutyhyle òraru tewinymahãõte. Inyõ rybemy ywisidÿÿna ijõmy rarybeke-wana ixilemy ywisidÿÿna-ò rexytyhynyke. Tii dori kia ibutomy tule riwinymyhÿre ibinamy wahe.

2 Inyõ kia aõbina binahakÿ riwinymyhÿkeki, Deuxu ywisidÿÿna-ò inatyhynalemmy tamy kòdòhònykre.

3 Kai tuleke –kiamy biwinykeki, Deuxu ywisidÿÿna-ribi mahenyõtyhy. Kai dori ywisidÿÿdumy texideòsinyte ihãre tahe iòraru wesele tewinymahãte.

⁴ Deuxu ruxetòena sòwemy adi rexiruxetòenanymyhÿre. Kia-di bexirâhíkemy adi ratxireri, tiemy ywimy aõna aõna bina riemyhÿre ratximyhÿre, awi heka adee rare. Kai aõbohe iribi õhõti rosakre kia heka arabedeòtiidÿÿnymyhÿre. Arabedewodÿÿnymyhÿre iòraru-ki. Kai aõbohe kia teeryõte?

⁵ Kai arybedÿÿsaeryõre rybe ijohona teeryõte õhõtiõre. Tai tahe Deuxu yarana ixideele tebutunymahâte. Ijõtxu Deuxu yarana txumykreu. Tai Deuxu ywisidÿÿdu òbiti rexitÿnynymy rÿikre.

⁶ Iny sohoji sohoji taaõna aõna myna aõmy rotÿÿnykre, aõhebo rotÿÿnymyhÿreki wahe.

⁷ Inyõ aõwidÿÿlemy ratximyhÿre. Tiiboho heka Deuxu wowydyna, Deuxu wohyna, Deuxu loosòna widÿÿmy rarutaamymhÿrenyre. Tule iny rarehykykrena-di rarutaamymhÿrenyre. Imyna Deuxu tamyreny riõkre.

⁸ Kia ixidile rõhõtinyinymhÿre mahãdu tahe, Deuxu woxibrunale, yaranale ritakre. Tiiboho dori inatyhyna rityhynyõhyymyhÿrenyre, aõ òbitile aõkõ riwinymyhÿrenyre.

⁹ Aõhõkÿmydÿÿnana, bedewona kanakre ibutumy aõbina bina widÿÿdu mahãdu-ò, judeu mahãdu-ò juhuhu idi judeukõdu mahãdu-ò.

¹⁰ Wowydyna, àlana, ywina tahe kanakre aõwihikÿ widÿÿdu mahãdu-ò judeu mahãdu-ò juhu delemy idi judeukõdu mahãdu-ò.

¹¹ Deuxu-ò heka ibutumy iny wiwese rare.

¹²⁻¹⁶ Tii heka aõhõkÿmy risÿnykre ibutumy iny òrarudu mahãdu. Moisesi bede ywina ihoõrehãrele tii rurukre. Judeukõdu mahãdu heka Moisesi bede ywina rybe ijõkõre. Tahe bede ywina iny rierykeki, idile Deuxu iòraruna riywinykre. Inyõ Deuxu bede ywina rybe roholare tahe rityhynyõre, kia tahe Deuxu dee ibinatyhyre. Ibutumy kia iny rurukre, òtÿÿ iraykywok-ile aõbo ibinare, aõbo òbitire rierymyhÿreki. Deuxu bede ywina wesemy heka iraykywo-ki ratximyhÿre. Iraykywydyna rexinohtinyinymhÿre ada dexiòbitidÿÿnymyhÿde, Rybe wimy rarybemyhÿre Jesuisi Kristu heka hãbu aõmydÿÿna ritÿÿnykre imyna timy rarekremy. Deuxu dori iteradÿÿdure.

¹⁷ Kaiboho, judeu mahãdu, texinohtinytenyta ibutumy awiremy aDeuxu-ureny-wana. Tii adeeremy bede ywina rybe riwahinyreki, tii abiòwatyhy rareki.

¹⁸ Kai heka aõbo Deuxu-ò awire teeryte. Aõbo ibinare, teeryte. Uladuule ibede ywina rybe teeryte, tai òbitityhyle adeeremy awire.

¹⁹ Kai Deuxu-ò nonana bitÿnynyke iny ruetà mahãdu-ò dori, kia teerytyhytenyteki. Ixi-di tahõtinytenyteki. Iwese, kaiboho loosòna wesemy toitemahã ixi-di tahõtinytenyteki.

²⁰ Tule kia ixi-di tahõtinyinmahâte. Kai bede erydÿÿdukõdu mahãdu erydÿÿdumy atxiterimy ixidi tahõtinyinmahâte. Uladu erydÿÿdumy atxiterimy ixi-di tahõtinyinmahâte. Kai bede ywina rybe tyyritiõ dire. Kia adee ibutumy inatyhyna rare bedeerydÿÿna.

²¹ Kai iny erydÿÿdumy atximahâte. Timyrekibo kai texierynanyõmahâte. Kai wasimy aõkõ tðerydÿÿnanymyhÿte. Timyrekibo tawasinymahâte.

²² Kai hãwyy òta aõkõ tetÿnynymahâte. Timyrekibo kai tuu tatÿÿnymahâte. Suritxoo dee àlana deramy iximy tarybemahâte. Aõherekibo erydÿÿ-ribi aõmydÿÿnana tewinymahâte.

²³ Kai bede ywina rybe luumy iximy tarybemahâte. Kai Deuxu-di texixi-wedenymyhÿte. Ihãre tahe bede ywina rybe tetyhynyõte. Kiawese Deuxu texirudÿÿnymyhÿte.

²⁴ Iwese juhuhu riritinyre wese wiji roimyhÿre: —Aòraru-ki tahe bedemy iny rÿira Deuxumy aõna aõnabinamy rarybemyhÿre.

²⁵ Kai bede ywina rybe bityhynykeki, òtyky resynadike, awire judeu mahādu dori rare. Tahe bede ywina rybe bityhynyōkeki, òtykyresyna adee aō aōkōre.

²⁶⁻²⁷ Iwesetyhylemy iny rare tōtyky resynaō mahādu. Tiiboho bede ywina rybe rityhynykeki, tōtyky resyna-di mahādu wesemy roirekre. Judeukōdu mahādu heka bede ywina rybe rityhynykeki, kia adee ix̄runa rare. Kaiboho dori Deuxu bede ywina rybe tetyhynyōte òtyky resyna dire hārele. Bede ywina rybe dire hārele.

²⁸⁻²⁹ Inyō judeu mahādu wesemy ih̄yre. Ihāre tahe judeu mahādu inatyhy aōkō rare. Tōtyky resyna-di judeu mahādu inatyhy aōkō r̄yira. Judeu mahādu inatyhy tawokihyyle kia idi r̄yira. Iwesele notyky resynad̄ȳna kia r̄yira. Iny-wokihyyle rare. Aō bede ywina rybekile aōkō tuu r̄yire inyrayky wydynamile kiawesemy inyō r̄yira. Hābu-ribi wowydynamy ritaōtyhy. Deuxu ribile ritake.

3

¹ Tibohe judeu mahādu deewinare. Notyky resynale tamywina. Kia aōbo ibuturatyre awire judeu mahādumy rareki?

² Inatyhy rare, sōwemy, Deuxu dori tamy juhu Ritid̄ȳna riwahinyre.

³ Inyō rityhynyōre-wana kia riwiurònyōhyymyh̄yre Deuxu heka òbiti rare.

⁴ Inatyhy urenanamy Deuxu raremyh̄y. Iny mahādu tahe roidumy r̄yiramyh̄y. Iwese ritina-ki roire wese Deuxumy rarybereri: —Kai arybe òbitina-di atximahāte urenana wahe. Inyō araurihikeki, kai inatyhyna-di biòlòd̄ȳnykre.

⁵ Inyboho òbiti aōkō roire. Kia tahe Deuxu òbitina riteòsinyre. Timykibo Deuxu inydee aōhōk̄myd̄ȳnana riwahinykre. Mobo heka kia òbitimy aōkō rarybekre. Jiar̄y hābu rayky-di wese rarybereri.

⁶ Kia òbiti rare. Kiaweseōkeki timybo Deuxu bede aōhōk̄my d̄ȳnana riwahinykre.

⁷⁻⁸ Kai tarybete: —Jiar̄y raruirā. Urile kia Deuxu inatyhyna reteòsinyre. Aōherekibo Deuxu aōhōk̄my riwasynyre. Kiarybe iwitxira rybewesemy rare: —Ibinamy rakatximyh̄ykeki, awihik̄y kia-ribi ròhònykre. Aōkōre, kiamy rybedu mahādu aōhōk̄my d̄ȳnana ritamyh̄ykre. Kia riki wamy rarybere, ruimy wahe.

⁹ Aōhe aōbohe, inyboho aōbo inywitxira-ribi awityhyrenyrene. Aōkōre. Jiar̄y reteòsinmahāre ibutumy judeu mahādu, judeukōdu mahādu ibutumy òrarudu roire.

¹⁰ Kiamy Tyyriti-ki roire: —Tiu heka inyō òbitiōre.

¹¹ Inyō heka Deuxu rieryōhyymyh̄yre. Timy heka riòryōhyymyh̄yre.

¹² Ibutumy iny rexiōnonomyh̄yre Deuxu-ribi wahe. Aōmy aōkō tiiboho rexi-winyrenyrene. Iny riuheōhyymyh̄yre aōbo awiré. Sohoji aōkō aōhebo rot̄ȳnyre aōbo awiré.

¹³ Ibòtòjò heka rubuwabede iraymy roimyh̄yre ròwese rare. Tiiboho iny itxenad̄ȳdu rare. Irybe heka hemylalatyhyju wese rare.

¹⁴ Aōbina binahak̄ylemy heka inymy rarybemyh̄yre.

¹⁵ Iti heka teyrewē rare hālubu txiwimy iny rubud̄ȳmy tule.

¹⁶ Titxibo ramyh̄yre-wana heka aōbina binanale riwahinymyh̄yre, aōhōk̄yle ririmyh̄yre.

¹⁷ Tiiboho dori ywimyno rieryōmyh̄yrenyrene.

¹⁸ Deuxu lau heka ruberuōtyhymyh̄yrenyrene, Deuxu rityhynyōtyhy.

¹⁹ Bede ywina rybe heka tatyhyd̄ȳna mahādu-ò diōde. Kia tahe inyboho rieryrenyrene. Tai heka iny rexitxiōnyōtyhy Deuxu-ò. Tai heka ibutu dee aōhōk̄my d̄ȳnana-ò riywinymy r̄yikre.

²⁰ Bede ywina rybe-ribi iny ibutumy rieryre ibinamy ratxireri. Inyõ heka bede ywina rybe heka rityhynyõhyre. Tai tahe inyõ kia-di rexitaõtyhy iywina òraru-ki.

²¹ Wiji tahe Deuxu òbitina ratỹnynomy ihỹre bede ywina rybe-ribi lahitximy. Ihetxiu rybedu-di kia ritỹnynomy ihỹre bede ywina rybe ritina-di.

²² Deuxu riòbitidỹnyra. Ibutumy Jesuisi Kristu tyhydỹdu kanakre. Deuxu dee dori ibutumy bede bede ludu wiweselere.

²³ Ibutumy raòrarunymyhỹre. Deuxu òbitina tamy rauhenymyhỹre.

²⁴ Deuxu taruxetòena-di ibutumy riòbitidỹnyre Jesuisi Kristu tarasadureki. Tii iny-ribi iòwydimy aõ rexitòenyõhyre.

²⁵ Deuxu Jesuisi-di rubuna iny òraru riixãwididỹnyre iòwy tii riòwynara, iny kamy rityhynykemy. Kawese-ki Deuxu òbitina ritỹnyra. Juhuu Deuxu iny òraruna-ò reteheõmyhỹre aõnityhymy iywisidỹna direki.

²⁶ Tahe wiji inyòraru-ò retehemyhỹre riixãwididỹnykemy. Tai tahe tii òbitire tule Jesuisi Kristu tyhydỹdu òbitidỹdure.

²⁷ Mobo Deuxu-ò rarybekre jiarỹ awiremy? Aõkõre, inyõ rarybeõtyhy. Bede ywina rybe tetyhynyõte. Deuxu iny òbiti widỹdure, ìbede ywina ywidỹ aõkõre. Inatyhynadile awityhymy iny rare.

²⁸ Kiamy tahe raraykynyre iny ityhynadile riòbitidỹnyke bede ywina rybe ywidỹ aõbo? Aõkõre!

²⁹ Deuxu aõbo, judeu mahãdu Deuxu sohojile rare? Aõkõre, judeukõdu mahãdu-ò tule Deuxu ihỹre.

³⁰ Deuxu sohojile rare. Iny wiwanale riòbitidỹnykre judeu mahãdu judeukõdu mahãdu-wana. Ibutumy ityhyna òraru-ki riòbitidỹnyke.

³¹ Ityhyna aõbo bede ywina rybe riixãwididỹnyra? Aõkõre, bede ywina ihãre rỹire.

4

¹ Timybo ararybekre inytybyreny Abraõmy.

² Aõbo riwinyre aõkõ idi rexiòbitidỹnyre. Tai tahe rexityhynyke inyko-ò. Tahe Deuxuko-ò aõkõ.

³ Kamy heka Ritidỹna-ki roire: –Abraõ heka Deuxu rityhynyre taile tahe rexiòbitidỹnyre. Deuxu dee tii òbitityhy rare tii rityhynyrekile.

⁴ Iny aõmysdỹdu raòwymyhỹke iaõmysdỹna myna. Urimy aõkõ dori raòwymyhỹre taaõmysdỹnaòwyle dori ritamyhỹre.

⁵ Inyõ rityhynymyhỹkeki, tii òbitina ritamyhỹre Deuxu-ribi. Deuxu dori òrarudu mahãdu òbitina widỹdu rare. Kia uriõno rare.

⁶ Davi heka juhUU riritinyre iwese teysatyhymy iny rarekremy wahe. Deuxu dori òbiti mahãdu dee riraykydỹnyre òbitimy roirekemy. Tii ixidee aõ riwinyõre. Davi kiawese riritinyre:

⁷ –Teysatyhymy iny rỹirakemy Deuxu iòraru riixãwididỹnyreu tõhõti-ribi iòraru rosakeu.

⁸ Teysatyhymy iny rỹirakemy iòraru-txi Inynyrỹ nohõti ijeraõmy ihỹkre.

⁹ Deysana aõbo judeu mahãdu sohojile riteysanymyhỹre ida judeukõdu mahãdu tule. Tulere! Inyboho dori rarybere: –Abraõ tyhynale tamy òbitina diwahinymyhỹde.

¹⁰ Tiubo tahe Abraõ òbitina ritare notyky resynako-ki ada ihewo-ki aõbo, ikoure.

¹¹ JuhUU dori rityhynyre idi ta notyky resyna tamy nade kia tyhyna Deuxu-ò riteòsinyreki. Tai tule òbitina Deuxu tamy riwahinyre. Kia butu tyhydỹdu tyby wese rare, Judeukõ mahãdu wahe.

¹² Notyky resynako-ki òbitina ritare. Tõtyky resyna-di mahãdu tyby wesemy riki Abraõ ratximyhÿre. Tiile tõtyky resynakõ-ki Deuxu rityhynytyhymyhÿre.

¹³ Deuxu Abraõ-ò rarybere tii ibutu bede bede wedu wesemy ratximyhÿre iriõre iribi rimyky. Tahe bede ywina rybe òraru-ki aõkõ tuu ihÿre, ityhyna òbitina òrarukile wahe.

¹⁴ Bede ywina rybe-ribi tybie tahe itarasadumy ratzikre, tai tahe inatyhyna aõ aõkõ rare. Aõbo Deuxu rarybere aõmy aõkõ rare. Tahe roirekre.

¹⁵ Bede ywina rybe dori Deuxu aõhõkÿmy dÿÿnana diõde iny ribedeerynykemy. Teysana aõkõ wahe. Bede ywina rybekõki, timyky iny aõ ityhynyõna. Bede ywina rybe ijõõre-wana òraruna ijõõre.

¹⁶ Tahe inatyhyna-di sohojile iny aõna aõna wiwihikÿ ritamyhÿke. Tai iruxetõena-ribi nade. Tahe aõmybo Deuxu rarybere ibutu riõreriõremy tuu rÿikre. Bede ywina rybe mahãdu tule bede ywina rybekõdu mahãdu-wana wiwana Deuxu rityhynyre. Abraõ riõre wesemy ibutumy tai inyboho roire.

¹⁷ Iwese Ritina-ki roire wese: —Jiarÿ aratare ibutu inytyby wesemy mabekemy. Ibutumy iny rityhynyre-wana, iwese Abraõ rityhynyre wese, iwese-ki Deuxu ritake. Deuxu tahe rubu mahãdu riixixanymyhÿre rubu-ribi. Tii rarybekeu aõ aõkõ aõwesele tii aõ heka rare. Tii rarybere tule riwinyre. Abraõ heka Deuxu rybe rityhynyre.

¹⁸ Timy heka rariõrenyky ixidee rõhõtinyõhyymyhÿre. Deuxu dori tamy rarybere: —Kai heka ariõkõreny sõwemy atximyhÿkre. Kai hãwã hãwã tybymy mabekre.

¹⁹ Abraõ tatyhyna ritxiõnyõhyre. Timy heka 100 beõramy idi ratximyhÿre, ixãwire uladu-ribi ramatuarinyreki. Tule ihãwy Sara iuladu herina-di kõremy rõhõtinyre.

²⁰ Timy heka ritxiõnyõhyre Deuxu Rybe. Rityhynymyhÿre Deuxu dealàna riwowydynyre.

²¹ Tii heka rierymyhÿre Deuxu irurudire irybe wesemy aõ rÿikemy.

²² Tai tahe Deuxu tamy òbitina tamy diwahinyde.

²³ Aõ iòraruki aõkõ kia ryberitina awimy raeryre, tamy sohojile aõkõ dori rarybere.

²⁴ Iny òraru-ki tule kia tuu roire. Iny tule inatyhyna-di òbitina ritakre. Inyboho dori rityhynymyhÿre, Inynyrÿ Jesuisi rubu-ribi ixixana widÿÿdu Deuxu raremy.

²⁵ Jesuisi iòludu-ò iwahidÿÿmy rara inyòrarureny-ki tai rurure. Tahe iny òbitina wahidÿÿna-ò diixixanyde rubu-ribi.

5

¹ Jesuisi tyhydÿÿ òraru-ki Deuxu inyboho rimyrenyre. Idi awimy rokoirekremy tii-wana, Jesuisi Kristu-wana wahe.

² Deuxu ruxetõenawo-ki inyboho rotamanymyhÿrenyre. Jesuisi Kristu tyhydÿÿna òraru-ki tamy rotamanymyhÿre. Deuxu loosõna worojuxanaõ-di rokoirekre. Tai inyboho reysamy ihÿre.

³ Inyboho bedewona-di hyy ihÿrenyre. Ihãrele tahe inyboho teysarenyre. Kia dori iny riwiõhenynymyhÿre rarõsõna ijõdikemy ruru inydeereny riwahinykemy.

⁴ Inyboho rikijerenyhyykeki, Deuxudeewimy rikiwinyrenyke. Deuxudeewina rikiwinyrenykeki, rarõsõna rikitarenykre.

⁵ Iny rarõsõna tarasana aõkõkeki, uritere rakabedewoõtyhy, Deuxuluuna dori inywo-ki ratxireri. Deuxu Tyytybytyhymy inydeereny wahidÿÿna rare. Tii dori inyworeny-ki Deuxuluuna ritidire.

⁶ Iruruõmy inyboho roiremyhỹre awimy riwinykemy. Tai tahe Kristu inydeereny, inyboho ibinare hãre rurure, Deuxudeewireu.

⁷ Isirare inyõ hãbu òbiti dee ruruke. Tahe hãbu wiwihikỹ dee òsana iny rurukre, kia heka irutaõre.

⁸ Deuxu tahe luunatyhy inydeereny diteònyde. Iny òrarudurenyre hãre, Kristu inykireny rurure. Juhuu heka inyboho òrarudu roire. Ihãrele Deuxu taluuna nihikỹ inydeereny diteòsinyde. Tai heka Kristu inyòrarureny-ki rurure.

⁹ Irubuna òraru-ki heka Deuxuru-ò inyboho òbitimy ihỹrenyire. Irubuna tahe kia riwinyreki irumy inonana tahe iratyre rarekre inydeereny wahe. Deuxu ykarana-ribi Kristu dori iny ritamyhỹre.

¹⁰ Juhuu Deuxu òludu inyboho roire. Tahe wiji ibiòwamy inyboho roire, iriòre iny òrarureny-ki rurureki, wahe. Wiji tahe rybe òludu mahãdu-ribi wiutadãnamy rỹire. Ibutu kia heka Kristu òraru-ki sohojile ture. Tai iny teysamy roire Deuxu rityhynyreki.

¹¹ Inyboho heka iwitxira Deuxu-wana ratximyhỹrenyire. Tai tahe reysamy ratximyhỹre. Inyboho Deuxu biòwamy ratximyhỹrenyire. Jesuisi Kristu Inynyrỹ òraru-ki heka ture.

¹² Hãbu sohoji òraru-ki òraruna bedeki ralore juhuu, Adaõ òraru-ki wahe. Taile tahe rubu nade bedeki. Idi ibutumy iny raòrarunyire. Adaõ òraruna-txi resereu, rubu ibutumy iny-ò resere.

¹³⁻¹⁴ Juhuu Adaõ rurure. Iribi tahe ibutumy iny rurure. Moisesi tule rurure. Tahe bedeki ywina òraru-ki aõkõ tiiboho rurure. Bedeki ywina dori Adaõ rubu hewo-ò Deuxu riwahinyre Moisesi-ò. Deuxu heka iny òrarunamy aõkõ rõhõtinyre, tabede ywina dori kiau riwahinyõre. Adaõ heka Deuxu rybe rityhynyõre, tai tahe rurure iwese Deuxu rarybere wese. Tule iòraruna òraru-ki ibutumy iny raòrarunymyhỹrenyire. Adaõ heka Jesuisi-ò rakewesenanykre.

¹⁵ Tiiboho wiwanale aõ kabede-ò aõ diwymyhỹdenyde. Adaõ heka rubu diwyde. Jesuisi heka runa diwyde. Adaõ heka sõwemy iny-ò rubu riwahinyre. Jesuisi tahe sõwetyhy-ò Deuxu ruxetòena riwahinyre, tarasana tamyreny riwahinyre. Òraruna sohoji-di heka Adaõ rubu riwahinyre ibutu iny-ò. Jesuisi tahe ibutumy iny-ò biu-ò hena riwahinykemy ratxireri iòraruna sõwere hãrele. Umytuedeõna wahidỹỹdu tii ratxireri. Kia awityhyre.

¹⁶⁻¹⁷ Inatyhymy Adaõ widỹỹna ibinare. Jesuisi widỹỹna heka awityhymy rare inydeereny. Inyboho dori Jesuisi-wana irumy ratxirenyre aõu aõu kowa bedeki wihikỹ-ki, Deuxu òraru-ki.

¹⁸ Aõhõkỹmy dỹỹnana heka Adaõ widỹỹna diwyde ibutumy iny-ò. Jesuisi tahe òbitina diwyde ibutumy inydeereny.

¹⁹ Adaõ heka Deuxu rybe rityhynyõre. Tai iny sõwemy òraruna-txi resere. Jesuisi tahe Deuxu rybe rityhynyre. Tai iny sõwemy heka òraruna-ribi ritare.

²⁰ Deuxu tabede ywina rybe riwahinyre. Tai tahe iny aõbina rierymyhỹre. Òraruna-di sõwemy ihỹreki, tai Deuxu ruxetòena sõwetyhymy ihỹre.

²¹ Juhuu òraruna ratximyhỹre iny umyreny-ki. Inydeereny rubule riwahinyrenyire. Wijile tahe Deuxu ruxetòena riwahinyre inyumyreny-ò, inyraykyreny-ò. Òbitina inydeereny riwahinyre Deuxuko-txi. Jesuisi Kristu Inynyrỹ òraru-ki heka, umytuedeõna inyboho ijõdire.

6

¹ Timykibo Deuxu inydireny rexiruxetòenykeu watzireri Deuxu ire inydireny raruxetòenykemy ire rexiòrarunanyhỹre hãrele. Timyki tuuõna.

² Aòkòhyyre. Inyboho heka òraruna dee rubumy ihÿrenyire. Timykibo iny ihyyimy òraruna-txi rekeseke? Aòkòhyyre.

³ Jesuisi Kristuni-ki inyboho raratisebenyreu, Tule Jesuisi rubu-my ratisebe-ò rururenyre. Kia teerytenyete.

⁴ Tiu inyboho risebenyire Jesuisi òraru-ki, tii-wana inyboho rurure. Tai iru tÿmyra-di inyboho ihyre. Iwese Deuxu taruru-di Jesuisi riixixadÿÿnyre wese tule inyboho iru tÿmyra-di rokoireke.

⁵ Iwese tii rurure wese, inyboho tule rukurenykre òraruna dee. Iwese Kristu rexixadÿÿnyhe wese inyboho tule òraru-ribi ixãwira tii-wana rarehyykremy.

⁶ Iny umy tyby tule rurure Kristu itxeò-ki. Tai inyboho heka òraruna deòdumy aòkò ihÿrenyire.

⁷ Inyò rurukreu, tii òraruna-ribi ixãwimy ihÿre.

⁸ Inyboho Kristu-wana rurukeki, tii Kristu-wana irumy ratxikre.

⁹ Kristu rexixare tii ixyby ruruòtyhy. Rubu ixyby tamy reaòtyhy. Kia tahe inyboho rieryrenyire.

¹⁰ Jesuisi rurureu, iny òraruna ixãwina rubulemy rurure. Wiji tahe irumy ihÿre Deuxudeehyy.

¹¹ Tule kai arumy atximahãte Deuxu dee iny aòbina bina-ò taruteki rubuwesemy arumy tahe Deuxu-ò. Inynyrÿreny Jesuisi Kristu tyhydÿÿki. Kiawesele mohòtinyke Deuxu dee, Jesuisi Kristu dee wahe.

¹² Kaiboho dori Jesuisi Kristu-wana atximahãtenyete. Òraruna-txi ixyby besekeòtyhy. Ixideewimy aòkò rikiwinyrenyke, aò ibina wahe.

¹³ Aumyreny biwahinybenyke Deuxu-ò iwese iny iru tÿmyra-di ihÿrenyire. Tai tahe òbitile biwinybenyke, òraruna-txi beseòtyhy aò iyja aòkò.

¹⁴ Òraruna rybe-ò ijohorenyòmy. Tii dori awedu aòkò rare. Deuxu ruxetòena-ò bexiweloromahãbenyke.

¹⁵ Aòbo tahe awityhyre. Ruxetòena òraru-ki aòbo rekexiòrarunymyhÿke. Aòkòhyyre.

¹⁶ Òraruna rybe-ò heka bityhynybenykeki, òraruna deòdumy atxibenyke, rubu iòwy rare wahe. Deuxu rybe-ò tahe bityhynybenykeki, òbitimy boibenyke. Bexideòdunybenyòtyhyke òraruna bityhynybenykemy.

¹⁷ Wowydyna Deuxu-ò kanakemy watxireri. Juhuu kaiboho òraruna deòdumy ahãtenyete. Tahe wiji inatyhyna erydÿÿna tetyhynytyhytenyete.

¹⁸ Wiji tahe kaiboho òbitina deòdumy atxitenyete. Tahe Deuxu deòdumy wiji toite, tii ixideewimy timybo adirenykre.

¹⁹ Iwese juhUU òrarunawidÿÿna-ò texiwahinymahãte wese, wiji bexiwahinybenyke Deuxu-ò, òbitiwidÿÿna-ò wahe. Òbitimy rarybemahãre, itÿnytyhy kaiboho dori òhòtitymy toite aiximynatyhyrenyò òraru-ki.

²⁰ Òraruna deòdumy atxitenyete, Deuxu tetyhynyòtenyete.

²¹ Kia aòmydÿÿnana wiji ixãruna adeereny rare. Aòbo tahe awimy juhUU tewinytenyete. Kia heka rubule riwahinymyhÿre.

²² Òraruna-ribi ixinamy atxitenyete. Kaiboho Deuxu-ò ibutumy texiwahinyete. Tai umytuedeòna tetatenyete.

²³ Òraruna òwy heka rubu rare. Inyò òraruna riwinykeki, tii ruruke, kia òraruna òwy rare. Deuxu wahidÿÿna tahe umytuedeòna rare, Jesuisi Inynyrÿ rurureki wahe. Idi tiile-wana tukre.

7

¹ Waityhydÿÿdu seriòre, kaiboho bede ywinamy teerytenyete. Tai bieryke aòmybo ararybekre. Inyò irulemy rariakekile, bede ywina tamy aò rare.

² Arawesenanykre. Hãwyy heka ihãbu-wana ihyyomy ihÿre bede ywina myna. Hãbu rurukeki, tahe ixinamy ihÿre ijõ-wana roikremy. Hãbu ruruõkeki tahe, ixinamy aõkõ ihÿre, ijõ-wana roikremy.

³ Inyõ-wana roiheki, hãwyy wedenamy raninikre. Ihãbu rurukeki, tii ixinamy rarekre. Ijõ-wana roihe.

⁴ Kia wese rare, waseriõreboho, ayreny-ki. Kaiboho bede ywina dee tarutenyete. Kaiboho dori ityhydÿÿdu mahãdu atximahãtenyete. Kaiboho Deuxu hõrõ mahãdu atximahãtenyete. Rubu-ribi ixixadu mahãdu atximahãtenyete, Deuxudeewina biwinybenykemy.

⁵ Juhuu ixideewile aõ tewinomyhÿtenyete, rubu aõmydÿÿnana wahe.

⁶ Wijile tahe bede ywina-ribi ixinamy inyboho roimyhÿrenyete. Iwese ihetxiu tyriti bede ywina rityhynomy aõkõ ihÿreny, wiji Deuxu Tytybytyhy aõmydÿÿnana inyboho rityhynenyete.

⁷ Timybo? Bede ywina aõbo ibinamy rare. Aõkõre. Ihoõkeki tahe òraruna jiarÿ arieryõtyhy. Bede ywina rarybere wasiõmy. Kiale reeryete aõbo wasimy rare, inyõ aõ arimykemy watxireriu, kia òraruna wasiweselemy rare.

⁸ Timyki, jiarÿ òraruna waerysõna bede ywina tuu rarybekõkeki. Bede ywina dori aõbina binamy riwabedeeryete.

⁹ Jiarÿ juhuu bede ywina reeryõre. Reeryete tahe aõmydÿÿnana binale wadee rarerenyete.

¹⁰ Deuxu heka bede ywina riwahinyete juhuu. Tamy ruru riwahinyete bede ywina wahe.

¹¹ Tahe bede ywina òraru-ki heka òraruna riwahinomy. Tai tahe õnosõna riwarubunyete.

¹² Kia bede ywina tahe awi rare, òbiti rare. Õnosõna awi rare.

¹³ Timybo rare. Òbitina aõbohe riwarubunyete. Aõkõre. Òraruna tiire. Tii tahe ibinatyhy rare. Bede ywina òraru-ki iny kia òraruna ibinatyhy reeryenyete.

¹⁴ Bede ywina heka Deuxu Tytybytyhy aõmydÿÿnana rare. Jiarÿ heka inyle rare, òraruna heka wawedu rare.

¹⁵ Aõbo warayky dee ibinarele, kiale rewinywãhãre. Aõbo awimy warayky dee rare, kia rewinyõhyete. Aõherekibo? Reeryõre.

¹⁶ Rexieromyhÿre aõbo rewinyomyhÿre. Reeryete kaa bede ywina awi rare. Tai heka rabadewomy watxiwãhãre. Jiarÿ dori bede ywina bede ywina riti reeryemy watxiwãhãre.

¹⁷ Retxiõnomy watxiwãhãre. Waruruõhy heka watxiwãhãre. Aõwi ariwinykeò. Òraru heka iõhõmy waribi ratximyhÿre waruru ratyete ratximyhÿre waribi. Tai heka òraru rewinymahãre.

¹⁸ Waumy ehetyxina tahe ibinatyhy rare. Aõbo awi rare heka ariwinykemy rewisÿnywãhãre ta heka rewinyõhywãhãre. Aõwi rewinyõhyymahãre!

¹⁹ Jiarÿ rarurunymahãre heka aõbina ariwinykõkemy. Tahe ihãrele heka rewinymahãre.

²⁰ Reeryetehe aõhebo ratÿÿnomyhÿre. Jiarÿ ixiõrarudÿÿ waòraruna wadi raitxÿteitxÿtenomyhÿre.

²¹ Deuxudeewimy heka ariwinykemy watxiwãhãre. Tahe araòrarunyhymahãre.

²² Waumytÿmyra rarurunyetyhymahãre Deuxudeewi widÿÿna ariwinyke. Awityhy rare wadee.

²³ Ijõ tahe waumywo-ki, waraykywo-ki, ratximyhÿre, waumyehetyxina waki ratximyhÿre. Wadi rarurunomyhÿre riwamomy ratximyhÿre. Aõbina widÿÿmy heka wadi rimomy ratximyhÿre. Reòludunyõhyymyhÿre waraykomy heka rahaÿnanomyhÿre. Aõwesele heka tuu rahaÿnanomyhÿre,

riòludunyõmyhÿreki wahe. Raraykynmahãre warayky-ki, Deuxudeewimy watzikemy. Tule tahe reerymahãre òraruna deòduõ jiarÿ rare wahe. Waumytÿmyra tahe wadee rarybemyhÿre òbitimy aõmydÿÿnana ariwinykemy. Waumyehetxina tahe kialemy wadee rarybemyhÿre –òraru ariwinykelemy.

²⁴⁻²⁵ Tai heka urile warayky raleileinymyhÿ. Mobo riwatake waumyehetxina bina bina aõmydÿÿnana-ribi? Deuxudeewina-ki, Jesuisi Kristu Inynyrÿ heka iximynamy riwatakre. Tii riwateònymy wadi rarekre. Wowydyna tamy ariwahinykre.

8

¹ Tai heka Jesuisi Kristu tyhydÿÿdu mahãdu rubutyhy-ò heka raõtyhy. Deuxu heka tii ritarenyke tii-wana rarehyyke.

² Deuxu-ò Tyytybytyhy dori warurutymyra-di riwarurudÿÿnytyhyre. Rubu-ribi dori Jesuisi Kristu riwatare ixinamy ararekemy.

³ Inyboho heka Deuxu Bede Ywina rieryreny, Moisesi tyyritina wahe. Tii heka iny òraruna-ribi iny ixinamy ririradÿÿnymyhÿre. Jesuisi Kristule, aõbo, òraruna ruru rahumyhÿre. Aõma rakahurenyõtyhy heka iny rururenydi aõma òraruna ixitawo-di. Rikityhynyrenyõtyhy heka aõma ixitawo-di aõbo bede ywina Tahe Deuxu tariòre diteònyde iny umyrenywesemy wahe. Tiu heka iòrarunaõhyyre. Tai heka rexiwahinyre iny òrarureny-ki.

⁴ Tai rikityhynyrenyke aõma Deuxu bede ywina. Iny nohõtireny rosake aõbo umy ehethinareny inydeereny rarybemyhÿré. Ijohonarenyõmy ta, irybe-ò, Deuxu Tyytybytyhy rybeòle rokoholamyhÿreny.

⁵ Aõbo Deuxudeewimy biwinybenykeki, tai Deuxu Tyytybytyhy rybeòle heka iny roholamyhÿke. Ixideewimy widÿÿmy burubenykeki tahe, aõwaxina bohoholabenyke umyehetxina rybe-ò.

⁶ Deuxu Tyytybytyhy rybe-ò ijohona heka iny umytÿmyra-ò ridymyhÿre, umytuedeõna-ò, ywina-ò. Umy ehethina rybe-ò iny rohola wana, tahe rubu-ò iny ridymyhÿre.

⁷ Umy ehethina dori aõma rare, Deuxu òludu. Deuxudeewimy aõkõ heka riwinyomy ihÿre tiu riwinyõtyhy.

⁸ Inyõ ibutumy òraruna ixideewimy riwinykeki, tiu heka Deuxudeewina riwinyõtyhy.

⁹⁻¹¹ Kaiboho tahe kiawesemy aõkõ heka toite. Deuxu Tyytybytyhy heka aworeny-ki rasÿnymyhÿre. Tai heka umytÿmyraõ heka kaiboho ijõdirenre. Deuxu Tyytybytyhy heka kaiboho ijõdirenreke. Inyõ Deuxu Tyytybytyhy ihoõkeki, tiu tii ityhydÿÿdu aõkõ rare. Aumytyhy heka rurukre aòrarunaõ direki wahe. Atytyby tahe iruhyomy ratxikre, Kristu dori aòraruna ri-ixãwididÿÿnyreki wahe, Deuxu araòbitidÿÿnyre wahe.

¹² Tai waityhydÿÿdu seriòreboho. Umy ehethina rybe-ò uritere ijohonarenyõmy.

¹³ Irybe deradÿÿna-ò beòbybenykeki, kaiboho heka burubenyke. Aõkõkeki arurenymy mariabenykre, Deuxu Tyytybytyhy-di wahe.

¹⁴ Ibutumy Deuxu Tyytybytyhy rybe-ò roholamyhÿre mahãdu, tiiboho tahe Deuxu riòre roire.

¹⁵ Deuxu rybemy bityhynybenyke. Deuxu Riòre wesemy tahe bityhynybenyke, òbitimy atxibenyke, deòdu wesemy aõkõ wahe, buberubenyõtyhy. Waha-my tahe marybemyhÿbenykre heka. Deuxu Tyytybytyhydile wahe.

¹⁶ Ijoiorenymy rakatxirenreke. Aõmybo Deuxu Tyytybytyhy-di inydeereny roimyhÿreki heka, tuu inatyhymy rakatximyhÿrenykre inyboho riòre roiremy wahe.

17 Ibutumy aõbo Jesuisi Kristu inydeereny riwahinymyhÿke heka, tule inyhõrõ reny heka rare. Iwese tii wowydyna iribi rikitarenykeki, tii-wana heka aõhõkÿmy rokotÿÿnyrenykre.

18 Aõhõkÿmy rokotÿÿnyrenykre tahe aõnihikÿmy aõkõ rare, urihimyòle wahe. Inydeereny dori wowydynaõ kidiwahinykre, sõwetyhymy.

19 Ibutu bedede aõna aõna riraòmy roimyhÿre, aõma-ò, Deuxu Riòre mahãdu ibutumy rubu-ribi ixixana kiditÿnyrenykre, rexixamy ibutumy rÿirakre idi biu-ò rirahukre wahe.

20 Kiatxu tahe ibutumy bedede raaõbinanyke. Iwese Deuxu juhoo riwinyre-ribi resere iny òraruna òraru-ki. Deuxu dori tuu bedede riywinyre txioinyhe tahe, raròsòna rÿire, riwitxiranyke.

21 Rekeysarenykre heka Deuxu riòremy heka rakatxirenykre. Tii ibutumy bedede ribi iny ritarenykre ibutumy òraruna-ribi, rubu-ribi. Ibutumy òraruna aõbina bina deòdu heka rexihukre. Deuxu ibutumy aõna aõna ritÿmyranykre iwese tariòre itÿmyrare wese.

22 Kaa wiji tahe ibutu aõna aõna aõhõkÿmy rotÿÿnymy rÿira iròdu alòbòròna, ibutumy heka uladu ijira dese wese heka riijemy aõna aõna rÿira. Aõma, ixixanatxu dehemynykòlemy roimyhÿreki wahe.

23 Tiibohole sohojile aõkõ, tule inyboho Deuxu Tyytybytyhyre hãre, kia delemy inydeereny rawahinyre hãre, aõhõkÿmy rotÿÿnymyhÿrenyre idi tiu Deuxu tariòremy risÿnyrenykemy riraòmyhÿre. Kia tahe inyboho riraòmyhÿrenyre.

24 Inyboho dori tararòsòna-ki kawese awirenyre. Inyõ iraròsòna itÿnykeki, aõbo tahe riraòmyhÿke.

25 Tai tahe Deuxu rikityhynyrenyke rikiraòrenymy aõma, inydeereny tuu raryberé, rikitarenykré. Rikiyrymy rikiraòmy rokorokomyhÿrenykre.

26 Iwesele tahe Deuxu Tyytybytyhy heka iny riwiòhenanyrenykre. Inyummy aõmydÿÿnanareny heka aõhebo rotÿÿnymyhÿre txuõ txuòlemy iny riwiòhenanyrenykre. Inyboho riwiòhenanyrenykre aõma inyboho rierykòreki ixitòedÿÿ. Deuxu Tyytybytyhy inydeereny dori rexitòenymyhÿre tii inyboho heka aõmy rybe inyboho rierykòmyhÿrenyre inydee risÿnynymy rarybemyhÿre tuu.

27 Inybytyreny heka ibutumy inyraykyreny, inyworeny, rierymyhÿre. Tii heka rexitòenymyhÿre inydeereny iny òbitinareny-di, iny ywinareny-di iny riixitòedÿÿnymyhÿrenyre.

28 Ibutumy aõbo inydeereny rabededÿÿnananyrenykré heka inydeereny aware. Deuxudeewina heka rikiwinyrenyke inydireny ratximyhÿre Deuxu dori inyluurenyre. Tii dori iny ridyre tariòre wesemy. Tii dori kiamy juhoo rõhõtynyre.

29 Juhudihikÿle Deuxu rõhõtynyre mobo tamy rakemy. Tahe tiu rierymyhÿre mobo aõma inyboho tamy kanakré. Tiu heka rierymyhÿre timybo widi rarekré, tariòre wesemy idi rarekré. Iriòre heka sõwemy iseriòre relekre. Iriòre tahe juhuule ityhydÿÿdumy iuhe rÿire, iseriòre wesemy wahe.

30 Tii heka inyboho rihitxinyrenyre. Tii heka ryrymyhÿre tamy, kanakemy. Tii inyboho tamy ritehemynyreu, heka inyboho tamy ritehemynyrenyre. Iny òraruna-ribi inyboho riixãwididÿÿnymy Deuxu, Jesuisi, Deuxu Tyytybytyhy ywina heka inydeereny riwahinyre.

31 Ywimy rakatxirenykemy heka inydeereny rõhõtinyinmy ihÿre. Wowydyna heka inydeereny riwahinykre. Timybo rakaryberenykre. Aware heka ibutumy. Nihikÿre. Deuxu heka inyworeny-ki ratximyhÿre. Tii heka inydinodurenyre. Inyòludurenyòhyre ratxirenyke, sohojiõ.

³² Ibutumy inydeereny riwahinykre –inydeereny dori taRìòretyhy dori diwahinyde. Diwahinyde heka inydeereny rurukremy. Deuxu heka iny riixãwididỹnyrenyreny.

³³ Inyboho heka òbitimy ratximyhỹrenyreny tamy rakatxirenykemy. Tii dori iny riwinyrenyreny òbitimy. Inyõ rarybeõtyhy iny òbitimy aõkõ ihỹre.

³⁴ Inyõ heka inymyreny rarybeõtyhy rukururenykremy. Jesuisi Kristu dori inydeereny rurure, iny òrarureny-ki. Tii ixityre rubu-ribi rexixare inydeereny. Katahe rononymhỹre Jesuisi heka rexitõenymy rononymhỹre in-kyireny. Deuxu-ò heka iny riixitõedỹnyrenyreny inydireny rononymhỹre.

³⁵ Tiu heka rihitxinyõtyhy, aõma Jesuisi Kristu luureki wahe. Aõhõkỹmydỹnana dori rakatxireny. Tii heka iny rirubunyrenyke. Iny rama rirubunyrenyke inieruõmy. Bede brebuwo-ki rakatxirenyke. Inymyreny rarybemyhỹkre. iny rirubunyrenyke. Ta Deuxu inywanarenyhy ratximy ihỹre. Tiu heka Deuxu-ribi aõ iny rihitxinyrenyõtyhy.

³⁶ Inyboho heka rubu riraõhyky ratximyhỹrenyreny, rexiwinyhykyle. Kia rikiwinyrenyke aõma Deuxu luuna-di xiery –iwese budoeni tarubuna riraõmy rỹimyhỹre wese. Deuxu rybe inykoreny tuu relyymyhỹre.

³⁷ Taiki heka imahãduy-ribi rokotarenykre. Kia òlõna inyhõrõreny rare. Kristu dori inydeereny rurure. Aõ heka iny rihitxinyrenyõtyhy Deuxuluuna-ribi. Rubu dori iny rihitxinyrenyõtyhy. Umy tiu iny-ribi rihitxinyõtyhy. Ýju dori tiu iny rihitxinyõtyhy. Aõbinahakỹ heòty, rubu bina heòty dori tiu Deuxu luuna-ribi rihitxinyõtyhy.

³⁸ Aõ heka iny rihitxinyõtyhy Deuxuluu-ribi. Biu wenonana dori, beheỹ ratyre, tiu Deuxu luuna-ribi iny rihitxinyõtyhy. Wiji aõna aõna itõmo rahudi aõna aõna, aõtxi aõna aõna tiu iluuna-ribi rihitxinyõtyhy.

³⁹ Kia ibutumy wadee inatyhy rare. Jesuisi heka Deuxu inydeereny ritỹmynymyhỹre ibutumy iluuna iny òrarureny-ki rurureu.

9

¹ Kaiboho waijoi reny, waityhydỹỹdu seriòre mahãdu. Kristu hõrõ jiarỹ rare, inytyhy rare. Deuxu Tyytybytyhy, Jesuisi Kristu-wanale rierymyhỹre kia inatyhy rare.

² Rabedewomy heka watxireri waijoi rityhynyõreki. Deuxu Tyytybytyhy kia rieryre. Txuõ txuõlemy, ruõ ruõlemy rabedewomy watxihãre. Txiole txiole aõmydỹỹnanamy adeereny ararybeke kaiboho tarasanaõ boibekemy.

³ Deuxu riwatzuhoke Kristu-ribi waijoi deròwomy, iwiòhedỹỹkeki. Jiarỹ heka ihyy arurukemy waijoi ityhydỹỹdukõdu mahãdu wahe ixi-di tamyreny rahõtĩnymy watxireri. Kia biu-ò hena ritarenykemy wahe. Tahe aõkõre heka.

⁴ Deuxu heka tamyreny sõwemy diwahinyde. Ihãrele tiiboho ijohona deramy rekoamahãrenyreny. Aõma, rihitxinyrenyreny heka taijoi renymy. Ridyrenyreny heka bederahy-ò loosõna-ki biuwetykywo-ki. Tahe tamyreny rarybere tii iluurenymy. Tamyreny heka sõwemy aõ kidiwahinykemy idireny ratximyhỹre. Tule tabede ywina rybe tamy diwahinyde. Tai tahe Deuxudeewina reeryrenyreny.

⁵ Tamy heka Deuxu wowydynaõ riwahinyrenyreny Deuxu teòduõ kanake tii tamy rarybere. Tybyreny dori ilahiboho dori rityhynyrenyreny, tii Deuxu sõwemy rityhynyrenyreny. Kristu tahe tule judeu mahãduõ ratximyhỹre, waijoi wahe.

⁶ Deuxu rybe inatyhytyhy rare. Sõwemy iny judeu mahãdu wese roire. Ibutumy tahe judeu mahãduutyhy aõkõ roire.

⁷ Ibutumy judeu Abraõ riòre riòre rÿira mahãdu aõkõ heka Deuxu riòremy rarekre. Deuxu heka Abraõ-ò rarybere: –Ijai riòrele ariòkòre rarekremy ijõ aõkõ. Ibutumy Abraõ riòre, Ijai riòre aõma ityhydÿÿdu aõkõ roire.

⁸ Ijõ iriòrekõna mahãdu tahe ityhydÿÿdu heka roire. Kia Deuxu rybe rityhynymyhÿrele heka ityhydÿÿdu mahãdumy rÿira –judeu mahãdu tyhy wahe.

⁹ Juhuu tahe Abraõ-ò Deuxu rarybere: –Ahãwyy Sara, iriòredikre ijõ beõrau wahe.

¹⁰⁻¹¹ Iu tahe Ijai iriòre hãwyy-wana herinanyreu, Rebeka-wana roire tahe inatxi uladumy heka Rebeka tamy kidiwahinykremy riywinyra. Ijau juhutyhy iriòredelamy reakre riywinyra. Ijõ tahe Ijaò ini rarekre. Kawese Deuxu rarybere uladu reakõule: –Jiarÿ heka Ijaòmÿ retamy rarybere Ijau aõkõ. Jiarÿ aõna aõna sõwemy tamy adiwahinykre. Deuxu kiamy rarybere Ijau reakõule. Tiu aõwiihikÿ aõbina bina riwinyke aõkõ. Myle roireri. Deuxu riteòsinyre ijõ tarasanamy reake-ribi tahe ijõle tuu reare. Aõ uladu tuu riwinyreriki aõkõ Deuxudeewimy tuu riwinyre.

¹² Juhuutyhy Rebeka-ò rarybere: –Idela taseriòre deòdumy rarekre.

¹³ Iwese tyyriti-ki roire wese: –Ijaò iluure tahe Ijau aõkõre.

¹⁴ Aõmybo tahõtinyteri? Deuxu aõbo adee ibinare kia riwinyreki? Aõkõre heka.

¹⁵ Deuxu rarybere Moisesi-ò: –Jiarÿ heka awimy inyõdee ariwinykre, tahe tuu ariwinykre. Inyõdee ruxetõena ariwahinykeki, tamy ariwahinykre iixideewimy.

¹⁶ Deuxu ruxetõenale heka rare, iny aõmysÿdÿÿ sõwehekÿmyreki aõkõ inydee tarasana riwahinykre.

¹⁷ Kaheka iny rieryre Faraò (Egito bede iòlò) ijyy dori inydee kia riteòsinyre iwese Deuxu rare wese wahe reteherenyké. Deuxu kiamy rarybere Faraò dee: –Adee kÿny ariwahinyre ruruõ kai bonyke iòlòmÿ. Tai tahe ibutumy iny wani wiwihikÿ-ò roholakre.

¹⁸ Ibutumy Deuxu ixideewimy tuu riwinyry rÿirakre. Ruxetõena riwahinyke tamywi tahe riwahinyra.

¹⁹ Inyõ tahe wadee timy rarybeõtyhy: –Aõherekibo kawesemy Deuxu inyõ aõhe risÿnykre ada amobohe Deuxu aõwidÿÿna deramy reakre.

²⁰⁻²¹ Tiu moõ rarybeõtyhy Deuxumy ibinamy. Iu inyõ butxi riwinykreu, aõma sudeõ rimykreu, riwinykre heka butxiwihikÿõ tamywikeki. Ibinaõ riwinykeki tasÿ iwesele riwinyke ibinamy tuutyhymy. Bedenamy riwinyke noijaka tamy ridemyhÿkemy. Ijõ butxi tamy wikeki.

²² Iwesele heka Deuxu rare. Rebureke heka inyõdee raykarananyke. Ijõ-ò tahe awike ta ruxetõena-di riwiòhenanyke iaõna aõna riijemy.

²³ Idi tahe rõkõhõtinyreny timybo Deuxu wina, Deuxu loosõna awiremy iruxetõena inydeereny riwahinyhyymyhÿre.

²⁴ Judeukõdu mahãdu Deuxu ritare. Judeu mahãdu yribi sohoji aõkõ. Inyboho.

²⁵ Osea tyyriti-ki rybeõ kiamy tai roire Deuxu rarybere wahe: –Ijõ mahãdumy sÿ aronykre wariòremy. Tahe waijoiy-ribi aõkõ waijoio mahãdu aõkõ waijoimy arininikre idi aritakre. Tuumy ararekre. Tiu heka luuna juhUU inyõ rewahinyõhyre.

²⁶ Deuxu rarybere tiu: –Kaiboho juhUU waijoi aõkõ toite, tuuõmyta kowa-ki wariòrerenyry boibekre.

²⁷ Isaia tule rarybemyhÿre aõma judeu mahãdumy wahe. Sõwemy, sõwemy imahãduõ hãre tahe, ibutumy tarasanamy reakre.

²⁸ Deuxu ele elemy rotỹỹnykre timybo rarybere myna. Ijõ-ò ruxetòena riwahinykre ijõ-ò adehuna riwahinykre riixãwidinyrenykremy.

²⁹ Ijõ Ritidỹỹna-ki Isaia rarybere: –Deuxu ibutu dinodu heka ruxetòena riwahinyòkeki, ibutumy judeu mahãdu riixãwididỹỹnykre iwese Sodoma hãwã Komora hãwã-wana riixãwidinyre wesemy wahe.

³⁰⁻³¹ Timybo rakaryberenykre kia aõmydỹỹnanamy? Kialemy: –Judeukõdu mahãdu-ò Deuxu tarasana riwahinyre tiu Deuxu riijeõhyymyhỹre hãrele. Judeu mahãdu heka rityhynykemy idi ratximyhỹre ibede ywidỹỹna-di tahe tiu heka ritaõhyymyhỹrenyre tarasana.

³² Bede ywina rybe riyrubunykehãre awikehãre tiu tarasana ritaõtyhy. Rityhynytyhykekile heka tuuke. Tai tahe ritaõre tarasana, rityhynytyhyõrenyre. Tai tahe iwere mana iny riatymyhỹre were rydỹỹnarenyre.

³³ Ijõti nihikỹ heka roimyhỹre. Tiu heka riòhòreõtyhy iweribi-ò. Deuxu rybe-ki kia wesemy roire: –Judeu mahãdury-ki mana nihikỹ wese retidimy doimyhỹde. Sõwemy heka iny rỹira tiu heka ityre-di rariaõtyhy biu-ò hena-ò dehemyndekeki wahe. Kia iny rityhynymy Jesuisi Kristu rỹirale tahe ritakre tarasanaõ heka inatyhymy.

10

¹ Waityhydỹỹdu seriòre, rexitòenymy wãhãre heka Deuxu-ò ibutumy judeu mahãdu biu-ò henamy rỹikemy. Kiamy tuu rarumahãre.

² Reerymahãre tiiboho ibutumy rityhynymahãrenyremy Deuxu. Tiiboho ityhydỹỹnareny tahe òbitihyky aõkõre.

³ Tiiboho kiamy rõhõtinyinmahãrenyre aõma judeu mahãdu heka bede ywina rybe rityhynyrenykekile rexiòbitinykemy heka rõhõtinyinmahãrenyre Kristu-ò ta rexiwelòròkõlemy Kristu bede-ò rexihumyhỹre, tai Deuxu iny-di awimy rarekemy.

⁴ Bede ywina heka Deuxu aõmydỹỹna tarasana aõkõ heka rare. Kristu rityhynymahãrenyke. Kia weseleke heka tii rimyreny rexiòbitinyre.

⁵ Moisesi dori ròritidỹỹre tuu: –Inyõ tiu òraruna-txi reseõhy rarekeki, taile iny tarasanamy ratxike.

⁶ Kiamy heka ityhydỹỹna namyhỹde. Uritere inyõ Kristu biu-ribi kòdidykemy ixinohõtidiỹỹõna Kristu kidiwykredi uritere nohõtirenyõmy, isiratyhyre wahe. Tuu aõkõ iny òbitidỹỹna-ki rahamyhỹre.

⁷ Uritere Kristu ixixana-di mohõtinyinnyõmyke isiratyhyre dori kia-ribi òbitidỹỹna kiditakremy.

⁸ Tii heka inyboho ribedeerynanymyhỹre. Iòhòlemy heka iny-ribi ihỹre warybereny wahe.

⁹ Iny taykyrenykele rityhynymyhỹre inykile. Tai tahe rarybere iny-witxira-ò aõma Kristu iny wedureny ihỹremy wahe. Inyworeny-ribi rikityhynymyhỹrenykeki. Aõma Kristu heka Deuxu riixixanyre rubu-ribi.

¹⁰ Taiki tahe biu-ò hena rakatarenykre. Aworibityhy rikityhynymahãke. Kiamy heka iny òbitimy rekelerenyke Deuxu dee wahe. Rarybeke iny-ò rityhynymy ratximyhỹremy tai tahe tuu relemy ratxike.

¹¹ Kiamy heka Ritina-ki roimyhỹre: –Inyõ rityhynytyhyhyke heka teysamy ratxike. Tiu heka anabedewoõtyhy tatyhyna-ki.

¹² Judeu mahãdu dori judeukõdu mahãdu-wana wiwesele rare. Ibutumy heka sohojihyyle iwedure, Inynyrỹ wahe. Ibutu heka inydee riwahinymyhỹre aõmybo iny rexitòenymyhỹre wahe.

¹³ Iny rexitòeny-wana Inynyrỹni-di tarasanamy, tai iny-ò riwahinymyhỹre.

¹⁴ Teerykõte heka timybo idi ratximyhÿre rexitòenymy. Timybo bieryke inyõ tuu relyykõhãre heka rityhynyke. Tamy heka roholaõtyhy inyõ tuu relyyõkeki tiu ityhydÿÿõna.

¹⁵ Inyõ heka raõtyhy, inyõ biteõnyõkeki wahe. Kiamy tahe Tyyriti rarybereri: —Kia Rybewihikÿmy rybedu heka awi heka rare, dehemynyna heka awire, deysana rybe dori diwymyhÿde. Deuxu rybena ywina wihikÿ heka diwymyhÿde. Tai tahe iny reysamy heka aõma Deuxu Rybewihikÿ tamy riwymyhÿreki wahe.

¹⁶ Ibutumy aõkõ tahe rityhynymyhÿre. Iwese Isaia Deuxu rybedu rarybere wese: —Inynyrÿ, Rybewihikÿmy tamyreny heka rarybemyhÿreny. Ihãrele tahe rityhynyõhyymyhÿreny.

¹⁷ Ityhyna heka Rybewihikÿ-ò iny roholamyhÿreu, rityhydÿÿmyhÿre. Kristu ityhyna tamy kedehemynykre, rybe wihikÿ õraru-ki wahe.

¹⁸ Dÿÿraxinaõ ariwinykre. Taholatenyõte aõbo Deuxu rybe-ò? Kohe, ibutumy heka roholamyhÿre. Tyyritina-ki roire: —Deuxu rybe tÿmyra wihikÿ ibutumy riteõnymyhÿre hãwã hãwãmy.

¹⁹ Ijõ arÿÿraxikre: —Judeu mahãdu aõbo kia rieryõmyhÿre? Moisesi tyyriti-ki roire: —Deuxu biu-ò hena judeukõ mahãdu-ò ariwahinykre. Waijoi mahãdu ariwoxibronykemy.

²⁰ Isaia tahe idi tuu rarybere: —Iny wiwana mahãduõ heka Deuxu riijemyhÿre. Tii rexitÿnynyre taõrysydu mahãdu-ò. Itxi reare.

²¹ Isaia rarybere Judeu mahãdumy kia: —Ihãrele Deuxu iny ritobinyrerimy ihÿre iny, iny nohõtibinaki wahe.

11

¹ Kaiboho heka timybo tahõtinyamahãtenyete Deuxumy? Tii aõbo taijoi-ribi nohõti rosaremy —judeu mahãdu-ribi? Aõkõre. Jiarÿle, Paulo, judeu mahãduõ rare. Jiarÿ heka Abraõ riokoreõ rare. Benjami ijojõ heka jiarÿ rare.

² Deuxu taijoi-ribe nohõti rosaõtyhy. Tii juhoo ritare. Elia juhoo Deuxu-ò taijoimy rarybere. Ryberiti-ki kia roire:

³ Tiiboho heka rybedu mahãdu rirubunyre. Tule axiwena wahidÿÿna ribõhõnyre. Jiarÿ sohojile aluure Deuxu. Tule rõrubudÿÿmy wadi ratxirenyreri.

⁴ Timybo Deuxu heka Elia-ò dirawyõnyde: —Aõkõre, kai ihewoludutyhy waluunadu aõkõ tate. Waluunadu 7000 inymy rÿire aribihiximy wahe. Tule Bali suritxoo tiu rityhynyrenyõhyymyhÿre.

⁵ Katahe wijile iwesele rare. Iny ibutemy Deuxu hõrõ mahãdu rÿire. Tii taruxetõnadile ritarenyre.

⁶ Deuxu ruxetõna heka aõ iõwy-di aõkõ riõwynymyhÿre Deuxu riwahinymyhÿre. Aõwihikÿ diwinymyhÿdenydeki aõkõ heka tuu heka ratximyhÿrenyre iõwydikeki tahe aõ ruxetõe aõkõ rare.

⁷ Deuxu heka judeu mahãduõ rihitxinyre tarasanamy rekré. Ijõ tahe iwety mahãdu wesemy ijõ rÿira. Deuxu tamy tarasana-ò ryrereri tiiboho roholaõre.

⁸ Tyyritina-ki rarybemyhÿre rõrõmy ratximyhÿrenyremy. Deuxu heka riru-berenyre ihãre ta tõhõtireny ratõbõnyreny. Taita rieryõhyreny heka Deuxu Tyytybytyhymy rarybemyhÿrenyeki wahe. Iwesele heka wijina roimyhÿre.

⁹ Ihetxiu Iõlõ Davi iwesele rarybere: —Kia heka taworana bedehesina-ki, ramyrenykre, raborenykre, tabonahemy reserenykre idi aõhõkÿmy rotÿÿnykre.

¹⁰ Irue idymy releke tiu robiõkemy. Tiumy rarabunykre iaõbinabina-ki.

11 Adeereny arỹỹraxikre kiamy: judeu mahãdu resereu ixãwire aõbo? Aõkõre. Urile tarasana nade judeukõdu mahãdu-ò tai. Judeu mahãdu ibinamy tai rõhõtinkyemy.

12 Judeu mahãdu òraruna òraru-ki heka sõwemy iny-ò aõwiihikỹ nade, judeukõdu mahãdu-ò wahe. Tahe awityhymy rarekre ibutumy judeu mahãdu ralokremy.

13 Jiarỹ, Paulo wahe, rybe wahidỹỹdu heka jiarỹ rare. Judeukõdu mahãdu-ò tii heka jiarỹ rare. Uritere nohõti losarenyõmy kia waaõmysỹdỹỹna rare. Kia awi heka wadee rare.

14 Deuxu heka adeereny aõ nihikỹ adeereny riwinyre, kaiboho judeukõdu mahãdu rare. Judeu mahãdu robikre. Tai heka tiiboho biu-ò hena mahãdu-wana ratxikemy riwisỹnykre. Kia wese òsana ijõ tarasanamy rimykemy.

15 Judeu mahãdu wiji rityhynyõreri. Tai Deuxu ijõ mahãdu-ò biu-ò hena riwahinyre, judeukõdu mahãdu-ò wahe. Iny sõwemy tai ritamy rỹimyhỹre òraruna-ribi. Iwese inyõ rubu-ribi riixixanyre wese kia rare iu judeu mahãdu ralòkreu wahe.

16 Juhuu paõ ere awimy Deuxu-ò biwahinykeki, ibutumy paõ ihõrõ rare. Òwòru rutysõmo Deuxu-ò biwahinykeki, ibutumy òwòru ihõrõ rare.

17 Òwòru ere judeu mahãdu wese rare. Tiiboho òwòru-ribi raòròmý raremyhỹ. Kaiboho judeukõdu mahãdu teròwýmý atximahãtenyete. Kia òwòruru wesemy òwòru-ò ralòmý atximahãtenyete, tai tahe arumy atximahãtenyete.

18 Ixityhymy nohõtirenyõmy. Kaiboho dori iratyre awimy aõkõ atximahãtenyete. Òwòru rutysõmo aramyre judeu mahãdu tyby wese wahe. Aõkõkeki, kai bedesekre òwòru desede wese.

19 Kaiboho òsana marybebenykre: Tiiboho òwòru-ribi ritamy raremyhỹ inyboho rikibynyrenykre.

20 Inatyhy rare. Urile õhõti-ribi losarenyõmy tiiboho iribi ritamy raremyhỹ rityhynyõrenyreki. Tule kaiboho talòmý tatemyhỹ tetyhynymyhỹtenyete. Tai ixiwededyõrenyre urile bexityhynymy.

21 Judeu mahãdu heka òwòru rutyhy wese raremyhỹ. Ihãrele tahe Deuxu òwòru-ribi ritare. Timybo tahõtintytenyteri –Deuxu aratarenyõtyhy. Tule aratarenyke timykeki.

22 Deuxu dori ywimy rare ijõ-ò. Tule tii isirare ijõ-ò: –òraruna-txi be-sebenykeki, tii aratarenyke.

23 Judeu mahãdu ixyby rityhynyrenykeki, ixyby Deuxu ritidikre iherina-ò. Deuxu irurudirare ixyby ritidikremy –isiraõre Deuxu-ò.

24 Kaiboho heka òwòru bederahy ludu wesemy atxitenyete. Iwese òwòru ludu-ò tii aratidirenyre wese. Judeu mahãdu dori òwòru ludu wesele rare.

25 Waityhydỹỹdu seriòre, inatyhynaõmy adeereny arelyykre. Deuxu riryre tiwesemybo judeukõdu mahãdu rityhynykre. Ikonana kaiboho bityhynybenykre, judeu mahãdu ixybyle kanalokre.

26 Tai tahe ibutumy judeu mahãdu ritakremy. Tyyritina-ki heka kiaweselemy roire: –Siaõ-ribi tarasaduõ kanakre. Ibutumy heka judeu mahãdu òraruna-ribi kòdòðsekre.

27 Kia bedeu heka aritakre iòrarureny wahe iwese tuu rarybere wese juhuuhukỹle.

28 Katahe rasõwemy roira aõma judeu mahãdu wahe. Tiiboho Rybewihikỹ òludu roire. Tamyreny heka awi aõkõ Rybewihikỹ. Kia heka adeereny awimy

ròhònnyre. Tetatenyta dori Deuxu-ribi aõma iwahidỹỹna aõna aõnawidỹỹnamy. Deuxu juhuu taluunamy walabiereny-ò rarybere.

²⁹ Deuxu heka tiu riwixiranyõhyymyhỹre. Releke wana heka riwinymyhỹre tahõrõ mahãdu dee.

³⁰ Judeu mahãdu heka Deuxu rityhynyõmy roimyhỹre wahe. Tai heka Deuxu ruxetõena adeereny diwahinyde.

³¹ Katahe judeu mahãdu heka wiji roire ityhydỹỹmy aõkõ. Aõutxu tahe Deuxu ruxetõena ixbyble rimykremy rỹira. Deuxu heka iximymy iny riteõnyrerimy ihỹre.

³² Deuxu ibutumy òraruro-ò rityhere idi taruxetõena ritỹnynkemy.

³³ Iny Deuxureny aõwi dinodu heka rare. Ibedeerytyhytyhy rare. Inyõ ibedeywidỹỹna rieryõhyymyhỹre.

³⁴ Tiu rikierenyõtyhy irayky, tiu rikibedeeryenyõtyhy.

³⁵ Inyõ tiu Deuxu tadiwidỹỹdumy isỹnyõna.

³⁶ Ibutumy dori Deuxu-ribi hikỹle nade ixidee. Ibutumy iruru namyhỹde. Tai tahe ibutumy wowydyna tamy rikiwahinyrenykemy inyboho ratximyhỹreny.

12

¹ Tahe waityhydỹỹdu seriõreboho, aumyreny heka biwahinybenyke Deuxu-ò. Aramyrenykemy òbitihyylemy. Kia wowydynatyhy Deuxu-ò. Tii dori ibutumy aõma inydeereny riwinyre. Kia ibutele rarekre tamy. Tii dori sõwemy riwinyre inydeereny.

² Uritere riraõmy bedede ludu mahãdu wesemy. Iwixiramy boibeke. Tai Deuxu dee awimy kia rarekre. Aumy tỹmyramy ibutumy biwinymahãke. Tai tahe Deuxu ribedeerynanykre aõbo awire.

³ Jiarỹ heka Deuxumy rybeduõmy rare adeereny. Tai adeereny ararybekre bexiiebenyke. Òbitimy marybemy aumy-ribi. Deuxu-ribi ityhyna adeereny diwahinydekí heka aõhe botỹỹnykemy mohõtinyinmahãbenyke.

⁴ Umy heka sõwemy txura txura roire, umy hitxi hitxinamy rỹire. Kristu ityhydỹỹdu mahãdu kia wese rare, Kristu woludu mahãdu wahe.

⁵ Tule Kristu mahãdu sõwemy aõmysỹdỹỹna wixira rỹire. Sõwemy iny wiribi hitxi rỹire. Iwese umy sohoji wese Kristu wo mahãdu rỹire. Ibutumy wiribi hitximy raaõmysỹdỹỹmy iwidỹỹmy rỹimyhỹke. Inyboho heka ibutumy iaõmysỹdỹỹna Deuxu-ò rikiwinymyhỹrenyke.

⁶ Deuxu heka aõwidỹỹna widỹỹna wixira iny sohoji sohoji-ò riwahinymyhỹre. Kai heka tỹnydỹỹna abrysikeki, awimy bexityhynyke awimy biwinykemy.

⁷ Awimy wiõhedỹỹmy atximahãte wana, bõwiõhenanyke awimy. Rybedỹỹdumy atxiteri-wana awimy òbitimy bibedeerydỹỹmy.

⁸ Deuxu rybemy rybedu atxiteri-wana marybeke inydee bexityhynymy. Deuxu sõwemy adee nieru riwahinyre-wana, bõwiõhenanyke inywixira. Inydinodumy atxiteri-wana, òbitimy maaõmysỹdỹỹ ibutu dee. Kia dohodỹỹdukeki botohodỹỹkre inyõ aõ biwahinykeki awowi-di bowahike.

⁹ Wiribi ihitxidỹỹõmy. Tuu luu-di tahe inywixira hitximy. Uritere rybeõmy urirybele. Uritere rybe òbitikõmy rỹireò nõõmy.

¹⁰ Kaiboho ityhydỹỹdu seriõre atximahãtenyete. Tai wiluummy atxibenyke. Widee biwowydynybenyke, ixidee aõkõ.

¹¹ Aõmysỹdỹỹna-di boibenyke. Ibutumy Inynyrỹ-ò biwinybenyke eysaren-di.

12 Beysamy atxibenyke ywina-di aõkõkỹmy dỹñnana-ki. Bex-itòenyhyamahãbenyke.

13 Aityhydỹdu seriòrey-ki inyõ aõ ihoõkeki, tamy biwahinyke ahõrõ-ribi. Inyõ ihetoõkeki, bidybenyke aheto-ò.

14 Inyõ ibinamy adeeremy riwinykeki, tahe ibinamy aõkõ biòwinyke. Bex-itòenyke Deuxu-ò tamy.

15 Inyõ reysakeki, tii-wana beysake. Inyõ rahinykeki, robukeki, tii-wana mahinyke, bobuke.

16 Ywimy ibutumy iny-wana boibebenyke. Ixityhy aõkõ nohõtĩõmy. Kai dori ibutumy aõkõ teeryte, tule aaõmysỹdỹ bina awimy bimibenyke.

17 Inyõ adeeremy ibinamy riwinykeki, ibina-di aõkõ biòwinybenyke aõma uritere ywihyylemy boike.

18 Wiwesehyyle ywimy rỹimyhỹre.

19 Inyõ umy aõma rarybekeki, uritere ixiòwydỹmy nohõtĩõmy. Deuxu-wana birimy. Tii heka riòwinykre iaõhõkỹmydỹñnana-di. Kia tahe roire Tyritina-ki.

20 Aõma aòludu ramamy ruru wana, tamy rỹsỹna biwahiny, bemy tii ruru wana, tamy bee biwahiny. Tai tahe tii raixỹrure aõbo adee riwinyre lau.

21 Aõbinahakỹ rỹira-wana, uritere iijiradỹõmy. Ibutumy aõwihikỹle aõ biwinymyhỹke. Tai tahe rexihuke aõbina bina.

13

1 Bityhynyke bede dinodu. Deuxu dori risỹnyre bede dinodumy. Ibutumy dinodu heka Deuxule inydeeremy riwahinyre.

2 Inyõ bededinodu rityhynyõkeki, tii heka Deuxu rityhynyõmyhỹre. Iny õbitimy ratxikeki, tiu bede dinodu rimoõtyhy ròtena-ki aõhõkỹmy dỹñnana rotỹnyõtyhy.

3 Inyõ õbitimy ratxikeki heka tiu bede dinodu lau ruberuõtyhy aõhe risỹnyõtyhy. Urile iny aõòtaòtalem rotỹnyre tahe, tiile ruberumyhỹre bede dinodu lau.

4 Bityhynybenyke ibutumy bede ywina aõbo dinodu mahãdu raryberé. Brebuõlemy botỹnybenyke. Deuxu diteònyde heka bede dinodu iny riwiòhenanykemy. Kai aõhõkỹmy botỹnymyhỹke aõòtaòtamy tatỹnymahãte-wana. Bede dinodu dori tuu nade.

5 Ibutumy bede dinodu bityhynyke. Tii heka biwinybenyke Deuxu dee kia awire. Tai heka aõhõkỹmy botỹnybenyõtyhy.

6 Tule iòwy biòwynymahãbenyke. Ibutumy heka biòwynymahãbenyke aõma tuu dinodu rarybemahãre wesemy. Tai dori riòwynymyhỹre iaõmysỹdỹdu. Tii heka anawiòhenanymyhỹde.

7 Biòwynymahãbenyke aõbo õbitire, ibutumy wahe. Aõma dinodu iòwydỹmy rariòwymahãre-wana biòwinyke ibutumy awedu mahãdu wahe. Bityhynyke ibutumy.

8 Inydee tanadevenymahãte-wana, biòwinyke õbitihyylemy. Inywitxira luumy atximahãke ibutumy iny wahe. Tii dori Deuxu bedeywina-ki bede õtiidỹna xiery ratximyhỹre.

9 Ibutumy Deuxudeewire heka kaa rare. Aeryna luumy iwese ixiluure wese, tahe tamy ibinaõre. Kai rubudỹõmy aõbo, ada wasimy iribi texiwonyte ada ihãwyy-wana maòtakemy aõbo, texinohõtĩdỹnyte. Uritere aõbina-di ix-inohõtĩdỹõmy aeryna-ò. Uritere aõbina widỹõmy. Aerynaluumy mabeke iwese kai ixiluure wese wahe.

10 Luuna inyõ-di rarekeki ibina inyõdee riwinyõtyhy rare. Ibutumy Deuxu-deewina heka riwinymyhỹre. Tii sohojile heka bede ywina-ki awityhyre.

¹¹ Tule heka òbitimy matximahãke. Bededỹnana dori iòhòmy resera. Bede ityre reakremy namyhỹde. Bexixabenyke wa, Inynyrỹ heka iòhòmy ratximyhỹre inonana-ò. Iòhòtyhymy relera juhu rityhynyrenyrene-ribi.

¹² Ruu heka ròhònymy rare. Txuu tule iòhòmy wahe. Uritere aòbinahakỹ bedeluruhukỹ aòmydỹnana widỹõmy. Diabo ijesu bitake aòwiihikỹ widỹõ wahe.

¹³ Òbitimy biwinymahãke iwese txu rojuxana iny ratximyhỹre wese. Tai ibutumy iny rarybemahãke kai iluumy atximahãtemy. Uritere abededỹnana huduõmy –itxỹteõmy, òtaõmy, adeburemy ijiraõmy, ihãruõmy.

¹⁴ Bexitòenymyhỹke Inynyrỹ Jesuisi Kristu-ò wahe anawiòhenanykemy. Tai tahe ibutumy òbitimy biwinymahãke. Uritere arayky aòmydỹnabinabina nohòtiõmy.

14

¹ Ijoiõ ityhydỹdu mahãduõ amahãdudỹmy rurukeki, ròtena ixinamy ralòke iityhyna ibuterehãre tii-wana aõna aõnamy widee rybetyhymy rybeõmyke. Aribi hitximy raraykynyke hãre, bidyke. Ihãrele biròtenybenyke.

² Ityhyna irurukõmy ratximyhỹre hãre biròtenybenyke. Tii òsana kiamy raraykynymyhỹre: Iny rexiòwynyke iròdude riròmyhỹrenyremy ijõ ròhòtinyke. Kai tahe òsana mohòtinyke kiamy. Tuu ibinaõre. Ityhynareny urihimydòle rare. Brebunale sỹny roholamyhỹre.

³ Inyõ tahe ibutumy riròmyhỹre. Awimy idi tahòtinymahãte-wana, wiribi hitximy aõkõ. Uritere iòhòresedỹrenyõmy. Deuxu dori ridymyhỹre iwesemy iweselemy.

⁴ Deuxu deòdumy tii rare. Eòdumy aõkõ. Deuxu-ò tii rirawydònyre aõhebo rotỹnymyhỹremy. Deuxu rarybeke aõbo òbitire, aõbo teòsare. Deuxu heka tii ritamadỹnymyhỹre.

⁵ Kiamy rakaraykywesenyrenykre. Txuõ aõworana bedehesi heka judeu mahãdu riywinymy roimyhỹre. Kia txuule Deuxu-ò realànanyymyhỹre rexinohòtidỹnymyhỹre. Tahe aõkõre. Ijõ ityhydỹdu mahãdu tahe aõkõre. Tii iwitxira rexinohòtinymyhỹre. Ibutu txuu tamy awire Deuxu àlana riwahinymyhỹre. Ixideewimy iny sohoji sohoji raraykywydynanyymyhỹre. Ixitawimy Deuxu riwowydnyre. Ibutumy iny òbitimy ixidee raraykynyke.

⁶ Kaiboho atxu biywinymyhỹbenykeki, kia tahe awire. Xiwenade riròkeki, tii tule Deuxudeewire riwinyre. Inyõ aõkõ riwinyre. Tii tule awimy riwinymyhỹre Deuxudeewina wahe.

⁷ Ixideewimy rikiywinyrenyõtyhy inynyrỹ-ò dori inyboho roire.

⁸ Inynyrỹdeewimy rikiwinyrenyke. Ihòrõ rare, aruruhãrele, aõkõhãrele.

⁹ Jesuisi Kristu rubu-ribi rexixare tai butu wedumy.

¹⁰ Inyboho heka ihòrõ mahãdu roire. Tai uritere inyseriòre rybeõmy ixiradỹõmy. Inyboho dori sohoji sohoji Deuxuru-ò rexideòsinyrenykre. Iu tii ibutumy iny riywisinykre.

¹¹ Kiamy heka Ritidỹna-ki roimyhỹre. Inynyrỹ heka rarybere: — Inatyhymy, Ibutumy warue-ò tatiowotimy resekre. Rarybekre heka wamy Jiarỹ Deuxu raremy.

¹² Iny sohoji sohoji iximy relyykre Deuxuko-ò.

¹³ Uritere inywitxira-ò ryberenyõmy tii ibinamy rare uritere aòwidỹõmy, iòraru-ki ixihydỹdu òraruna-txi resehemy.

¹⁴ Jiarỹ tahe kiamy rahòtinyre. Kia aòmydỹnana aõ aõkõ rare Deuxu-ò. Xiwena rỹsỹna rirỹsỹkeki aõ aõkõ rare. Uritere kia nohòtidu dee ibinare.

Tiiboho riròòke. Xiwena rÿsÿnarÿsÿ òraru-ki aijoiò bibedewonyhenylau irÿsÿòmykre.

¹⁵ Aityhydÿÿdu seriòreò òbitiòmy ratxikeki tahe iru-ki arawidÿÿòmy atx-imahã. Tamy dorihe òbitimy aòkò heka idi ròhòtinyke. Tii heka tule riwinykelemy ixidi ròhòtinyke. Timy aòki teòsamy rahaòhyymyhÿre aòma, xiwena rÿsÿna-ki. Kai aòki awimy aòma awityhy irÿsÿòmyke Deuxu Riòreò dibinadÿÿnyke lau wahe, Kristu dori iòraru-ki rurure.

¹⁶ Kaki awimy òbitimy mahakeki. Biwinykeki inywitxiraru-ki atxikeki, kia tai uritere rieryòmy aki rahake.

¹⁷ Riroximyhÿreny, riòmyhÿreny —kia Deuxu Iòlòna dee aò aòkò rare. Aòmale tahe ròkòhòtinytyhymyhÿreny: wiòhedÿÿna, ywina eysana. Deuxu Tyytybytyhy inydeereny wahidÿÿna wahe.

¹⁸ Kia wese iny rÿikeki heka Deuxu dee wina rare, inydee tule.

¹⁹ Wii rikiwiòhenanymyhÿrenyke ibutumy wiwesehyyle ywina-di. Tai iny tyhynareny rikikyhynanyrenykemy.

²⁰ Rÿsÿna òraru-ki aòhe wisÿdÿÿ renyòmy, butumy dori Deuxu riwinyre. Kia inyò iòraru-ki aòwitxiramy ròhòtinykeki tahe ibinare.

²¹ Aò dee rÿsÿ vÿi momo heka ibinare, tai tii rexiòrarunykeki aòraru-ki urile bexiijònybenyke.

²² Kaa biwinykeki timybo Deuxu dee òbiti relemyhÿre, urile ibutu-ò tuu rybeòmy iny bedeòby, kia ira-ki aò ibinakòre.

²³ Ijò urihimyo tatyhynomy ratximyhÿre heka iximy riatyke. Adee tahe òbiti heka rare. Aòbo riwinyre heka òraruna rare. Tai iwidÿÿòmy.

15

¹⁻² Iny ixira-di heka ròkòhòtinyrenyke ibutumy aòbo iny riwinymyhÿredi. Idi ròkòhòtinymyhÿrenyke inywitxira aòlaubo ruberumyhÿré. Iny òbiti erykò mahãdu-di.

³ Kristu dori kaki raremyhÿu ixideewimy aòkò tuu riwinomy raremyhÿ. Wiwana ritidÿÿdu wesemy riki riritinymyhÿre: nade aòhòkÿmydÿÿnana-ò tai heka bede-ò nade. Riòludunyre heka aòbo iòludu aòbinabinahãkÿ rarybere heka riwaòludunymy raremy.

⁴ Tuheka roimyhÿre ihetxi Tyyritina-ki inywiòhedÿÿna reny. Iny heka ribedeerydymyhÿreny ywina-di rakatxirenykemy rikiraòrenyke heka Deuxu aòmy bede dÿÿnana wahe. Rahykyu òraru rahykyu wahe rubu.

⁵ Tii heka wadee awire wii biwiòhenanyke. Deuxu anawiòhenanykemy adireny watxireri. Iwese Jesuisi Kristu riwinyre wese.

⁶⁻⁷ Iлуу ratxirenykemy irumy wiluumy matxibenykemy. Iny sohoji sohoji raraykynyke Jesuisi Kristu rayky wese-di. Ityby Deuxu rayky wese-di rÿike òbitimy. Tai tahe inyboho ywinale rekealàmymhÿre Deuxu-ò, tii Jesuisi Kristu tybyreki wahe.

⁸ Deuxu ihetxi mahãdu òraru-ki Jesuisi Kristu heka judeu mahãdu deòdurenymy ioxisÿnyre.

⁹ Iwese rybetyyritityhy rarybere wese: —Idi judeukòdu mahãdu Deuxu riwowdynykemy. Tai adee ariwiunykre judeukòdu mahãduy-ki. Jesuisi Kristu heka nade inatyhy riteòsinykemy. Judeu mahãdu riwiòhenanykemy Jesuisi Kristu nade.

¹⁰ Kiamy heka roire wiuna Ritidÿÿ-ki kia rarybere. Àlana adee ari-wahinykre wiuna-ki judeukòdu mahãduy-ki ani-di arawiunykre. Ijò-ki tulekre: —Tuheka wiuna-ki raritidÿÿ roimyhÿre judeukòdu mahãdu beysake wa judeu mahãdu-wana.

¹¹ Ijō-ki kiamy roire: —Àlàna heka biwahinykemy Inyryrỹ-ò idi watzireri, kaiboho tule judeukōdu mahādu.

¹² Deuxu dee rybeduō, Isaia tuu rarybere: —Rexiriòkòremy heka irybe roimyhỹre. Ijese riòkòre wahe. Tii judeukōdu mahādu iòlòmỹ ronykre. Tiile heka riraòmỹ roimyhỹkre.

¹³ Jiarỹ rexitòenyre, Paulo, kaiboho, Deuxu heka arateysanyrenykre sōwemy ywina-di, tyhydỹna-di. Kiamy heka adireny heka watzireri, waseriòreboho. Jiarỹ heka rexitòenyhy watzimyhỹré Deuxu arawiòhenanykemy adeereny rexiterenymy watziwāhāre. Deuxu Tyytybytyhy ruruna-di raròsōna-di adeereny kidiwahinykemy watzireri.

¹⁴ Kaiboho òbitimy ahātenyete waityhydỹdu seriòreboho. Sōwemy aōna aōna witzira teerytenyete. Inywitzira bibedeerynybenyke dori teerytenyete.

¹⁵ Ihārele taheka atxireny wanohōti reare inatyhymy tai warybe rewahiny Deuxu riwatyhynymy kawese riwasỹnyreki.

¹⁶ Biwateònyke taheka judeukōdu mahādu-ò. Jesuisi Kristu dori riwatare tadeòdumy idi judeukō mahādudikemy. Iu Deuxu rybe wihikỹmy rarybemyhỹreu, xiwena wahidỹdu wese rare. Kia tahe judeukōdu mahādu Deuxu-ò awike.

¹⁷ Tai tahe Jesuisi Kristu-wana rexibedesanymyhỹre Deuxu-ki waaòmỹsỹdỹna òraru-ki.

¹⁸ Jesuisi Kristu Rybewihikỹ tỹmyra-di rareri. Rexitòenymy rare adeereny. Tai kaiboho òbitimy teletenyete Deuxu Tyytybytyhy òraru-ki wahe. Wadeysamy heka watziwāhāre. Jesuisi Kristu adeereny riwinyreki wahe. Jiarỹ reerykōre iwitzira mahādu-di. Tahe aōma waaòmỹdỹnana reeryre. Tiu dori biwawiòhenanyke judeukōdu mahādu aritakemy. Deuxu mahādu judeukōdu rarekemy. Òbitimy ikoreny-ki raremyhỹ.

¹⁹ Rybe wihikỹmy rybe-di rarewāhā tamyreny. Aōna aōna wiihikỹ irureny-ò rewinywāhāre. Deuxu Tyytybytyhy-di Jerusalē hāwā-ribi heka rybe-di rare. Iliri bede-ò wahe. Ibutumy bede bedemy rarybere. Jesuisi Rybewihikỹmy. Ibutumy waaòmỹsỹdỹna rewinyre, Deuxu wadee riwahinyre wahe.

²⁰ Ihāre tahe ararybekemy watzireri tiu iny roholakōmyhỹre mahādu-ò. Ijōò dohodỹna iny ritohodỹnymyhỹre. Tai ikomy ararybekemy ixidi watzireri.

²¹ Isaia dori kia Tyyriti roire: —Tiu iny tamy roholakōmyhỹre tamy ijo-honaòmỹ rarybere. Tai rierymyhỹre. Tai tahe roholakre tahe rityhynykre.

²² Tai heka raraòlemy watziwāhāre —adeereny.

²³ Katahe kaki rexihumy waaòmỹsỹdỹ ratxireri. Katahe arorarenymy arake watzireri beòrakòle arakemy ixidi watzireri.

²⁴ Espanha bede-ò arakemy watzireri. Arakreu dori Roma-ò aroramy heka arakre. Iribi inyboho ibutumy rakatzimyhỹreu tahe tako-ò biwaix-idỹnybenykre.

²⁵ Ikoki taheka wahidỹyō ariwykre Jerusalē-ò. Jerusalē hāwā mahādu dori aòhòkỹmy rotỹnymy rỹiramyhỹ.

²⁶ Macedonia bede-ki Akaia bede-ki tamy nieruō riwahinykremy ratxireri dohodỹna mahāduō kia rama rahureri mahādu wahe.

²⁷ Tiiboho riwiòhenanyre deysana-di. Kia òbiti rare. Iribi tahe Deuxu rybe aòmỹdỹnana, Judeu mahādu-ribi nade. Tai tahe judeukōdu mahādu, tule judeu mahādu riwòhenanymyhỹke taaòwiwi-di.

²⁸ Kaa nieru-di arakreu, tahe aroramy arehemynykre. Iribi Espanha-ò arakre.

²⁹ Tuu awana watzikreu, tahe teysamy Inyryrỹ-di rakatzikre.

³⁰ Bexitòenyke wadee waõmysÿdÿÿna sõwemy watzireri ariwinykremy. Deuxu Tyytybytyhy heka sõwemy wadee nade adeereny ariwahinykremy, luuna sõwemy adeereny ariwahinykre.

³¹ Tule ityhydÿÿdukõdu mahãdu Judeia wadee aõbinahãkÿ wadi ratximyhÿre. Wadi bexitòenybenyke jiarÿ iribi arahenykre. Tule kaa nieru rewyneri waribi teysamy rimyrenykre.

³² Tai tahe awanareny tahe wadeysamy arehemynykre Deuxudeewikeki.

³³ Deuxudeewikeki wii riki Deuxu ywina adeereny watzireri. Kie.

16

¹⁻² Fibi hãwyy ityhydÿÿdu seriòreõ adee rakre. Tii heka Sekrea hãwã ludu dohodÿÿna mahãduõ rare. Tii heka dohodÿÿdu mahãdu riwiòhenanymyhÿre aõu aõu aityhydÿÿdu seriòre wesemy. Tii kaiboho biwiòhenanykre, tii dori sõwemy riwawiòhenanyre.

³ Birybedÿÿnyke Prisila Akila-wana. Tii wawiòhenadÿÿdureny.

⁴ Tii wadee sõwemy riwinyre rubu lau ruberuõtyhy. Tai jiarÿ reàlàwãhãre tamy, tule tuu ibutuma Judeukõdu dohodÿÿna mahãdu. Iheto dohodÿÿna mahãduõ warybe wehityhyna biwahenyre.

⁵ Epenetu-ò biwehityhyny. Tii ibutumy ityhydÿÿdu-ribi juhuule rityhynyre Asia bedeki. Tii wabiòwa rare.

⁶ Marie adeereny raaõmysÿdÿÿtyhyre. Biwehityhyna wanimy.

⁷ Adroniko, Junia wana biwehityhynanykre. Tiiboho judeu mahãduõ roire. Ròtenawo-ki wawana roiremyhÿ. Dohodÿÿna mahãdu rierietyhyre. Deuxu deòdÿÿna mahãdu heka wakomy rityhynyre.

⁸ Ijõ waityhydÿÿdu biòwa Ampliato inire. Tamy kanarybekre tule.

⁹ Urbano, Estaki-wana tule Kristu dee wawiòhedÿÿdu tule rybe wehityhyna tamy biwahinyke.

¹⁰ Apele heka ityhydÿÿdu tyhy rare. Biwehityhynanyke. Aristabulo-wana heto woludu mahãdu biwehityhynanykre warybe tamy.

¹¹ Tule biwehityhynanykre Herodiaõ –waijoiõ tii rare judeu mahãduõ wahe. Kristu dee dori kia iny òbiti rare. Narciso heto ludu ityhydÿÿduõ heka tule biwehityhynanykre warybe tamy.

¹² Tule Trifena, Trifosa, Peside-wana raaõmysÿdÿÿmy Inynyrÿreny-ò biwehityhynanykre wary tamy.

¹³ Rufu tule Deuxu dee aõmysÿdÿÿdu rare ise tule. Tii dori nadi wesemy riwawisinanyre.

¹⁴ Asincrito, Flegonte, Hermes, Paroba, Hermas, tule biwehityhynanykre ityhydÿÿdu mahãdu.

¹⁵ Filologo, Julia-wana, Nereu taseriòre-wana, Olimpa, ityhydÿÿdu mahãdu tii-wana ratxireri ibutu-ò warybe wehityhyna.

¹⁶ Ibutumy aseriòre debò bimyke biwehityhynanybenykre ibutumy. Ibutumy Kristu tyydÿÿdu mahãdu-ò arawawehityhynanykre. Tule kaki dohodÿÿna irybe wehityhynanyre adeereny riwahinyreri.

¹⁷ Rybeõ roire kaa rybe tyyriti ixiydynako-ki. Ijõ aõhe dÿÿnana doimyhÿde kia hetowo hitxina-ki. Iwitxiramy heka taerydÿÿna mahãdu –iwese inydeereny erydÿÿnamyhÿre wesemy aõkõ kia lau tahe bexiebenyke.

¹⁸ Aõ Jesuisi dee aõkõ raaõmysÿdÿÿnyre. Ixidee tule heka raaõmysÿdÿÿmyhÿre aõ ixidee ritarenykemy röhòtinymyhÿreny. Tiiboho heka rarybewihikÿmyhÿreny, aõma, ruikedÿÿmy timy bedeki erykõ tuu ratximyhÿreny.

¹⁹ Jiarÿ wadeysamy watzireri kaiboho òbitimy ibutumy toiteki. Araerywãhã jiarÿboho aõbo òbitire uritere aõbina widyyõmy.

²⁰ Deuxu ywisidỹỹna wahidyyna dori Satanasi riixãwididỹỹnyke. Jesuisi Kristu Inynyrỹ wiòhedỹỹna adeereny riwahinykemy idi watzireri.

²¹ Tximòtxi dori wawiòhedỹỹdu rare. Lucio, Ijasõ, Sosipatu, wajudeui-joi-wana tule adeereny irybe wehityhyna riwahinyre.

²² Jiarỹ, heka Tercio, reritinyreri aõbo Paulo rarybere adeereny. Jiarỹ adeereny warybe wehityhyna rewahinyreri.

²³ Jiarỹ heka Kaio heto-ki watzireri, dohodỹỹna rabutunyreki watzireri. Kaio irybe wehityhyna adee riwahinyre. Tule Erasto hãwã nieru rubudỹỹdu rare. Tule Quarto inyseriòreereny rare. Ibutumy heka kaa irybe weityhyna adeereny rewahinyrenyneri.

²⁴ Inynyrỹ Jesuisi Kristu ruxetòena ibutumy adeereny kanakemy idi watzireri. Kie.

²⁵ Deuxu irurutyhy-di rare. Tii heka adi riyrubunyky adi watzireri. Iwese rybeweityhyna rarybere wesemy, ruru adee riwahinykre.

²⁶ Kaheka Deuxu tarasana rare. Ibutumy iny mahãdu kaa tarasana rare. Katahe wiji ibutumy Deuxu rybemy rybena reamyhỹre. Iwese Deuxu rybedu mahãdu juhoo rarybere wesemy. Deuxu heka ibutu-ò tuu rarybere. Tai tahe ibutumy iny Deuxu Tytybytyhy rierykre tule rityhinykre.

²⁷ Deuxu-ò àlàna biwahinykeki tii dori bedeeryna ratximyhỹre Jesuisi Kristu òraru-ki wowydyna tamy biwahinybenykre aõu aõu. Kie, Paulo.

1 Oritxi Mahãdu-ò 1 Oritxi Hãwã Dohodỹỹna Mahãdu-ò

¹ Paulo jiarỹ Deuxudeewimy deòdumy wãhãre, Jesuisi Kristu deòdỹỹna-ki wahe. Jiarỹ waityhydỹỹdu seriòre Sòteni-wana adee warybereny adiwahinyde.

² Oritxi hãwã dohodỹỹna mahãdu-ò heka watyyriti adiwahinyde, Jesuisi Kristu òbitidỹỹna mahãdu-ò, Deuxu hõrõ mahãdu-ò, hãwyy, hãbu-wana, ibutumy Jesuisi Kristu ityhydỹỹdu mahãdu-ò. Tii iny Iòlòrenymy heka ratximyhỹre.

³ Ruxetòena, ywina-wana adeeren kanakemyidi watxireri, Deuxu iny tyby-ribi, Jesuisi Kristu iny Iòlò-ribi.

⁴ Deuxumy reàlàmy watxiwãhãre, Jesuisi Kristu adeereny ruxetòena diwahinydeki.

⁵ Ibutumy dori iribi tòerymy ahãte arybena-di, ersydyỹỹna-di.

⁶ Kristu dee rybena akireny roimyhỹre.

⁷ Iribi awahidỹỹna rauhenyõreri, kaibohe dori Kristu deòsidỹỹnamy teraòmahãte.

⁸ Jesuisi arawiòhenanyhyy rarekre bededỹỹnana konana-ò, tatxuu òbitimy ixiko-ò, rexilamadỹỹnykemy.

⁹ Deuxu òbitihyyra. Tii aratabinyra Tariòre Jesuisi Kristu-wana rarekremy, iny Iòlòrenymy.

¹⁰ Jiarỹ adeereny rexitòenyneri Jesuisi Kristunimy iny Iòlòrenynimy wiwese wimy wimy bityhynymy marybebennykemy. Wade awiõre wiribi hitxi hitxidỹỹ. Wii bitotynytyhymy boibekemy adireny watxiwãhãre, araykyreny-ki, aerysynareny-ki.

¹¹ Kaibohe waseriòre mahãdu, wimy taujõmotenyteri. Lòe hetowoludu mahãdu kia wako relyyra.

¹² Inyõ wadee rarybemyhỹre. Ijõ mahãdu heka Paulo rityhynymyhỹre ihõrõ mahãdu wahe, ijõ heka Apòlo rityhynymyhỹre ijõ tasỹ Pedro rityhynymyhỹre, ijõ tahe Kristu rityhynymyhỹre.

¹³ Aõherewe, Kristu be iny rihitxihitxinymyhỹre. Paulo be itxeò nihikỹ tyre-ki rurure adeereny. Pauloni-di be rasebere.

¹⁴ Inyõ he ròratisebenyõre. Krispu, Kaiowanale tahe resebenyere. Tai tahe wabedesamy watxireri.

¹⁵ Kiamy ta heka inyõ rarybeke lau reijõnymahãre: —Jiarỹ Pauloni-di rexisebenyere.

¹⁶ Tefana hetowoludu mahãdu adiratisebenyede. Inyõ reratisebenyeki wanohõti reaõhyyre.

¹⁷ Kristu dori aõsebedỹỹmy aõkõ diwateònyde Rybewihikỹmy rybemy. Bede erydỹỹna nihikỹmy rybemy aõkõ diwateònyde, Jesuisi itxeò-ki lamana ariwòkemy aõkõ, kia inydeereny rurureki wahe.

¹⁸ Kristu itxeò rubumy ijyy heka ityhydỹỹdukõdu dee itxỹtena rare. Biu-ò hedu mahãdu dee tahe, Deuxu ruru kia rare.

¹⁹ Kiamy tahe iritidỹỹna roire: ierysydu mahãdu ersyna-di ariixãwidỹỹnyke. Bede erydu rayky-di adijõnykre.

²⁰ Titxibo tahe bede erydu rare. Tyryritimy erydu heka titxibo rare. Titxibo tahe wiji dỹỹraxidu rare. Kabede ludu bede ersyna heka Deuxu-ò itxỹtedỹỹna rare.

21 Bede bede ludu mahādu rōhōtinyre bedeerytyhymy. Tai tahe Deuxu iximy rierynanyōhyyre. Kia tahe Deuxudeewire. Iny rybewihikỹmy rybe heka iny wixira-ò itxýttere. Kia-di tahe Deuxu iny ritareri iny rityhynyreki.

22 Judeu mahādu aōwiwi rỹikemy aōbo raremy ratxireri. Judeukōdu mahādu bede erysydỹỹna-di rarekemy riijemyhỹre.

23 Kristu itxeò-ki lamanamy iny rarybemyhỹreny. Kia tahe judeu mahādu riojinyre, judeukōdu mahādu dee itxýttena kia rare.

24 Tahe Deuxu rarirōwysyna judeu tule judeukō mahādu-ò heka Kristu erydỹỹna tule ruruna rare ihedỹỹnarenymy.

25 Deuxu itxýtēdỹỹnamy rybe hābu bedeery ratyre rare. Deuxu iruruōkeki, tii hābu ruru ratyre iruru rare.

26 Waseriōre mahādu ararirōwysyna-di mohōtinybenybeke. Betehemy iny erysyna mahādu-ribi sōweōre, Deuxu rarirōwysyna mahādu. Dinodu mahādu sōweōre, iny Iòlòtyhy mahādu-ribi sōweōre.

27-28 Deuxu heka aōna aōna itxýttena ritare bedeeryhykỹ mahādu ri-ixỹrudỹỹnykremy. Aōna aōna ruruō Deuxu ritare aōna aōna ruru-di ri-ixỹrudỹỹnykremy aōna aōna derare, aō aōkō rare Deuxu ritare aō-di aō aōkō-ò riyjanykre.

29 Tai dorihe inyō rexityhynykōkemy Deuxuko-txi.

30 Kaiboho dori Jesuisi Kristu hōrō toite. Tii heka inydee ibutumy rare: erysynamy òbitinamy, tamanamy, tarasanamy rare biu-ò hena wahe. Deuxu kia ibutumy diwahinyde inydeereny.

31 Kia dori ritina rybe-ki roire: –Inyō rexiwowydynykeki, Deuxu-ki rexiwowydynyke.

2

1 Waseriōreboho aō hābu bede erynihikỹ wese aōkō adeereny anade. Deuxu rybetyhydỹỹnanamy ararybekremy. Rybenihikỹmy heka rarybeōre.

2 Tii sohojile reeryre akireny rarewāhāu, Kristu itxeò-ki lamanale wahe.

3 Akireny rarewāhāu waruruōmy rarewāhā, ixỹru brebu tahe riwamy-tatadỹỹnyre.

4 Wabedeerydỹỹna erytyhy rybesirahakỹ-di aōkō rarybereri iny rityhynykemy. Urile tahe Deuxu Tyytyby ruru-di rarybewāhāre.

5 Hābu erytyhydỹỹna aōkō bityhynykemy adi wāhāre Deuxu ruruna tahe atyhynarenymy heka idi toite.

6 Ityhydỹỹdu umy-ò bede erydỹỹna-di rarybemahāre. Kabede aōmydỹỹnana bede ery aōkō rare.

7 Kia tahe Deuxu erydỹỹna tyhyre. Kia heka hābu mahādu lau riwōmyhỹre. Juhu inydeereny riywinyre.

8 Kia bede erydỹỹna inyō wiji Iòlòtyhy mahādu rieryōre. Kia rierymyhỹkeki, Wanyrỹ wowydyna-ribi itxeò-ki ritamadỹỹnyōhyyre inihe.

9 Iwese Ritidỹỹna roireri wese rare: –Rue lobixiōhyymyhỹre, nohōti heka roholaōhyymyhỹre, inywo rieryōhyymyhỹre, aōbo Deuxu riwinyre taluuna mahādu dee, tamy riwahinykremy.

10 Deuxu Tyytybytyhymy kia inyboho riteōwarixinyreny. Ityytyby ibutumy rieryre. Deuxu raykywo-ribi aō ritỹnynymyhỹre.

11 Inyle heka iny ixirayky rierykre, kawese tule Deuxu tyytybydile aōna aōna rierykre.

12 Bede aōmydỹỹnana aōkō inydeereny wahisidỹỹdu rare. Deuxu Tyytyby tahe inydeereny wahisidỹỹdure.

¹³ Kiadile Deuxu wahisidỹna iny reeryrenyre. Kia iny reerydỹnanamahãrenyre hãbu bede erydỹna-di aõkõ, Deuxu Tyytybytyhy-di tahe reerydỹnanywãhãre. Kia iny retỹnynmahãre iny Deuxu Tyytybytyhy-di mahãdu-ò.

¹⁴ Iny Deuxu Tyytybytyhy-di rỹiõra mahãdu dee Deuxu Tyytybytyhy aõmydỹna dera. Tamy itxỹte rare. Rierykõre. Deuxu Tyytybytyhydile iny rierymyhỹre.

¹⁵ Iny heka Deuxu Tyytybytyhydikeki ibutumy rierymyhỹre. Inyõ tahe tuu aõmy tuu irybeõna.

¹⁶ Ryberiti-ki roire: –Mobo tahe rieryre Wanyrỹ rayky, mobo tamy aõ ritỹnykyre inyõ aõbo? Inyboho Kristu rayky ijõdire, iwesele raraykynymhỹre.

3

¹ Waseriõreboho adeereny rarybeõhyre hãbu Deuxu Tyytybytyhy-di rỹira wesemy. Hãbu õrarudu wesemy rỹirawesemy adeereny ararybeke. Uladu wesemy Kristutyhydỹ-ki rỹira wesemy adeereny rarybere.

² Huỹsy-di õedỹ araerynadỹnyrenyreou rỹsỹnatere wesemy aõkõ erydỹnasiramy aõkõ rybe. Kia rỹsỹna rỹsỹmy texiywinyõtenyte. Wiji tule texihumy aõkõ toitenyte.

³ Òrarudu wesemy dori ahãtenyte. Ihãrumy, ijãmy atximyhỹtenyte. Tai tahe õrarudu mahãdu wesemy ahãte ityhydỹdukõdu mahãdu wesemy ahãtenyte.

⁴ Inyõ rarybekeki: –Jiarỹ Paulo erydỹnay-ki rare. Ijõ rarybekeki: –Jiarỹ Apõlo erydỹnay-ki rare. Tiiboho ityhydỹdukõdu mahãdu wesemy ihỹrenyre.

⁵ Aõbohe Apõlo, aõbohe Paulo. Deuxu deõdu heka inyboho roire. Inyribireny tetyhynymy teerymahãtenyte. Iwese Deuxu iny sohoji sohoji-ò aõmydỹna riwahinyre wese, tai tetyhynyte.

⁶ Ta jiarỹle rybemy rarybere iny aõty ribõrõnymhỹre wese, Apõlo rybe ritỹnyre iny alõbõrõna ribenymhỹre wese rituunyre. Deuxule tahe idimyhỹre iwese alõbõrõna riumydỹnymhỹre wese.

⁷ Tai tahe tõbõrõdỹdu aõ aõkõ rare; ituudỹdu tule aõ aõkõ rare. Deuxule aõwedu wedu heka rare. Tiile ityhydỹdu widỹdu nihikỹ rarekre.

⁸ Tõbrõdỹdu ituudỹdu-wana sohoji wesemy ihỹrenyre. Sohoji sohoji tauri wahisidỹ ritakremy, iwese sohoji sohoji raaõmysỹdỹmyhỹre wese. Wiwana dori Deuxu dee iny raaõmysỹdỹmyhỹre.

⁹ Inyboho heka Deuxu wiõhedỹdu mahãdu roire. Kaiboho tahe Deuxu oworu wese toite. Iwese tahe Deuxu heto wese kaiboho toite.

¹⁰ Heto widỹdu deyrewewese retelenyre. Ibutumy Deuxu ruxetõenamy kia rewinyre. Juhumana retidire idi tahe itira ityre reõdõnyra. Ywimy biwinybenykyre. Awimy bitamadỹnykemy.

¹¹ Jesuisi Kristu juhumana wese heka rare, inyõ tiile tarasadu wahe ijõ manaõ terõwymy ritidiõtyhy.

¹² Ibutumy juhumanatyre-ki relerereri. Ijõ womati tỹrỹrỹhỹkỹ, ijõ prata-di ijõ manatỹny-di, ijõ õwõru-di, ijõ õteti-di, ijõ horeru-di.

¹³ Kia txuu Kristu txu wahe riteõsinykyre aõdibo sohoji sohoji raaõmysỹdỹmyhỹre heõty dori riurihixinanykyre. Aõhebo iny rotỹnymhỹreki.

¹⁴ Juhumanatyre-ki iny aõmydỹna rỹikeki, tii uri iwahisidỹnana ritakre.

¹⁵ Iny aõmydỹna rasõkeki tii rõõnodỹkyre. Ihãre tahe tarasana ritakre heõtyroobymy wahe.

¹⁶ Kaiboho Deuxu heto wesemy toitemahã. Teeryõte aõbo. Deuxu Tyytybytyhy heka aworeny-ki rasỹnymhỹre.

¹⁷ Inyõ Deuxu heto wesemy rahukeki, Deuxu tii rihukre, Deuxuheto dori rare. Kia tahe kaiboho toite Deuxu heto lytytyhy rare, ihõrõtyhy wahe.

¹⁸ Ixi itxenadỹõmy, inyõ bedeerymy ixi-di rõhõtinykeki, raitxỹteke tai tahe bedeery inatyhy-ki rareke.

¹⁹ Kabede bede eryna tahe Deuxu dee itxỹtena rare. Kia Ritidỹõna-ki tahe roire: –Bede erynadu tyhy tabedeerydỹõna-ki Deuxu-ò rõõnodỹõre.

²⁰ Ijõ Ritidỹõna-ki roire: –Wanyrỹ, bede erydu rayky rieryre. Kia raykywi aõ aõkõ rare, rybetyhy aõkõ.

²¹ Iny aõmydỹõnana-di ixiwowydydỹõmy, ibutu dori ahõrõ rare.

²² Paulo, Apòlo, Pedro, bede, umy, rubu, aõmydỹõna wijina, aõmydỹõna bede kanakre, ibutumy ahõrõ rare.

²³ Kaiboho Kristu hõrõ toite. Kristu Deuxu hõrõ rare.

4

¹ Inyboho Deuxu deòdu roire, ibutumy idi mohõtinybenyke tii inykireny ihỹre. Inyboho dori Deuxu aõmydỹõnana erykõdu tỹnydỹõdu roire.

² Deuxu tỹnydỹõdu òbitihyky rarekemy.

³ Wadi rõhõtinykeki awimy aõbo ibinamy aõbo kia tahe wadee aõ aõkõ rare. Aõbo dohodỹõ tỹnydỹõdu mahãdu wadi rohõtinyke kia wadee aõkõhykyre. Jiarỹ tahe ixi-di dehummy rahõtinyõhyymahãre.

⁴ Jiarỹ reeryõre inyõ aõbinamy wadee rexiwonyke warayky wadee òbiti rare. Tahe ihãrele òbitimy iko-ki rare. Wanyrỹ tahe wadi timy rõhõtinyke.

⁵ Kia tahe wiji idi timy nohõtĩõmy. Jesuisi nonanako-ki. Tii tahe kanakreu, ibutumy wasĩmy aõ rỹira ritỹnynykre, ibutumy iny raykymy rỹira ritỹnynykre. Kia txule ibutumy iny tabedeõby ritakre Deuxu-ribi.

⁶ Kia aõna aõna wawese riwawesenanyreri. Apòlo wese tule rewesenanyreri. Kaiboho dori bierybenykemy kia: ierysydỹõrenyõmy aõbo iritidỹõnawo-ki ihoõre. Kia wese keki, ijõ tỹnydỹõdu ijõ ratyre ryiõtyhy.

⁷ Mobo iny wiribi iwitxiramy ihỹre. Aõbohe akire Deuxule aõwiwi adee riõre. Ibutumy iribi tetateki tahe aõherekibo axiwedere.

⁸ Kaiboho ibutumy aõ ijõdire. Tatyhytenyete, iòlò wesemy taditehemynyte iny arawiõhenanyrenyõre. Wadee awire kaiboho iòlòm y ahãtenyete. Tai jiarỹboho awana ariòlõnykre.

⁹ Kiamyre òsana. Deuxu dee heka inyboho deòdỹõna mahãdu rurukrerke mahãdu roire ibutuko-txi, yjuko-txi, hãbukò-txi.

¹⁰ Kristu òraru-ki itxỹtewesemy jiarỹboho roire. Kaiboho Kristu erydure riki. Jiarỹboho warurukõrenyete. Kaiboho orarudirenyete jiarỹboho inyõ waluurenyõre. Kaiboho tahe ibutu luuna toite.

¹¹ Ihãre tahe wiji ramamy, bemomomy, tykyõmy rekoamyhỹre. Tule sỹywisidỹõna rỹiõre. Tule jiarỹboho wahãwã òbiti ihokõre.

¹² Ihãre inyboho naaõmysỹdỹõmyhỹde iny debò-di irukemy. Inyõ inydeereny aõbinamy rarybekeki, awilemy inyboho rirawyònymyhỹre. Inyõ aõsirahakỹle inydee riwinykeki, aõmy rybeõmyke.

¹³ Rybebinamy inyboho dee reakeki, ihãrele Deuxumy tamy rarybemyhỹre. Rỹnysityby wese inydireny tiiboho retehemyhỹre, iijese ijese wesemy.

¹⁴ Kia rõritidỹõreri aixỹrudỹõrenymy aõkõ, tahe wiõhedỹõdumy retirỹreri binadỹõna lau, iwese inytybyõ tariõre rierynanyre wese.

¹⁵ Tahe sõwemy Kristu-ki bede erydỹõdu rỹire. Sõwemy aõkõ bobohomy rỹirenyete. Kristumy heka jiarỹ sohojile borenymy rare. Rybewihikỹ erysyna-di dori borenymy rãire.

¹⁶ Kia dori kaiboho wawesemy boibekemy adireny watxireri.

17 Tai Tximòtxi reteònyre adeereny. Tii wariòre luu wesemy ratxire. Tii òbiti rare Wanyrỹ-ò. Tai watxi òhòtirenny reake iwese Jesuisi Kristury wese rariamyhỹreki, tule iwese reerynanyre wese ibutu dohodỹỹna hetowo-ki.

18 Inyò ixiwowydymy ixidi ròhòtinymyhỹ iwese arura-ò araòreki.

19 Wanyrỹdeewikeki arakre wylemy arorarenny-ò. Tai arierykre ixiwowydymy nohòtidu irybe sohojile aòkò arierykre, aòhebo rotỹỹnyre tule arierykre.

20 Deuxu òlòna heka rybe sohojile aòkò rare, rurutyhy heka rare.

21 Aòbo tahe awityhyre òhòte-di adehemyny aòbo, ada luuna-di ywina-di adehemyny aòbo?

5

1 Dohodỹỹna mahãduy-ki òrarutyhy-di riki toite kia tahe rare: hãbuò heka tybyhãwyytyby-wana roire. Kia òraru tahe ityhydỹỹdukòdu mahãdu riòludunyòhyymyhỹre.

2 Kia hyyle ixidi aò aòkò tòhòtinymyhỹte. Aòherekibo bede teòtiinyòtenyete tahinyòmy idi textòenyòhytyenyete. Hãbu kia riwinyre, ityhydỹỹdu mahãduy-ribi biòlòdỹỹnyke.

3 Jiarỹ akyneny-ki watxiòrerihãre, tahe warybetytyby awanarenny ratxireri, iwese jiarỹ awana ratximyhỹre wesele. Tahe wadohodỹỹna ariwahinykre kahãbumy ibinamy riwinyremy. Tahe ityhydỹỹdu ributunykeu,

4 warybetytyby akireny rỹireu, Jesuisi Kristu ruru akireny rỹireu, kahãbu Satanasi-ò biwahinybenyke.

5 Tai kahãbu umy Satanasi-ò biwahinybenyke itytytyby tahe rahenykre Wanyrỹ Jesuisi kia nonanatxu-u.

6 Arybe iximy wydy awi aòkò rare. Taholaòtenyete aòbo kia rybe-ò; iuri ibutere paò widỹỹna sòwemy rauridỹỹra uridỹỹna heka òraru wese heka rare.

7 Idi behubenyke iuri hitxina-di, tahe paò iuriòmy rỹirekre wese boibekemy òbitimy, Kristu tule buddèni xiwedỹỹna wesemy inydeereny rurure, iny Pascoarenny worana bedehesi dorihe rarỹỹnymy rare.

8 Tai tahe ixena roxina rikiwinyrennyke. Paò iuri-di ryiòmy rakatximyhỹrenny. Kia uri paò òraruihetxina wese rare. Paò tỹmyra, òbitire, inatyhyre, tii rikiyrennyke. Kia tahe rare òbiti widỹỹna wahe.

9 Adeereny watyryiti rewahinyre òrarudu mahãdu roo-ki risiòmy, òtadu mahãdu-wana boiòkemy.

10 Ibutumy òrarudu mahãdu-ò aòkò adeereny rarybere. Iny ibina mahãdu, wasidu mahãdu, Deuxutyhy luukòdu mahãdu. Kia-wana noòrennykeki, bede-ribi ihyyle bexihitxinyke.

11 Wiji watyryiti kia wese rewahinyre. Ityhydỹỹduy-txi ròtedu òrarudu rarehykeki, kia roo-ki risiòmy tule iny ibina mahãdu, Deuxutyhy luukòdu, ujòmomy rybedu, wasidu, axaxa momodu, kia mahãdu-wana tahe byreòmy.

12 Ityhydỹỹdukòdu mahãdu ywisidỹỹdu aòkò jiarỹ rare.

13 Deuxu dohodỹỹdukòdu mahãdu hitxidỹỹdu rarekre. Deuxu Ryberiti-ki roire: —Òrarudu ay-ribi biòlòdỹỹnyke.

6

1 Iny ityhydỹỹduò widee raurenanykeki, aòbohe awire? Erysydu-ò rikidy aòbo ada ityhydỹỹdu mahãdu-ò rybeke aòbo? Uritere ityhydỹỹduòle marybekre.

² Ityhydỹdu mahādu bedede mahādu ierysydỹkre. Kia teerytenyōta aōbo. Ityhydỹdu mahādu bedede mahādu ierysydỹkeki, aōna aōna iyja tahe teeryōtenyete timy rasỹdỹnykemy.

³ Tahe inyboho ýju aōmydỹnana rikieryrenykre. Kiakeki iratyre kabede aōmydỹnana rakieryrenyhyyke.

⁴ Erysydỹnana ijōdikeki, aōherekibo erysydu ityhydỹdukōdu-ò radymyhỹre. Ityhydỹdule aōtxi awire.

⁵ Kia heka adeereny ixỹruna rare. Hābu erysydu ityhydỹdu mahāduy-ki ratxiōre aōbo ierysydỹ-ki.

⁶ Erysydu ijōdihāre ta ityhydỹdu seriōre wii ridyke aōbo ityhydỹdukōdu erysydu-ò, kia awiōre.

⁷ Ityhydỹdu wii ridykeki, kia tahe iaō bedede eryōmy rare. Inyō adeereny aōmy rotỹnykeki, urile tahe aōhōkỹmy rotỹnykre. Kia heka Inynyrỹ-ò òbitire.

⁸ Kaiboho ityhydỹdu hāre aōhōkỹmy wii tesỹnymahātenyete.

⁹ Òrarudu mahādu-ò, Deuxu Iòlōna uri riwahiōtyhy. Kia teeryōtenyete, iny ywimynoduō, Deuxutyhy luukōdu, wiriōrese-ò òtadu, hābu hāwyy wese rexiwahinyhỹre ijō hābu-ò.

¹⁰ wasidu, ixidee imynomy nohōtidu, axaxamomodu, jei jeimy rybedu, inywitxira aōmydỹnana wydydu, kia-ò Deuxu Iòlōna uri rawahiōtyhy.

¹¹ Kaiboho heka juhu kia wese toite. Wiji tahe iny Iòlò Jesuisi Kristu, anasuhode, anaixāwidinyde anatade Deuxu Tyytybytyhy-di.

¹² Ibutumy ariwinyke ixidee wikeki ibutumy aōmydỹnana tahe iwidỹ awiōre. Ibutumy arotỹnyke ixidee wikeki, aō aōkō tahe waumy-di rarekemy raremyhỹ.

¹³ Rỹsỹnaheka weryri-ò ralōmyhỹ kia-ò heka ihỹmyhỹre. Kia heka Deuxu wiwanale rahukre ikonana-ò. Umy heka òraru-ò sohojile aōkō rỹire. Deuxu umydikemy dorihe riwinyre.

¹⁴ Deuxu Inynyrỹ riixixanyre rubu-ribi. Tule iny kidiixixanykre taruru-di.

¹⁵ Iny umy heka Kristu rareasa rare. Kia aōbo teerytenyōte? Kabe Kristu rareasa aderana-wana rabutukre, aōkōrehe.

¹⁶ Inyō hābu aderana-wana roikeki, sohoji umyhyyle wiwana roireke. Kia teerytenyōte aōbo? Kia Tyyriti Iritina-ki roimyhỹre, hābu hāwyy-wana sohoji umyhyyle wiwana roireke.

¹⁷ Moo Wanyrỹ-wana ributunykeki, sohoji Deuxu Tyytybyle rareke.

¹⁸ Òraru-ribi teòrehemy atximyhỹbenyke Ijō òraru inyō riwinykeki umywo-ribi nodu aōkō rare. Òta òta òraru tahe inyō riwinykeki, kia ixiumy òludu òraru-di reake.

¹⁹ Aumy Deuxu Tyytybytyhysỹ rare. Kia aōbo teeryōte? Deuxu rexiwahinyre awo-ki rasỹnyhyomy rarekremy.

²⁰ Kaiboho aumy wedu aōkō atxitenyteri. Jesuisi Kristu adee rurureki. Tii òwynihikỹ-di anadyde, Kia tahe aumyreny-ki Deuxu-ò bealābenyke, òbitimy bexisỹnyke aumyreny-di.

7

¹ Atyyriti dỹraxi rerawyònyreri. Kia rare: hābu hāwyy-ò aderexiōhyykeki, kia heka awire.

² Hābu tahāwydyhyyle rareke, tule hāwyy tahābudihyyle rareke òta òta òraru dori sōwereki.

³ Hābu tahāwyy-ò umy wahisidỹna tamy riwahinyke. Hāwyy tahābu-ò umy wahisidỹna riwahinyke.

⁴ Hāwyy taumywedu aōkō rare, ihābu iwedure. Tule hābu taumywedu aōkō rare. Ihāwyy iwedure.

⁵ Wiòmysadỹỹõmy. Urile rexitòenykemy aõutxu-ò wii riòmysanykre. Urile ixideewimy wiwana ratxike. Idi wiwana roikre Satanasi riixiranyheny bededỹỹnana riijereki.

⁶ Kia warybe bedede ywina aõkõ rare. Urile wadododỹỹna rare. Adee awikeki, tuu bityhynybenykemy.

⁷ Ibutumy hãbu wawese rỹirakeki, awire. Iny sohoji sohoji tahe, Deuxu bedede ywisidỹỹna tamy riwahinyra ijõ wiribi lahitxi ihỹre.

⁸ Ixihy mahãdu-ò wytese mahãdu-ò wadododỹỹna rewahinyre: wawese hyy rỹirakeki, awire.

⁹ Ixiwedudõkeki, tahe boikre, tii arasahy mabekelau.

¹⁰⁻¹¹ Hãbu hãwyy my heridu-ò warybe rewahinyra, tahe warybe aõkõ rare, Wanyrỹ rybe. Kia rare: Hãwyy uritere tahãbu ririõhyyke. Hãwyyõ tahãbu-ribi rexihitxinykeki, ijõ-wana roiõke ada tahãbuwanale ixyby roiõke. Tule hãbu uritere tahãwyy risiõmy.

¹² Ijõ-ò warybe rewahinyra Wanyrỹ rybemy aõkõ: Ityhydỹỹdu seriõre ihãwyy ityhydỹỹdukõdukeki, uritere iatasyõmy hãwyy tii-wana rarekemy ratximyhỹreki.

¹³ Hãwyy ityhydỹỹdu ihãbu ityhydỹỹdukõdukeki, tule uritere iatasyõmy tahãwyy-wana rarekemy ratximyhỹreki.

¹⁴ Hãwyy dori ta hãbu ityhydỹỹdukõdu riõbitinymyhỹre rityhydỹỹnymyhỹ tii-wana ratximyhỹreki. Hãwyy ityhydỹỹdukõdu iwesele ta hãbu risỹnyre. Aõkõkeki ariõre ityhydỹỹdukõdumy raremyhỹ. Ka tahe rityhynyreki.

¹⁵ Ityhydỹỹdukõdu resekeki ixinamy rake. Kia wesekeki, ityhydỹỹdu ri-taamy aõkõ ihỹre. Kaiboho ywina-di boibekemy Deuxu ratximyhỹre.

¹⁶ Hãwyy, teeryte ta hãbu rityhynykre aõbo, ada aõkõre aõbo? Aõkõ, teeryõte.

¹⁷ Iwese Deuxu iny sohoji sohoji rihitxihitxinyre wese, boibemahãke. Iwese atximahãtenyete wese Deuxu anatadenydeu kia wese boibeke. Kiamy heka reerynanyamahãre ibutumy dohodỹỹna-ki.

¹⁸ Inyõ notyky resyna-di bityhynykeki, kaweselemy mabeke. Inyõ õtyky resyna-di aõkõ bityhynykeki, juhuu tatemahã wese mabeke, notyky resy-dỹỹõmy.

¹⁹ Notykyresy aõ aõkõ rare, ityky resykõ tule aõ aõkõ rare. Deuxu bedede ywina ywidỹỹna, kia heka aõ wihikỹ rare.

²⁰⁻²¹ Iwese Deuxu ibutumy iny ditade wese, juhu widỹỹnalemy mabeke. Deòdumy aõbo tetyhynyte, tahe tuhyymy mabeke. Awedudeewimy bexihukeki tahe, idi make araokorore-ribi bohonykeki, tahe make.

²²⁻²³ Deòduõ-ò Deuxu ritakemy rarybekeki, tahe rityhynykeki, tii raòkòrò-ribi rohonyra Deuxu rue-ò òkresyõ mahãdu rityhynyrenykeki, tiiboho deòdu roire. Deuxu aradyra òwyhykỹ-di tai tahe hãbu deòdumy aõkõ boibeke.

²⁴ Ityhydỹỹdu seriõre, iwese atximahãte wese adee tarasanamy Deuxu rarybereu, kia wesele boibeke.

²⁵ Ijadõma-ò bedede ywinamy Wanyrỹ Deuxu tarybe diwahinyõde. Ihãrele wadododỹỹna adee ariwahinykre kialemy. Deuxu dori tatòenamy ri-waõbitinyre.

²⁶ Aõhebo kowa rotỹỹnyre, awi aõkõ rare. Kia tahe aratohonykre: Iwese iny ratximyhỹre wesehy, boibeke. Tii tahe wadee awire.

²⁷ Kai aõbo hãwyy my heridu tate. Tahe ixihitxidỹỹmy nohõtiõmy. Kai aõbo hãwyy my heridu aõkõ tate. Tahe hãwyy my herimy nohõtiõmy.

²⁸ Tahe hãwyy-wana boikeki. Tii òraruna aõkõ rare. Tule ijadõma roikeki tule òraruna aõkõ rare. Ibutu iny heridu iaõmydỹỹ-ki aõhõkỹmy rotỹỹnyrenyke. Ila u jiarỹ adeereny rarybere inyõ aõhõkỹmy rotỹỹnyheny.

²⁹ Bededỹỹnana he iõhõre. Tai tahe adee rarybere waseriõreboho, inyõ heridu ixihyno wese ratxikemy.

³⁰ Iny bedewomy ratxirerí, ixibedewodỹỹ-ribi tõhõti rosake. Iny deysamy ratxirerí, deysa-ribi nohõti rosake. Inyõ aõ riwymyhỹre, ihokõ wese rotỹỹnyke.

³¹ Kabede aõna aõna kai bierysynanykeki iwese ierysydỹỹõmy bisỹnyke. Kia aõna aõna ibutummy ituekre. Bededỹỹnanahe aõwesele rexihukre.

³² Ixiraõmy ahãbenyke, kiamy tahe adee watxiwãhãre. Inyõ heridu aõkõ Deuxu aõmydỹỹna riwinyemyhỹke, iwese Deuxudeewimy ratximyhỹkemy.

³³ Iny heridu heka bede aõmydỹỹna riwinyemyhỹre, iwese tahãwyydeewimy ratximyhỹkemy.

³⁴ Kiamy rihitxinyre. Hãwyy tule heridu aõkõ Deuxu aõmydỹỹna riwinyemyhỹre taumy Deuxu Tyytybytyhy õbitidỹỹmy. Hãwyy heridu tahe bede aõmydỹỹna-di rõhõtinymyhỹre tahãbudeewimy riwinykemy.

³⁵ Kia aratohodỹỹnyra adeerenywikremy. Kaiboho arataaõtyhy. Urile anawiõhenanymahãde Deuxu iõhõmyhỹreki. Iõkõramy ibutummy arahenyrenykeki watxiwãhãre.

³⁶ Ijadõma tibiedỹỹdu tatibiena-õ õbitimy aõkõ risỹnomy rexinohõtinymyhỹre. Ijadõma tahãbumy herina bede-õ rehemynyre. Tahe tatibiedỹỹna-di inyõ-wana roikemy idi ihỹre, ixinamy roike. Kia òraruna aõkõ rare.

³⁷ Weryrybõ heriõkemy rarurunykeki, tii tahe awire. Tii dori irurudire iheridỹỹnyke heny. Tii ixiumy wedu rare.

³⁸ Tahe riheridỹỹnykeki, tii awire. Tule riheridỹỹnyõkeki, iratyretyhy awire.

³⁹ Hãwyy hãbu-wana rỹihyyke hãbu irumy. Rurukeu tahe hãwyy aõtxile roike. Urile Wanyrỹ Deuxudeewimy.

⁴⁰ Tahe wytesetyhymy ratxihyykeki, teysamy rỹikre. Tuheka jiarỹ rahõtynreri. Deuxu Tyytybytyhy wawo-ki ratxirerimy idi rahõtynreri.

8

¹ Katahe adeereny ararybekre: Suritxoo-õ rỹsỹna xiwedỹỹnamy. Inyboho ibutummy bedeery roire. Bede ery iny aõnityhymy rixinohõtynre. Luuna tahe inywiõhedỹỹdure.

² Inyõ aõerysydumy rexinohõtynykeki tii aõwihikỹ rieryõre.

³ Inyõ tahe Deuxu luukeki, Deuxu tii rierymyhỹre.

⁴ Kaa rỹsỹna suritxoo-õ xiwemy rawahimyhỹre. Kia tahe aritỹnynykre. Inyboho rieryrenyre suritxoo aõ aõkõ rare. Sohojihyy heka Deuxu rare.

⁵ Iny deuxu aõ òta òtalemymy rininimyhỹre biu-ki, bede-ki. Iwese deuxu sõwemy ihỹre wese wedu sõwe rare.

⁶ Inydeereny Deuxu sohojile rare. Inytybyreny. Tii ibutu aõna aõna riwinyre. Tamy inyboho roire. Tule inydeereny Wanyrỹ sohojile rare, Jesuisi Kristu. Tii ibutu widỹỹdure. Tii ratximyhỹre xiery inyboho ratximyhỹrenyre. Tamy inyboho roire.

⁷ Tahe ibutummy kia iny rieryõre. Iny sõwemy suritxoo iny reõwarimymy rỹira. Tii riki ixiwenedumy riroxikeki, tai òraruna tuu relemyhỹre.

⁸ Rỹsỹna aõkõ riwatyhenyrenyra Deuxu-õ. Tai roxiheny rỹire. Rikirỹsỹrenyõkeki, rikiõnonyrenyõtyhy. Rikirỹsỹrenykeki, aõ rikitarenyõtyhy.

9-10 Bexiebennyke. Urile ityhydÿÿdu aokõdu ixihe-ki iatysyõmy, aurihixi-nahe-ki. Suritxoo hetowo-ki inyõ umy robikeki teroxiterimy, tii tule ijõ rÿsÿmy rexiwonyre, xiwe rÿsÿmy.

11 Tai tahe aòraru-ki aseriõre atyhyna-ki òraruna-txi resekre. Tamy Kristu tarasamy rurure.

12 Kiamy ityhydÿÿdu seriõre-ò taòrarunyteki, tule Kristu-ò texiòrarunyte.

13 Tai rÿsÿna òraru-ki ityhydÿÿ-ki waseriõre òraruna-txi resekeki, jiarÿ kia rÿsÿna ariroxiõtyhy, waseriõre òraru-ki.

9

1 Jiarÿ adeereny rexihyomy watxiwãhãre. Jesuisi teòdÿÿnamy jiarÿ watxiwãhãre. Jesusimy, Inynyrÿrenomy rabiõremy tahõtinyinmahãtenyte aõkõ, Jesusimy rabire. Waòraru-ki kaiboho ityhydÿÿdumy toite. Deuxu dee waõmysÿdÿÿ òraru-ki ayreny-ki.

2 Inywitziraõ-ò òsana Deuxu deòdÿÿnakõmy watxiwãhãre. Adeereny tahe inatyhomy Deuxu teòdÿÿnamy wãhãre kaiboho dori wateòdÿÿna urihixinamy ahãtenyte Deuxu dee.

3 Kia tahe warawyòdÿÿna rare iny witziraõ-ò:

4-5 Jiarÿ ariroxikeki, ariõkeki, tai aõkõhe awilere. Ityhydÿÿdu hãwyyõ-wana, wawana aridykekõ aõbo awileke. Kawese ibutumy Deuxu teòdÿÿna mahãdu rotÿÿmyhÿre, tule Jesuisi seriõre, tule Pedro.

6 Jiarÿ, Banabewanahyyle raaõmysÿdÿÿwãhãre iny aõreny tarasanamy. Kia rikirirenykeki, awikeki, aõbo.

7 Inyõ aõbina-ò rakeki, ta aõ aõbo riòwynyke? Aõkõre. Inyõ oworumy uva bederaty ribrõnyke-wana, bederatyõ aõbo ritõleke. Inatyhomy inyõ teòte asi-ò riyrubunumyhykeki, ihowÿsomy aõbo riõmyhÿke? Kohe, riõmyhÿke.

8 Kabexe hãbu wese aõbo jiarÿ rarybereri? Tule tahe bede ywina tyryiti aõbo riritinomy rÿimyhÿre.

9 Moisesi bede ywina ritidÿÿna-ki rÿimyhÿre: —Broreniry itaaõmyhÿ maixõmo tyre rariamy risymyhÿreu. Deuxu aõbo broreni riwotõenymyhÿre. Aõkõre.

10 Tahe waòrarureny-ki aõbo kia rarybere. Kohe. Inyõ ròbrõmyhÿreu, iyremy ritakemy rõhõtinyinmyhÿre. Tule inyõ riòrõmyhÿreu, ijõõ ixidee ritakemy rõhõtinyinmyhÿre.

11 Deuxu Tyytybytyhy aõmydÿÿnanamy adeereny anaerynanykeki, idi aõna aõna aribireny aritaleke, aõbo? Kia aõnityhyre aõbo?

12 Iny witzira aõ aribi ritake-wana, jiarÿboho iratyre iu arõtarenykemy arotÿÿnyrenyke. Tahe tiu ròtaõhyre. Deuxu Rybewihikÿ tÿnydÿÿna ariokòròõtyhy. Tai ibutumy aõ witzira witzira riòludunywãhãre.

13 Dohodÿÿna heto deòdu irysyna ritamyhÿre dohodÿÿna heto-ribi. Xiwe dinodu aõ rÿsÿna ritamyhÿre xiwena-ribi.

14 Kia wese Deuxu rarybere; inyõ Rybewihikÿ ritÿnynykeki, ibutumy aõmy reamyhÿre ritamyhÿre, Rybewihikÿ aõmysÿdÿÿbro-ribi.

15 Tahe jiarÿ aõ aribi retaõhyre tule kia reritinyreri aõ aritakemy aõkõ aribireny. Warybe inyõ riõnonykemy aõkõ watxiwãhãre iko-ki tahe arurukre.

16 Jiarÿ Rybewihikÿ retÿnynymahãre, rexierymahãre dori aritÿnydÿÿke. Kia heka aõhõkÿ aõkõ waloosõnadikemy rare. Rybe aritÿnynyõkeki, heka aõbinatyhyõ wadee kanake inyhe.

17 Ixidee wimy Rybe aritÿnynymyhÿkeki, tai ki aritakre. Ixideewimy aõkõ aritÿnynyke-wana, ihãrele tahe itÿnydÿÿmy iwahisidÿÿna wadee roire.

18 Kiake-wana, timybo wawahidÿÿna ihÿre. Kia heka rare. Rybewihikÿ tÿnydÿÿ-ò arexiòwynyõtyhy. Aõbo inatyhomy wahõrõre, retaõhywãhãre.

¹⁹ Jiarỹ inydeòdumy aõkõ rarehywãhã. Tahe iximy rexideòdunyre sõwemy iny òraru-ribi aritakemy.

²⁰ Judeu mahãdu-ò judeu wesemy jiarỹ rexisỹnyre, judeu mahãduõ dori òraru-ribi aritakemy idi watzireri. Moisesi bedede ywina yrubudỹỹdu mahãdu dee ixiwesemy rexisỹnyre iòraru-ribi dori aritakemy. Urile jiarỹ kia bedede ywiny rubudỹỹna aõkõ rare.

²¹ Bede ywina aõkõ mahãdu dee ixiwesemy rexisỹnyre. Urile Deuxu bedede ywina dire jiarỹ Kristu bedede ywina yrubudỹỹdu jiarỹ watziwãhãre. Kia iòraru-ribi aritakemy jiarỹ rexisỹnyre.

²² Irurukõdu mahãdu-ò waruru aõkõ wesemy rexisỹnyre, irurukõdu mahãduõ ritakemy. Ibutu iny deewesemy rexisỹnyre rarewãhã, aõtxile tiibohoõ aritakemy iòraruna-ribi.

²³ Ibutumy rewinyre, Rybewihikỹ dee iwihedỹỹdukemy ixi-di wãhãre.

²⁴ Ijarana rõhõnykeu ijaramy ijaranadu sohojile rõhõnyra. Tiile wahidỹỹna ritake. Kaiboho maijarenybenyke tii bitakemy.

²⁵ Ibutumy ijaradu ixidi rorenymyhỹre aõikõkõmy rexierynanymyhỹre. Kia riwinymyhỹ wahidỹỹna ritakemy. Kia wahidỹỹna retybykre. Inydee wahidỹỹna tahe retybyõtyhy.

²⁶ Jiarỹ kawesemy raijaranyre aõ aritakemy. Axiò ijesumy resuwãhãre yhyle rehetenyre wese aõkõ.

²⁷ Waumy-di rõrenyhywãhãre. Wadeòdu wesemy waumy resỹnyre. Tai dori resỹnyre. Jiarỹ inyõ-ò Rybewihikỹ aritỹnynykeki, ywiny dehudu wesemy aõkõ arareke, adehuky-ribi riwata lau.

10

¹ Boholabenyke weseriòre ityhydỹỹdu mahãdu. Inybyre ny kia biuwetyky nonoe rawo-di roimyhỹ. Tule ahobesòhòkỹ rawo-di reuròrenyre.

² Moisesi, iwedu, ibutumy aho-di nonoe-di rexisebenyre. Tai iwedu inatyhymy rityhynyrenyre.

³ Deuxu Tytytyby rỹsỹna sohojile wiwese wesele ibutumy rirỹsỹre.

⁴⁻⁶ Deuxu Tyytybytyhy mona sohojile ihỹre. Bee manay-ribi nade. Mana tahe Kristuweselemy ihỹmyhỹre. Inynyrỹ kiamy roiremyhỹu. Deuxu-deewimy aõkõ riwinymyhỹre. Tai rurure bedero-ki. Kia tahe inydeereny bedery urihixina erysydỹỹnamy ratxireri, inyboho-dori aõbina widỹỹna aõkõ rokohotinyrenykemy, iwese tiiboho riwinyre wese aõkõ.

⁷ Inyboho suritxoo tyhydỹỹdukõmy rokoireke iwese ijõ mahãdu tuu rerinanymyhỹre wese kòkremy. Ritina-ki roimyhỹre: –Tiiboho ronymyhỹre riroxikemy, riòkemy. Tahe ritamanyrenyre risinykremy.

⁸ Tule òta òtamy rokotỹỹnyrenyõke iwese tii riwinyre wese –tai 23.000 iny rurure sohojixu-u.

⁹ Deuxu urihixirenyõmyke, iwese tii riwinyre wese. Tai rururenyre hemy-lala jurutana-ki.

¹⁰ Iburaõmyke iwese tii ribuarenyre wese. Tai rubudỹỹdu rirubunyre, Rubu Ýju wahe.

¹¹ Kia tahe bedede ery urihixidỹỹna erysyna inydeereny ratxireri. Riritinymyhỹre iny bedede erynarenymy. Bededỹỹnana konana-ò iòhõmy inyboho roire.

¹² Tahe inyõ òbitimy rỹimy rõhõtynykeki, tii rexijemy ratxike reseke lau.

¹³ Ixirana isirare inydee rehemynyõtyhy rikiòludunyõtyhy. Deuxu awi rare. Riattyõtyhy iòlududỹỹna-txi. Tii inydeereny ixirana-ribi ixitarasana riwahinyre. Iny rurureny wesele ixirana rare. Tai rikiòludunyrenyke.

¹⁴ Waluuna mahādu, kaiboho suritxoo luuna-ribi bexiebeny.

¹⁵ Adeereny rarybere, kaboho dori abederyreny kai bedeerywesety-hymy toiteki. Mohōtinybenyke aōmybo rarybereridi.

¹⁶ Deysanamonahyna aōbo ityhydỹdu mahādu wowydyna rare Kristu hālibu wesemy tuu riōreki? Iny paō riyreyrenyreu, Kristu umy wesemy aōbo rare? Inydee aōbo wowydyna rare?

¹⁷ Inyboho sōwe roire. Urile tahe paō sohojihyy rare. Sohoji butunahyymy rare, paō sohojiribile yre yre rarỹsỹreu, inyboho sohojilemy roire.

¹⁸ judeu ijoi-ò betehebennyke. Kia xiwe rirỹsỹrenyreki, xiweribile rita-myhỹre. Kia aōbo òbitire.

¹⁹ Timybo jiarỹ rarybereri? Rỹsỹna aōbo xiwenamy diwahinydeki, kia aōbo aō rare ada ritxoo aō aōbo rare.

²⁰ Kiamy aōbohe jiarỹ rarybereri? Aōkōre, tuu aōkō rarybereri. Urile, kia raxiwemyhỹre, diabo tyytyby-ò rare. Deuxu-ò aōkō raxiwemyhỹre. Kaiboho diabo tyytybyō-ò tamy bexiijemy. Tii-wana uritere noōmy.

²¹ Wanyrỹ monamy biōkeki, tai diabo monamy tule biōōke. Wanyrỹ roxi-ki biroxioreki, tule tai diabo rỹsỹna rỹsỹōmykre.

²² Deuxu aōbo iny kidihārudenyykre. Inyboho aōbohe ityhyreny iratyre?

²³ Aōwaxiny tuu botỹnyke. aōmydỹnana awire. Ihāre tahe awiōre. Aōmydỹnana ixidee wimy botỹnyke. Urile aōmydỹnana riwiōhenanayōhyre.

²⁴ Uritere aaōmydỹnana sohojidile nohōtiōmy; tule inywitxira aōmydỹna-txi òhōti beake tai aōwiwihikỹmy tamy biwinykre.

²⁵ Biròmyhỹke ibutumy aō rỹmyhỹre meriadu-ki, nohōtiōmy aōbo raremyhỹmy.

²⁶ Ibutu bede aōmydỹna Wanyrỹ wahidỹna rare inydeereny.

²⁷ Ityhydỹdukōdu mahāduō aratobinymy, kai makeki, biroxioreki ibutumy aōbo adee kidekre. Dỹraxyōmy araykywydyna òraru-ki.

²⁸ Tahe adee rarybekeki; kia ritxoo xiwe rare. Irỹsỹōmy, kia hābu raykywydyna òraru-ki tamy ibinare wahe.

²⁹ Araykywydyna òraru-ki aōkō jiarỹ rarybere, tahe iwitxira òrariki. Ijō hābu witxira rayky-di aōkō aritōhōtinymyhỹke. Kia òsana inyō rarybekre.

³⁰ Dealānadile jiarỹ ariroxiwāhākeki, timybo inyō ibinamy wamy rarybeke. Deuxu-ò dori rexideylydỹnyra.

³¹⁻³² Tai tahe, biroxioreki-wana, biōbenykeki, aōmy botỹnykeki, ibutumy Deuxu wowydyna-ò botỹnyke. Inyō atyhyna-di iatysyōmy, judeu mahāduō-ò, judeukōdu mahādu-ò, tule Deuxu tyhydỹduō-ò.

³³ Ibutu dee rarurunywāhāre tamywikemy. Waaōmydỹnana sohojile aōkō rahōtinymahāre ibutu iny aōmydỹna dee rahōtinymahāre tarasadỹmy.

11

¹ Iwese jiarỹ Kristu wesemy watximyhỹre wese kaiboho wawesele boibekre.

² Ararybekre: —Kaiboho awirenyremy kaiboho dori iwese bede eryna araerynanyre wese ibutumy teyrubunymahātenyte.

³ Tahe ijōmy araerynanykre. Kristu iratiwi ibutu hābu ratyre rare. Hābu tahe hāwyyrati ratyre rare. Tule Deuxu tahe Kristu ratiwi ratyre rare.

⁴ Hābu rexitōenyreu, ritỹnnykeu tarahety-di, Kristu rityhynyōre.

⁵ Hāwyyō tahe rexitōenykeu, ritỹnnykeki tarahety-di aōkō, tii tahābu rityhynyōre. Tii dori tarade rasymyhỹre wese ratximyhỹre.

⁶ Hāwyyō tarade rihetynyōkeki, tii tarade riorokre. Hāwyy tarasyrlau raixỹrukeki, tahe tara rihetynykre.

⁷⁻⁹ Hābu tara rihetynyōmyhỹkre dohodỹỹna heto-ki. Bera-ò tyytyby wesemy Deuxu dee hābu rare. Deuxu dee hābu rare. Hāwyy tahe hābu dee-ki rare. Hābu heka hāwyy-ribi aōkō dori iwidyỹ rare. Hāwyy tahe hābu umy-ribi iwidyỹ rare. Hābu hāwyy dee aōkō relere. Hāwyy tahe hābu dee relere.

¹⁰ Tai tahe hāwyy tara riwōmyhỹke. Iu tahe hābu rityhynymyhỹre ŷju òraru-ki.

¹¹ Deuxu ityhydỹỹduy-ki wiwesele wiweselemy ratximyhỹre. Hābu hāwyy-di ratxikemy; hāwyy hābu-di ratxikemy.

¹² Iwese hāwyy hābu-ribi relereu wese, hābu hāwyy-ribi reamy raumynymyhỹre. Deuxu ibutumy riwinyre.

¹³ Kaiboho mohotinybenyke: Hāwyy rexitōenyreu, tarade rihetinyke, aōbo ada aōkōre aōbo?

¹⁴ Hābu iraderehemy rỹira, tarati rityhynyōmyhỹre tuu rỹira. Kiamy bede riwaerynanyreny.

¹⁵ Hāwyy tahe irade rehely rỹira ixiruxeradyỹmy rỹira, hety wese tamy iò rarekremy wahe.

¹⁶ Inyō iwitxiramy rexinohōtinykeki, tamy ararybekre, kia wese: Inyreny-ki kia bede ywina rare ibutumy dohodỹỹna heto-ki.

¹⁷ Aōwesebo botỹỹnykremy adee ararybekre. Wade awiōre iwese ahātenyte wese kaiboho tebutunytentyteu, kia arawiōhenanyōhyyre urile tahe arabinyntyhyreny.

¹⁸ Juhuu ararybekre timybo raholaremy: kaiboho texihitxinytenyte dohodỹỹnaheto-ki, kia tahe retyhynyriōremy watxireri.

¹⁹ Wiribi bexihitxinybenykeki, tai iny òbiti rỹira bierybenykemy.

²⁰ Bibutunymyhỹbenykeu, Inynyrỹ roxina aōkō terỹsỹmahātenyte.

²¹ Ijō detiteremy taroxina riwymyhỹre inywitxirako-ki. Ijō aō rimyōmyhỹreki rama risamyhỹre. Ijō tahe sōwetyhymy riōmy raitxỹtemyhỹre.

²² Kai aōbo ahetoōre, tai biroximyhỹkemy, biōmahākemy? Kia wese-ki Deuxu dohodỹỹna heto aōbo tetyhynyōhyymahāte. Iaōkō rỹira mahādu tule teixỹrudỹỹnymyhỹtenyte. Aōmybo ararybekre. Arawowydydyỹnyrenykyre aōbo? Aōkōre. Tai arawowydydyỹnyrenyōtyhy.

²³ Kia Inynyrỹ-ribi retare, tule aerynamy adeeremy rewahinyre. Kia wahisidỹỹnadyna txuu, Jesuisi Inynyrỹ orotxu rimyre.

²⁴ Rexitōenyredi, riòròre, idi tahe rarybera:

–Kia heka waumy rare. Adeeremy wahidỹỹmy watxireri. Kia biwinymyhỹkreu, watxi òhōtirenny reakemy.

²⁵ Tule riymyhỹre rahudi, tahe bemona hyna rimyra, idi tahe rarybera:

–Kia heka wadeewimy Deuxu, iny-wana ratximyhỹre. Wahālubu òraru-ki kia riwinyre. Kia biōmahābenykreu, aōu watxi òhōtirenny reakemy.

²⁶ Tiubo paō biymahābenykreu, bemona hyna-ribi biōmahābenykreu, warubu rybe tetỹnyntenyteri idi adòòsekreu.

²⁷ Tai inyō òhōtiōmy riykeki-wana, riōkeki-wana, tii Jesuisi umymy hālubumy òraru-ki ratxireri.

²⁸ Sohoji sohoji taaōmydỹỹnana-di rohōtinykre, idi tahe riymyhỹre, riōmyhỹkre.

²⁹ Inyō Jesuisi umy-di rōhōtinyōkeki, ixidee aōbinahakỹ kidiwinyke.

³⁰ Kia òraru-ki sōwemy binamy òhyyle toite, tule iny sōwemy rurumy rỹira.

³¹ Iny ixi-di rohōtinykeki, aōbinahakỹ rexierykemy, tahe iny rexiōbitinyke. Deuxu tai aōhōkỹmy rotỹỹnyōtyhy.

³² Inynyrỹreny inyboho riòbitinymyhỹre. Kiamy heka bede mahādu-wana aōkōkeki, aōhōkỹmy rotỹỹnyrenykyre.

³³ Kiamy, waseriōreboho, roximy bibutunykrey, ijō wii biraòbenykyre.

³⁴ Inyõ rama risamy r̃ikeki, taheto-ki riroxike tai rihuõmy r̃imyhỹkre Deuxu ywisid̃ỹna-ki. Adee arehemynykre, ijõ kia aõna aõnamy arðerynanyrenykre.

12

¹ Deuxu Tyytybytyhy bede eryna wixira wixiramy adeereny ararybekre, araerynanyrenykemy.

² Ityhyd̃ỹdukõdumy toitemahãu, aõõ aradyrenyre suritxoo rybeõhõk̃y-ò.

³ Tai arabedeerynyreri: Inyõ Deuxu Tyytybimy rarybemyh̃keki, tii rarybeõtyhy: Jesuisi ibina rare. Tule inyõ uri rarybeõtyhy: Jesuisi Wanyr̃y rare. Tii Deuxu Tyytybytyhydile tuu rarybekre.

⁴ Deuxu Tyytyby bede eryna wixira wixira sõwemy r̃yire. Deuxu sohojile tahe iwahid̃ỹdu rare.

⁵ Aõmys̃d̃ỹwi-ribi lahixi rare, tahe Inynyr̃y sohojile rare tamy rakaaõmys̃d̃ỹnyke.

⁶ Aõmyd̃ỹna wiribi lahixi rare, tahe Deuxu sohojile ibutud̃ỹdu rare. Tii iny-ò aõmys̃d̃ỹna wid̃ỹna riwahinyre.

⁷ Sohoji sohoji tabedeeryna wixira wixira Deuxu Tyytybytyhy-ribi ritamyh̃re ibutu iny wiðhed̃ỹmy.

⁸⁻⁹ Inyõ-ò bede eryhyk̃y wahid̃ỹmy ratxireri, Deuxu Tyytybytyhy iwahid̃ỹdure. Ijõ-ò tahe rybe bederyd̃ỹ wahid̃ỹmy ratxireri, iwahid̃ỹdu tiile rare. Ijõ-ò tahe ityhyd̃ỹtyhy-ki rarekemy. Deuxu Tyytybytyhy iwahid̃ỹdure. Ijõ-ò tahe, õhotibedumy rarekemy. Deuxu Tyytybytyhy ris̃nyre rare.

¹⁰ Ijõ-ò tahe, bedeõby wid̃ỹdumy rarekemy, ijõ-ò rybe-di t̃nyd̃ỹdumy, ijõ Tyytyby erydumy, ijõ rybewixiramy rarybekemy, ijõ rybe wiuròd̃ỹdumy.

¹¹ Deuxu Tyytybytyhy sohojile tahe iwahid̃ỹdu rare. Tii sohoji sohoji-ò riwahinyryh̃re ixideewimy.

¹² Iny umy sohojihy rare. Urile iaõmyd̃ỹnana sõwere. Kia wese ityhyd̃ỹdu r̃yira ityhyd̃ỹdu mahãduy-ki, Kristu-ki iny sohojihy.

¹³ Sohoji sohoji mahãdu-ribi rabutura, ijõ judeu mahãdu-ribi, ijõ judeukõdu mahãdu-ribi, ijõ deòdu mahãdu-ribi, ijõ deòdukõdu mahãdu-ribi. Wiji tahe Deuxu Tyytybytyhy-di sohoji hõrõmy iny r̃yire. Idi tahe inyboho t̃ximy r̃yire.

¹⁴ Umy dori sohoji aõmyd̃ỹnana-di aõkõ rare, sõwere tahe.

¹⁵ Inywa rarybekeki kia rarybekre õsana: jiar̃y umy aõmyd̃ỹnana aõkõ watzireri, debò aõkõ dori rare. Kia rarybekeki, ihãre ta umy aõmyd̃ỹnanaõlemy ratxireri.

¹⁶ Nohõti rarybekeki: rue aõkõ jiar̃y rare, tai dori umy aõmyd̃ỹna aõkõ rare, Kia rarybekeki, ihãre ta umy aõmyd̃ỹnanale ratxireri.

¹⁷ Ibutumy umy ruelemy ratxikeki, timybo rokoholarenkyre. Ibutumy nohõtilemy ratxikeki, timybo rue rareke timybo robirenykre.

¹⁸ Deuxu ibutumy aõ ritidire, titxibo ixideewimy rõhõtinyre.

¹⁹ Ibutumy aõmyd̃ỹnana wiweselehek̃ykeki, timybo raaõmys̃d̃ỹnyke?

²⁰ Inatyhymy aõmyd̃ỹnana sõwere. Umy tahe sohojilere.

²¹ Rue debò dee rarybeõtyhy: Kai aõ aõkõ tate. Tule ratiheka waò rybeõmy: Kaikõkeki wadee awike.

²² Kia k̃nyhe. Aõ aõmyd̃ỹnana inydeereny iruruõmy aõmy aõkõ r̃yire wese, tii aõwityhy r̃yire.

²³ Tule aõbo inydee aõmy aõkõ r̃yira tamyhe woreke r̃imyhỹre iruxeramy aõkõ rare, iny woreke r̃imyhỹre.

²⁴ Aõbo inyumy-ki iruxeramy rare, kia urid̃ỹõmy. Deuxu tahe umy aõmyd̃ỹnana ibutumy ributunyre. Tii aõ ibuturatyre rityhinyre.

²⁵ Kiawese alòreõmy umy-ki ibutumy umy aõmydỹnana wiwana raaõmysỹdỹnnyhỹre wii riwiòhenanymhỹre.

²⁶ Sohoji aõmydỹnana txubererekeki, iuhe rubererenyke. Ijõ teysakeki inyõ riwowydnykeki iuhe reysake.

²⁷ Boholabenyke, kaiboho Kristu umy mahãduõ toite. Ityhydỹdu sohoji sohoji heka umy aõmydỹnanaõ wese rare.

²⁸ Deuxu ityhydỹdu mahãduykile iny rihitxinyre. Juhuu Jesuisi teòdỹdu mahãdu, ihewo-ribi Deuxu rybe tỹnydỹdu mahãdu, idi ierydỹdu, aõwiwihikỹ widỹdu, òhotibedu mahãdu, wiòhedỹdu, dinoduwesedỹnadu, rybewitxira ersydumy.

²⁹ Ibutumy deòdu aõbo roire? Ibutumy tỹnydỹdu aõbo roire? Ibutumy erydỹdure aõbo? Ibutumy aõwiwihikỹ widỹdure aõbo? Aõkõre wii ihitxihitxire.

³⁰ Ibutumy ywisidỹ rieryre aõbo? Ibutumy rybe witxira rybedu aõbo? Ibutumy rybewitxira wiuròdỹdure aõbo? Aõkõre.

³¹ Tahe, eryna wiwihikỹmy mynyny, atximyhỹbenyke. Tahe ariteòsynykre tibo ryy.

13

¹ Ibutumy iny rybe witxira witxira arierykeki, ýju rybe adrierykeki, kia tahe luuna-di aõkõkeki, jiarỹ aõwodỹna widỹna wesemy ararekre.

² Jiarỹ ibutumy Deuxu rybewahidỹ eryna ijõdikeki, ibutumy bedeery ijõdikeki, hãwãlò iherina-ribi aritake watyhydỹna kiadikeki, tahe luuna-di aõkõkeki, aõ aõkõ watzireri.

³ Ibutumy waaõmydỹna iny aõkõ mahãdu-ò ariwahinykeki. Waumy Kristu Rybewihikỹ dee òraru-ki wòsikemy ariwahinykeki, tahe luuna ijoõkeki, kia heka aõkõweseleke.

⁴ Inyõ luunadikeki, ywimy rarekre, awimy rarekre, ihãrukõmy rarekre, luunadikeki, ixityhydỹdukõmy rarekre.

⁵ Inyõ luunadikeki ihỹkỹhỹkỹmy aõkõ rarekre. Ixisohojidile aõkõ rõhõtynykre.

⁶ Òbitiõna-di deysaõmy, inatyhyle kedeysakre.

⁷ Moõ iluunadireki ibutumy aõhebo rotỹnykre, ibutumy rityhynykre, ibutumy riraòkre, ibutumy riòludynykre.

⁸ Luuna tiu itueòtyhy, tahe rybe tỹnydỹna aõutxumy ituekre, rybewitxiramy rybe ituekre, bede eryna ersynamy tule ituekre.

⁹ Inyboho iyrelemy rieryrenyke. Tule iyrelemy ritỹnynyre.

¹⁰ Aõutxumy tahe kia iyre rexihukre, ibutumy kanaerykre, kia hãbu òbiti tyhy kedehemynekeu, Kristu wahe.

¹¹ Uladumy rarewãhã uladu wesemy rarybere, uladu wesemy ixidi rarewãhã, uladu wesemy raykywydynanyra. Hãbumy relereu tahe, wauladumy nona rerire.

¹² Wiji tahe inyboho robirenyre, iwese itxerenatỹnykowese-ki, kiadxu tahe, wiòsanamy rokobirenykre. Katahe iny rieryrenyke txuraõ, kiadxu tahe, iwese tii inyboho dierydenyde wese rikieryrenyke.

¹³ Tahe inataõ aõmydỹna rỹire: ityhydỹna, iraròsõna, luuna. Ijõ ratyre tahe luuna rare.

14

¹ Luuna-di boibeke ibutu ijõ ratyre. Tyytybytyhy ersyna biijebenyke. Iratyre biijebenyke Deuxu rybe tỹnydỹna erydỹna.

² Inyõheka rybe witxiramy rarybekeki, hãbu-ò aõkõ rarybereri. Deuxu-ò sohojile rarybere. Inyõ irybe rieryõre. Deuxu Tyytybytyhy rybe tii erydure.

3 Inyõ Deuxu rybemy rarybemyhỹreu, iny-ò rarybereri. Tai riwiòhenanymyhỹre, riòbitinymyhỹre, riteysanymyhỹre.

4 Inyõ rybe witxiramy rarybereu, tiilehyy rexiwiòhenanymyhỹre. Inyõ tahe rybe ritỹnykye wana, dohodỹỹna mahãdu riwiòhenanyre.

5 Ibutumy rybe witxiramy rarybekeki, tii tahe wadee awire. Tahe ibutumy Deuxu Rybewihikỹmy rierynanykeki, kia iratyretyhy wadee awire. Deuxu rybe tỹnydỹỹna tahe, rybe witxiramy rybedu ratyre rare. Wiuròsòdỹỹdudile rybe witxiramy rarybeke dohodỹỹdu mahãdu wiòhedỹỹmy rarekemy.

6 Jiarỹ adeereny ararybekeki, rybewitxira-di. Tiwesebo arãwiòhenanyrenyke. Urile bede erytỹmyra-di, erynatyhyhyky-di, inatyhyeryna-di araerynanykeki, kia-di tahe arãwiòhenanykre.

7 Ka tahe wiudỹỹna rare. Wyhyhykỹ jurònawesena ada rerotisõmo wiudỹỹna kidiwiunykeki, tahe awimy riwiunyõke, timykibo iny rieryke aõbo riwiun-yreri.

8 Tule juròna òbitimy ritxurònyõkeki, timykibo aõbinadu mahãdu rierykre aõbina-ò nomy rexiywinykemy.

9 Kaiboho tule kiawesere. Inyõ arybe rieryõkeki, tiwesebo rieryke aõmybo tarybetenyteri. Kiawese dori yhydeele tarybetenyteri wese.

10 Inatyhymy sõwemy rybe witxira rỹire bede-ki, ibutumy tahe aõna aõnamy rybedu rarybere.

11 Aõmybo rarybere arierykõkeki, rybedu dee jiarỹ iny witxira, rybewitxi-raõ tamy rare, tule tii wadee rare.

12 Kaiboho Deuxu Tyytybytyhy eryna teijetenyteri. Tai dohodỹỹna mahãdu wiòhedỹỹmy marurunybenyke.

13 Inyõ rybe witxiramy rarybekeki, iòbitidỹỹnamy rexitòenyke.

14 Rybe witxiramy arexitòenykeki, watyytybyle rexitòenyteri waraykywy-dyna-ò ralòõtyhy.

15 Tai tahe aõhebo arotỹỹnykre? Watyytyby-di, warayky-di arexitòenykre. Idi watyytyby-di warayky-di arawiuunykre.

16 Kai atyytybyle-di textitòenymyhỹteu, timykibo inyõ rierykemy? Idi rarybeke aixitòedỹỹna rexihukeu. Tii dori arybe rieryõre.

17 Kai tahe inatyhymy awimy textitòenye, tai tahe iny aõ rieryõhyre, idi riwiòhenanyõtyhy.

18 Deuxumy reàlàwãhãre. Jiarỹ dori aratyrereny rybe witxiramy rarybe-mahãre.

19 Tahe dohodỹỹna mahãdu-ò iruyre rybe eremy ierysynamy ararybeke ada sõwemy rybe eremy iwitxira rybemy anarybekeki. Juhule wadee awityhyre ijõ ratyre-ki iny kiawese inatyhymy reerynanyre.

20 Waityhydỹỹdu seriòre uladu raykywesemy aõkõ bexi-raykynymyhỹbenyke. Inyery bederyhykỹ wese maraykynybenyke. Aõibina erysynale uladu aõeryõ wesemy boibeke.

21 Bede Ywina tyyriti-ki kia rỹire: —Kia inydee, hãbu rybe witxira-di anarybekre. Ihãre ta warybe dee tiiboho roholarenyõkre. —Kiamy tahe Wanyrỹ rarybere.

22 Inatyhymy tahe iwitxira rybe rybemy ityhydỹỹdu mahãdu dee deòsina aõkõ rare. Kia ityhydỹỹdukõdu mahãdu dee deòsina rare. Tule Deuxu rybe tỹnydỹỹna ityhydỹỹdu mahãdu-ò rare.

23 Dohodỹỹna mahãdu wii ributunykeu, rybewitxiramy rarybemyhỹreki. Ityhydỹỹdukõdu mahãdu ralòkeki, iny ierykõdu ralòkeki, timybo tii rõhõtinyke. taitxỹtetenyterilemy idi rõhõtinyke.

²⁴ Tahe ixityre ityhydÿÿdukõdu mahãdu ralòkeki, tahe Deuxu rybemy rarybereriò, ralòkeu, tii rexierykre òrarudumy rare, ibutumy aõwòmý roholare tarayky riixixanyke.

²⁵ Aõbo tawo-ki riwòmý rÿimyhÿredi rexierymy ixi-di rõhõtinykre. Tai resekre tatiowomy Deuxu deãlanamy reãlakremy. Tule rarybekre: –Inatyhymy Deuxu ayreny-ki ratxireri.

²⁶ Aõhebo dohodÿÿna-ki rokotÿÿnyrenykre waseriòreboho wii rikibutunrenykreu. Kia heka rare: Inyõ wiuòmý kanawiunykre, ijõ tasÿ Deuxu rybe bede erydÿÿna kedeerynanykre, ijõ itÿnydÿÿnamy kanarybekre, ijõ rybewitxiramy rybena kanarybekre, ijõ iwiuròsòdÿÿnamy kanarybekre. Aõhebo botÿÿnybenyke ityhydÿÿdu wiòhedÿÿnamy rarekemy.

²⁷ Inyõ rybewitxiramy rybemy ratxire riki, inatxi inataõlemy rarybeke, wihewomy, tule iwiuròsòdÿÿdulemy rarybekre.

²⁸ Wiuròsòna ihoõkeki, rybeõlemy ronyke dohodÿÿna heto-ki. Ixiwanale Deuxu-di rõhõtinyre, rexitòenymy.

²⁹ Urile inatxi, inataõlemy rybe tÿnydÿÿdumy rarybekre wana, ijohonadu mahãdu tahe irybe-di rõhõtinytyhyke timybo.

³⁰ Ijõhonadu-ò itÿnydÿÿna rybemy ratxikeki, rybedu rexihudi rarybekre.

³¹ Ibutu dori Deuxu rybemy rarybekre, sohoji sohojimy. Tai ibutumy rierykre, reysakre.

³² Rybe tÿnydÿÿdu mahãdu rayky, tiile rexierymyhÿkre.

³³ Deuxu tahe wimy uriuridÿÿdu aõkõ rare; tii tahe òbitina widÿÿdu rare. Ibutu ijõ dohodÿÿna heto-ki kia wesemy rare.

³⁴ Hãwyy tahe dohodÿÿna-ki roholamy rÿimyhÿre rybeõhykymy tai aõwedumy aõkõ. Ywilemy rÿirake iwese judeu bedeywidÿÿna roimyhÿre wese.

³⁵ Tÿÿraxinadikeki taheto-ki tahãbu-ò rÿÿraxike. Hãwyy dohodÿÿna-ki rarybemyhÿre heka ixÿruna rare.

³⁶ Timywese tahõtinytenyete. Deuxu rybe aõbo aykyreny-ki ròhònnyre ada kaiboho sohojile aõbo ijõdire.

³⁷ Inyõ rybe tÿnydÿÿdumy ixi-di rõhõtinykeki ada Deuxu Tytybytyhy-ò wiòhedÿÿnamy rarekeki. Timybo rarybekre. Kia waryberiti heka Deuxu bede ywidÿÿna rierykre.

³⁸ Inyõ kia rityhynyõkeki, tii wile ratyhyòdÿÿõkre.

³⁹ Iribi tahe waseriòre tÿnydÿÿdumy boibekemy atxibenyke. Ixinamy rybewitxiramy iny rarybemyhÿke.

⁴⁰ Ibutumy aõhebo botÿÿnybenykre. Òbitilemy, ywilemy.

15

¹ Aõtxi õhõtireny araijaradÿÿnykre. Kia tahe rare. Rybewihikÿ iwese adeereny retÿnnyre wese, tetyhynytenyete wese, tule tetyhynyhy ahãtenyete.

² Tai tahe tarasanawo-ki ahãtenyete rybe teeryhy ahãtenyete ki iwese retÿnydÿÿnyre wese. Aõkõkeki aròtenareny aõtyhy aõkõ adeereny ihÿre.

³ Juhuutyhy adeereny retÿnnyre iwese raholare wesemy. Kia rare: Kristu iny òrarureny dee rurure. Kiamy heka ritidÿÿna roire.

⁴ Tule mana wabede-ò rahãluure. Inataõ txu idi rÿidi tahe, rubu-ribi rexixare, ritidÿÿna rarybere wese.

⁵ Rexideòsinyre Pedro dee, idi tahe waòinatxi mahãdu dee.

⁶ Idi tahe 500 iny ratyre tuu robire. Kia iny ityhydÿÿdu seriòre mahãdu ibutumy rexibutunymyhÿre Jesusimy robire. Ijõ rurure kia butudÿÿnay-ribi, tahe ijõ irulemy ihÿmyhÿre.

⁷ Iribi tahe Txiau tuu robire, idi tahe ierydu mahādu ibutumy tuu robire.

⁸ Ihewo-ribi tahe jiarỹ tuu rabire. Iwese uladu ibededỹnanakōmy reare wese tuu rabire.

⁹⁻¹¹ Jiarỹ ierydu hewo ludu rare. Uritere erydumy wanidỹỹōmy watxiwāhāre, raixỹrure wahe. Jiarỹ dori juhuu ityhydỹỹdu mahādu aōhōkỹmydỹỹdu rare. Deuxu ruxetōenale dori aōmy watxiwāhāre. Iruxetōena aōnihikỹmy waki riwinyre. Jiarỹ dori ibuturatyre aōmysỹdỹỹna rewinyre. Tahe jiarỹ aōkō wāhāre. Deuxu ruxetōenamy wahāre jiarỹ aōbo ada tiiboho aōbo adeereny relyyreny, idi kaiboho tetyhynletenyte.

¹² Kristu rubumy roira-ribi rexixara, kiamy heka rarybemahāreny. Aōherekibo inyō rarybereri rurumyhỹre-ribi inyō rexixaōkremy.

¹³ Inyō tiu rubu-ribi rexixaōkeki, Kristu tahe rexixaōre tarubu-ribi.

¹⁴ Kristu rubu-ribi rexixaōre wana, jiarỹboho aōmy waryberenyōna idi aō atyhydỹỹnaōna.

¹⁵ Kristu inatyhymy rexixaōkeki, inyboho Deuxumy ruimy rybedu mahādumy roire. Kristu ixixana rybemy dori jiarỹboho rarybemyhỹreny. Kiata bohe Deuxu, Kristu riixixanyōlere.

¹⁶ Rubumy roimyhỹre mahādu rexixaōkeki, taita Kristu rexixaōre.

¹⁷ Kristu rexixaōkeki, ainatyhynareny aō aōkō rare. Aōrarudile ahāteny.

¹⁸ Tule, ityhydỹỹ-di rurure mahādu, biu-ò ròiōtyhy.

¹⁹ Kabede-ki sohojile inyboho Kristu riraōmyhỹreki, inyboho bedewotyhytyhymy roire.

²⁰ Inatyhymy taheka Kristu rubumy roire-ribi rexixare. Tii juhuuludu rubu bede-ribi dòsede mahādumy roirekemy, tai iny tule rerexixarenkyre.

²¹ Iwese hābu sohojiō rubu diwyde wese, tule hābu sohojiō rubu-ribi ixixana diwyde.

²² Iwese Adaō-ki ibutumy iny rurukemy rỹimyhỹkemy tule Kristu-ki ibutumy ixixana kiditakre.

²³ Kristu bededỹỹnana kedehemyhỹkreu, rubu-ribi ixyby ixixana kòdòhònykre. Kristu juhuu rexixare, ihewomy tahe taeryna mahādu kidiixixanykre.

²⁴ Tai tahe bede konanakre. Jesuisi ibutu wedu mahādu, bede dinodu mahādu, Iòlò mahādu kanahukre. Tahe ibutumy tyby Deuxu-ò òlòna kidiōkre.

²⁵ Jesuisi tahe ibutu ratyre Iòlòmý ratxikemy rarehykre. Iòludu mahādu ibutumy iwarawo-ki rỹikre.

²⁶ Iòludu konana heka, rubu rare. Tii tule riixāwididỹỹnykre.

²⁷ Ryberiti kiawese roire: –Deuxu tahe ibutumy iwarawo-ki ritidireri. Iximy ritidiōtyhy tii dori tidisidu rare.

²⁸ Rexihudi tahe tule iRiòre ritidikre. Tai tahe Deuxu ibutu iòlòmý rarekre.

²⁹ Rubumy rỹira ixyby kedexixaōkeki aōherekibo iny deròwy teratisebenyteri, rubumy roira mahādu hārehekỹle wahe.

³⁰ Aōherekibo berebunatyhyhykỹ-txi inyboho iòhārumy ratximahāreny re txuō txuōlemy.

³¹ Ibututxu rubu reijemyhỹre. Adeereny wawowydynatyhymy watxireri. Jesuisi Kristu Inynyrỹ òraru-ki. Tai heka kia lau rarybemahāre.

³² Hābu mahādu-ò Efesu hāwā-ki iròdu debure-ò aōbina wese resumahāreki aōtyhybo aritakre? Inatyhymy aōbo? Rubu rexixaōkeki, rikiroxiryrenyke, rikiōrenyke, biurasòmý dori rukururenkyre. Aō aōkō inytyhydỹỹna. Kia riki ityhydỹỹdukòdu mahādu tuu rexirybeny, abiòwa mahādukeki.

³³ Ixi itxenadỹỹōmy: kia biòwa bina dori iny ixihemy riatymyhỹhỹre.

34 Ywityhylemy boibeke, òbitilemy òrarurenyõmy, sõwemy iny Deuxu rieryõre. Kia heka iny ixỹrudỹñnareny rare, tai rarybewãhãre.

35 Tahe inyõ kanarybemyhỹkre: –Timybo rubu kedexixakre. Aõumywesemykre iumy?

36 –Itxỹte, juhuhu alòboròna rabròõkeki tiu txuhuõna.

37 Telòho iny ribòrònyõtyhy, ityle iny ribòrònyke. Iwese maixõmoty ribòrònyke ada oworuty wese.

38 Ibututy-ò Deuxu iraty umy riwahinymyhỹre ixideewireki. Deuxu ixideewimy alòbòròna ritxuhudỹñnymyhỹre timybo?

39 Dee ibutumy wiwese wese aõkõ rare. Inyde, iròdude, nawiide, uturade ibutumy tahe wiribi hitxi hitxire.

40 Biumy rỹira mahãdu tule lahixire, aõwitxira witxira bedemy rỹira kia wowdynareny wiribi hitxire. Tii-wana wimy rahitxirananyre.

41 Txuu ahãdu, taina, iloosònareny wiribi hitxire. Taina ijõ taina-ribi iruxeratyhyre.

42 Tai tahe kia wese rubu-ribi ixixana rỹimyhỹre. Umy rubu su-ò rahãloodỹñmyhỹre rarònyhe txu. Idi tahe irulemy kòdòhònykre, alòbòròna ruhunymyhỹre wese tahe umy tuedeõnaõ. Bede luruhukỹ-ki rahãloodỹñmyhỹre, tahe loosònatyhy-ki kòdòhònykre.

43 Iruruõ-di umy heka rahãloodỹñnymyhỹre ibinare, tahe iruxeramy tarurutyhy-di kòdòhònykre.

44 Iny umy wesemy rahãloodỹñmyhỹre, tahe tyytyby wese kia umy-di kòdòhònykre, biuludu mahãdu wahe.

45 Kiamy heka ritidỹñna-ki roire. Iny umy riuhemyhỹreki, tule tyytyby umy riuhemyhỹremy rỹire: Juhuu inyiru Deuxu riwinyre Adaõ heka rare.

46 Juhu tahe inyumyreny tayry-di riwinyre idi tahe ritytybynyre.

47 Juhuu ludu hãbu suribi ije rare. Ihewo-ribi Hãbu biu-ribi ihỹre Kristu wahe.

48 Juhuu hãbuwesemy ibutumy iny bede ludu ihỹre juhuhu inytyhy wese wahe. Hãbu biuludu wesemy ibutumy biu ludu mahãdu ihỹre.

49 Tai tahe kabede hãbu wesemy inyboho rỹimyhỹrenyre wesereki, tule biu ludu Hãbu wesemy rỹkỹirenyke.

50 Waityhydỹñdu Kia heka rarybemahãhyreri, iwese inyboho ihỹmyhỹrenyre wesemy tiu Deuxu Òlòna-ò ralòõtyhy. Iny umy heka ruruhy umy rare, tai tahe Deuxu Òlòna ritaõtyhy, kowa-ò dori iny umy ruruõtyhy.

51-52 Tahe aõbo teeryõte adee aritỹnynykre: Ibutumy iny ruruõkre. Ibutumy ityhydỹñdu iny ruruõle iumy riwitxiratỹmyranykre, aõwesele reakre, iny tarue riberenymyhỹre wese reakre, ikonana juròna ritxurònykreu. Juròna ritxurònykre idi ibutumy ityhydỹñdu rubumy rỹira riumywitxiratỹmyranykre umytuedeõna-di. Inyboho ityhydỹñdu mahãdu tulekre.

53 Tahe rekexiwiurònyrenyke, iny bede umy dori rurumyhỹre. Rakaumynykre umy witxira-dí taita rukururenyõtyhy.

54 Iny umy witxiradikre, tahe kia rybe rexihumy rỹikre: Ryberitina rarybere: –Rubu ijesu rikitarenykre:

55 –Aõherekibo rubu, aijesuna wawana tetaõta? Aõherekibo tiwamytxitxidỹñnyõte?

56 Òraru rubumytxitxidỹñdu rare. Bedeywidỹñ òraru rurudỹñna rare.

57 Deuxu umymy rekealàmymhỹkre, tii dori ijesu inybohoreny ritakemy riwiòhenanymyhỹre. Jesuisi Kristu Inynyrỹ-di diwiòhenanymyhỹde.

⁵⁸ Tahe weseriòre luu mahãdu, bityhynyhybenyke, ywihyymy ahãbenyke, Wanyrỹ aõmysỹdỹña-ò hyy tiiemy ahãbenyke. Aaõmysỹdỹña Wanyrỹ dee, idi inydee awimy rarootinymhỹre.

16

¹ Nierumy ararybekre. Kia bibutunykemy kowa tyhydỹdu mahãdu-ò, Judeia mahãdu wahe. Iwese Alaxia mahãdu-ò ròerynanyre wese, kaiboho tule ijõ dee bitabenyke.

² Semana juhu ludu txuu, iny sohoji sohoji tiwesebo tòtatenyete jura birarenymahãbenyke rawahikremy.

³ Tai adehemynykreu kia nieru rexihumy rỹikre myiõtyhy tahe ijõ rarasamy. Tahe mobo kai tyyriti-di biditakre, tii-wana nieru iny ariteõnykre Jerusalẽ-ò.

⁴ Tahe jiarỹ arakewana iny dee wikeki, tuu wawana kodoikre.

⁵ Macedonia bede-ò arakre rahudi arehemynykremy adeereny watzireri. Macedonia-di delemy arakre.

⁶ Araroorehenykre òsana biubede taile arahukre awanarenhyyle. Tai ele elemy biwatỹidỹnykre titxibo arakemy.

⁷ Deuxudeewikeki urihimyò aõkõ akireny bede arieke bededỹñana arahukre akireny.

⁸ Efesu hãwã-ki Pentecoste woranabedehesi konana-ò ariijekre. Idi tahe arakre.

⁹ Ijõtòbònahakỹ wese irayhyky rỹimyhỹre waaõmysỹdỹñ. Tai waaõmysỹdỹña irutaõre, ihãre ta wamy òludu sõwere. Namy sõwehyymy taheka òludu rỹire.

¹⁰ Tahe, Tximòtxi rakeki, iixỹru lau biijemy tii dori Deuxu aõmysỹdỹña diwinymhỹde wawese.

¹¹ Inyõ Tximòtxi-di aõmy aõkõ ihỹkeki heka wadee awiõre. Wadee itỹina-ò biwiòhenanybenyke ywina-di. Reraõmahãre dori ityhydỹdu seriòreboho wana kanakemy.

¹² Inyseriòre Apòlo-ò sõwemy rarybewãhãre arorarenymy rakemy ijõ iny seriòreboho-wana. Tahe tii heka Deuxudeewimy aõkõ idi rõhõtinyinymhỹre. Idi tahe rakre ixideewimy tiu txumybo.

¹³ Aõu aõu bexiywinylemy borukubeke. Inatyhymy òbitimy myibenyke, hãbu rurutere wesemy bexirurudỹnyke.

¹⁴ Aõhebo botỹnybenykemy ywina-di luuna-di botỹnymy boibemahãke.

¹⁵ Tefana, tasỹ mahãdu-wana Akaia bede ludu-ki ityhydỹdumy juhuru rare. Kia teerytenyete. Tiiboho ityhydỹdu mahãdu wiòhedỹduhyymy ihỹrenyete.

¹⁶ Tamy boholabenyke, ibutumy tamy wityhymy biwinybenyke. Tule kia wese wiòhedỹdu biwiòhenanybenyke.

¹⁷ Tefana, Fortunatu, Akaio kaò ditehemynydenyete. Taita wadeysamy watzireri. Tiiboho riwawiòhenanyrenyete kaiboho kaki aõkõ atximahãtenyete.

¹⁸ Tiiboho wawo-ribi riwateysadỹnyete, araykyreny òsỹnyete tule wahe. Kia mahãdu heka ratyhydỹmyhỹke.

¹⁹ Kaki Asia bede-ki ibutumy dohodỹña mahãdu tarybe wehityhyna adeereny riwahinyreri. Akila, Prisila-wana taluuna Wanyrỹnimy rybe adee riwahinyrenyete taheto-ki dohodỹnareny mahãdu tule wahe.

²⁰ Ibutu seriòre mahãdu rybe wehityhyna adeereny riwahinyreri. Birybenybenykreu wii bimybennykre wiwetya-ki seriòrewesemy tamy luòsòna òbitityhyna-di buòbenyke.

²¹ Iroo tahe jiarỹ ariritinykre wadebò-di wahe. Jiarỹ Paulo warybe wehi-tyhyna rewahinyre.

²² Inyõ Inynyrỹ luuõkeki, aõbinahakỹbo tamy kanake, kiamy rexirybenyre: 'Maranata' kia heka Jesuisi wymy kanake rare.

²³ Deuxu luuna adeereny kanakemy idi watxiwãhãre.

²⁴ Ibutu-ò waluuna Jesuisi Kristumy. Kie.

2 Oritxi Mahãdu-ò 2 Oritxi Hãwã Dohodỹna Mahãdu-ò

¹ Jiarỹ, Paulo, Deuxu deòduõ watzireri Deuxudeewireki. Tahe katyyriti rewahinyrenyre Oritxi hãwã dohodỹna mahãdu-ò. Iny seriòreneny Tximòtxi wawana ihỹre. Tule rewahinyrenyre ibutu ityhydỹỹdu mahãdu roholakemy Akaia bedeki.

² Ruxetòena, ywina-wana adeereny kanakemy idi watzireri Deuxu inytybyreny-ribi Jesuisi Kristu Inynyrỹ-ribi.

³⁻⁴ Deuxu heka Jesuisi Kristu tyby rare. Iny wiòhedỹỹdu ihỹre. Ruxetòena sòwemy inydeereny riwahinymyhỹre. Ibutumy aõmydỹỹna-di riwiòhenanymyhỹre. Tai tahe iny witxira rikiwiòhenanyrenykre Deuxu wiòhedỹỹna-di.

⁵ Iwese Kristu aõhòkỹmy dỹỹnana kaiboho teeryteny wese, Kristu wiòhedỹỹna bitamy bierybenyke.

⁶ Jiarỹboho aõhòkỹmy arotỹnyrenykreu, awiòhenadỹỹrenykre tuukre. Tai tahe tarasana iribi bitake. Deuxu-ribi wiòhedỹỹna arimynykeki, kia biu-ò hena iribi bimyeke arawiòhenanyrenykre. Tai tahe kaiboho arururenydikre aõhòkỹmy botỹnybenykreu.

⁷ Tahe wararòsòna sòwemy ihỹre akireny. Tiubo aõhòkỹmy dỹỹnanamy botỹnybenykreu tule wiòhedỹỹna bitabenyke iwese aritarenykre wese.

⁸ Waityhydỹỹdu seriòre, Asia bedeki jiarỹboho sòwemy aõhòkỹmy ratỹnyroiremaha. Wadeereny heka isiratyhyre ibedeki. Tai heka raberumy roiremaha arururenyke lau.

⁹ Rahòtinyrenyre tai wakonanareny sana. Kiamy heka wadeereny ditỹnynde bedeynamy: ixi-di inyõ nohòtiõmy, Deuxudihyyle wahe. Tii dori rubu-ribi ixixadu rare.

¹⁰ Inatyhymy tii riwatarenyre kia brebuna-ribi. Ibutu aõna aõna-ribi riwatarenykre ixityre.

¹¹ Kaiboho dori wadeereny Deuxu-ò texitòenytenyteri. Tahe ibutumy ixitòena-ò Deuxu kodoholakre tai riwiòhenanykre. Tahe ibutumyiny Deuxu riteàlananykre.

¹² Ibutumy jiarỹboho heka kia Deuxudeewimy rewinyymyhỹrenyre. Tai heka wadeysarenyre jiarỹboho. Awanareny heka tule rarybemahãrenyre: òbitinamy, Deuxu rurunamy. Iny raykywydyna-di aõkõ wahe, Deuxu raykywydyna-di.

¹³⁻¹⁴ Idi mariakele, biritinykele, bierykele, kia reritinyrenyre adeereny. Wiji urihimyòle teerymy toite. Jesuisi txu tahe ibutumy bierybenyke. Jiarỹboho areysarenykre bierybenykeki wahe. Tule kaiboho beysabenykre.

¹⁵⁻¹⁶ Juhuu rahòtinyre kiawesemy: arakemy ixi-di rahòtinyre. Juhuu heka Macedonia hãwã bedeki arakemy ixi-di rahòtinyre. Iule tahe aroramy arakemy heka ixi-di watxiwãhã. Òkeseu tasỹ tule, aroramy adehemynykre. Tai wiòhena inatximy bitake. Jiarỹ ayrenymy areakre, Judeia bedeki arakemy kaiboho biwawiòhenanybenyke.

¹⁷⁻¹⁸ Reòsamy watzirerimy aõbohe wadi tahòtinytenyteri? Ixiòrarukile aõbohe tuuremy adee araỹraxikre? Tuu aõbo iximy rarybere kohe, myỹ, iule. Aõkõre, myy rarybere, iule wahe. Inatyhymy aõbohe rarybereri. Aõkõre rarybeõre. Jesuisi Kristu heka warybe rieryre. Kohe, myy, iule.

¹⁹ Tai heka raryberenyre: –Inatyhy rare. Myỹ wahe, Deuxudeewinamy. Sila Tximòtxi-wana kia Deuxu rybe-di adeereny ritỹnynyre, Jesuisi Kristu iriòremy, jiarỹ tule adeereny kia retỹnynyre.

²⁰ Inyboho ratximyhỹre Jesuisi Kristu-ò. Kristu heka Deuxu widỹỹdu ratxireri. Inyummyreny ratximyhỹre. Deuxu heka tuu iny rierynanymyhỹreny, tii inatyhy.

²¹⁻²² Tii heka iny ritamyhỹreny; rihitximyhỹreny; tahõrõ mahådumy riwinyre. Inydeereny riwahinyre Deuxu Tyytybytyhy inyworeny-ò risỹnyre. Tai heka inyboho rõhõtynyreny inydeereny ibutumy riwahinykremy.

²³ Deuxu heka warayky rieryre. Tai heka rarybemahãre, inatyhy raõre Oritxi hãwã-ò. Tai heka adiride ixinamy.

²⁴ Araryberenyõtyhy jiarỹboho aõbo bityhynybenykemy, mary-bebenykemy. Kaiboho dorihe inatyhyna tetyhynytenyte. Urile tahe arawiõhenanyrenykre deysana-di Deuxu Tyytybytyhy dee deysana-di.

2

¹ Tai wawo rerahòrera. Arakemy aõkõ abedeòtiidỹỹrenymy ixityre.

² Arabedeòtiidỹỹnyrenykeki tahe mobo riwateysanykre. Kaibohole toite.

³ Tai adeereny reritinyre. Anaõtyhy heka abedeòtiidỹỹrenymy. Kaiboho dori deysana-di biwasỹnybenyke. Iu wadeysamy watxireriu, kaiboho tule beysabenykre. Kia heka reerywiwire jiarỹ.

⁴ Adeereny reritinyre bedewona-di ranywãhãu; warube rytynmahã. Bedeòtiidỹỹna-di arasỹnyrenykeki aõkõ kỹny. Tahe timybo aluurenyremy kaiboho bierybenykemy adeereny reritinyre.

⁵ Bedewonamy relyykeki, tiu inyõ wii ribedewonyreu, riwabedewonyõtyhy. Aõtxi arabedewonyreny. Waryberiti isirare aõkõ ihỹre.

⁶ Aõhõkỹmy dỹỹnanamy yla aõkõ rotỹỹnyre. Tai ixinamy rarekre wiji.

⁷ Wiji tahe iwitxira aõmydỹỹnana biwinyke: biwiõhenanyke iixãwididỹỹnadikemy. Tai tahe bedewona-di sõwetyhymy riatyõtyhy bedewona-ribi wahe.

⁸ Tii luunatyhy-di bierynanybenyke.

⁹ Tai heka adeereny õnosõna rewahinyre. Tai juhoo waritidỹỹna adeereny rewahinyre. Jiarỹ heka kaiboho rexiywinymy aõbo atxitenyterí ityhydỹỹna-ò. Kiamy adireny watxireri.

¹⁰ Kai biixãwididỹỹnykeki heka, jiarỹ tule ariixãwididỹỹnyke. Kia adeereny rikiwinyrenyke Kristu òraru-ki.

¹¹ Tahe Satanasi tiu iny riatyrenyõtyhy. Inyboho rieryreny tii kia riwinykemy riwisỹnymyhỹré.

¹² Jiarỹ heka ròirenyre Troaji-ò Rybewihikỹ tỹnydỹỹmy Kristuni-di. Tamy retehemynyreu, isiraõlemy tai Rybewihikỹ dohodỹỹmy, Inynyryỹ riwawiõhenanyre wahe.

¹³ Tahe wabedewomy watxiwãhã inyseriòreny Txitu-ki rahaõrekí. Tai tahe kia iny mahãdu reteòwarinyre arakremy Macedonia hãwã-ò rare.

¹⁴ Tahe Deuxu deysana! Deuxu-wana watxiwãhãreny. Tahe kia ijesu tai ritake. Kristu heka ridykre ijesu tarasadu mahãdu. Rokoirenykre heka ihe-ki.

¹⁵ Iwese aderõna lỹnyrehekỹ ibutumy idi riàlànymyhỹre wese heka, kia wese inyboho roire. Ibutumy iny rierykemy heka ityhydỹỹdu mahãdu rỹirerimy ihỹre. Lỹnyrena wihikỹ Kristu ritoonyre wese Deuxu-ò inyboho roire. Iny lỹnyrena wese heka rare. Ityhydỹỹdu, ityhydỹỹdukõdu mahãdu-ò ramyhỹre.

¹⁶ Kia rityhynyõmyhÿre mahãdu tahe, tÿnyre rirubunyre. Rityhynymyhÿre mahãdu tahe tÿnyre iruweselemy rare. Kia aõmysÿdÿÿna biwinybenyke. Isirare heka iaõmysÿdÿÿ.

¹⁷ Inyboho heka sõwemy inywese aõkõ iny roire. Iwese iny riwymyhÿre aõõwryõre idi ijohomy, kia wese karybe rare. Kia Deuxu deõdu mahãdu heka iõwydimy aõkõ rybe riwymyhÿre. Tahe inyboho heka inatyhymy rarybemyhÿreny. Deuxu dori inydeereny rarybere õbitinamy. Riwateõnyreny õbitina-di araryberenykemy.

3

¹ Timyre heka tyyriti ritididÿÿnamy raruõhymahãrenyre jiarÿboho awirenyremy. Tahe waribireny tule aribireny kia Ritidÿÿna arihurenyõtyhy.

² Kaiboho heka Kristu tyyriti wese aõma toite. Riritinymy heka roimyhÿre inywo-ki, inyrayky-ki. Idi riramy kaiboho burubenykeki, aõbo kaiboho tewinymahãte heka tamy betehebonyke. Tai tahe rierymy idi rariake ix-ideele. Idi rariake hãre tahe idi rexibedeerynyke.

³ Kaiboho heka Kristu tyyriti wese heka toite. Inydeereny iwahidÿÿmy heka tii rare. Kia tyyriti witxiramy rare. Aõ ritidÿÿna manamy aõkõ riwinyreri. Deuxu Tyytybytyhy-di tahe riwinyreri. Aõ manatyre-ki aõkõ rõritidÿÿreri inyraykyreny-ki, inyworeny-ki rõritidÿÿmyhÿre.

⁴ Deuxu heka retyhynymahãre, Kristu õraru-ki wahe. Tai tahe tuu raryberenymahãre kiawesemy.

⁵ Jiarÿboho heka warururenyõhyre kaa aõmysÿdÿÿna widÿÿna-õ. Iny ruruna heka Deuxu-ribi sohojile nade. Tii iny wiõhedÿÿdu, aõ iny rikiwinymyhÿrenyke-õ wahe.

⁶⁻⁸ Irybe tÿmyra dohodÿÿdumy heka inyboho roire. Ihetxiu bede ywina wesemy aõko heka rõritidÿÿre Deuxu Tyytybytyhy ihÿre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki rõritidÿÿre. Deuxu loosõna tule rõhõnyre, riwahinyreu wahe. Moisesi õsÿny-ribi sõwemy loosõna rõhõnyre. Idi tahe riixãwididÿÿnyre. Tahe judeu mahãdu reteheõhymyhÿre iõsÿny-õ, iõsÿny loosõnadireki. Deuxu Tyytybytyhy heka iratyre awimy rare, iny-õ dori Deuxu irutyhy riwahinyre. Tahe bede ywina nade loosõna wiwihikÿ-di bede ywina tÿmyra tahe iratyre awi rare.

⁹ Tii heka iny-di ixãwikemy ratxireri.

¹⁰ Tahe iratyre rybe tÿmyra rare. Iny õraruna-di ixãwikemy ratxireri.

¹¹ Kia urihimyò rÿire awi rare. Iratyre tahe umytuedeõna rare.

¹² Iny rarõsõna sõwemy ratximyhÿreny. Tai tahe inyboho ruberuõhymyhÿreny.

¹³ Moisesi wesemy aõkõ rakatximyhÿrenyke. Imahãdu raykytxymy dori rÿirenyre.

¹⁴⁻¹⁵ Imahãdutxymy dori rÿirenyre. Moisesi bedeywina-di rariakeki, irayky ritõbõnyke. Kia rieryõreny iraykyreny ratxynymyhÿrenyremy.

¹⁶ Kristu rityhynyre xiery, irayky raraymyhÿre. Iwese Moisesi õsÿnytõbõna iõsÿny-ribi resere wese kia rare.

¹⁷ Kia Tyyriti-ki Inynyrÿreny heka Deuxu Tyytybytyhy rare. Tikibo Deuxu Tyytybytyhy rÿikeki kowa ibutumy iny ixinamy rÿike.

¹⁸ Tahe ibutumy inyboho heka Deuxu wowydyna iny õsÿnÿreny-ki ijõdire. Iwese iny õsÿnyreny itxena-ki iny retehemyhÿ wese, Deuxu wowydyna ibutumy robimyhÿke iny õsÿnyreny-ki. Inynyrÿ he Deuxu Tyytybytyhy

rare. Iribi tahe wowydyna nade. Kia wese inyboho heka Inynyrỹ wese my relemyhỹrenyre. Inihikỹmy delemyhỹdenyde. Tii dori iny woreny-ki raaõòtaòtamyhỹre.

4

¹ Deuxu taruxetòena-di heka kia aõmysỹdỹỹna inydeereny diwahinyde. Tai heka ikonanakõdumy idi rakatximyhỹrenyke.

²⁻³ Ibutumy heka rikiwinymyhỹrenyke aõbo òbiti rare. Aõbina binahakỹ widỹỹ-ò heka rekexiijerenyke aõbo òbitirele heka rikiwinyrenyke; rikiwiurònyrenyõtyhy heka Deuxu rarybereriki, tuu. Deuxuruòhyyle rikiwinyrenyke. Inatyhyna loosòna-ki heka rakatxirenkye. Ibutumy heka rikiwinyrenyke ibutu itxerena òbitimy wahe. Inyboho ritỹnynymyhỹre Rybe tymyra wihikỹ. Inyõ-ribi riwòmy roimyhỹkeki tahe kia rityhynyõmyhỹrele tuu ritidimy roike.

⁴ Kiakeki tahe Satanasi iitxeredỹỹ-ò riijõnyreri loosònamy robike lau. Deuxu binadỹỹna rare. Ibinadỹỹdu wesemy ratxireri. Kaa loosòna-ò iny riitxeredỹỹnyhyymyhỹre aõma Rybewihikỹ tỹmyra-ò. Rarybemyhỹre dori Kristu heka Deuxu yrubule rare.

⁵ Iximy aõkõ rarybemahãrenyre. Inynyrỹ Jesuisi Kristulemy heka rarybemahãrenyre. Inyboho heka deòdumy inyboho ratximyhỹrenyre adeereny. Jesuisi òraru-ki kia rewinymahãrenyre.

⁶ Juhuu Deuxu rarybere: –Bedeluru-ribi heka loosòna doosòmehỹde. Tii heka loosòna-di inyraykyreny ritoosònanyhỹre. Tai heka iny Deuxu erysydỹỹna inyboho rieryrenyre. Kristu òsỹny-ki sohojile tuu rokobirenyke.

⁷ Kia heka aõna aõna wiwi inydeereny heka rare. Ihyna òwy riòre wesemy inyumyreny ratxireri, butxi weselemy wahe. Tai heka Deuxu sohojile irurudire, inyboho aõko irurudire.

⁸ Ihãrele heka aõbo iny riwinyke rieryõhyymyhỹre timybo aõ iny riwinyke heka.

⁹ Aõhõkỹmy dỹỹnana heka inydeereny rehemynymyhỹre tai inyboho ikyhynamy riemyhỹrenyre. Inyboho heka bedewodihyy ratximyhỹrenyre, tahe tiiemy iny raròsònarenydihyy inyboho ratximyhỹrenyre.

¹⁰ Inyboho heka itxi tõhõti reahyy inyboho ratximyhỹrenyre, Jesuisi rubuna-txi wahe. Kaki tahe iwese Jesuisi raremyhỹ wese heka rakatxirenkye. Tai iny witxira heka tuu robikre kiamy, Jesuisi rirudỹỹnanamy.

¹¹ Jesuisi òraru-ki heka brebunahakỹ-ki inyboho roire. Kia wese-ki heka iny Jesuisi runamy robikre inykireny.

¹² Kia-ki heka iny rubukonanareny inykireny rare. Tahe iruna akireny tule ratximyhỹre.

¹³ Kiamy heka Ritidỹỹna roire: –Jiarỹ retyhynyre. Taita rarybere: –Kia weselemy roire. Retyhynyrenyreri tai heka jiarỹboho tule raryberenyneri.

¹⁴ Jesuisi ixixadỹỹdu heka rare. Kaa tule inyboho tule riixixanyrenykre. Rikirònykre heka Deuxuko-txi. Kaiboho tule boibenyke wawanareny.

¹⁵ Jiarỹ wawanareny kia adeereny relere. Tamy Deuxu ruxetòena sõwetyhymy ramyhỹre-wana heka riwahinymyhỹre iratyre sõwetyhymy tamy deàlana riwahinymyhỹre. Kia heka Deuxu wowydyna-ò tuu ratximyhỹre. Bedewoõmy.

¹⁶ Iny bedewonaõhyyre heka. Iny umyreny retybynyre. Txuõ txuõlemy heka ratỹmyranke inywo-ki. Tiie heka aõbo rierynyre inatyhy wahe.

¹⁷ Iny bededỹỹnanareny heka urihimyòle roimyhỹre. Iny wowydynarenyko-ki heka aõhõkỹmy dỹỹnana inyboho ritarenkye inydireny

retehemyhÿre. Retyhenyrenyrene wowydyna-ò awityhyremy inyboho idi retehemyhÿre iny idi retehõmyhÿredi.

¹⁸ Aõbo iny tuu robimyhÿre bede bedemy tuu iny robimyhÿre ibutumy idi reamy. Aõbo iny tuu robiõmyhÿre heka tiu itueõtyhy. Kia-di tahe inyboho rõhõtinyinmyhÿre.

5

¹⁻² Inyummy tÿmyrahakÿ heka inydeereny kidiwahinykre Deuxu, iwitxira biu bede-ki wahe. Aõ hãbu wahisidÿÿna-ki aõkõ Deuxu-di wahisidÿÿna-ki heka tuukre kia umy tÿmyra wahe. Tiu heka itueõtyhy. Rakabedeworenykre heka bede-ki iny telesõreny-ki rasÿnyreki inywo-ki wahe.

³ Inyboho heka biubede-ki inysÿreny inyummytÿmyra-ki rõkõhõtinyinmyhÿrenyke. Kaa iny umyreny wahe. Rabedewomyhÿrenyrene. Umy tÿmyraõ heka rikitaranykemy inyboho ratximyhÿreny.

⁴ Aõherekibo inyboho wiji rabedeworenyrene? Inyboho heka Deuxu bedewihikÿ-ò arõirenykekõ aõbo? Inyreny rikitaranykemy aõkõ wiji. Kaki aõhõkÿmy dÿÿnana riwawobededÿÿnyra. Kia aõbo umy tÿmyra tyre tahe rikirutyrenyke ijõ wahe. Ijõ rikitaranykre umytuedeõnaõ. Tiu itueõtyhy. Kia riwinyre inydeereny kia wahe.

⁵ Deuxu dori tuu rarybereri inydee riwahinykre. Tatyytybytyhy dori diwahinyde diteòsinyde.

⁶ Kia iwese juhoo rarybere wese heka tuu rotÿÿnykre. Tai heka inyboho teysamy ratximyhÿrenyrene. Kabede-ki inyboho ratximyhÿre heka inyummyreny ratximyhÿre heka aõ Inynyrÿ-wana aõkõ ratximyhÿre.

⁷ Tiu heka rokobirenyõtyhy rikityhynyrenykekile ka idi rakatxirenykre. Inyboho rieryreny tinybo rarekre wahe.

⁸ Jiarÿ wadee awire kabede-ribi arexitake Deuxu-wana arasÿnyke wahe.

⁹ Aõma tamydeewimy heka tuu iny riwinyke wahe iny-wana rasÿnyke. Kaki iny ratximyhÿre tahe aõbo awire heka tamy awire.

¹⁰ Inydireny retehemyhÿre. Aõbo inyboho riwinymyhÿrenyrene. Aõbina bina rikiwinyrenyke heka aõhõkÿmy dÿÿnana inydeereny riwahinykre. Aõwihikÿ riki rikiwinyrenykre wana tasÿ. Aõbo awityhy inydereny kidiwahinykre.

¹¹ Inynyrÿ heka inyboho rityhynymyhÿre. Tai inyboho iny witxira-ò tuu sõwemy relyymyhÿrenyrene. Ibutumy heka Deuxu iny rierymyhÿrenyrene. Kaiboho heka tule tiwaerymahãtenyete.

¹² Kia heka reraõmy watximyhÿrenyrene biwaerybenyke. Ararybeõtyhy heka adeereny jiarÿ awiremy. Tahe wadee ka awire kaiboho waluurenyke. Hãbu iumyle awimy rÿirerimy ihÿremy idi rõhõtinyinmyhÿre. Tii heka õbiti aõkõ rare. Kia biwyõnybenykemy adireny watxireri.

¹³ Juhoo iny rieryremy itelesõ. Inymyreny rarybekeki itxÿtemy inyboho roiremy. Rakaryberenyke heka aõbo inyboho dori Deuxu dee. Aõmysÿdÿÿrenymyhÿreki inydireny rõhõtinyinmyhÿre. Inymyreny rarybekeki inyboho awilerenyremy. Iõrarureny-ki tuu rakatxirenyke.

¹⁴ Kristu luuna heka kiamy iny riraykydÿÿnymyhÿre. Tii heka rurure iny ibutudee. Tii rurureu, ibutumy inyderõwyrenymy rurure.

¹⁵ Rurure heka aõma iny ixidee sohojile irumy rareke lau. Kia tako-ò rakreu tamy heka irumy rakre. Tamy dori rurure tai rexixare rubu-ribi.

¹⁶ Rakaraykynyrenyke timybo hãbu awiré, ibinaré. Kaimy heka rakaraykynyrenyke. Aõ iwese iny witxira raraykynymyhÿre wese aõkõ raraykynyrenyke. Aõma inyboho aõbo Jesuisi Kristu-di raraykynymyhÿre heka. Ixityre aõbo tuukre.

17 Tii heka umy t̃myra tuedeõna-di ratximyh̃re iwitxira ratximyh̃re. Juhu iaõmyd̃ỹnana iribi ixãwira. Tahe wiji raraykywydynanyre iwitxiramy. Ibutumy iaõna aõna ihetxiu heka rawitxiranyre, awi-ò.

18 Deuxu heka ibutumy kia riwinyre tamy. Inyboho heka iòludu roire, juhuu wahe. Wiji tahe iliinamy ijoi ratximyh̃re. Iny witxira heka iliinamy rarekemy idi watxiwãhãre.

19 Wiji tahe timybo Kristu rarybekremy heka adeereny rarybereri. Aõma Deuxu kia liinamy rarekemy wahe. Ixinamy Deuxu. Ka Deuxu aõ anaumy-witxiranydenyke. Kia Kristu òraru-ki tuu ratximyh̃re.

20 Jiar̃boho Deuxu deòdu roire. Tai Kristu deròwomy adeereny rarybereri: Iluuna ixidee ixby bimybenyke. Wii biwowixinybenyke.

21 Deuxu heka iny òraruna ritidire Kristu tyre-ò. Kristu inyòrarunareny riwyre. Wiji tahe Deuxu òbitina inydeereny riwahinymyh̃re.

6

1 Jiar̃boho tahe raaõmys̃d̃ỹnyrenyke Deuxu dee. Deuxu ruxetòena dori tetatenyete, tai idi mohòtinybenyke, òhòtirenny-ribi losaõmykemy.

2 Boholabenyke aõmybo Deuxu rarybereriò. Jiar̃ heka aluurenyre iurenana tahe ka arybe-ò raholareri. Arawiòhenarenyre iu wadee textiòdenyteu, wadee taryteu. Boholake wiji heka bitabenyke Deuxu ruxetòena. Wiji heka biu-ò hena txumy bede r̃yire.

3 Inyõ iny aõmys̃d̃ỹnarenymy ibinamy rarybekeki, uritere ijõ iny bedeworenyõmy, jiar̃boho òraru-ki.

4-5 Jiar̃boho dori Deuxu deòdutyhy roire. Tai rikiteòsinyrenyke ibutumy aõbo inyboho dori Deuxu deòdu roire. Tai riteòsinyke ibutumy aõbo iny riwinymyh̃ke. Aõna aõna rikiteòsinyrenyke. Òhòte wakireny r̃imyh̃re. Ròtenawo-ò ralòmyh̃renyke. Bedeweweky-ki aõhòk̃my rat̃ỹnymyh̃re. Sõwemy heka reòludunyre aõnana bina binahak̃y reòludunyre. Aõ òta òta reòludunyre. Sõwemy heka raaõmys̃d̃ỹnynihik̃yrenyke. Sõwemy heka aõmys̃d̃ỹnadikre; t̃yik̃o bede reijerenyke; byreõmy bede reijerenyke;

6 òbitimy heka rewinyrenyke. Aõma, ywiny-di ròwid̃ỹrenyke bedeeryna-di. Ka roirewãhã iny iwitxira rewiòhenanyre. Ibutumy kia rewiòhenanymy roirewãhã. Deuxu Tyytybytyhy heka wawanahyy roiremyh̃. Luuna heka inydee reteòsinyrenyke Inatyhyna rybe heka ret̃ỹnynmahãrenyke. Sõwe heka rit̃ỹnynmy, jiar̃boho Deuxu deòdu roire wahe.

7 Òbitina dori wadebònareny wese rare Satanasi itxemy. Jiar̃boho heka remymahãrenyke aritarenkykemy. Tule iny rexiijemyh̃re òbitina-di.

8 Ijõ heka waluurenyre inyõ tas̃y aõbina binahak̃yle wadee riwinymyh̃re. Ijõ heka Rybewihik̃my wadee raryberemyh̃re. Ijõ tas̃y rybe binamy wamyre, raujõmo. Inatyhyna rarybemyh̃re. Tai wamy ruidu riwaninimyh̃renyke.

9 Ibutumy heka iny riwayreny. Tahe rieryõhyemy heka inatyhy rare. Watxiwãhãrenyke rubu wese ihãre tahe warumy watxiwãhãrenyke. Tiibohe heka rubu wesemy inydireny ratximyh̃renyke. Aõhòk̃my rat̃ỹnyrenyke hãre raruõhyylemy watximyh̃renyke.

10 Aõna aõna heka bedewonihik̃my ròhònyre. Tiemy wadeysahyy watxiwãhãrenyke. Jiar̃boho heka urimynodule watxiwãhãrenyke. Ibutumy inyboho rityhyd̃ỹnyrenyke. Aõhomy aõk̃o inyboho ratximyh̃renyke tahe ibutumy inydire roimyh̃renyke.

11-12 Tahe kaiboho ityhydÿÿdu seriòre mahādu Oritxi hāwā-ki. Jiarÿboho heka kaa òbiti-my aōna aōnamy rarybemyhÿre. Kaiboho heka ijohona derarenyre aōmybo rarybemyhÿrenyreò. Jiarÿboho heka aluurenyre.

13 Kai wariòre wesemy adee rarybereri. Umy iwese jiarÿ aluure wese, kai waluurenyre.

14 Boholabenyke warybereny-ò ityhydÿÿdukōdu mahādu-wana aōmysÿdÿÿrenyōke. Timybo òbitinaō heka aōbinaō-wana raaōmysÿdÿÿke. Timybo heka loosōna bedeluru-wana ratxike? Aōkōre! Tiu wiwana rauriōtyhy.

15 Satanasi heka Kristu-wana raaōmysÿdÿÿnanyōtyhy. Ityydÿÿdu mahādu wiwesehyyle raraykynkemy rÿira. Ityhydÿÿdukōdu mahādu-wana tahe wiraykweseke aōkōre.

16 Deuxu aōmysÿdÿÿna heka iwitxi rare, suritxoo aōmydÿÿnana-ribi, wahe. Kaiboho heka Deuxu dohodÿÿna ijoimy toite Deuxu oworeny-ki ratximyhÿre. Deuxule heka kawesemy rarybere: —Jiarÿ heka wasÿ ariwinykre ayreny-ki. Jiarÿ iDeuxumy aronykre tiiboho waijoimy. Rorokurenkre. Tai tahe Inynyrÿ rarybere wiribi bihitxinyke. Inybina-ribi bexihitxinybenyke.

17 Bexiebenyke òbitikōre-ribi wahe. Uritere tamy adi rexihumy, ixierya aramyrenkre ixidee wariòre wese.

18 Warurutyhymy adee rarybere. Boomy heka adireny ararekre, jiarÿle wahe. Deuxu rurutere rare Jiarÿ.

7

1-2 Deuxu ibutumy tuu rarybere: —Kai ityhydÿÿdu waseriòre mahādu. Tai tahe rikexiòbitinyke ibutu aōmydÿÿnana-ribi. Iny umyreny-ki rokobirenyke inyumyrenyy-ki. Òbitimy heka rakatxirenyke iko-ò, Deuxuko-ò. Aōma waluumy heka atximahābenykemy rahōtinywāhārenyre. Iny-ò aō bina bina rewinyōhywāhārenyre.

3 Tuhe kaa rarybere tahe ixityre anarybekre. Aluurenyre jiarÿboho ibutuhyyle ratximyhÿre iny rummy ratximyhÿre hāre tasÿ rukururenkre tulekre.

4 Wadee heka awire ibutumy kaiboho ratximyhÿrenyre. Kai aōwitxira wixira wadereny rÿira umy retyhynyreki. Isirare heka wadee kia ratximyhÿhārele WadeSATYHymy heka watziwāhāre, wiòhedÿÿtyhy òraru-ki, ijy òraru-ki.

5 Jiarÿboho rethemynyre Macedonia bede. Taita tule elehynaōhyyre wadereny. Ibutumy heka aōna aōna, òta òta wixira wixira; bede bede ihyymy aōkōre rÿire tai. Aōma bedewonihikÿ heka watelesōreny-ò ralore.

6-7 Deuxu riwawiòhenanyrenyre; Txitu diteònyde wadereny. Tii rybereny heka awiremy kaiboho. Tai tahe reysarenyre jiarÿboho. Kaiboho tabedewomy atxitenyteri waòraru-ki. Katahe wadeysa nihikÿmy watzireri.

8 Adeereny warybetyriti rewahinyreki tabedewomy atxitenyte. Tai tahe reysamy watzireri. Ihārele heka tyriti adeereny arawahinykre. Kaiboho heka tabedewotenyte iribi tahe aōmydÿÿna kaiboho tewitxiranytenyte teòbitinytenyte ibutumy.

9 Tai tahe jiarÿ reysamy watzireri. Aōbinare dori rewinykōre arawiòhenyrenyre heka.

10-11 Deuxu heka iny ribedeòtiidÿÿnymyhÿre iny ywimy riraykydÿÿnykemy. Kia kidiwymyhÿke inydee tarasana wahe. Tii heka awire. Ijō bededeòtiidÿÿ tahe bede ludu bede òtiidÿÿ. Kia tahe rubu diwymyhÿde. Kaiboho heka tabedeòtiidÿÿnymyhÿtenyte. Deuxu heka kia riwinyre awiòhedÿÿnamy aōma kaiboho awirenyre. Aō wixira wixira sōwemy akireny rÿireri, aō òta òtareny. Kiadile tahe aōma òbitihyymy òhò ayreny-ribi kaiboho heka

taykarananytenyte. Kaiboho heka waluudumy teletenyte. Kaiboho biwiny-benykemy aõbo òbitimy ratximyhÿre iwidÿÿmy tarotenyte. Ibutumy heka òbitihyymy rarekemy idi tetehtenyte.

¹² Tai kia tyyriti adeereny rewahinyre. Aõ kia rewinyre heka aõ iny iòrarudikekile aõkõre rewinyre. Idi aretehekemy heka. Kaiboho waluurenytyhyre aõbo òraru-ki wahe.

¹³ Tai heka wadeysamy watxiwãhãre. Aõ inyboho sohojile aõkõre teysa ratximyhÿrenyrene. Txitu tule teysamy ihÿmyhÿre, kaiboho tawiòhenanyteki

¹⁴ Tu heka rarybere adeereny kaiboho dori awimy tai tahatenyta awityhy. Adeereny heka inatyhyhy rarybemahãrenyrene, inatyhynamy. Tule mobo rarybere Txitxu-ò. Ka tahe inatyhy rarybemy ratximyhÿre.

¹⁵ Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynmahãte-txi. Kaiboho tedytenyteki. Ihãrele urihimyò ruberumy ratximyhÿ.

¹⁶ Reerymahãre jiarÿ kaiboho òbitimy boibekre. Tai wadeysamy watxireri.

8

¹ Deuxu ruxetòena-ki heka sòwemy riwinyre Macedonia dohodÿÿna mahãduy-ki wahe. Jiarÿ tuu arelyykemy idi watxireri waseriòreboho.

² Sòwemy heka iaõna aõnareny iaõòtaòtarenyrene tiiboho. Aõhõkÿmy rotÿÿnyreri tiiboho. Ihãrele ka deysamy heka relerenyrene. Reysareny heka. Tiiboho heka iaõkõrenyrene. Aõhohomy aõkõ heka roiremyhÿ. Kiahãrele heka sòwemy riwahinyrene tamahãdu wiòhedÿÿmy.

³⁻⁵ Riwahinyrene heka sòwemy ixideewimy. Sòwemy riwahinykelemy wadee rarybere. Tiiboho heka sòwemy wiòhedÿÿmy rurumy roiremyhÿ. Tai inyboho ribedeòtiinyrene sòwerekiki. Kia judea bede, dohodÿÿna mahãdu, kia wiòhedÿÿmy. Juhu heka tiiboho rexiwahinyrenyrene Inynyrÿreny-ò. Tule Deuxu deewina inydee riwahinyrene. Iny wiòhedÿÿnarenymy rexiwahinyrene.

⁶ Tai tahe jiarÿ rarybereri Txitu-ò: –Kai biwiòhenanykemy iaõmydÿÿnareny-ò.

⁷ Kaiboho heka sòwemy tetyhynyteri. Kaiboho heka Deuxumy awimy tarybemyhÿtenyte. Kaiboho heka teerytenyte Deuxu aõmydÿÿnana. Kiaboho heka waluureny waluuurenymy boibeke wawiòhedÿÿdurenymy. Biwawiòhenanybenyke. Tai heka sòwemy bexiòlòdÿÿnybenyke adireny watxireri.

⁸ Aõ bede ywinaõ heka adeereny rewahinyòhyreri. Arierykemy heka idi watxireri timybo aluuna ratximyhÿremy. Tii riteòsiny heka timybo ijò dowiòhedÿÿmyhÿdemy. Tai tahe iwese tii rotÿÿnyrene wese kaiboho tule botÿÿnykre.

⁹ Deuxu ruxetòena teerytenyte, Jesuisi Kristu ruxetòena wahe. Tii heka ityhy rare. Tii rikòdÿÿnyrene heka aòrarurenymy-ki.

¹⁰ Taihyky tetyhynytenyte Deuxu aõmydÿÿnana-di. Kiamy heka raraykynynereri. Arawiòhenanykemy heka adireny rahòtynyrene kanau bedeu. Tewiòhenanytenyte inatyhymy. Tai tahe bikonananybenyke kia kanau bedeu tewinytenyte heka bikonananybenyke.

¹¹ Aõma ireiòno, uriòno biwahinybenykeki, Deuxu heka rinyke. Kia-di ròhòtynyke.

¹² Kia uriònomy idi teywinymy atxiteri-di ròhòtynyke. Tamy wahidÿÿmy aõkõhykeki tahe Deuxu aõma raraykynyòtyhy.

¹³⁻¹⁴ Jiarÿ heka isiramy adee ariwinyòtyhy aõ. Kaiboho heka sòwemy kaa wiji toite, Tai tawowi-di inyò ròòkeki, taaõnasòwe myna Deuxu-ò riwahinykre. Iaõkõkeki tai ibinamy Deuxu rahaòtyhy. Tai biwiòhenanybenyke

heka ihoõmy rÿira mahãdu. Jiarÿ heka aõ retòenyreeri aõkõ rare, biwahinybenykemy. Kai ihoõmy atxikeki tahe, tule inywitxira anawiòhenanykre. Taita wiwanale wiwesehyyle ròhònykre.

¹⁵ Kiamy heka Tyyriti-ki Ritidÿÿna roire: –Hãbuõ heka sõwemy ributunyre. Tahe aõhe rauhenyõhyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyre.

¹⁶ Txitu awiòhedÿÿrenymy rurumyhÿre iwese awiòhedÿÿrenymy rurumyhãre wesele wahe. Deuxumy reàlàre tai, Deuxu dori tuu rotÿÿnyre.

¹⁷ Taita ixinamy arorarenymy rehemynykre.

¹⁸ Riwiòhenanyrenyere iwitxira seriòreõ. Ibutumy dohodÿÿna mahãdu-ribi tii rityhynymyhÿre aõma Rybewihikÿ-di ritÿÿnynymyhÿre awimy.

¹⁹ Dohodÿÿna mahãdu rihitxinyre wawana kanakemy. Ibutumy Inynyrÿ loosõna heka tuu ratximyhÿre. Tule riteòsinymyhÿre ibutumy iny riki-wiòhenanymyhÿrenykemy. Tai heka inyseriòreony reteònyrenyere ityhydÿÿdu mahãdu.

²⁰ Tai inyõ kia nierumy inyõ rarybeõtyhy.

²¹ Òbityhylemy rikiwinyrenyke ibuturu-ò.

²² Ijõ tii-wana rake. Reurihirenyre heka tii wiòhedÿÿmy rakeò, tai heka tii wiòhedÿÿmy ratxireri.

²³ Txitu heka waliina rare; wawana raaõmysÿdÿÿnynymyhÿre heka rare. Jiarÿboho heka awiòhedÿÿrenymy rarumahãrenyere. Ijõ seriòreonyõ nade dohodÿÿna-ò wiòhedÿÿmy. Tai kaiboho wowydyna tamy biwahinybenyke.

²⁴ Tai tahe dohodÿÿna mahãdu kaki rierykre. Tai rityhynyrenykre aõmybo umyreny rarybere. Tule wiluumy atxiteri.

9

¹ Reerywãhãre jiarÿ wiòhedÿÿmy tarumahãtenyete Judeia bedeki. Tahe kiamy aõ aõkõ ariritinykre.

² Reerywãhãre timybo akireny rare. Jiarÿboho heka awimy raryberenyre umyreny Macedonia hãwã mahãdu-ò. Myheka rarybere: –Akaia bedeki seriòre mahãdu wiòhedÿÿmy rexiwinyriny ratximahãrenyere kau beòrau. Tai tiiboho rexideysananyrenyere.

³ Tai heka kaa seriòre mahãdu reteònyre. Tai heka awikre biwiòhenanybenykre dori. Kiamy iwese rarybereri heka inatyhy rare.

⁴ Araixÿrukre heka jiarÿ aõma bexiywinybenyõlemy wiòhedÿÿna-ò atxibenykre-wana. Tule kaiboho maixÿrubenyke.

⁵ Tai heka inyseriòreony reteònyre akorenymy. Tahe iu arehemynykreu, bexiywinybenyke. Biwahinybenyke wiòhedÿÿmy atxitenyteri ixideewimy. Aõ jiarÿ adeereny rexitòenyreeri aõkõ wiòhedÿÿmy.

⁶ Kia hãbu ibutemy ròbòromyhÿre heka ibutelemy tamy aõna aõna ruhunykre. Kia hãbu sõwemy ribrònymyhÿre tahe tamy sÿ sõwemy aõna aõna ruhunymyhÿre tamy riwahinykre bederaty aõmydÿÿnana.

⁷ Tai heka iny sohoji sohoji ixideewimy tiwesebo riwahinymyhÿke. Ri-wahinyõke tahe aõ tuu rurukõreeri urenana tuu ratxike. Deuxu dee ri-wahinymyhÿke mahãdu deysana-di riwahinymyhÿre kia iny mahãdu Deuxu tuure.

⁸ Deuxu heka riwahinymyhÿre sõwemy aõmybo tarumahãte kia indeereny iratyre. Ibutumy aõmybo tarumahãte heka tule iny witxira bi-wiòhenanybenyke.

⁹ Kiamy Ritidÿÿna-ki roire: –Tii tawowi-di iaõkõ mahãdu-ò. Ròwahimyhÿre. Kia tahe iinydee wobrona tiemy rosaõmy rarekre. Deuxu heka ri-wahinymyhÿre tibo alòbòròdu-ò.

¹⁰ Inydee riwahinymyhÿre paõ iny rirÿsÿke. Tahe tule sohoji sohoji òwòrutymy rurumyhÿre heka tamy riwahinymyhÿre. Kia ribòrònymyhÿre tahe Deuxule ritxuhudÿÿmyhÿre. Tahe sòwemy bitakre Deuxu-ribi.

¹¹ Kia rimymyhÿre mahãdu tahe Deuxumy reàlàmyhÿre. Kia tewinymahãte heka Deuxudeewimy tewiòhenanymahãte. Deuxu heka sòwemy rimymyhÿre eàlànareny iòraru-ki.

¹² Kaiboho heka Deuxu mahãdu teriwiòhenanytenyte. Kia sohojile aõkõ. Tule aòraru-ki tiiboho Deuxu-ò wowydyna sòwemy riwahinyrenyke.

¹³ Kaiboho Rybewihikÿ tÿmyra tetyhynytenyteri, Kia ibutumy rierymyhÿre kaiboho dori uriõno tewiòhenanytenyteki, tai iny wowydyna Deuxu-ò riwahinykre.

¹⁴ Adee rexitòenykre aluumy heka relekre Deuxu adee ruxetòena riwahinyreki.

¹⁵ Deuxu-ò wowydyna iny-ribi kanakemy heka idi watzireri. Wahidÿÿna wihikÿ dori Deuxu inydeereny riwawahinyre.

10

¹ Jiarÿ Paulo heka aõmybo adeereny arexitòenykre. Aõherekibo tamy tarabemahãtenyte awanareny watxiwãhãu urihimyoòle watyhyna watzirerimy wamy tarybemahãtenyte. Jiarÿ heka awana rybetere-di rarybeõmahãre awanareny watzireri wana. Tiu rareu, taheka ròritidÿÿre rybetere-di wahe.

² Rõhõtinywãhãre. Rexitòenyre. Awi heka rare. Ywina-di iny risÿnymyhÿre. Inyõ wamyreny ibinamy rarybekeki tahe tule ararybeke heka.

³ Inatyhymy kabede-ki inyboho rasÿnymyhÿreny. Rakaaõbinanykeki, inyumyreny aõbinana wesemy rare. Tebònadirenyre.

⁴ Tebònadirenyre. Aõ kabedemy iny rÿira kia debòna wese aõkõ kÿny. Deuxu debòna heka rÿira irurule heka rare.

⁵ Inyõ aõbinamy Deuxumy rarybemyhÿkeki, tai tahe kia wadebònareny remymy resewãhãrenyre kia ixãwididÿÿnamy wahe. Ibutumy Deuxu òludumy ratximyhÿre heka remywãhãrenyre Deuxu rierykemy Kristu rityhynykemy wahe. Kaiboho heka ibutumy tetyhynymahãtenyte.

⁶ Kaiboho biatybenykeki, tahe, rexihuhyymy rÿimyhÿre aõhòkÿmy dÿÿnana-ò.

⁷ Kaiboho heka tetehemahãtenyte aõna aõna-ò ahana-ribi wesele wahe. Inyõrarakynykeki ratximyhÿreny ixinamy tuu raraykynyke. Jiarÿboho heka tule Kristu mahãdu hõrõ iny ratxirenyre.

⁸⁻⁹ Deuxu heka ruruõ wadee diwahinyde arawiòhenanykemy tai raixruõmyhÿre. Tai heka abrebudÿÿrenymy aõbo kariti rewinyre. Urile tahe aumydÿÿreny adireny rewisÿnywãhãre aõ bede arãatyremy aõkõ.

¹⁰⁻¹¹ Ityyriti rybetere heka ribrebudÿÿ tahe rehemynyre heka tii aõkõ rybetere-di rarybemyhÿre. Awityhymy aõkõ rarybemyhÿre riritinyre. Iwese ròritidÿÿre wesemy aõkõ rarybere. Iu adehemynykre tahe, iwese ròritidÿÿre wesele heka anarybekre.

¹² Iny tai ratximyhÿre heka sòwemy ixidi rõhõtinymyhÿre tii awiremy. Kia tahe watzimyhÿreny kia raryberenyõtyhy. Tii dori raitxÿtemy ratximyhÿ.

¹³ Aõmy iximy rarybemyhÿre dori tii awimy iximy rarybemyhÿre heka urile tuu raraykynymyhÿ. Timybo Deuxu inydee raryberele rikiraõmyhÿke. Kiawesele inydeereny awire.

¹⁴ Iaõmysÿdÿÿna heka timybo rikiwinyrenykele iny riijemyhÿreny. Juhu heka Rybe tÿmyra wihikÿ heka adeereny adiwykemy idi watxiwãhãre.

Rewyrenyre heka juhUU Rybe tÿmyra wihikÿ adeereny rewyre. Tai heka tuu raryberenyõhyymahãreny tÿmybo iny wixira aõmysÿdÿÿna riwinymyhyÿreny.

¹⁵ Kaiboho heka aityhydÿÿnareny raumynykre. Tii heka wadeereny awire. Jiarÿboho heka aõmysÿdÿÿna wihikÿ sõwemy ariwinyrenykemy watrixereri ayreny-ki, Deuxudeewireki.

¹⁶ Idi tahe arõirenykre rybe-di aritÿnynyrenykemy ijõbede-ò, Rybe tÿmyra wihikÿ-di wahe. Aõmy ararybeõtyhy aaõmysÿdÿÿnareny iwixira rewinyremy. Kiamy heka Ritidÿÿna-ki roire:

¹⁷ –Urile tuu rybe rÿike Inynyryÿ tÿmybo riwinyrelemy.

¹⁸ Iny ixidi rõhõtinyinmyhyÿre tii awireny. Tahe awi aõkõ rare Deuxu-ò. Deuxu tahe awimy tai rahamyhyÿre tii idile rõhõtinyinmyhyÿreki.

11

¹ Jiarÿ òsana urihimyò raitxÿtemahãremy kaiboho wawana tòiterimy ixi-di atxitenyteri. Ihãrele taheka urihimyò reõludunymahãre. Jiarÿ heka okorenyre iwese Deuxu ratximyhyÿre wesele.

² Ywimy atximahãbeny adireny watrixereri. Kaiboho iwese ijadõma hãbumy roikre wese toite. Hãbu heka Kristu rare.

³ Jiarÿboho raberuwãhãrenyre kaiboho Kristu-wana atximahãbenyke lau wahe. Iwese Eva hemylala riitxenanyre wese wahe.

⁴ Inyõ kanakeki rõhãletedÿÿmy Jesuisi wixiramy. Tahe kaiboho bityhynybenykekile jiarÿ heka raberumahãre.

⁵ Ijõ dori ritÿnynymyhyÿre iwese inyboho ritÿnynymyhyÿrenyre wese aõkõ iwixiramy.

⁶ Kaiboho heka tahõtinyinmahãtenynte tÿnydÿÿdu wihikÿmy inykireny ratximyhyÿre. Tahe awiremy idi tahõtinyinmahãtenynte. Tai iwesele inyboho roire awi heka roire.

⁷ Tahe iwese tii awityhymy rarybemyhyÿre wesemy aõkõ inyboho rarybemyhyÿrenyre. Tahe iny rierymyhyÿrenyre inraykyreny-ki. Sõwemy heka tuu adeereny rarybemahãrenyre. Iu jiarÿ rybe ritÿnynymy akireny rarewãhãu, kiau heka adeereny rexitõenyõhyÿre iõwydÿÿmy. Iyjamy heka ixidee reijenyrenyre kaiboho bexiòlõnybenykemy. Teòsare òsana iwese rewinyre wese.

⁸ Ijõ dohodÿÿna mahãduõ heka riwaòwynyre adeereny aritÿnynyrenykemy. Iwese iribi rawasinyre wesemy heka rahõtinyre.

⁹ Iu akireny rybe-di tÿnydÿÿmy rarewãhãu tiu rexitõenyõhyÿre adeereny biwawiõhenanykemy. Macedonia hãwã-ribe dori ityhydÿÿdu, mahãdu seriõreõ aõmybo raruwãhãre wadee diwyde. Tiu heka aõ aribireny aritaõtyhy. Tuu rarehy wese heka wiji rarekre.

¹⁰ Kristu inatyhynamy wadee rarybereri kia wese tule ararybekre ibutumy Akaia hãwã hãwã-ki.

¹¹ Jiarÿ heka aluunihikÿrenyre. Taile heka tuu rarybewãhãre Deuxule rieryre.

¹² Kia rybe tÿnydÿÿdu heka iwese rewinywãhãrenyre wesele ròwidÿÿmyhyÿre. Kia heka rewinywãhãrenyre heka kia rarybereri heka aõ wiribi lahitxi aõkõmy rarybereri.

¹³ Kahãbu heka inatyhy Deuxu deòdÿÿna aõkõ ratximyhyÿre. Ruile heka iaõmysÿdÿÿna-ki rõhõnynmyhyÿre. Rexitÿnynykemy Kristu deòdÿÿna mahãdu-ò.

¹⁴ Tahe aõkõre heka Satanasi tule rexiwixiranymyhyÿre. Ýju wesemy tii rexideòsinymyhyÿre. Kia hãbu teòdu rare. Tai heka irehemy iribi rexiijaranyre õbiti deòdu mahãdu ratrixereri wahe.

¹⁵ Urile tuu iny idi rõhõtinykelemy heka tuu ratrixerimy ihÿre. Tahe aõkõre. Ikonanau tahe aõhõkÿmy dÿÿnana ritarenykre aõbo riwinymyhyÿre òraru-ki.

¹⁶ Ixityre tuu ararybekre. Inyõ raykykõmy jiarỹ itxỹte raremy. Ararybekre heka waaõmydỹỹnanarenemy.

¹⁷ Teramy ijirarenyõmyke aõmybo ararybekre. Deuxu dori tuu arybedỹỹ-ò riwajõnomy, tai heka rarybere itxỹte wesele watzimahãremy.

¹⁸ Kaiboho heka taholamahãtenyete itxỹte mahãdu-ò. Katahe bodoholabedenykre aõmybo ararybekre.

¹⁹ Inyõ kedehemynykeki kaa biwinybenykre. Tahe tewinymahãtenyete aõna aõnany aõkõ wahe.

²⁰ Inyõ araitxenanyrenykeki uritere aõmydỹỹrenyõmy tamy. Jiarỹ heka ariwinyõtyhy tuu, wadee awiõre.

²¹ Ijõ rarybemyhỹre inyõ. Tule jiarỹ ararybekre. Itxỹte wesemy ratximyhỹremy.

²² Tii heka Hebreu mahãdumy tii rexininire. Jiarỹ tule kia tuu rare. Ijaò mahãdumy heka tiiboho rexininirenyre. Jiarỹ tule. Abraõ riokoremy rarybemyhỹre. Jiarỹ tuleri.

²³ Kristu deòdumy heka tii rexininimyhỹre. Rarybemahãre itxỹte wesemy. Jiarỹ heka iratyre deòduwimy watxiwãhãre. Jiarỹ raaõmysỹdỹỹ nihikỹre. Ròtenawo-ò riwarutyrenyete iratyre. Riwhatenyrenyete iratyre. Arurure inihe iratyre.

²⁴ Judeu mahãdu heka 39 hetenamy wamy raòhòtere iruyre sõwemy wahe.

²⁵ Roma mahãdu tasỹ inataõmy riwhatenyete. Sohoji ta mana-di watyete rihure. Ijõttxu heka hãwoninikỹ heka riorore. Aõutxu heka bera-ki rãire ruu ibutumy txuu tule ibutumy rehure.

²⁶ Ibutumy reamy rarewãhã aõma wasidu bede aõmydỹỹnanamy bera-ki tule arurure inihe. Judeu mahãdu warubudỹỹmy wadi riwisỹnyre. Tule judeukõdu mahãdu tulere. Hãwãhãkỹ-ki rebunatyhymy watxiwãhã, bede rahy-ki tule, ahohokỹ-ki tule. Waliinaõ inatyhy aõkõ tai ihỹmyhỹ. Tai heka riwaitxenanyrenyete.

²⁷ Aõmysỹdỹỹ nihikỹ tai. Tỹikõhyky heka bede reijemy rarewãhã. Rama riwasare; bemy rarowãhãre. Timy heka tỹinatykyõ ihoõhykyre sõwemy wahe.

²⁸ Tai tahe rahõtinyre ibutu dohodỹỹna mahãdu-di.

²⁹ Urihimyòle taruru-di ratxireri wana jiarỹ tule iheki waruruhohomy aõkõ relemahãre.

³⁰ Inyõ raòrarunymyhỹre wana jiarỹ rabadewowãhãre iòraru-ki. Jiarỹ rexideòsinywãhãre waaõkõre urityhywãhãre.

³¹ Deuxu Jesuisi Kristu tyby dori riwaerymyhỹre aõu aõu heka iny rakanihikỹnykre.

³² Iu Damasu hãwã-ki rarewãhãu, Iòlò Areta bede dinodu heka riwamymy riwateònyre. riwamykemy hãwãhakỹry ijò-ò.

³³ Weriri nihikỹwomy riwawòmý riwatidire, Walina mahãdu. Tahe heto raro-ribi riwaatyete hãwã ahana-ò. Tai tahe rahenyete iribi.

12

¹ Jiarỹ heka ararybekemy watzireri. Aõ aõkõ rarehãrele heka ararybekemy watzireri. Wiòhedỹỹna aõkõ heka rare. Wanyrỹ wadee riwahinyete aõna aõnany heka rabire rasina wese jiarỹ sohojile wahe. Kiamy heka arelyykre wiji.

²⁻³ Tahe 14 beòramy heka Deuxu ityhydỹỹduõ ridyete biu-ò tasỹ-ò wahe. Deuxule rierymyhỹre inatyhy aõbo rare ada aõkõre aõbo.

⁴ Kahãbu Deuxu-ribi heka rybeõkemy roholare. Tahe rarybeõtyhy.

⁵ Iximy tahe ararybeõkre kia wadeysarehãre. Waaõhõkõmy dõõnanadile areysakre.

⁶ Urile ararybekre timybo releremy. Taile tahe iny tuu rarybekre. Tuheka rabire sõwemy aõwiihikõmy. Jiarõ awiremy iny wamy raraykynyheny.

⁷ Tahe Satanasi aõbinana wixirahakõbo wadee riwahinyre. Ixidi arõhõtinyõkre. Jiarõ aõwiihikõ jiarõ raremy wahe. Araraykynyõkemy.

⁸ Inataõmy heka Inynyrõ-ò rexitõenyre kiamy waribi ritakemy.

⁹ Tii wadee rarybere: –Waruxetõenale heka adee awire. Aõbo kai taaõkõteu heka waruru adee rewahinyre. –Tai tahe jiarõ reysare, waaõkõreu wahe.

¹⁰ Tahe awire, waõkõna, warurukõna, ibutumy wadee awire. Kristu òraru-ki heka tuure. Tiubo ibinamy wamy riwinykreu warurukõkreu, waru-rudikre.

¹¹ Rarybere heka hãbu itxõte wesele heka rarybereri. Kaiboho iòrarureny-ki heka kia wesemy rarybereri. Inatyhymy heka jiarõ kia rybe tõnydõõdu mahãdu bina ratyre watxiwãhãre. Ayreny-ki rarewãhãu heka teerytenyte.

¹² Aõna aõna wiwiihikõ, deytana wiihikõ, bedetõidõõna ayreny-ki rewinyre kia Kristu deõdumy watximyhõreki wahe.

¹³ Rybe tõnydõõ õwyõ heka aribireny retaõhyyre.

¹⁴ Ihewoludu txu tahe aroramy arakemy ixidi watxireri. Inataõmy reywinyra aroramy arakremy wahe. Aribi nieruõ aritaõtyhy. Urile arawiõhenanyrenykremy adireny watxireri. Uladu riki heka tyby riyrubunyõtyhy. Tyby tahe uladu riyrubunymyhõre.

¹⁵ Ibutumy idi watxireri heka arahukre arawiõhenanyrenykremy. Adeereny wylemy arihukre. Jiarõ heka aluurenyre. Kaiboho aõbo tule waluurenykre?

¹⁶ Waòraru-ki heka adee isiraõkre heka. Ihãrele tahe inybina wamy rarybemyhõre: –Tii itxenadõõdu rare.

¹⁷ Wamahãdu tule aribireny ritaõtyhy ijõ.

¹⁸ Txitu reteõnyraijõ ityhydõõdu seriõreõ-wana. Tii aõbo aõ aribireny ritare? Aõkõre. Txitu wawesele heka tii rare.

¹⁹ Taõmysõdõõna heka awiõhedõõnarenymy rare. Aõ wadi jiarõ awiremy nohõtirenõmy tuheka rarybereri adeereny. Deuxu, Kristudeewinamy heka tuu adeereny rarybereri heka. Deuxu kotxi heka adeereny rarybereri awiõhedõõrenymy.

²⁰ Raberumahãre heka arehemynykreu, iwixiramy atxibenybeke lau. Tule wadi iwixiramy betehobenyeke ixiweserenymy aõkõ. Ihãru, adebure. Aõkemy watxireri. Iny aõbina binamy wimy rarybemyhõre. Iny ixidile rõhõtinerimy ihõre mahãdu. Kia aroholakeki tahe wadee awiõre. Riyrubunymyhõre. Riyrubunyõhyymyhõre.

²¹ Raberuwãhãre heka arahinykre heka akotxireny iõhãru òraru-ki. Aõna aõna wixira wixira òta òtamy rõhõtinyinymyhõre, raraykynymyhõre. Sõwemy heka riwinyre ta ixi-txi tõhõti reaõhyymyhõre kia riwinyretxi.

13

¹ Tahe ikonana txu roraludu heka jiarõ rare. Inyõ aõbina binamy wimy rarybemyhõreki waribi ihitxihitximy heka tuu rarybemyhõre. Iny rimymyhõre heka tuu robimyhõre; tuu rarybemyhõre. Wiweselemy heka tuu rarybekre.

² Iny iòrarudimy rõyikre-wana, ibutumy heka aõhõkõmy rotõõnykre arehemynykreu.

³ Aõmy Kristu rybemy heka rarybekre. Tai bierybenykre. Aõmy waru-rudõõdure heka bierybenykre Kristu wahe.

⁴ Kristu heka itxeò-ki rurure irururenyõ wahe. Jiarỹ warurunarenykõ òraru-ki. Tahe Deuxu ratximyhỹre, iruruna-di. Tii-wana heka inyboho heka ratximyhỹrenyre iruruõmy. Tai awanarenyle watzireri, tahe tii-wana Deuxu ruruna-wana watzireri.

⁵ Ixi-di heka betehebennyke. Bexiurihibennyke tyhyna-di atxitenyterimy. Jesuisi Kristu awo-ki ratxireri.

⁶ Kia terytenytemy, inatyhy. Tahe jiarỹboho inatyhymy aõna aõna ri-ijerenyre. Kia aõbo teerytenyte.

⁷ Jiarỹboho rexitòenyrenywãhãrenyre. Òraruna widỹrenyõmykemy. Kaiboho aõwiwi biwinybennyke. Kia òbitimy watzimyhỹrenyreki aõkõ, kiemy òbitimy boibenykemy.

⁸ Aõbo heka inatyhyna wiòhedỹnãle rikiwinyrenyke.

⁹ Kaiboho arurudimy atxitenyteri-wana heka, jiarỹboho warurudimy watxiwãhãrenyre, kia wadeereny awi rare. Rexitòenymahãrenyre kaiboho òbitimy matxibenybekemy, ywimy ahãbennykemy.

¹⁰ Tai heka adeereny ratyritinyreri kiamy. Aribireny irehemy watxiwãhãre taheka arawiòhenanyrenyke. Arehemynykreu tahe timy heka aõhõkỹmydỹnanamy arõhõtinyõtyhy, kia waaõmysỹdỹnã rare. Inynyrỹ dori iny wiòhedỹnãreny nade. Iny aõhõkỹmy dỹnanamy aõkõ.

¹¹ Arakre tahe waseriòreboho. Idi biwisỹnybennyke ibutumy òbitimy biwinybennykemy. Warybe-ò heka boholabennyke. Wiwese weselemy maraykywydynanybennyke wiribihiximy aõkõ. Ywina-di matximahãbennyke. Deuxulu-una heka tule akireny ratxikre.

¹² Wii birybenymyhỹbennyke ityhydỹdu seriòre mahãduõ tai wiluummy atximahãbennyke.

¹³ Ibutumy Deuxu ijoi mahãdu heka adee rybe riwehityhynanyreri.

¹⁴ Jesuisi Kristu Inynyrỹ ruxetòena heka akirenykemy watzireri. Deuxu luuna aki rỹikre. Deuxu Tyytybytyhy awana rỹikre.

Alatxia Paulo Tyyriti, Alatxia Mahãdu-ò

¹ Jiarỹ Paulo, rybeõmy nodu rare. Inyõ riwateònyõhyyre. Jesuisi Kristule, Deuxu inytyby, Kristu ixixadỹỹdu-wana riwateònyre.

² Jiarỹ ityhydỹỹdu seriòre-wana. Kaa watyyritireny rewahinyreri Alatxia bedeludu mahãdu-ò, ibutumy dohodỹỹna mahãdu-ò, ityhydỹỹdu mahãdu-ò wahe.

³ Ruxetòena ywina-wana adeereny kanakemy idi watxireri Jesuisi Kristu-ribi, Deuxu inytybyreny-ribi.

⁴ Jesuisi rexiwahinyre iny òrarureny-ribi iny ritarenykemy. Wiji bede aõmydỹỹnabina-ribi iny ritarenykemy. Kia dori Deuxu-ò inytybydeewimy rare.

⁵ Tamy àlàna aõu aõu kanawahimyhỹke.

⁶⁻⁷ Jiarỹ bede reòtiinyra, rybe witxiraõ eleelemy tetyhynmahãteki. Rybewihikỹ witxira ihoõre. Juhuu Kristu taruxetòena-di bedebina-ribi aratarenyire. Inyõ adee rare. Idi Deuxu Rybewihikỹ riwitxiranykemy. Tai tahe atyhydỹỹna ribinadỹỹnyra. Tai tahe kiamy adee rarybera.

⁸ Inyõ aõbo, jiarỹ aõbo, ada biuludu ýju aõbo, adee Rybewihikỹ witxiraõ rarybekeki, Deuxu kyarana tamy kedesekeki idi watxireri. Rybewihikỹ-ò juhu waribi taholatenyite. Kia sohojile inatyhyre.

⁹ Iwese rarybere wese ixityre ararybekre. Inyõ Rybewihikỹ riwitxiranykeki, aõmybo juhuu taholateny-ribi, Deuxu kyananamy resekre.

¹⁰ Deuxudeewimy taheka watxireri hãbudeewimy aõkõ. Jiarỹ hãbudeewimy aratximyhỹkeki Kristu deòdu aõkõ jiarỹ rare.

¹¹ Aõmybo rarybemyhỹre hãbu-ribi rare. Kia Rybewihikỹ tyhy rare. Kia bierybenyke.

¹² Kia tihãbuõ-ribi adoholaõhymahãde. Hãburybe-ki aõkõ reeryre Jesuisi Kristule dori kia riwaerynanyre.

¹³ Kaiboho taholatenyite, iwese jiarỹ judeu mahãduy-ki raremahãu Iu Deuxu ityhydỹỹdu mahãdu aõbinamy rewinydỹỹnananyhỹre. Idi ariixãwididỹỹnykemy rarewãhã.

¹⁴ Wamahãduy-ki sõwemy iratyre raremahã judeu mahãdu bede ywina ywidỹỹ-ki. Idi retyhynyhyymahãre wahona mahãdu ratyre, byrena erỹdỹỹna-ki.

¹⁵ Iribi tahe Deuxu riwamyre taruxetòena-ki. Ratohouãnyõlemy rareò juhu riwahitxinyre.

¹⁶ Wadee Deuxu tariòre riteòsinykremy ratximyhỹ judeukõdu mahãdu-ò tuu ararybekemy wadi ratximyhỹ. Iu inyõ dee aõmy rarybeõhyyre Jerusalẽ hãwã-ò raõhyyre.

¹⁷ Ròtyhydỹỹõmy raremahãu. Deuxu deòdỹỹna mahãdule rỹiramyhỹ. Ihãrele tahe tamy rybemy raõra. Iribi tahe rahònyra Arabia-ò. Idi tahe ixityrele adòòsede Damasu-ò.

¹⁸ Inataõ beòramy heka kowa-ki reijere. Idi tahe rare Jerusalẽ-ò Pedro roramy. Tahe bede reijere waiyre txumy tai.

¹⁹ Ijõmy heka rabiõhyyre deòdỹỹna mahãduõmy. Txiaulemy heka rabire, Kristu seriòremy.

²⁰ Ka heka watyyriti inatyhy rare. Deuxuko-txi inatyhy rare.

²¹ Idi Siria bedeõ-ò rare, tule Silisia bede-ò.

²² Judeia bede-ki Kristu dohodỹỹdu mahãdu wamy lobixidu aõkõ rỹira.

²³ Uritÿÿna roholamyhÿre: –Kia juhu inyhudurenymy inydireny raremyhÿ, wiji tahe tyhyna-di dobedeerydÿÿnanymyhyÿde. Juhu tahe tii tyhyna rahukemy riwisÿnyre.

²⁴ Kia ibutu òraru-ki tahe Deuxu-ò dealàmhyÿde wamy, Paulo wahe.

2

¹ Waòinaubiòwa reurò beòra-di rexihureu, ixyby Jerusalè-ò ròsere. Banabe, Txitu-wana redyre.

² Rawãhãre heka rasi wese-ki aõmybo rabireki. Retÿnynyre iny-ò iwese inywitxira-ò rarybemyhÿremy. Dohodÿÿdu mahãdu ratyre retare tamy ri-hitxinyre rarybekemy. Tuu arierykemy watzireri ywimy watxiwãhãremy.

³ Txitu wawana ihÿre, tii judeukõdu mahãduõ hãrele tahe itõtyky resymy rarybeõhyrenyre. Tiiboho waki ibinamy rahaõhyrenyre.

⁴ Idile rõhõtinyinmyhÿre ityhydÿÿdukõdu mahãdu. Tiiboho nalòdenyde waixãwididÿÿnaren-y-ò retehekremy, iny Kristu-ki ijõdiwãhãre-ò. Tiiboho ixiwesemy iny-di risÿnykemy ratxirenyreri. Tiiboho ityhydÿÿdu wesemy rexisÿnynmyhÿre.

⁵ Tamy jiarÿboho raholaren-y-õhyymahãre inatyhymy Rybewihikÿ aribireny ritaõhykemy.

⁶⁻⁹ Dohodÿÿdu mahãdu ratyre mahãdu heka Joaõ, Txiau, Pedro-wana rare. Tiiboho ibutu erysna ratyre rÿiraki, kia aõ aõkõ wadee rare. Tiiboho aõ tÿmyra riwabedeerynyõre. Deuxu-ò tahe ibutumy iny wiwesehy rare. Deuxu riwateònyrenyre judeukõdu mahãdu-ò Rybewihikÿ wahisidÿÿmy. Kia Joaõboho wiwesehyylemy widi rõhõtinyinre riwawehitynanyra jiarÿ Banabe-wana. Tai tahe iwese Pedro judeukõdu mahãdu-ò rare. Tiiboho tahe ritÿÿnynmyhÿke judeu mahãduòle wahe.

¹⁰ Urile riwatyhenyra iny aõkõdu mahãdu ariwiòhenanymahãkemy. Kia juhuy ariwinykemy watxiwãhãre.

¹¹⁻¹² Atxiòkia-ò Pedro rehemyhÿreu jiarÿ tuu rarybere timybo ibinamy riwinymy ihÿremy rexiitxenanymyhÿreki. Hãbuõ Txiau-ribi rehemynyõrau, tii judeukõdu mahãdu-wana riroxire. Irahudi tahe dehemynydenydeu, riroxiõhyylemy rexitare. Judeu mahãdu rybe lau ruberure.

¹³ Ijõ judeu iwesele rotÿÿnyre. Ihewoludu Banabe tulere.

¹⁴ Tuu rabireu, òbitimy aõkõ Rybewihikÿ inatyhy wesemy aõkõ rotÿÿnynmy raremyhÿ tahe rarybere ibuturu-ò, Pedro-ò. Kai judeu mabekeki, tahe judeukõdu mahãdu wesemy tanabededÿÿnanamy ahãte. Uritere judeukõ mahãdu judeu mahãdu wesemy isÿdÿÿõmy.

¹⁵ Jiarÿboho tahe judeu mahãdumy reamahãrenyre. Judeukõ mahãdumy aõkõ watxiwãhãrenyre.

¹⁶ Iny bede ywidÿÿna aõkõ iny ritamy roire. Kia Kristu iny rityhynymyhyÿrele iny ritamy roire. Bede ywina ywityhydÿÿna iny ritaõtyhy.

¹⁷ Iny Kristu-ki tarasana ritamy ratxikeki, tahe òrarudu tyhymy ronykeki, Kristu aõbo òraruna widÿÿna rare? Aõkõre.

¹⁸ Jiarÿ bede ywiny ywidÿÿna-ò aròðsekeki, òrarudumy ararekre. Kia jiarÿ idi ariatymy rÿimyhÿre ixityre ariwinykeki òrarudumy arareke.

¹⁹ Jiarÿ bede ywina rarumy rãire wese, Kristu-ò warumy ararekremy. Kristu-wana jiarÿ raitxeòkirubudÿÿnanymahãre.

²⁰ Jiarÿ ixidee warumy aõkõ wahãre. Kristu tahe wawo-ki riwarudÿÿnanymy ihÿre. Warumy watzireriwana Deuxu iriòretyhydÿÿna òrarukile warumy wãhãre. Tii waluumy ratximyhÿre. Tahe wadee rexiwahinyra.

²¹ Deuxu ruxetòedỹna aribynykemy aõkõ watzireri. Bede ywina tyhydỹna òraru-ki ywityhydỹna tahe inyõ ritakemy ratxireri. Kia-dí inatyhymy inyõ rexitakeki tahe, Kristu uriòle rurure.

3

¹ Alatxia mahãdu timybo tahõtinyteri kaiboho õhõtibede-di rierykõrenyre. Kia-di òsana tahõtinyre. Moòwòru ijeranamy ahãtenyte. Jesuisi Kristu itxeò-ki rururedi taholatenytyhyta. Õhõti-ribo aõbo kia rosare.

² Kiale arierykemy watzireri timybo tahõtinytenyteri: Deuxu Tyytybytyhy temytenyta bede ywina widỹnamy aõbo ada inatyhyna tyhydỹnamy aõbo.

³ Juhu urile tetyhynytenyte idi ixiumykile tadexityhynymy ahãtenyte, bede ywina ywisidỹna wahe.

⁴ Kaiboho òbitimy tahõtinyõtenyte. Kia aõbo aõhõkỹmy tatỹnytenyte uriòhyyòle?

⁵⁻⁶ Aõkõre, uriòkele aõkõre òsana tahõtinyteri. Deuxu Tattytybytyhy adeereny diwahinyde. Kia aõbo riwinyre bede ywina ywisidỹ kaiboho tamahãtenyteki? Aõkõre, tetyhynmahãteki kia riwinyre. Deuxu aõna aõna wiwihikỹ akoreny-ki riwinyre. Kia sohojile iny ritake. Abraõ Deuxu rityhinyre. Tai tahe tamy òbitimy rare Deuxu-ò, iòraru iribi riixãwididỹnyraki.

⁷ Tai ibutumy rityhynymyhỹre mahãdu Abraõ riòremy rỹira.

⁸ Tyyriti-ki roimyhỹre kia: —Deuxu heka judeu mahãdu sohojile aõkõ riòbitinykre. Ibutumy iny riòbitinykre ityhydỹ erysydỹna òraru-ki. Rybewihikỹ erysyna Abraõ-ò juhoo dehemynde. Kia wese Tyyriti doide: —Aòraru-ki ibutumy iny-ò deysana kanakre.

⁹ Tahe ityhydỹdu mahãdu Abraõ wesemy teysare. Abraõ dori ityhydỹdu rare.

¹⁰ Inyõ bede ywina rityhynyòkeki, Deuxu txuhòbina kedeake. Jesuisi-ò tyhynale iny kiditakre. Kia Tyyritidỹna dori roire: —Inyõ ibutumy bede ywina riwinyòkeki, tamy Deuxu txuhòbina kedealeke.

¹¹ Òbiti mahãdu rityhynymy ronykre. Kia riki Ritidỹna roire. Tahe bede ywina heka inyboho aõkõ riòbitidỹnyre.

¹² Bede ywina heka iwitxi rare ityhyna-ribo. Tahe inyõ bede ywina rityhynymy ratxikeki, tii ibutumy rityhynymy rarehyyke.

¹³ Inyboho Deuxu bede ywina rikiywinyrenyòkeki, Deuxu txuhòbina inydeereny kedeakre. Kristu tahe kia-ribo iny ritare. Tule inyòwòruna òraru-ki rexilamadỹnyre inydee iòwydỹna-ki. Beteheke Tyyritidỹna roire: —Inyõ òwòru itxeò-ki ritamadỹnykeki, tamy txuhòbina kedealekre.

¹⁴ Deuxu narybede heka Tattytybytyhy iny-ò riwahinykemy. Wiji tahe inyõ rityhynykeki, Deuxu Tyytybytyhy ritakre. Tai Abraõ deysana inydeereny rehemynyre Jesuisi Kristu òraru-ki.

¹⁵ Waseriòreboho, jiarỹ hãbu wesemy ararybekre. Iny inatxi jurasadỹna ritina riwinykeki, inireny ritidikeki, inyõ riwitziranyòtyhy. Tai ijõ wixira riritinyòtyhy.

¹⁶ Boholabenyke, Deuxu juhoo Abraõ dee narybede: —Abraõ riòre hewoluduõ Kristumy. Abraõ riòre sòwe dee rarybeõre. Sohojideele rarybere. Tahe tariòre-ò Kristumy rarybere.

¹⁷ Tuheka rarybereri: —Deuxu juradỹna wese juhoo rarybere, 430 beòra bede rỹire idi tahe bede ywina nade. Kia Deuxu juradỹna riixãwidinyòtyhy.

¹⁸ Tarasany bede ywinawidỹna òraru-ki kidiwahinykeki, wahisidỹna aõkõ heka rare. Tai Deuxu heka Abraõ-ò jurasadỹna riwahinyre. Iòwydimy aõkõ juhoo dori rarybere tii kidiwahinykemy.

19 Aõherekibo heka nade? Kia nade òraruna òraru-ki Kristu nadeule kÿny juhu ludu wese aõkõ roire. Kristu heka Deuxu deòdÿÿna rare. Iwese Deuxu rarybere wese riwahinyre. Tii Abraõ riòre riòre-ribihy reare. Ýjumy bede ywina nade. Iny itya ludu debò-ki rehemynyra. Moisesi iwahidÿÿdure.

20 Boholake, Moisesi sohojile aõkõ itya ludu ratxireri bede ywina riwahinyre. Deuxu tahe sohojile rare irybe riwahinyre.

21 Bede ywina aõbo Deuxu jurasadÿÿna riixãwidinyke? Aõkõre. Bede ywina umy ituedeõna riwahinykeki, òbitidÿÿna inatyhymy bede ywina nade. Tahe aõkõre.

22 Deuxu Tyyriti rarybere: ibutumy iny òraruna-di ratxireri. Kristu iny rityhynykeki, Deuxu jurasadÿÿna tamy riwahinyke.

23 Ityhydÿÿna rehemynymynkoki bede ywina iny rityhynymyhÿre ròtenawo-ki inyboho roire wese. Kia-ò iny riraòhyymy rÿimyhÿre inatyhydÿÿna kedehemynkemy.

24 Uladu bedeerydÿÿdu wese bede ywina rare inydeereny. Kristu rehemynkõu, inyboho bede ywina rityhynyreny. Tai Kristu-ò inyboho òbitimy ronykremy ityhydÿÿna òraru-ki.

25 Ityhydÿÿna-ò iny rehemynyre, uladu bede erydÿÿdu-ribi ixãwimyhÿre.

26 Kristu-ki ibutumy Deuxu riòre atximahãtenyete ityhydÿÿna-ki.

27 Ibutu dori Kristu-ò taratisebenyete, Kristu wesemy tatÿÿnyete.

28 Kristu tÿnydÿÿna-ki wiribi hitximy aõkõ boibe, judeukõdu mahãdu, iny-wana, deòdu deòdu aõkõ-wana, ijoj hãwyy-wana ibutumy wiwese wesele Kristu-ki rÿike.

29 Kristu-ki mabekeki, Abraõ riòre riòrelemy mabekre. Jurasadÿÿna rareasadÿÿdumy atximahãtenyete.

4

1 Ijyyõ arelyykre –rareasadÿÿduõ deòdu wesemy raremyhÿ tii uladumy rareu, ibutu wedu rare hãre wahe.

2 Urile tyby rarybere raumynkõule, tii tatibiedÿÿdu rybe rityhynymyhÿre.

3 Kia wese iny rare. Uladu wesemy bede aõmydÿÿnana rityhynymyhÿre juhuu.

4-5 Iribi tahe bededÿÿnana he rehemynyra. Deuxu tahe Tariòre diteònyde ijadõma ririòredÿÿnykremy. Bede ywina tyhynakremy reare. Tii nade bede ywina tyhydÿÿdu mahãdu tarasamy kia tyhyna-ribi ritakemy tariòre wesemy ritibienykemy.

6 Deuxu Riòre wesemy iny ihÿreki iny-ki ratximyhÿreki, Tatytybytyhy inywo-ò risÿnyre. Tai inywo-ribi rarybemyhÿre: –Waha, Waha.

7 Wiji tahe deòdu wese aõkõ atxiteri, Deuxu riòretyhy wese atxiteri. Tule Deuxu rareasadÿÿduõle tate.

8 Juhuu Deuxu teeryõtenyete. Kaiboho deuxu witxira wese tetyhynytenyete –deuxu inatyhy aõkõ tetyhynytenyete.

9 Ka tahe Deuxu teerymy ahãtenyete tetyhynmahãte. Deuxu anaerynymyhÿdenyde. Ixyby bede aõmydÿÿnana-ò òòsedÿÿõmy, arawiòhenyõreki. Deòdumy aõkõ ixyby rÿimy boibeke.

10 Txu yrubudÿÿõmy, ahãdu yrubudÿÿõmy, beòra yrubudÿÿõmy.

11 Inatyhymy ada aõkõre aõbo waaõmysÿdÿÿna adeereny reõnonyra?

12 Wawesehyymy boibeke. Jiarÿ dori tatemahã wese raremahã, waseriòreboho. Kaiboho wadee aõbina tewinyõmahãtenyete.

13 Kia teeryte. Jiarÿ juhuu adeereny Deuxu rybemy rarybereu, jiarÿ iu wabinawãhãu.

14 Wabinana heka isirare adeereny, ihâre tahe waderaõre tahe wadi arukirenyra, iwese ÿju Deuxu-ribi jiarÿ anade wese kaiboho tiwamytenynte, iwese taheka Jesuisi Kristule jiarÿ rare wese wadi tewisÿnytenynte.

15 Titxibo rare eysanareny juhoo adi toite wahe. Kaiboho aruereny wii tesÿnymy toitemyhÿ kaiboho wakyyrenyeki.

16 Jiarÿ aõbohe aõludumy relera, inatyhy rybe adeereny rarybereki? Aõkõhyyre.

17 Hãbuõ arãitxenanyhÿreny. Aluu wese heka ratxirerimy ihÿre. Aõlõnany dori rarunyeri. Tiiboho wabiõwana-ribi atarasamy adi ihÿreny.

18 Aõwihikÿ erysomy marurunyke. Tii tahe awire, awanale watzireriki aõkõ.

19 Wariõre wese, adeereny aõhõkÿmy ratÿÿnyre, hãwyy reamyhÿre mytxitxi wese jiarÿ rare adeereny Kristu awo-ki rexilamadÿÿnyhykemy.

20 Awanareny ararekemy watzireri. Tai tahe warybe wixira-di kia anarybekemy watzireri. Aõhebo adeereny heka arasÿnyre arawiõhenanykemy watxiwãhãre. Timybo reerykõre dori.

21 Inyõ bede ywina tyhydÿÿdumy ratxikeki, wadee manarybeke kiamy: aõmybo bede ywina raryberamy teeryteri?

22 Kia Tyyritidÿÿna-ki roire Abraõ riõre inatxire. Juhoo ludu teõdu-ribi, Haari-ribi, reare tabireludu-ribi. Ijõ, Sara-ribi, ihãwyytyhy-ribi reara, deõdu-ribi aõkõ.

23 Deõdu riõre ibutu dee wese nade. Abraõ hãwyy riõre aõkõre Deuxu rybawahisidÿÿna xiery reare.

24 Kia ijyy-di rawesenanyrereri. Inatxi hãwyy inatxi jurasadÿÿna wese heka rare.

25 Ijõ Haari inire, deõduni. Iriõre deõdumy rarekemy reare. Sinai Hãwãlõ wese tii rare. Kowa tyre-ki bede ywina inydee riwahinyre. Jerusalẽ wesemy roimyhÿre kia mahãdu deõdumy dori rÿira, tariõre-wana.

26 Jerusalẽ tyhydÿÿna mahãdu, biu ludu tahe deõdu wese aõkõ rare, ixinamy inyboho roire. Abraõ hãwyytyhy riõre wese inyboho roire.

27 Tyyritidÿÿnaõ dori roire: –Hãwyy ariõreõ beysakre. Birajuakre ariõrekõhãrele beysamy ariõredikire heka. Hãwyy risina riõre sõwetyhyre, hãwyy ihãbu-di ratyre.

28 Waseriõreboho, kaiboho rybe ywisidÿÿna riõre wesemy ahãtenynte, Ijai wesemy.

29 Iwese ibutu ludu wesemy reareõ aõbina riwidÿÿnanymyhÿre. Deuxu Tyytybytyhymy reareõ. Wiji, tahe kia weselemyhÿre.

30 Tyyritidÿÿ rarybera: –Biteõnyke deõdu tariõre-wana. Rareasadÿÿdu ibutumy rimykre. Hãwyy deõdu aõ aõkõ rimykre tariõre-wana.

31 Waseriõreboho, deõdu riõre wese aõkõ inyboho roire. Hãwyytyhy riõre tahe iny roire.

5

1 Kristu inyboho ritare ixinamy inyweduoõduõlemy roirekemy. Kawese rokoirekemy. Deõdu wese ixyby rukunyunyõkre.

2 Jiarÿ, Paulo, adeereny rarybereri: inyõ notykyresyna-ò ròõsekeki, Kristu riwiõhenanyõhyymyhÿre.

3 Ixityre ararybeke. Inyõ rinotykyresynanykeki, bede ywina ibutumy tii riyrubunyhyke.

4 Inyõ bede ywina rexiõbitinymy ratxikeki, Kristu-ribi rexihitx-idÿÿnymyhÿre, ruxetõena tyhy-na-ribi rexitare.

⁵ Deuxu riwaòbitinyrenyrene Tatytybytyhy òraru-ki kia retyhynyrenyrene. Kia reraòrenyrene.

⁶ Jesuisi Kristu-ò notyky resyna aõ aõkõ rare. Notyky resynakõ tule aõ aõkõ rare. Inatyhynamy luunamy aõ rare.

⁷ Juhuu awimy tuu tatyynmahâte, inatyhyna-ki ijera wihikỹmy teamyhỹte, moõ inatyhyna-ribi anaixãwididỹnyde.

⁸ Deuxu aõkõ atarasadu juhUU ixãwididỹnyde.

⁹ Inyõ paõ riwinykeu, ibutenode ritxiwikeki ibutumy ratarinyke. Inyõ ibinamy urihimyò arabedeerynykeki sówemy ribinadỹnyke.

¹⁰ Jiarỹ Wanyrỹ retyhynyrene, kaiboho wawesemy mohõtinybenykemy adireny watxireri.

¹¹ Waseriòreboho jiarỹ waòludu dire. Kia tahe riteòsinyrene notyky resynamy rarybeòre ijõ wamy raryberehãre. Kia ararybekeki sówemy wahemy kanakre. Itxeò tỹnydỹna rybe rityhynykre.

¹² Kowa mahãdu òte rexihukemy idi watxireri. Adeereny aõbina diwinymyhỹdenyde.

¹³ Kaiboho Deuxu arateònyrenyrene, urile òraruõmy boibeke kaiboho bede ywina-ribi ixinamy boibeke. Wii biwiòhenanymyhỹbenyke, wiluurenkyemy.

¹⁴ Bede ywina ibutumy rexibutunyrene rybe-ki kia tahe rare: —Inyluuke ixiluure wese.

¹⁵ Wiwana bòrenybenykeki, kaiboho widi buruakeki, bexihãrubeny ibutumy wii mahubenyheny.

¹⁶ Tai jiarỹ rarybere, Deuxu Tyytybytyhy deewimy boibekemy deòbiredỹna iwidỹõmy boibeke.

¹⁷ Deòbiredỹna dori Deuxu Tyytybytyhy òluduna-ki ramyhỹre. Wimyy òludurennyrene. Tai aõbo adeereny awire iwidỹã adeereny isirare.

¹⁸ Tahe, Deuxu Tyytybytyhy arateòsinyrenykeki, bede ywina ywidỹna aõkõ bityhynyke.

¹⁹ Deòbiredỹna aõna aõnamy dỹnana-ki kia roire: aderanadino, aõbinade, raykyõmy, òta òta,

²⁰ suritxoomy àlàdỹna, òwòruna wii, òlududỹna, aõbinaluu, ihãru, kyara, wobiredỹna, wiribihixina,

²¹ ibutu aõmydỹna ixixiburedỹ, axaxaluu, rỹsỹnaluu byrehekỹ, tule ijõ aõna aõnã sówemy kawesere. Inyõ kia aõna aõnawidỹ rierykeki, Deuxu òlona rareasadỹdu aõkõ roikre. Tuu rarybere juhuule.

²² Ka heka Deuxu Tyytybytyhy aõmydỹnanamy rybena roire: iwahidỹna kia rỹre, tii dori inywomy rỹira. Wiluuna, deysana, ywina, ruxetòena, wina, òbitidỹnana,

²³ ibutu-ò awina, ixidee inytyhyna, ixirydyỹna, tai bede ywina ihoõhyyre kia-ò.

²⁴ Kristu hõrõ mahãdu kia itxeò-ki ritidirenyrene: deòbiredỹna, aõmydỹnana bina-ribi, deòsana aõmydỹnana-ribi

²⁵ Inyboho Deuxu Tyytybytyhy-di rokoirekeki Deuxu Tyytybytyhyry-ki rakariarenkyre

²⁶ Ixi deàlanararòsò luukemy aõkõ rakatximyhỹrenyke. Tai tahe ixixiburedỹna-di aõkõ, rakatxirenyke. Wiòbiredỹna-di rakatxirenyõke.

6

¹ Waseriòreboho. Inyõ òraruna-txi resekeki, kaiboho ywina-di biòbitinybenyke. Bexihãrumahãbenyke kia òraruna-txi ixẽomy boibekõkemy. Kaiboho dori, Deuxu mahãdu toite wahe.

² Wiitxykywydywesemy wii biwiòhenanybenyke ibutu aõmydỹỹnana-ki. Iwesekeki, Kristu bede ywina tetyhynmahãtenyte.

³ Inyõ ixidee aõlemy rõhõtinykeki, tahe tii aõhy aõkõ rare, tii rexiitxenanymyhỹre.

⁴ Ixinamy iny sohoji sohoji taaõmydỹỹna-ò retehemyhỹke, aõhebo rotỹỹnymyhỹremy wahe. Idi tahe ixi aõmydỹỹnale-di kedexityhynymyhỹkre, tabireludu aõmydỹỹna-di aõkõ.

⁵ Iny sohoji sohoji dori taitxyky riwymyhỹke.

⁶ Inyõ Deuxurybe erydỹỹna ijõdikewana tabedeerydỹỹna mahãdu-ò ibutummy erysyna wiwihikỹle-di rirareamahãke. Tule bedeery mahãdu heka tohodỹỹna mahãdu-ò aõna aõna wihikỹ riwahinymyhỹre.

⁷ Ixiitxenadỹỹõmy. Inyõ heka Deuxu itxenadỹỹõmy alòbòròna-ò iny ribòrònykeki, tiile tahe raumynyhyymyhỹre.

⁸ Inyõ òraruna ribòrònykeki, rubule taummy-ki ritake. Inyõ Deuxu Tyytybytyhy deewimy tuu rotỹỹnykeki umytuedeõna ritake.

⁹ Aõwihikỹ widỹỹhyemy boibeke. Kia-ki elemy ruburenyõmy. Aõwihikỹ widỹỹhy boibekeki, adeeremy aõwihikỹ wahidỹỹna wese kanake.

¹⁰ Ibutummy inydeeremy aõwihikỹ widỹỹ-ki inyboho abededỹỹnanawikeki ibutummy iny rikiwiòhenanyrenymy, rỹkỹirenyke, ityhydỹỹdu mahãduõ bexiwinyhyy ahãbenykemy iwiòhedỹỹ-ò.

¹¹ Tuhe, jiarỹle ariritinykre, Paulo wahe. Betehebeny inihe ritidỹỹna nihikỹ reritinyra wadebò-di.

¹² Inyõ ayreny-ki wohyna ixidee rimumy ratxireri, kia adeeremy õtyky resynamy adi ratxirerihyymyhỹre. Kristu itxeòmy tiibohe ritỹnynyrenykeu aõhõkỹmy rotỹỹnyõmykemy rõhõtinyinymyhỹre.

¹³ Notyky resyna mahãdu bede ywina rityhynyõre. Tiile rexityhynymyhỹre. Kaibohe irybe-ò boholakemy atxiteri.

¹⁴ Jiarỹ arexiwowydynanyõhyymahãkre, Wanyrỹ Jesuisi Kristu itxeò-di areysakre, biu-ò hena òraru-ki wahe. Bede aõmydỹỹnana waki rỹimyhỹre, itxeò-ki retamadỹỹnyra waribi ixãwira.

¹⁵ Notyky resynadỹỹ aõ aõkõ rare. Notyky resynadỹỹkõ tule aõ aõkõ rare. Urile biu-ò hena-di boibekele tahe aõ rare.

¹⁶ Kia bede ywina bityhynybenymy boibekeki, Deuxu-ribi ywina, ruxetòena, adeeremy kanakemy idi watxireri. Tule Deuxu mahãdu ibutu-ò, judeu mahãdu wese dori ratxireri.

¹⁷ Karibi tako-ò tahe inyõ waixiradỹỹõmy ararekre. Beydỹỹna dori waummy-ki roimyhỹre, Jesuisi rybe rybemy rybedu òraru-ki.

¹⁸ Waseriòrebohe, Jesuisi Kristu ruxetòena akireny rỹikemy watxireri. Kie.

Efesu Paulo Tyyriti, Efesu Hãwã-ò

¹ Paulo, Jesuisi Kristu deòdỹna jiarỹ rare. Deuxudeewimy tahe kia rare. Efesu hãwã ityhydỹdu mahãdu –ò kalemy warybe rewahinyreri. Kaiboho ywimynodu mahãdumy toimahãte.

² Ruxetòena adeereny kidiatykemy Deuxu-ribi idi watrixeri tule Jesuisi Kristu Inynyrỹ-ribi.

³ Deuxu, Inynyrỹ tybyreny, inyboho tuu reàlàmyhỹreny. Tii dori inydeereny wihikỹ inywo ywinamy diwahinyde Jesuisi òraru-ki biukihikỹle wahe.

⁴ Deuxu inyyreny-ribi rihitxinymy ritare. Inyboho heka tuu roire. Ihetxiu heka inyho aõkõu tii rihitxinymy ritakremy rỹimyhỹre, inyboho wahe. Kristu-ki iny rihitxinymy rỹire. Iny òbitimy rỹirakemy rihitxinymy, ywimy nodumy wahe. Kiamy heka rokoirekre Kristuko-txi luuna-di.

⁵ Ihetxiu tamywimy Deuxu rihitxinymy ritare, inyboho wahe. Iriòreny wesemy rokoirekemy.

⁶ Kiamy heka Deuxu riwinyre àlana, wohyna-wana tamy rikiwahinyreny kemy tii dori inyluurekí wahe. Kristu hãlubu òrarukile biu-ò henareny iny nade. Iny òrarureny riòwinyre taruxetòena wihikỹ òraru-ki.

⁷⁻¹⁰ Ruxetòena sòwemy inydeereny diwahinyde tii dori ibutumy aõna aõna erydu rare. Deuxu dee wina rybe wòte wese rare. Tahe inydeereny kiditynynykemy idi ratxireri. Tamywimy tahe inydeereny riteòsinyre. Iwese tii ròhòtinyre wese. Bededỹnana rexihukreu. Kristu-ki ibutumy aõna aõna biu-ki bede-ki rỹikremy ihỹre. Kiamy tahe Deuxu ròhòtinyre.

¹¹⁻¹² Kristu òraru-ki Deuxu juhoo iny mahãduy-ribi inyboho rihitxinymy. Tii diwahinyde inydeereny uriònojura jurana. Tii dori ixideewilemy ibutumy aõhebo rotỹnynymyhỹre Deuxu kia hitxidỹna mahãdu ixidile wowydyna mahãduõ rỹirakemy rỹimyhỹre. Inyboho juhoo rityhynymy Kristu-ò.

¹³ Kaiboho kiaõ toimahãte. Juhoo rybe inatyhy-ò taholatenyete, tetyhynymyhỹtenyete tarasa Rybewihikỹ-ò wahe. Tai tahe Deuxu Tyytybytyhy-di ratidỹna wesemy iny dee ritidimyhỹre. Deuxu Tyytybytyhy dori tii kidiwahinykemy rarybere, ihetxiu wahe.

¹⁴ Uriòno jura jurana Deuxu Tyytybytyhy rare inydeereny. Deuxu tahõrõ mahãdu ritakreu, tuu reàlàrenykre tuu, inyboho dori kia mahãduõ roire.

¹⁵ Tahe jiarỹ, Paulo, tule umy raholamahãre Jesuisi Kristu atyhydỹna-ò, tule aluuna ityhydỹdu-ò. Tai tahe Deuxu-ò àlana-di araxitòedỹnyrenymahãre. Wanohõti aribireny rosaõhyymyhỹre.

¹⁶⁻¹⁷ Deuxu tahe Jesuisi Kristu biu loosõna tyby rare. Tii araykyreny-ò beceryna kidiwahinykemy watrixeri, awolyrana kidiwahinykemy watrixeri.

¹⁸ Tai tahe araykyrawoni ritỹnynykemy watrixeri. Tai kaiboho bierybenykre Deuxu iryna. Tule ityhyna biu loosõna-di bierybeny kemy watrixeri.

¹⁹ Deuxu taruruna sòwemy diwahinymyhỹde ityhydỹdu mahãdu-ò. Iruna tahe aõni rare inydeereny uriòno jura jurana. Kia tule bierybeny kemy watrixeri.

²⁰⁻²¹ Kia irurumy inyboho tuu robirenyre, Kristu rubu-ribi rexiixixanyreu, taruruna weribi ronykemy disỹnydeu, biukihikỹle wahe. Kristu tahe ibuturuna wixira wixira ratyre rare, ibutu wedu ratyre, ibutu dinodu ratyre,

ibutu deòdỹỹdu ratyre. Ibutuni ratyre tii rare. Wijinani ratyre, tule kanakremy ihỹreni ratyre rare.

²² Deuxu tahe ibutu aõna aõna wixira wixira Kristuwarawo-ò ritidire tai tii ibutuwedukremy. Tii ibuturati wesemy rare. Kia tii ihỹre dohodỹỹdu mahãdu-ò, iwedu wahe.

²³ Dohodỹỹdu mahãdu tahe Kristumy wese rare. Kristu dori ibutu aõna aõna ritỹxinymyhỹre.

2

¹ Juhuu kaiboho rubumy tãimahãte òraruna òraru-ki.

² Juhuu kaiboho bedeaõmydỹỹnana bedeki toitemahã juhUU Satanasi deòdỹỹna tetyhynymy toitemahã. Tii bedeyhy ruruna dinodu rare. Ityhydỹỹdukõdu mahãdu wiji dori rityhynymy rỹira, itxiõdỹỹdu mahãdu wahe.

³ Ityhydỹỹdukõdu mahãduy-ki juhUU tule inyboho roiremahã –ibutumy ixideerenywymy inyboho riwinyrenyre; inraykyreny wydyna-deewimy tule inyboho riwinyrenyre. Ehehewidỹỹdu inyboho roiremyhỹ, tuu ratybienymy rarehyy dori tuu rare. Iwese ijõ roiremyhỹ wese.

⁴ Deuxu tahe sõwetyhymy ruxetõena diwahinymyhỹde, inyluurenyreki.

⁵⁻⁶ Deuxu inyboho rurudỹỹnyre Kristu-wana rubu-ribi riixixanyrenyre. Kristusỹ-ki biu-ki tii inyboho risỹnyre tai rokonyrenykeny. Iruxetõena òrarukile abiu-ò henareny dire.

⁷ Iruxetõena kiditeòsinykre bededỹỹnana robehemy roireki wahe. Iwese sõwehyymy iruxetõena diwahinyde wesemy.

⁸ Tarasana Deuxu ruxetõenaribile nade aityhydỹỹnareny òraru-ki tuu rare. Iny-ribi aõkõ nade. Deuxu wahidỹỹna rare.

⁹ Iny-ribi rarybekre inyõ ixityhydỹỹmy tahe aõkõre Deuxu ruxetõenakile tuu rare.

¹⁰ Tii tahe ibutumy iny riwinyrenyre. Òbiti aõmydỹỹnana widỹỹdukemy iny riwinyre Jesuisi Kristu òraru-ki. Deuxule juhUU rõhõtinyre òbiti widỹỹdumy aõbo rokoirekeny.

¹¹ Tahe kaiboho uritere nohõti losaõmy kaiboho judeukõdu mahãdu toite juhUU mahã. Kiamy judeu mahãdu arãninimyhỹrenyre, notykyresykõdu mahãdu wahe. Tii dori notyky resydu mahãdu roire, iyresynadireki wahe.

¹² JuhUU tahe aruta wesele toite Kristu-ki aõkõ. Judeu mahãdu-ribi ri-hitxinymy nyimyhỹde. Deuxu rybe ywisidỹỹna ludu aõkõ toite. Araròsõna renyõhyyre. Adeuxurenyõhyyre bedede bedemy.

¹³ Juhu irehemy Deuxu-ribi toite mahã. Tahe wiji Jesuisi Kristu hãlubu òraru-ki araõhòdỹỹnymy toite.

¹⁴ Jesuisi Kristu tahe iny ywidỹỹna rare. Kyarana tahe òtity wese itya-ki rỹimyhỹre judeu mahãdu aribi kia rihitxinyre. Tahe kia òtity ritxiwire tahe sohoji mahãdulemy riwinyre.

¹⁵ Tahe Kristu rurureu tahe ixãwire kia bedede ywina. Tahe inatxi wimy òludu mahãdu sohoji iny tỹmyrahyylemy riwinyre. Tahe ywina rõhõnyre wiwana ributunyra tahe Deuxu taluuna tamy riwahinyra.

¹⁶ Jesuisi taitxeò-ki rurureki, ywina rieryrenyre. Tahe kyarana-ribi ri-ixãwididỹỹnyre.

¹⁷ Jesuisi tahe ywinamy rarybere iòhò ludu kaiboho wahe tule irehe ludu, judeukõdu mahãdu wahe.

¹⁸ Tahe kaiboho jiarỹboho-wana sohoji Deuxu Tyytybytyhy òrarukile Deuxu-ò rekexitõenyrenyke.

¹⁹ Kawese tahe kaiboho ityhydỹỹdu mahãdu-ò talote. Iny-ribi lahixi aõkõ toite, Deuxusỹ mahãduõle heka toite.

²⁰ Deuxu rybedu, tadeòdu-wana hetoõ wesemy kaiboho boibekre. Jesuisi Kristule iko ludu mana wese rare.

²¹ Jesuisi Kristu òraru-ki wiwesehyyle heto awimy rỹire. Tai Inynyrỹ hetotyhy relemy rexihumyhỹre.

²² Kaiboho tule matybienybenykre Deuxu Tyytybytyhy hetoõ wese wahe.

3

¹ Tai jiarỹ, Paulo, rotena-ki nodu wesemy rare Jesuisi Kristu òraru-ki. Judeukõdu mahãdu dee kiamy heka watxiwãhãre, adeereny wahe.

² Deuxu ruxetõena wadee riwahinyre. Kaiboho aõbo tuu taho-latenyõmahãte.

³ Deuxu dori tawõtena diteòsinyde wadee.

⁴⁻⁵ Jiarỹ kiamy juhoo reritinyriòrere katyyritikile wahe. Idi mariabenykeu bierybenykemy idi watxireri, timybo Kristu wõtena rybe reeryremy wahe. Kristu wõtena tahe ihetxiu ibutu inyõ riteòsinyõhyre. Wiji tahe riteòsinymy ihỹre Deuxu Tyytybytyhyle tahe deòdu-ò, rybedu-ò ritỹnynymy ihỹre.

⁶⁻⁷ Kiamy heka rare: kaiboho, judeukõdu mahãdu, wii ributunyre inyboho-wana judeu mahãdu wahe. Uriõnowi jurawi juramy idi rokoirekre, sohoji mahãdulemy wahe. Kristu Rybewihikỹ òraru-ki ityhydỹỹdu mahãdu-ò rirònyrenyre. Kia rybe-di rybedumy diwateònyde, ruxetõena wahidỹỹnaõ wadee nade Deuxu ruruna sõwe-ribi. Ityhydỹỹdu mahãduy-ribi jiarỹ aõ aõkõmy watxiwãhãre retyhynytyhymy aõkõ watxiwãhãre.

⁸ Ihãrele Rybewihikỹ rybedumy ararekre Kristu aõmydỹỹnana heka iny raykywydyna ratyre awimy ihỹre. Kiamy judeukõdu mahãdu-ò arelyykemy riwahitxinyre.

⁹ Ibutu inyõ rybe wõtena aritỹnynykemy watxiwãhãre juhoo Deuxu Jesuisi-wana ibutumy aõna aõna riwinyre kiau rybewõtena riwõmy roimyhỹre Deuxu-ki.

¹⁰ Wijina tahe riteòsinykemy ihỹre dohodỹỹna-ki. Tai tahe ibutumy biu-ribi rurunadu, bedeerydỹỹdu rierykemy timykibo Deuxu bede erysyna-di raremyhỹ ibutumy aõna aõna erysyna-di.

¹¹ Iwese Deuxu ibutumy aõhebo rotỹỹnykemy ratximyhỹre wese iny rierykre, Inynyrỹ Jesuisi Kristu òrarukile wahe.

¹² Tai tahe iny rexideòsinymyhỹre brebuõlemy Deuxu ixitõenadỹỹna-di Kristu dori inyboho rityhynymyhỹre.

¹³ Tai kaiboho ixiiiodỹỹrenyõmy ahãke, jiarỹ aõhõkỹmy ratỹỹnyreki kia dori awowydyna rare, waaõhõkỹmy dỹỹnana wahe.

¹⁴ Tai tahe umyreny Deuxu-ò rexitõenyre Inynyrỹ Jesuisi Kristu tyhy-ò wahe. Ibutu sỹ mahãdu tyby Deuxu rare.

¹⁵ Ruruna adeereny kidiwahinykemy idi watxireri, tawowydyna sõwe-ribi wahe.

¹⁶ Deuxu Tyytybytyhy rurutyhy araykywo-ò kidiwahinykemy watxireri.

¹⁷ Tai Kristu aworeny-ki kanasỹnymyhỹkemy rahõtinyinmahãre atyhyna direki kaiboho heka wiluutyhymy boibekemy watxireri.

¹⁸ Tai ibutu ityhydỹỹdu mahãdu-wana Kristu luuna bierybenyke. Inyõ Kristu luuna awire rieryõtyhy. Ihãrele tahe bierybenyke iwese rare wesemy.

¹⁹ Tai Deuxu-di bexilỹxinykemy idi watxireri.

²⁰ Deuxu iruruna dire. Tai iny ixitõena ratyre inydeereny kidiwahinykemy idi ihỹre. Iny irurudireki wahe.

²¹ Dohodỹỹdu mahãdu wowodyna riwahinykemy tamy watxireri, aõu aõu wahe. Bededỹỹnana konana-ò wahe. Kie.

4

¹ Inynyrỹ deòdu arixidu jiarỹ rare. Arexitòenykre inihe adeereny. Yrubuna-di aõhebo botỹnybenykemy adireny watzireri. Tai tahe Deuxu-deewimy boibekre.

²⁻³ Tii dori juhUU adeereny irydu rare òbitimy boibekemy xiwedeõmy boibeke, ele eleõmy; wii biwiòhenanymy; luuna-di marurunymy boibeke. Ixi wesehyylemy boibekemy. Tai tahe Deuxu Tyytybytyhy aratorabutenyrenykre ywimy nodu dori kia diwiòhenanymyhỹde.

⁴ Sohoji mahådule rare, sohoji Deuxu Tyytybytyhydile. Umy sohoji wese, ityytyby sohojilemy wese rare. Kaiboho tule araròsònareny sohojile rare, kaiboho ityhydỹdumy terònyteki wahe.

⁵ Inynyrỹ sohojile rare inytyhynareny sohojile rare. Tule iny ratisebena sohojile rare.

⁶ Deuxu tule sohojilere, ibutu tybymy rare ibutu ratyre rare. Ibutuy-ki tii rare. Tule ibutu rawo-ki ratzireri. Ibutumy aõhebo rotỹnykemy iny-di riwisỹnyreri tawowina-di.

⁷ Kristu tahe iny sõwemy rareki sohoji ruxetòena sõwemy sohoji-ò riwahinyre.

⁸ Kiamy heka ritina-ki roire: –Iu Jesuisi raòwònyreu biu-ò ròtena ludu mahãdu ridyre idi wahidỹna inydeereny diwahinyde.

⁹ Betehebentyke rybeweereõ-ò raòwònyremy. Aõmybohe kia rarybereri. Tahe juhUU dori surawo-txi robehere kiakekile tahe idi raòwònyke.

¹⁰ Kia robeherele taheka raòwònyre biuratyremy ibutu aõna aõna-di rex-ilỹxinykemy.

¹¹ Inyõ-ò deòdỹna mahãdumy rarekemy diwahinyde aõwihikỹ widỹ wahidỹna wahe. Ijõ-ò Deuxu rybedumy mahãdu rarekemy diwahinyde. Ijõ-ò Rybewihikỹmy rybedu mahãdumy rarekemy diwahinyde. Ijõ ityhydỹdu mahãdu yrubudỹdu mahãdumy rarekemy. Ijõ bedeerydỹdumy mahãdu rarekemy.

¹² Ibutumy kia mahãdu ityhydỹdu riwiòhenanykemy idi ratzireri. Tai ityhydỹdu iaõmysỹdỹna riwinykre. Kristu umy wesemy ritibiedỹnykemy. Ibutu dee diwahinyde.

¹³ Ikonanau tahe ibutumy wiwese wesemy rõkõhõtinyrenyke, iny tyhynareny wahe. Deuxu Riòre rikierityhyrenyke, iny òbitimy rokoireke, Kristu òbiti wesemy rokoireke.

¹⁴ Tohouã wesemy aõkõ rokoireke inytyhynareny-ki. Uritere witxi-radỹrenyõmy ibutu bedeeryna witxira witxira-di. Iwese yhy tiò tiò aõ riwymyhỹre wese kia bedeerydỹdu rare. Iwitxira tyhydỹna-ò kia ityhydỹdu mahãdu ridykemy ratximyhỹre. Ijõ inatyhy rybe weselemy rarybere. Tahe aõkõre. Kia-ò ijohonarenyõmy.

¹⁵ Tahe luuna-di inatyhymy marybebentyke. Kristu aõmydỹnana-di bex-ilỹxinybenykemy idi maumynybenyke. Tii dori iny wedureny rare.

¹⁶ Ityhydỹdu mahãdu heka Kristu umy wese rare. Ityhydỹdu sohoji sohoji wijura jura weselemy rỹira. Kristu ibutumy riwiòhenanymyhỹre iwese umy hona umy wese. Umyjura kia ibutumy iaõmysỹdỹ dire. Wiweselemy tahe raaõmysỹdỹnykeki tai tahe umy awimy rariamyhỹke. Ijõ widerakeki tahe, Kristu umy raumynyõtyhy.

¹⁷ Katahe Inynyrỹnime adeereny kiamy rarybemyhỹre. Ityhydỹdukõdu mahãdu wesemy aõkõ boibenybeke.

¹⁸ Iraykyreny bedeluru-ki ihỹrenyke. Ieheherenyre, rieryõrenyke. Tai tahe Deuxu biu-ò hena umytedeõna rieryõrenyke.

- 19 Ixâruna ihoõhyyre. Urile ibutumy òraruna-txi rexiwahinyrenyrene.
- 20 Kia Jesusimy aõkõ teerytenyete inyribireny wahe.
- 21-22 Jesuisi inatyhyna teerytenyete, ibutumy aõbina bina ixi-ribi bi-hitxinyke.
- 23 Ibutumy awo arayky-wana bexitymyranyke.
- 24 Deuxu umy tÿmyra wesena-di bexityhynybenyke. Kia heka òbiti rare; inatyhy rare.
- 25 Tai tahe ruirenyõmy wahe. Inatyhymy iny wixira-ò marybemahãbeny. Wiwese hyylemy widi rakatximyhÿrenyke.
- 26 Makyarananymahã-wana tahe urile òraru-txi ixẽõmy. Ixi-di txu iròtedÿÿõmy awobinana-di
- 27 Tule Satanasi deradÿÿna-ò nokõmy.
- 28 Inyõ juhuu wasidureki, ixityre tii wasiõmy. Tii wiji raaõmysÿdÿÿkre aõna aõna wiwihikÿ tebò-di riwinykemy wahe. Tai tahe iaõdikre iny aõkõmy rÿira riwiðhenanyke.
- 29 Kai uritere rybebinaõ ary-ribi iòlòdÿÿõmy Rybewiwihikÿlemy marybemahã. Kia rybe-di ijohodu riwiðhenanymyhÿrele kynyhetuukre.
- 30 Bibedeòtiidÿÿõmy Deuxu Tyytybytyhy. Tii dori arayrubunymyhÿre tarasanatxu-ò.
- 31 Òbina rybemy widi nokõmy, wimy ujõmoõmy, adebure ijà ijàõmy, aõbinamy inymy ijyyõmy, rybebina-di iny ihetedÿÿõmy.
- 32 Tahe ibutu dee ywimy boibekre, awimy wahe ainytyhymy iny-di boibekre. Aõbinamy iny adee rarybe-wana tahe iribi bexinohõtilosanymy biixãwididÿÿnymy Deuxu dori inyòraru riixãwididÿÿnyreki wahe.

5

- 1 Deuxu inytybytyhyreny rare. Tai tahe iwese uladu tyby wesemy rotÿÿnymyhÿre wese, kaiboho Deuxu wesemy matximahãbenyke Deuxu riòre luunadu wesemy matximahãbenyke. Wiluurenyke, Kristu dori aluurenyre.
- 2 Tule rexiwahinyre xiwe wesemy iny ritarenykemy. Tai tahe Deuxu dee kia lÿnyrena wiwihikÿ wese rare.
- 3 Tahe òta òtarenyõmy. Ibutumy aõna aõna bina bina widÿÿrenyõmy. Kaiboho dori ityhydÿÿdu mahãdu toite.
- 4 Rybebinamy uriteretere rybeõmy. Ixideòsidÿÿõmy. Kia widÿÿna tahe ibinare. Tahe aõwihikÿõ biwinyke, Deuxu deàlanamy.
- 5 Òta òtadu tahe Deuxu òlòna wahidÿÿna ritaõtyhy, iny binaõ aõkõ, iny-wobire aõkõ. Kia Deuxu tyhy biukõdu mahãdu rare. Bierybenyke kia.
- 6 Itxenadÿÿ rybe-ò ijohonarenyõmy. Ityhydÿÿdukõdu mahãdu Deuxu rybe riwinyõmyhÿre. Tai tahe Deuxu reburemyhÿre tamyreny.
- 7 Tiiboho-wana ratxiõhyymyhÿrenyrene iaõmydÿÿnana binareki.
- 8 Hÿÿnau kaiboho bedeluru-ki toitemahã. Tahe wiji Inynyrÿ loosõna-ki toite. Loosõnadÿÿdu riòre weselemy boibeke.
- 9 Aõbo loosõna-ribi nade tahe awire, òbitire, inatyhyre.
- 10 Tai aõbo Inynyrÿdeewi kia riteòsinyre.
- 11-12 Iwese bedelurubina widÿÿdu aõhebo rotÿÿnyre wese uritere iwidÿÿrenyõmy tahe teòsaremy tamy marybebenyke. Aõbo tiiboho wasimy aõhebo rotÿÿnymyhÿre ixÿruna adee rare tuu maryhemahãkeki.
- 13 Ibutumy aõna aõna loosõna ritÿÿnyre. Tai tahe iny aõmydÿÿnana loosõna ritÿÿnykeki, iny rierykre itÿnydÿÿna dori loosõna rare.
- 14 Tyyritiõ kia wesemy rÿire: —Inyõ rõrõmy rÿikeki, rexixake rubuy-ribi rÿike. Kristu tahe araloosõnanykre.

¹⁵ Aõhebo botỹỹnybenykeò bexiijebenyke. Itxỹte widỹỹdu mahãdu wesemy aõkõ ahabenyke, bedeerydu mahãdu wesemy ahãbenyke.

¹⁶ Iõnodỹỹõmy abededỹỹnana. Wiji txu bededỹỹnana tahe ibinatyhymy rare.

¹⁷ Tai tahe itxỹteõmy ahãke. Bierybenyke aõbo Deuxu dee wire.

¹⁸ Vĩĩ mona-di axaxa rubudỹỹna wesemy aõkõ matxibenyke. Kia tahe aõnityhyre, tumodu wahe. Tahe Deuxu Tyytybytyhy heka atykymy ralõmy boibeke.

¹⁹ Mawinymy bexirybenyke awo-ki. Bexirybenybenyke Inynyrỹ-ò awi-ribi bitxienymy mawiunykem. Rybewiumy marybeke.

²⁰ Deuxu inytybyreny-ò ibutumy bealãmahãbenyke Jesuisi Kristu Inynyrỹni òraru-ki tahe bexitõenyke.

²¹ Kaiboho ibutumy widee bexiywinyhyymy ahãbenykre.

²²⁻²⁴ Iwese dohodỹỹna mahãdu Kristu rybe rityhynymyhỹre wese, hãwyy tahãbu rybe riywinyke, ibutu aõmydỹỹnana-ki wahe. Hãbu dori tahãwyy dinodu wese rare.

²⁵ Ibutumy hãbu tahãwyy luukemy. Kristu dori dohodỹỹna mahãdu luureki ture. Tamy tii rexiwahinyre rurukemy.

²⁶ Tai tahe kia òbitidỹỹnamy rurure. Iwese bee aõ rasuhõmyhỹre wese, tarybe risuhõmyhỹre.

²⁷ Iòraru-ki tahe Jesuisi dohodỹỹna mahãdu wiwihikỹõ ixidee rimykre. Òbiti mahãdulemy rarekre, aõbina binaõ heka tai rỹiõhyymyhỹre. Awi mahãdu widỹỹdumy rarekre.

²⁸ Kiamy heka hãbu tahãwyy-di rỹirake. Iwese hãbu taumy luure wese tahãwyy luumy rỹirake. Iny tahãwyy luukeki, kia-di ixiluuke.

²⁹ Iny taumyderamy rỹiõhyymyhỹre. Tahe aõkõre tule rexiõwenymyhỹre rexiweseanymyhỹre. Iwese Kristu dohodỹỹna mahãdu riwisinanymyhỹre wese.

³⁰ Inyboho dori Kristu mahãduõ roire.

³¹ Kiamy heka Ritina roire: –Tai heka hãbuõ tybyboho heto ririmyhỹre tahãwyy-wana wii ributunymy roirekemy. Inatxi umy ribi sohoji umyhyymy ròhònymyhỹre.

³² Kia aõmydỹỹnana heka ierysysirare. Tahe Kristu tohodỹỹna mahãdu-wana rarybereri.

³³ Ihãrele tahe hãbu tahãwyy luumy rỹira iwese ixiluumy rỹira wese. Tule hãwyy tahãbu rityhinyke.

6

¹ Uladu mahãdu tybyboho rybe rityhynymyhỹre Inynyrỹ òraru-ki. Kia tahe òbiti rare.

² Boo adi-wana bityhynybenyke. Kia tahe bede ywina rybe juhoo rare. Tule Deuxu raròsõna kia bede ywina rybe-wana rare.

³ Kia biywinybenykeki, awimy mabeke, abededỹỹnana irehemy mabeke kabede-ki.

⁴ Uladu tyby, uladuse, ariòrereny adeburehyymy idi iwisỹdỹỹrenyõmy. Tahe aõki reòsakeki tii riòbitinykemy tamy marybebenyke. Inynyrỹ deòsidỹỹna-di tamy marybebenyke.

⁵ Deòdu mahãdu kabede-ki awedureny bityhynybenyke. Awo-ribi tyhy tamywimy biwinybenyke. Bexiijemy ywimy biwinymy. Iwese Kristu dee tewinymahãte wesemy.

⁶ Aõ tabiteriki aõkõ biywinyke. Iwese Kristu deòdu wesemy mabeke. Deuxu dee wina awo-ribi biwinyke.

⁷ Deysana-di ibutumy òbitimy bisỹdỹỹnyke.

⁸ Ibutumy deòdu ada deòdukõdu Inynyrỹ-ribi aõna aõna rimyke. Tamy aõwiwihikỹ riwinykeki.

⁹ Tahe wedu mahãdu, kaiboho eòdu mahãdu-ò kia weselemy mabeke. Brebudỹrybe-di eòdureny-ò rybeõmy. Awedu dori eòdureny wedu tule biu-ki ratximyhỹre. Tamy dori ibutumy wiwese wesele rare.

¹⁰ Ibutu-ò tahe ikonanamy ararybekre. Inynyrỹ ruruna-di bexirurudỹnyke. Iruru tahe aõni rare. Tahe ixidee bimyyke.

¹¹ Bexityynyke aõbinanatyy-di, debõna aõmydỹnana bimyyke. Tai tahe Diabo rybemy nodu biòludunyke.

¹² Iny ijesunareny dori moo iny-wana aõkõ rare. Iwitxira Satanasi ruruna-di rare. Dinodu ruru-di rare, kabede luruhukỹ wedu-di wahe. Tyytybybina ruru-di rare, biukihikỹle.

¹³ Tai tahe ibutumy Deuxu debõna aõna aõna bimyyke. Idi txubina-ki biòlòdỹnyke. Aijesu bitakeu tahe, òraru rỹike.

¹⁴ Inatyhyna-di awereysana birarutxynyke. Òbitina-di abreti bitòbònyke.

¹⁵ Bexiywinyke ywina Rybewihikỹ rybena-ò. Tii heka adikre.

¹⁶ Ityhyna tahe awyhyitxenamy ihỹre, idi eorutà bitỹtenyke. Idi tahe Satanasi heòty wyhy biturinyke.

¹⁷ Tarasana tahe arataana wese rare. Deuxu Tyytybytyhy mayrehe heka Deuxu rybe rare.

¹⁸ Deuxu Tyytybytyhy-ki ibutumy ixitòedỹhyymy atximahãbenyke. Kia-di tahe biriranymy, boibeke. Ityhydỹdu mahãdu ibutumy bexitòenyhyymy boibeke.

¹⁹ Tule wadee, bexitòenybenyke. Deuxu wadee rybe kidiwahinykemy wahe. Tai brebukõlemy Rybewihikỹ aritỹnykyke, ierysy siramy wahe.

²⁰ Jiarỹ Rybewihikỹ deòsidỹdu rare wawomati rerotidire hãrele wahe. Kristumy arelyykemy watzireri. Tii heka wawidỹnare.

²¹⁻²² Txitxiò tahe ityhydỹdu seriòreõ rare, waluunaduõ rare. Inynyrỹ rybe-di òbiti aõmysdỹdu rare. Tai tahe tii adeeremy reteònyre waaõmydỹnana adee ritỹnykykemy. Awo riteysadỹnykremy.

²³ Ywina ibutumy ityhydỹdu mahãdu seriòreõ kanakemy watzireri. Luuna tyhyna-wana kanakemy Deuxu, inytyby-ribi, Jesuisi Kristu, Inynyrỹ-ribi wahe.

²⁴ Ruxetòena kanakemy watzireri Jesuisi inatyhymy luunadu mahãdu-ò wahe. Tii Kristu rare, Inynyrỹreny wahe.

Filiposi Paulo Tyyriti, Filiposi Hãwã-ò

¹ Paulo, Tximòtxi-wana Jesuisi Kristu deòdureny roire. Ka tyyriti tahe rewahinyrenyleri Filiposi hãwã-ki ityhydỹỹdu mahãdu-ò. Ityhydỹỹdu yrubudỹỹdu mahãdu-ò tule rewahinyrenyra dohodỹỹna wiòhedỹỹna mahãdu-wana.

² Ruxetòena, ywina-wana Deuxu-ribi adeereny kanakemy watzireri tule Jesuisi Kristu Inynyrỹreny-ribi.

³ Rexitòenyreu, tiu aribireny wanohòti rosaòhyymyhỹre. Deuxumy reàlàwãhãre umyreny.

⁴⁻⁵ Wadeysamy watxiwãhãre Rybe tymyra wihikỹ tewiòhenanymahãtenyteki, juhuu, wiji tule ahãtenyete.

⁶ Deuxu iaòmỹsỹdỹỹna wihikỹ inyworeny-ki rexideleny. Tahe Jesuisi Kristu bededỹỹnana txuu heka rexihumy kia rỹikre. Kia tahe reerytyhyre.

⁷ Kaiboho wawana Deuxu ruxetòena luuna-wana widee inyboho riubỹtỹnyre. Ròtena-ki rarewãhãu, tule ròtenaribiòlòmỹ rarewãhã. Tule Rybewihikỹ retỹnynomy rarewãhã kiamy heka rahòtinymahãre, wawo-ki adireny rahòtinhyymahãre.

⁸ Sòwemy arawehityynanyreri. Deuxule kia rierymyhỹre. Jesuisi Kristu ruxetòena uludumy iny widi roire.

⁹ Kia ixitòedỹỹna tule Deuxu-ò rewahinyre umyreny. Aluunareny sòwemy rỹikemy rexitòenyre. Tule araykywydynareny riixidorudỹỹnymyhỹke.

¹⁰ Tibo awityhymy rỹira kaiboho biijebenykemy rexitòenymahãre. Tule inatyhywidỹỹdumy rarekremy tamy rexitòenymahãre òbitihyylemy rarekemy Jesuisi Kristu bededỹỹnanatxu-ò.

¹¹ Òbitidỹỹna bederaty wesele rare. Kaiboho oworu taraty-di rỹimyhỹre wese tỹxihikỹlemy òbitidỹỹna-di matxibenykemy rexitòenymahãre.

¹² Jiarỹ ròtena-ki rãireu, kia tahe Rybewihikỹmy rybe riwiòhenanyra.

¹³ Kowa dori ibutumy yrubudỹỹdu mahãdu roholare, dinodu heto itxeredu mahãdu wahe. Tai tahe bierybenykemy tuu rarybere.

¹⁴ Jesuisi Kristu òraru-ki tahe ròtena-ki rãimỹ rarewãhã. Ibutumy iny tahe kia rieryre, iòraru-ki. Waròtena òraru-ki tahe ityhydỹỹdu mahãdu Inynyrỹ aòmỹdỹỹnadile ròhòtinyre, tule Deuxu rybe rarybemyhỹre ruberuòhyylemy ixitòedỹỹna-di.

¹⁵ Ijõ heka ixityhydỹỹmy Rybewihikỹmy rarybemyhỹre. Ijõ tahe inatyhymy Rybewihikỹmy rarybemyhỹre.

¹⁶⁻¹⁷ Rierymyhỹre waròtena Rybewihikỹ òraru-ki rare. Ixityhydỹỹna mahãdu tahe inatyhy òbiti aõkõ rare. Aõhòkỹmy adotỹỹnykemy wadi ihỹre Rybewihikỹ-di.

¹⁸ Aõhebohe arotỹỹnykre? Arabedewomy aõbo ada areysakre aõbo. Areysahyymy ararekre. Kristu rybe dori rarybemy rarehyymy iny inatyhy-nadiremy ada aõkõremy.

¹⁹ Jiarỹ areysatyhykre ròtenawo-ribi dori aròhònykre. Aixitòedỹỹna, Jesuisi Kristu Tyytybytyhy riwawiòhenanykreki. Kia tahe reeryre.

²⁰ Deuxu aòmỹdỹỹnana ariwiòhenanykemy watzireri waumy-di. Jiarỹ arurukeki ada aõkõkeki aõbo. Jiarỹ araixỹruòtyhykemy watzireri aõhebo arotỹỹnykreki.

²¹ Kristu dee warumy ararekre. Tahe arurukeki kia tule wadee awire.

²² Tahe ararekeki Kristu dee araaõmysÿdÿÿmy arareke iny-ò Rybewihikÿmy ararybekre. Tibo awityhyre reerykõre.

²³ Tahe ixityre arõhõtíwydynanykeki kiamy heka rahõtínýreri. Arakre Kris-tuòhyyle heka Kristu-ò arakele awire. Tii heka awityhyre.

²⁴⁻²⁵ Atòenarenýkile tahe warumy ararekre. Tai tahe kabede-ki ararikre aityhydÿÿna-di beysakemy maumynykemy. Tai tahe kaki ararekre.

²⁶ Iu ayreny-ki aralokreu, Deuxumy beàlàbenykemy watzireri, ayreny-ki ixityre watzireriki wahe.

²⁷ Biyrybenykemy adireny watzireri iwese Kristu tyhydÿÿdu mahãdu rÿira weskemy adireny watzireri. Ayreny-ò arakeki aõbo ada araõkeki aõbo ijyy wihikÿ-ò adoholamyhÿkemy watzireri. Kaiboho wiwana wanale inatyhyna rybe-di tarybemahãtenyte.

²⁸ Uritere brebuõmy aõludu lau Rybewihikÿ òludu lau wahe. Tamyreny tahe kia rubu bina bede urihixina rare. Tahe adeereny biu-ò hena rare. Kia Deuxu-ribi nade.

²⁹ Aõ Kristu tetyhynytemy sohojile aõkõ tahe tamy aõhõkÿmy tatÿÿnytenyte tule.

³⁰ Inyboho dori ibutumy wiwana aõhõkÿmy rotÿÿnykre. Jiarÿ sówemy aõhõkÿmy adotÿÿnymahãde. Kia-ò tahe taholatenyte wamy.

2

¹⁻³ Kaa aõbohe rÿire wiòhedÿÿna luuna-wana Kristu-ki, biòwana aõbo Deuxu Tyytybytyhy-ki. Kohe, kia ibutumy Jesuisi Kristu kilehekÿ rÿire. Ibutumy tahe wíluumy boibeke, wíwesehyyle mohõtínýbenyke, wíi bitòrabutenybenyke. Tai tahe areysakre aõrarureny-ki.

⁴ Iximy xiwederenyõmy. Tahe wiribi lahiximy boibeke, aõkõmy ixi-di marãkyknybenyke. Iny sohoji sohoji aõna aõnadirenyremy ixi-di nohõtírenyõmy. Tahe hitxihiximy bõwidÿÿke iny sohoji sohoji iny wítxira aõmydÿÿnana yrubudÿÿmy marãkywydynanyke.

⁵ Iwese Jesuisi Kristu inywítxira aõmydÿÿnana-di rõhõtínymyhÿre wesele, kaiboho mohõtínýbenyke.

⁶ Jesuisi Kristu juhuhyy raremyhÿ, Deuxule rarehãre. Deuxururu tahe rimyõhyyre.

⁷ Tahe iribi ritare kaò idi kodobehekemy deòdu weselemy. Tahe inyumyõ rimyre kaki inylemy rarekemy.

⁸ Tamy tahe ibinatyhymy nade itxeò-ki rurukemy wahe. Ibutu aõbo kaki riwinyke heka, riwinyre. Tai tahe ibutu ratyre Deuxu Jesuisi risÿnyre. Ibutuni ratyre ini rare.

⁹⁻¹¹ Kiani-ò tahe ibutumy tatiowomy resekemy rÿire, biu mahãdu, bedeludu mahãdu, suwomy rÿira mahãdu. Tahe ibutu rybe wítxira wítxiramy iny rarybemyhÿre: —Jesuisi Kristu ibutu wedu rare. Deuxu inytybimy ibutumy reàlàmyhÿre. Kiamy waseriòre waluuduboho. Awana watzireriki tule iwítxira bede-ki aratxikre hãrele. Deuxukihyyle atximahãbenyke. Warybe bityhnyke.

¹² Aityhydÿÿna-di òraru-ribi bexitabenyke, bexiebenyke òraru-txi ixelau.

¹³ Deuxu heka adeewina riwahinymyhÿre òbiti widÿÿna. Tiile riwiòhenanymyhÿre òbitina widÿÿna.

¹⁴ Uritere rybe binamy rybeõmy. Adeburemy iny iijeõmy.

¹⁵⁻¹⁶ Tai tahe inyõ rybe binamy umy rarybeõtyhy. Òbitityhymy boibeke kaiboho dori Deuxu riòremy toite. Kristu kodobehekreu, aõrarureny-ki areysakre. Retare dori aõmydÿÿnana wihikÿõ ayreny-ki.

¹⁷ Arurukewana ayreny-ki rybe wihikỹmy rybe òraru-ki, taile areysakre. Deuxu-ò dori rexiwahinyre xiwena wesemy arurukremy wahe.

¹⁸ Kaiboho tahe wadi beysahyymy boibekre ixideewimy tahe adeereny arurukremy wãhãre.

¹⁹ Aõwesele Tximòtxi ayreny-ò ariteònykemy idi watxiwãhãre. Jesuisi Inynyrỹ dee wikeki. Tai tahe arierykre timybo kaiboho toite wahe. Tai heka areysakre.

²⁰ Tximòtxi tahe arawiòhenanyrenykre iny wixira wixira ratyre wahe.

²¹ Ijõ dori ixidile rõhõtinyinmyhỹre Jesuisi Kristu aõmydỹnana-di aõkõ.

²² Tximòtxi tahe teerytenyete iwese riwawiòhenanyre wese Rybewihikỹmy rybe-ki. Iwese tyby iriòre riwiòhenanymyhyre wese Tximòtxi riwawiòhenanyre.

²³ Aõbo wadee ròhònyke arierykre, tai wylemy ayreny-ò aditeònykremy idi watxireri.

²⁴ Jiarỹ òsana tule wylemy Deuxu riwateònykemy wadi ratxireri ayreny-ò.

²⁵⁻²⁶ Ijõ hãbuõ iteòdỹmy raruwãhãre ayreny-ò, Epafrodu wahe. Tii wawana noduõ rare. Kaiboho juhoo wadee teteònytenyete wawiòhedỹdumy rarekemy. Tii heka awehityyrenymy rurumyhyre. Tai tahe reòkesedỹnyreri kaiboho iwebinaduna-ò taholatenyete. Tai heka òkesemy riwisỹnyre.

²⁷ Inatyhy rare rurure inihe. Tahe Deuxu riruxetòenyreki riteytenyete. Jiarỹ tule Deuxu wadi raruxetòere. Tai rabadewoõhyre aõwixira wixiramy ratỹnymahãreki.

²⁸ Tahe aõwesele ariteònykemy watxireri. Kaiboho beysabenykre kia araerymahãrenyete. Jiarỹ tahe urihimy-ò arexielehynykre wanohõti yrena-ribi.

²⁹ Tii kedehemynykre, tahe bididybedenykre biwowydynybenykre. Rexiòhãrunymy rare Kristu òraru-ki riwawiòhenanykremy.

³⁰ Tahe tii inihe heka rurure iòraru-ki. Arokoreny-ki tii riwawiòhenanyre.

3

¹ Ikonanamy tahe ararybekre: –Beysabenyke, Inynyrỹ deysanamy. Jiarỹ heka riwaixiranyõhyymyhyre heka tuu rybe. Awire tahe boholabenykeki.

² Bexiijebenyke iny ijòròsa wesena-lau tii iixỹruterere aõbinawidỹdumy mahãdu tahe tii rare. Bexiijebenyke notykyresydu mahãdu lau.

³ Inyboho dori notyky resydu mahãdu òbiti rare. Deuxu Tyytybytyhy deewimy nodu roire. Jesuisi Kristu dee winale inydeereny awire. Inyboho dori aõwihikỹwidỹ-ò rikityhynyrenyòke.

⁴ Jiarỹ, Paulo ariòludunyleke aõbo xixi-wana ariwinyke. Jiarỹ ijõ hãbu ratyre waaõmydỹnana diremy arexityhynyke. Jiarỹ dori judeu mahãdu ijoi tyhy-ki tybie rare noty resyna ijoi tyhy rare. Debò inataõ reurotxu-di reareu.

⁵ Bejami mahãduõ jiarỹ rare. Judeu mahãdu tyhy wãhãboho roire. Iriòremy jiarỹ rare. Fariseuõ jiarỹ rare.

⁶ Tai tahe bede ywina rybe retyhynyre. Jiarỹ heka iijaramy raeleemy reamahãre ityhydỹdumy mahãdu aõhòkỹmy arisỹnykre-ò.

⁷ Wabede ywinareny òbitimy rare sana raholamahãre, ibutumy retyhynymy rarewãhã. Ibutumy wahe aõmydỹnana reatyra Kristu luuna òraru-ki.

⁸ Inatyhymy Kristu wabi-ò hedu reeryre, ibutu aõmydỹnana-ribi wanohõti rosare. Ibutumy retxiwire iòraru-ki, kia ibutumy aõ aõkõ rare, Kristu wabi-ò hede arimykre wabi-ò hedukremy rare.

⁹ Waòbitina tahe aõ wawidỹna aõkõ rare. Jesuisi retyhynyre urenana tahe tii riwaòbitinyre.

¹⁰ Kristu arierykemy idi watxiwãhãre. Rubu-ribi ixixana arierykremy, aõhõkõmy arotõnykre iòrarukile, iwese tii rurure wesemy wahe jiarõ heka arexiwinykremy watxireri.

¹¹ Tai rubu-ribi ixixana mahãdu-wana arexixakre.

¹² Jiarõ òbitityhy aõkõ rare ada ibutumy òbitina wadee riwahinyõre. Jesuisi riwamyre aõmysõdõõnaõ ariwinykemy. Tai tahe wako-ò rawãhãre araòbitinykemy watxireri. Tamy tahe araaõmysõdõõnykemy watxiwãhãre.

¹³ Òbitityhy aõkõ jiarõ rare. Kia sohojile tahe ariwinykre.

¹⁴ Tahe areheminykremy watxireri titxibo Kristu diwateònyde. Kowa bede wihikõkile uriõno aritakre.

¹⁵ Tahe ityhydõõdu iumy kia-di mohõtinybenyke. Inyõ aõ rieryõkeki Deuxu tamy kia ritõnynykre.

¹⁶ Uritere biije benyke inatyhyna bityhynybenykemy wiwese weselemy rõkõhõtinyrenyke.

¹⁷ Ityhydõõdu seriòre, iwese rewinymy rarewãhã wese biwinymy boibeke. Tule ijõ-ò betehebennyke wawese dori riwinymyhyre.

¹⁸ Sõwemy dori iny òbiti aõkõ rõira, Kristu òludumy wahe, itxeò aõmydõõnana òludu wahe.

¹⁹ Kia iny tahe Deuxu rahukre. Rõsõnale ta ideuxure. Tiiboho tahe aõbina binaòle awirenyre. Bede aõmydõõnanadile rõhõtinyre.

²⁰ Iny bedereny tahe biu-ki roimyhõre. Kowa-ribi reraòrenyneri iny tarasadu dehemynyna-ki. Inynyrõ Jesuisi Kristu wahe.

²¹ Tii inyumyreny riwitxiranykre. Tii taumywelese iny ritxienykre, taumy wihikõtyhy wesemy. Tii ruru dire. Tahe ibutu aõna aõna wedumy ronykre irurudireki.

4

¹ Waluunadu, waseriòreboho, kaiboho wadeysana warataana wesemy toite. Ywihyylemy boibekre, waluunaduboho.

² Warybe rewahinyre inatxi hãwyy-ò Eòdia, Sintxiki-wana. Kialemy wahe Inynyrõ tyhydõõna-di wiwesehyylemy maraykynyke.

³ Adee tule wawiòhedõõdu tyhy waryhe rewahinyre. Kai biwiòhenanykre hãwyy Rybewihikõ wiòhedõõdu mahãdu wahe. Tule Lemetxi riwawiòhenanyre ijõ-wana wahe. Ibutumy inireny heka Tyyritina rubuonanakõdu-ki rõire.

⁴ Inynyrõ-wana beysahyybenyke. Tahe ixityremy ararybekre. Beysabenyke.

⁵ Ywina-di bisõnyke ibutu iny-ò. Inynyrõ dehemynyna dori iòhòmy ihõre.

⁶ Ibutumy aõmydõõnana heka biyrydõõnybenyke. Ibutumy bexitòenyke Deuxu-ò, àlàna-wana bexitòenyke.

⁷ Deuxu ywina awo-ò bitidikre arayky ibutumy riyrubunyke. Deuxu ywina dori inraykyreny rieryõtyhy timyrekibo awityhyre.

⁸ Ikonanau tahe ibutumy aõmybo ararybekre maraykynybenyke ibutu inatyhyna, ibutu aõeryhykõ, ibutu òbiti, ibutu tiihyyle, ibutu iluuna, ibutu tyhyna awimy tahe roirekeki àlàna-wana rõikeki, tahe kia-di ibutumy maraykynybenyke.

⁹ Araerynanyreny, kaiboho teeryteny, rarybereò tahe taholatenyta. Timybo watxireri wese kaiboho wamy tabitenyta. Tai iwesemy boibeke, ibutumy wahe. Deuxu heka ywina rare. Tii umywanarenyle rarekre.

¹⁰ Jiarõ heka reysare Wanyrõ dee. Kaiboho heka ixityre watxi õhõtireny reare. Tiu waribi õhõtireny rosaõhyre urile kaiboho wawiòhedõõny taruteny tahe isirare.

¹¹ Kaa tuu rarybereri heka aõmy raruõhyreri.

¹² Jiarỹ dori reeryre aõbo wamy rỹira idi reysamy watxiwãhãre. Ibutumy waki rỹimyhỹre-wana tule awilemy rahõtinymahãre.

¹³ Reeryre dori awimyno tule ramamy rubu reeryre. Xiwersyna wese reeryre tule aõhõkỹmydỹỹ reeryre rama jubreré. Kia tahe reeryre. Ibutu ariwinyke Kristu dori ruru wadee riwahinyre.

¹⁴ Tule umy arealækemy watxireri tiwawiõhenanyteki.

¹⁵ Filiposi hãwã dohodỹỹna mahãdu, kaiboho sohojile nieruõ wadee tewahinytenyete, juhuu Macedonia hãwã-ribi rareu wahe.

¹⁶ Tesalonia hãwã-ò wadee nieru tewahinymahãtenyete, inatxi nonanamy taditeõnytenyete. Tahe riwamyre wadee rasiranymy idi rewyré.

¹⁷ Aõ rexitõenyre aõkõ nierumy. Sohojile aõmydỹỹnanamy aribi aritakemy watxireri. Deuxu aõmydỹỹnanale aritakemy rarumahãre. Umyreny Deuxu wehityhynamy arobikemy.

¹⁸ Remyre awahidỹỹna. Epafroditu aribi riwawahinyre. Tai tahe sõwemy waki rỹireri. Iwese lỹnyrena sõwemy watxi reamyhyre wese awahidỹỹna wadee rare. Iwese Deuxu-ò xiwenaõ awire wese wadee ihỹre.

¹⁹ Aõhere inyDeuxureny ihewoludu atyhyna loosõna adeereny kadiwahinykre, Jesuisi Kristu òraru-ki. Aõbo adeereny rasiranyreri.

²⁰ Deuxu kidiwahinykemy adeereny watxireri. Kia tahe inyDeuxureny-ò loosõna kidiwahinykemy watxireri tiemy heka rarehyykre. Kie.

²¹ Iny sohoji sohojimy warybe-di biwehityynanykre Jesuisi Kristu òraru-ki. Kaki ityhydỹỹdu mahãdu tarybe wehityyna adeereny diwahinyde.

²² Ibutumy ityhydỹỹdu arãrybeweityhynanyre. Iòlò heto ityhydỹỹdu mahãdu yribihyyle adeereny diwahinyde.

²³ Inynyrỹ Jesuisi Kristu ruxetõena adeereny kanakemy watxireri.

Òlòsò Paulo Tyyriti, Òlòsò Hãwã-ò

¹ Paulo, Jesuisi Kristu deòdu Deuxudeewimy rare kia tyyriti rewahinyre. Tule Tximòtxi inyeriòre rybe weityhyna riwahinyre, ibutumy ityhydỹỹdu seriòre-ò Òlòsò hãwã-ki.

² Wiòhedỹỹna, ywina, Deuxu inytyby-ribi adeereny kanakemy watzireri.

³ Jesuisi Kristu-ò àlàna rewahinyhyymahãre, tule Deuxu Inynyrỹ tyby-ò. Adeereny dori rexitòenyhyymahãre.

⁴ Kaiboho Jesuisi Kristu tetyhynymahãtenyete. Tule kowa ityhydỹỹdu mahãdu wiluurenyre.

⁵ Rybewihikỹ inatyhyõ juhoo taholatenyete. Idi tahe araròsòna tetatenyete. Tai tahe biu-ribi kia ibutumy kanakre.

⁶ Iwese Rybewihikỹ bededeemy rariamyhỹre wese adeereny tule dehemynyde. Rybewihikỹ aõwihikỹ adireny riwahinyre. Iwese òwòru taraty riwahinyhyỹre wese, kaiboho inywitxira-ò aõwihikỹbo tewahinytenyete.

⁷ Epafa jiarỹ wiwana Deuxu deòdurenyre. Kia iribi tadoholamahãte. Tii Kristu rybemy rybedu òbiti rare.

⁸ Tule wadee relyyre Deuxu Tyytybytyhyòraru-ki wiluuna-di ahãtenyete.

⁹ Kia inyboho roholarenyreu, adeereny rexitòenyhy watziwãhãrenyre. Rexitòenymyhy Deuxu dee wityhymy kaiboho bedierybedenyke. Deuxu Tyytybyerynatyhy-di boibekemy, bederydỹỹna-di.

¹⁰ Deuxudeewihymy kaiboho atximahãtenyete maratynyke wesemy aõwihikỹmybo. Biubỹtỹnymy boibeke Deuxumy bierybenytyhykre.

¹¹ Ibutumy ruruna-di boibeke Deuxu ruruna wityhy-di texihymy tadonymahãte ibutumy aõhõkỹmy bodotỹỹnykre deysana-di.

¹² Deuxu inytybyreny-ò àlàna biwahinybenyke. Tii iny riywidỹỹnyrenyra inyjura juramy ritakemy. Kia jura jura ityhydỹỹdu mahãdu hõrõ rare Deuxu loosònawo-ki ratximyhyỹrenyeki.

¹³ Tii bedeluru òlòna-ribi diwatade tahe diwadyde taRiòre luuna òlòna-ò.

¹⁴ Kristu heka iny ritare. Tii iny òrarunareny riòwynyete. Ibutumy òraruna riixãwidinare.

¹⁵ Jesuisi heka Deuxu lobixidỹỹna rare. Deuxu tahe alobixina aõkõ rare. Ibutumy widỹỹna-ribi tii juhoo rãire.

¹⁶ Tii tahe ibutumy bededỹỹnana widỹỹdure. Ibutumy biu-ki bede-ki lobixina lobixiõna-wana riwinyre. Iòlòna wedu tyhydỹỹna ruruna. Dinodu widỹỹna. Ibutumy tii riwinyre ixidee.

¹⁷ Tii ibutu aõna aõna-ribi juhoo rỹire. Ibutumy aõna aõna taruru rimireri tai.

¹⁸ Iwese umyriti umy wedu rare kia wese Jesuisi ityhydỹỹdu mahãdu riti rare. Tii juhuna rare. Iwedu rare. Tii rubu-ribi ixixana juhoo ludu rare ibuturatyre dori Deuxu risỹnyre juhuuludumy ratxikemy.

¹⁹ Jesuisi-ki ibutu wiwihikỹ rarekemy. Kia tahe Deuxu dee wire.

²⁰ Deuxu ywina diwahinyde Jesuisi hãlubu-di itxeò-ki. Jesuisi hãlubu xiery ibutumy Deuxu riwaaxidỹỹnyre biu-ki bede-ki.

²¹ Kaiboho Deuxu ery aõkõ juhoo toite. Iòludu toite, arayky-ki aõbinahakỹ widỹỹ tadexinohõtinytenyete.

22 Jesuisi umy-di Deuxu arainythydyỹnyre Jesuisi rurureki. Tai Deuxu tako-ò akanatamadỹnykre taòbitidyỹnyteki aòraru lyrana-di, aòraru tue-dena-di inyò umy ibinamy rarybeòtyhy.

23 Urile tyhydyỹna-ki boibebenyhyke araròsòna-ribi ixihitxidỹỹòmy. Araròsòna dori Rybewihikỹ-ribi nodu rare. Tii-ò tahe taholatenyta. Ibutumy iny biurawoludu-ò Rybewihikỹlemy narybede. Iribi jiarỹ, Paulo, Rybe wihikỹmy rybedu ròhònyre.

24 Wijile reysamy watzireri adee aòhòkỹmy ratỹnyreriki, aò aòhòkỹmy dỹỹnanabo Kristu-ò rauhenyre. Tai jiarỹ aòhòkỹmy arotỹnykre waumy-ki hyumy. Kristu-ò rỹira mahādu dee kiamy ratỹnyre, dòhòdỹỹna mahādu dee.

25 Iribi jiarỹ Rybe wihikỹmy rybedu ròhònyre. Kiamy Deuxu dee wimy diwateònyde tarybemy rybedumy.

26 Tii ihetxiu rybe inatyhy ibutu lau rexiwore. Wiji tahe rexitỹnyre ityhydyỹdu mahādu dee.

27 Kia-ò Deuxu rexitỹnykemy ratzireri iwese aòwihikỹ, taloosòna ratzireri, ibutu iny witzira dee. Kristu inywo-ki, kia tahe iny iraròsòna rare.

28 Kia Rybewihikỹmy relymahārenyre ibutumy iny-ki reerydỹỹnanamahāre bederysyna-di. Kia wesele ibutumy ityhydyỹdu mahādu òbiti Kristu-ò ariteòsinykre.

29 Kiaòle tahe rexirurudỹỹnyhyamahāre, Kristu rurudile waki rỹimyhỹre.

2

1-2 Warayky-ribi ijesu nihikỹmy resumahāre awo umyreny rahòtieremahāre reysakemy Òlòsò hāwā-ki. Laodisia mahādu tule wamy robiòmyhỹre mahādu tule wiluutyhyrenykeny kaiboho ibutumy Deuxu bedeerysynatyhy biery-benykeny adireny watzireri. Kristu-ki tahe bede erysynatyhy-di atxiteri idi watzireri.

3 Kristuwo-ki ibutumy bedeerydỹỹna bede erysynatyhy ityhyna wesemy riyrubunymy rỹire.

4 Kawese rarybera inyò arāitxenanyòmyhỹkeny rybe rayky-ribi ije-di.

5 Waumy awanareny ratxiòreri, watytyby tahe awanareny ratzireri, ri-wadeysanyreri, aòwityhy òbiti-di riwaerynanyreri Kristu-ki aityhydyỹna-di riwaerynanyre.

6 Iwese Jesuisi Kristu heka Inynyrỹhyny tetyetynte wese. Tai tii-wana mabehyybenyke.

7 Iwese oworu irarutiò rimymyhỹre wese myike. Anaerynadỹỹnymahāde wese maumynyke àlàdỹỹnamy.

8 Bexihārubenyke, inyò anaitxenadỹỹnyke lau. Tarayky-ribi ije rybe-di lahirybe-di anaitxenanykeny ihỹre rybe uritere ije ije-di. Kia rybe iny aòmydỹỹnana-ki rỹire bede tyytyby aòmydỹỹnana-ki. Kia Kristu aòmydỹỹnana aòkòhyumy rỹirake.

9 Kristu umy-ki tahe ibutumy Deuxu ixitỹnydyỹna rỹire.

10 Tule Kristu-ki kaiboho tyhynamy toite, texihutenynte. Tii heka ibutumy hābu rurudỹỹna ratyre rare, iòlòdỹỹna ratyre rare.

11 Iwese uladunotyky riòròre wese Kristu aòraru urarina aribi diorode. Notyy resyna inatyhy aòkò rare. Kristu iwesenalemy riwinyre.

12 Taratisebenytenynte, Kristu rubu wesemy tewesenatenynte deledede. Tule beribi tadòhònytenynte irubu-ribi ixixanamy tewesenanytenynte. Deuxu tyhy-dỹỹna-di rubu-ribi texixatenynte.

13 Kaiboho aòraruna-ki tòimyhỹteu rubu wesemy notyynaresy aòkò-di toimyhỹteu, adeereny runa Deuxu diwahinyde, aòrarureny diixāwidinyde.

14 Kristu iny òraruna widỹnareny-ribi tōhōti rosara. Kia tyyritina-di ri-ixãwididỹnyre taitxeò-ò rareu.

15 Rurudỹna mahādu ruru dinodu mahādu ruru ritara, ibutumy iitxerenarenemy ibutu-ò riteòsinyre. Kristu taitxeò-ki irurureny ritara.

16 Kaiboho tahe uritere iny rybemy deòbyrenyōmy roxina bemomo, ada ahādu herinau ixenamy, ada sabado bededỹnanamy.

17 Kaiboho dori aō kanakre wesemy rare. Kristu tahe ibre tuu rare. Kia aōmydỹnana aō aōkō.

18 Inyō adeereny rarybekeki: bexitxiōnyke ŷju biteàlānykemy, rasina-ki ierysomy mohōtinykemy. Tamy ijohonarenyōmy urile erydỹdumy rohōtinyra. Tii tahe Kristu rityhynyōhyymyhỹre.

19 Inyummy wese inyboho ihỹreny. Kristu tahe umy ratiwesere. Umybutule-ribi ibutumy iukỹna wiwana reare. Ibutumy òhōna tusina-wana umy rabutumyhỹre. Deuxu umyna-di umy raumymyhỹre.

20-22 Kai Kristu-wana taruta-wana bede aōmydỹnana-ribi, aōherekibo wiji bede aōmydỹnana-wana arumy ahāte. Aōherekibo bede ywina wixira wixira tetyhynomy ahāte: imyny wedeydỹdomy. Tamy ade rexiōmy, roxina urihixiōmy. Kia wese hābu bede ywina tetyhynmahātenyte. Kia aōmydỹdỹkeki, rexihuke.

23 Bede erydỹna wese ratxireri. Kia dori ixideele rexityhydỹnyre iyrubu wesemy rawesenanyreri, taumy ixidee aōhōkỹmy rexisinyre. Ibutumy kia tahe riwiòhenanyōhyymyhỹre umy òraluna lau.

3

1 Kaiboho Kristu-wana texixatenyteri wana, biu ludu aōmydỹnana-di mohōtinybenyke, tai Kristu Deuxu ruruna weribi rasỹnomy rononymhỹreki.

2 Biu ludu aōmydỹnana-di mohōtinybenyke, kabede ludu aōmydỹnana-di aōkō.

3 Rubu wesemy dori ahātenyte, aumy tuedeōna runa Kristu-wana rare — Deuxu-ki riyrubunomy ratximyhỹre.

4 Kristu rehemynyreu, tule tii-wana rakatxirenyke.

5 Tai òhōti bitosanyke bede ludu aōmydỹnana aki rỹire: uri uri rỹira mahāduhemy ijara, òbitiōna, deòsana hemy nodu, iòbi retỹnyre òbiti-di aōkō rare. Inyō rỹire-di òtena kia ritxoo àlàdỹna wese rare.

6 Kia aōna aōna Deuxuwo binana rare, kia-ò Deuxu ykarana kanakre kia òrarudu mahādu-ò.

7 Kaiboho kia tewinytenyte aòrarunareny òrarudumy toiteu.

8 Wiji tahe ibutumy kia aōmydỹnana aribi rexihukemy idi watxireri — wobinana, ujōmo, rybe ije ije.

9 Iny wixira-ò ruiōmy, araybidinatyby dori aribi dexihude, iwidỹnabina-di.

10 Araybidina tỹmyra-di tahe texiumydỹnyte tii araijōnyre bedeerysynahakỹ-di, Kristu raybidina wesemy araybidina rarekre òbitimy araijōnykre.

11 Kowa-ki wii rikininirenyōkre: judeu mahādumy, judeukōdu mahādumy, notyky resydumy, bedeeryō mahādumy, txiebese wese mahādumy, deòdu mahādumy, deòdu aōkō mahādumy ibutumy Kristu dee wiwese weselemy rỹire. Kristule tahe ibutumy ihỹre inydeereny. Tii ibutu inywo-di ratximyhỹre.

12 Kaiboho Deuxu ijesemy anadymyhỹde tahōrō luunana mahādukremy. Tai ruxetòena-di boibekre ixãwidina-di, inytyhyna-di, ywina-di.

13 Wii riwiòhenanymy r̄yike. Wii riixãwidid̄ȳnymy r̄yike. Inyõ adee aõmy rotyynykeki ixirawomy biijeranyke. Iwese Inynyr̄y araixãwidinyre wese iny biixãwidinyke.

14 Ibuturatyre wiluurenykemy kiadile kaiboho wiwana ibutumy boibeke iweselemy mohotinybenykemy.

15 Kristu ywina heka umyy-ki itxeredumy rarekre. Kristu hõrõ mahãdu sohojilemy mabeke. Tai tahe àlàna tamy biwahinybenyke.

16 Kristu rybe-di awo-ki mabehyymy mabekre idi watxireri. Wii biery-nad̄ȳnymy bitohonymahãbenykemy bede erysyna-di. Deuxu-ò àlàna bi-wahinymahãke wiurybe-di, wiu-di Deuxu Tyytybytyhy wina-di. Mawinyke àlàna-di aworeny-ribi.

17 Ibutumy tuu marybekremy, ibutumy tuu bot̄ȳnykremy Wanyr̄yini-ò, tuu bot̄ȳnykre Jesuisi Kristuni-ò. Inytyby dee àlàna biwahinykre, Deuxu-ò wahe.

18 Hãwyy! Kai ahãbu bityhynyke, Deuxu erysyd̄ȳna-di.

19 Hãbu! Kai ahãwyy luuke, idi tudòrenyõmy.

20 Uladu! Borybe, adirybe-wana bityhynyke. Kia tahe Inynyr̄ydeewire.

21 Uladuse, uladutyby! Kai ariòre ikyarad̄ȳõmy, bede wona-di aõkõ ratxikemy.

22 Deòdu mahãdu! Kai kabede-ki awedurybe-di ibutumy bityhynyke aõ idi retehererikile aõkõ, awedudeewi sohojilemy aõkõ, awo-ribi tyhy Inynyr̄ydeewimy tuu bot̄ȳnyke.

23 Aõbo bot̄ȳnymahãke ibutu Deuxudeewimy bot̄ȳnyke. Hãbudeewimy aõkõ.

24 Deuxu-ribi aõwyd̄ȳna kanakre. Kristu-ò dori taaõmys̄d̄ȳnymahãte. Adeereny rahetoõ riyrubunymy roimyh̄re.

25 Inyõ tahe aõbina riwinymyh̄keki, ihewomy aõbinale ritake. Deuxu dori ibutu dee wiwese weselemy idi rot̄ȳnymahãre.

4

1 Wedu mahãdu, kai eòdureny dee òbitimy idi ahãbenyke. Kai tahe tule awedu dire biu-ki. Kia nohõti losaõmy.

2 Bexitòenyhyymahãbenyke. Betehehybenyke. Bealàhyymahãbenyke.

3 Inydeereny kia bedexitòenykre. Deuxu rybe wihik̄y-ò iny dee hãwã witzira-ò kidiraynykre, Kristu inatyhynamy arelyyrenykremy. Iòraru-ki womati reroti nihik̄y-di watxiwãhãre.

4 Kia ritynynykremy idi watxiwãhãre. Waaõmys̄d̄ȳna kiemy dori ih̄re.

5 Biu ludu bedeeryd̄ȳna-di boibeke ityhyd̄ȳdukõdu mahãduy-ki. Aõwihik̄yrybe bexit̄ȳnykeki, turybelemy idi beake.

6 Arybe aõwi weselemy biyrubunyke, iwese r̄ys̄na juwyrã-wana raurinymyh̄rewi wesemy. Tai arawyòna ijòdikre t̄ȳraxina-ò.

7 Txitxiò ibutumy waaõmyd̄ȳnana adeereny relyykre. Tii waityhyd̄ȳdu seriòre waluumy rare. Tii rybedu òbiti iny-wana ratxireri.

8 Adeereny reteònyreri waaõmyd̄ȳnanareny eryd̄ȳnamy awo deysad̄ȳmy.

9 Onesimo heka tii-wana ariteònykre. Tii tule òbiti ityhyd̄ȳdu seriòre ratxireri. Ahãwãreny yluduõ rare. Tiiboho kedelyydenykre ibutumy timybo wãhãremy.

10 Aristarku wawana ròtenawo-ki wãhãre. Tarybe adeereny diwahinyde. Marku adeereny tarybe tule diwahinyde. Tii Banabe exi rare. Markumy, warybe teeryte, adeereny rybe rewahinyre wahe. Tii adeereny kedehe-mynykeki, bidiwiòhenanyke.

¹¹ Josue-Justu ibutumy eryna rare. Jesuisi inityhy rare. Kaiboho sohojile tahe judeu mahãdu-ribi iny-wana raaõmysỹdỹreri Deuxu òlona òraru-ki. Tiiboho riwawiòhenanyhyymyhỹrenyre.

¹² Epafa tule aeryrenyõ rare tarybe adeereny diõde. Tii adeereny rex-itòenytyhyhyymyhỹre kaiboho Deuxudeewimy boibehyykemy.

¹³ Jiarỹ reeryre tii adeereny tòemy ratximyhỹre, tule Laodisia mahãdu dee tule Ieryopoli mahãdu dee.

¹⁴ Luka, tarybe diwahinyde. Tii ityhydỹỹ òhotibedu rare. Dema tule tarybe diõde.

¹⁵ Warybe wehityhyna biõke Laodisia ityhydỹỹdu seriòre. Ninfa-ò tule wehityhyna biwahinyke dohodỹỹna mahãdu taheto-ki rỹireriwana.

¹⁶ Watyyriti-di dohodỹỹnaheto-ki rariakreu, idi tule Laodisia mahãdu-ò biõkre tako-ò rariakemy. Tule watyyriti kowa-ò rewahinyre, wimyke amahãduko-ò rariarenykremy.

¹⁷ Arikipu-ò warybemy marybeke. Tii aõmysỹdỹỹnaõ ritare Deuxu-ribi. Kia-di tii ratxihyykemyidi watzireri.

¹⁸ Kia tyyriti wadebò ritidỹỹna tyhy rare. Womati reroti-di rataataamy nadoimyhỹderibi õhõtireny lusarenỹomy. Deuxu wohyna adee kanakemy idi watziwãhãre. Paulo.

1 Tesalonia Mahãdu-ò Juhuu Tyyriti Tesalonia Dohodỹna Mahãdu-ò

¹ Jiarỹboho, Paulo, Sila, Tximòtxi-wana heka Tesalonia hãwã ityhydỹdu mahãdu-ò tyyriti ariwinyreny Deuxu ijoimy kaiboho toiteki. Deuxu wohyna, Deuxu ruxetòena heka Waha-ribi, Jesuisi Kristu Iòlò-ribi akirenykemy he wadee awire.

² Aõu aõu Deuxu deàlànamy adeereny rexitòenymahãre.

³ Atyhyna tiu inynohõti-ribi rosaõtyhy. Aluunareki dori Deuxu dee taaõmysỹdỹmahãte, Jesuisi Kristu iny Iòlò dehemynyna teraòteri.

⁴ Kaiboho, Deuxu luuna mahãdu, Deuxu iyreny araijere.

⁵ Rybewihikỹ adee retỹnynymahãre. Kia heka rybe sohojile aõkõ rare. Tii ruruna rare Deuxu Tyytybytyhymy. Erynatyhy teeryte. Iwese iny ako-txi ratỹnyreny wese, kaiboho teerytenyta. Aluureki dori kawesemy ratỹnyreny. Tai tahe iwese inyboho ratỹnyreny wese tule kaiboho tatỹnytenyte. Tule Inynyrỹ-wesemy tatỹnytenyte.

⁶ Aõhõkỹmydỹnana hãrele heka kaiboho rybe-ò taholatenyte. Tii aradeysarenynre, aõhõkỹmy dỹnana-ki hãrele. Eysanarenyn dori Deuxu Tyytybytyhyribile namyhỹde.

⁷ Kaiboho tahe ityhydỹdu mahãdu wihikỹ toite. Ibutumy ityhydỹdu mahãdu heka aweserenymy roirekemy ratxirenyreri Macedonia bedeki, Akaia hãwãdỹna-ki tule.

⁸ Aeryna ibutumy hãwã hãwã rieryra Deuxu tetyhynnyteki, Macedonia bedeki tahe tule Grecia bedeki. Tahe kia-ò icyby boholabenykekõ dori rare.

⁹ Iny arora-ribi dehemynydeu inyko relyymyhỹre. Kaiboho asuritxoo deuxu-di tehutenyte tahe inatyhy Deuxu tetyhynnytenyte, Deuxu iru wahe.

¹⁰ Iriòre biu-ribi kanakremy teraõmahãtenyte. Kia heka Deuxu rubu-ribi riixixanyré rare. Jesuisi sohojile heka Deuxu debure-ribi riwatarenykre. Deuxu dori òraruna òraru-ki sõwemy rakyaranynihikỹmyhỹre. Tule kia umy inydee relyymyhỹreny.

2

¹ Kaiboho teerytenyte arora-ò roirenyreu, jiarỹboho Deuxu aõmysỹdỹna sõwemy rewinyreny.

² Jiarỹboho aõhõkỹmy ratỹnyreny Filiposi hãwã-ki. Tai tahe adee rehemynyreny Tesalonia hãwã-ò wahe. Deuxu taruru diwahinyde. Tai heka jiarỹboho adeereny roirenyre Deuxu ijyywihikỹmy arelyyreny. Sõwemy inydeereny òbinadu rỹre.

³ Iny rybe-di tỹnydỹnarenyn inatyhymy rare. Inyboho òbitimy rõhõtynyreny. Jiarỹboho anaitxenanyrenyõtyhy.

⁴ Iwese Deuxu inydeereny riwateõnyre wese kialemy heka rarybeke. Aõbo inysõwehekỹ deewimy aõkõ raryberenyre, tahe Deuxudeewimy. Tiile rieryre aõbo inywo-ki ratximyhỹ.

⁵⁻⁶ Tii rieryre iwese inyboho adeereny rarybemahãreny wese. Nieru tarasakemy aõkõ inyboho watxirenyre rui-di raryberenyremy rybewihikỹ adee rewahinyõhymy. Awowydyna, arybe wiwihikỹ heka inydee aõkõhymy idi watxirenyre. Ijõ iny-ribi tule aõkõ kia rybe idi watxirenyre.

⁷ Jiarỹ tiu ararybeõmahãreny idi anierurenyn aritakemy. Kia ariwinyrenykeki tahe, tule awire. Inyboho dori Jesuisi Kristu deòdỹna inyboho

ratxirenyreri. Tahe iu jiarỹ ayreny-ki raremahãu, aluurenyre. Iwese hãwyyõ tariòre riyrubunyre wese adireny watximahãre.

⁸ Deuxu Rybewihikỹ sohojile aõkõ adeeremy ariwahinykemy aõkõ, tule wabededỹnana tule adeeremy ariwahinykemy watxireri, aruruke adeeremy, jiarỹboho sõwetyhymy aluurenyreki wahe.

⁹ Sõwetyhymy jiarỹboho raaõmysỹdỹnynmahãre ayreny-ki raremahãu, tai tahe òwyyõ aõkõ teòwynymahãtenyte. Rummy raaõmysỹdỹmahãrenyre, txumy tule. Tai ixiaõmysỹdỹnadile inyboho rỹimahãrenyre.

¹⁰ Jiarỹboho ayreny-ki òbitimy roiremahã. Aõhe inatyhy, waityhydỹỹdu seriòreboho. Kia teerytenyte. Deuxu tule riwaeryre.

¹¹ Iwese tybyõ tariòre riywinyre wese, jiarỹ araywinyra, wariòre wesemy.

¹² Arãwiòhenanykemy adi watxireri arateysadỹỹkemy. Warybe dohodỹỹna-ò boholabenyke. Tai tahe kaiboho Deuxudeewina-ki atxibenyke. Tule tii-wana masỹnybenyke taòlòna-ki, toosòna-ki.

¹³ Tai tahe àlàna sõwemy Deuxu-ò rewahinyrenyre. Ayreny-ki raremahãu, Deuxu rybe tỹnydỹỹmy, kaiboho tetyhynytyhymahãtenyte. Deuxurybele taholatenyte. Tii heka inatyhy kia rare, Deuxu ijyutyhy wahe. Waityhydỹỹdu seriòre, Deuxu ayreny-ki ratximyhỹre.

¹⁴ Waseriòreboho, iwese Judeia ityhydỹỹdu mahãdu heka aõhõkỹmy rotỹỹnyre wese, kaiboho iwesele aõhõkỹmy tatỹỹnytenyte. Kaiboho aõwitxira witxira aõbina bina teòludunymahãte aõhõkỹmy dỹỹnana-ki. Abede ludu mahãdu tuu riwinyre. Iwese Judeia mahãdu heka judeu mahãdu deb-ò-ki aõhõkỹmy rotỹỹnyre wese, kaiboho tule aõhõkỹmy tatỹỹnytenyte.

¹⁵ Judeu mahãdu heka juhoo Deuxu rybedu mahãdu rirubunyre. Jesuisi tule rirubunyre. Inyboho tule ribinadỹỹnykemy ratxireri. Deuxumy dòdu tiiboho roire. Ibutumy inymy òludu ratxireri.

¹⁶ Tiiboho iny ribinadỹỹnykemy ratximyhỹre, iny dori rybe tỹnydỹỹdumy inyboho ratxireri judeukõdu mahãdu-ò. Kia-di heka ijõ òraruna tiiboho ributunyre. Deuxu tahe wiji tiiboho ribinadỹỹnykre. Ityreny-ò Deuxu kyarana bededỹỹnana kedeseke.

¹⁷⁻¹⁸ Waityhydỹỹdu seriòre, aribi irehemy watxireriu, awehityhyna sõwemy wadi ratxireri. Sõwemy adi aretehekemy watxireri ixityrele. Tiubo aroramy arake, Satanasi riwabinadỹỹnyra. Tahe aõkõre. Araõke.

¹⁹⁻²⁰ Kaiboho dori iny raròsonatyhy, inydeysana, iny biu-ò hena Inynyrỹ Jesuisi òraru-ki atxitenyte. Tii dori kanake. Kaiboho ixityhydỹỹnaõ heka toimahãte.

3

¹ Ikonanau tahe reòludunyrenyõtyhy. Tai tahe ixisohojile Atena hãwã-ki rỹikremy watxireri.

² Tai Tximòtxi adee reteònyre, inyeriòre wahe. Tii heka wawanareny Deuxu aõmysỹdỹỹna-ki riwiòhenanyre Kristu Rybewihikỹ tỹnydỹỹmy. Adeeremy dori reteònyre aityhydỹỹna wiòhedỹỹmy.

³ Tai tahe bede jei jei òraru-ki, kaiboho ahewo-ò booseõtyhy. Kia ibutumy Deuxudeewina inydeeremy rare.

⁴ Iu ayreny-ki rarewãhãu, kiamy rarybewãhãre aõma adeeremy aõhõkỹmy dỹỹnana kanake. Kiale tahe inatyhymy nade.

⁵ Tai tahe Tximòtxi reteònyre, omy arierykemy timybo aityhydỹỹna-ki tatỹỹnytenyte. Satanasi òsana waaõmysỹdỹỹna ayreny-ki ribinadỹỹnyre. Aõkõre, tii Deuxu aõmydỹỹnana ribinadỹỹnyõtyhy.

⁶ Tximòtxi heka Tesalonia hāwā-ribi ròòsera. Ijyy Wiwihikỹ tahe raholara. Aityhydỹna aluuna wana raumynyre. Tule tii relyyre iwese kaiboho awehi-tyhyna dire inyluure wese. Wadeysamy watzireri, waseriòreboho, aòraru-ki.

⁷ Waaòhòkỹmy dỹnana hārele heka wadeysamy watzireri, aityhydỹna awireki wahe.

⁸ Kaiboho awimy matxibenykeki, awimy jiarỹ watzimahāre, warumy watzimahāre.

⁹ Aòraru-ki tahe Deuxu-ò àlàna rewahinyre. Deuxu-ki tahe wadeysamy watzireri.

¹⁰ Rummy txu-wana adeereny arexitòenykre arora-ò arake, aityhydỹna wiòhedỹmy wahe.

¹¹ Deuxu Inytyby, Jesuisi Kristu Inynyrỹ-wana riwawiòhenanykemy idi watzireri arora-ò arake.

¹² Wiluummy ibutumy ityhydỹdu mahādu luummy idi watzireri. Iwese aluure wese wiluuke.

¹³ Tii inydeereny ruruna riwahinykemy idi watzireri. Òbitimy tahe rakatxirenyke Deuxuko-ò, Inytybyko-ò. Inynyrỹ Jesuisi kedehemynykreu, tamahādu-wana, tai iny imahādule rakatxirenykre.

4

¹ Waityhydỹdu seriòre, timybo òbitimy ahābenykemy rebedeerynyre Deuxudeewina wahe. Iratyre tahe arexitòenykre Inynyrỹ Jesuisi òraru-ki, òbitityhymy boibenybekemy. Kia tahe teerytenyte.

² Jesuisi bede erydỹna heka adeereny rewahinyrenyrene. Kia teerytenyte.

³⁻⁴ Kia tahe rare. Òbitityhymy ahābenyke, òta òtarenỹmy. Iny sohoji sohoji òbitimy ahāwyy-wana matxibenyke.

⁵ Iwese ityhydỹdukòdu mahādu riwinyre wese aòkò idi ahāke. Tii dori Deuxu rierykòrenyrene.

⁶ Tuleke kia aòmydỹnana-ki iny sohoji sohoji aityhydỹdu seriòre ib-inadỹnykemy. Iwese rarybere wese ixityre ararybekre. Inyò kia aòmydỹnana riwinykeki, debure bededỹnana tii ralòke.

⁷ Òta òta aòmydỹnana aòkò Deuxudeewire, òbitina aòmydỹna tamywire.

⁸ Inyò kia bede erydỹna rityhynyòkeki, Deuxule heka tii rityhynyòre, hābu bede erydỹna aòkò. Deuxule Tatytybytyhy inydee riwahinyre.

⁹ Kaiboho aityhydỹdu seriòre mahādu luurenyre. Tai ixyby kia adeereny ariritinyòtyhy. Deuxu dori araerynanyrenyrene timybo wiluummy boibekemy.

¹⁰ Kia luuna-di tahe ibutumy Macedonia hāwā hāwā mahādu luummy. Ihārele tahe waseriòreboho iratyre wiluummy.

¹¹⁻¹² Ywina-di wi-ò wi-ò boibeke. Aaòmỹsỹdỹna-di iximynamy boibeke. Tai ibutumy ityhydỹdukòdu mahādu umyreny robikre anatyhynyrenyrene. Tai tahe ijò iny aaòmỹdỹnana ixi-di nokòmy. Ixisohojilemyta ixi-di maaòmỹsỹdỹnyke.

¹³ Waseriòreboho araerynanykre rubu mahādu aòmỹdỹnanamy. Tai ijò inywese mahinybenyòke, bobubenyòke. Tii dori raròsòna-di aòkò ratxirenyre

¹⁴ Kristu heka rubumy roire ribile rexixare. Kia tahe retyhynyrenyrene. Kiawesele tii-wana heka Deuxu taityhydỹdu mahādu kididyke, rityhynymy rurure mahādu tule.

¹⁵ Inynyrỹ riwabedeerynyrenyrene kiamy: inyboho irumy ratxikeki kiatxuu juhuummy timy inorenykòna. Rubu mahādu tuukre.

¹⁶ Tahe ýju wedu juhuu rarybekre. Deuxu juròna-di ritxurònykre. Idi Inynyrỹ kodobehekre biu-ribi. Juhuu ibutumy ityhydỹdu rubumy rýira riumynykre, riumywitziratỹmyranykre, riixixanyrenyrene.

¹⁷ Tahe ibutumy inyboho irumy rÿira mahãdu heka Inynyrÿ-wana ributun-yrenykre biu-ki. Tai tiiwanahyy roirenyre

¹⁸ Kia rybe-di wii beysabenyke.

5

¹ Ityhydÿÿdu seriòre, tiubo kia ibutumy aõhebo rotÿÿnykre. Kiamy adeereny ariritinyõtyhy.

² Rumy wasidu wesemy kia txu kanakre. Kia teerytenyete. Ibededÿÿnana iny rieryõtyhy.

³ Inyõ rarybekeki: —Ibutumy awire. Ibutumy ywina-di ratxireri. Kiatxuu kedexihukre. Inyõ rahenyõtyhy. Iwese hãwyy txuberere wese, uladu ijera iòhòreu kia rare.

⁴ Kaiboho, waseriòreboho, tetyhynytenyete tai kiatxu adeereny bede òtiidÿÿ aõkõ rarekre. Kaiboho dori kia teerytenyete, wasidu wesemy kanakemy wahe.

⁵ Inyboho ibutumy txuu mahãdu atxitenyete, loosòna mahãdu wahe. Bedeluru hukÿ mahãdu aõkõ inyboho ratxireri.

⁶ Tai tahe røkòrònyõtyhy. Bexixabenyke. Ijõ iny wese aõkõ atxibenyke. Betehebenyke.

⁷ Rumy ibutumy iny ròròmyhÿre. Tule kiau ibutumy riòmyhÿre, axaxaluudu mahãdu wahe.

⁸ Inyboho tahe iximy rekexiòbitidÿÿnyke ywina-di. Ityhyna, luuna-wana heka iny òrarunareny itxena wesenamy rikitidikre. Tarasana tahe inyratiywina wesena rare, tarasana raròsòna wahe.

⁹ Debure bededÿÿnana-ò aõkõ inyboho ralòõtyhy. Deuxu aõhòkÿmy dÿÿnana kia Deuxudeewina aõkõ rare inydeereny. Biu-ò hena-ò tahe inyboho ralòrenykre Jesuisi Kristu Inynyrÿ òraru-ki.

¹⁰ Tii dori inydeereny rurure. Tai tahe tii-wana rarehyymy rÿikre irumy ada rubumy iny ratxirehãre.

¹¹⁻¹³ Kiarybe-di widee beysadÿÿnymahãbenyke. Deuxu rybe tÿnydÿÿdu mahãdu biwiòhenanybenyke, bityhynybenyke. Kia tahe wadee awire. Tii dori awiòhedÿÿdu ratxireri Inynyrÿ òraru-ki. Ibutumy widee òbitimy atxibenyke, tii Deuxu deòdu rareki.

¹⁴ Tule adeereny ijõ dohodÿÿnaõ aratohodÿÿnykre. Iehehe mahãdu biòbitinybenyke. Ityhyna kyhynakõ mahãdu bikyhynanybenyke. Ibutumy widi atximyhÿbenyke.

¹⁵ Inyõ aõbinamy adee rakeki, ixiòwydÿÿõmy. Ywina-di tamy bisÿnyke.

¹⁶ Beysahyybenyke.

¹⁷ Ixitòedÿÿhyymy boibehyybenyke.

¹⁸ Ibutumy bealàmahãbenyke. Kaiboho dori Kristu ijoi atxitenyete. Kia adeereny Deuxudeewinare.

¹⁹ Deuxu Tyytybytyhy-ò boholake, awo-ki arayky-ki tii ratxire.

²⁰ Deuxu dee rybedu mahãdu awire irybe awire. Ibinamy aõkõ tai marybebenyõtyhy.

²¹ Ibutumy biurihibenyke. Aõbo awirele tahe idi bimyke.

²² Ibutumy òraruna-ribi irehemy atximahãbenyke.

²³ Deuxu heka ywina rare. Tii araòbitidÿÿnytyhyke. Adeereny rexitòenyre. Araykywydyna, òhòtiwydyna, aumy-wana ibutumy raywidÿÿmy ratxike idi watxireri. Jesuisi dori eleelemy kodobehekre.

²⁴ Tii kia ibutumy juhoo rarybere wese, tii adeereny riwinyhykre.

²⁵ Waityhydÿÿdu seriòre, inydeereny bexitòenybenyke.

²⁶ Deuxu deysana òlusò-di wii birybebenyke.

²⁷ Wadee boholake Inynyrỹ òraru-ki. Kia watyyriti heka ibutumy ityhy-dỹỹdu seriòre roholakemy watzireri. Idi mariake.

²⁸ Jesuisi Kristu Inynyrỹ ruxetòena heka adeereny ratximyhỹkemy idi watzireri. Kie.

2 Tesalonia Mahãdu-ò 2 Paulo Ryberiti Tesalonia Hãwã-ò

¹ Paulo, Sila, Tximòtxiboho-wana tyyriti rewahinyrenyre Tesalonia dohodỹna mahãdu-ò. Deuxu Inyityby, Jesuisi Kristu Inynyrỹ ijoi toiteò.

² Wiòhedỹna, ywina-wana adeereny kanakemy watzireri Deuxu Inyitybyreny-ribi, Jesuisi Kristu Inynyrỹreny-ribi.

³ Inyseriòreereny, Deuxu-ò adee reàlãmahãrenyre. Kia tahe awi rare. Kaiboho aõu aõu textyhydỹnytyhymy atximahãtenyteki, ityhydỹdu seriòre wilu-una-di iluutyhymy teletenyteri.

⁴ Tai heka ijõ Deuxu dohodỹna heto-ki aõwiihikỹmy umy rarybemahãre. Kaiboho dori aõwitxira witxira aõbina bina teòludunymyhỹtenyete, aõhõkỹmy dỹnana-ki ixiwesehymy toitemahã ire tetyhynytyhymahãtenyete.

⁵ Kiawesele Deuxu aõna aõna òbitimy riwinymyhỹre. Kaiboho Deuxu teywinytenyteri Iòlõna-ò malòbenykre, aõhõkỹmy tatỹnytenyteriki wahe.

⁶ Deuxu, tiiboho aõbina bina-di riòwinyrenykre, aõhõkỹmy dỹnana dori adeereny riwahinyreki. Kia tii òbitimy rõhõtinyre.

⁷ Biu-ribi Inynyrỹ Jesuisi tarurunareny ýju-di kodobehekreu, aõhõkỹmy dỹnana-ribi elehyna adeereny, tule inydeereny Deuxu kidiwahinykre.

⁸ Heòtyloona-di tii kanakre riòwinykre Deuxu rieryõmy rýira mahãdu dee, tule Inynyrỹ Jesuisi Rybewihikỹ riywinyõmy rýira mahãdu dee.

⁹ Kia mahãdu aõu aõu aõhõkỹmy rotỹnykre Inynyrỹ òsýnỹ-ribi iteòdỹna-ki taruruloosõna-ribi.

¹⁰ Tii kanakre tahe ibutumy ijoi mahãdu tamy làhàna riwahinykre. Ribedeòtiidỹnyrenykre ibutumy taijoi dee aõmydỹnana riwinyreki. Tetyhynymahãtenyete, Deuxu rybe dori jiarýboho adeereny rewahinymahãreki.

¹¹ Kaiboho iwese Deuxudeewimy rarekemy boibeke. Tai tahe adeereny rexitòehymahãrenyre. Deuxu ruruna-di atyhydỹna-di sòwemy aõwiihikỹ riwinykemy idi watzimahãre.

¹² Tai tahe ibutumy Inynyrỹ Jesuisi Kristu nimy sòwemy beàlàmyhỹkemy. Tii loosõna adeereny riwahinykemy watzireri. Kia Deuxu dee, Inynyrỹ Jesuisi dee awi rare. Wiòhedỹna iribi bitabenyke.

2

¹ Waseriòreboho, Inynyrỹ Kristu òkesenamy iximy iny ritakemy adeereny warybe ariwahinykre. Inyõ rarybekeki Inynyrỹ òkesena txumy rehemynymy rýire, kia rybe-di iòtiidỹõmy.

² Inyõ rarasinykeki, Deuxu-ribi ijyy ritakeki, urile ityhydỹrenyõmy. Inyõ waribi tyyriti itarasamy rarybekeki, ityhydỹrenyõmy.

³ Inyõ aitxenadỹõmy boibeke. Ityhydỹdu atysyna nihikỹ juhoo kanakre, idi tahe kia txu kanakre. Juhoo hãbu ibinatyhy kedexideòsinykre. Heòtybedeluduõ tii rare.

⁴ Tii ibutu Deuxumy òludunadu rarekre Deuxumy iny rininire mahãdu wahe. Ibutumy àlàna aõmydỹnana riatykre. Deuxu dohodỹna hetowo-ò ralore tahe Deuxu weselemy ronykre. Iximy rarybekre tii Deuxu raremy.

⁵ Tuu heka adeereny rarybere, akireny raremahãu, òhõtireny aõbo itxi rearenyõra?

⁶ Ibededỹnana raòbitikre xiery, kanakre. Deuxu ruru dori rimymyhỹre. Kia tule teerytenyete.

⁷ Iaõbinahakỹ aõmydỹnana inyy-ki ratxireri. Tii tyhy wiji kanaõkre. Imynydu iribi rexitare xiery, tahe tii kanakre.

⁸ Taile tahe hãbu ibinatyhy kedexideòsinykre. Inynyrỹ Jesuisi kanakreu, tii tuu kidirubunykre taryeledile.

⁹ Juhuu tahe kia hãbu Satanasi deòdu tahe iruru-di kedehemynykre. Aõna aõna wiwihikỹ widỹỹmy ròitxenadỹreri.

¹⁰ Inyõ sõwemy riitxenanykremy bededbydỹỹ wesemy. Ityhydỹỹdukõdu mahãdu tii riitxenanytyhykre. Tiiboho dori inatyhyna rybe rityhynyõmyhỹre, tuuõmyhỹre, tai rexirutaõrenyre.

¹¹⁻¹² Deuxu dori rilawere tuu rityhynyrenykre ibinare hãrele. Kia ruina rityhynyrenykre, tai Deuxu rihitxidỹỹnykre inatyhyna rityhynyõreki, taòrarudỹỹna luureki.

¹³ Deuxu tahe juhuutyhylemy aratarenyre, waseriòreboho. Biu-ò hena adeereny riwahinyremy inatyhyna tetyhynytenyteki. Deuxu Tyytybytyhy aralyradỹỹnyrenyre. Tai, Inynyrỹ luuna mahãdu, Deuxu mahãdurenymy belebenykemy atximahãtenyte.

¹⁴ Deuxu adeereny Rybewihikỹ diteònyde. Inyboho tahe ijyydumy roire. Iny òrarureny-ki tahe Inynyrỹ Jesuisi Kristu loosõna bitabenykremy idi toite.

¹⁵ Kia ibutumy, waseriòreboho, itxi õhõtireny reake. Aõmybo araerynanymahãre kowa-ki raremahãu, tule watyyriti-di rebedeery-dỹỹnymahãrenyre, idi mohõtinytyhybenyke, õbitimy idi boibeke.

¹⁶⁻¹⁷ Inynyrỹ Jesuisi Kristu Deuxu Inytyby, luuna luuna, wiòhedỹỹna, raròsõna sõwemy inydeereny diwahinyde. Inyboho aõhyymy aõkõ roire. Iribireny raybidina adeereny kanakemy watxireri. Tule umy kanawiòhenanykemy watxireri ibutumy aõhe botynyke, marybemahãbenyke.

3

¹ Watyyriti-di konanamy tahe adeereny ararybekre. Waseriòreboho, inydeereny bexitòenyke. Inynyrỹ rybemy araryberenykemy, inywitxira-ko arelyyrenykemy, tule Inynyrỹ rybe-di iwese rybe ayreny-ki aõwiwihikỹmy raremyhỹ wese.

² Tule bexitòenyke kia iny iehehe-ribi arexitarenykemy. Ibutu iny dori inatyhyna rityhynyõreri.

³⁻⁴ Tahe Inynyrỹ õbiti rare tii arawiòhenanykre. Tii ararurudỹỹnykre kia reeryre. Satanasi-ribi arayrubunyrenykre. Tahe, aõmybo reerynadỹỹnyre wese kaiboho aõhebo tatỹỹnytenyterimy heka adireny watximahãre tule kia wesehyyle rakatxirenyke.

⁵ Inynyrỹ-ribi Deuxu luuna, Kristu itxõmotxina bede erynahakỹ adeereny kanakemy watximahãre.

⁶ Kia Jesuisi Kristu Inynyrỹ bede ywina wese rare adeereny ararybekremy. Waseriòreboho bexiweresynyke iny deoruxere-ribi, ibutumy iny waerysy-dỹỹna roholaõre mahãdu-ribi, tii ityhydỹỹdu mahãdu hãrele.

⁷ Ayreny-ki roiremahãu, raaõmysỹdỹỹhyymy roiremyhỹ. Tai kaiboho teery-tenyte iwese mabekemy.

⁸ Tiu iny witxira rỹsỹna rerỹsỹrenyõhyyre, iòwyõmy. Txuu ruwana raaõmysỹdỹỹre waaõna aõna òwydỹỹmy. Tai tahe adeereny isiramy aõkõ ayreny-ki jiarỹ raremyhỹ.

⁹ Inyõ-ribi rỹsỹnaõ arirỹsỹmahãkeki, kia tahe ibinamy aõkõ rare, jiarỹ Deuxu rybemy rybedu-ki wahe. Tahe aõkõre urile rexideòsinykemy rerỹsỹõmahãrenyre. Iwese aõmysỹdỹỹna awirewesele umy reerynanyrenyre.

¹⁰ Tai rarewãhãu kia bede ywina rewahinyre: —Iny raaõmysỹdỹỹõmyhỹre riroxiõtyhy.

¹¹ Jiarỹ raholawãhãre iny deoruxeretyhy-ò ayreny-ki ratximyhỹreny, tii boho aõmysỹdỹỹ derareny, urile raujõmomyhỹreny.

¹² Jesuisi Kristu Inynyrỹni-di tamyreny ararybekre rayruburenykemy, raaõmysỹdỹỹreny kemy ixideereny.

¹³ Tahe adeereny, waseriòreboho, ararybekre. Aõwiihikỹ widỹỹ-ò ixi-rarenyõmy.

¹⁴ Inyõ ka waryberiti riywinyõkeki, mobo tii rare bierybenyke tahe kie-ribi irehemy biijeke, tai tii raixỹrukemy.

¹⁵ Urile tii aõludumy aõkõ ratxireri. Aseriòre wesemy tamy marybeke. Biijemy idi ahãke.

¹⁶ Inynyrỹ ywina wedu rare. Tii adeereny ywina ibutumy aõmydỹỹnana-ki kidiwahinykemy idi watxireri. Inynyrỹ awanareny ratxikemy idi watxireri.

¹⁷ Kia konana warybewehityyna jiarỹle ariritinykre wadebò-di. Ibutumy waryberiti-ki rỹire wese kawesele wani retidire. Paulo.

¹⁸ Jesuisi Kristu Inynyrỹ wiòhena ibutumy adeereny ratximyhỹkemy idi watxireri.

1 Tximòtxi-ò Paulo Juhuu Tyyriti Tximòtxi-ò

¹ Jiarỹ Paulo watxiwãhãre. Jesuisi Kristu deòdỹna watxiwãhãre. Deuxu iny tarasadumy riwateònyre, tule Jesuisi Kristu Inynyrỹ riwateònyre. Tii tahe inyararòsònareny rare.

² Katyyriti adee rewahinyreri Tximòtxi. Kai inatyhymy wariòre wesemy atximyhỹte ityhydỹdu mahãduy-ki. Tahe Deuxu-ribi Jesuisi Kristu-ribi luuna, ywina, ruxetòena, adee kanakemy watrixiri.

³ Jiarỹ Macedonia-ribi rareu, adee warybe rewahinyre kai Efesu hãwã-ki mabekemy. Kia adiwahinyde warybe tamy kia beòbykemy; kowa dori inyò Bede ywina tyyriti wixiramy ròerydỹnanyre riki.

⁴ Ihetxiu ijyymy heka rusake kiawesemy heka kai tamyreny marybekre. Talahi talabie òraruòraru-di he ròhòtinyòhyymyhỹkre. Kia aõna aõna tahe rybenatyhytyhyre. Kia aõna aõna iny lahi òraru rybena-di ixinohòtidỹõmy. Kia ityhydỹnadile kanakre.

⁵ Kia wiluuna tahe inywolyrahakỹwo-ribi ròhònymyhỹre, iny raykylyrahakỹ wo-ribi, iny ityhydỹnatyhy-ribi.

⁶ Kia aõna aõna wihikỹ-ribi iny rexixãwididỹnyre. Tai tahe aõmybo rarybemyhỹre heka rieryòhyymyhỹre. Aõtyhymy aõkõ widee rarybemyhỹrenyre.

⁷ Bede ywina tyyriti erysydỹdu weseekemy rexinohòtinymyhỹre, tahe rieryòhyymyhỹre aõmybo raremy. Aõmy rierynanymyhỹrenyre tahe timybo ihỹremy rieryòlemyhỹrenyre.

⁸ Katahe inyboho rieryrenyre. Inyò bede ywina tyyriti òbitimy rityhynykeki, Bede ywina tyyriti heka awi rare.

⁹ Inywihikỹ-ò heka tiu bede ywina tyyriti riwahinyòhyymyhỹre. Inybina binaòle iwahidỹna rare, iny òrarudu-ò, iny ityhydỹdukòdu mahãdu-ò, iny aleerydu-ò, iny tadi tyby-wana rirubunymyhỹre mahãdu-ò.

¹⁰⁻¹¹ Kia iny-ò bede ywina tyyriti rỹimyhỹre. Ibutumy bina bina widỹdu-ò. Bede ywina tyyriti rỹimyhỹre ka mahãdu-ò: inydỹwe mahãdu dee, taòtaòta wixiramy òtadu mahãdu-ò, inywasidỹdu-ò, ruidu mahãdu-ò. Deuxu ijyy tỹmyra wihikỹ dee wiòkeki, tii aõna aõna riwinykeki, tamy. Deuxu bede ywina tyyriti roimyhỹre. Deuxu bedeerydỹna òbiti aõkòreki, Deuxu wiiwihikỹ loosònadewimy aõkòreki kia erysydỹnadu jiarỹ rare.

¹² Jesuisi Kristu, iny wedu waruruixiòlòdỹdu rare. Jiarỹ tamy wawimy raremyhỹ. Tai tarybe-di wiòhedỹdumy riwatare. Kia-ò Jesuisi Kristu heka jiarỹ rewowydynyre.

¹³ Juhuu jiarỹ tuu rarybere. Ityhydỹdu mahãdu-ò wadeburemy rarewỹhỹ. Tule Jesuisi-ò wedeburemy rarewỹhỹ. Tahe wadee raruxetòenyrenyre. Tahe ibutumy kia reerykòlemy rewinyrery raremyhỹ, retyhynyòlemy rewinyrery raremyhỹki.

¹⁴ Inywedu sòwemy wadee raruxetòere. Tii riwasỹny ixiluuwehikỹkemy, rikityhynymyhỹrenyreny.

¹⁵ Jesuisi Kristu kabede-ò dobehede òrarudu ritakemy. Ka rybe heka inatyhy rybe heka rare. Jiarỹ heka òrarudutyhy nihikỹ rare.

¹⁶ Iurenanyre tahe tii riwaruxetòenyre. Tiu heka waki rexiraòre. Tii riwateòsinyre juhuu ityhydỹdu wesemy. Ityhydỹdu mahãdu-ò itxerenamy, iwese tii mahãdu kidityhynyreny. Tai umy tuedekòdu mahãdu-ò ralòkemy.

¹⁷ Beàlàmahābenyke Deuxu-ò. Tii heka bededỹnana tuedeõdu hukỹ Iòlò rare. Tii lobixina aõkõ rare. Tii sohojile rare. Beàlàmahābenyke aõu aõu, wowydyna tamy biwahinyke. Kie.

¹⁸ Ka inatyhymy rybemy adee ararybekre Tximòtxi –kai dori wariòre wesemy Tate. Kia rybe heka ihetxinarybe wesele rare. Deuxu aratareu, kia biyrubunywihikỹke. Besuke arurutyhymy aõbo òbitimy ratximyhỹre wihikỹ-ò.

¹⁹ Aõhewe õhõtitydynawimy mabekre. Bityhynymy mabekre. Inyõ heka idi rõhõtinyrenyõra, tai reserenyra ityhydỹ-ribi.

²⁰ Ijõ Imineu inire, Alexỹdre ijõre. Jiarỹ rewahinyre Satanasi-ò, Satanasi bedeburana tamyreny riwahinykre. Tiiboho rybebinamy tii Deuxu-ò rary-beõtyhy.

2

¹ Delemy kamy ararybeke: Àlàna sõwemy idi rawahinyke, ibutumy iny-ki bexitòtenykre.

² Iòlò dee, ibutumy dinodu dee tule bexitòenykre. Tamyreny biix-itòedỹnanymy Deuxu-ò, tule Deuxumy beòbykemy, tai ibutumy iny iworana bedehesimy rỹikre. Deuxumy iny rõkõhõtinyrenykemy idi òbitimy tamy rokoirekemy.

³ Kia wese awire Deuxu dee.

⁴ Deuxudeewimy ibutumy iny ritakemy raerykemy tibo inatyhy raremy.

⁵ Deuxu sohojile rare iny-ki rybedu tule sohojile rare, Deuxu-ò iny mahādu tii sohojile kia riwinyre. Tii hābutyhyhykỹ rare. Tai tahe tii tiò tiò rare, Deuxu, iny mahādu-wana widee ributunykemy, Jesuisi Kristu wahe.

⁶ Jesuisi rexiwahinyre ibutumy iny òraruna òwydỹmy. Tii heka riòwynyrehohihyylemy. Kia heka tiiehyymy deòsidỹmy rarekemy. Tiu iny mahādu rahenykemy Deuxu rexinohõtinyre.

⁷ Jiarỹ heka imynynamy riwamyre kia rybe-di arelyykremy. Tule jiarỹ rybe-di dohodỹdukremy riwamyre iny witxira bedeerydỹmy judeukõdu mahādu wahe. Kia raerykemy tibo inatyhy raremy. Kia dori inatyhy rare.

⁸ Ibutumy dohodỹna hetowo-ki ibutumy rexitòenyre rexityhynymy. Ujõmomomy rõhõtinyry aõkõ.

⁹ Hāwyy uritere ixidi nohõtityhyõmy ixiaõmydỹnadỹmy urile ywilemy ixidi rõhõtinykemy. Hāwyy ityhydỹdu ixiywidỹna tahe tyywihikỹ aõkõ, iradesihodỹtyhy aõkõ, deorutylududike aõkõ.

¹⁰ Urile tahe iyrubukemy Deuxu-di rõhõtinyke tamy aõwihikỹ riwinykre.

¹¹ Hāwyy ityhydỹdu mahādu ròeryrenykre yrubu-ki.

¹² Jiarỹle heka hāwyy ariwahinyõtyhy hābumy hỹnakemy, hābu erydỹdukemy tule tuu areõnyke aõkõre, hāwyy heka urile iyrubumy rỹike.

¹³ Adaõ heka Deuxu juhule riwinyre idi Eva riwinyre.

¹⁴ Tule tahe Satanasi Eva juhuru riitxenanyre, Adaõ aõkõ tai raòrarunyre.

¹⁵ Hāwyy uladu reakeule rexitake. Idi ròtyhydỹmy. Inyluumy idi rexityhynykrekẽ.

3

¹ Kia rybe inatyhy rybe rare: –Inyõ dohodỹdu dinodumy rarekeki. Kia heka rexiburemyhỹre aõwihikỹmy ratximyhỹre.

² Tahe rybe-di dohodỹ aõmysỹdỹdumy ralòkeki, tii heka òbitimy rareke, tahāwyy sohojidile, rexityhynymy rarekemy, iny inatyhy, iny aòraru rarekemy, erynadỹdutyhymy rarekemy.

³ Tii heka iaxaxa luuõre aõbina luummy aõkõ rare tule iyrubure. Tahe tule iaõmy nohõtidi aõkõre.

⁴ Tii heka taijoimy reõnymyhÿre, tariõre rierynanywihikÿmyhÿre ixirybe rityhynykemy.

⁵ Inyõ tahe taijoi reõnyõkeki, Deuxu aõmydÿÿna-di õbitimy raaõmysÿdÿÿõtyhy.

⁶ Tii ityhydÿÿdu tÿmyra aõkõmy rarekemy. Raxiwedenymy rarekeki tahe urile Satanasi alõsena-txi tii reseke.

⁷ Ihãrele tahe ityhydÿÿdu mahãdu aõkõ rare ihÿre, awimy tuu rarybemyhÿre. Tuu heka raujõmorenyõtyhy tule tii Satanasi ireitidisi-txi reseõtyhy.

⁸ Tule dohodÿÿdu wiõhedÿÿdu mahãdu, kiawesele rarekemy. Tii tule õbitimy rarekemy irybe õkese õkese aõkõ, iaxaxaluu aõkõ rare, tule aõna aõna sõwemy nohõtidi aõkõ rare.

⁹ Iny inatyhydÿÿnareny õbitimy tuu rotohodÿÿnanymyhÿrenyke, tarayky õbiti-di.

¹⁰ Tule kia wesele raurihikre. Iribi õbitimy rõhõnykeki, tai dohodÿÿdu wiõhedÿÿdu mahãdu-ò ralokre.

¹¹ Ihãwyy tule õbitimy rarekre. Ujõmodumy aõkõ rarekre, iyrubukemy, urileta rexityhynymy rarekemy.

¹² Tule dohodÿÿdu wiõhedÿÿdu mahãduõ ihãwyy sohojidilemy rarekre. Tariõre, taijoi-wana reõnymyhÿkre.

¹³ Kia mahãduõ Deuxu aõmysÿdÿÿna õbitimy riwinymyhÿreki, inatyhymy tii iny rityhynykre. Tai Deuxu aõmydÿÿna tii riõbitinykre ibutumy inydee.

¹⁴⁻¹⁵ Aroramy jiarÿ wylemy arakemy watzireri. Aõkõkeki urile warybe ritina adee rewahinyreri. Kia warybe-di bierynanybenyke aõhebo ityhydÿÿdu mahãdu warybe-di rotÿÿnykemy. Ityhydÿÿdu mahãdu Deuxu ijoiõ rare. Inatyhy rybe yrubudÿÿdu rare.

¹⁶ Iny tyhydÿÿnareny awi tyhytyhy rare. Kia wese rare: —Jesuisi heka hãbu wese nade. Tii Deuxu Tyytyby-di õbitimy rityhynyreu, ÿjureny tuu robirenyre. Taaõmydÿÿnanarenymy ibutu bede bedemy relyyrenyre. Sõwemy iny rityhynyrenyre. Roosere biu botorahakÿ-ò.

4

¹ Deuxu Tyytyby rarybera: —Ihewoladu bededÿÿnana txuu hãbu tyytybybina rybe-ò roholakre. Tai iny tyhydÿÿnanareny ririkre.

²⁻³ Tahe ruina rybe rityhynyre, hãbu aõmy nohõti erykõ rybe-ò. Kia heka hãbu raerynadÿÿmyhÿre uritere hãwyy my heriõmykremy, ijõ rÿsÿna aõtxi irÿsÿõkremy. Kia rÿsÿna iny rirÿsÿke Deuxu riwahinyre. Juhuu àlàna Deuxu-ò rawahikre.

⁴ Kia heka ibutumy Deuxu riwinyre awire. Aõ aõkõ heka awiõre. Deuxumy beõbyke, kia tahe ibutumy awike.

⁵ Ixitõedÿÿna Deuxu rybe kia ibutumy awimy risÿnykre.

⁶ Kai heka ityhydÿÿdu mahãdu bierynanykeki, kai heka Jesuisi Kristu aõmysÿdÿÿdu mahãduwihikÿõ tate. Kia inytyhydÿÿnareny erydumy mabekre.

⁷ Kai ihetxiu nohõtividÿÿna ijyy bityhynyõtyhy. Marurunymy mabeke Deuxu aõmysÿdÿÿnana-ò.

⁸ Aumyruru urihimyõmy idi mohõtinykre, atyytybywi-di tahe kia idi sõwemy mohõtinykre kai kabede-ki adeewikre tule tiu bede-ki awikre.

⁹ Kia rybe heka õbiti rare. Ibutumy iny rityhynyke.

¹⁰ Inyboho raaõmysÿdÿÿnymyhÿre inatyhymy. Deuxu dori iny rityhynyre. Tii ibutumy iny tarasadu ratximyhÿre, ityhydÿÿdule tarasadure.

11 Kia warybemy biernanybenyke.

12 Iny aratyhynyòkeki kai matuari aòkò tateki, tai ityhydýýdu wihiký mabekremy bexityhynyke. Tai tahe arybe-ò aratyhynykre aityhydýýna, aluuna, òbitina òraru-ki wahe.

13 Adehemynykre kotyre, Deuxu rybe-di mariakre dohodýýna heto-ki, idi belyykemy mabekemy tule biernanykemy.

14 Uritere nohòti lusaòmy kai erydýýdu wihiký tatemyhý. Dohodýýna matuari mahàdu debòtidina-di arateònyrenyreu, wahisidýýna weseò tetate rybe-di týnydýýna òraru-ki.

15 Kia aòmydýýnanamy mohòtinywityhymyhý. Ixidile bexiywinytyhymyhýke bede erydýýnana-di tule bexiywinytyhymyhýke.

16 Tai kai òraru-ribi bexitake tule aijohonana-di òraru-ribi bitakre.

5

1 Matuari ityhydýýdu mahàdu-ò ywimy aòki tamy marybemyhýke, bowese idi atximahàke Weryrybò mahàdu, aseriòre wesemy bitohodýýnyke.

2 Senadu mahàdu adi wesele biernanykre. Ijadòma mahàdu aseriòre wesere ibutumy òbitilemy biywinykre.

3 Inatyhytyhy wytese mahàdu kai bityhynykre iòsýný biywinykre.

4 Iriòredikeki, iriòkòredikeki, juhUU iriòre biernanyke imahàdule òbitimy biwiòhenanyke idi watrixeri. Kia dori Deuxu dee awire.

5 Wytese mahàdu ixisohojilemy rasýnymyhýre iriòrekòkeki, Deuxu-ribi aòna aòna riraòmyhýre. Deuxu dee sòwemy rexitòenymyhýkemy.

6 Kia tahe wyteseò òraruna luukeki kia tahe irulemy ratximyhýre hàre rubu rare.

7 Tximòtxi, kia bede ywina tahe rewahinyreri urile wytese mahàdu òwe òweòmykremy bibedeerynanykre.

8 Inyò juhUU tasýreny dee idi aòna aòna taijoi dee kanawyòkeki, tii ityhydýýdukòdu mahàdu ratyre rabinare. Tii ityhydýýdu mahàdu wese aòkò dotýýnymyhýde.

9 Wytese týmyrani tyyriti-ki iritidýýòmykre 60 ibeòraòkeki. Tule tii sohoji-hyyle roire hàbumy.

10 Tule tii aòna aòna wihiký riwinymyhýre, tariòre ritybienyke, taro-raludu-ò awimy raremyhý, ityhydýýdu mahàduwa risuhòmy raremyhý, aòhòkýtityhytymy rotýýnymy rare mahàdu riwiòhenanymy raremyhý. Aòu aòu heka iny wixira riwiòhenanymy raremyhý taworana bedehesi-di.

11 Wytese týmyrani heka tyyriti-ki iritidýýòmykre. Hàbumy herimy ròhòtinymyhýre wana, tai Kristu-ribi tòhòti rosamyhýre.

12 Tarybe ywidýýna riywinyòlemyhýre, tai iurenana tahe tuudýýdumy Deuxu-ò ratximyhýre.

13 Hetomy rawerywerynymyhýre kia urenana urile raujòmomyhýre aòna aònalemy. Aò heka riwinyòlemyhýre. Kia ratyre bina tahe tuu rybenanamy aòkò rybebinamy rarybemyhýre.

14 Kia heka wadee awire wytese týmyra hàbumy roikre, rariòrerenyke, tule taheto riywinykemy. Kia wese iòludu inydeereny aòna aònabinamy rarybeòhýkýkre.

15 Wyteseò dori Satanasi hemy roire.

16 Wyteseò ityhydýýdusý-ki rarekeki, tii heka riwiòhenadýý rýikre. Kiawese dohodýýdu mahàdu nieru tamy ritakre. Kia nieru rayrubunykre. Tahe rawahikre ixisohojile ratximyhýre-ò.

¹⁷ Matuari ityhydỹdu mahãdu iny rityhytyhynykre. Dohodỹna mahãdu aõmydỹnana òbitimy retehemy ratximyhỹkeki, ratyhytyhynykre. Inatyhytyhywityhymy kowa òbitimy relyymyhỹre tule rybe wihikỹ rierynanymahãre kia heka raõwywikre.

¹⁸ Tai tahe raritidỹmy roimyhỹre: –Broreni maixõmotyre iwysydỹmy rariamyhỹu, iry ratòbònyòtyhy ibyre lau. Tule ròritidỹmy roimyhỹre:

–Mobo raaõmysỹdỹmyhỹre, tii heka iny riòwynymyhỹre.

¹⁹ Matuari mahãduõ iny tuu raujõmokeki, tuu arityhynyòtyhyke. Tuu lobixidu inatxi ada inataõkekile, aratyhydỹkre.

²⁰ Tii inatyhymy òraruna-txi resereu, kai tamy marybeke iòrarumy ibutumy inyko-txi. Iurenana tahe ijõ iny ruberumy rỹimyhỹkremy.

²¹ Adee ararybekre. Deuxu, ýjuren, Jesuisi Kristu-wana ibutumy warybe-ò roholareri. Kai warybe biywinykre. Myheka wiratyre widi rõhòtinyòtyhy. Tiiemy wiwese weselekemy rỹikemy.

²² Uritere rybe-di tỹnydỹdu tỹmyra juhu biurihike idi tahe debòtidina-di biteònyke rybe tỹnydỹmy. Kawese aõkõkeki heka hãbu òrarunamy tudỹdukremy òsana mabekre. Aõmydỹnana tiiemy òbitimy biywinymyhỹ.

²³ Bee sohojilemy aõkõ biõkre urihimyòmy vỹmy biõkre. Kai dori awo ibinareriki tiiemy tuu abinareri.

²⁴ Ijõ òraru aõwesele iny kanatỹnykre, bedeluura aõwesele kòdòhònykre. Ijõ òraru taheka idile kanatỹnykre.

²⁵ Ruxetòenawihikỹ iwesele rare. Ele tii raeryòtyhy idi tahe iny rierymyhỹre.

6

¹ Ibutumy wetxuõ tawedu rityhynykre. Tawedu rityhynyòkeki heka Deuxu nibinarybemy iny rarybekre. Tule ityhydỹdu eryna binamy rarybekre.

² Weduõ ityhydỹdukeki, kia heka ire ratyhydỹmyhỹke tule aõnityhymy tamy aõmysỹdỹkre. Tii dori ityhydỹdu seriòre wese rare. Kia dori taaõmysỹdỹnyteri ityhydỹdu widee. Kaiboho ixideerenyle wiluukemy. Kia tule bierydỹnykre.

³ Inyõ erydỹna witxira ròerynanykeki kia òbitimy aõkõ Jesuisi Kristu Rybewihikỹ wese aõkõ ratxikeki,

⁴ kia hãbu ixiwede rare, aõ rieriyòlere. Kia hãbu urile dỹraxidỹ luure. Kia dỹraxidỹ-ribi ibutumy rybe jei jei rõhònymyhỹre. Iribi tahe tule rexinaananyhỹre, raujõmomyhỹre, rexiwodohonanyhỹre.

⁵ Raruimyhỹre. Kia ibutumy rotỹnyrerí, hãbu tõhòtina òweòwere. Inatyhyna-ribi kia hãbu tõhòti rosare. Ityhydỹdureki tii ròtakemy ixidi ratximyhỹre. Kiamy heka rõhòtinymyhỹre.

⁶ Inatyhymy ibutumy heka tai iny aõtyhydỹdu-ki taaõ-di teysakreki.

⁷ Aõ kabede-ò iny ixihemy diwyòhydenyde inatyhymy heka rukururenkykre tule aõ ixihemy kabede-ribi rikiwyòtyhyrenkykre.

⁸ Iny tydirenykeki, iny rỹsýnadirenykeki, urile reysarenkykre.

⁹ Tahe inyõ ityhymy ixidikiki, tii òraruna-txi resekre. Kia heka iny rexiburemy, rexibinanymyhỹre, tule rexiraykyitxỹtenymyhỹre.

¹⁰ Inyõ nieru luukeki, tii aõ òta òta òraruna-txi resekre. Kia-di heka iny sòwemy ityhydỹdu mahãdu-ribi rõhònyra aõhòkỹmy rotỹnyrenkykre.

¹¹ Kai Deuxu ijoi tate. Ibutumy kia-ribi bexiemy mabekre. Uritere ityhymy ixi-di nohòtiòmy tahe awimy mabekremy mohòtinykre. Deuxu wiwese, ityhydỹdutyhy wese, Deuxuluu wesemy. Tiiemy heka òbitimy atximahãke, ywimy ainytyhymy atximahãke.

¹² Aõu aõu òbitimy atximyhỹkemy marurunya, умы tuedekõnahakỹ bitakemy, kai tule inatyhy rybemy tarybete inysõweko-ò, Deuxu dori adee rarybere juhUU.

¹³ Inatyhymy adee ararybekre. Deuxu adee ijohonadu rare. Tule Jesuisi Kristu wadee ijohonadu rare. Tii inatyhy rybemy tarybete Ponsiu Pilatoko-txi.

¹⁴ Kaheka warybe rare: Kai heka bede ywina bityhynyke aõ bede ywina tyyriti òraru-ki aõhe botỹỹnyõtyhy. Biraòke InywedU Jesuisi Kristu dehemynyna txuu.

¹⁵ Tiutxukremybo Deuxule kedexitỹnynykre, tii deysana wedu rare. Tii sohojile heka IòlòmY rare. Ibutumy IòlòwedU rare. Ibutu wedu wedumy rare.

¹⁶ Tii sohojile heka tiu ruruõhyy rarekre. Tii irehetyhymy loosõnawo-ki rasỹnymyhỹre. TiimY heka inyõ tuu robiõtyhyre. Inyõ tiu iòhòmY tamY rehemynyõtyhy. TamY rikiwodeysanyrenykre. Tiòhe aõu aõu taruru-di ratximyhỹ.

¹⁷ Kai marybekre iaõdi mahãdu-ò uritere ta aõna aõna-di rexiwowy-dynyõtyhy, iaõna aõna dori rỹiõhyykre. Tahe Deuxule rityhynykre. Tii dori ibutumy aõna aõna wiwihikỹ inydeereny riwahinyre.

¹⁸ Tii aõna aõna wihikỹ inydeereny riwahinymyhỹre. Iaõdi mahãdu uritere aõwihikỹ-di ijõ-ò rawiòhedỹỹnykre. Aõu aõu ròwirareamyhỹke iny-ò.

¹⁹ Kia wese tiiboho ributunyrenykre. Aõna aõna wihikỹ biu-ki awimY idi rarekre. Tule umytuedekõnahakỹ tiiboho ritarenykre.

²⁰ Kai Tximòtxi, aõbo adee rawahidỹỹre, kia biyrubunykre. Rybe òwe òwe-ribi irehemY mabekre. Aõbo heka raninireri bedeerydỹỹ kia heka inatyhy aõkõ rare.

²¹ Inyõ kia aõ erydumY ixi-di nohõti-ki, rexitara ityhydỹỹdu mahãdu-ribi. Deuxu deysanamy adee ratximyhỹkemy idi watxireri.

2 Tximòtxi-ò Paulo Inatxina Tyyriti Tximòtxi-ò

¹ Paulo jiarỹ rare. Jesuisi Kristu deòdu jiarỹ rare. Kia jiarỹ rare Deux-udeewireki wahe. Jesuisi Kristu juhuhu rarybere, umy tỹmyra tuedeõna inydeereny kidiwahinykremy. Tii kia wedu rare.

² Kai Tximòtxi, wariòre waluunadu wesemy atximahãte. Kia tyyriti adee ariwahinykre. Wiòhedỹỹna, ruxetòena, ywina, Deuxu Inytyby-ribi, Jesuisi Kristu Inynyrỹ-ribi adee kedehemynykemy watzireri.

³ Deuxumy reàlãreri iwese wahabohomy reàlãre wese. Wanohõti Deuxu-ò ywile jiarỹ rare. Aõu aõu adee, Tximòtxi, rexitòenymahãre. Txuõ txuõlemy, ruwana Deuxu-ò rexitòenymahãre.

⁴ Iu rareu, arube-ribi wanohõti rosaõhyymyhỹre. Arora-ò arakemy watzimahãre, wadeysatyhymy ararekemy.

⁵ Atyhydỹỹna-ribi wanohõti rosaõtyhy. Alahi, Lòide, juhuhu rityhynymyhỹre. Idi adi, Eunisi, tule rityhynymyhỹre. Kai tule wiji tetyhynymyhỹte inihe.

⁶ Kia dorihe itxi õhõti reijaranyreri. Wadebò tahe aratityre retidireu, arayky-ò Deuxu aõ riwahinyre awahisidỹỹna wesekremy. Wiji kia arayky woludu rõrõra wana biixixanyke. Kia dori Deuxu wahisidỹỹna rare.

⁷ Deuxu-wana iny ruberuõtyhy. Tii dori inydee ruru riwahinyra, luuna riwahinyra, tule bedeerydỹỹna riwahinyra.

⁸ Tule Deuxu rybemy rybe-ki ixỹruõlemy. Deuxu rybemy rybe-ki wamy maixỹruõtyhy. Deuxu rybemy rybe-ki tahe, ròtenawo-ò riwatidire. Kia tahe awire. Deuxu rybe wityhydỹỹna-ò aõhõkỹmy rokotỹỹnykre. Deuxu dori inydee ruru riwahinymyhỹre.

⁹ Tii heka iny ritarenyre biu-ò hena riwahinyre wahe. Tai taaõmysỹdỹỹna inydee diwahinyde. Iny awirerimy rareki aõkõ inydee diwahinyde. Taruxetòenale-ki inydee diwahinyde ixideewireki. Juhu bedeu Jesuisi Kristu òraru-ki ruxetòena inydee diwahinyde.

¹⁰ Kia ruxetòena wijile rehemynyra inydee. Jesuisi Kristu inytarasadu kia diwyde. Tii rubunale riixãwididỹỹnyre. Biu-ò hena Rybewihikỹmy kia ritỹnynymy diwyde.

¹¹ Riwatare tarybemy rybedumy. Rybedumy riwateònyre, tule bedeerydỹỹdukemy riwateònyre.

¹² Tai judeukõdu mahãdu òraru-ki aõhõkỹmy ratỹỹnymahãre. Ihãrele tahe raixỹruõlemahãre. Rexieryre dori tii retyhynymahãre. Reeryre dori tii ruru dire waaõmydỹỹnana tamy retidire iyrubudỹỹmy kiatxu-ò.

¹³ Waòbiti rybe biywinyke juhuhu kia wamy taholate, ityhydỹỹna-di. Biywinyke luuna-wana. Jesuisi-ki tahe luuna tyhy rare.

¹⁴ Timybo Deuxu adee diwahinyde, biyrubunyke. Deuxu Tyytybytyhy dori inywo-ki ratzireri.

¹⁵ Ibutumy kabede ludu Asia ludu riwarira. Fikelu ijõnre. Erimojini tahe ijõre. Kia tahe kai teeryte.

¹⁶ Inynyrỹ ruxetòena kidiwahinykemy watzireri Onisiru sỹmahãdu-ò. Tii dori aõu aõu riwawiòhenanyre areysakemy. Tiu riixỹrudỹỹnyõtyhyre wawomati reroti-di jiarỹ ranyreriki.

¹⁷ Tai tahe Roma hãwãhãkỹ-ò ritehemynyreu, riwaijehyryre; idi tawa-ki rahare.

¹⁸ Iny Iòlò ruxetòena tamy kidiwahinykemy watzireri kia txuu. Efesu hãwã-ki dori Onisiru riwawiòhenanytyhyre. Kia teeryte waratyremy.

2

¹ Kai tahe wariòre wese tate. Jesuisi Kristu làhàna-ribi ruruna bitake.

² Aõbo wary-ribi taholatemy iny sòweko-ò relyyreu, kia ijõ iny òbiti-ò tuu belyykre. Iny rexihumy rarekoòle tuu belyykre. Idi tahe tiiboho inywitxira ribedeerynyrenykre.

³ Waaõhõkỹmydỹñana wawana tuu botỹnykre. Jesuisi Kristu soldadowi-hikỹ-wesemy kai mabeke.

⁴ Soldadoõ tadinodu aõmydỹñanale rityhynymyhỹre. Tii ixideewimy raru-taaõtyhy.

⁵ Ijesudu ijesu ritake òbitimy resukekile.

⁶ Oworuwidỹñdule juhuu suribi bederaty ritamyhỹ.

⁷ Aõmybo wiji raryberadi mohotinyke, raweseranyreki. Inyiòlò ibutumy araerynanykre.

⁸ Jesuisi Kristu rubu-ribi ixixadu-txi õhõti reake. Ihetxiu Davi Jesuisi labiemy raremyhỹ, iwese inyrybewihikỹ rarybere wese.

⁹ Rybe wihikỹmy relyyreki dori womati reroti-di rataamy aõhõkỹmy ratỹnyreri, aõbina widỹñdu wesemy. Deuxu rybe tahe, inyõ ritaaõtyhy.

¹⁰ Ibutumy reòludunymahãre ityhydỹñdu mahãdu dee, Deuxuhõrõ dee. Ki-aboho Jesuisi Kristu tarasanamy ritakemy idi watzireri. Tarasana, làhàna aõu aõu ritakemy idi watzireri.

¹¹ Rybe inatyhy rare. Jesuisi Kristu-wana iny rurukeki, irumy tii-wana aroireke.

¹² Inyboho rikityhynyhyrenykeki, tii-wana riòlònyrenyke. Inyboho Jesuisi rikitxiõnyrenykeki. Tii tule iny ritxiõnykre.

¹³ Iny rikityhynyõrenykeki, ihãrele tii ityhyhyymy rarekre. Tii rex-itxiõnyõtyhy.

¹⁴ Iny nohõti kia-txi reakemy biwisỹnyke. Tamy marybeke ujõmohyyõmy rarekemy. Ujõmo tahe wiòhedỹña aõkõ rare. Ujõmo-ò ijohonadu urile ujõmodumy relekre.

¹⁵ Kai tahe marurunyke Deuxudeewimy belekemy. Kai Deuxu deòdu tate. Kia rybe inatyhy-di òbitimy maraykynyke, idi tahe, bierynanyke. Tahe bexiixỹrudỹnyõtyhy.

¹⁶ Rybe òweòwemy rybedu-ribi irehemy bexieke, rybebina-ribi tule. Kia rybedu urile raòrarunynihikỹmyhỹke.

¹⁷ Kia erydỹña reuròmyhỹre yjy wese. Imineu, Filetu-wana kia wese rierydỹñanyre. Kia rybe inatyhy-ribi rexihitxinyre.

¹⁸ Tii rarybemyhỹre: –Iny ixixana dorihe reara. Kia rybe-di ityhydỹñduõ wimy uriurile rityhynyre.

¹⁹ Deuxu hõrõ tahe inatyhymy rỹirakre. Kia tahe urihixina rare:

–Deuxu tahõrõ mahãdu rierymyhỹre.

Ijõ tahe:

Inynyrỹ ijoimy iximy rybedu, òraruna heka riatykre.

²⁰ Ityhy mahãdu hetonihikỹwo-ki womati tỹrỹrỹhỹkỹhyna, pratahyna sohojile aõkõ rỹire. Òwòruhyna, suhyna tule rỹire. Hynaõ tahe rỹsỹnawihikỹ hyna rare. Ijõ tahe rỹnysi-di dehuna rare.

²¹ Kia hyna wese iny rỹira. Ijõ rỹnysihyna wese rỹikeki, idi rexisuhokeki, rỹsỹnalralyra wesemy reuròke. Tawedu-ò awimy rỹike, tawedudeewimy. Tai tahe aõ wihikỹhynamy rexiywinymy rỹire. Kai tahe iwesele mabeke.

22 Kai ijoi tÿmyra tate, amahãdu òraruna-ribi bexiekemy; ixi-ribi aõ-di rõhõtinyreri, kia-ribi mahenyke. Òbitina, ityhyna, luuna, ywina-wana biheludunyke. Deuxu-ò rexitòenyke òbiti mahãdu-wana.

23 Erysydÿÿna itxÿtemy wiribi rybeõmyke. Kiaribile ujõmo ròhònymyhÿre.

24 Deuxu deòdu raujõmonyõtyhy. Tii tahe iny ibutu dee ywimy risÿnymyhÿre, erydÿÿnamy rexihumy ihÿmyhÿre.

25 Ywina-di riòbitinyreri iny ixitxiõdÿÿna mahãdu. Tii heka riraòreri Deuxu worahòresena tamy riwahinykemy. Idi tahe inatyhymy rierykemy.

26 Tule itxÿte-ribi ròòsekemy, Satanasi reroti-ribi rexitakemy. Tai tahe Satanasi rimyrau tahe ritaataara teewimy riwinykemy.

3

1-2 Bededÿÿnana konanamy bededÿÿnana sirahakÿ kÿnyikre. Kia tahe bieryke. Iny ixideewimy riwinykemy ixi-di ratxikre. Nieru tarasalemy ixi-di rexinohõtiddÿÿnymyhÿke. Rybetyhyhÿkÿlemy iximy rarybekemy ratxikre. Ixidee awihikÿlemy rõhõtinykemy ratxikre. Rybebinalemy rarybemyhÿke. Tyby ise-wana riywinyõhyymyhÿke. Inyõ-ò aõmy reàlàõhyymyhÿke. Òbitiry rityhynyõhyymyhÿke.

3 Iny-ò tuuna ihoõhyyre. Inyõ ibiòwamy rareõtyhy. Aõbina binalemy inymy relyymyhÿke. Rexiywinyõhyymyhÿke. Reburehekÿ rariamyhÿke. Òbitimyno ibinahyymy rarekre.

4 Iny deòsadÿÿdumy rarekre. Ixiluunadumy rarekre. Ywimy aõkõ rarekre. Iwisÿdÿÿna luuhyymy rarekre. Deuxu tahe tuuõkre.

5 Òbitimy risÿnymyhÿre wese tahe òbitiruru ritxiõnymyhÿke. Kai, Tximòtxi, kia iny-ribi irehemy mabeke.

6 Kia hãbu tahe hetoõ-ò ralòmyhÿre. Hãwyuri uri rÿira xiwedeõ-ò òrarulÿxina-di ralòmyhÿre. Kia tawisÿdÿÿna-di rierynanymyhÿre tarybewi-widile, tahe hãwyuri rityhynymyhÿre.

7 Kia hãwyuri aõu aõu ròerykemy ixidi rõhõtinyymyhÿre, urile tahe inatyhyna tiu rieryõtyhy.

8 Iwese ihetxiu Ijãni, Ijãbri-wana Moisesi òludumy rÿire wese. Wiji tule kia hãbu inatyhyna òludumy rare. Irayky rawerynyre. Ityhydÿÿna-di deòsanamy rÿimyhÿre.

9 Tiu tako-ò raõtyhy, iitxÿtereriki, kia iruina òraruna ibutumy iny rierykre, iwese Ijãni, Ijãbri òraruna ibutumy iny raeryre wese.

10 Kai, tahe waerydÿÿna-ò taholahyymahãte. Iwese raremahã wese tiwaheludunymahãte. Watyhyna teerymahãte, wadeybina, waywina, waluuna, waixiòlòdÿÿna.

11 Aõu aõu inybinahakÿ wadi riwisÿnyreri, tule aõhòkÿmy ratÿÿnyreri. Kia ibutumy teerymahãte. Kia wade rotÿÿnymy rÿire Atxiòkia hãwã-ki, Ionio hãwã-ki, tule Listra hãwã-ki. Aõwitxira witxiramy aõhòkÿmy ratÿÿnymahãre. Wanyrÿ tahe ibutu-ribi riwatate.

12 Inyõ òbitimy ratxikeki Jesuisi Kristu-ò, tii aõhòkÿmy rotÿÿnykre iòraru-ki.

13 Hãbu bina bina rabinahykymy rarekre, tule hãbu inatyhy aõkõ rabinahykymy rarekre. Inyõ tiiboho riitxenanykre, tule tiiboho inyõ kidiitxenanykre.

14 Kai tahe aõbo teeryte, kia-di mohõtinyke aõbo tetyhynymahãte-di. Tahe tiribibo teeryte, õhòtikile idi mabeke.

15 Uladuribile teeryte Deuxu Tyyriti. Kiadile bierykre Jesuisi Kristu tarasadÿÿna idi bimykremy. Kia adee kanake bityhynykekile kÿnyhe.

¹⁶ Ibutumy Tyyritityhy Deuxu elewesenamy nade. Bedeerysyna urenana heka rare. Òrarudu òbitidỹyna heka rare, ibutumy riòbitinykemy. Tule aõbo awihikỹmy raremy rierynanykre.

¹⁷ Deuxu deòdu dori òbitile rỹirakemy. Aõwihikỹ widỹyna aõbo dori rexi-hulemy rỹirakemy.

4

¹ Deuxu, Jesuisi Kristu kiaru-ki arãteònykre. Jesuisi Kristu dori rubu mahãdu iru mahãdu-wana wiribi rihitxinykre, tii taòlòna kaò kidiwykreu.

² Belyyke Deuxu rybemy, inydee awikeki, tule inydee awiõkeki. Ywina-di iny biòbitinyke. Iny biwiòhenanyke.

³ Bededỹynanabina kanakre. Kia txuu erydỹydu òbiti-ò roholaõhyyre. Erydỹydu ributunykre tamydeewimy. Iwese iny tõhõti nohõtijuty-ò rotỹnynyhyre wese tamy wimy aõna aõnaòle roholamyhỹkre.

⁴ Inatyhyerydỹyna-ò roholaõhyymyhyre. Urile ihetxiu ijyyòle roholakemy ixidi ihỹre.

⁵ Kai tahe ywimy maraykynyke. Ibutumy aõhõkỹmy botỹnyke. Deuxu Rybewihikỹmy belyyke kia tahe aõmysỹdỹynare Deuxu adee riwahinyre. Idi hyulemy mabekre.

⁶ Iny riwawahinyke xiwena wesemy rubu-ò. Waixituededỹynana heka rehemynreri.

⁷ Ijesu wihikỹwesemy tahe rexiijesudỹnyre wese. Rekonananyra heka waummy ijera. Retyhynyhyra tahe ityhyna.

⁸ Òbitiwidỹyna raheto wese wadee rexihumy roire. Wanyrỹ, ywisidỹydu òbiti, riwawahinykre kiatxuu. Jiarỹ sohojiòle aõkõ. Tahe tule iraròsòdu mahãdu-ò. Jesuisi dehemynyna luummy kia mahãdu roimyhỹre. Tamy tule rataanaõ raheto wese riwahinykremy.

⁹ Wylemy inihe waroramy manake.

¹⁰ Dema riwarira Tesalonia hãwã-ò rara. Tii bede aõmydỹynana luure. Kalatxia bede-ò Kresetxi rara. Dalimasia bede-ò Txitu rara.

¹¹ Luka-wanale watzireri. Tahe kai Marku bididykre, wawiòhedỹydu wihikỹmy rarekemy.

¹² Txitxiò heka Efesu-ò reteònyre.

¹³ Kai tahe manakreu warahana bidiwykre. Troaji hãwã-ki Karpu heto-ki tahe warahana rerire. Watyyriti tule bidiwyke tyyriti welỹte tule nohõti losaõtyhymy.

¹⁴ Alexỹdre womati loresedỹydu warybe dibinanymyhyde. Wanyrỹ iòwydỹyna tamy kidilidikre riwabinanyreki.

¹⁵ Kai beziekre kowa-ribi, inyrybe dori rityhynyõhyymyhyre.

¹⁶ Juhuu dinodu-ò rewyònyreu inyõ riwawiòhenanyõhyyre. Ibutumy rirahure waribi. Aõbo wabinamy riwinyre-ribi Deuxu tõhõti rosamy watzireri.

¹⁷ Wanyrỹ tahe, riwawiòhenanyra Deuxu rybemy rybe-ki. Iny witxira dori, judeukõdu mahãdu roholamyhỹre. Leaõry-ò, wadi rehukõra.

¹⁸ Wanyrỹ tule riwatakre ibutumy aõmydỹynana bina bina-ribi. Kowa bede wihikỹ-ò riwadykre. Tuu rekealàkre aõu aõu bededỹynana roobymy. Kie.

¹⁹ Warybe wehityyna Prisila-ò, Akila-ò biõkre tule Onisiru sỹ mahãdu-ò.

²⁰ Erasto, Oritxi hãwã-ki rarire. Trofimo, Miletu hãwã-ki binamy resere. Taile heka rarira ibinamyhỹreki.

²¹ Wylemy manake inihe beòrako-ki. Ubulu tarybewehityyna adee riwahinyre. Tu Prudente, Lino, Laujia ijõre. Tule ibutumy ityhydÿÿduseriòre rybe wehityyna adee riwahinyreri.

²² Wanyrÿ awana ratxikemy watxiwãhãre. Tule làhàna umy-wana ratxikemy watximahãre. Kie. Paulo

Txitu-ò Paulo Tyyriti Txitu-ò

¹ Jiarỹ Paulo rare. Deuxu deòdu rare. Jesuisi Kristu riwamyre inatyhyna aritỹnynykemy. Kia tyhydỹyna, Deuxu tarasana mahãdu hõrõ rare. Kia ityhydỹyna dee inyõ rierykeki, rityhynykeki, Deuxu deewimy tii rarekre.

² Umytuedeõnahakỹ iny riraòmyhỹre. Deuxu dori tuu rarybere ihetxi bedeu. Deuxu heka tiu raruiõtyhy.

³ Ibededỹynana òbiti dehemyndeudeu, Deuxu aõmydỹynana rarybekemy rotỹnyre. Kia aõmysỹdỹyna wadee Deuxu riwahinyre, iny tarasadurenymy rybe-ò.

⁴ Txitu-ò kia warybe rewahinyra. Kai iny-wana Deuxu tetyhynyteri, kia dori inatyhymy wariòre wesemy tate. Deuxu, iny tyby-ribi, Jesuisi Kristu, iny tarasadu-ribi, Deuxudeysana-di, ywina-wana adee kanakemy watxireri.

⁵ Inyaõmydỹynana biòbitinykemy dori adee adiride. Kreta bede-ribi ròhõnyreu, dori waaõmysỹdỹyna rehuõre. Kia-ki dori kowa-di anaride. Ibutumy hãwã hãwã-ki ityhydỹydu mahãduy-ribi kai matuari mahãduõ bimyke. Iwese jiarỹ rarybere wese kai bimyke.

⁶ Matuari òbiti bimykre. Matuari ihãwyy sohojiõ rỹira bimyke. Inyõ ityhydỹyduy riòrenadule bimyke. Iriòre iòraruluukeki, iehehekeki, kia hãbu bimyõke.

⁷ Ityhydỹydu mahãdu yrubudỹydu òbitilemy dori ihỹkemy. Inyõ-ki heka ibinamy mahakeki, imynyõmy. Tii dori, Deuxu dee raaõmysỹdỹykre. Ixidile nohõtidu mynyõmy. Hãbukyara rybebyby, mynyõmy, vñ luudu aõkõ, hãbu aõbinaluudu aõkõ, hãbu ityhymy nohõtidu aõkõre. Kia mynyõmy.

⁸ Iny inatyhyle, òbiti luunadule, taroraludu-ò awire mahãdu, iny aõwityhy luunadule, ixiwedule, Deuxu rybe tyhydỹydu, kiale bimykre.

⁹ Deuxu rybe-di kia hãbu òbitimy rõhõtinkyre, òbitityhylemy rierynanykemy. Inyõ ierysydỹyna rityhynyõkeki, erydỹydu irayky riywinykre tai ihewo-ribi rieryke, rityhynykemy. Tule iny iwitxira erydỹyna-di rarybemyhỹreki, tii riòbitidỹnyke.

¹⁰ Iny sõwemy inatyhymy rityhynyõreri. Tii dori aõna aõnalemy rarybemyhỹre, ityhydỹydu mahãdu riitxenanyhỹkemy. Kia mahãdu-ribi, judeu mahãdu ibutu ratyre kia aõna aõnamy rotỹynymyhỹre.

¹¹ Inyõ kowa mahãdury riirykemy tamy rarybeke. Iny sõwemy heka riitxenanyhỹre. Òbitimy aõkõ heka iny rierynanyhỹre. Nieruòle heka iny rierynadỹynymyhỹre.

¹² Kowa mahãduõ, ierydỹyduõ rarybera:

–Inyboho, Kreta bedeludu mahãdu, ibutumy ruidu roire. Iròdu brebuna wese iny roire. Inyboho heka teoruxere roire. Byrelemy inyboho rõhõtinyhỹrenyre.

¹³⁻¹⁴ Aõmybo kahãbu rarybera heka inatyhy rare. Urenana tahe arurumy rityhynykemy. Judeu mahãdu ihetxi ijyy-ribi tõhõtireny rosakemy kai marybeke. Hãbu mahãdu bede ywina rityhynyõkemy. Kia hãbu dori inatyhyna aõkõ rityhynyre.

¹⁵ Òbiti mahãdu dee ibutu òbitire. Ityhydỹydukõdu mahãdu-ò aõ aõkõ òbitire. Tõhõtinareny dori aõbina binalemy rõhõtinyhỹre. Aõu tii rexierye aõbinahakỹ riwinykemy. Deuxu-ribi tõhõti rosare.

16 Tiiboho rarybemyhÿrenyre: –Deuxu inyboho reeryrenyre. Tiiboho tahe Deuxu erydu wesemy aõkõ aõna aõnamy rotÿÿnymyhÿrenyre. Tiiboho iny riojinyrenyre rybemy reòbyõlemyhÿrenyre. Aõwiwihikÿ widÿÿ rieryõrenyre.

2

1 Kai, Txitu, aõernawihikÿdibo biernanymyhÿke.

2 Matuari mahãdu kai biernanyke hãbu ixiwedu mahãdulemy roirelemy, ywimy nohõti wydynadu mahãdu roirekemy, òbitilemy rityhynykemy, ibutu òbiti luukemy, iixiraterekemy.

3 Senadu mahãdu tule biernanyke iyubumy rÿikemy iujõmoõmy rÿikemy, tule vÿi luuõmykemy. Aõernawihikÿdibo biernanybenykemy.

4 Hãwyy tÿmyra hãbumy heridu tÿmyra tahãbu luukemy, tariõre luukemy, kia senadu mahãdu riernanykre.

5 Tuu iyubumy rÿikemy, òbitimy raraykynymy rÿikemy, taheto riywinymy rÿikemy, awimy rÿikemy, tahãbu rybe riywinymy rÿikemy. Kia wesekeki, Deuxu rybemy inyõ ibinamy rarybeõtyhy.

6 Weryrybõ mahãdu tule biernanyke iyubumy rÿikemy.

7 Kai, Txitu, aõna aõna wihikÿmy botÿÿnykre, tai tahe ityhydÿÿdu mahãdu awesele aõna aõnamy rotÿÿnykre. Kai biernanykeu, òbitilemy inatyhymy biernanykre.

8 Arybe òbitityhydile biernanykre. Tai tahe aòludu raixÿrukre aõmy dori umy rarybeõtyhy.

9 Kai biernanyke urideòdu mahãdu tawedu rityhynykemy. Tamy awimy raaõmysÿdÿÿnykemy. Tamy heka ròrawyòdÿÿõtyhykemy.

10 Rawasinyke aõkõre, ibutumy òbitilemy riwinykemy. Kiawesekeki, ibutumy Deuxu inytarasadu deewimy riwinykemy.

11 Deuxu taerydÿÿna-di taluuna ibutumy iny-ò rexideòsinyre. Taluuna tahe inytarasana-ò rehemynymy raremyhÿ.

12 Kia heka iny tuu robikeu, awimy erydÿÿna rahake. Riwaernanymyhÿ aõbina bina widÿÿmy tule òbitina-di yrubudÿÿna-di iny rariakemy kabede-ki.

13 Tule iny riraõmyhÿrenykemy iny Deuxu wihikÿ iny tarasadu Jesuisi Kristu loosònatyhywo-ki kedehemynykre.

14 Iny òwymy dexiwahinyde iny òraru òwydÿÿrenymy. Kiawese heka iny riwyre idi riratisebenyre iny ijoi lyrahakÿ ixidee rimyre. Kia ijoi iluure.

15 Kai, Txitu kia aõna aõna inyko belyyke. Tai Deuxudeewimy riwinykemy urenana rakatxirenykemy. Iny biernanykre. Iny biòbitinykre. Iny ibutumy rityhynykemy matxibenyke.

3

1 Kai ityhydÿÿdu mahãdu ixi bitõhõtiijeranyke ibutumy hãwã dinodu, bedede dinodu rityhynykemy, tabede ywina rityhynykemy. Tule aõmysÿdÿÿnana wihikÿ riywinykemy.

2 Modee heka ibinamy rarybeõtyhy, raaõbinanyõtyhy ywimy rarekemy, moheka iehehemy riywinyõmyhÿre.

3 Inyboho heka tule iehehe roiremyhÿ, iitxÿtemy roiremyhÿ, òraru luunamy iny riitxenany roiremyhÿ, òtaluumy roiremyhÿ. Aõbina bina lumy iny wixira aõna aõna-di wii risÿnymy roiremyhÿ, wideramy roiremyhÿ.

4 Tahe Deuxu iny tarasadu luuna, ruxetõena-wana inydeereny dehemynydeu, tii kia-ribi iny ritarenyre.

5 Kia aõna aõna wihikÿ iny riwinyrenyreki aõki, iny Deuxu ritarenyre, taluuna-di tahe iny ritarenyre, Jesuisi òraru-ki xiery heka Deuxu riwatÿmyranyre Tatytybytyhy-di. Umytÿmyra riwahinyrenyre, riwasuhòrenyra.

⁶ Tatytyby inydee riwahinyre Jesuisi Kristu iny biu-ò hedureki.

⁷ Kiawese iny riwaòbitinyrenyre taluuna-di. Katahe inyboho umytuedeõna ijõdire.

⁸ Kia heka inatyhy rare. Ka aõna aõna bierynanytyhykeu, tahe wadee awikre. Kia wese Deuxu ityhydỹỹdu mahãdu aõwiihikỹlemy rõhõtinyinmyhỹke tule rewinyhỹkemy. Kia heka awire. Kia iny riwiòhenanyhỹre.

⁹ Ýraxina itxỹte kai rỹraxydỹỹõmy, iwyòdỹỹõmy, rybe jei jei-ribi irehemy mabekre, tule lahi òraru rybe-ribi. Kia rybe aõ aõkõ rare. Awi aõkõ rare, iny riwiòhenanyõtyhy.

¹⁰ Hãbuõ rybe òwe òwe-di ityhydỹỹdu rierynanykeki, aruru rybemy tamy marybeke. Kai inatxi rybemy marybekeki, tii rexiòbitinyõkeki, tahe uritere aõna aõnany tamydỹỹõmy. Tii òrarudu dori ratximyhỹre. Hãbu òbiti aõkõ.

¹¹ Tiile rieryre tuudỹỹdumy ratximyhỹre.

¹² Jiarỹ, Txitxiò, Atema-wana aòrysomy ariteònykreu. Niòpòli hãwã-ò wadee manakre. Kowa arasỹnykre ibutumy biu bedeu.

¹³ Zena, bede ywina erydỹỹdu, Apòlo-wana kai itỹinaren-y-ò biteònylebenyke aõmybo tamy biwahinyhỹke.

¹⁴ Bierynanyke iny aõmysỹdỹỹ wihikỹkemy rotỹỹninyhỹkemy. Kia wese aõbo rauhenyreri tamyreny ijõdikre. Tai riwiòhenanykre.

¹⁵ Ibutumy kaki jiarỹ-wana iny rybe weityhyna adee rewahinyrenyreri. Warybe biwahinyke ibutumy inyluudu ityhydỹỹdu mahãdu-ò ibutumy adeereny Deuxu deysanamykre. Kie.

Filemo-ò Paulo Tyyriti Filemo-ò

¹⁻² Jiarỹ Paulo rare. Jesuisi Kristu òraru-ki ròtena-ki wãhãre. Tximòtxi iny seriòre wese jiarỹ-wana adee Filemo-ò rybe rewahinyrenyre. Kai inlyu-unareny, iny wiòhenadỹỹdu tate. Tule Afia-ò, rewahinyreri, tii iny wyòrenyõ rare. Tule Arikipu-ò, rewahinyreri iny rybe tỹnydỹỹdu-ki ijoiõ rare. Tule ityhydỹỹdu mahãdu-ò rewahinyreri, aheto dohodỹỹna ijoi-ò wahe.

³ Ruxetòena ywina-wana Deuxu iny tyby-ribi, Jesuisi Kristu iny iòlò ribi adeeremy kanakemy watzireri.

⁴ Deuxu-ò rexitòenyreu, atxi, Filemo, wanohõti reamyhỹre. Tai umy rarybera.

⁵ Kai dori Jesuisi tetyhynyte, inyìlò luummy, ityhydỹỹdu mahãdu luummy atximahãte. Kia-ò raholamyhỹre.

⁶ Tule rexitòenymahãreu kiamy jiarỹ rarybemahãre. Kai iny witzira-ò Deuxu aõmydỹỹnanamy belyykeu, Kristudeewimy bierynanyke. Kia indeeremy rexitòenyre Deuxu-ò.

⁷ Jiarỹ wadeysatyhyreri, kai dori aluuna iny witzira dee ratximyhỹre. Kia heka deysana nihikỹ ityhydỹỹdu mahãdu-ò rare, tii riwawowesenymyhỹre.

⁸ Jiarỹ timy atxikemy adee ararybekeki, tule ke heka arateranyke. Jiarỹ dori aityhydỹỹdu seriòre rare.

⁹ Tahe aluudỹỹna òraru-ki tahe adee arexitòenykre. Jiarỹ Paulo rare. Ròtenawo-ki jiarỹ roire Jesuisi Kristuluu òraru-ki.

¹⁰ Wariòre wese dee rexitòenyre. Onesimo wariòre wesemy redyreri Kristu tyhydỹỹna-ò waribi umy wese kaki ròtenawo-ki rare.

¹¹ Tiu heka adee riwahinyõmyhỹre tii dori juhoo awiòhedỹỹdutyhy aõkõ rare. Wijile tahe iny diwiòhenanymyhỹde adee wadee tule.

¹² Tii adee reteònyreri. Ixyby araòkesedỹỹnyreri. Kai ixi-ki bimyyke wawesemy, wadee dori tii awityhy rare.

¹³ Jiarỹ dori ixideele remyõre wawiòhedỹỹdu kaki ròtenawo-ki Rybewihikỹ dohodỹỹ òraru-ki. Kia òsỹny adee awire.

¹⁴ Urile aõkõmy marybekeki tii arimyõthy. Kai aõ wadee bidiwahinykeki, kai ixi sohojile inihe biwahinykre. Waixitòena-ki aõkõ.

¹⁵ Onesimo heka aribi irehemy rexijere ijõ bededỹỹnana witzirau, tahe wijile tiemy abrysimyykre.

¹⁶ Juhoo wesemy aõkõ ihỹre deòdumy wahe, wiji aseriòre wesemy heka rare. Tii heka walutyhy rare, adee tulekemy ityhydỹỹdu wese wiluukemy wadee awire.

¹⁷ Kai wabiòwakeki, tii birybenyyke iwese tiwarybenymyhỹte wese.

¹⁸ Aõ adee rasiranyreki, jiarỹ ariwyònykre teròwmy. Jiarỹ iximyna kaa retyyritinyre: Jiarỹ Paulo ariòwinykre.

¹⁹ Kai waòraru-ki ityhydỹỹdumy atximahãte. Kia tahe adee tuu ararybeõtyhy.

²⁰⁻²¹ Warybe mynamy ta kai bòwidỹỹkre Kristu òraru-ki, tai ta biwadeysanykre. Jiarỹ warybe rewahinyreri, araeryre, waixitòedỹỹna ratyre biwinykre.

²² Ijõmy adee arexitòenykre: wasỹ waherina aheto-ki biwinykre. Deuxu-ò bexitòenykreki, tai jiarỹ aõhe-wana adeeremy aròðsekere.

²³ Epafa wabiòwa ròtenawo-ribi adee riwehityhynanyreri (jiarỹboho kaki watzimyhỹrenyre Jesuisi Kristu Rybe òraru-ki),

²⁴ tule Marku, Aristarku, Dema, Luka-wana rexiwehityhynanyreri. Kia ibutumy heka Deuxu-ò aõmysỹdỹỹdumy roire.

²⁵ Jesuisi Kristu làhàna awo-ki ratximyhỹre.

Hebreu-ò Tyyriti judeu ityhydỹỹdu mahãdu-ò

¹ Juhuu Deuxu inytybyreny-ò rarybemy raremyhỹ. Deuxu rybe-ò ijohonadu-di tamy rarybere. Tule sówemy aõna aõna wixira wixira rarybere tamy.

² Tahe ikonana wiji txuu inydeereny tariòre diteònykemy rarybera. Tii rarybere tybyderòwmy. Iriòre tahe ibutumy aõna aõna wedu rare. Deuxu iriòre kia rarekemy rarybere. Tii tule juhuu bede widỹỹdu rare.

³ Tii Deuxu loosòna tỹnydỹỹdumy ratxireri. Deuxu wesehyymy ihỹmyhỹre. Iriòre, taryberuru-di, ibutumy aõna aõna rimymy roimyhỹre. Iny òrarunareny riixãwididỹỹnmy rahudi, biu-ki Iòlò Deuxu ruruna weribi ronyre.

⁴ Iriòre ranire niwihikỹmy. Tii dori ýjuratyre awityhyre.

⁵ Tiu heka ýjuò-ò rarybeòhyymyhỹre: —Kai wariòre tate. Bohyymy wiji wãhãre. Ijõ ritidỹỹmy rỹire, kawesemy: —Jiarỹ tybymy ararekre. Tii wariòremy rarekre. (Kia tahe ýju-ò tii rarybeòhyymyhỹre.)

⁶ Iriòredela kabede-ki reareu ixityre ijõmy rarybere: —Ibutumy Deuxu ýju tuu reàlakemy.

⁷ Ýjumy tahe kawesemy Deuxu rarybere: —Jiarỹ ýjuboho tahe yhy ele elewesemy retxienyre, wadeòduboho heòtyloosòwesemy retxienyre.

⁸ Tahe tariòremy kawese rarybere: —Wariòre, Deuxulemy atxiteri. Kai ibutumy inyiòlòhyymy rare. Aruru tuedeõna debòna dire. Wiwesemy nonana-di ibutu-ò atximahãte, òbitimy.

⁹ Òbitinaluumy kai atximahãte òraruna deramy tahe atximahãte. Tai tahe Deuxu, aDeuxu amahãdu ratyre awimy teleta adee riwahinyre deysana.

¹⁰ Ijõmy Deuxu rarybere tariòremy: —Kai Wanyrỹ juhUU bede widỹỹdu tate. Bede ibutumy tewinyte. Tule biuludu aõmydỹỹnana tewinyte.

¹¹ Kia bede aõmydỹỹnana ludu ibutumy rexihukemy. Kai tahe tiu atuedeõna. Iwese uwòhi retybyre wese, kia aõna aõna retybyke.

¹² Tule wesirahana rawerasemy roimyhỹre wese ibutu tyy retybymyhỹre, rawitxiradỹỹmyhỹre. Kai tahe ixiwesehyy ahãte. Abede dỹỹnana tahe tiu itueòtyhy.

¹³ Ýjuò-ò Deuxu tiu rarybeòmyhỹre: —Bodonyke waruruna weribi. Aòludu mahãdu ako-txi resemyhỹkemy. Eòdumy rarekemy. Kiamy tahe tariòre-ò rarybere.

¹⁴ Ibutumy ýju mahãdu Deuxu deòdu rare tyytyby wesemy rare. Deuxu diteònyde ityhydỹỹdu mahãdu wiòhedỹỹmy tule ibutumy biu-ò hedu mahãdu wiòhedỹỹmy.

2

¹ Tai tahe, waseriòreboho, ityhyna rybe-ò rokoholarenyreki, tamy tahe rikimynrenykre rikityhynynrenykre. Tai tahe iribi tiu ròkòirenyòtyhy.

² Ibutumy ýju rybe inatyhymy raremyhỹ. Ibutu òrarudu rimyre aõhòkỹmydỹỹnana-ò irybe riywinyòreki.

³ Kia inatyhy rare. Tarasana rybe wityhy-ò rokoholarenyòreki, timybo inyboho rikiòlònyrenyke. Kia rybe wityhy Wanyrỹ Jesusile juhUU inydeereny relyyre. Idi tahe, ijohonadu mahãdu tuu rarybere tule.

⁴ Deuxu irybe myna rotỹnyre, ròbedeòbydỹnyre tai ròbedeòtiidỹnyrenymy tai Deuxu ruru ritỹnyre. Tule Deuxu Tatytybytyhy iaòwidỹnyamy ixideewimy inymy riubỹtỹnyre.

⁵ Ýju-dee aòkò bede riwahinyre-kia iòlòmý rarekremy. Jesuisi-ò kia riwahinyre.

⁶ Juhuu inyò rybe txiòdỹnyamy rarybere: —Ritina-ki kia rybe roimyhỹre: —Aòbo heka hàbu tyhy riòre rare? Tii aò aòkò rare.

⁷ Ijò bededỹnanaò Deuxu riòre ýju-ribi tyhymy aòkò ihỹre.

⁸ Tahe wiji wowydyna tamy rawahire iwese iòlò dee iny riwahinyre wese, tamy rawahire. Tule ibutu wedumy rarekemy. Iny ruereny dee ibutu ihòrò aòkò òsana rare. Ibutu rurudu wese aòkò iny ruereny-ki rỹre.

⁹ Tahe inyboho Jesuisimy robirenyre. Tiile tuu ihỹre. Urihimyò bede aòmydỹnana bedeu ýju-ribi tyhymy aòkò Deuxu tii relere aòhòkỹmy dỹnana rimykremy. Tahe rurure. Rubu riurihire inyderòwyrenymy. Tai tahe rataana raheto wesena Deuxu tamy riwahinyre deàlana-wana.

¹⁰ Deuxu riwinyre ibutu aòna aòna ixidee. Tii kòkeki, bede ihoòhyymy roike. Tii ityhydỹdu mahàdu ridymyhỹre taloosònasy-ò, taijoimy. Tai tahe Jesuisi aòhòkỹmy rotỹnyre Deuxudeewireki. Tarasana wydydumy heka wityhymy Deuxu delede aòhòkỹmy rotỹnyreki, tai awityhymy ròhònykemy tarasadudikemy.

¹¹ Òbiti widỹdu tahe òbitina mahàdu-wana wimahàdu wese roire. Wiwanale sohoji tybyribile doidenyde. Tai tahe raixỹruòlemy Jesuisi seriòremy rininire.

¹² Ritina-ki rarybere: —Ani aritỹnykyre waseriòreboho-ò. Dohodỹna heto-ki àlànawiu-di adee ariwiunykre.

¹³ Ijò Ritidỹna-ki rarybere: Tii arityhynyhykyre. Ijò: Kakile wahe watzireri, tule roire wariòre Deuxu diwawahinyde.

¹⁴ Iwese ibutumy inyummy wiwesele roire wese, tule Jesuisi umyò rimyre, inyummy wesele, tai inywesemy rurukremy. Tai tahe rubu dinodumy raahananyre, Diabo wahe.

¹⁵ Kia rubu mahàdu lau ruberumyhỹre mahàdu, ibrebu iribi ritare. Kia mahàdu dori rububrebu deòduhyymy ihỹrenyre.

¹⁶ Ýju aòkò ritakemy namyhỹde, Abraò riòre riòre ritakemy namyhỹde. Tahe wiji tule ihỹre.

¹⁷ Iseriòre wese hyymy roirekemy ihỹrenyre. Tii dori Deuxu Xiwena widỹdumy rarekemy inydeereny tai ruxetòena wahidỹdu òbiti tii ihỹre. Ibutumy iny òraru òwydỹnyamy rỹimyhỹkemy.

¹⁸ Ibutumy ixiradỹna mahàdu tii riwiòhenanymymyhỹre, ibutumy ixirana-di aòhòkỹmy rotỹnymyhỹreki.

3

¹ Tai tahe, waityhydỹdu seriòreboho, boholatyhyke Jesuisi rybe-ò: —Kaiboho dori tule bimybennykemy biu bede aòmýsỹdỹna. Jesuisi iny ityhydỹna Xiwena wahidỹdu wedu tyhy rare tule inatyhyna deòdỹna tyhy tii rare.

² Deuxu tii riwinyre Xiwena wahidỹdu wedumy. Tai tahe tii òbitimý riwinyre Moisesi riwinyre wese Deuxu sýmahàduy-ki raaòmýsỹdỹnymyhỹreu.

³ Jesuisi-ò tahe sòwemy wowydyna rawahikremy. Moisesi wowydyna ratyre rawowydynanykemy. Hetowidỹdu iny riwowydynymyhỹre, hetoratyremy.

⁴ Ibutuheto iwidỹdu dire. Ibutu widyydu tahe Deuxu rare.

⁵ Moisesi Deuxu heto-ki òbitimy rybe riywinymyhÿre teòdu aõmysÿdÿÿnanamy. Tai tahe teòsidÿÿna ririre ijesenareki. Deuxu rybe tÿnydÿÿdu tahe Moisesi rare.

⁶ Kristu tahe Deuxu sÿmahãdu wedu rare Deuxu riòre rareki. Inyboho Inynyrÿreny-ò ròkòtyhydÿÿrenykeki tuu rokoirekre. Tai iny brebutererenymy iny raròsònareny inatyhymy rakatximyhÿrenykeki tahe Deuxu ijoi inyboho roire.

⁷ Kiawesemy tahe Deuxu Tyytybytyhymy narybede: –Wiji tahe tamy boholabenyke aworeny iòlududÿÿrenyõmy.

⁸ Judeu mahãdu wesemy aõkò boibeke, tybyboho wesemy aõkò wahe boibeke. Tiiboho dori tamy raujòmomyhÿre bedero-ki Deuxu riurihirenyreu.

⁹ Deuxu rarybere: –Aõbede wiwihikÿ rewinyre hãre, alabiereny riwaitxenanyrenyre tamyreny watxireri iny inatxiwaitue beòramy aõbedewiwihikÿ riraòmyhÿre.

¹⁰ Tahe Deuxu rarybere: –Waky reamy tamy wãhãre. Tiu heka wawana ratxiòhyymyhÿre ryòbiti tamy retÿnynyre hãrele. Tawo-ki teòsahyymy ratximyhÿre.

¹¹ Deuxu rarybere: Waky reatyhymy tai tahe ixidee resere, inatyhymy rarybere: –Tiu tiiboho elehyna bede-ò ralòòtyhy.

¹² Bexiijebenymy waseriòreboho uritere awo-ò ròtedÿÿõmy raykyitxÿtena. Kia òraru-ki aDeuxutyhy-ribi irehemy bexilòhòrarienyheny aDeuxu tyhy dori irumy ratximyhÿre. Tii inatyhy rare.

¹³ Txuõ txuõlemy wii biòbitinybenyke. Òraruna dori itxenadÿÿdu nihikÿ rare. Tai tahe wiji kiamy botÿÿnybenyke.

¹⁴ Deuxu rikityhynyrenyhyymy rakatxirenyke. Irybe rikiywinyrenykemy rakatxirenyke iwese juhu rityhynyrenyra wese. Kia wesekeki, Kristu leinamy rakatximyhÿrenyke.

¹⁵ Kiawesemy tahe Deuxu Tyytybytyhymy narybede: –Wiji tahe tamy boholabenyke aworeny iòlududÿÿrenyõmy. Iwese ihetxiu mahãdu riwinyre wese aõkò boibebenyke.

¹⁶ Timahãdubohe roholare Deuxu rybe-ò iribi tahe wimy raòludure. Kowa Egito bede-ribi doimyhÿde mahãdu roire. Moisesi tamahãdu-wana doimyhÿde.

¹⁷ Mobohe Deuxu kyaradÿÿdure 40 wyra sòwe. Kia mahãdule bederahykile rexihure raòrarunyreki.

¹⁸ Moòbo Deuxu rarybere taelehyna bede-ò ralòòtyhymy? Rybe ywisidÿÿdukòdu mahãdu-ò rarybere.

¹⁹ Inyboho tuu rieryreny. Rirònyrenyõremy rityhynyõrenyreki.

4

¹ Deuxu juhoo rarybere: –Inyõ taelehynabede-ò ralokremy. Inatyhymy heka aõmybo rarybere rÿire. Inyõ òsana kaibohoõ tamy rehemynyòtyhy rityhynyõmyhÿrenyreki. Tai tahe bexityhynymyhÿbenyke kia-ò.

² Inydeereny tahe Rybewihikÿ tÿmyra ròhònymy roimyhÿre, iwese Moisesi mahãdu-ò ròhònyre wese. Tamyreny tahe awityhymy aõkò tamy ròhòtinymyhÿre rityhynyõhyymyhÿreki.

³ Deuxu tyhydÿÿdu mahãdu ralòke taelehyna bede-ò. Deuxu dori rarybere: –Jiarÿ inatyhymy anarybede. Iny rityhynymyhÿrele tamy ralokre. Deuxu kiamy rarybere: –Taelehynabede tamy rewinyre xiery juhoo bededÿÿnana rewinyroireu.

⁴ Inyboho rierymyhÿrenyire tii riraòmyhÿremy Ritidÿÿna roireki: —Deuxu taelehyna-ki ele rihynyre debòinatxitxu bededÿÿnanamy. Taaòmysÿdÿÿna ibutumy rahure aòbo riwinykemy idi raremyhÿ riwinyre.

⁵ Ijõ rybe tule kia-wana roire: —Tiu ralòòtyhy waelehyna bede-ò.

⁶ Tuu heka Deuxu rarybere inatyhy raremy. Ijõ mahãduõ ralòmyhÿre Ijõ mahãduõ ralòrenykre. Moisesi mahãdu tahe ralòõre Deuxu rybe riywinyõreki.

⁷ Wiji bededÿÿnanamy heka Deuxu rarybereri. Kia rybe rare iwese Davi rarybere wese: —Wiji tamy boholaranykeu, aworeny iòlududÿÿrenyõmy.

⁸ Josue ridyre Moisesi mahãdu Suwitxiraõ-ò. Kasu tahe kabede aòkõ rare Deuxu elehyna bede. Deuxu idihyy tuu rarybemy ihÿre. Wijina ròtena bededÿÿnanamy Deuxu rarybemyhÿre.

⁹ Tai tahe Deuxu mahãdu dee elehynasu bede roimyhÿre. Deuxu elehynatxu wese heka rare, iwese Deuxu debò inatxitxu-di rexielahynyre wese.

¹⁰ Iwese Deuxu raelehynanyre wese raelehynanyre inyboho taaòmysÿdÿÿna-ribi, inyboho rukururenykre.

¹¹ Awityhymy rokoireke tamy rikirònyrenykeny tule. Rekeixijerenyke. Deuxu rybe rikiywinyõrenykeki iwese judeu mahãdu wese rikirònyrenyõtyhy.

¹² Ibutumy Deuxu inydeereny rarybere iruru dire. Iwese mayrehe wiòtxureemy rÿrira wese Deuxu rybe rare. Inyrayky wydyna riòròmyhÿre, òhòti wydyna-wana. Mayrehe rayky riraynymyhÿre aòmybo inyrayky Deuxu ibutumy rierykemy.

¹³ Ibutumy Deuxu rierymyhÿre inyraykyreny. Iny Deuxureny irumy ihÿre. Ibutumy aòna aòna tamy itÿnyhÿkÿle rare. Aò heka iwasi aòkõ tamy rare. Ikonanau ilau ibutumy aòhebo iny rotÿÿnymyhÿrenyre rikitÿnyrenykre.

¹⁴ Jesuisi Deuxu riòre iny xiwenadÿÿdu tyhy rare. Tii rare biu-ò iny wiòhedÿÿmy. Tai tii rikityhynyrenyhyymyhÿke.

¹⁵ Tii iny aòkònarenny rierymyhÿre; ixiradÿÿna rierymyhÿre tai iny riruxetòenyre. Tii kabede-ki tiu heka raòrarunyõhyre, ixiradÿÿna hàrele.

¹⁶ Tai tahe rekexiterenymy rekexitòenyrenyke iny iòlòreny rynana-ò. Tai tahe ruxetòena sòwemy inydeereny kidiwahinykre. Bedeòbyna kidiòkre tuu rokorurenykre.

5

¹ Hãbuõ Deuxu rimyre xiwena widÿÿdu mahãdu wedumy rarekemy. Tii ibutu iny deròwymy Deuxu-ò rybedumy raremyhÿ. Tii iny uriònosõna Deuxu-ò riwahinyre. Tule òraruna brò-ki xiwena tamy riwahinyre.

² Tii dori hãbu rare tamahãdureny-ò dori ywina-di ixi-ki ratxireri iòrarureny rierymyhÿreki. Imahãduõ ibedeeryõre ijõ tahe reòsamyhÿre tiemy aòna aòna bina riwinyhyymyhÿre.

³ Tai tahe xiwena riwahinyhyymyhÿre tamahãdu òraru-ki tule ixiòraru-ki.

⁴ Inyõ ixideewimy aòkõ xiwenawidÿÿdumy raremyhÿ Deuxudeewi xiery tahe tuu rareke. Deuxu tamy rarybemyhÿrekile tahe tuu rÿike. Iwese Araõ-ò Deuxu rarybere tuu rarekemy.

⁵ Tahe Kristu tule reximyõhyre xiwena widÿÿdu wedumy rarekemy Deuxu tuu rimymy rarybere: —Kai wariòre tate wijile kai inihe anataru.

⁶ Ijõ ritina-ki ijõ rÿire: —Kai xiwena wahidÿÿdu atximahãte urenana. Xideki xiwena wahidÿÿdu wesemy atximahãte.

⁷ Jesuisi kaki raremyhÿ hãbu wesemy iruberytynymy rexitòenymy reàlamyhÿre. Rahinymy riajuamy Deuxu-ò rarybere. Tii heka Deuxu rityhynyre tai tamy roholare.

⁸ Deuxu riòre heka tii rarehãrele tahe aõhõkỹmy rotỹỹnymyhỹre. Tai tahe ròeryre rybe ywidỹỹmy.

⁹ Tii heka raòbitinytyhyre. Tai tarasana widỹỹdu rỹimyhỹre iywidỹỹdu ityhydỹỹdu mahãdu dee.

¹⁰ Deuxu dori tii rymyre xiwena wahidỹỹdu wedu rỹirakremy Xideki wesemy.

¹¹ Sõwemy tuu adee ararybekemy watzireri. Urile adee isirare iersyna, teeryõhyemy taholamahãte.

¹² Kaiboho ihetxiu tetyhynytenyte. Tahe inyõ bibedeerynybenyke. Ihãre tahe teerynanyõhymahãte. Ihymy texiòkesedỹỹnyta tai tahe inyõ anaerynanykemy adi ratxireri timybo ityhydỹỹdu-ki tatemahãmy. Juhuu erydỹỹna wahe.

¹³ Tohouã howỹtòdu weselemy atximahãtenyte, ityhydỹỹdu aõmydỹỹnana teerytyhyõmahãtenyteki, rybeerysydu òbiti aõkõ atximahãtenyteki. Kaiboho taumynyõmahãtenyte iwese ityhydỹỹdu mahãdu rỹirawesekemy.

¹⁴ Deuxu erysynatyhy inyummy rỹsỹna wesemy roire. Aõbinahakỹ aõwihikỹ erysyduòle kia rỹsỹna roire, tiiboho dori rierymyhỹre aõbo awire aõbo ibinare, tuu rotỹỹnyrenyre aõbo awireki.

6

¹ Tikiemy juhUU Kristu rybetyhynamy araerynanymahãre. Rekexitõmonyrenyke. Iwitzira erysyna rikierenykemy. Tai tahe rakaumynyrenyke ityhydỹỹdu tyhymy ityhydỹỹdu rurudỹỹna-di. Inyõ rarybemyhỹre. Iny raòbitinymy ratxike xiery iny ratakemy ihỹre. Kia aõmydỹỹnana reerydỹỹnanyõkre tahe. Iny rityhynymyhỹkekile iny ratake.

² Ratisebenamy heka anaerynanyõkre, tule debòlidisinamy, tule rubu-ribi ixixanamy, tule bede konana ritxuakre txummy ibutumy heka tuu ararybeõkre. Tii heka juhUU erydỹỹna rare. Kaiboho dori teerytenyte.

³ Wanyrỹ dee wikeki tahe iwitzira erysyna heka ariwiuronkyre.

⁴⁻⁶ Inyõ biu-ribi loosõna wãhidỹỹna riurihimy ritakeki. Deuxu Tyytybytyhy aõmydỹỹnamy ijõ ritake wana, Deuxu rybe riurihike wana, kowa bede wihikỹ ruru rieryke wana. Tii ibutukeki tahe Deuxu-ribi tahewo-ò dòòsede inatyhyna ririre. Isiratyhyhyre ixityre ròte taðraruna Deuxu-ò relyyõtyhy. Tii dori Deuxu riòre ixityre itxeònihikỹ-ki ritidire, inyru-ò ritidire ibinamy rarybemyhỹre.

⁷ Biu heka suõ risebenymyhỹre. Òwòruty iribi ritxuhudỹỹnymyhỹre tòbòròdỹỹdu-ò. Aðratybo raratynykeki tahe Deuxu bedeòbydỹỹna kia rare.

⁸ Tahe edeweweju kidiwahinykeki, awiõre heka inydee kia sumy ibinamy rarybere. Urile roomyhỹre. Kia suu tahe iny ityhyna ririre mahãdu wese rare.

⁹ Kiawese jiarỹ urile rarybereri. Ihãrele tuu aõkõ umyreny rahõtinyreri. Inatyhymy rahotinyreri kaiboho aõ òbiti tewinymahãtenytemy. Iwese tarasana mahãdu wesekeky kaiboho ahãtenyte.

¹⁰ Deuxu dori òbitityhy rare. Kaiboho tamy taaõmysỹdỹỹnihikỹmahãtenyte tai aribireny tõhõti rosaõtyhy. Iwese Deuxu-ò aluunareny teteòsinyta wese ityhydỹỹdu seriòre tewiðhenanytenyteki ihãre tadiwiðhenanymahãte.

¹¹ Wiluu hyemy boibeke bede dỹỹnana konana-ò. Tuu raruhyymahãre. Tule iny raròsonareny-di mohõtinybenyke.

¹² Tai tahe ityhydỹỹdu aõmydỹỹna irisirenyõmy boibeke. Òbiti widỹỹdu iele ele aõkõ rare. Rityhynyneri Deuxu wahisidỹỹna ritakremy iwese Deuxu rarybereki. Kaiboho òbiti widỹỹdu mahãdu wesemy ahãbenyke.

¹³ Deuxu Abraõ-ò rarybereu, inatyhymy ixideele rarybere. Inyõ dori Deuxu ratyremy ratxiõmyhÿre.

¹⁴ Kawesemy rarybere. Deuxu tiemy ixirybe riwinyhyymyhyre Inatyhymy anabedeòbynykre, idi anaixijuradÿÿnykremy tai ariokoreõ rasõwekremy.

¹⁵ Tahe Abraõ riraõmyhÿre, raeleleõmy. Idi Deuxu tarybe myna rotÿÿnyre.

¹⁶ Inatyhymy aõmy inyõ rexirybenykreu aõmy rarybekre. Kai tahe aõ ijyy riixãwididÿÿnymyhyre.

¹⁷ Deuxu tule ixidee rexirybedÿÿnyre inatyhy rybe-di. Tai rybe tarasadu mahãdu rierymyhÿre Deuxu rawitxiranyõtyhy.

¹⁸ Inatxi aõmydÿÿnana iny rieryreny. Deuxu rarybere-wana tiu raruiõtyhy. Tai tahe inyboho inyararòsònareny rimymyhyre. Iny ixiwòtena-ò ralòmmyhyre tarasana-ò ralòmmyhyre wese.

¹⁹ Inywo-ki inyrayky wiòhedÿÿdu ijõdire hãwòjurasu rimymyhyre wese iny roire Jesuisi koludu wesemy inydeereny ralòmmyhyre wesirahana webòrò-ribi, Deuxusÿ wahe.

²⁰ Jesuisi juhoo ralore tai. Tai tahe Jesuisi Xiwena wahidÿÿdu wedu rÿihyykemy Jesuisi tahe Xideki axi weseõ xiwena wahidÿÿdure.

7

¹ Xideki tahe Salẽ hãwã iòlò rare. Deuxu Tyhydÿÿdu Xiwe wedu rare. Abraõ heka aõbina ritara. Xideki ròhònyre itxi reakemy, tahe ribedeòbyrybedÿÿnyre.

² Tai Abraõ tamy riwahinyre ibutu aõbina aõmydÿÿna-ribi, debòwiò-ribi sohoji riwahinyre, Xidekini tahe òbiti Iòlò rare iwitxira rybe-ki. Salẽ hãwã Iòlò tahe ywina nodu rare iwitxira rybe-ki.

³ Tybyõre, iseõre, isÿõre. Tii heka itxu ròhònyõhyre tule bedekonanaõhyre. Tii heka Deuxu riõre weselemy ihÿre. Tii Xiwena wahidÿÿdu urenana ratxihyymyhyre.

⁴ Kaiboho mohòtinybenyke timybo tii aõnityhymy raremyhÿdi. Abraõ iny-tybyreny tamy diwahinyde: debòwiò aõmydÿÿna-ribi sohoji tamy riõre. Iòlò taòludu aõbina aõbina aõmydÿÿna-ribi tamy riõre.

⁵ Xiwena wahidÿÿdu mahãdu Levi sÿriõre mahãdu-ribi doidenyde. Tamy bede ywina riywinymy riteònyre debòwiò-ribi sohojina ritakemy iny-ribi. Taijoityhy-ribi. Tiiboho dori Abraõ sÿijoiluduõ tule roire.

⁶ Xideki tahe Levi sÿijoiludu aõkõ rare. Ihãrele tahe Abraõ tamy debòwiò-ribi sohojina riwahinyre. Xideki tahe bedeòby rybe-di heka Abraõ rirybedÿÿnyre. Abraõ juhoo ityhydÿÿdu rare Deuxu dori tamy ityhyna rybe riwahinyre. Xideki tahe ityhytyhy rare. Aõhe inatyhy?

⁷ Bedeòbymy rybedÿÿdu aõnityhy rare. Moòbo rarybemyhyre ratyre aõnityhy rare. Ibutumy kia rierymyhÿre.

⁸ Levi xiwedÿÿdu mahãdu hãbumy ituerenyre. Xideki tahe ruruõhy ihÿre. Kia ritina-ki roimyyhyre.

⁹ Levi debòwiò-ribi sohojina tarasadu rare. Ihãrele tahe Abraõ teròwomy debòwiò-ribi sohojina riwahinyre.

¹⁰ Levi dori natibienyõde, ihãre Abraõ-ki ratximyhy iu witxi Xideki-wana witxi reareu.

¹¹ Bede ywina rybe xiwedÿÿdu mahãdu-wana iny rataõtyhy. Tai tahe iwitxira xiwe wahidÿÿdu inyboho riijemãhãreny. Araõ ijoi ribi aõkõ nade, Xideki nade wese tahe Kristu nade.

¹² Xiwena aõmydÿÿnana rawitxirakeki, tule rybe bede ywina rawitxirake.

¹³⁻¹⁴ Inynyrÿ tahe Levi xiwewahidÿÿdu mahãdu-ribi aõkõ nade. Tii Juda mahãdu-ribi nade. Tiiboho heka tiu xiwewahidÿÿdu mahãdu-ki ri-wiòhedÿÿõhyymyhyre. Moisesi dori tamy kia aõmysÿdÿÿna riwahinyõre.

¹⁵ Kristu iwitxira xiwewahidỹỹduõ ròhònnyre Xideki wesemy raremyhỹ. Tuu heka teerytenyte.

¹⁶ Tii heka bede ywina rarybere wesemy aõkõ nade. Tahe iwitxi rare. Tii umy witxira tuedeõna-di nade. Kia ruru òraru-ki nade.

¹⁷ Rybe riti-ki rỹire, Kristumy rarybereu: Kai xiwewahidỹỹdu mahãduõ tate Xideki wesenamy ahãte.

¹⁸ Aõmydỹỹna tyby rawitxiradỹỹre awimy aõkõ dori rare. Irurudimy aõkõre dori rỹire tarasana wiòhedỹỹmy aõkõ.

¹⁹ Kia iny riòbitidỹỹnyre aõkõ. Wiji tahe raròsòna wihikỹ ròhònnyre inydeereny Kristu dori Deuxu-ò inatyhymy iny ridymyhyre.

²⁰⁻²¹ Deuxu rexirybedỹỹnyre inatyhymy Kristu xiwena wahidỹỹdumy rarekemy. Tahe iwitxira xiwenadỹỹdumy aõkõ kiawese narybede. Kristu-ò tahe Deuxu rarybere: —Deuxu rexirybedỹỹnyre. Tiu rawitxiranyòtyhy arybe. Kai xiwena wahidỹỹdu atximahãte urenana.

²² Tai tahe Jesuisi riòludunyre wijina aõmydỹỹnana tỹmyra.

²³ Xiwedu sòwekemy idi ròhòtinymyhyre, ijõ rurumyhyreki. Ijõ tahe teròwymy ralòmhyhyre.

²⁴ Jesuisi tahe xiwena wahidỹỹdu mahãduy-ribi ròhònnyòtyhy. Kristu tahe aõu aõu ratxihyymy rarekre. Tai ixiwe òlòdỹỹnamy aõu aõu iweselemy rarekre. Ijõ-ò tiu raòtyhy.

²⁵ Tai tahe moõ Deuxu-ò Kristu-di kanakeki, tii tahe Jesuisi ritalekemy ratximyhyre. Tii dori Deuxu-ò inydeereny rexitòenyhyymyhyre.

²⁶ Tii dori iny deròwymy rarehyymy rareke Deuxu sỹdee. Jesuisi biu-ki rononymyhyre Deuxu-wana. Sỹwihikỹ worana bedehesina-ki rononymyhyre urenana. Tai tahe tii xiwenadỹỹdu wedumy inyboho rurumyhyrenyre. Tii òbiti rare, tyrare, iòraruna-ki aõkõ, òrarudu mahãdu-ribi hitximy.

²⁷ Xiwena wedu txuõ txuõlemy xiwena diwinymyhyde juhoo taòraru hetydỹỹnamy riwinymyhyre idi tahe ibutumy inyòraru hetydỹỹnamy riwinyre. Jesuisi kia Xiwena wedu wesemy aõkõ ihỹre. Tii xiwena wahidỹỹdu mahãdu-ribi lahixi rare. Sohojihyy dori xiwenamy rexiwahinyre rubu-ò ikonana xiwena wahe. Tii txuõ txuõlemy aõ rubu xiwe wesemy riwahinyõre, iwese iwitxira xiwedỹỹdu riwahinyre wese. Juhoo taòraruna òraru-ki raxiwenyre idi iny òraruna òraru-ki raxiwenyre.

²⁸ Bede ywina hãbule ritidire xiwena wedukremy. Hãbu tahe iruruõre idi tahe sohoji rybeòtyhy bede ywina hewomy nade. Kia tahe Deuxu riòrele tuu risỹnyre, tii òbitityhyreki.

8

¹⁻² Kiamy heka jiarỹ rarybere. Kia awese iny xiwena wedu ijòdire. Iòlò tarynana-ki rononymyhyre. Jesuisi tahe Deuxu ruruna-ribi ronyre. Iheto-di itxeredu tahe Jesuisi rare. Deuxusỹle iyrubudỹỹdu rare. Kia hãbu aõkõ riwinyre Deuxule riwinyre.

³ Kristu iheto raroowo-ki Deuxu deewina riwinymyhyre.

⁴ Kristu kabede-ki ratxikeki tii xiwena wahidỹỹduõmy aõkõ ratximyhyke. Kabede ludu dori bede ywina rybe riritinymyhyre wesemy riwinymyhyre.

⁵ Tiiboho biu aõmydỹỹnana wesemy urihimyòlemy aõna aõnamy rotyynymyhyrenyre. (Deuxu Moisesi-ò riteòsinyre aõwesemybo tealàna heto-ki raremyhỹ. Tai tahe Moisesi riwinykemy timybo riteòsinyre wesemy hãwãlò ratyy-ki riteòsinyre.)

⁶ Kristu tahe iwitxira aõmysỹdỹỹna iaõmysỹdỹỹnare. Bede òtiidỹỹna urenana heka Kristu aõmydỹỹnana ròimhyhyre bede ywina widỹỹdu aõmydỹỹnana

ratyremy ihÿre. Kristu tahe bede ywidÿÿna tÿmyra riwinyre Deuxu iny-wana heka widee rilorore. Deuxule rarybere tahe juhoo-ribi awityhyre irybe.

⁷ Juhoo bede ywidÿÿna awi aõkõ rare. Awikeki tahe ijõ tÿmyraõ ròhònyõtyhy.

⁸ Deuxu dori ihetxina-ki tamy awimy aõkõ ihÿre. Kawesemy dori rarybere: –Txuõ kanakreu tahe, bede ywidÿÿna tÿmyra aritobinykremy Juda sÿmahãdu-wana judeu sÿmahãdu-wana.

⁹ Bede ywidÿÿna tÿmyra ihetxina-ribi iwitxira rarekere. Ihetxina reto-binyre tybyreny-ò. Iu Egito-ribi retareu, retobinyre. Tiiboho bede ywidÿÿna tÿmyra-ò rieryõre. Tai riywinyõre bede ywidÿÿna.

¹⁰ Kiawese bede ywidÿÿna tÿmyra rarekre, Wanyrÿ Deuxu rarybere: –Wabede ywina iraykywydyna-di ariritinykre iwo-ò aritidikre wabede ywina. Jiarÿ iDeuxumy ararekre, tule tiiboho wasÿ ijoimy roirekre.

¹¹ Kia txuõ rahukredi tahe ibutumy riwaerykre tasõmo-wana, tanihikÿ-wana. Tiu wii rierynanyõtyhy Wanyrÿ Deuxumy.

¹² Ruxetõena tamy ariwahinykre taðrarutedenamy. Iòrarureny ibutumy wanohõti iribi rosakre.

¹³ Bede ywidÿÿna tÿmyramy Deuxu rarybereu, ihetxina retybyra raseruserunyra. Taita awiõra heka.

9

¹ Juhoo bede ywidÿÿna-ki bede rybe ritina rÿimyhÿre Deuxu-ò deàlana timybo rawahinykemy. Tule rÿimy raremyhÿ tykyheto bederahy-ki.

² Iwo-ki inatxi rareamy rÿimyhÿre. Juhoo irareasana-ki Deuxu iòhònasÿ heka inire iwo-ki tahe adÿÿ loosõna rÿimyhÿre. Tule tii paõ brebuna deòtena òwòrubesetyre-ki rÿimyhÿre.

³ Tyky ijòtòbõna hewo ludu rareasa tahe Deuxu sÿle inire. Òkòsy nihikÿ rihitxinyre ijõ-ribi. Tule tahe òwòruwodÿÿõ rÿire womati tÿrÿrÿÿhÿkÿyle ihetyre. Iwo-ki tahe xiwena deòtena. Tai riwosinyrmyhÿre tÿnyre reakemy.

⁴ Òwòrudÿÿrawo-ki tahe womati tÿrÿrÿÿhÿkÿ butxi riòre ibòbese-di rÿire, iro-ki ihina rÿire mana ta irybereny-ki inire. Tule Araõ hoju rÿimyhÿre tai ruhunymy raremyhÿ. Tule bede ywidÿÿna riti mana tyre-ki tai roimyhÿre.

⁵ Tule iratyy tyre-ki rÿimyhÿ ÿju ritxoo inatximy. Teubrorodile tahe riwòmyhÿre. Òwòru wodÿÿ ratòbõna tikibo Deuxu iny òraruna riixãwidÿÿnyrmyhÿre wahe. Tahe tuu rÿybeõnyrenykre kia aõmydÿÿnana tai rÿiremy.

⁶ Kia ibutumy rexihureu xiwena wahidÿÿdu mahãdu ralòmyhÿre juhoo rareasanawo-ki taaõmysÿdÿÿna tyhy widyymy.

⁷ Ihewoludu rareasana-ò iwedule ralòmyhÿre. Beòra bededÿÿnana sohojimy sohojile tamy ralòmyhÿre. Iròdu riwomyhÿre ihãlubu ritxiwikemy xiwenamy. Taðraru-ò iny witxira òraru-ò tule. Inyðraru-ki tii mahãdu aõna aõnamy rotÿÿnyrenyre rexieryrenyõhyylemy, kiabro-ki.

⁸ Deuxu Tyytybytyhy kia ijyy-di iny ribedeerynomyhÿre. Juhoo tyky heto rÿireu, inybohoõ heka Deuxu iòlònasÿ-ò ralòmyhÿre.

⁹ Kia heka wijina bedeerynare. Juhoo dori xiwena witxira witxira wahidÿÿna witxira witxira uriõno rare. Kia urile iwahidÿÿdu iwo irayky-wana riòbitinyõhyre.

¹⁰ Juhoo ludu aõmydÿÿnana bede ywinale rare. Rawitxirakekile tahe ròhònyke. Tii tahe rÿsÿna bede ywinamy rare, monatyhy bede ywinamy, aõna aõna surona bede ywinamy. Iny kia bede ywina ibutumy rityhinykemy rÿimyhÿre.

11 Kristu dehemynydeu, iu tahe rawitxiradỹyre. Kristu Xiwena wahidỹỹdumy ratximyhỹre. Tai tahe ibutumy rawitxiradỹỹmy roimyhỹre. Tii ralòmehỹre tyyheto tỹmyra-ò. Itỹmyra tahe biu-ki rare. Kabede-ki aõkõ ihỹre; hãbu iwidỹỹdu aõkõ rare.

12 Kristu ralore Deuxu Tyytyby sỹnawo-ò tahãlubu òrarukile ralore. Sohojihyyle ralore iny tarasanarenymy inydeereny riwahinykremy. Iròdu hãlubu-di aõkõ ralore, broreni riòre-di aõkõ, budoeni hãlubu aõkõ wahe tahãlubudile. Tai iny tarasanareny rimyhỹre.

13-14 Juhuu budòe broreni Oriòre hãlubu-di raxiwenanyreny. Broreni bryby riubỹtỹnyre iny tyre-ki iaòsusu-ribi rahòkemy. Juhuu xiwena iny taòraru-ribi risuhòkeki, iratyre tyhy Kristu hãlubu iny risuhòke. Tai iny raykybina bina ritamyhỹre tule inywo aõ aõkõ rare, ritamyhỹre. Idi tahe iny Deuxu irumy ratximyhỹre dee wimyri kiwinyrenykre. Tii òbitimy ihỹre iny dee rurureki.

15 Kristu tahe bede ywidỹỹna tỹmyra wedu rare. Tai tahe ibutumy bede ywidỹỹna tỹmyra mahãdu namyhỹde ibutumy aõmybo rarybere ritakemy. Tii dori rurure iny òrarureny dire-ki ihetxiu bede ywina aõmydỹỹnana rỹimyhỹreu, tii rubu-ò rexiwahinyre. Tai inyboho òraruna-ribi rexitareny.

16 Inyò rurumyhỹre-wana tii iny dee ritinaò ririmyhỹre kia ritina rarybere: –Moòbo taaõna aõna riwahinymy ririkre. Iny rururemyhỹre xiery tahe, ritina awi rare.

17 Kia ritina aõ aõkõ rare iwidỹỹdu tyhy irumy ratxikeki, rubumy roimyhỹrele ritina aõ rare.

18 Tai tahe juhuu bede ywidỹỹna ijõ hãlubu txiwixina dire.

19 Moisesi Deuxu bede ywina wahidỹỹ rahudi, tii bede ywina tyre ritxiwire, iny ratytyre riubỹtỹnyre budoeni hãlubu-di broreni riòre hãlubu-di bewana riurinymy riubỹtỹnyre. Tule budòe siratykysò-di riubỹtỹnyre.

20 Iu tahe tuu rarybere: –Kia bede ywidỹỹna tỹmyra hãlubu rare. Deuxu wadee rarybere kaiboho bityhynykemy.

21 Tule tykyheto-ki hãlubu riubỹtỹnyre deàlana aõmydỹỹnana-ki

22 Bede ywina rybe ditỹnynyde ibutumy hãlubu-di risebenyre, hãlubu txiwixina ihoòkeki òraruna rexihuòtyhy.

23 Kabede aõmydỹỹnana biu aõmydỹỹnana wesele rare. Tai tahe Kristu tahãlubu-di kia ibutumy risuhore. Tai iratyre tyhymy ihỹre.

24 Kristu heka templo hãbu widỹỹna-ò ralòòre. Kia tahe inatyhy heto aõkõ rare. Biu-ò Kristu ralore Deuxuko-ki kia tahe isỹtyhy rare.

25-26 Tii sohojihyyle heka rare iny òrarureny riixãwididỹỹnykemy rubu-ò rexiwahinyre. Xiwena wedu wesemy aõkõ ralòre. Kia xiwena wedu aõu aõu beòralemy hãlubu-di rara xiwemyhỹre. Kristu tahe sohoji hyyle rubu-ò rexiwahinyre.

27-28 Iny rurumyhỹre sohojihyylemy idi tahe Deuxu ywisidỹỹna hitxinatxu kanakre ibutu iny. Kristu rurure sohojile sòwemy iny òraru ixityre ri-atykemy. Inyò tamy retehemy riraòmehỹre wana, tamy ixityre kanakre òraru ixãwididỹỹnamy iny tarasanarenymy.

10

1 Juhu bede ywina rybe urihimyòle iny ribedeerynyre Kristu aõmydỹỹnamy. Bede ywina itỹnytyhymy aõkõ iny dee roire aõmybo Kristu inydeereny riwinykre. Ubòròròna wesemy inydeereny dobehede bede ywina. Tai tahe tiu iny riòbitinyòtyhy xiwena-di reamyhỹre beòra ihyymy aõkõ.

² Aõkõkeki beòra beòrau idi reaõtyhy. Aõkõkeki sohojihyylemy xiwena riwinykre. Sohoji bedede dÿñnanadile iòrarureny rexihuke. Tahe aõkõre beòra ihyyemy aõkõ xiwena-di reamyhÿre.

³ Tai tiemy òraru-di hyy heka rõhõtinyhÿre.

⁴ Broreni hãlubu, budoeni hãlubu òraruna rahuõtyhy.

⁵ Tai Kristu kabede-ò dehemynydeu, rarybere: –Deuxu, broreni hãlubu budòe hãlubu adee awimy aõkõ ihÿre. Tai tahe waumy teywinymy ahãte axiwenamy aroikremy.

⁶ Kai heka awimy tai tahaõhyte iròdu hãlubu xiwena-ki òraru tuedenamy.

⁷ Tahe jiarÿ rarybere: –Betehe inihe waumy rubu-ò rewahinyraò iwese ritidÿña rybe roimyhÿre wesemy, adeewina ibutumy arityhynykre wahe.

⁸ Tai Kristu juhoo rarybere: –Deuxu, broreni hãlubu budòe hãlubu adee awimy aõkõ ihÿre. Tai tahe waumy teywinymy ahãte axiwenamy aroikremy. Kai heka awimy tai tahaõhyte iròdu hãlubu xiwena-ki òraru tuedenamy. Kia rarybere bedeywina rybe hãrele.

⁹ Tahe ixityre rarybere: –Deuxu kakile watrixeri adeewimy ariwinykemy. Juhoo bitake xiwena ihewoludu ritidikemy, Kristu xiwena wahe.

¹⁰ Kristu rurure iny òraru-ki. Ixiwena sohojilemy rÿire tuhy ramyhÿre Deuxu deewina wahe. Kabede ywidÿña tahe itÿmyra ihÿre. Tai tahe iny riòbitidÿny hyy rarekre.

¹¹ Xiwedÿdu txuõ txuõlemy rixiwenanymyhÿre. Tii tahe tiu inyòraruna ritaõtyhy.

¹² Jesuisi tahe sohojihyylemy òraru xiwena riwinyre. Iny òrarunareny riixãwidinymy rahudi Deuxu rurunawe-ribi ronyre, riwowydynymyhÿreki.

¹³ Tahe Kristu riraòmy ronymyhÿre. Taòludu ruru iribi ritakemy tawarawo-ò Deuxu ritidikemy.

¹⁴ Jesuisi dori sohoji xiwehy-di, iny riòbitidÿnyhyymyhÿre.

¹⁵ Deuxu Tytybytyhy tule kiamy rarybere. Kiawese ritidÿña roire:

¹⁶ –Kiawese bedede ywidÿña tÿmyra rarekre. Wanyrÿ Deuxu ijõmy rarybere: –Wabede ywina irayky wydyna-ki ariritinykre, aritikre wabedeywina iwo-ò wahe.

¹⁷ –Idi ixityre rarybere: Ruxetòena tamy ariwahinykre iòrarutuedenamy. Iòrarureny ibutumy wanohõti-ribi rosakre.

¹⁸ Òraru wanohõti-ribi rosareu, idi rehureu, tiu xiwena rÿiõtyhy tuu rahukemy.

¹⁹ Katahe, waseriòre, rekexiuwaresemy rikirònyrenykre Deuxusÿ-ò. Tamy rekexitòenyrenykre Jesuisi hãlubu dejuxuna òraru-ki sohojile rikirònyrenykre.

²⁰ Jesuisi dori rytÿmyra riraynyre Deuxu-ò wesirahana yra-di ralòkemy. (Iwese xiwedÿdu wedu ralòmyhÿre wese, inyboho wiji ralorenyke.)

²¹ Tule iny xiwe wahidÿdu nihikÿ ijõdireny Deuxu heto-ki.

²² Tai rikitehemynyrenykre inraykytyhy ywinakemy inatyhynatyhymy òbitinatyhymy nohõtmy, rati betyhy ixãwina-di sebena-di inyumyreny.

²³ Inatyhyna rikiyrubunyrenyke inyararòsònareny wahe. Aõbo Deuxu inydeereny riwahinykemy rikiraòrenyke. Tii dori inatyhy rare.

²⁴ Tule widi røkõhõtynyrenyke wiluurenymy rakatxirenykemy wiwiòhedÿmy rakatxirenyke.

²⁵ Uritere ixihitxidÿõmy tamy beahy rakatximahãrenyke. Ijõ dori dohodÿña-ò noderamy reamyhÿre kia awi aõkõ rare. Inyõ ryribi rexidòrarienyhÿkeki, tamy rakarybemyhÿrenyke kòdòòsekemy ixby. Inynyrÿtxu dori iòhòmy resera. Tai tahe sòwemy ròkòtèòsidÿnyhÿke.

²⁶ Iribi inyboho inatyhyna ibutumy rieryrenymy rahudi, tahe kia hãrele heka òraruna-di rariamyhỹkeki, òraruna xiwena roiõmyhỹre inydeereny iny òraruna tarasana wahe.

²⁷ Kia-ribi tule brebu rỹimyhỹre Deuxu ywisidỹnatxu lau. Deuxu heòty ratyradỹdu lau ruberumyhỹre. Kia Deuxu òludu rahukemy rỹimyhỹre.

²⁸ Ruxetòena-di aõkõ inyõ rurure Moisesi bede ywina riywinyõreki. Itxeredu inatxi ada inataõ-di aõbo raryberenykemy. Tai rirubunyre.

²⁹ Kia-di dori mohõtinybenyke. Inyõ Jesuisi rybe-di risinykeki, iratyremy ibinatyhymy rarekre tamy. Tii sòwetyhymy aõhõkỹmy rotỹnykre ibutu ratyre. Inyõ Deuxu Tyytybytyhy ruxetòena aõ aõkõmy idi rõhõtinyre ibinamy tuu rarybemyhỹre. Jesuisi hãlubu aõ aõkõmy idi rõhõtinyre ibinamy tuu rarybemyhỹre.

³⁰ Deuxu kia rarybere: –Txiòhe iny òwydỹdu jiarỹ rare. Inymy jiarỹle arexiòwinykre.

Inyboho rierymyhỹrenyre kiamy rarybemyhỹre. Tii kiawese rare. Tule ijõmy rarybere: –Inynyrỹle tajoi-di ywisidỹna-di riywisidỹnykre.

³¹ Deuxu irumy rare. Tii brebuna-di tyhy rareke. Iu iny tamy ibinakeki, tii dori idi rehuke.

³² Juhuu Kristumy teerytenyete, awimy heka ahãtenyete. Kia-ribi õhõti losarenyõmy. Kristu òraru-ki aõhõkỹmy tatỹnytenyete. Ihãrele tahe Kristu-wana hyy toitemahã.

³³ Inyõ umyreny robireu, tai akireny rutzuenyre, tule akireny òhòte itamadỹnyre. Ityhydỹdu seriòre mahãdu inyõ aõhõkỹmy risỹnyreu, kaiboho tewotòenytenyete.

³⁴ Inyõ ròtenawo-ò ridykeki tai tewotòenmahãtenyete. Inyõ ahõrõ-di rawasinyreu, urile teysate. Ahõrõ dori iratyre sòwemy rỹimyhỹre biubede-ki. Tai aõna aõna tiu rabinaõtyhy. Kia teerymahãtenyete.

³⁵ Uritere araròsòna-ribi awo xierysõmy. Kai dori uriõno nihikỹ bitakre.

³⁶ Ywinihikỹ-di heka rokoireke Deuxudeewimy rikiwinyrenykemy. Tai aõwihikỹmybo Deuxu rarybere, rikitarenykemy.

³⁷ Ritinamy tahe rỹire: –Txiokre inihe. Urihimyò biraòke. Kia kanakre inatyhymy. Tii raroorehenyõtyhy.

³⁸ Waityhydỹdu mahãdu òbiti iruhymy rỹirake, riwatyhynyreki. Inyõ tahe ròðsekeki tamy wadeysaõtyhy.

³⁹ Inyboho heka tahewo-ò òkòsedu aõkõ roire. Ityhydỹdu dori roire, iruhymy nodu, biu-ò hena mahãdu wahe.

11

¹ Aõbohe ityhyna rare. Aõna aõnaõ iny inatyhymy riraðmyhỹreu, kia tahe ityhyna rare. Inatyhymy dori kanakre iny rierymyhỹre, iny tuu robiõlemy.

² Ihetxina mahãdu Deuxudeewimy tuu ihỹre, rityhynymyhỹreki.

³ Juhuu Deuxu aõna aõna bede bedemy riwinyre. Iny inatyhy hynale kia rierymahãrenyre. Deuxu lobixiõna-di ibutumy aõna aõna riwinyre. Idi tahe lobixinamy ròhònyre iny itxerenarenymy. Deuxu rarybere. Tai tahe aõna aõna ritxienyre.

⁴ Taityhydỹna òraru-ki Abeli Xiweõ riwahinyre Deuxu-ò. Kaĩ xiwedỹna ratyre tamy riwahinyre. Abeli rityhynrekile riwahinyre, tai tahe Deuxu reysare, òbitimy rareki. Tai ixiwedỹna Deuxu riwinyre. Abeli tahe rurure. Ihãrele, iwese tii ityhyna-di raremyhỹ wese rokoireke.

⁵ Enoi tatyhydỹna òraru-ki tiu ruruõhyre. Enoi Deuxudeewimy riwinyre tuu Deuxu juhuru rarybere. Aõwesele iõmy reare. Deuxu ridymy reare.

⁶ Inyõ ityhynaõkeki, tiu Deuxudeewimy aõ iwidỹỹõna. Inyõ Deuxudee iòhòmy ratxikeki, tii rityhynymyhỹke inatyhymy Deuxu-wana ihỹre. Deuxu dori tamy rexideòsinykemy ratxireri.

⁷ Noe tule ityhyna dire. Tii hãwò nihikỹtyhy riwinyre. Aõhebo rotỹỹnykremy robiõhyyre. Ihãrele tahe Deuxu rybe rityhynyre. Tai tahe tasỹ mahãdu ritare rubu-ribi. Bedeludu mahãdu tahe rurure. Noe tahe Deuxu riòbitidỹỹnyre, ityhyna òraru-ki.

⁸ Abraõ tule Deuxu rityhynyre. Deuxu ijõ bede-ò diteònydeu, Abraõ irybe riywinyre, rare taijoi-wana. Deuxu tamy rarybere suõ tamy rihitxinykemy isỹmy. Tai Abraõ rexitare, rare ihãwã bede ierykõna-ò.

⁹ Ityhyna-di rasỹnyre kia bede-ki. Tyky heto-ki rahetonymyhỹre iwese ijõ bedeludu wixira mahãdu rahetonymyhỹre wese. Ibede rarehãrele tahe ihõrõmy aõkõ rõhõtomyre idi tuu aõkõ rexinohõtinyre. Tariòre Ijai, Ijaò-wana rasỹnyre. Tamy tule Deuxu rarybere iwese tyby-ò narybede wesemy.

¹⁰ Abraõ tahe hãwãõ riraòmyhỹre. Deuxu widỹỹna hãwã biu ludu-ki. Kia hãwã Deuxu nohòti-ribi nyide. Kia hãwã dori tiu rabinamy rejuxunyõtyhy ihetotira kyhyna direki.

¹¹ Sara ityhyna dire. Tai ruru dire uladusemy ronykemy ibeòra sòwere hãrele. Tii tahe rityhynyre tuu raryberemy.

¹² Sara iòhòmy irubu roire rasenadunyreki. Ihãrele tahe sòwemy rariòreriòrenyre. Iwese taina rudera wese, ÿnyra sòwewese.

¹³ Kia heka ibutumy rityhynymyhỹre. Idi tahe ituerenyre aõ heka rimoõre Deuxu rybe lidisinaõ. Ireheribile tuu robirenyre; reysarennyre. Tiibohe rarybemyhỹrennyre kabede ludu mahãdu aõkõ raremy, isỹrenny mahãdu aõkõ raremy.

¹⁴ Tii heka rarunymyhỹre sỹwihikỹmy tai raerymyhỹre tuu rarybereki.

¹⁵ Tamy wikeki riòkeserenyra inihe tahe aõkõre, noderare.

¹⁶ Wiji tahe tii sỹwihikỹmy biu-ki rarunymyhỹre. Tii dori ijõ ratyre rare. Deuxu isỹ wihikỹ riwinyre tai tahe inyõ iDeuxurenymy rarybekeki, tai Deuxu tiu raixỹruõtyhy.

¹⁷ Deuxu Abraõ urihixina-di reareu riwahinyre Ijai xiwenamy. Tariòre sohoji riywinymy rỹire xiwenamy rurukremy. Tii Deuxu rybena-ki iriòre rarehãre.

¹⁸ Deuxu dori juhoo rarybere: –Ariòre Ijai ariokoretybimy rarekre.

¹⁹ Abraõ rieryre Deuxu iruru dire rubu-ribi riixixadỹỹnyke, tii Deuxu rityhynyreki. Abraõ dori rõhõtomyre rawasenanyre. Ijai juhoo rubu-ribi ixixa wesemy reare, raumynyre.

²⁰ Iribi tahe Ijai tyhyna-di rarybere Ijaò dee, Ijau dee aõbo kabede-ò kanakremy aõwihikỹ wahe.

²¹ Iribi tahe tule Ijaò rarybere Jyje riòre dee, tariokoreboho-ò. Ityhyna-di rarybere. Ijaò iòhòmy rubu-ò ihỹre, òwòru-ò reximymy rariamyhỹre. Tahe òwòru-di rexilamadỹỹnymy rỹire rexitòenykemy Deuxu-ò, riwowydynyremy wahe.

²² Iribi tahe tule Jyje iòhòmy rubu-ò ihỹre. Tule ityhyna-di rarybere judeu ijoi Egito bede-ribi kòdòhònykemy. Tule tahe tarybe ririre titxibo itityby rỹikremy.

²³ Iribi tahe Moisesi reareu, tybyboho iseboho riwòrennyre inataõ ahãdumy tatyhynarenny-di ihỹrennyreki. Moisesi itohouã ruxerare. Iòlò rubudỹỹ bede ywina rybemy rarybere. Moisesi tyby-wana kia bede ywina rybe lau ruberuõhyyre.

²⁴ Moisesi raumynyre, Faraò riorerioresmy noderare tii tatyhydỹỹna òraru-ki.

²⁵ Tii heka tamywire Deuxu erydu mahādu-wana aōhōkỹmy rotỹỹnykre. Urihimyò òrarumy reòwarike derare heka rare.

²⁶ Moisesi, Egito bede-ki aōna aōna wiwihikỹ rỹiramyhỹ derare. Iny tamy aōmy rarybehinamyhỹre. Tahe ibinamy rōhōtinyōmyhỹre. Kristu dori riraòmyhỹre, biu-ki uriōno idi rōhōtinymyhỹre.

²⁷ Moisesi Egito bede-ribi rōhònyre, ityhyna direki wahe. Ruberuōhyymyhỹre heka tii iòlò deburehekỹ lau. Iwese Deuxumy lobixiōnadu iko-txi robire wesemy, rōhònyre. Tii tahewo-ò ròðseōhyre.

²⁸ Moisesi heka Deuxu rityhynyre. Tai tahe pascoa worana bedehesi riywinykemy beòra beòramy rarybere. Hālubu ijò-ò ritxiwire. Tai ýju heka iny riòre delareny rirubunyōre. Egito riòre delareny rurure tai.

²⁹ Iwese surubu tyre-di reurore wesele judeu mahādu Ahobesò rawo-di reurore beòlemy. Iu Egito mahādu reuròkemy rareu, urile bee idi raratòbòre. Kia riwinyreny ityhydỹỹnadireki.

³⁰ Ijeriò hāwā mana òtity nihikỹ resere judeu mahādu rityhynyreki. Debò inatxi reurò txuumy hāwā rora-ki rariare tahe resere.

³¹ Raabe heka hāwyy uriuri ixidinodu rare, wedena wahe. Tahe Deuxu tyhydỹỹdukòdu mahādu rexihureu, Raabe ruruōre tatyhydỹỹna-ki. Bede-di itxeredu riwòreki.

³² Timybohe ijōmy ararybekre? Wasirare heka ibutumy tuu ararybekre, sōwereki. Kideō ijo, Barake, Sansaō, Ijete, Davi, Samueli, tule Deuxu rybemy rybedu mahādu sōwere.

³³ Kaheka ibutumy riwinyre tyhyna-di. Ijō iòlòhāwā-di rahỹỹnanyre. Òbitina riwinyreny. Ritareny aōmybo Deuxu rarybere. Leaōry dori rirarytxinyre.

³⁴ Rirònyre heòtywo-txi ihārele ruruōreny. Mayrehe rubudỹỹna-ribi rixitareny. Bina-ribi ixyby rarurunyreny. Ijō aōbina-ki irurudityhymy ratximyhỹre. Tai sōwemy aōbinadu iribi rahenyre.

³⁵ Tasỹō rubu-ribi riixixanyre hāwyyō rityhynyreki. Ijō mahāduō aōhōkỹmy dỹỹnana-ki tamy reare. Ixitarasamy rōhōtinyōhyre aōhōkỹmy dỹỹnana-ribi. Tii dori umytuedeōna wihikỹ-di rubu-ribi rexixakredi rōhōtinymyhỹre.

³⁶ Ijō ityhydỹỹduō idi rybe jei jeina-ki ratximyhỹre. Tule tai òhòte rỹire reruti òhòte-di. Tule ijō womati reroti-di rataataare, ihyymy idi rehure ròtenawo-ò.

³⁷ Ijō mana-di riwere. Ijō sehòtxi-di riwetyaòròre, wiere riatyre. Ijō mayrehe-di rirubunyre. Ijō ityhydỹỹdu-ò budoeniy-di watxinityy-di idi rexityynyre, rama risareny, aōhōkỹmy risỹnynyre inyō tòtxi ririōhyre. Ijō heka aōbinalemy tamy reare.

³⁸ Kia ityhydỹỹdu mahāduō ibutu iny ratyre Deuxu dee wire. Kabelududu ityhydỹỹdukòdu mahādu wese aōkō tiìboho roire. Hāwālòmy, bederahymy, hāloomy, kia ibutumy bede-di rariamyhỹre iwese iny isỹkōmy rỹire wese.

³⁹ Ibutumy iribi rakaraykynyrenyke tiìboho dori inatyhynarenydireki. Tahe urile Deuxu rybe wahisidỹỹna ritaōmyhỹreny.

⁴⁰ Deuxu dori iny-ò riraòmyhỹre Kristu dehemynyna wahe. Ihewo-ribi tahe kia inydeereny riwahinykre, wiwanahyyle. Tai tahe idi awityhymy iny ibutumy rōhònykremy.

12

¹ Sōwere inydireny itxeredu. Iny robirenylemy rỹirerimy ihỹre. Tai tahe tako-ò rekekoamyhỹrenykre. Deuxu dori inydeereny riwahinyre. Òraru

iutxiere inykireny rỹire. Tai tahe rikiatyrenyke òraru ibutumy inyboho dori rimymyhỹreny.

² Jesuisi-ò sohojile reketehemynyke. Tii dori inatyhydỹna deledỹdu rare tule inatyhydỹna konanadỹdu rare. Jesuisi deysana kanakredile rōhōtinymyhỹreny. Tai tahe rahōtinymyhỹre. Tai tahe aōhōkỹmy rotỹnyre, itxeò nihikỹ-ki rurure. Tai tahe ixỹru tamy reaōhy rurureu. Wiji tii ronymyhỹre Deuxu ryna ruruweribi-ki.

³ Jesuisi dee hābu binahakỹ aōbinamy reare. Tahe rawobinarybenyōhyre. Tai tahe idi rōkōhōtinynyke iwese rakatxirenykemy. Uritere bede worenỹmy bede òtiidỹnyōmy.

⁴ Boholabenyke, òraru ijesu òraru-ki inyō aribireny ruruōhyymy ihỹre.

⁵ Deuxu tariòre dee rybe wesele adeereny rarybemyhỹre. Kia-ribi aōbohe òhōtirenny rosara. Kia wese Deuxu rarybera: –Wariòre, araòbitidỹnyre, uritere adebureōmy, alisina aōkō dori rare. Deòsana rybemy adee ararybekeki, uritere bedewoōmy.

⁶ Deuxu dori aluurekile araòbitidỹnykre. Deuxu tariòre wesemy inyō rimykeki, aōhōkỹmy risỹnymyhỹre iòbitidỹny.

⁷ Tybydiò aōbohe uri tariòre-di uri aōbohe tyby idi rỹira tariòre riòbitinyōmy? Aōkōre.

⁸ Ibutumy iny òbitidỹny Deuxu rurumyhỹre. Inyō òbitidỹnadiòkeki tii iriòre inatyhy wesemy aōkō rare.

⁹ Tule inytybyreny inydeereny retehemyhỹre inyboho riòbitidỹnymyhỹreny. Tai tahe iny riywinymyhỹreny. Deuxu tahe inytybyreny rare. Inytybyreny ratyre tahe tuu rikiywinyrenyke, tahe irumy rokoireke iurenana.

¹⁰ Iny tybyreny urihimyo bededỹnana-di riòbitidỹnyre iwese tamywiny rōhōtinynyre wese. Deuxu tahe iny riòbitidỹnyre rekexiywinyrenyke. Iwese òbitimny tii raremyhỹ wese rokoirekemy.

¹¹ Inyō òbitidỹny deramy reakeki, tii deysamy aōkō rareke. Òbitidỹny bedewona-di rare. Rexihuredi, tahe wiòhedỹny reamyhỹre modeebo reamyhỹreò, irumy ywina-di rarehyke.

¹²⁻¹³ Kai bedewokeki, aumy-di, arayky-di iruruòra, ihārele tahe birurudỹnymy bimyke. Ati tule iruruòre ihārele tahe, myike òbitimny. Betehemy, biywinyry ryòbiti-di mariake. Tai tahe ijō iny reyterenykre, raòwenyōtyhy.

¹⁴ Ainytyhymy inydee ibutumy ahābenyke tule bexiòbitidỹnymy ahābenyke. Iny òbitimny rỹiòkeki, tiu Deuxumy robiòtyhy.

¹⁵ Inyō tahewo-ò Deuxu ruxetòena-ribi ròòseke lau kaiboho bexiebenyke. Tule amahādurenny-ki alòbòrònahyre wesemy inyō ihỹke lau kaiboho bexiebenyke. Kiakeki, sōwemy iny rahyrenyke òraruna uri wesemy.

¹⁶ Tule bexiebenyke inyō òta òta òraru-txi reseke lau ada Deuxu tōhōti ribi rosake lau. Ijau tahe Deuxu-di rōhōtinnyre. Tyby rurukreu aō tarasana-di tii rohonyre byrena sohoji òwylemy tahelỹna-ò rohonyre.

¹⁷ Iribi tahe òhōtirenny losarennyōmy. Tii dori rōhōtinnyre taaōwi-di ixiby imynymy reare. Tahe aōkōhyre rahinyrehārele. Rabedewomy ronyre Ijau dori rỹsỹna deròwmy taaōwi riwahinyre taexi-ò. Inyboho tahe rekexiywinymahārenyke itxỹte lau.

¹⁸ Deuxu tabede ywina rybe heka judeu mahādu-ò riwahinyre, tiiboho Sinai hāwālò heòtyko-txi rỹire. Sōwemy heòty bedeluru yhynihikỹ tai reare. Tiiboho rubuerurenny. Kaiboho tiu breburennyōmy ahābenyke iwesereny.

¹⁹ Txurònaò rurònyre nihikỹmy. Tule rybeò rarybere. Iny ibinamy tai rōhōtinnyre. Tai tahe riixāwidinykemy Deuxu dee rarybere.

²⁰ Iròduõ hãwãlò-di tawa ritidikeki, iny mana-di tamy rehuke irubudỹỹmy Deuxu rybemynamy.

²¹ Tai tahe iny tahewo-ò rexihejire brebumy. Moisesi tule, rexiòhãrunyre tuu robireu. Ramytatamy brebumy.

²²⁻²³ Kaiboho dori iwitxira hãwãlò-ò tetehemynyta, Siaõ hãwãlò-ò, Deuxu hãwã-ò. Kia biu-ki Jerusalẽ rare. Sõwetyhymy tai ýju mahãdu rỹire bede hesina-ò. Ibutu butuna rare. Deuxu riòre sohojile butuna-ò tehemynyte, dohodỹỹna mahãdu wahe. Ibutumy ityryiti-ki ini roimyhỹre tamy rehemynyre. Deuxu-ò tehemynyte ibutumy erydumy ratximyhỹreò. Inyhỹkỹna mahãdu òbitimy rỹira mahãdu-ò tehemynyta.

²⁴ Tule Jesuisi-ò tehemynyte. Tii iny lobitỹmyradỹỹdu rare. Ihãlubu-ò tehemynyte. Abeli hãlubu ratyre awimy ihỹre. Jesuisi hãlubu dori inydee aõwiwihikỹ rare iny òrarureny òraru-ki dori ritxiwire iny riòbitidỹỹnykremy.

²⁵ Boholabenyke Deuxu rarybemyhỹreu, boholabenyke. Kia Deuxu roholaõmyhỹre mahãdu, rexihumyhỹre kabede-ki. Tii biu-ribi narybedeò, rokoholaõrenykeki, tule inyboho rekexihurenyke. Inydeereny aõnityhykre.

²⁶ Iu rarybereu, bede ramytatatyhyre. Tahe tii rarybere: –Sohojimy ixityre bede biумы arimytatadỹỹnykre.

²⁷ Kiamy heka rarybereri. Aõbo relemy, urile ixãwikre aõbo ixãwidikõnalemy rỹirakre.

²⁸ Tai tahe Deuxumy rikiàlàrenyke. Inyboho dori Iòlònasỹõ rokoirenykre kia rỹihyummy rarekre. Iwese Deuxudeewire wese rikiàlàrenyke ityhyna-di òhãruna-di.

²⁹ Deuxu ykarana dori heòty riworonymyhỹre wese rare.

13

¹ Ityhydỹỹdu seriòre wiluummy ahãbenyke.

² Aõtxile aroraluduõ bimyhymy ahãbenyke. Inyõ kawese risỹnykeu, ýju dori riwiòhenanyre, rieryòhyyre mobo rare.

³ Ròtenawo-ki rỹire mahãdu-ribi nohõti losarenyõmy. Iwese kai tii-wana atximahã wesele, aõhõkỹmy botỹỹnykre. Aõbinahakỹlemy tamy reamyhyre mahãdu-ribi nohõtilosaõmy. Iwese inyõ adeereny aõbinahakỹ riwinymyhỹre weselemy idi mohõtinybenyke.

⁴ Ibutumy bityhynybenyke ahãwymy herina, hãbu tahãwyy-wana sohojile roiike. Deuxu dori aõhõkỹmy risỹnykre òta òtana nodu tule òbitimy raòdònyõre mahãdu ixi-di ròtemy aõkõ boibeki.

⁵ Aõnihikỹ nieru tarasamy ixinohõtidiỹỹrenyõmy. Aõbo akireny rỹiredile, beysabenyke. Deuxu dori rarybere: –Tiu kaiboho wanohõti aribi rosaõtyhy. Tiu heka araatyrenyõtyhy.

⁶ Tai tahe rikityhynymy rakaryberenyke: Inynyrỹ iny wiòhedỹỹdurenyre. Tai tahe tiu rukuberurenyõtyhy. Inyõ wadee aõbina riwinyõtyhy.

⁷ Aerydỹỹdureny-ribi nohõti losarenyõmy, tii adeereny Deuxu rybe rotohodỹỹmyhỹreki. Aõbo iruna konana-ò riwinymyhỹredi, mohõtinybenyke. Iwese inatyhyna-di rỹimyhỹre wese kaiboho inatyhyna-di atximahãbenyke.

⁸ Kanau, wiji, Jesuisi Kristu wiwesele ratxireri. Tiiemy iwesele rarehykre.

⁹ Deuxu ruxetòena ixinamy arayky rirurudỹỹnyke. Roxina bede ywina wiòhena aõkõ ratxireri. Kia heka moo tiu riwiòhenanyõhyre.

¹⁰ Inyboho ixiwena witxiradirenyre. Iribi tyby hetowo xiwena widỹỹdu mahãdu riroxiõtyhy.

¹¹ Iròduõ didyde tykyhetoworanora-ki hãlubu ritxiwikemy. Xiwena widỹỹdu mahãdu wedu tuu ritxiwire òraruna tuedenamy. Uritere iròdu umy hãwã òtity webrò-ribi riwòsinyre.

¹² Tai tahe Jesuisi tule hãwãhãkỹ ijò webòrò-ribi aõhõkỹmy rotỹỹnyre, iu tahãlubu ritxiwireu inydeereny tõemy, iny riòbitidỹỹnykemy.

¹³ Rokoirenyke tahe tamy hãwã webòrò-ribi rikimyrenykemy iixỹrunayreõ.

¹⁴ Inatyhymy inydeereny tiemy hãwã kabede-ki ihoõre. Tahe inyboho riraòmyhỹrenyri biu-ki ijõdikre.

¹⁵ Jesuisi òraru-ki tahe Deuxu rikiwowydynyrenyke. Kia iny xiwena wahidỹỹreny rare tamy. Tii iny rityhynyrenymyhỹre, tai tuu rekealãrenyke.

¹⁶ Tiu rikiwinyrenyke aõwiwidỹỹ. Tii Deuxudeewire. Tule wii riki-wiòhenanyrenyke.

¹⁷ Aerydỹỹna mahãdu biywinybenyke. Bityhynybenyke. Tiiboho dori aijesedureny ratximyhỹrenyri. Tii idi Deuxu-ò rirawyònymyhỹre. Kaiboho bityhynybenykeki, tii teysamy raaõmysỹdỹỹkre. Aõkõkeki bedewomy ratxikre. Tai arawiòhenanyõtyhy.

¹⁸ Wakireny bexitòenyhyymahãbenyke. Jiarỹboho wodeysanale-di rahõtinyimahãre, òbitina widỹỹdu-di rahõtinyimahãreki.

¹⁹ Tule Deuxu-ò bexitòenyhyyke jiarỹ ele elemy adeereny aròserenykemy.

²⁰ Inynyrỹ Jesuisi Kristu heka Deuxu rubu-ribi riixixadỹỹnyre. Tii iny-di itxeredureny nihikỹ rare. Budoeni-di itxeredu weselemy inydireny retehemyhỹre. Tii tahãlubu ritxiwire iny-wana bede ywina iixihudunakõna riwinykemy.

²¹ Deuxu adeereny ibutumy riwahinyke tamy wimy kaiboho biwinybenykemy. Kia heka wadeewire. Jesuisi Kristu-ò wowydyna ibutumy rarehyykemy watximahãre. Kie.

²² Waseriòreboho, kia watyryiti nihiỹmy aõkõ rewinyre. Tai tahe ywinamy idi boholabenyke rybe wiòhedỹỹna rybe tahe rare.

²³ Iny seriòreny Tximòtxi heka ròtena-ribi riteònyrenyri. Ele elemy kanakeki, rakre wawana arorarenymy.

²⁴ Wawehityyna rybe ibutu dohodỹỹna mahãdu-ò biwahinykre, aerydỹỹdu mahãdu-ò tule. Italia bede ludu mahãdu irybe wehityhyna adeereny diwahinyde.

²⁵ Deuxu ruxetòena akireny ratxikemy watximahãre.

Txiau Txiau Ryberiti

¹ Jiarÿ Txiau rare. Deuxu Jesuisi Kristu Inynyrÿ-wana deòdu rare. Ròritidÿÿreri Deuxu mahãdu inatyhy-ò. Ubÿtÿmy iny rÿira mahãdu-ò. Warybe weityhyna adeereny rewahinyreri.

² Waityhydÿÿdu aõna aõnasira seriòre, araurihixinanykeki adeereny kanamyhÿkeki, beysamahãbenyke.

³ Kia-di tahe ityhydÿÿdu tyhymy beleke.

⁴ Aurihixina ixinamy rexiòlònyke atyhykemy. Ixinamy kanake araurihikemy. Tai tahe raòbitidÿÿnykre adee aõ rasiranyòtyhy.

⁵ Inyõ bedeery ihoõkeki, rexitònykre Deuxu dee, tii dori ibutu dee riwahinyhÿre. Inyõ lau dori ritòenyòhyymhÿre.

⁶ Urile tii iseòdÿÿõmy bexityhynomy tamy bexitònykre. Riseònykeki yhy òbò-di tiò rehumyhÿre wese rare.

⁷⁻⁸ Kia hãbu iòreki, awimy aõkõ aõhebo rotÿÿnomyhÿre ywiòreki, tii Deuxu-ribi aõ ritaòtyhy, irybe inatxire.

⁹ Iny aõ ijòkõmy rÿimyhÿre, teysamy rÿirake, aõ ijòdikreki Kristu dori rityhynre. Kia iaòdimy ityhymy rÿira, tule teysamy rÿike ityhydÿÿdumy. Rÿiraki aõ ijòðkre hãre.

¹⁰ Ityhyna heka iny-ribi wylemy ituemyhÿre kie iwese noijese ramoròmyhÿre wese. Tahe ityhydÿÿdu mahãdu dee kia aõ aõkõ rare.

¹¹ Txutòteetyhy ròhònymyhÿre dori alòbòròna rimoròdÿÿnomyhÿre. Tahe noijese rejuxunomyhÿre. Tahe iruxerana riixãwidinyhÿre. Kia wesele hãbu ityhymy rÿire rexihumyhÿre. Aõhebo rotÿÿnomyhÿre wetyatxile.

¹² Urihixina inyõdee kanakeu, tahe ijesu binaõ wesemy ritakeki. Tai tahe tii reysakre. Tii tahe umytuedeõna heka Deuxu-ribi ritakre. Deuxu dori kia wahidÿÿnamy rarybere taluunadu mahãdu dee.

¹³ Inyõ aõbina bina ixirana-di rexirakeki. Tii rarybeòtyhyke Deuxu riixiranomyhÿremy. Inyõ dori Deuxu tiu riurihiòtyhy. Tule Deuxu riixiranyòtyhy aõbina bina widÿÿ-di. Ixiradÿÿdu aõkõ tii rare.

¹⁴ Kiawese iny ixiribile rexirake, aõ-di sòwemy ròhòtinykeki, tii arabònyre, araitxenanyre.

¹⁵ Kia urari-ribi tahe òraruna ròhònymyhÿre. Iribi tahe òraruwidÿÿna-ribi rubu rÿimyhÿre.

¹⁶ Ixitxenadÿÿõmy waluuna mahãdu, waseriòre mahãdu.

¹⁷ Wahidÿÿna ibutumy bedeerydÿÿnatyhy Deuxu biu-ribi diwahinyde kia ibutumy loosònatyby-ribi naderi. Tiu heka rawitxiraòtyhy, tii aõu aõu iwe-selere.

¹⁸ Tii iny ixityre riwinomyhÿre ritÿmyranomyhÿre tatyhyna rybe-di. Tai ibutumy iwidÿÿna-ribi inyboho juhuurenyre, awirenyre.

¹⁹⁻²⁰ Idi mohòtinybenyke waluu waseriòre mahãdu. Ibutumy bexiwinymahãbenyke iny-ò boholamyhÿbenyke, tahe aõwimy aõkõ marybeke lau, wymy adebureõmy. Hãbu debure-ribi Deuxu òbitina rahenyòtyhy.

²¹ Abinamy aõhebo tutÿÿnomyhÿte ixi-ribi bitake idi biatyke. Tahe Deuxu rybe-ò boholake, kia dori iruruna dire atytyby kanatakemy.

²² Kaiboho bede ywina widÿÿdumy, bede ywina tyhydÿÿdumy boibeke. Aõ ijohonadu mahãdulemy aõkõ boibeke. Kiawesekeki bexiitxenanyke.

²³⁻²⁴ Inyõ ijohonadule ronykeki, rybemynamy nodu aõkõ rare. Tii hãbu itxerena-di itxerenadu wese rare. Itxerena-di ixidee retehereu, rexierye iwese raremy. Tahe rexitareu, aõwesele ixi-ribi tõhõti rosare timybo tii rare wahe.

²⁵ Inyõ tahe bede ywina òbiti-ò retehemyhẽreki, rityhynymyhẽreki tii tahe teysamy ratxikremy ibutumy aõhebo rotỹnykremy. Tii dori ijohonamy nohõti losadu aõkõ rare. Bede ywina rybe widỹỹdu rare, ityhydỹỹna wahe.

²⁶ Inyõ bede ywina rybe widỹỹduõmy rõhõtinkyeki, tahe tòròtò riyrubunyõhyymyhẽkeki, tabedeywidỹỹna aõ aõkõ rare. Tii tawokile rexiitxenanymyhẽre.

²⁷ Iny Deuxu, Inytyby-ò kia bede ywina widỹỹna òbiti rare. Uladuwyte, wytese-wana riwiõhenanykemy. Tule aõbina bina aõmydỹỹnana widỹỹõmy.

2

¹ Waseriõre mahãdu, kaiboho Inynyrỹ Jesuisi Kristu, tetyhynytenyete loosõna wedu tii rare. Tai iny wiribi lahitxiõmy, wiweseweselemy iny-di atximahãbenyke.

² Kie inyõ tahe dohodỹỹnawo-ò kanalòkeki, womati debo tỹrỹrỹ-di tywihikỹ-di kanalòkeki, tahe tule iny aõkõdu mahãduõ kanalòkeki.

³ Kai tywihikỹ dinodu-ò marybekeki: Kaò bodonyke rynawihikỹ-ò. Tahe marybekeki iaõkõ-ò: Kiakile myike lamalemy ada bede-txi aõbo bonyke.

⁴ Kia wese wiribi hitxidỹỹ-ki tatỹỹnymyhẽtenyete, araykyreny rabinamy kia wese tumahãre.

⁵ Boholake, waseriõreboho, kaiboho juhoo iny aõkõ mahãdu wese toite. Iribi ityhy ityhydỹỹdukõdu mahãdu iaõrarumy roirekemy, kaiboho Deuxu weselemy tadeletenyete atyhyna òraru-ki. Aratamyhẽrenyete inatyhyna-di ityhydumy boibekemy, tule kaiboho kowa biu-ò hena bitabenykre. Deuxu dori rarybere: –Waluudu mahãdu tuu arisỹnykre.

⁶ Kiawese, kaiboho urimynodu derarenyete aõhebo tatỹỹnyteri. Ityhy mahãdu tahe ararutỹkỹnymyhẽre tule aradyrenymyhẽre soldadu dohodỹỹna heto-ò.

⁷ Tiiboho tule Kristunimy aõbinamy rarybemyhẽrenyete. Kaiboho ini-di texininimyhẽtenyete.

⁸ Kia bede ywina rybe-ki roire: iwese ixiluure wese, aerykõdu mahãdu luuke, wiery mahãdu wahe, abireludu wahe. Kia bede ywina biywinykeki, awimy botỹỹnymy mabeke.

⁹ Tahe iny wiribi lahitxinykeki, taõrarunyteri, teywinyõteri. Bede ywina aõkõ atximahãte.

¹⁰ Inyõ tahe bede ywina rybe ibutumy riywinykeki, tahe sohoji aõmydỹỹna riywinyõreki, tai tahe bede ywina rybe ywidỹỹdu aõkõ ratxireri.

¹¹ Deuxu tarybe ririre. Kia rarybera: –Òta òta widỹỹõmy. Tule rarybera: –Rubudỹỹõmy. Tai òta òta biwinyõkeki tahe inyõ terubunyteki, kai bede ywina rybe yrubudỹỹdu aõkõ atxiteri. Òrarudumy tate.

¹² Iwese iny bede ywina rybe-di tỹmyra ahãbenyke. Deuxu dori bede ywina-di arararutxỹnyrenyete. Taita òbitimy botỹỹnybenyke, marybebenyke.

¹³ Inyõ riwotòenyõmyhẽkeki, tule tamy riwotòenyõleke tawiribihitxinatxu-u. Wotòedỹỹna wiribihitxina ratyre rare.

¹⁴ Waseriõre mahãdu, inyõ rarybekeki: –Jiarỹ watyhyna ijõdire. Tahe iaõmydỹỹna wihikỹ-di aõkõ rare. Kia tahe aõ aõkõhyky heka rare tamy. Ityhynale kahãbu ritakekõ aõbo. Tahe reruinyreri.

15-16 Inyseriòreõ tyy, rÿsÿna ihoõke-wana. Tahe inyõ tamy rarybekeki, ywina-di bòhònyke, aheto-ki biroxikemy. Tahe aõ riwahinyõra tyy, rÿsÿna-wana. Aõbohe irybe rare. Aõkõhykyre irybe.

17 Kiawese taheka kia hãbu inatyhyna rare, iaõywidÿÿna ihoõkeki kia ityhyna ihoõke wese rare.

18 Inyõ rarybeke-wana: –Kai atyhyna dire. Jiarÿ waõwidÿÿna ijõdire. Biteòsinyke wadee atyhyna sohojile tamyreny wina-di aõkõ. Tahe jiarÿ tamyreny waywina-di adee ariteòsinykre kia òraru-ki bobike jiarÿ Kristumy retyhynrerimy. Watyhyna iny idiõre waõwidÿÿna ijõõre-wana.

19 Kai bityhynyke Deuxu sohojile raremy. Kia tahe awire urile diabo tyytybybina tule Deuxu rityhynyre. Tai ilau ruberumyhÿre.

20 Inatyhyna iaõmy widÿÿnana ihoõkeki, aõ aõkõ wese rare. Kia tetyhynyõlemahãte aõbo, hãbu itxÿtere.

21 Inylabiereny Abraõ tariõre-di Ijai rixiwenykemy idi ratximyhÿu, kia-ki Deuxu riòbitinyre.

22 Tabimahãte aõbo. Abraõ tatyhyna iwidÿÿna-wana aõna aõna riwinyre. Ityhyna riwiòhenanyre.

23 Tahe iwese ritidÿÿnamy roire wesemy tuu rotÿÿnyre aõmybo heka rarybera Abraõmy: –Boholake, Abraõ heka Deuxu rityhynyre. Tai Deuxu tii riòbitidÿÿnanyre. Tule, Deuxu tabiòwamy rininire.

24 Betehebeny ini. Inyõ iòbitidÿÿmy ronyke-wana inatyhyna sohojidile aõkõ tii ihÿke, tahe iwidÿÿna-di tule wahe.

25 Ijõre tahe: Raabe, aderanamy raremyhÿ. Iribi tii Deuxu rybedeòdu mahãdu riyrubunyra rubu lau, tahe riteònyre rywasi wixira-di. Kia widÿÿna Deuxu Raabe riòbitidÿÿnyre.

26 Iwese umy tyytyby-di aõkõ rubumy rÿimyhÿre wese, tule inatyhyna sohojile aõ aõkõ rare tamywina-di aõkõreki heka rubu wese rare.

3

1 Uritere, waseriòreboho, bedeerydÿÿdu mahãdumy aõkõ ixi-di norenykõmyke. Ibede ònana hitxina txuu dorihe aõnihikÿkre bede erydÿÿdu mahãdu dee.

2 Inyboho ibutumy sõwemy òraruna-txi aõu aõu resemymhÿnyre. Inyõ tarybe-ki raòrarunyõkeki, tii iny òbiti rare.

3 Iwese awaru iny riraòmyhÿre wese taumy ibutumy riraòmyhÿre. Awaruru-ki juraròsòna rirutymyhÿreu, tii iraròsòna-di rare. Tai tahe awaru iny riywinymyhÿre iumy ibutumy iny riraòmyhÿre.

4 Betehebenyke iny heòty lawò nihikÿ-ò iraròsòna iyjatyhyre tahe iraròsòdÿÿdu idile riraòmyhÿre titxibo inonana-ò yhy nihikÿ iwetxi kedeakreki, ihãrele iraròsòna riraòmyhÿre.

5-6 Iwesele iny dòròtò rare. Iyjatyhyre ihãrele aõnihikÿmy rarybemyhÿre. Betehebenyke iny heòty helÿÿresi iyjare, ihãrele òtiranihikÿ ritoonymyhÿre. Dòròtò tahe heòty wese rare. Sõwemy heka òraru riwinymyhÿre. Dòròtò bede aõmydÿÿnanabina dinodu wese rare, inyumy susudÿÿdu dòròtò rare. Sõna bede tòtee-ribi diabo mahãdu-ribi heka nade.

7 Ibutumy iròdu brebuna, nawii wixira wixira, iròdu beraludu, utura, riinytyhydÿÿnymyhÿre. Iny mahãdu iratyre irurudÿÿna dire.

8 Inydòròtò inyõ tahe riinytyhydÿÿnyõtyhy. Ibinatyhy rare. Rubudÿÿna uri-di ratxireri.

9 Inydòròtò-di Deuxu inytybymy iny reàlãmymhÿre tule idi inumy rajõmomymhÿre. Deuxu ixiwesemy iny riwinyre, ihãrele iny wimy rajõmomymhÿre.

¹⁰ Inyõ tary-di Deuxu rirowòdydynmahãre tule idi ujõmomy reamyhỹre. Waseriõreboho, kiamy aõkõ idi boibeke.

¹¹ Beijirana-ribi ibree ihỹre-wana wiule heka ròhònyõtyhy.

¹² Òwòru inatxi wiribi lahixire. Ijõ aõbo wiraty-di raratynyke aõkõre? (Figueira azetonamy raratynyõtyhy) Videira figomy raratynyõtyhy. Juwyrabe hãloo-ribi bebreke ròhònyõtyhy.

¹³ Inyõ bederykeki ibedeernadikeki, tii ywimy ratximyhỹke. Ibutumy òbitimy ratxirerimy aõ riwinymyhỹremy rexityhynymy ixidi ròhòtinyõtyhy tyhymy rabekemy.

¹⁴ Kaiboho awo-ki ixiburena ijõdikeki, inywitzira hãrosu ijõdikeki tai tii deysamy atxiõke tai tuu marybeõke. Kai ruiwidỹõmy.

¹⁵ Kia bedeeryna biu-ribi aõkõ nade, bederibile, iny hãrosu diaboribile nade.

¹⁶ Inywitzira hãrosu ijõdike-wana, tai jei jeina rare. Ibutumy aõbina bina.

¹⁷ Bedeerydỹna biu ludu juhule òbiti rare, idi ywina rare, rutaõna rare, wityhyna rare, ruxetõena rare. Awihyymy nodu widỹna rare.

¹⁸ Òbitina aõu aõu kanakre ywinawidỹdu-ò. Iwese aloborodu rehumyhỹre wese, tiiboho ywinamy rekoamyhỹreny.

4

¹ Aõherekibo ayreny-ki jei jei rỹimyhỹre. Awo-ribi namyhỹde araykywydyna ribi.

² Kai sõwemy aõdikemy tahõtinyinmahãte aõhebo aõkõ tetate. Tahe terubunymahãte. Inywxira aõmydỹna-di òbire, tahe aõkõre. Tai aõbina tete-lenymyhỹte ijei jei-di. Aõ ijõõre textiõenyõma hãteki.

³ Textiõenyteki, tetaõmahãtenyete. Teõsamy dori textiõenymahãtenyete. Ixidee sohoji dehunalemy tahõtina mahãtenyete aumydeewimy behukelemy.

⁴ Bede aõmydỹnana luudu mahãdu heka Deuxu òludumy ihỹre. Kia aõbo teeryõtenyete, òbitiõna, mahãdu. Inyõ bede aõmydỹnana bina biòwamy ratxikeki, Deuxu òludumy rare.

⁵ Aõ aõkõ aõbohe rybe riti kawese roire: Aõhe rare. Deuxu taTyytybytyhy inywo-ki heka Deuxu risỹdỹnymyhỹre. Tai tahe iny-di riijetyhymy ratximyhỹre. Aõbo heka kia rare?

⁶ Tii tahe iny rirurutedỹnymyhỹre. Kawesemy ritina rarybere: — Ixiwedu mahãdu heka Deuxu ixi-ribi birehedỹnymyhỹre. Tahe ruxetõena sõwemy ixiwedekõ mahãdu-ò riwahinymyhỹre.

⁷ Deuxudeewi biwinymahãke. Diabo ixi-ribi birehedỹnykeki, tahe tii aribi rahenyke.

⁸ Deuxu-ò bexiòhòdỹnykeki. Deuxu adee rexiòhòdỹnykre. Òrarudu mahãdu, ebòmý bexilyraranyke aõraru-ribi bexitake, rybe inatxi mahãdu, araykyworeny biòbitinybenyke.

⁹ Mabedewoke, bobuke, mahinyke aõraruna òraru-ki. Ajuedena-ribi arube rytynykre, eysa-ribi mabedewomy atxikemy.

¹⁰ Ayrubumy Inynyrỹko-txi boibekeki, tii aratamadỹnykre; tii ixideewimy riwinykemy.

¹¹ Waseriõreboho, uritere aõmy wimy ryberenyõmy. Inyõ taityhydỹduseriõremy tuu ibinamy rarybekeki, iaõna aõna riaõkõkeki tii bede ywina ibinamy rarybereri. Bede ywina rybe riaõkõdỹnyreri. Inyõ bede ywina rybe riaõkõnykeki, tii bede ywina ywidỹdu aõkõ rare. Tii bede ywina rybe hitxidỹdu rare.

¹² Deuxu sohojile dori bede ywina hitxidỹỹdure. Bede ywina dohodỹỹna dinodu tii rare. Tii itarasadỹỹdu rare ihãre irubudỹỹdule rare. Mobohe kai atxiteri; abireludu hitxidỹỹmy aõbo texinohõtĩdỹỹnyteri? Aõkõre.

¹³ Boholabenyke, tuu tarybetenyteri: wijile aõbo ada biurasõmy aõbo rokoirenykre hãwãõ-ò. Tai bededỹỹnana sohojimy rikierenykre. Tai nieru tarasamy rakaõmysỹdỹỹrenykre.

¹⁴ Txiohe rare. Kaiboho dori teeryõlemahãtenynte aõhebo bede rotỹỹnykre. Timybo mabekre? Iwese biuwetyy yja aõwesele rexihymyhỹre wese heka timybo mabekre? Kiawesemy aõkõ marybeke.

¹⁵ Kamy heka marybeke: –Inynyrỹdeewikeki iny rummy rokoireke, tai tahe kia ada kowa aõbo rikiwinyrenyke.

¹⁶ Iwese wiji ratximyhỹre wese. Biurasou aõnihikỹ widỹỹmy marybekeki, kia tahe awi aõkõ rare.

¹⁷ Inyõ aõwiwidỹỹ rieryekeki, tahe riwinyõmyhỹ-wana kia rexiòrarunanymyhỹre.

5

¹ Boholabenyke warybe-ò ityhy mahãdu. Mahinybenyke, bobubenyke aõhõkỹmy botỹỹnybenykreki.

² Aõmydỹỹnana wiwihikỹ rabinamy rỹire. Atyywityhy isibrey tysini riròre.

³ Aorotỹrỹreny awomatiurareny raruxinyra tabededỹỹnana riõnonyrerimy. Anieru susudỹỹna awobiredỹỹnamy kiditynnykre. Iwese dee heòty risõmyhỹre wese, kia sudỹỹ anasõmyhỹkre. Aõna aõna sõwemy ixidee tebutunymahãte kia atxukonana-ò.

⁴ Abaderòwysydỹỹdu òwydỹỹdu aõkõ dori kai Tate. Kai ixideele tebutunymahãte iribireny tawasinymahãte. Tiiboho rahinomy rirajuamyhỹreny tahe kia wysydỹỹdu mahãdu hina-ò Deuxu roholare. Tii ruru mahãdu wedu rare.

⁵ Kaiboho abeòrareny teõnonytenyteri isikile. Ixideehyyle texideysadỹỹnymyhỹte. Ibutumy aõbo adeereny wiwi ixidee temytenynte, iwese rubutxudỹỹnatxu broreni riòwenymyhỹre wese. Kai ahãte. Deuxu akanarubunykre.

⁶ Òbiti mahãdu teteònymahãte terubunymahãte. Tii tiu adee rexiòwynyõtyhy.

⁷ Ixieleledỹỹõmy tahe waseriòreboho. Inynyrỹ kanakreu. Betehe inihe. Òworudu heka taaõwi riraòmyhỹre biu bedeu.

⁸ Kia wese kaiboho tule eleelemy aõkõ biraòmyhỹke aworeny-ki beximymyhỹbenyke, Inynyrỹ nonana dori iòhõrehe.

⁹ Waseriòreboho uritere wimy ibinamy ryberenyõmy Deuxu dori arahitxinyreny. Ihitxidỹỹdu nonana tahe iòhõre ijòkiwesele riijemy rỹimyhỹre.

¹⁰⁻¹¹ Waseriòreboho ihetxiu Deuxu rybemy rybedu mahãdu iyrubumy rỹiramyhỹ. Iwese tiiboho rỹiramyhỹwese boibeke aõhõkỹmy dỹỹnana-ki rare. Kia aõhõ kỹmydỹỹnana-ki òbitimy rotỹỹnymyhỹre. Iwese Jòò iyrubumy raremyhỹre taholamahãtenynte. Tule iwese ionanau Deuxu riwiòhenanyre wesemy teerytenynte. Inynyrỹ dori ruxetòenatyhy-di rare làhãnatyhy-di.

¹² Ibutu ratyire waseriòreboho inatyhymy sohojilemy marybeke ijõ rybemy rybeõmyke Deuxu arybe ritxiõnyõtyhy. Aõna aõnamydỹỹnanaribike aõkõ iximyhỹle marybeke. Kohemy marybekeu kohelemy marybeke. Aõkõmy marybekeu, aõkõlemy marybeke. Kawese-ki inyõ aratxiõnyõkre.

¹³ Inyõ aõbo ayreny-ki aõhõkỹmy rotỹỹnyteri. Tahe tai bexitòenykre. Inyõ aõbo ayreny-ki teysamy ratxireri. Àlãnawi-di tii wana mawiunykre.

¹⁴Inyõ aõbo ayreny-ki webinadumy roireri wana. Tahe dohodỹỹna rybedu mahãdu-ò tamy bididybedenyke tamy rexitòenyrenykemy. Adỹỹ ityre ritxi-wikemy Inynyrỹni òraru-ki.

¹⁵Ixitòedỹỹna tyhynale webinadu riteytenykre. Inynyrỹle ritamahỹỹnykre. Tii òraru-ò raòrarunymyhỹke-wana Deuxu iòraru riixãwidinyke.

¹⁶Iny wiò wiòmy aõna aõnarenymy belyybenyke. Wiò wiòmy wii biix-itòedỹỹnybenyke, ibutu-ribi beytebenykemy. Inyòbiti ixitòedỹỹna irurudire, aõna aõna sõwemy riwinymyhỹke.

¹⁷Eliasi heka inywesereny rare. Tii rexitòenyhyymyhỹre biu ròãtyhykremy bede-ò. Tahe inataõ beòra-di biu ròãhyre.

¹⁸Tahe ixityre rexitòenyre. Tai biu ròare. Tahe oworu-ki ixityre aõwi ruhunyre.

¹⁹⁻²⁰Waseriòreboho, inyõ ay-ki inatyhyna-ribi ròhònykeki. Inywitxira tuu rarybekeki, teòsary-ribi ridykeki, tahe ityytyby ritara, rubu konana ixãwina lau sõwemy araru-di riixãwidinyre. Kie.

1 Pedro 1 Pedro Tyyriti

¹ Jiarỹ, Pedro warybe ritina rewahinyreri ubýtỹ deòdỹna jiarỹ rare. Ibutumy judeu mahãdu-ò rewahinyreri Ponto-ò, Alaxia-ò, Apadosia-ò, Asia-ò, Bitinia-ò.

² Kaiboho heka iitxe itxemy toite Deuxu Inytybyreny-ò, Deuxu Tyytybytyhy araòbitinyrenyra, Jesuisi Kristu bityhynybenykemy tule tahãlubu-di arasebenyrenykemy. Wiòhedỹna sòwemy ywina-wana adeereny kanakemy watxireri.

³ Ibutumy àlana Deuxu Inynyrỹ tyby-ò rikiwahinyrenyke. Tii dori sòwemy ruxetòena inydeereny diwahinyde. Tai inyboho ixityre reamyhỹrenyre ratybinyrenykemy Deuxu sỹ mahãdu wo-ki. Inyboho wijile iraròsònareny dire, Kristu rubu-ribi rexixareki.

⁴ Tii wiòhedỹna wiwihikỹ inydeereny ririre. Biu bedekile riyrubunymy roire. Tiu rasunyòtyhy, retybyòtyhy, iruxerahakỹlemy lyrahakỹlemy roire.

⁵ Deuxu tarurusòwe-di arayrubunyrenykre kia wiòhedỹna bitabenykemy tetyhynyteki. Tarasana heka kia rare. Ikonanatsu Deuxu bedexiteòsinykre.

⁶ Tai tahe beysabenyke. Bededỹnana tòbò reakreu, mabedewobenykre òsana aòmydỹnana sira òraru-ki.

⁷ Tii tahe kawese-ki atyhydỹnareny ityhymy ròhònykre. Atyhydỹnareny womati tỹrỹrỹhỹkỹ òwy ratyre iòwy dire. Tiu rabinaòtyhy. Heòtyru-ribi womati tỹrỹrỹhỹkỹ ròhònyre wese atyhynareny kòdòhònykre àlana, wowodyna, luuna Jesuisi Kristu-ò, tii kedehemynykreu.

⁸ Kaiboho tuu tabitenyòte ihãrele tuure. Tetyhynytenyteri, tai tahe tỹxihikỹlemy deysatyhy-di ahãtenyete.

⁹ Tai atarasadỹna-di teteheteri, tetyhynytenyteki.

¹⁰ Juhuu Deuxu rybedu mahãdu ritỹraxyra kia tarasanamy. Tule wiòhenadỹmy rarybere adeereny kanakemy.

¹¹⁻¹² Idi tahe dierydenyde ibededỹnanau kanaòkre urile ihewo-ribi kanakremy. Katahe adeereny reare Deuxu Tyytybytyhy nade òraru-ki. Ýju mahãdu dori tamywimy tuu rieryrenykemy ihỹrenyre. Jesuisi Kristu aòhòkỹmy dỹnanamy tule toosònadỹnamy rarybemyhỹrenyre, tiubedemybo kia kanakemy riijemyhỹrenyre.

¹³ Arayky-ki birarutxynybenyke wereysana rara rotỹnynyhỹre wese. Òbitimy maraykynybenyke wiòhedỹna-di bidimybedenykre-ki Kristu kedehemynykreu.

¹⁴ Wijile kaiboho ywimy nodu riòre wesemy boibeke. Iwese juhu aykaraòtamy tatỹnyny tatemahã wese noòmy, abedeerykòmy tatemahãu.

¹⁵ Iweseòmy. Uritere adee rybedu òbitimy raremyhỹwesemy kaiboho ibutumy tuu botỹnybenyke kia-ki òbitimy boibeke.

¹⁶ Raritinymy dori rỹire: –Òbitityhymy boibeke, jiarỹ dori òbitityhymy raremahã.

¹⁷ Deuxu iny wiribi rihitxihitxinyre aòbina bina widỹ òraru-ki. Deuxu wiwese wesele iny luure tuu rarawetyynyòhyymyhỹre. Iwese bodee textitòenymahãte wese tamy bedeerykò rira wese boibeke.

¹⁸⁻¹⁹ Kia teerymahãtenyete tuu ararybekre. Ixinamy rexihumyhỹredi aòkò iwese womati tỹrỹrỹhỹkỹ iurahakỹ-di aòkò atarasanareny riòwynyre. Tahe Kristu hãlubu-di aòhebo ibina botỹnybenyke-ribi textitatenyeta aòwidỹnabo booreny-ribi teerytenyete. Kristu tahe budoeni òbiti lyrahakỹ wesemy rare.

20 Tii juhu bededỹ̃nanau taumy rubu-ò riwahinykremy rexieryhyymy raremyhỹ, wijile kaò nade rurukremy aluunareny òraru-ki.

21 Tule Deuxu tetyhynymahãtenyete Kristu òraru-ki, Deuxu rubu-ribi ri-ixixadỹ̃nyre tahe tamy loosòna riwahinyre, tai araròsònareny aityhydỹ̃na Deuxu-ki roimyhỹre.

22 Kaiboho atyytyby tesurònanytenyete inatyhyna dori teywinytenyeta. Tai tahe wiluuluutyhymy rakatxirenyke. Wiluumy wesenedỹ̃renyõmy atximahãtenyete.

23 Wiji umydỹ̃na juhu wese aõkõ iny bòtòdỹ̃na raumydỹ̃re wiji tahe Deuxu Rybe aumydỹ̃namy ihỹre. Kia tahe ituerenyõtyhy. Umytuedeõna diwahinyde.

24 Iwese ryberiti rarybere wese:

–Ibutu iny asi wese rare. Inyloosòna asi noijesa wese rare. Asi ramoenymyhỹreu tõijsa rejuxunymyhỹre.

25 Deuxu Rybe tahe aõu aõuhyy rỹira. Rexihuõtyhy rỹira. Kia rybemy tahe adeereny rarybemyhỹre, Rybewihikỹ wahe.

2

1 Ibutumy idi behuke ixi-ribi, aõbinatyhyna-di, rui-di, inywitxira aõmydỹ̃na xibure-di aõ ikõkõmy ujõmo-di ibutumy.

2 Tahe iwese tohouã howỹsy luure wese rybe-ò bexiborenanyke. Atytyby howỹsyna wese rare. Idi maumynykemy tarasana inatyhy-ò.

3 Wanyrỹ dori wihikỹ rare. Kia teerytenyete.

4 Tamy bodoibedenyke. Tii dori manairuhykỹ wese rare. Heto tira widỹ̃du kia mana-di rehura. Tahe Deuxu dee kia ixitarasanamy rare. Awimy heka tai rahare.

5 Kaiboho tule mana iruhukỹ wesemy tòimahãte heto òbiti wesemy aijõreny-di kanaijedỹ̃nydenykemy. Xiwena wedu mahãdu òbitimy boibeke, Deuxu dee wina xiwedỹ̃na òbiti biwinybenykemy Jesuisi Kristu wowydy-namy.

6 Kawese dori Ryberitina-ki rỹire: –Betehebeny inihe Siaõ bedeki iny mana heto tiramy iwidỹ̃ wesemy ritidire. Tii aõwihikỹtyhy wadee rare. Kia iny rityhynymyhỹkeki, tiu raixỹruõtyhy bede òtiidỹ̃ ribedewonyõtyhy.

7 Kaiboho ityhydỹ̃du mahãdu, adeereny tii aõwihikỹ rare. Ityhydỹ̃dukõdu mahãdu dee tahe kawese tii rare: –Hetotirawidỹ̃du kia mana-di rehura. Kia mana tahe wiji juhuludu mana ritidimy roire.

8 Tule ijõ kiamy rare: –Mana idireny kedese denykre. Kia mana awi aõkõ tamyreny rare. Reserenykre rybe ritxiõnymyhỹrenyeki Deuxu heka rierymyhỹre reserenykre.

9 Kaiboho tahe iny iitxese itxesemy aratarenyre, xiwena wedu mahãdu òbiti boibe benykremy, inyijoi òbiti boibeke, Deuxu hõrõ mahãdule, irux-eranamy marybe benykemy adee dori bededorohokỹ-ribi anadydenyde taloosòna wiwihikỹ-ò.

10 Kaiboho juhuru inyijoi aõkõ toitemahã tahe wiji Deuxu taijoimy aratara. Juhuru ruxetõena tuu inyõ riwahinyõhyre adeereny, wiji tahe tii riwahinyra adeereny.

11 Waluuna mahãdu adeereny ararybekre. Kaiboho iwitxira bedeludu mahãdu wese atximahãtenyete. Uritere òtaõtarenyõmy atyytyby òludu dori kia rare. Atytyby aõbina dỹ̃nana adeereny diwahinyde.

12 Ahotiludu mahãduy-ki òbitimy boibeke. Tai omy ibinamy rarybekeki, tii-boho aumytuedeõnamy robimyhỹkemy tahe Deuxumy kiditoosòdỹ̃nadenykre Deuxu hitxidỹ̃na txuu.

13-14 Bede dinodu bede ywina rybe biywinyamahābenyke Wanyrỹ òraru-ki Iòlòrybe, aõbo kai deòdu rybewydydu aõbo ibutumy birarenybenyke. Iòlò deòdu mynyduhykỹ doidenyde aõbinahakỹ widỹỹdu aõhòkỹmy risỹnyny rimymy risỹdỹỹnykremy ritamadỹỹnykremy tule aõwiihikỹ widỹỹdu ritealādỹỹnykremy.

15 Aõwi wihikỹ widỹỹna-di kaiboho hābu bina biyrydỹỹnybenyke. Kia Deuxudeewi rare.

16 Kaiboho hābu ixihyyludumy ahātenyete urile aõbina bina widỹỹõmy boibekre. Deuxu deòduweselemy boibeke.

17 Iny ibutumy iòsana biywinyke. Ityhydỹỹdu seriòre luumy boibeke. Deuxu biwowydinybenyke. Iòlò bede dinodu biwowydinybenyke.

18 Deòdu mahādu, awedu bityhynybenyke awedu wiwihikỹle-ò sohojile aõkõ ibina bina-wana dori bityhybenyke uritere bedeòtiidỹỹmy rỹiõmy.

19 Aõbina riwinyõhyymyhỹre deòdu tawedu-ò. Tahe wedu teòdu-ò aõhòkỹmy risỹnyre. Deòdu riòludunymyhỹre aõmy rarybeõhyymyhỹre, Deuxu rityhynymyhỹreki. Kia wese tahe Deuxudeewina rare.

20 Iny raòrarunymyhỹkeki, tai tahe òhòtenamy inyboho ratximyhỹrenykeki, aõloosòna widỹỹna bohe kia rare. Inyboho riòludunymyhỹreki. Aõwiihikỹ widỹỹna-di inyboho ywina-di òhòtenamy riòludunymyhỹrenykeki, kia Deuxudeewina rare.

21 Kaiboho biòludunymyhỹbenykemy tai iitxemy aratarenyra. Kristu tule dori òrarureny-ki aõhòkỹmy rotỹỹnyre. Iwese timybo tii riwinyre wese kaiboho biwinybenyke.

22 Kristu dori tiu raòrarunyõtyhy, tule aõbinahakỹmy rarybeõtyhy, raruiõtyhy.

23 Tamy adebure irāmy rryryreu wobinamy aõkõ dirawyònyde. Rihetenyre, aõma aõkõ dirawyònyde. Urile tii rexiwahinyre Deuxu dee. Deuxu dori òbitina-di rihitxidỹỹnyre.

24 Inyòrarureny dori riwyre itxeò nihikỹ tyre-ki. Tai tahe òraruna dee rakarunyunyrenyke, tahe òbiti widỹỹna-ò rakatximyhỹrenyke. Kristu wotõmomy iny riteytenymyhỹre.

25 Iwese budoeni reòsamyhỹre wese kaiboho toite. Wijile tahe kaiboho tòòsemy atxitenyete aitxeredu-ò atyytyby wiòhedỹỹdu-ò.

3

1-2 Hāwyyreny, ahābureny rybe bityhynybenyke. Tai inyõ ihābu ityhydỹỹdu aõkõkeki, tii kidityhynykre tahāwyyhe-ki, aõrybebo aõkõ roholareki ihe-ki robireki.

3-4 Hāwyy ruxerana heka ixidee itidisirenyõmy atximahābenyke aõ taumy-ki ritidimyhỹre aõkõ hāwyy ruxerana rare. Aõ iwo-ribi teysare, Deuxu Tytybytyhy widỹỹna inytyhyna tii tahe hāwyy ruxerana rare. Rade sihodỹỹtyhy ibutu ratyre aõkõ rare. Womati tỹrỹrỹ noho tule aõkõre, ty wiwihikỹ-di rariamyhỹre tule aõkõre. Kia tahe Deuxu dee aõwiihikỹtyhy aõkõ rare.

5 Tule ihetxiu hāwyy òbiti tuu rotỹỹnyre, tahābu riywinyre, Deuxu rityhynyre.

6 Sara, Abraõ riòrese, tahābu riywinyre. Itxi õhòtirenny beake tawedumy tamy rarybere. Kiaboho hāwyyreny iriòre riòre atximahātenyete. Tai aõwiihikỹ widỹỹnamy botỹỹnybenyke. Bededỹỹnana jei jei lau brebuõmy.

7 Hābu mahādu, kaiboho tule asỹreny-ki abedeeryna biyrubunybenyke. Ahāwyyreny biywinybenyke hõraõmy idi ahābenyke, tiiboho dori itxõmotxirennyre iruruõrennyre. Iòsỹny bityhynybenyke. Wiwana Deuxu

ruxetòena tarasadỹ̃du atximahãtenyete. Tai aixitòedỹ̃namy òbitimy bexitòenybenyke.

⁸ Tahe kaiboho ibutumy widi mohõtinybenyke wiwesewesele. Ityhydỹ̃du seriòre dee tòena luuna-wana biwahinyke. Ruxetòena-di boibeke iny-ò ixityhydỹ̃ aòkõ.

⁹ Inyõ aõbinamy adee rakeki, ixiòwydỹ̃õmy. Inyõ rybe-ki aõbinamy adee rakeki, irawyòdỹ̃õmy. Wityhymy tamy marybeke. Kia-ò tahe Deuxu aõwiwhikỹ̃ adee riwahinykre, tai ijõt̃xu Deuxu wityhynamy adee riwahinykre.

¹⁰ Tai inyõ tabededỹ̃nanaluumy ratxike-wana, tatxuu teysamy ratxikeki, tahe dòròtò rexitaake rybe bina lau iry riyryke wobina rybe lau.

¹¹ Aõbina bina-ribi bihenybenyke aõwiwhikỹ̃lemy botỹ̃nymahãbenyke. Ywina biijemahãbenyke ywina-di ahãbenyke.

¹² Deuxurue tahe òbiti mahãdu-di retehemyhỹre. Tanohõti tahe ixitòena-ò riijohonanymy ronymyhỹre. Aõbina widỹ̃nadu-ò tamyreny rayaranymy idi retehemyhỹre.

¹³ Kai aõwiwhikỹ̃ widỹ̃lemy tiu matxibekeki aõhe iny adee rotỹ̃nyõtyhy.

¹⁴ Kai òbitiwidỹ̃ òraru-ki aõhebo bòtỹ̃nykeki, deysamy atximahãke. Breburenymy iwese ilaureny ixiòhãrudỹ̃renyõmy.

¹⁵ Urile Kristu awedurenywesemy bisỹnybenyke aworeny-ribi. Inyõ adeeremy aratỹ̃raxinyke-wana aõherekibo Kristu tetyhynymyhỹtemy, kai bexiywinyhy tamy ixidee rybena bydỹ̃na biywinyhyemy idi ahãke. Arawyòdỹ̃na ywina-di tamy marybeke iòsỹny bityhynymy arayky òbiti-di marybemahãke.

¹⁶ Tai tahe biixỹrudỹ̃nyke umy ibinamy rarybekeki, tai dori òbitilemy Kristuko-txi tariamahãte.

¹⁷ Tahe Deuxu dee wikeki, aõwiwhikỹ̃widỹ̃ òraru-ki inyõ aõhòkỹmy rotỹ̃nykeki, kia tahe Deuxu dee awi rare. Aõbinahakỹ̃widỹ̃ òraru-ki aõhòkỹmy rotỹ̃nykeki, kia tahe Deuxu dee awi rare.

¹⁸ Kristu tahe sohojihyyle rurure iny òraruna òraru-ki. Òbitiwidỹ̃du tahe rurure òbitiwidỹ̃du aòkõ òraru-ki, kaiboho ruruweselemy atximahãtenyete. Deuxu Tyytybytyhy direki kaiboho iruweselemy atximahãtenyete.

¹⁹ Kristu Tyytyby rara rotenawo-ò, tyytyby-ò ritỹnynymy rarybeke.

²⁰ Noe hãwò nihikỹ̃ riwinyreu, Deuxu riraòmy raremyhỹu urile hãbu mahãdu rityhynyõmyhỹre. Debò inataõ reurò inymy rohonyre rubu-ribi bera-ò rabòròròre.

²¹ Wiji, kia sebedỹ̃na ijyy wese heka rare. Tahe aõsebedỹ̃na aòkõ iny tarasanare. Sebedỹ̃na-ki Kristu rubu-ribi ixixana inyboho riteòsinyreri iny Deuxu-ò retehemyhỹre tarasana ritakemy. Bee tahe hãlubu suròdu aòkõ rare. Rexitòenymyhỹreki inywo rityranymyhỹre risuhònymyhỹre.

²² Kristu tahe wijile biu bede ronyre Deuxu rurunawe-ribi tii ýjuboho, dinoduboho, rurunaduboho wedu Kristu rare.

4

¹ Tahe Kristu taumy-wana aõhòkỹmy rotỹ̃nyre. Tai tahe iwesemy mohõtinybenyke. Inyõ dori aõhòkỹmy rotỹ̃nyre. Tai tahe òraruna-ribi ixi-ixãwididỹ̃my ròhõtinyreri.

² Tai kabede-ki iny bededỹ̃nanareny uhe hãbu òta òtawidỹ̃ nohõtina wesemy aòkõ rakatximyhỹrenyke. Deuxu deewina widỹ̃na-ò rakatximyhỹrenyke.

³ Juhuu kaiboho sòwemy taòrarunyenye, iwese ityhydỹ̃dukõdu mahãdu wiji rỹira wese.

4 Aòraru-ò biòwa mahādu wiji bederiòtiinyre kai tii-wana taòrarunykōmahāteki iwese tiiboho naòrarunymhỹdenyde wese. Tai adee ibinamy rarybemyhỹrenyre.

5 Tule tiiboho ywisidỹỹdu Deuxu-ò rirawyònykre. Idi dori òbiti ywisidỹỹna-di rihitxidỹỹnykre iru mahādu, rubumahādu wana.

6 Tai tahe inyō ituekre mahādu-ò Rybewihikỹmy rarybemyhỹre iumy dori rihitxidỹỹnykre ibutu hābu wesemy. Tahe ityytyby Deuxumy irumy rarekre.

7 Boholabeny inyhe, bededỹỹnana konana iòhòra. Tai tahe inatyhymy mohòtinyke Deuxu-ò òbitimy bexitòenykemy.

8 Ibutu ratyre wiluutyhymy atximahābenyke. Kaiboho dori aluunadi-renyeki wiòraruna-di itxerekōmy ahābenyke. Inyō dori iluunadikeki, wiòraruna-di itxerekōmy ihỹke.

9 Iny witxira dee awimy rỹira, roraludu isỹōmy rỹira aheto-ò bisỹdỹỹnyke. Bitỹhidỹỹnyke roraludu luumy atximahā.

10 Wii biwiòhenanymy ahābeny iwese bede teerytenyte wese biwiòhenanybenyke. Deuxu wiòhedỹỹdu wiitxura wahidỹỹdu wiwihikỹmy boibeke.

11 Inyō rarybekeu, Deuxu rybedile kana rybeke. Inyō reòbykeu. Deuxu ruudile kedeòbyke. Tai tahe Deuxule loosòna kia-ribi kanatake Jesuisi Kristu òraru-ki ibutumy aōna aōna-di. Aōu aōu ibutumy ruruna, loosòna Jesuisi Kristu hōrō rare. Kie.

12 Waluuna mahādu, ixibedeòtiidỹỹōmy bede aōmydỹỹnana sira adee kanakreu. Kia tahe aō brebudỹỹna aōkō rare aōhebo adee kodotỹỹnykeki.

13 Tỹxihikỹlemy deysa-di atximahāke kia aōhōkỹmy dỹỹnana dori Kristu aōhōkỹmy dỹỹnana-ò biòwa atximahāte. Idi tahe tule kedeysakre Kristu loosòna òraru-ki.

14 Inyō adee ibinamy Kristuni òraru-ki rarybekeki beysake. Kiau Deuxu Tyytyby heka loosòna sōwe-di atyre-ki kanakre.

15 Kaibohoō rubudỹỹrenyōmy, wasirenyōmy, aōna aōna bina widỹỹōmy, inywitxira aōwysyna-txi ròte. Kiake-wana iòwydỹỹnamy aōhōkỹmy botỹỹnybenyke. Tii dori wadee awiōre.

16 Inyō tahe aōhōkỹmy rotỹỹnykeki, ityhydỹỹdumy rare òraru-ki tai ixyrūōmy mabeke. Urile Kristunimy riwowydynkemy idi rare. Bededỹỹnanahe rehe-mynymy roire ityhydỹỹdu mahādu-di rihitxidỹỹnanymy riteranykemy.

17 Tahe inydee ywisidỹỹna ritelenykeki, timybohe Deuxu Rybewihikỹ ityhydỹỹdukōdu mahādu-ò kòdòhònykre.

18 Ryberiti-ki roimyhỹre kia: —Òbiti mahādu dee tarasana isirakeki, timybohe òrarudu mahādu ròhònyke.

19 Tahe inyō Deuxudeewi òraru-ki aōhōkỹmy rotỹỹnykeki, Tatytyby Deuxu-ò rawahike tahe aōwihikỹ widỹỹmy rareke. Deuxu dori aōu aōu iny widỹỹdureny rare; iny wiòhedỹỹdureny rare.

5

1 Ityhydỹỹdu-ò itxeredu mahādu-ò aritohonykre ararybekre. Jiarỹ tule itxeredu-ò rare. Kristu aōhōkỹmy rotỹỹnyreu, jiarỹ tuu rabire. Taloosòna kiditeòsinykreu jiarỹ awana wataxire tewebromy rikitarenykemy.

2-3 Biwisinanyke aityhydỹỹdu butuna iwese itxeredu budoeni-di retehemyhỹre wese idi beteheke. Ixideewimy kia biwinyke. Inywitxira deewimy aōkō. Aō nieru tarasa sohojilemy aōkō, ityhydỹỹdu wiòhedỹỹmy. Aō ityhydỹỹdu wedu wesemy aōkō bisỹnybenyke, urile bexideòsinyke iwese ityhydỹỹdu òbiti rỹira wesemy.

⁴ Tahe itxeredu mahãdu wedutyhy kedehemynykeu, tii adee kidiwahinykre loosona araheto. Tii tiu toosò ixãwiõtyhy.

⁵ Itxeredu mahãdu tỹmyra bierybenyke itxeredu mahãdu matuari-ribi widee ixiwedeõmy ahãbenyke. Ixiwede mahãdumy dori Deuxu rarawetyynymyhỹre. Ixiwede aõkõ mahãdu-ò tahe ruxetõena riwahinyke.

⁶ Ywimy ahãke Deuxuru-ò iximy xiwedeõmy. Tii dori bede õbiti kanakeu akanaloosõnykre.

⁷ Aõmydỹyna witxira witxira biwahinybenyke Deuxu-ò tii dori arawisi-naymyhỹrenyke. Anawiõhenanykre.

⁸ Bexihãrubenyke aõludureny Satanasi-ò. Òbitimy mohõtinybenyke. Tii dori leaõ reburemyhỹre wese rare. Tii rariarerimy ihỹre tibo rirõkemy.

⁹ Atyhynatyhy-di idi bexiumynyke. Aityhydỹdu seriõre-dori awana aõhõkỹmy rotỹnyreri kia ixiradyỹduhukỹle-wana.

¹⁰⁻¹¹ Iny Deuxu ruxetõenatyhy rỹire. Kaiboho urihimyò aõhõkỹmy botỹnybenykeu akanawiõhenanykre, akanarurudỹnykre, akanaõbitidỹnykre, anaijohonadyỹnykre. Ibutumy ruruna ihõrõmy aõu aõu rarekehymy idi watximahãre.

¹² Kia waryberatiyla Sila-wana adeeremy riritinyre. Tii iny seriõreny õbitityhy rare. Jiarỹ rarybereri kia Deuxu wiõhedỹyna inatyhy rare. Kaiboho idi tyhy mohõtinybenyke.

¹³ Kowa hãwyy Babilonia hãwã ludu tule tarybe weityhyna adee diwahinyde. Tii tule itarasana mahãdu-ò. Tule wariõre Marku arãrybeweityhynanyrenyke.

¹⁴ Widee buõbenyke narybewehityhynanyde. Ywina adeeremy kanakemy watxireri Kristu tetyhynmahãtenyteki.

2 Pedro 2 Pedro Tyyriti

¹ Jiarỹ, Simaõ Pedro, Jesuisi Kristu deòdu rare. Jesuisi Kristu rybemy rybedu rare. Warybe ritina rewahinyre ityhydỹdu mahãdu-ò, Deuxu ywisidỹna mahãdu-ò, Jesuisi Kristu inyтарасadu òbitina òraru-ki, inatyhyna inyboho ijòdirenreki.

² Ruxetòena wiòhedỹna-wana adeereny kanakemy watzireri Deuxu erydỹna-ki, Inynrỹ Jesuisi erydỹna-ki.

³ Tahe Deuxu rurutyhy-ribi inydeereny aõna aõna sòwemy riwahinymyhỹre òbitimy inyboho rokoirekemy iny bededỹnanaren-ki. Tii inyboho ridyrenyre taloosòna òbitiwo-ò, tii inyboho rieryrenythyreki.

⁴ Tai inydeereny tuu rarybere, sòwemy aõna aõna kanakremy awityhymy inydeereny kia rybe rare.

⁵ Kia rybe bityhynybenykeki, bede aõmydỹnana bina-ribi bexitabenyke, òta òta widỹna-ribi bexiebenyke. Tule Deuxu rayky wesena-di urihimyo boibeke.

⁶ Tai tahe ibutumy aruru-di marurunyke aityhydỹna-ò òbiti widỹna bibutunyke, kia-ò bederydỹna bibutunyke, kia-ò ixiwedudỹna bibutunyke, kia-ò widỹnahyyna, kia-ò òbitimy nonana.

⁷ Kia-ò ityhydỹdu seriòre luuna, kia-ò wiluuna bibutunyke.

⁸ Kia aõna aõna dori awo-ki ratximyhỹkeki, rexiòlònykeki, arawiòhenanykre Jesuisi Kristu Inynrỹ bierybenykeny. Tai ityhydỹdu wihikỹmy boibekemy. Iny witzira biwiòhenanybenyke.

⁹ Kia aõna aõna inywo-ki ratxiòmyhỹkeki, tii heka iruetàlemy ihỹre. Aõbo iòhòmy ratxirerilemy robimyhỹre. Juhu òraruna iribi risuhoremy idi tòhòti rosare.

¹⁰ Tai waseriòreboho marurunybenyke atyhymy boibekemy, aityhydỹna tyhydỹmy boibekemy. Tai tiu òraruna-txi aixeõna.

¹¹ Kia wesekeki tahe deysana-di birònybenykre Jesuisi Kristu inyтарасadu òlòna bede-ò.

¹² Kia aõna aõna teerytenyete. Inatyhyna tetyhynyhy atximahãtenyete. Ihãrele tahe itxi aròhòtijiradỹnyhyrenykre.

¹³ Tule warumy mahãreu, awimy idi rahòtinymahãre kia inatyhyna-di akanaixixadỹnydenykeny.

¹⁴ Waumy dori kaki ele elelemy aririkre reeryre. Inynrỹ Jesuisi Kristu dori kia wadee diteòsinyde.

¹⁵ Aõu aõu tahe ararurunythyymy ararekre kaiboho kia ibutumy òhòti-ribi rosaòtyhykemy. Tule warubuhewo-ribi kia-di mohòtinyhy boibekre.

¹⁶ Tahe adeereny Jesuisi Kristu themynynamy rarybereu, aõ uritere tere ijyymy aõkò heka relyyreri hãbu ijyyna-ribi aõkò ijyityhymy. Inyboho dori iny iòlòreny loosònatyhymy robimyhỹreny.

¹⁷ Tii dori Deuxu inytyby-ribi loosòna wowydyna-wana ritare. Tuu Deuxu loosònawo-ribi narybede: Kai heka Wariòre waluu tate. Jiarỹ reysamy watzireri adee.

¹⁸ Kia rybe-ò jiarỹboho raholarenyre tii-wana hãwãlò raty tyre-ki roiremyhỹu.

¹⁹ Iwese juhu rybemy rybedu mahãdu rarybere wese, kiamy heka wiji inydeereny ritỹnynymy roimyhỹre. Kaiboho tule kia-ò boholahãbenyke bityhynmahãbenyke. Iwese iny loosòna-di bedeluru-ki, retehemyhỹre wese. Idi

tahe Kristu kòdòhònykre, iwese tainahakỹ ròhònyre wese. Tahe aworeny-ki kanasỹnykremy ratxikre.

²⁰ Kia heka juhoo bierykre: Tyyritirybeõ tiu ixiwanaletyhy.

²¹ Deuxu rybe dori hãbudeewimy aõkõ heka nade juhu Deuxu Tyytybytyhy hãbu dee rybe ritỹnyre aõmybo rarybekemy.

2

¹ Iwese juhoo inyy-ki rybedu inatyhyõna rarybere wese, tule ayreny-ki rybedu inatyhyõna kidierydỹnykremy. Tiiboho kedeerynanykre aõbinabinahãkỹmy. Tiiboho kidiitxenanydenykre. Tule Inynyrỹ kidiseõnykre. Tai tahe aõwesele rexihukre.

² Sõwemy iny iõta òta erydỹnyra rityhynykre. Tai iny wixira inatyhyna ery dee ibinamy rarybekre.

³ Kia rybedu inatyhyõna adyna-di ratxihyymy roireke tai adeeremy raruimyhỹke. Anieru tarasanareny-ò.

⁴ Iatysyna heka iòhòmy namahãde tule idi dehuna inatyhymy kòdòhònykremy ihỹre. Ýju mahãdu raòrarunyreu Deuxu tõtxi ririõlemy reare tahe idi rehulemy reare bedebina heòty-ò.

⁵ Iu bee-di Deuxu suu ritỹmynyreu, òrarudu mahãdu ituere Deuxu tõtxi ririõre. Noe, òbitina rybedule, ritare debò inatxi reurò iny-wana.

⁶ Sodoma hãwã Omora hãwã-wana aõwesele Deuxu ritoonyre, raòrarunyreki. Brybymy relere. Tai heka iny ribedeerynymyhỹre òraru lau.

⁷ Kia hãwã-ribi heka Lòjoi sohojile ritare. Lòò òbiti rare. Tii heka terare òrarudu mahãdureki. Tõtxi ririõhyre.

⁸ Imahãdu-ki Lòò rasỹnyreu, txuõ txuõlemy iwo rabadewotyhyhymyhỹre, aõbinawidỹnybo robire idi roholareki.

⁹ Tahe òbiti widỹnydu urihixina-ribi Inynyrỹ ridykemy rierymyhỹre. Tule ibinamy widỹnydu mahãdu aõhòkỹmy dỹnyana riraòmyhỹre. Ywisidỹnyatxu kedehemynykreò.

¹⁰ Ibutu ratyre urari òta òta widỹnydu mahãdu aõhòkỹmy rotỹnykre. Tiiboho Deuxu ruru riseõnyrenymyhỹre. Ixi-di xiwededu wesemy rỹirenyre, ixiluudu wesemy rỹirenyre.

¹¹ Aõbinahakỹlemy biuludu mahãdumy rarybemyhỹreny. Tahe ýju mahãdu iruruna ratyre-di hãre tamy ibinamy rarybeõmyhỹre, Deuxuko-txi.

¹² Tahe kia iykaraluu mahãdu iròdu deborehekỹ wesemy ratximyhỹre. Iròdu debore tahe bedehuduna widỹnyrare ada ròtenawo-ò rakelemy. Kia hãbu mahãdu aõmybo ròeryõhyymyhỹre dee ibinamy rarybemyhỹ.

¹³ Tiiboho ixi-di dehuna-di ixi dee kedexiixãwinykre. Tiiboho òraru luumyhỹre txumy dori raòrarunyrenymyhỹre. Awanareny dori riroximahãre, aõbinahakỹtyhy wesemy ayreny-ki ratximyhỹ iòrarunarenymy rybe luureki.

¹⁴ Tiiemy iru hãwyydihyy rethemy ihỹre tamy òta òtalemỹ rõhòtinymyhỹre. Kia hãbu hãwyydỹnyweduna rierymyhỹre. Hãwyy urihimyo tỹnywekeki kia hãbu idyna rybe-di rierymyhỹre hãwyy-di aõbo tai riurarinymy taòbirenareny rihydỹnyhỹre aõbo tai riurarinymy idi ratximyhỹre. Tiiboho tuedena nihikỹ-di ituerenykre.

¹⁵ Òbitiry ririmyhỹreny. Reòsamyhỹreny. Balaaõry dori riheludunymyhỹreny Balaaõ, Beoro riòre òraruòwydỹnyritakemy ratxireri iòraru luureki.

¹⁶ Aõbinahakỹ riwinyreki rexiòwinyre. Kiamyre heka. Jumenta wesena rybeteremy tamy rarybere inyrybe wesemy iitxỹtena-ribi riixãwidinykemy.

17 Tiiboho bedidehuna wese roire bee ihoõreki. Yhy biuwetyy tiò ridymyhÿre wese kia hãbu mahãdu roire. Tamy bede luruhukÿ bede riyrubunymy rÿire.

18 Tiiemy taòrarumy rarybehyymy raremyhÿ inyõ aòta òta rybe-di ridykemy. Inyõ deòsary-ribi ròhònykeki, tii ridylemyhÿre ixybyle òraruna-ò.

19 Tamyreny rarybemyhÿre ixideewimy boibekemy. Urile irybedureny òrarunawidÿÿna deòdumy ihÿrenyrene.

20 Iwese inyõ ijեսuna-ribi riatymyhÿkeki, iatysydÿÿdu deòdumy rarekre wesemy. Kiawesele tahe òraruna rare. Inyõ bede aõmydÿÿnana òraru-ribi ròhònykeki, tahe ixybyle ròòsekeki, teleu raremyhÿ ratyre ikonanau ratÿÿnykre. Inynyrÿ Jesuisi Kristu dori tii rierymyhÿre juhuhu tahe idi rexideyresanyre kia aõmydÿÿnana òraru-ò.

21 Tiiboho ryòbiti rierymyhÿrenyrene. Tahe bede ywina òbiti-ribi rexiòlòdÿÿnyrene. Rieryòhÿykeki tamy wimy tuu raremyhÿ, rytÿmyra erysy-ribi rohonyrenyreneki.

22 Tiiboho kia rybedÿÿna hitxina wesemy ihÿrenyrene: —Ijòròsa tahylòina-ò ròòsere. Tule ijò rybedÿÿna wesemy: —Ixÿni bedi risuhòkeki, tii tasu bu-rena-di ixybyle rexisunyke.

3

1 Kia, waluuna mahãdu warybe ritidÿÿna juhuludu aõkò rare ihewoludu rare. Warybe riti wiwanadile anohòti ijiradÿÿmy watxireri anohòti riraixix-anykemy.

2 Deuxu rybemy rybedu òbitimy rarybemyhÿre òhòti-ribi rosaòkre, tule Inynyrÿ iny tarasadu bede ywina nohòti losaõmy iwese tarybe deòdu adeereny rierynanyrene wese.

3 Ibutu ratyre, kia-ribi nohòti losaõmy. Ikonana txuu hãbu binahakÿ rybe binatyhy-di kòdòidenykre. Kia hãbu òta òta widÿÿlemy ròhòtinymyhÿre.

4 Kiamy hãbu rarybekre. Tiubo Jesuisi Kristu nonana kanakre. Juhu inytybyreny ituereu wiji bededÿÿnanau tiu naõhyymyhÿde. Ibutumy heka juhu bedeu ixi wese hyylemy bede roimyhÿre.

5 Iribi tòhòtirenny rosare ixideewimy Deuxu irybedile biu bede-wana riwinyrene. Beribi riwinyrene, bedi riwinyrene. Iribi tahe bedi bede rahure.

6 Bedi juhuhu bede ibutumy rexihura.

7 Tule wiji irybedile bede rÿimyhÿre. Tahe ixybyle kanahukre. Heòty-di kanahukre. Kia txuu ibutumy inybinahakÿ ituekre kia-ribi ixideewilemy kia hãbu tòhòti rosare.

8 Tahe aõsohojibo, waseriòreboho, nohòti-ribi loosarennyõmy. Kia heka rare: Inynyrÿ dee. Txusohoji 1000 beòra wese heka rare. Tule 1000 beòra txusohoji wese rare. Tamy bededÿÿnana aõ aõkò rare.

9 Inynyrÿ tarybewesele aõna aõnamy kodotÿÿnykre. Aõ raroorehenymyhÿre aõkò rare urile tahe hãbu riraòhyymy rÿimyhÿre hãbu taòraru-txi tòhòti reakemy. Ibutumy tarasana-ki rÿikemy dori idi ratxireri.

10 Wasidu namyhÿde wasimy Inynyrÿ txuu kòdòhònykre. Biuwetyy, bede-wana rexihukre. Ibutu suludu heka ramyjijy heòty adÿÿwesemy ritxi-ienykre.

11 Òbitimy rakatxirenyke. Kia ibutumy ròhònyreneki.

12-13 Inyboho heka riraòmyhÿrenyrene biuwetyy tÿmyra sutÿmyra-wana. Inynyrÿ dori rarybere kia kidiwahinykre.

¹⁴ Tai heka waseriòre waluuboho, òbitimy atximahãbenyke kia-ò dori teraòmahãtenyte. Tii kanakreu umyreny robikre ywimy, òbitimy, inyõ heka umyreny ibinamy rarybeõtyhy.

¹⁵ Rexiroorehenymyhỹre ibutumy iny tarasanarenymy. Tule inyseriòre Paulo adeereny ròritidỹỹre ibede eryna Deuxu tamy riwahinyre.

¹⁶ Kiamy tule aõna aõnamy tii ròritidỹỹre. Tahe iritina-ki aõbo isiratyhyre ierykõnatyhymy roire òbiti mahãdu aõkõ kia rybe-di aõwitxiramybo rierynanymyhỹre. Iwese ijõ Ryberiti-di riwinyre wese. Tai heka tiiboho ituerenyre.

¹⁷ Kaiboho tahe waityhydỹỹdu seriòre bexihãrubenyke ilau teòsana-di aradyrenyheny. Tai kaiboho beòsabenyke.

¹⁸ Inynyrỹ Jesuisi Kristu wiòhedỹỹna-di ibedeerydỹỹna-di maumynybenyke. Wowydyna ibutumy tamy kanakemy idi wãhãre wiji tyhymy rareke. Kie.

1 Juaõ

1 Joaõ Tyyriti

¹ Jiarỹboho akoreny retỹnyreri, Jesusimy. Tii Rybe rininirenyra. Tii juhubedeu raremyhỹ. Jiarỹboho rabirenyra, tarybemy aholarenyra, tamy reteherenyre, aõbo riwinyreò, tule tamy iny rerimyhỹre. Tii inydeereny umytỹmyra riwahinyreri.

² Umytỹmyra tuedeõna Deuxu inytyby-ribi rehemynyra. Kia umytỹmyra tuedeõna Jesuisi-di rare. Jiarỹboho tuu rabirenyre. Tii rexideòsinyre inyrenyko-ò. Kia tahe adeereny relyreri iwese raremyhỹ wese.

³ Aõõbo iny roholare wese, tuu rabire wese, kia tahe tuu relyreri inyboho wiluurenykemy winohõtiewesele rõkõhõtinyrenykeny. Inyboho rahõtinyrenyri iwese Deuxu inytybyreny, Jesuisi Kristu Deuxu Riõre-wana wiwese rõhõtinyre wese.

⁴ Kia tahe waryberiti adee rewahinyreri adeysamy rakatximahãrenykeny.

⁵ Kiamy tahe Jesuisi inydeereny relyreri: —Deuxu txuloosõna wese ratximyhỹre. Deuxu-ò bedeluru aõmydỹnana rehemynyõtynyhy kiamy adeereny relyreri.

⁶ Inyõ rarybekeki: —Jiarỹ Deuxu-wana winohõtiewesele rahõtinyamahãre. Kia iny bedeluru aõmydỹna-di ratxireriki, kia iny raruimyhỹre.

⁷ Tahe inyboho loosõna waõmydỹna riwinymyhỹrenykeki iwese, Deuxu loosõnawo-ki ratximyhỹre wese, tai inyboho wiwesele rõhõtinyimyhỹke. Tahe Jesuisi, Deuxu Riõre hãlubu ibutumy iny òraru-ribi iny risuhòmymhỹke.

⁸ Inyõ rarybekeki: —Jiarỹ raòrarunyõhywãhãre, kia rybe-di tii ixidee riitxenanyimyhỹre. Tii raruire rityhynyõre.

⁹ Iny taòrarurenymy relyrenykeki, Deuxu tiemy òbiti rare, tii iny òrarurenin-ribi riixãwididỹnykre. Aõbo iny iwo-ki isuisumy ihỹre tii rityranyke.

¹⁰ Inyõ òrarudikemy aõkõ raryberenykeki, inyboho Deuxu ruidumy rarybe-mahãreny. Kia iny Deuxu rybe rieryõhyimyhỹre.

2

¹ Kaiboho wariõre wese atximahãtenyete. Adeereny waryberiti rewahinyreri, kaiboho òrarurenymykeny. Iny òraruna-txi resekeki, iny wiõhedỹdurenny dire. Tii Jesuisi Kristu rare. Òbiti rare òraru iyyydumy rarekeny Waha Deuxuko iny wiõhedỹmy.

² Tii dori itxeònihikỹ-ki rurura iny òraruòwydỹ-ki. Inysohojile òraru aõkõ rurura tahe ibutumy iny òraruòwydỹ-ki.

³ Tiwesebo inyõ rexierykre Jesuisi rieryrenykeny rityhynymyhỹkeki karybe bede ywina wese rierykre tii rexierykre Jesuisi rityhinyreri wana.

⁴ Inyõ rarybekeki: —Jiarỹ Jesuisi reeryre. Irybe bede ywina riywinyõkeki, iny ruidu rare. Inatyhyna rityhynyõre.

⁵ Inyõ Jesuisi bede ywina riywinykeki, inatyhymy tawo-ki Deuxuluu rare. Kiawese heka iny rierykre Jesuisi mahãduwo-ki ratxireri-wana.

⁶ Inyõ rarybekeki: —Jiarỹ Jesuisi mahãduwo-ki watxireri. Tamy kia wese rỹikeki. Aõmybo Jesuisi rotỹnyre wese, tii tule rotỹnyke.

⁷ Ityhydỹduseriõre, adee bede ywina tỹmyra aõkõ rewahinyreri. Bede ywina tyby kia rare. Kia juhoo teerytenyete. Inyboho wiluurenykeny, kia bede ywina tyby rare, juhoo taholatenyete.

⁸ Kia rybe bede ywina itÿmyra rare. Jiarÿ adee rewahinyreri. Kristu dee inatyhy rare tule adee inatyhy rare. Bedeluru rõhònryra, loosòna inatyhy bede-ò ralòmhyÿre.

⁹ Inyõ rarybekeki: —Jiarÿ loosònawo-ki watzireri. Kia iny taityhydÿÿdu seriõre luuõkeki, bedeluru-ki ratximyhyÿre.

¹⁰ Inyõ taityhydÿÿdu seriõre luukeki, kia sohojile loosònawo-ki ratxireri. Aõ aõkõ tii riatydÿÿnyra.

¹¹ Inyõ taityhydÿÿdu seriõre rexihitxinykeki, bedeluru-ki rariamyhyÿre. Titxibo rakre rieryõhyymyhyÿre. Bedeluru dori ruetàna rare.

¹² Adeereny warybe rewahinyreri wariõre wese aòraru dori, tii ri-ixãwididÿÿnyre Jesuisi òraru-ki.

¹³ Iumy mahãdu-ò warybe riti rewahinyre adiwahinyde, kaiboho dori tuu teerytenyete. Tii hykyle dori juhoo raremyhÿ. Ijoityhy-ò waryberiti rewahinyre, Satanasimy tahaÿnanytenyete.

¹⁴ Wariõre, inytyby Deuxu teerytenyete. Iumy mahãdu, adeereny aratyyritinykre, kaiboho dori tuu teerytenyete. Tii hykyle dori juhoo raremyhÿ. Ijoityhy, adeereny aratyyritinykre, Deuxu rybe dori õhõtireny-ki ratxireri, arurudireny dori. Satanasimy tahaÿnanytenyete.

¹⁵ Bede aõmydÿÿnana luurenykõmy boibeke. Inyõ bede aõmydÿÿnana luukeki, Deuxu inytyby luuna rieryõke.

¹⁶ Kia bede aõmydÿÿna rare: òraruluuna, aõmy robira-wana tuure, aõna aõnamy ixityhydÿÿna. Kia Deuxu-ribi aõkõ nade. Kia bede aõmydÿÿna-ribi nade. Kia bede aõmydÿÿna-ribi nade.

¹⁷ Kabede ixãwikre taaõmydÿÿna òta òta-wana. Deuxudeewimy widÿÿdu tiu ixãwiõtyhy. Tii awimy rÿirakre.

¹⁸ Wariõre wese. Ikonana bededÿÿnana iòhòmny roire. Adeereny narybede Kristu òludu kanakemy. Betehe inihe, Kristu òludu sòwemy dehemynyde. Kiawese inyboho rieryrenyrene ikonana bededÿÿnana iòhòmny roire.

¹⁹ Kia Kristu-ò òludu iny mahãdu wotya-ribi rõhònnyrenyra. Tii ityhydÿÿdutyhymy aõkõ ratximyhyÿre. Ityhydÿÿdu mahãdu tiu rõhònnyõtyhy. Ròhònnyrenyreu, ibutumy rieryre, kia iny mahãdu aõkõ ratximyhyÿre.

²⁰ Kaiboho aõmydÿÿnana ibutumy teerytenyete Deuxu Tyytybytyhy direki.

²¹ Kia rybe adee aratyyritinyke, kaiboho dori Deuxu rybe inatyhyna teerytenyete. Tiu rui Deuxu inatyhyna-ribi rõhònnyõhyymyhyÿre. Kia tahe teerytenyete.

²² Moheka ruidu rare. Inyõ rityhynyõkeki Jesuisi Deuxu deòdÿÿna raremy, tii tahe ruidu rare. Inyõ Kristu Deuxu-wana ritxiõnykeki, tii Kristu òludu rare.

²³ Inyõ Deuxu Riõre ritxiõnykeki, tii Deuxu-wana aõkõ ratxieri. Inyõ rarybekeki: —Deuxu Riõre retyhynyre, tii Deuxu-wana ratxireri.

²⁴ Juhoo aõòbo roholare taholamy toitemyhyÿ idi mohõtinybenyke. Idi mohõtinyamahãbenykeki, Deuxu, Iriõre-wana aõu sõu matxibenyke.

²⁵ Jesuisi Kristule juhoo inydeereny narybede, umy ituedeõna inydeereny kidiwahinykemy.

²⁶ Kia waritina jiarÿ wiji rehura. Aitxenadÿÿdu lau adee reritinyra.

²⁷ Abedeerydÿÿna Kristu tatytyby adeereny riwahinyre. Tii tahe awanale ratxireri. Aerydÿÿdu aõkõ adeereny rauhenyrenyeri. Tii tahe inatyhy bedeerydÿÿna ibutumy araerynanyeri. Rui aõkõ rare. Iwese tii araerynanyreri wese, ibutumy biyrubunymahãbenyke. Kia tahe Kristu-ki hykyle bexiemyhyÿbenyke.

²⁸ Wiji, wariõre wese aõu aõu boibekemy Deuxu mahãduy-ki. Tai Jesuisi kaò kedehemynykeu, buberuõtyhy ada maixÿruõtyhy ilau.

²⁹ Deuxu òbitityhyhy ratximyhÿre. Kia teerytenyte. Inyõ òbitimy rarekeki, Deuxu riòremy rareke. Kia tule teerytenyte.

3

¹ Boholake, inytyby Deuxu taluuna nihikÿ inydeereny riwahinyre. Inyboho dori tii rininirenyre Deuxu Riòremy. Inatyhymy inyboho Deuxu Riòremy roire. Kia tahe ityhydÿÿdukõdu mahãdu rieryõre. Tiiboho dori Deuxu inytyby rieryõhyymyhÿre.

² Waluuna mahãdu, inyboho Deuxu Riòremy roire. Rierykõrenykre timybo iny rokoirekremy. Kia inyboho rieryreny: Jesuisi kodobehekrey, inyummy taummy wese risÿnykre. Inyboho dori kodobidenykre iwese rarybemyhÿ wese.

³ Inyõ Jesuisi wesemy rarekemy ratxikeki, iwese Jesuisi òbitimy raremyhÿ wese tii rareke.

⁴ Inyõ Deuxu bedede ywina rybe rityhynykeki, tii rexiòrarunyke. Kia heka òraruna rare.

⁵ Jesuisi dobehede òraru tarasadummy rarekemy. Kia teerytenyte. Jesuisi inatyhymy raòrarunyõhy raremyhÿ.

⁶ Inyõ Jesuisirykihy rarialeke, tii òraruõmy rareõtyhy. Inyõ òrarummy rarehykeki, tii Deuxu rieryõhyymy rareke tuu robiõhyymy rareke.

⁷ Wariòre wese, itxenadÿÿdu lau bexiyrubunyke iny aõmydÿÿnana òbitimy riwinykeki, iny òbitilemy rareke, iwese Jesuisi òbitimy raremyhÿ wese.

⁸ Inyõ òrarunadityhy raretyhykeki, tii Diabo mahãdu-di rareke, Diabo heka òrarauna-ki hyy nodure. Tai kaò Deuxu riòre nade Diabo aõmydÿÿnana ixãwikemy.

⁹ Inyõ Deuxusÿ riòrekeki tii òraruna-txi reseõlemy ratximyhÿre Deuxu dori iwo ritymyranyre. Tii reseõhyky rareke. Deuxusÿ dori rare.

¹⁰ Kia wese iny rieryrenykre inyboho iriòre Deuxu riòremy roire ada Diabo riòremy aõbo, inyõ Deuxu deewimy riwinyõkeki, tii Deuxu Riòre aõkõ rare. Inyõ taityhydÿÿdu seriòre luuõkeki, tule Deuxu Riòre aõkõ rare.

¹¹ Kia bedede ywina rybe juhuyu taholamy tatemyhÿ ihãre tadoholamahãte. Kia heka rare: iny wiluukemy.

¹² Iwese Kai taseròre rirubunyre wese aõkõ rikiwinykre. Tii dori Satanasi mahãdu rare. Aõherekibo tasewriòre rirubunyre. Iaõmydÿÿna Deuxu dee awiòre Iseròre aõmydÿÿna Deuxu dee òbitire tai tahe rirubunyre.

¹³ Waseriòreboho, ityhydÿÿdukõdu mahãdu eramy ratximyhÿ. Kia-di be-deòtiidÿÿomyke.

¹⁴ Inyõ ityhydÿÿdu seriòre luukeki, tii rubummy rÿire wese mahãdu-ribi ròhònyre. Kia reerymyhÿreny. Tahe umytuedõna-ki rahara. Inyõ luuõkeki, tii rubummy rÿirawese mahãdu-ki ihÿmyhÿke.

¹⁵ Inyõ taseriòre derakeki, tii rubudÿÿdu wese rare. Boholake, kia teerytenyte. Rubudÿÿdu umytuedeõna-ki rahaõtyhy.

¹⁶ Kiawese luuna rikieryrenke dori Kristu rubu-ò rexiwahinyre inydeereny tòmey. Tai tahe inyõ taseriòre dee rurukeki iluuna sòwerek. Tii tahe awire.

¹⁷ Inyõ ityhydÿÿdu seriòre aõhokÿmy rotÿÿnykeki, rama rahukeki, tuu robike aõ ijòdikeki, tahe iny riwiòhenanyõkeki, tii Deuxu luuna-di aõkõ ratximyhÿre.

¹⁸ Wariòre wese, luuna urile tuu rybena aõkõ rare. Aõhebo rotÿÿnykemy ihÿre. Kia tahe aluuna inatyhymy biteòsinyke.

¹⁹⁻²⁰ Kiawese iny reeryreny inatyhyna mahãduwo-ki ratximyhÿre. Jiarÿ arahòtinykeki. Jiarÿ aõkobo ityhydÿÿdumy watximahãre. Deuxu warayky riwiòhenany ratxireri. Deuxu warayky ratyre raraykywydynanyhÿre. Tii ibutumy aõ rieryre.

²¹ Waluuna mahādu, ruberuōhyymyh̄re tahe iny ityhyd̄ȳdu mahādu-ki ratximyh̄re wana rieryreki Deuxu iny rityhynyre.

²² Tahe aōmy iny rexitōenykeki tii inydee kidiwahinyke. Iny dori ibede ywina rybe rityhynymyh̄re. Deuxu deewimy iny riwinymyh̄re.

²³ Kia heka Deuxu bedede ywina rare. Jesuisi Kristu, iriōrenimy rikityhynykemy. Tule iny wiluuna wiluukemy. Iwese tabede ywina rybe diwahinyde wese rarekemy.

²⁴ Inyō Deuxu bedede ywina rybe rityhynykeki, Deuxu-wana rareke. Tii-wana ratxikemy. Kia wese heka iny rieryrenyre Deuxu-wana iny ratxireri. Deuxu Tatytybytyhy dori inydee riwahinyre.

4

¹ Waluuna mahādu, ibutumy rybe bityhynybenyōke inihe ityhyd̄ȳrenyōmy. Tai biurihike iny rybe Deuxu-ribi inatyhy aōbo ada aōkōre aōbo. Sōwemy rybedu mahādu rōhōnymyh̄re. Tahe inatyhymy Deuxu rybemy rybedu aōkō rare.

² Kiamy Deuxumy rybedu mahādu inatyhymy bierykre, inyō rarybekeki: Jesuisi Kristu hābu wesemy nade, tii inatyhy Deuxu mahaduō ih̄re.

³ Inyō kiamy rarybeōkeki, tii Deuxu mahādu aōkō ratximyh̄re. Kia Kristu òluduō rare. Tamy taholamahāte kanakreò, tahe, kia ratximyh̄re.

⁴ Wariōre wese, kaiboho Deuxu mahādumy toite. Rybedu inatyhy aōkō rare, kia ruru tetatenyte. Deuxu dori aworeny-ki ratximyh̄re Deuxururu, Diabo ruru ratyre rare.

⁵ Inatyhymy rybedu aōkō aōmyd̄ȳnana binamy relyymyh̄re. Tii dori ka bedede aōmyd̄ȳnana bina mahādu rare. Tahe ityhyd̄ȳdukōdu mahādu tamy roholamyh̄re.

⁶ Inyboho Deuxu mahādu roire. Inyō Deuxu rierykeki, inydeereny roholamyh̄re. Inyō Deuxu rieryōkeki, inydeereny roholaōtyhy. Kiamy rikierymyh̄renyke inatyhyna mahādu inatyhyna aōkō mahādu.

⁷ Waluuna mahādu, wiluumy rakatximyh̄reny. Luuna dori Deuxu-ribi nade. Inyō luukeki, Deuxu-ribi tibie rare. Iny Deuxu rieryre.

⁸ Inyō luuōkeki Deuxu rieryōre. Deuxu dori luuna rare.

⁹ Kiawese inyboho rieryrenyre Deuxu inyluuremy ratxire. Deuxu Tariōre sohojile diteōnyde bedede-ò inyboho Iriōre-ki umy t̄myra-ki rahakemy.

¹⁰ Kia heka luuna rare. Juhuu Deuxu iny tuu aōkō rare. Tii tahe inyluure. Tule tariōre diteōnyde inyōraru òwy òwyd̄ȳnanykremy.

¹¹ Waluuna mahādu, Deuxu inyluurenytyhyreki, tai tahe inyboho wiluumy rokoireke.

¹² Tiu Deuxumy inyō robiōhykyre. Inyboho wiluumy r̄yikeki, Deuxu inywo-ki ratxike. Tai tahe inatyhymy Deuxu luuna inywo-ki ratximyh̄re.

¹³ Deuxu iny-ò Tatytyby riwahinyre. Kiamy tahe inyboho rieryrenyre tamahādu-ki ratximyh̄re. Tule rierymyh̄reny tii iny-wana ratximyh̄renyre.

¹⁴ Deuxu Riōremy inyboho robirenyra Tulobixidumy inyboho roire. Tuu adeereny relyyri. Deuxu Tariōre diteōnyde iny tarasadumy rarekemy.

¹⁵ Inyō rityhynykeki idi rarybekeki: Jesuisi Deuxu Riōre rare, tii Deuxu-di tawo-ki ratxireri. Tii Deuxu-wana ratxireri.

¹⁶ Inyboho rieryrenyre Deuxu inyluurenyre. Kia iny rityhynyrenyre. Deuxu heka luuna rare. Inyō luuna-ki ratxihiyykeki Deuxu tii-wana ratxihiyyke. Tii Deuxu-wana ratxihiyyymyh̄re.

¹⁷ Iny luunareny Deuxu-ò rauhenyōreri. Tai tahe Deuxu wiribi ritxuakre kia txuu inyboho kiatxulau ruberuōtyhy. Iwese tii ratximyh̄re wese inyboho kabede-ki ratximyh̄renyre.

¹⁸ Inyō luuna-di ratxityhykeki, tii ruberuōtyhy. Luunatyhy brebuna-di rehumyh̄re. Aōhōk̄myd̄ȳnana brebuna kidiwahinyleke. Inyō brebuna-di ratxikeki, tamy aōh̄k̄my d̄ȳnana kanakre.

¹⁹ Juhuu Deuxu inyluurenyre, tai tahe inyboho iluurenyre.

²⁰ Inyō rarybekeki: –Jiar̄ȳ Deuxuluure. Tai tahe tii ityhyd̄ȳdu seriōre luuōkeki, tii ruidu rare. Inyō taityhyd̄ȳduseriōre luuōkeki, timykibo Deuxu luummy rarekemy iximy rōhōtinyke Deuxu dori tiu tuu robiōhyymyh̄re, taseriōremy tahe robihyky ih̄re.

²¹ Kia bede ywina rybe heka Kristu inydeereny riwahinyre: Iny Deuxuluummy ratxikeki, tule tii taityhyd̄ȳdu seriōre luummy ratxikre.

5

¹ Jesuisi inatyhymy Kristu rare, Deuxu deōd̄ȳna rare, inyō rityhynykeki, tii inatyhymy Deuxus̄ mahāduwo-ki ratximyh̄re. Inyō Deuxu luukeki, tule iriōre luukre.

² Inyboho Deuxuluukeki tarybe ywina rikiywinykeki, tai Deuxu tibied̄ȳna mahādu luummy rikieryrenyke.

³ Deuxu rybe ywina rikityhynykre, irybe ywina dori isiraōre. Tai inyboho Deuxu luuna riteōsinykre.

⁴ Deuxus̄ mahādu bede aōmyd̄ȳnana bina bina ruru ritamyh̄re iny Deuxu rityhynyrekeriki, kia bede bina bina ruru ritareri.

⁵ Mo tahe kia ijesu tarasadure. Inyō Jesuisi Deuxu Riōre raremy rityhynykeki, tii bedebina bina ijesu tarasadu rare.

⁶ Jesuisi Kristu nade. Inyō tii riratisebenryre idi rare rurukremy tahālubu ritxiwikremy. Rexiratisebenrykemy sohojile aōkō nade, tule tahālubu ritxiwikemy nade. Kiamy heka Deuxu Tyytyby tuu rarybere. Deuxu Tyytybytyhy tahe inatyhymy rare.

⁷ Inataō aōmyd̄ȳnanamy inydeereny rarybere: Deuxu Tyytybytyhy ijōre, Jesuisi ixirati sebed̄ȳna ijōre, Jesuisi rubud̄ȳna ijōre.

⁸ Kia inataō aōmyd̄ȳnanamy wiwese wiweselemy rarybereri.

⁹ Hābu rybe iny rityhynymyh̄re. Deuxu rybe hābu rybe ratyre rikityhynymy rakatximyh̄renykre. Kiamy Deuxu Tariōremy rarybereri.

¹⁰ Inyō Deuxu Riōre rityhynykeki, aōbo inatyhy ixidee rieryre. Inyō rityhynyōkeki, tii Deuxu-di ruidumy rōhōtinyreri. Tii dori rityhynyōreri timybo Deuxu tariōremy rarybere.

¹¹ Kia rybe rare: Deuxu inydeereny umytuedeōna riwahinyre. Tii tiu umy ituedeōna iriōre-ki inyboho rakaharenkyke.

¹² Inyō Deuxu Riōredikeki, tii umyt̄myra tuedeōna-ki rahake. Inyō Deuxu Riōre-di aōkōkeki, tii umyt̄myra tuedeōna-ki tahasaōna.

¹³ Kia aōna aōna adeereny retyyritinyre kaiboho umytuedeōna-di atxitenyteri bierybenykykemy. Deuxu Riōre tetyhynytenyete.

¹⁴ Inyboho Deuxudeewimy rexitōenymyh̄renyreu, Deuxu iny-ō roholamyh̄re. Kia tahe inatyhymy rybena rare.

¹⁵ Inyboho rierykeki tii inydeereny roholamyh̄re, tai rierymyh̄reny tii inydeereny riwahinyke aōmybo iny tamy rexitōenyre.

¹⁶ Iny ityhyd̄ȳdu seriōre rubu-ō aōkō òraruna-txi resekeki, tamy Deuxu-ò rexitōenynenyke, Deuxu kia riwiōhenanykemy ixiby Deuxu-ò ròðsekemy. Tii rubu-ò òraruna-txi resekeki, jiar̄ȳ adee ararybeōkre tamy bexitōenykemy.

¹⁷ Ibutumy òbiti aōkōkeki, òraruna rare. Òraruō rubud̄ȳnahyky kidiwahinyōkre.

¹⁸ Inyõ Deuxu-ribi tybiekeki, òrarunahyy-ki rareõtyhy. Kia inyboho reeryrenyre. Deuxu Riòre ryrubunymyhỹre. Diabo iribi ròtaõtyhy.

¹⁹ Deuxuhõrõ inyboho roire. Kia inyboho rieryrenyre. Kabede bina mahãdu taaõmydỹỹna-wana Diabo hõrõ rare.

²⁰ Tule inyboho rieryrenyre: Deuxu Riòre inatyhymy kaò nade. Tii rierynanyre mobo Deuxu inatyhy raremy. Deuxu-wana inyboho ratximyhỹrenyre, inyboho-dori Jesuisi Kristu Deuxu Riòre-wana ratximyhỹrenyre. Kia heka inatyhymy Deuxu rare. Kia inatyhymy umytuedeõnamy rare.

²¹ Wariòre wese, bexihãruke ibutu bedèòraruna lau.

2 Juaõ

2 Juaõ Ryberiti

¹ Jiarỹ dohodỹỹna matuari mahãduõ warybe rare. Watyyriti rewahinyreri Deuxu ywisidỹỹna hãwyyõ-ò, iriòre-ò. Jiarỹ ibutumy inatyhyerydu mahãdu-wana tiiboho inyluutyhyrenyre.

² Inatyhyna dori inyworeny-ki ratxireri. Ratxityhyhyemy ratxike.

³ Kia dori inatyhy inydeereny tate luuna-di. Deuxu deysana, ruxetòena, ywina adeereny kanakemy watzimahãre Deuxu Waha-ribi, Jesuisi Kristu, Iriòre-ribi.

⁴ Ariòre mahãduy-ribi inatyhymy ijõ ityhydỹỹdumy ralore. Kia reeryreu, jiarỹ wadeysatyhyre ariòre Deuxu bede ywina rityhynyreeriki.

⁵ Adeẽ arexitòenykre hãwyy. Bede ywina rybe tỹmyra rewahinyreri wese aõkõ rare. Juhuu-ribi teeryte. Urile bede ywina hetxina õhõti reijer-adỹỹnyreri. Kia heka rare: iny wiluukemy rakatximyhỹrenykemy.

⁶ Bede ywina rybe rikityhynyhyykeki, kia heka inatyhy luuna rare. Kia bede ywina juhUU Deuxu-ribi taholate. Tuu txuõ txuõlemy biwinyke.

⁷ Sõwemy hãbu itxenadỹỹdu tyhy kabede-ò dòhònyde. Tiiboho Jesuisi hãbuwesemy nade rityhynyõlemyhỹre. Kia itxenadỹỹdutyhy tule Kristu òludutyhymy roire.

⁸ Tamyreny bexiebeny, inyaõmydỹỹnana aõmysỹdỹỹnatyhy-di ritaremy iõkõkemy, Deuxu wahidỹỹnaòwy ibutumy ritakemy.

⁹ Inyõ Kristu erydỹỹnana-ribi ròhònykeki tule iwitxira erysyna rierynanykeki, tii heka Deuxu hõrõ aõkõ rare. Inyõ Kristu erydỹỹnana-ribi ròhònyõkeki, tii Deuxu dire iriòre dire.

¹⁰ Tai tahe itxenadỹỹdu Kristu erydỹỹnana erydỹỹdu aõkõ aheto-ò rehemynykeki, uritere iròtedỹỹõmy, irybedỹỹõmy.

¹¹ Inyõ rirybenykeki, iaõmydỹỹnanabina-ò riwiòhenanyreri.

¹² Jiarỹ warybe sõwemy adibutumy wãhãde. Urile tyyriti-di ariritinyõkre. Arorarenymy dori arakemy watzireri. Kiamy rybe sõwemy ròhònykre inysõwemy reysakremy.

¹³ Aseriòre Deuxu ywisidỹỹna mahãdu senadu, kia riòre tarybe wehityhyna adee riwahinyreri. Kie.

3 Juaŋ

3 Juaŋ Ryberiti

¹ Jiarŷ, dohodŷŷna matuari mahāduŋ rare. Wabiŋwa-ŋ, Kaio-ŋ watyyriti rewahinyreri. Inatyhymy aluomy watximahāre.

² Waliina, juhuutyhy Deuxu-ŋ arāixitŋedŷŷnyra aaŋmydŷŷna tule aumy wihikŷhykymy mabekemy, iwese atyytyby awire wesele ratxireri.

³ Inyseriŋre wese aribi rehemynyrenyreu, wako relyyrenyre umy iwese kai ŋbitimy tate wese tule inatyhyna-ki tateri wese. Tai wawo reysamy watximahāre.

⁴ Jiarŷ raholamahāreu wariŋre wese Deuxu inatyhyna rityhynyrreriki, kia ibutu ratyre wawo riteysadŷŷnytyhyre.

⁵ Kai tahe, Kaio, kowa inyseriŋre tule iwitxira ludu seriŋre teeryŋteki, tewiŋhenanyteu aŋmydŷŷnana wihikŷ tewinymahāte.

⁶ Inyboho wirotyra-wana, kia hābu iny seriŋre aluunamy rarybera. Ibedetŷinana-ŋ biwiŋhenanykeki, aŋwihikŷ biwinymahāke. Tuhyykeki Deuxu deewimy atximahāke. Tii dori iny-wana Deuxu inatyhyna-ŋ raaŋmysŷdŷŷnykre.

⁷ Kia dori kianimy rŋhŋnyre. Ityhydŷŷdukŋdu mahādu-ribi aŋ ritaŋhykyre.

⁸ Kia wese tahe tuu rikiwiŋhenanymyhŷke. Tai tahe Deuxu aŋmydŷŷnana tŷnydŷŷna riwiŋhenanymyhŷre.

⁹ Ratyyritinymahāre kowa ityhydŷŷdu mahādu-ŋ. Inyŋ tahe warybe-ŋ roholaŋmyhŷre. Tiibocho dori juhuludukemy ratxireri. Diŋtesi inire.

¹⁰ Aŋu arehemynykreu, ararybekre aŋmybo tii rotŷŷnyre tule aŋbinamybo rarybere inymy. Aŋ tiihykyle aŋkŋ, iny ityhydŷŷdu seriŋre hāwāwitxira ludu ixidee tarora-ŋ rimyŋtyhy. Inyŋ kia seriŋreŋ rimykeki, tii riixāwidinyre idy-ribi tii seriŋredyna-ŋ dohodŷŷdu mahādu-ribi hitximy riteŋnyre.

¹¹ Waleina, kai Kaio, ŋrarudu mahādu aŋhebo rotŷŷnyre wese aŋ kai tate. Iny wihikŷ wese kai tate. Inyŋ aŋwihikŷ riwinykeki, Deuxu hŋrŋ tii rare. Aŋkŋkeki Deuxu rieryŋre.

¹² Ibutumy Dimitiu dee inatyhyna-di aŋwihikŷmy rarybere. Inybocho tule. Kaile teeryte inybocho inatyhy rarybere.

¹³ Sŋwemy rybe adee ariwahinykemy watxireri. Tahe aŋkŋre tyyriti ritina-ki.

¹⁴ Eleelemy arakemy dori watxireri aroramy tai tahe widee rakarybekre.

¹⁵ Deuxu awo-ki riyrykemy idi watxireri. Abiŋwaboho kaki awehityhy risareri. Wabiŋwaboho sohoji sohoji kowa-ŋ warybe wehityhyna biwahinykre.

Judas Judas Tyyriti

¹ Jiarỹ Juda rare. Jesuisi Kristu deòdu jiarỹ rare, Txiau exi wahe. Deuxu heka aluudu rare. Tii arayrubunymyhỹre òraruna-txi reseke lau. Tai òbitimy ahãbenyke Kristu nonana-ò. Watyyriti adee rewahinyre.

² Ruxetòena adee kanakemy watzireri Deuxu-ribi. Ywina sówemy aworeny-ki atxibenykemy adireny watzireri. Wiluuna sówemy akireny ihỹke, Deuxu-ribi.

³ Jiarỹ kaiboho ibutumy aluurenyre. Deuxu ibutumy inyboho ritarenyre. Kia ibutumy ariritinykemy idi rahõtinyra. Inyboho heka ibutumy Deuxu sỹ mahãdu roire. Iwese iny rityhynymyhỹre wese tii iny ritỹnynymyhỹre. Iribi tahe iny mahãduò adee nade iny inytyhyna riwitxiradỹỹnykemy adireny ratxireri. Iny heka inatyhyna biyrubunybenyke òbitimy rarehyyke.

⁴ Kia òbitikõ mahãdu ayreny-ò ralòra. Tiiboho Deuxu rityhynyõre. Deuxu inydeereny awi heka rare òraru-ribi iny ritarenyreki. Kia òbitikõ mahãdu tahe kia wese rarybere: –Òraru-di atxikeki, kia aõ aõkõ rare. Deuxu dori iny òraru-ribi ritare. Jesuisi iny wedu rare, iny Iòlò wahe. Tiiboho tule rarybere: –Deuxu bityhynybenyõke. Deuxu ihetxiu rieryre kia wese tiiboho rarybekemy. Tai tahe tii ritỹnynymy ihỹre tiiboho bedeheòtybina-ò riteònyke.

⁵ Deuxu inatyhymy riteònykre ritỹnynyraki. Iwese tii ihetxiu iny-di rehure wese, tii wiji iny rehukre. Judeu mahãdu heka Deuxu ritare Egito bede-ribi. Idi tahe imahãduò rityhynyõre. Tai tahe imahãdu rahurenyre. Kia teerytenynte. Itxi õhõtireny reakre.

⁶ Ỹju mahãduò tule juhuru Deuxu deòdumy ihỹre. Idi tahe taaõmysỹdỹỹna ririre. Tai Deuxu ròtena bedeò-ò riteònyre. Bedelorohokỹ ihỹre. Kabederawo-ki roire. Tiu heka iribi riòlòdỹỹnyõtyhy. Deuxu bededỹỹnana riywinymy roimyhỹre aõhõkỹmy isỹdỹỹnana-ò. Tai tahe ỹju wesemy kia òbitikõ mahãdu rỹike, Deuxu itỹnydỹỹdumy rỹikre.

⁷ Ijõ ijyy teeryte. Inatxi hãwã ihetxiu ibinatyhy rare: Sodoma, Omora-wana. Ijõ hãwã tule ibinatyhy rare. Kia hãwã yludu mahãdu ibutumy heka òta òtanale riwinymyhỹre. Hãbuò dori wiwana rexiòrarunymyhỹre, hãwyy tule wiwana wahe. Tai tahe Deuxu ihãwã rahure. Biu-ribi heòty diteònyde. Idi Deuxu dibedeerynyde òraruna derare tii. Tiiemy aõhõkỹmy dỹỹnana riwahinyre.

⁸ Kia tule òbitikõ mahãdu-ò riwahinyre. Tiiboho dori ibinamy riwinymyhỹre. Aõbinalemy raraykynymyhỹrenyrene, taumyreny risurisunymyhỹrenyrene òraruna-di. Deuxu rityhynyõre tule ỹju ruruna-di risinymyhỹrenyrene.

⁹ Tiiboho Mieli wesemy aõkõ riwinyre Mieli heka Deuxu ỹju dinoduò rare. Tii Satanasi-wana wiribi òtummy rarybemyhỹrenyrene, Moisesi umy òraru-ki. Mieli heka ritirỹmyhỹre iummy ridyke lau. Iu Mieli Satanasi-ò rarybereu urihimyò rityhynymy rarybere, ixinohõtibile ritehiõtyhy. Urile rarybere: –Deuxule aratehikre.

¹⁰ Kia òbitikõ erydu mahãdu aõbina riwinymyhỹrenyrene. Aõbinalemy tyytyby bede aõmydỹỹnanamy rarybere kia rieryõmahã hãrele. Kabede aõmydỹỹnanale rierymyhỹre iwese ibutu iròdu mahãdu rierymyhỹre wese. Tiiboho heka iròdu aõna aõna nohõtijuranadile aõna aõnamy rotỹỹnymyhỹre. Tai rexi-hurenyre.

¹¹ Deuxu heka kia mahādu kiditynynyke, Kaĩ reòsamy raremyhỹ wese dori reòsareki. Aõbo Kaĩ ixidi riwinykemy rõhõtynymyhỹré heka riwinyymyhỹre. Kia mahādu tule Balaaõ wesemy riwinyymyhỹre. Balaaõ nieru sõwemy ritakemy ixidi ihỹmyhỹ. Tai tahe Deuxudeewimy riwinyõre. Tule kia mahādu Kore wesemy riwinyymyhỹre. Deuxu òludumy rexisỹnyre. Tai rexihurenykre iwese Kore mahādu rexihure wesemy.

¹² Kaiboho wiluuna roxina-ò tebutunyteu, kia mahādu tule ayreny-ò ralòra. Aworana bedehesi tiiboho ribinadyỹnymyhỹre òbitimyno rieryõreki. Urile rexihydynymyhỹre, inywitzira-txi tõhõti reaõhyymyhỹre. Iwese yhy debure wese tiiboho roire. Urile yhy biu ridyõtyhy. Rõaõtyhy. Sõwemy taheka relemyhỹre, ihārele aõhomy aõkõ namyhỹde. Òwòru bederaty wahidyỹdu wese tiiboho roire. Iratydikemy ratxireriu, ihārele aõkõlere. Òwòru rubu wese roire tiiboho. Raòromyhỹre, rurumyhỹre. Kia wese heka kia mahādu rare.

¹³ Kia òbitikõ erydu mahādu tiu ele risaõhyymyhỹre. Ahohokỹ aõwetari òbòhòkỹ idi rehumyhỹre wesemy tiiboho inyrenyrene. Iwese òbòbexi-di rònòmymyhỹre wese. Iòraruna òraru-ki aõbina bina iribi rònòmymyhỹre. Tiiboho dori Deuxu inatyhyna ririrenyrene. Iwese taina resemymyhỹre wese tiiboho iribi resemymyhỹrenyrene. Deuxu kia mahādu-di ritỹnynomy riteònyke bede luruhukỹ-ò. Iribi rònòmnyõtyhy.

¹⁴ Enoi heka Adaõ dee yreõ rare. Adaõ juhū hābu rare. Debòinatxi riòreky-ribi Enoi rare. Enoi Adaõ riòre roko rare. Ihetxiu Enoi rarybere wijinabòdu mahādumy. Iwese òbitikõ erydu mahādumy roirekre. Enoi rarybere Kristu nonanamy: —Tii kanakre tamahādu sõwe-wana.

¹⁵ Idi ibutumy iny ritỹnynykemy. Inyõ tii taaõhòkỹmyna aõhòkỹmy rotỹnykre òraruna òraru-ki. Ibutumy òrarudu mahādu rehukremy Deuxu-my ralahatxinanymyhỹreki.

¹⁶ Tiiboho rexirahemyhỹre, tiu reysaõhyymyhỹre, aõdibo tamywimy rabinadyỹmyhỹreki ratxikelemy. Rarybenihikỹmyhỹre. Riwiòhenanymyhỹre aõ ritamyhỹre xiery.

¹⁷ Waluuna mahādu, õhõtireny reake aõmybo Wanyrỹ Jesuisi Kristu teòdỹna mahādu juhū raryberé.

¹⁸ Tiiboho adeereny rarybere: —Bededỹnana roomy tahe ijesu kòdòhònykre, ixidee wilemy tuu rotỹnyymyhỹre.

¹⁹ Kia hābu iny wiribihiximy risỹnykemy, bede aõmydỹnana luudu mahādu. Deuxu Tyytybytyhy-di aõkõ ratximyhỹre.

²⁰ Kaiboho waluuna mahādu aityhydỹna-di arurumy bitỹnynyke, Deuxu Tyytybytyhyna-di bexitòenyberihyy. Deuxu luunay-ki iximy boibeke.

²¹ Wanyrỹ Jesuisi Kristu ruxetòena biraòbenyke. Tii heka umytedeõna kidiwahinykre.

²² Biwiòhenanymyhỹke ka ritxiõnomy rỹira mahādu.

²³ Kia mahādu iworonawe-ribi wese bitake. Ijõ-ò ywina-di brebuna-di bisỹnykemy taòraruna deramy bekowabenyke. Iòraruna aõna aõna-ò akyreny reake.

²⁴ Òraruna lau taruru-di Deuxu arayrubunomy ratximyhỹre. Tii arateòsinykre yramy, tako-ò wowydyna-wana.

²⁵ Wowydyna, àlàdỹna, ruruna, Iòlòtyhydỹna, iny Deuxu sohoji-ò kanakemy watxireri tule Inynyrỹ Jesuisi Kristu iny tarasadu-ò. Kata juhū-una-ribi, wiji aõu aõu-ò rahyykre. Kie.

Apocalipse Deuxu heka Joaõ-ò bede ritỹnynyre

¹ Katyyriti-ki tahe bede aõmydỹỹnana roire. Kia heka Deuxu Jesuisi-ò ritỹnynyre. Idi Kristu Joaõ-ò ritỹnynyre. Aõhebo ele elemy rotỹỹnykre heka inydeereny riteòsinyreri, teòdu mahãdu wahe. Ýjuõ heka Kristu riteònyre Joaõ-ò ibutumy relyykemy, ritỹnynykemy.

² Iribi tahe Joaõ ibutumy relyyre. Kaki heka riritinyre. Kia heka ijyy rare. Jesuisi Kristu inatyhyna rare.

³ Inyõ katyyriti-di rariakeki, eysamy ratxireri. Inyõ kiamy roholakeki, eysamy ratxireri. Inyõ kia rityhynykeki, eysamy ratxireri. Bededỹỹnana dori iòhòmy ratxireri. Kia ibutumy rotỹỹnyke.

⁴ Jiarỹ heka, Joaõ wahe, dohodỹỹna mahãdu-ò watyyriti rewahinyreri. Debò inatxi reurò mahãdu Asia bede-ki watyyriti rewahinyreri. Ruxetòena, ywina-wana adeereny kanakemy idi watxireri. Deuxu-ribi dori ratxireri, ihetxiu rare, tule tiemy rarekre. Tii dori ruxetòena adee riwahinykre, tule irynana tyytyby riwahinyke, debò inatxi reurò mahãdu wahe.

⁵ Jesuisi Kristu tule adee kia riwahinykre. Tii tahe inatyhyna ijyydu rare. Tii juhUU rubu-ribi ixixadu rare. Tii ibutu iòlò dinodu heka tii rare. Tii inyluure. Inyòraru iny-ribi tii riwatarenyre tahãlubu òraru-ki.

⁶ Tii Xiwe wahidỹỹdu mahãduõ ixidee riwinyre, inyboho wahe. Ibutumy ityhydỹỹdu heka xiwe wahidỹỹdu mahãdu wese rare, iòlò mahãdu wese wahe. Deuxu rekealàmỹhỹke. Ibutumy wowydyna, ruru-wana heka Jesuisi Kristu-ò rawahidỹỹmy rarekre ihyy hyymy. Kie

⁷ Beteheke, tii biuwetykywo-ki naderi. Ibutumy iny tuu robikre. Irubudỹỹdu tule tuu robikre. Ibutumy iny rahinykre, robukre iòraru-ki. Inatyhy rare. Kie.

⁸ Jiarỹ AA rare YY rare. JuhUU ludu rare, tule ikonana ludu rare. Deuxu jiarỹ rare ibutu ruru wahòrò rare. Aõu aõu jiarỹ watxiwãhãre.

⁹ Jiarỹ Joaõ rare, aityhydỹỹdu seriòre wahe. Jiarỹ tule awese aõhebo ratỹỹnyre. Jesuisi Iòlòna òraru-ki. Patmos bedebute-ki jiarỹ ratxire, ròtena wese heka tai ratxire. Jesuisi inatyhyna dori retỹnynyre.

¹⁰ Nobiu txuõ heka jiarỹ aõma Deuxu Tyytybytyhy wadee dobehede. Iu tahe rybeõ-ò raholare, juròna wodỹỹ wese heka rare.

¹¹ Tahe wadee rarybere: –Biritinyke aõma ibutumy aõbo kai bobikre. Ibutumy dohodỹỹna mahãdu-ò kia tyyriti biwahinyke. Ka tyyriti tahe biteònyke heka debò inatxi reurò hãwã-ò: Efesu hãwã-ò, Esmirna hãwã-ò, Pergamo hãwã-ò, Txiatira hãwã-ò, Sardesi hãwã-ò, Filadelfia hãwã-ò, Laodisia hãwã-ò.

¹² Retehera wahewo-ò mobo wadee rarybereò. Tahe debò inatxi reurò loosòna mynynalemy rabira, womati tỹrỹrỹyle wahe.

¹³ Itya-ki tahe hãbuõ wese rare. Ityky urarehe heka ratxire. Iwereysana heka womati tỹrỹrỹỹ heka rare wyò wòtena-ki roire.

¹⁴ Irade iurahakỹ ratximyhỹre. Irue heka heòty wese rare.

¹⁵ Iwa tahe bronze womati wese rare. Irybe wodỹỹ heka bee ijiranahakỹ wese heka rare.

¹⁶ Iruruwe-ribi debò-ki heka taina debò inatxi reurò sòwe rimyre. Irybe mayrehe wiòtxu wese iry-ribi ròhònymyhỹre. Iòsỹny tahe txu tòtee wese heka rare, itỹnytyhyre.

¹⁷ Kia ibutumy rabireu, jiarỹ resera bedè-ò rubu wesemy. Tii ruruwe-ribi debò watyre-ki ritidire, rarybere: –Buberuõtyhy! Jiarỹ juhuludu rare, ihewoludu rare.

¹⁸ Jiarỹ rurure, iribi tahe rexixare rubu-ribi, aõu aõu tahe jiarỹ watzireri. Tiu aruruõtyhy. Rububede dinodu heka jiarỹ watzireri, ityre waruru rare.

¹⁹ Biritinyke ibutumy tuu tabita wiji. Tule aõbo idi kanakemy biritinyke.

²⁰ Adeë aritỹnynyke aõbo kia ibutumy rare. Debò inatxi reurò taina heka wadèbò-ki rare. Kia taina heka dohodỹỹna mahãdu ýju wese rare. Loosõna mynyna heka dohodỹỹna mahãdu wese rare.

2

¹ Kia heka biritinyke Efesu dohodỹỹna ýju-ò: –Kaa heka inyõ rybe rare. Tii taina debò inatxi reurò rimymy idi rỹimyhỹ iruruwe-ribi debò wahe. Tii loosõna mynyna yky-ki rariareri. Kia womati tỹrỹrỹhỹkỹ-di relere wahe.

² Aaõmysỹdỹỹna wiwihikỹ reeryre, awoxierysytere tule. Hãbu bina tiu aitxerenaõna toite. Inyõ Deuxu deòdumy iximy uritere rybedu, teurihitenyke. Kia iruirybe teerytenyke.

³ Kaiboho tawoxierysterenytenyke. Tule aõhõkỹmy tatỹỹnytenyke waòraru-ki, wijile tule wahe.

⁴ Kiaremy tahe sohojile wadee ibinare. Iwese juhoo waluu wesemy aõkõ wiji ahãtenyke.

⁵ Kaiboho heka atyhyna-ribi ahewo-ò taddòsetenyke. Kiaremy ta idi bexinohõtinyinmy bexirãhĩbenyke. Iwese juhoo atximahãte wese, ixityre boibekemy. Kiamy aõkõkeki, aloosõna mynyna ay-ribi aritakre.

⁶ Kiaremy ta akireny sohojile awire wadee. Kaiboho heka Nikolaita mahãdu iaõaõna widỹỹ derarenyre wawesemy.

⁷ Iny rybeõ ijohona mahãdu boholabenyke Deuxu Tyytybytyhy rybe-ò timybo Ityhydỹỹdu mahãdu-ò rarybemyhỹre: –Inyõ òraruna ijesu ritakeki, tamy jiarỹ umytuedeõna ariwahinykre. Kia tahe Deuxu bederaty ritokre, Deuxu oworu-ki rỹimyhỹre wahe. Kia bederaty inyru wahidỹỹdu rare.

⁸ Kia heka biritinyke Esmirna dohodỹỹna ýju-ò: –Kia heka Juhuuludu rybe rare, Ihewoludu rybe rare. Tii rururibile rexixare.

⁹ Aõhõkỹmy dỹỹnana reerymyhỹre. Uriterenodu wesemy toite. Ihãre tahe aõna aõnawiwi ahõrõreny rare. Aòludu mahãdu umy rarybereri ibinamy. Tiiboho Satanasi mahãdu roire. Judeu mahãdu aõkõ roire tiiboho tuu rarybèrehãre.

¹⁰ Buberuõtyhy kaiboho! Aõhõkỹmy dỹỹnanaõ kanakre debò wiò txumy wahe. Tahe buberuõtyhyke. Ròtenawo-ki boibenykre. Burubenyke hãrele heka òbitimy biwatyhynybenyke. Iribi tahe irudỹỹna rataana adeë ariwahinykre.

¹¹ Kaiboho nohõti-di mahãdu, boholake timybo Deuxu Tyytybytyhy heka ityhydỹỹdu mahãdu-ò rarybemyhỹre.

¹² Kia heka biritinyke Pergamo dohodỹỹna ýju-ò: –Kia inyõ rybe rare. Tii mayrehe wiòtxuree dire:

¹³ –Jiarỹ reeryre asỹ, ahãwã wahe. Kaiboho Satanasisỹ-ki tasỹnyteri, irynana rareri wahe. Tahe Kaiboho aityhydỹỹna teriõtenyke. Tai tiiboho warybedu Antipasi òbiti rirubunyhãrele.

¹⁴ Ihãre tahe akireny sohojile wadee ibinare. Ayreny-ki inyõ Balaaõ erydỹỹna rityhynyre. Tii ihetxiu Balake òraruna-txi aatysydỹỹmy ribedeerydỹỹnyre resedỹỹkemy. Tii Israeli mahãdu-ò rarybere:

–Xiwenã aõma ide tahe biròbenyke tule òta tahe urihimyo tahe ibinare.

15 Tule ayreny-ki tahe Niolaita tohodỹỹna ijõreny rityhynyre, timybo rexiòrarunanykemy. Kia ibinare wadee.

16 Tai marybeke tiiboho rexirahĩkemy idi iribi rexixãwidỹỹnykemy. Tukõkeki, anakre warymayrehe wiòtxuree-di iòludumy areakre wou-ki.

17 Iny nohõti-di mahãdu, boholake Deuxu Tyytybytyhy rybe-ò timybo Ityhydỹỹdu mahãdu-ò rarybemyhỹre: –Inyõ òraruna ijesu ritakeki, tamy biu-ribi rỹsỹna rỹikre. Manauratyre-ki heka nii tỹmyra raritimy roire. Òmo nii rieryõre. Tunidukrele rierye.

18 Kia heka biritinyke Txiatira dohodỹỹna ỹju-ò: –Kaa heka Deuxu Riòre Rybe rare. Irue heka heòty wese rare. Iwa bronze womati wese rare.

19 Aaõmysỹdỹỹna reeryeri, luuna, ywina, tyhydỹỹna, juhUU ratyre wiji aaõmysỹdỹỹna.

20 Kiaremy tahe sohojile wadee ibinare: Kaiboho heka Jezabel teijemahãtenyete. Kia hãwyy dori Deuxumy rybedu ixi-di rare. Ihãre tahe òtaòtamy, xiwe rỹsỹmy rotohodỹỹmyhỹre, ritxoo hõrõ wahe.

21 Jiarỹ tule txiò reijere òtaòta-ribi ixãwikemy. Tahe tuuõhyyre.

22 Idi herina-ò arilidikre ihãbu mahãdu-wana. Tai aõhõkỹmy rotỹỹnyrenykre. Tiiboho kia rexirãhĩnyõrenykeki, tuu ele elemy ariwinykre.

23 Iriòre bina arirubunykre. Tai ibutumy aõwidỹỹnamyna ityhydỹỹdu mahãdu riwaerykremy. Jiarỹ heka inywo erydu dori rare. Kiaremyta iny sohoji sohoji ariòwinykre.

24 Ayreny-ki tahe inyõ rỹire. Tiiboho bedeeryna bina rityhynyrenyõre. Tii-boho bedeeryna bina rieryõhyyre. Txioinihe, bede ywina sira aõkõ adeereny ariwahinykre.

25 Iwese kaiboho tetyhynyete wese wiji bityhynybenyhyyre. Ele ele dori arehemynykre.

26-28 Kaiboho heka òraruna ijesu bitakeki, adeereny ruru ariwahinykre. Kaiboho ihyymy wadeewimy biwinybenykeki, bede bede dinodu mahãdumy boibebenyke, iwese ruru Waha-ribi remyra wese wahe. Tamywikeki womati òhòte-di bede bede mahãdu rihukre, iwese butxi ribòhònyre wese wahe. Tule adeereny ariwahinykre aõma biurasò taina wahe.

29 Iny nohõti-di mahãdu, boholake Deuxu Tyytybytyhy rybe-ò, timybo tii ityhydỹỹdu mahãdu-ò rarybemyhỹre.

3

1 Kia heka biritinyke Sardesi dohodỹỹna ỹju-ò: –Deuxu Tyytybytyhy debò inatxi reurò dinodu, taina debò inatxi reurò dinodu kia rybe rare: –Aõhebo tatỹỹnymahãtenyete reerymyhỹre. Arumy anireny ratỹỹnymyhyre ihãre tahe tarumy ahãtenyete.

2 Bexirawahatebenyke ainatyhydỹỹna-ki, urikõ-ribi kiemy ixãwiheny. Deuxuko-ki awityhymy aõkõ ixi-di texiemyhỹtenyete. Kia reerymyhỹre aõmysỹdỹỹnarenny tewinyamahãte.

3 Inatyhyna juhu taholatenytedi, bexinohõtinybenyke. Idi bityhynybenyke aõnanabina-ribi bexirãhĩke. Tukõkreki wasidu wese ierykõmy adeereny anakre.

4 Ihãre tahe Sardesi hãwã-ki inyõ reximymy òbitimy rarekremy ihỹre. Tiiboho wahe-ki tyky lyra urahakỹ-di kanariarennykre kiemy dori òbitimy reximyre.

5 Mobo ròtarennykre, tyurahakỹ-di rexityynyrennykre. Inireny Rutyyriti-ribi aritaõtyhy. Idi Wahakõ-ò wahõrõrenny aritỹnykre tule iỹjuko-ki.

⁶ Kaiboho nohōti-di mahādu, boholake timybo Deuxu Tyytybytyhy heka, ityhydỹỹdu mahādu-ò rarybemyhỹre.

⁷ Kia heka Filadelfia dohodỹỹna ŷju-ò biritinyke: —Kaheka inatyhymy Deuxu deodỹỹna rybe rare, òbitimy nodu wahe. Tii Davi ijò rayna dinodu rare. Tii ijò riraynykeki tiu inyō riratòbònyōtyhy. Tii riratòbònykeki tiu iny riraynyōtyhy.

⁸ Aōhebo tatỹỹnymahātenyete reeryre. Akyhynakōmy atximahātenytemy rieryre warybe dori tetyhynymyhỹtenyete. Tai ijò adeereny reraynyra. Tii inyō riratòbònyōtyhy.

⁹ Bodoholabenykre. Satanasi mahādu heka Judeumy rexininimyhỹre tukōdu hārele. Idi adidydenykre akoreny-ò tatiowotimy kedeseke. Iu aluurenymy riwaeryrenykre.

¹⁰ Aōhōkỹmy dỹỹnana kanake ibutumy iny urihidỹỹmy. Kaiboho warybe tetyhynyta, ywina-di tetyhynyta. Tai ilau arayrubunyrenyke.

¹¹ Ele elemy dori adehemynykre. Ahōrōreny biyrubunyke inyō aribi rawasinyheny arudỹỹna rataana wahe.

¹² Oraruna ijesu inyō ritakeki. Tii ixyby rubumy ruruōkre. Tii Deuxu heto-ki rasỹnyihykre. Deuxuni ityre raritinykre tule Kristuni tỹmyra wahe. Jerusalēni tỹmyra tule ityre raritidỹỹmy rỹikre, biu-ribi dobehede wahe.

¹³ —Iny nohōti-di mahādu, boholake Deuxu Tyytybytyhy rybe-ò timybo ityhydỹỹdu mahādu-ò rarybemyhỹre.

¹⁴ Laodisia hāwā dohodỹỹna mahādu ŷju-ò heka biritinyke: —Kie rybe kaa rare. Tii inatyhyna inatyhy rybe rare. Tii Deuxu-wana bedede relereu, ratximyhỹ.

¹⁵ Aōhebo tatỹỹnymyhỹtenyete ibutumy reeryre. Ainatyhyna-ki inatyhymy aōkō, txiōlemy aōkō toite tule.

¹⁶ Tai tahe iōraru-ki ixi-ribi aratarenykremy rexinohōtinyre.

¹⁷ Kaiboho tarybetenyete: —Waaōwiwi-di roire. Awityhymy watzirenyreri. Wadeereny aō rasiranyōhyreri. Idi urile texibònytenyteri. Kaiboho dori abina, iaōkō mahādu, adehekỹ, aruety toite.

¹⁸ Kia aratohonykre: —Waribi womati tỹrỹrỹhỹkỹ aworibityhy biōbranykre, aityhynamy wiwihikỹ. Tasỹse tyyurahakỹ tule, ade wòtenamy. Tasỹse rueluahina tule, arue ywinamy.

¹⁹ Waluuna mahādu òhòte-di aribedeerynymyhỹre warybemy tule. Tahe eryrewemy aōsusu-ribi bexitabenykre wadee.

²⁰ Bodoholabenyke. Ijò-ki rarymy watzireri. Inyō roholakeki ihetowo-ò aralokre. Tai tii-wana ariroxikre.

²¹ Óraruna ijesu inyō ritakeki, tii wawana waryna-txi ronykre iwese jiarỹ waha-wana nadonymyhỹde wese. Ròtare dori wawouna-ki.

²² Iny nohōti-di mahādu, boholake Deuxu Tyytybytyhy rybe-ò, timybo tii ityhydỹỹdu mahādu-ò rarybemyhỹre.

4

¹ Iribi tahe biu-ki ijòmy rabira rasina wese. Rybeō raholare, jurònajurò wesemy. Iwese wadee rarybere wese. Kiamy narybede: —Mana òwònyke, aōhebo itxōmo rahudi rotỹỹnykre ini ariteòsinykre.

² Iule tahe Deuxu Tyytybytyhy riwamyre. Iu, inyō ryanamy rabira biu-ki.

³ Iòsỹny heka roosònymyhỹre womatiwihikỹ rỹsỹ wese, Jaspe wesena, Sadonio wese. Uwajiō witzira tỹre heka rare iryna rirurawonyre.

⁴ Tahe 24 ryna iryna rirurawonyre. Ityre tahe 24my wedu mahādu ronyre tyyurahakỹ-di. Irati-ki womati tỹrỹrỹhỹkỹ-di rarataanany.

⁵ Biudelaa, biumyta, irynana-ribi dohonyde. Heòtyloo heka debo inatxi reuròmý sòwe iko-ki rÿire. Kia heka Deuxu Tyytybytyhy tuu sòwedú rare.

⁶ Tule iko-ki mana aho roire iuramy raurananyre. Irurawona-ki wiòwiò-ki aõni inaubiòwa ràire, irue sòwe ihewo-ki, iko-ki.

⁷ Aõni delena heka hãlòehékÿ wese rare. Ijõ heka karòtihikÿ wese rare. Ijõ tahe hãbu òsÿny wese rare. Ikonanareny tahe nawiihikÿ dowòmý nade wese rare.

⁸ Ibutumy tiiboho debò sohoji reuròmý tesòwereny. Ta tiiboho tetya wirawyò rawyò irue dire. Tahe tiiboho rexielehynyõhyylemy txumy rummy rawiunumyhy: —Òbitityhy tate, Òbitityhy tate, Òbitityhy tate Inynryÿ Deuxu rurutere. Kai tate, tule kai mabekre.

⁹ Kia heka inaubiòwa boho rawiunyre: —Wowydyna, àlàna-wana ryanana-ki rÿdu-ò, iki kiemy nodu-ò wahe.

¹⁰ Iu tahe 24 wedu mahãdu heka tatiowotimy taòsÿny sutxi ritidimy riwowydynumyhyreny resemý iko-ò. Tamy tarataana-di rehumy raryberenyre.

¹¹ —Wadinodureny, waDeuxureny adee sohojile heka wowydyna, loosòna, àlàna rawahike. Ibutumy dori aõna aõna tewinyte. Adeewimý rÿimyhÿre idi rariamyhÿreny.

5

¹ Ryna-ki rÿdu ruruna debò-ki heka tyyriti werywery wesemy rabira. Tyyriti tahe wirawyò rawyò-ki iriti dire, tii debò inatxi reurò iratòbòna sòwe.

² Ýju ruru ruruhukÿ-my ryrymy dÿÿraxi-di: —Mobo ityhykre tyyriti ratòbòna aresydÿÿdukre iraydÿÿ-ki tule.

³ Tai tahe inyõ ijõhyre: —Biu-ki, bede-ki, surawo-ki ijoõhyre.

⁴ Inyõ ityhyõre iraydÿÿ-ki tamy itxere-ki. Iòraru-ki ta urile jiarÿ rahinymyhÿre.

⁵ Iule tahe matuariõ wadee narybede: —Hiõmyke, betehe ta inihe Juda mahãdu hãlòehékÿ-ò, Iòlò Davi iriõre riõre wahe. Tii dori tyyriti ratòbòna riorokre idi riraynykre, tii sohojile dori wou-ribi ròtare.

⁶ Kiamy tahe rabira, Budoeni Riõre wahe. Tii ryanana ubey-ki rÿimyhÿ. Aõni inaubiòwa ijõre. Tiiboho-wana tahe matuari mahãdu rÿire. Budoeni rurure wesemy rÿire. Iò tahe debò inatxi reurò rare. Irue tahe tule. Kia rare Deuxu Tyytybyõ rare, tii bede bedemy nodu mahãdu.

⁷ Budoeni riõre tahe ryanana-ki rÿdu ruru debò-ribi ditade, aõma tyyriti wahe.

⁸ Iule ta aõni inaubiòwa, 24 matuari boho-wana tatiowotimy rejujure buddeni riõreko-ò. Tii sohoji sohoji wiuna-di, womati tÿrÿrÿhÿkÿ hyna-di ratximyhÿreny. Sohoji sohojiro-ki tahe òwòrusõ wydysilÿnywi-di wese rare. Kia Deuxu tyhydÿÿdu mahãdu ixitòedÿÿna violão wese tule ratximyhÿreny.

⁹ Tiiboho wiutÿmyramy rawiunumyhyreny kamy wahe: —Kai atyhy tate Tyyriti raydÿÿ-ò, iratòbòna eresydu tule. Arubumy heka Deuxu-ò Ixÿju ixÿju teõbranyte. Irybe wixira wixira, ibede wixira wixira iixÿjuna tule.

¹⁰ Iòlòmý tewasynyteny Deuxu dee tule xiwena wahidÿÿny mahãdu wahe. Idi hãwã hãwã ariwedunyenkyre.

¹¹ Ýju sòwetyhymy rabira ryanana werora-ki, aõniboho matuariboho tule. Miliaõ hõkÿmy rasòwerenyre.

¹² Tiiboho rirajuahakÿmy rawiunumyhyreny: —Wowydyna, ruruna, deysana, àlàna, loosòna tamy sohojile rawahinyrenyke buddeni riõre-ò. Tii dori rurure ityhymy

¹³ Tai tahe ibutumy biu iròdu iròdu, suityre iròdu, bera iròdu iròdu ibutumy aõna tule rawiunymyhÿrenyre rynana-ki rÿdu-ò. Budoeni riòre-ò tule kia rawiunymyhÿre. Rarehykyle, rarehykyle heka rarekre. Kie.

¹⁴ Aõni inaubiòwa rirawyònyre: —Kie, Matuari 24 tahe reserenyre iko, kiemy noduko-ò.

6

¹ Tahe Budoeni riòre heka tyyriti ratòbònaõ riòròre. Kiamy rabire. Tule aõni inaubiòwa mahãdu-ò narybede rybenihikÿmy biummyta wodÿÿ wese. Mana ini itxeremy.

² Tai retehere awaru urahakÿmy rabire. Tairÿdu iwaxiwahate dire. Tamy irudÿÿna rataana riwahinyrenyre. Tahe rare wou ròtakremy.

³ Tahe ijò ratòbòna riorore. Ijò aõni tahe narybede inatxina wahe: —Mana ini itxeremy.

⁴ Idi awaru sòhòkÿ ròhònyre. Inyò ityre rÿdu-ò ruruna riwahinyre, wou ritelenykemy bede bedemy. Tai hãbu mahãdu wii rahukremy. Tule inyò mayrehe ityre rÿdu-ò riwahinyre.

⁵ Tahe inataõna ratòbòna riraynyre. Ixyby inataõna aõni rybe-ò raholare: —Mana ini itxeremy. Tai retehere. Awaru lybmy rabire, ityre rÿdu urihina-di tebò-ki.

⁶ Tahe aõniy-ribi rybeò-ò raholare: —Womati nieru sohoji-di heka urihina sohojile heka trigo rawykre, txusohoji aõmysÿdÿÿna òwy wahe. Tule inataõ urihina sevada rawykre, txusohoji aõmysÿdÿÿna òwy. Uritere ta uva-ò, adÿÿ-ò aõhe isÿdÿÿõmykre.

⁷ Tahe inaubiòwana ratòbòna riraynyre, Budoeni riòre wahe. Ixyby inataõna aõni rybe-ò raholare: —Mana ini itxeremy.

⁸ Tai retehere. Awaru bisamadòbòlÿre wesemy rabire. Ityre-ki rÿdu heka Rubu inire, heòty bede rubunana iheludumy. Inyò ityre rÿdu-ò ruru riwahinyre. Tai ròhònyre iny rirubunykremy. Inaubiòwa iny-ribi heka, sohoji rirubunykremy. Wou-ki, rama desemy, rubutyhy-di, iròdu debure-di heka iny rurure.

⁹ Tahe iruyrena ratòbòna riraynyre. Tahe Xiwena wahedÿÿna rawo-ki iny mahãdu rabire Deuxu rybe òraru-ki, tatyhydÿÿna òraru-ki rururenyre mahãdu wahe.

¹⁰ Tiiboho rirajuamyhÿre: —Deuxu Inynyrÿhÿkÿ, kai tyhy tate, òbiti tule. Tiu wexi waòwyreny bilidikre, warubudÿÿduren-ò?

¹¹ Tahe iximynamynamy tyyurahakÿ-di rexitynyrenyre. Tahe tamyreny rarybere urihimyo rexielehynyrenykre. Ijoiireny iwesereny rurukreu riraòrenykremy. Isòwereny rexihureu wahe.

¹² Tahe debò sohoji reuròna ratòbòna riraynyre. Kiata idi suu ramytypare inihikÿmy. Txuu urile rurunyre, ahãdu isòmy relere, halubusò wese.

¹³ Taina tahe sutxi dejujude iwese bederaty yhydebore ritxiwimyhÿre wese.

¹⁴ Biu titxibo ikòre, iwese tyyriti rarasemyhÿre wese. Ibutumy hãwãlò bedebute tule tahe-ri-ribi ratare.

¹⁵ Iu tahe ibutumy iny rexiwore hãloohokÿwo-ò, manahakÿ hewo-ò tule. Tii roire Iòlò mahãdu, bededinodu mahãdu, soldado dinodu mahãdu, ityhy mahãdu irurutere mahãdu, ibutumy ijò mahãdu rexiwore.

¹⁶ Tahe taixiwotena-ribi rirajuamyhÿrenyre: —Waxireny mana heka bedesede rynana-ki rÿdu lau rekexiwòrenykemy. Budoeni riòre debure lau tule.

¹⁷ Deburena txu, kyarana txu heka reare tamy, mobo riijekre.

7

¹ Idi tahe inaubiòwa ÿjumy heka tuu rabire. Tiiboho heka inaubiòwa bedehitxihitxi bedemy rÿire. Tahe rimyrenyre yhyhykÿ tebò-ki heka rimyrenyre. Tiu heka òwòru radeò raykÿhyky roire. Bede-ki aòkò, aho-ki aòkò rebònyra?

²⁻³ Tule ijòmy rabire ÿjuòmy ibryra-ribi rarerimy. Deuxu irumy nonadu hàletena nihikÿ widÿÿna heka diwymy idi nade. Iribi tahe inaubiòwa ÿju-ò tii rryre: –Txiokre inihe. Iwotòmodÿÿòmyke wa suu, bee, òwòru. (Kia ÿju mahàdu dori, bede, bero, wotòmodÿÿòdu mahàdu ihÿre.) Biraòriòreke heka Deuxu hàletena deòdu òru-ò aritidikre.

⁴⁻⁸ Tiwesebo kia ritidÿÿna rimymy idi rare. Tahe raholare heka jiarÿ tiweserebo. Ta 144.000 iny ibutumy. Israeli ijoi waòinatxi reurò kia ijoimy heka ixidee rimyre. Sohoji sohoji ijoi-ribi 12.000 inymy heka rimyre: Juda ijoi-ribi, Gade ijoi-ribi, Asser ijoi-ribi, Naftali ijoi-ribi, Manases ijoi-ribi, Simeaò ijoi-ribi, Levi ijoi-ribi, Issacar ijoi-ribi, Zebulò ijoi-ribi, Jyje ijoi-ribi, Benjami ijoi-ribi, Kia ibutu ijoi-ribi heka 12000 inymy rimyre.

⁹ Iribi tahe sòwemy inymy rabire. Timy heka idi wariramahàduòkre. Ibutu 12.000 hàwã hàwã-ribi wirotyre. Bede ibutu rybe wixira wixira rybedu ibutu ijoi wixira wahe. Tai tahe Budoeniube-ò tiiboho rotamanyrenyre. Budoeniko-txi ryanako-txi wirotyre. Ibutumy tiiboho ityurahakÿlemy roiremy. Horeni iru-di heka roiremyhÿ.

¹⁰ Tahe rryrenyre –irariemy rryrenyre: –Biu-ò hena waDeuxu-ribi nade rynana nihikÿ-ki ronyreri. Tule Budoeni-ribi nade.

¹¹⁻¹² Tahe ÿju ibutumy heka widotyde ryanawerora-ò, tule matuari mahàdu tule iwo-ki. Inaubiòwa aòni ibutumy reserenyre rynana nihikÿko-txi resere taòsana sutxi ritidimy Deuxu kia wowodynamy relere. Kie, myheka rarybere: –Wowodyna, Bedeerydÿÿna, dealàna, loosòna, aruru, aixiòlòdÿÿna. Ibutumy heka kia kanakre inyDeuxu-ò. Rarehykyle, rarehykyle heka rarekre. Kie.

¹³ Tahe wawiò inaubiòwa matuari mahàduò wadee rÿÿraxire: –Kai aòbo teerymahàte kia tykurahakÿ-di ratxirenyreriò, tule tiribibo ròireri?

¹⁴ Tahe rarybere: –Aòkòre wanyrÿ, reerykòre. Bedelyyke wako. Tahe wako tuu delyyde. Kia heka dòhònyde heka aòhòkymy dÿÿnana-ribi dòhònyde rare. Ityky rityranyre heka Budoeni riòre hàlubu-di.

¹⁵ Taiki heka rynana nihikÿko-ki ratxirenyreri Deuxuko-ki. Kaheka ruu, txuu-wana heka rãähimy ratximyhÿrenyre taheto bededÿÿnana-ki. Kia rynana-ki rÿdu tahe riyrubunynyrenyre.

¹⁶ Tiu rama rirubudÿÿrenyòmy heka bemomo boho. Tiu txutòteehekÿ-wana wirisÿnyòtyhy ybòtò boho-wana, txutye boho-wana.

¹⁷ Budoeni riòre dori rynana nihikÿko-ki ratximyhÿre. Tii heka aryÿna adee riwahinymyhÿkre. Tii heka adi itxeredukre heka aradykre heka Umyituedeòna ube-ò. Deuxu irube rirubudÿÿnykre.

8

¹ Budoeni riòre debò inatxi reurò hàletenamy ribòhònyreu, aòdee biu-ki roholaòhyre heka byy, myle roire: aòwodÿÿ wodÿÿhomy aòkò. Wadee meia hora txumy bedemy bede rewyre.

² Debò inatxi reurò ÿjumy tuu rabire Deuxuko-ki nyidemy. Tahe inyò tamy riòremy idi retehere debò inatxi reurò ajurònamy.

³⁻⁴ Tahe iwixira ÿju nade. Tii womati tÿrÿrÿhÿkÿ atara nihikÿ. Tahe xiwenatyre orarade rÿny wihikÿ ritoonyre. Inyò riwahinyre ÿju-dee sòwemy. Riurinykemy Deuxu ijoi ixitòedÿÿna-wana xiwenatyre-ò risòkemy aderòna

rŷnyrehekŷ heka womati tŷrŷrŷ xiwenatyre-ki ritxiwire Deuxu ryanako-txi. Ŷju iribi tahe kia ibutumy raòwònyre Deuxu-ò.

⁵ Tahe heòty-di heka ŷju atara ritŷxinyra idi heòty-di rehure biu-ribi bede-ò. Tai tahe biumytxi ramytxynihikŷnyre heka suu biu tawe rihetenyre rybe wese wodŷŷ ramytatare.

⁶ Tahe debò inatxi reurò ŷjumy heka rexiywinymy rŷire ajuròna-di jurònykremy.

⁷ Juhu ŷju heka rurònyre. Iribi tahe bedejutytyhykŷ heòty hãlubu-wana raurinymy bede-ò rejuxunyre. Bedejura tahe roomyhŷ asirade, bedero-wana inataò-ribi, sohoji roomyhŷ.

⁸⁻⁹ Iribi ihewoludu txuròna-di rurònyre. Tahe berahakŷ-ò resere hãwãlò nihikŷ wesemy. Tai ibutumy heòtylawò txuramy ituere. Iyre bee tahe hãlubuhukŷlemy relere. Iyre utura tahe ituere.

¹⁰ Tahe ihewoluduhe txuròna-di rurònyre. Iribi tahe tainahakŷò berohokŷyre-txi resere berayre-txi tule.

¹¹ Tainahakŷ heka ihyre inire. Tahe sòwemy iny ituere ihyre bee riurinyreki.

¹² Tahe ihewotyhy tyaludu txuròna-di rurònyre. Tahe aòwesele txutyemy txuu roosòòhyre. Tahe ahãdu tawekremy turutyhy inihe relere taina tule. Tahe bederurunutyhyre heka.

¹³ Tahe idi retehemy jiarŷ rãiwãhã. Tahe tuu rabire nawii nihikŷò ruòmý ratxireriò. Tii iryru-di heka rarybemyhŷ: –Bede heka rabinakre. Bede heka rabinakre. Suludu bede iny-ò ryrymyhŷ: –Txioinihe sòwemy aòbina binahakŷ rexiòtŷmyranykre. Tahe hewotyhyludu ŷju txuròna-di kudurònykreu heka bede rabinatyhykre.

9

¹ Ijò ŷju tajuròna rurònyre. Tii heka iruyre hewoludu rare. Tahe ijò inymy rabire. Biu-ribi suò taina resere wese tii resere. Tamy ijò raynaò diwahinyde, hãloo nihikŷ ratòbòna rayna wahe. Hãloo nihikŷ heka irehehekŷ rare.

² Tahe riraynyre. Wàdasi iribi tahe dòhònyde. Iwese tahe bede rurunyre wawerorareny-di. Txuu, ibutumy rurunyre wàdasi lybyhykŷ òraru-ki.

³ Tahe seihikŷlyby wese heka wàdày-ribi dòhònyde tahe desede suò. Seihe heka itytibòròhòkŷ wese heka ihe rare.

⁴ Asi rubudŷŷòmykre bederaradeò tule, òwòru tule. Inyò Deuxu kia ritidŷŷna iòru-ki rŷiòkeki, tahe tule tamy ijira rŷikre.

⁵ Iny rubudŷŷmy aòkòre. Tahe iny aòhòkŷmy rotŷŷnykemyre heka iruyre ahãdumy. Aòhòkŷmy rotŷŷnymyhŷre kia ihe juberereri riijererimy ihŷre.

⁶ Kia txuu tahe ixirubudŷŷmy reamyhŷre. Tahe aòkòre heka timyhe ixirubudŷŷkòmy tamyhe rubu dehemynyòhyymyhŷde. Tukemy heka riwisŷnymyhŷre. Tahe aòkòre rubu iribi rahenymyhŷre.

⁷ Seihikŷ heka awaru wese rare. Iwese awaru rexiywinymy wou-ki ralòkremy rŷimyhŷre wese heka rare. Irati-ki rŷire womati tŷrŷŷhŷkŷle irataana wahe. Iòsana heka iny òsana wese rare.

⁸ Irade irehehekŷre hãwyy radehekŷ wesele. Txuu tahe leaò juhukŷ wesele rare.

⁹ Wyhy itxena ibreti-ki roimyhŷre. Womatile ibreti rare. Bede heka urile rawodŷŷnyhŷkŷmyhŷre. Iwese tewe awaru-di nodu sòwe iwodŷŷ rare. Iwese aòbina-ò rajaramyhŷre wodŷŷ wese wahe.

¹⁰ Seihikŷ heka bòròhywe nihikŷ wese heka rare. Tahe iruru-di rare. Iny riwotòmonymyhŷkemy iruyre ahãdumyhŷmy. Iherona ramytxytxyre iruyre ahãdumyhŷmy.

¹¹ Iiòlò heka hãloo rahejihikỹ wedu heka rare. Ini heka hebreu rybe, Abadu rare. Grego rybe heka, Apoliõ heka rare. Iny rybe heka iny hàdu hàduhukỹ rare.

¹² Juhuu bedebinahakỹ ituera ròhònyra. Katahe ijõ iwitxira kòdòhònykre inatximyhỹmy wahe.

¹³ Ijõ ýju tajuròna-di rurònyre. Tii heka debò sohoji hewoludu rare. Raholare heka rybeõ-ò. Womati xiwena-ò-ribi ròhònyre. Xiwena-ò heka inaubiòwa sòwe. Kia womati týrýrỹ xiwena heka Deuxu ryanako rỹire.

¹⁴ Kia ýju-ò heka rarybere ijuròna dinodu wahe: –Inaubiòwa ýju besedýnyke ixinamy ròhònyke. Tii heka Bero nihikỹ ròtena-ki, bero Eufratesi-ki.

¹⁵ Tii heka ròtena-ki ratximyhỹre kia bededýnanau, kia txuu, kia ahãduu kia beòrau. Iribi tahe riòlòdýnyrenyrene. Iribi tahe ihewoludu iny ibutumy rahure. Iyreyre inataõ hãwã jurajuramy heka rahure. Inataõ jura-ribi sohoji sohoji rirubunyrene.

¹⁶ Tahe jiarỹ raholare tiweserebo aõbinadumy rỹire. Iny 200.000.000 inumy rỹire.

¹⁷ Tahe aõbinadumy rabira awaru tyre ronyreri. Awaru tyre ludu tahe iwyhy itxena dire. Ibutumy wako-ki rỹire. Ibutumy rabire. Womatihikỹle, heòtyhykỹwesele heka rare. Ijõ heka týreura rare safira wese. Ijõ tahe týre raramadòbò wesele. Awaru rati heka leaõ ratihikỹ wesele rare. Heòtyle iry-ribi ròhònyreri wàdasi enxofre-wana wahe.

¹⁸ Kia heòty heka inataõ jura-ribi sohoji jura iny rahure.

¹⁹ Tule awaru nohewòru heka iruru dire. Iryribile tahe iheòty ròhònyre. Taile iruru rare. Hemylala rati wese dire ruròmý heka inatxi hemylala juwesele.

²⁰ Iny ituere sýtybymy tahe rarònyre. Deuxu deàlana dee heka reòbyòhyre. Diabo mahãdu luulemy ratximyhỹrenyrene. Aõma rityhynyrenyrene womati týrýrỹhỹkỹ ritxoo, òwòru ritxoo suritxoo, mana ritxoo. Kia ritxoo heka aõki robiòhyymyhỹre, aõ roholaòhyymyhỹre. Rariaòhyymyhỹre.

²¹ Iòraru-ribi roxirãhiòtyhy iribi tahe rahòtinyrenyrene aõ òtaòtamy, rubudýnyamy, wasinamy, òwòrumy. Kiale ròhòtinymyhỹrenyrene.

10

¹ Tahe iwitxira ýjuhukỹ rabira biu-ribi suò robehererimy. Biuwetykywesehekỹle iweroramy rýireri. Tahe owaji wese iratikile roireri. Iòsýny tahe txuwewehekỹle, iwaube tasỹ heòtyhykỹwesele roosòmý.

² Tii heka tyyritinadile debò ritýtenymy ratximyhỹ. Tahe itýte heka deboube-ki roimyhỹre. Tahe tawaube ruruludu heka betye ritidimy idi rỹire. Tawahyweludu tasỹ ityti-ò ridemy idi rỹire.

³ Tii ryryre heka tarurumy. Leaõ iràhàkỹwesele ryryre. Iu tii rarybereu, debò inatxi reuròmý heka ramytxynymy dirawyònyde.

⁴ Tahe riritinyre heka aõmybo timykira raryberenyre wahe. Tahe rybeõ-ò raholare: –Kia widýyòmý. Kia rybe hewa ierysyna aõkõ rare ixinamy tahe tuu roike. Biritinyòke aõmybo ramytxyna rarybere?

⁵ Tahe ýju suki ratxireri, beki ratxireri ruru ludu debò biu-ò riteòsinyre:

⁶ –Deuxu-ribi heka tuu raryberé, warybemy inatyhymy. Deuxu heka tiemy rarehyyle rare. Ibutumy heka riwinyre biu-ki rýira bede-ki rýira-wana. Tai heka warybe inatyhymy rare. Ararybekre heka raroorehenyòtyhy kaki.

⁷ Debò inatxi reuròna ýju tajuròna ritxurònykreu heka, Deuxu ibutumy relemy rýikre iwese rarybere wese.

⁸ Iribi tahe rybe biu-ribi wadee nade. Wadee rarybere: –Biòryke hewa tyyritina ÿjudebò-ki naderí suki bera-ki kia rÿireri.

⁹ Tai tahe tamy rehemynyreri iòhòmy tyyriti tamy rexitòenyre. Tahe wadee rarybere: –Biwyke. Birÿsÿke. Juhuu tahe bidi wesemy ary-ò bidekre. Birÿsÿkreu tahe ibutumy rahyrenykre awo-ki.

¹⁰ Iribi rewyrera rerÿsÿra. Iwese tii juhUU rarybera wese rare. Ibreere juhUU. Iribi rerÿsÿreu tahe, wawe rubererenyre.

¹¹ Tahe wadee rarybere: –Kai heka dohodÿÿmy makre ixityre ibutumy inywitxiramy heka botohodÿÿkre. Ibutumy inywitxira witxira-my botoho. Ibutumy rybewitxira witxira botohomy. Ibutumy iòlòmy botohodÿÿkre.

11

¹ Iribi tahe inyò wadee diwahinyde urihixinaò. Wadee rarybere: –Biurihikesÿ titxibo Deuxusÿ rÿimyhÿré. Iwo tule xiwena wahidÿÿna biurihike. Idi mariake tiwesebo iny iwo-ki rÿirémy.

² Tahe ahana-ki iube idi riraòmyke. Tii dori ityhydÿÿdukòdu mahàdu dee wahisidÿÿna rare. Tiiboho dori 42 ahàdumy idi rariakre.

³ Jiarÿ dori inatxi rybedu idi watxiwähàre. Tamy ruru ariwahinykre. Tii heka saumytkyle rariakre. Tii heka rybe ritÿnynykre beòra inataò weeremy.

⁴ Rybedu inatxi heka bederaty òwòru inatxi wese rare. Tahe tule inatxi loosòna mynydu wese heka rare. Kia Deuxuko-txi rÿire wese heka rare.

⁵ Inyò idi ibinamy riwisÿnykeki, tahe ixirubudÿÿmy rorukumyhÿre. Heòty iryribihikÿle ròhònyke heka iny rirubunyke.

⁶ Tii heka irurudire biu dejuxu lau riekemy. Tahe tiu biu reseòtyhy heka inataò beòra weeremy wahe tii Deuxu rybemy rarybereri wahe. Ihàre tahe tii rexirahòreke bero nihikÿmy aho nihikÿmy hālubumy rexirahòreke. Ihàre tahe ibutudee bina riwahinyke, rubuna riwahinyke tiiboho awimy tai raharenykeki.

⁷ Kia heka inataò beòra weere rikonananykeu, rybe tÿnydÿÿdu inatxi rikonananykeu, hāloo rehe nihikÿwo-ribi aòni kòdòhònykreu, tahe aòbina nihikÿ-ki heka iu rÿikre. Tahe inatxi rybedu rirubunykre.

⁸ Iumy rubu tahe hāwāry-ki roikre, tibo inyrÿ rirubunyrele. Rawesenanyre, kia hāwā arininikre Sòdòma ada Egito wese.

⁹ Inataò txuu weere riwydi hāwā ube-ki iumy rubu roikre. Inyò heka tiu rituunyòtyhy. Ibutu iny hāwā hāwā-ribi ibutu rybe witxira-ribi heka tamy itxeremy rehemynykre.

¹⁰ Ibutumy heka iny teysamy rÿikre urile iny widee aòna aònamy riwahinymyhÿkre. Tiiemy inyò raaòmysÿdÿÿòtyhy kiatxuu. Tai heka tahòti heka itxi reakre kia inatxi rybedu rurure tahòti itxi reakre. Lisini heka rÿikre, worana bedehesi.

¹¹ Kia txu inataò txuweere-di, iumyreny iruna kòdòòsekre tamy Deuxu-ribi. Tiiboho lamamy rotamanykre. Iny rarokonykre heka ruberu nihikÿmy rÿikre heka.

¹² Inatxi rybedu-ò heka rybetereò biu-ribi nade: –Kaiboho bòdòibedenyke kaò. Tahe biuwetyky raòwònyrenykre kia iòludu mahàdu idi retehemy rÿireri yrubule.

¹³ Kiaule tahe bede ramytatakre. Debò wiò heto jura jura-ribi heka sohoji resere. Tahe 7000 inymy rurure. Tahe iny rarokonykre tahe iuhe ruberu nihikÿmy rÿikre. Tahe wowydyna riwahinykre Deuxu biu-ki ratximyhÿreò.

¹⁴ Inatxina bede dÿÿnana bina tahe ròhònyre. Tahe ijò kanakre.

¹⁵ Debò inatxi reurò ÿjummy heka juròna rurònyre. Tahe sòwemyhe iny rarybemy rÿimyhÿ, ryrymy rÿimyhÿ: —Kia bede dÿÿnana, iòlòna, inynyrÿ hõrõ rare. Kristu hõrõ rare. Aõu aõu tii ibutu ibutu iòlòmý ronykre.

¹⁶ Wawiò inaubiòwa matuari tahe, rynana-ki ronyrenyleri Deuxuko-txi. Tahe Deuxuko-txi reserenyre. Wowydyna tamy riwahinyrenyre:

¹⁷ —Kai Deuxu, tuu tate ihyymy, ibutururu ratyre aruru rare. Aruruteremy bonykre bede dinodumy. Umy realàmý kia-ò.

¹⁸ Iny heka ibutumy alau ruberumyhÿre ibutumy òludumy rÿire, adee deburemy rÿimyhÿre. Rubu hitxidÿÿna heka bede reamy heka roire. Eòdurenyle heka riòwynykre, aijoi riòwynykre, rybedu mahãdu wahe. Ibutumy ani rityhynumy rÿira, nihikÿ iyja-wana, kia bede huduhukÿ rare. Ibededÿÿnana reamy heka roire.

¹⁹ Biuwetty riraynyre Deuxu heto. Ibutumy heka lobidÿÿna tyyriti hyna iwo-ò iny robimy rÿire. Iu tahe biumytxi, biudelaa ibutu yhynihikÿ, ibutumy bede ramytatamy rÿire, berahakÿ tule resere.

12

¹ Iribi tahe ròhònyre warasina-ki aõbo. Aõhebo bede ritÿÿnykremy, biuwetty-ribi hãwyyòmý rabire. Txuu wese tahe itykyra. Tii lamamy rÿire ahãdu tyre. Tarati tyre-ki tahe tainahakÿ rataana idi rÿire, waòinatxi taina wahe.

² Tii heka bòtòmý ihÿmyhÿ. Ryrymy heka txubrere riijemy tabededÿÿnana-ò resera uladu reakremy.

³ Iribi tahe aõna aõna biu-ki rexisÿnymy, aõni hemylalasò nihikÿ wese wahe. Irati tahe debò inatxi reurò sòwe iratimy. Debòwiò sòwe heka iòmý. Irataana heka iratimyna myna rÿimyhÿre.

⁴ Tii tahe tõhewòru-di taina ributunumy ridyre. Bede tyre-ki idi rehure, taina jurã. Tii hãwyyko-txi rÿire. Uladu reakreule tahe uladu riròkremy.

⁵ Tahe tohouã reare, hãbumy heka reare. Tii iòlòmý heka ronykre, ibutu bede bede iòlòteremy wahe. Ihãre tahe Deuxu ridyre. Raòwònyre heka Deuxu rynana-ò.

⁶ Hãwyy tahe rahenyre bederahy-ò. Tii 1260 txumy heka tii bederahy-ki bede riekremy. Deuxule heka tii riywinyre.

⁷ Biu-ki heka aõbina nihikÿ rÿire. Mieli, ÿju dinodu heka, taijoi-wana raaõbinanyre aõni-wana taijoi-wana.

⁸ Aõni tahe resera taijoi-wana. Ròtara. Biu-ribi ròhònykemy tahe idi ratxireri.

⁹ Riteònyre biu-ribi, aõni nihikÿ heka ròhònyra. Tii heka hemylala nihikÿ wese rare. Satanasi inire, Diabo wahe. Itxenadÿÿdu heka rare ibutumy iny. Suki resera, taijoi-wana.

¹⁰ Raholare tahe biu-ribi rybeõ-ò: —Deuxu tarasana heka rehemynyre. Tii taruru riteòsinyre iòlòtyhy raremy. Kristu taruru riteòsinyre. Aõbina bina rybedu tahe Deuxu-ò rarybehymy ratxireri, txu-wana, ruwana. Tii tahe ròhònyra biu-ribi.

¹¹ Waityhydÿÿdu seriòre mahãdu heka ròtara Budoeni hãlubu-di, inatyhyna hãletena-wana. Rurukemy ratxireri tiibohe tamydeewikeki.

¹² Beysabenyke biu mahãdu. Koityhyxe tahe ahohokÿ, bede-wana. Diabo dori adee rehemynyre. Tii reburere, ibededÿÿnana dori iòhòmý reare.

¹³ Iu hemylala aõni heka bedekile ratxirerimy rieryreu, tahe hãwyy tohouã-wana kia-ò aõhòkÿmy rotÿÿnykemy risÿnykemy idi ratxireri.

¹⁴ Tahe hãwyy heka nawiihikÿ-ribi idei rihuòtera, tahe idi ruòra bederahy-ò, tasÿ-ò.

15 Hemylala aōni tahe bee sōwemy tary-ribi rarybexinyre hāwyy ribòròbòròdđỹkemy.

16 Tahe aōkōre. Suu tary riraynyre tahe ibutumy bee riōre.

17 Hemylala aōni tahe reburemy reare hāwyy dee. Ibutumy hāwyy ijoi mahādu rirubunykyre idi ratxireri. Kia mahādu tahe Deuxu bede ywina rityhynyre, iwese Jesuisi tuu ritỹnynyre wese.

18 Tai hemylala aōni ŷnyrakile rỹire.

13

1 Iribi tahe aōnimy rabire berawo-ribi ròhònyre warasina-ki. Tii heka debò inatxi reurò iratimy tahe debò wiò iòmy ijōdire. Rataanaō tahe sohoji sohoji iò-ki rỹire. Irati-ki tahe nibinamy heka rỹire.

2 Tii heka hālòe wesetyhymy rare. Iwa heka ursowa wesele heka rare. Iry heka hālòery wese rare. Aōni heka tamy ruru sōwemy riwahinyre, irynana wahe.

3 Iribi heka rabire iratiō, sohoji heka wotōmonahakỹ dire. Tahe reytereri. Ibutumy iny riòtiinyre. Aōni riheludunyre.

4 Aōni hemylala heka taruru riwahinyre aōni-ò. Tai tahe ibutmy iny heka aōni riwowydynyre. Iny rarybere: –Mobo heka aōni wese rare? Mobo ijesedukre?

5 Aōni heka aōbina bina rarybere. Inyō ribyrenyōtyhy. Ahādu 42 tii heka kiawesemy rỹikre.

6 Tii Deuxu dee heka aōbinamy rarybere, Deuxusỹ dee, ibutumy biuludu mahādu tule rybebina-di ribinabinadđỹnyre.

7 Inyō tamy ruru sōwemy riwahinyre Deuxu ijoi mahādu-wana raaōbinadđỹkemy. Tuu rahaŷnanykemy heka ibutumy iny witxira witxira, ibutumy rybe witxira mahādu, ibutumy bede bede mahādu.

8 Ibutumy iny ityhydđỹdukōdu mahādu tamy wowydyna riwahinyke. Budoeni Riòre ijoi mahādu tahe aōkōre, kia dori ini rỹirenyre tyyriti-ki. Juhu bededđỹnana inireny iwo-ki roire.

9 Tahe inyō roholakeki heka, boholake.

10 Inyō ridyke. Riròtenyke ròtenawo-ki. Ijō tahe rirubunyke. Deuxu ijoi mahādu tahe rexitihynykre idi òbitimy roirenyrekremy. Kie.

11 Tahe ijō aōnimy rabira. Tii ròtuòreri bede-ribi. Iò heka inatxire. Budoeni wese heka rare. Ihāre tahe aōni wesele rarybere.

12 Tii juhu aōni wese rare, iruru. Rarybere: –Juhuludu aōni biwowydynyke. Kia ratiwotomona-di.

13 Budoeni aōni heka aōna aōna wiwihikỹmy riwinyre. Tii heòty biu-ribi resekyre tii rotỹnyre. Ibutumy iny tuu robire.

14 Tii ibutumy iny riitxenanyre kia aōna aōna wiwihikỹ òraruki. Iny ibutu-ò rarybere: –Suritxooō nihikỹ biwinyke aōni dee. Tii mayrehe-di rawotōmore hārele ruruōre.

15 Tahe ihewoludu aōni heka rabunyra suritxoo-ò tahe irumy rỹire. Idi suritxoo rarybere. Inyō tamy wowydyna riwahinykeki, tii tahe rirubunyre.

16 Tii rarybera ibutumy iny-ò: –Kaiboho waritina bitidike aòru-txi, eboreny-txi, ruruweludu wahe.

17 Aōkōkeki tahe aōhoho aōkō riwyke. Iny kia ritina ijōdiōkeki aōhoho aōkō rohonykre.

18 Kai erydđỹna sōwekekile, aōhebo tatỹnytemy kaiboho bierybenykre. Kai erydđỹnadikeki, aōni heka rieryke. Ini heka iritina raròsòna wese rare 666 ihỹre.

14

¹ Idi tahe budoenimy rabire lamamy nyidemy Jerusalē hāwā-ki. Aōma Siaō hāwālòkile rỹiremy. Tii-wana heka rỹire 144.000 kia inymy heka tii-wana rỹire. Ibutumy tiiboho heka tybynimy, inymy heka ibutumy iòru-ki raritinymy rỹire ibutu òru-ki. Tahe tuu rabire rasinaōmy.

² Biuwodỹỹ nihikỹmy raholare, tule biuwodỹỹhỹkỹ ada benihikỹ lesetere wese iwodỹỹ rare. Tahe sōwemy iny rawiunymy rare violaō-wana, kia wodỹỹ wesehekỹle wahe.

³ Kia heka wiu tỹmyra riryrymy ròirenyre kia iny tỹmyra rirahura mahādu. Kia Deuxu rynana nihikỹko-txi heka rotỹmynyrenyra. Kia inaubiòwa aōnityhy heka waitue inaubiòwa matuarimy tahe ijōmy rỹire. Tahe 144.000 kia inyle heka rawiunykeki, awimy rỹike. Tii dori aōma tarasadumy ratximyhỹrenyre.

⁴ Tiiboho heka tyra roire, tiiboho heka òbiti roire iwese ijadōma ratxirerimy ihỹre wese òtadu mahādu aōkōhyyre. Tahe budoeni riòrehemy heka rare titxibo tii rare hemy. Tii dori wydynamy rare. Kia hābuy-ribi. Bede ywisidỹỹna juradỹỹna kia dinodumy heka rare. Deuxu heka Budoeni Riòre-wana wahidỹỹnamy heka roiremy.

⁵ Tiiboho heka raryberenyōtyhy tiiboho ruidu roiremy. Òbiti heka tiiboho roire. Tiiboho heka rahitxirenyre Deuxu dee.

⁶ Tasỹ ijōmy rabire ŷjuōmy aōma biuwetyky kiako-txi raramy ruòmy rabirerimy. Tii heka Rybewihikỹ tỹmyra rimymy idi rara aō inywitxira-ò ritỹnynykremy. Ibutu bede bede inywitxira-ò ritỹnynykremy. Ibutu rybe-di ritỹnynykremy, Rybewihikỹ tỹmyra wahe.

⁷ Kiamy heka ryryre: —Deuxu bityhynyke. Marybebenyke tii awi raremy nihikỹ raremy. Bededỹỹnana rehemynymy roire ihitxidỹỹdu bede-ò. Bityhynybenyke tii dori bede ibutumy riwinyre bee, biu ibutumy riwinyre.

⁸ Tahe ŷjuō heka ihewomy ruòmy ratximyhỹre. Babilonia hāwā nihikỹ rexihura. Ibutu iny dori òraruna-txi resera. Kia hāwā mahādu dori ibutumy iòrarudỹỹnyra.

⁹ Iribi tasỹ iwitxira ŷjusỹ tamy nade iheto-ò. Tii tahe ryrymy nade: —Inyō aōnimy ada iritxoomy rityhynykeki, iribi riwykeki iwotōmona iòru-ribi tebò-ribi riwykeki iritidỹỹna, tii tahe Deuxu ykarana heka iribi riwykre.

¹⁰⁻¹¹ Tiiboho heka aōhōkỹmy rotỹnyrenykre ŷjuko-txi. Budoeni Riòreko-txi aōhōkỹmy rotỹnyrenykre. Heòty kia bede dỹỹnana tyhy tiemy raòwònyhyy rarakre. Tiiboho dori tiemy aōnityhy nihikỹle, iritxoo-wana rityhynymyhỹrenykeki, tiiboho heka iritidỹỹnale ixi-ki riwymyhỹrenyre.

¹² Tai tahe ibutumy iDeuxuhe ywina-di heka iwitxira iny ronykemy heka ratximyhỹre. Ibutu aō òta ibina bina biòludunybnykemy, tiiboho dori aijoi òbitihyy boibekemy ikonana-ò. Jesuisi bityhynykemy.

¹³ Iribi tasỹ ixityre ijō rybe-ò raholare watyre-ki. Rarybere: —Kiahe bir-itinyke: Aō roorehemy aōkō heka dehemynymy deade. Kia Jesuisi-ò rurure heka uriòno heka tamy dehemynymy deade. Iribi tahe tule rarybere: atyytyby reysamy ratxireri. Myle. Tahe rexielehynymy heka rorukumyhỹrenyre aōhōkỹmy dỹỹnana-ribi. Tii dori aōwiihikỹle riwinyrerimy ihỹre. Reeryre heka.

¹⁴ Idi tahe iwitxiramy aōmybo rabire wiribi hitxiramy. Nonoe wetyky urahakỹle wese heka rare. Inyō ityre-ki ronymyhỹ. Hābuō wesehekỹlemy heka rare. Irataanadihikỹlemy ronymy heka tarati-ki heka idi ronymyhỹ. Womati tỹrỹrỹhỹkỹle wesehekỹle irataana rare. Tahe ijō heka itieresynaō-di heka tebòkihikỹle heka rỹire.

¹⁵ Ijõ heka Deususỹ-ribi nade, ýjuõ. Tamyhe ryryre: –Bexitỹmyranyke, itieresyna-di tasỹ bexitỹmyranykre. Bededỹñana rehemynomy roire adee aõ biòròròkemy.

¹⁶ Tahe kia nonoe wetyky tyre-ki ronyreri tahe rexidelenyre riòròrerihe. Riwyrehe ibutумыhe aõna aõna riwyre tahe ributумыre.

¹⁷ Kia ijõ Deususỹ-ki ratxireri tasỹ tule debònadimỹ ratximyhỹ kia tieresy-nadile ratxireri.

¹⁸⁻¹⁹ Kia ýju aõma heòty kia loo-di ratxireri tahe dyryde heka tieresynadile tamy rehemynykemy. Tieresynadile biorobeke idi atxibeke. Ibutумыhe bede bede kia biorobeke. Ceifale dori biorobeke. Rubумы dori rỹire hitxidỹñna-ò. Iribi tahe reare. Tiò tiò idi reamy tahyna-ò rabutумы reare kia Deuxu ykarana-ò.

²⁰ Tai tahe bederatyhe risorunyrenyre hãwã-ribi hitximy. Sõwemy hãlubu ròhònyre. Kia urihixina heka sohoji metro weere heka rare. Irehere heka bero wese 300 quilometros irehemy. Awarulomy heka rabeheõmy roire ibero.

15

¹ Ijõ aõna aõnamy rabire biu-ki ihewo-ribi riteòsinyreri. Debò inatxi reuròmy ýjummy heka rimyra kaa aõmysỹdỹñna. Kidiwydenykre heka debò inatxi reurò aõhòkỹmy dỹñnamy. Idi tahe Deuxu ykaranamỹ rexikonanamỹhe roikre.

² Iribi tahe bero nihikỹmy rabire wako-txi aõma heòty wese, womati tỹrỹrỹ wese. Sõwemy heka inymy rabire kia sutyre-ki nyidemy bero iòhòmy. Ibutумы heka aõni debure deburehekỹ kia rubu-ribi ritamy nyide. Iu heka aõni tai roiòhykyre heka, aritidỹñna roiòhykyre heka. Tahe aõma aõnimy rahañnanyrenymy ratximyhỹre iritxoomy tule violaõ oworuwodỹkỹhe tai rỹire, Deuxu rawiunyrenyreri riryryreri.

³ Moisesi Inynyrỹ deòdu wiu riryrynyreri. Tule Budoeni Riòre wiu riryrynyrenyreri. Kiamy heka rare: –Oi Deuxu, Kai heka aruru-di tate. Aõni tewinymahãte. Ibutu tarasana tewinymahãte. Ibutu heka ary òbiti rare. Awi heka rare. Kai heka ibutu iòlò tate.

⁴ Iòlòhyky tanamahãte. Tiiemy heka rityhynomy hyky hyky tanamahãte Inynyrỹbohomy. Wowydyna heka adee riwahinymahãke. Kai sohojile heka òbitityhomy atximahãte. Ibutu bede bede ludu heka anatyhynykremy kedeakre. Ibutумы aõbo tewinyte. Ibutумы bede òbitidỹñnymahãte heka rieryre.

⁵ Kia bedeõ heka Deuxu hetomy roimyhỹre ierykõnamy roimyhỹre. Iwòte ierykõna. Tii heka riraynyrenyre heka kia bede.

⁶ Kia debò inatxi reurò kia ýjuhe ròhònyre Deuxu heto-ribi. Diwydehe debò inatxi reurò aõhòkỹmy dỹñnana. Aõma itykyrenyre, linho urahakỹ itykyrenyre. Irawo-di ibreti wereysanamỹ tahe womati tỹrỹrỹhỹkỹ reare.

⁷ Sohoji aõniõ aõma Deuxu ykarana hyna sohoji sohoji-ò tamy diwahinyde.

⁸ Deuxu hetowo heka aõma wadãhãkỹlemy reare. Loosona dori iruru dori sõwemy rỹimyhỹ. Tai heka urile roosòhòkỹmy ratỹrỹrỹhỹkỹmy. Inyõ heka iròteõna. Debò inatxi reurò ýjummy. Kia ritxiwimỹ rexihudile tahe iny ralòke.

16

¹ Deuxu hetowo-ribi ijõmy raholare rybetereõ-ò. Rarybereri ýju mahãdu-ò: Boibenyke hewa abede-ò. Debò inatxi reurò hyna bitxiwibenyke kia Deuxu ykarana hynamy. Tahe ýjummy dòhònymy deade tahyna-di ditxiwide bede-ò.

² Iribi tahe rexidelenymy reare aõma juhoo ýju ihyna ritxiwire bede-ò. Ýju binahakỹmy ròhònyre ibutu inymyhe robỹtỹmy reare. Kia aõma aõni kia

ritina iòru-ki rÿirele kÿnyhe tuu rÿximy. Tule suritxoo rityhynymyhÿre kia mahådule heka yjy yjy ròhònyre.

³ Tahe ihewoludu heka tahyna-di dòhònymy deade. Betyre ritxiwire. Bee hālubu hukÿlemy reare. Ibutumy bera-ki raremyhÿre ituere.

⁴ Juhu ludu hewoludu tahe ritxiwire berohokÿ tyre heka ritxiwire. Bee ibutumy bewydysyna rihòrònyre. Ibutumy hālubu hukÿlemy relere.

⁵ Tahe ÿju rybe raholare aõhebo bera-ki rotÿÿnyreriò: —Kai Deuxu, Kai awi tate. Kai òbiti tate. Tuhyy ahâte ihære tahe tuhyy ahâte.

⁶ Rybe tÿnydÿÿdu mahådu heka ituere, rurure. Deuxu ijoi hālubu ritxiwire suò. Katahe rubudÿÿdu kaihe iòwydÿÿdukre. Hālubu tetxiwiteriki tule iòwydÿÿdukre.

⁷ Tahe raholare ijò ÿju rarybereri-ò, Xiwena-ribi heka ròhònymy: —Kia InyDeuxu heka ibutumy ruru dire. Ibutumy tewinyte òbitimy awimy.

⁸ Tahe ihewotyhy konana ludu tahe ritxiwire hyna txutyre-ki. Tahe txuu ratòteenyre itòtee nihikÿmy relere. Sòwemy heka iny risòre bedetòtee.

⁹ Tai tahe rirajuamyhÿre Deuxu nibinahakÿmy rirajuarerimy ihÿre Deuxu dori diteònyde heka bededÿÿnana binahakÿ. Tahe inyò heka tòhòti rawitxi-ranyòhyre iraykywydyna. Kiamy ixiwesehyròhòtinyrenyre. Kia iny heka aõhe rotÿÿnyòhyre wowydyna loosònabo.

¹⁰ Iwitxira ÿju tahe aõma ritxiwire tahyna aõni ryna tyre. Kia heka aõni beludu rare. Tarynana tyre rononymhÿ. Tahe ibutu irynanareny torohokÿlemy reare. Ibutu iòlòna torohokÿlemy reare. Tahe tòròtò-ki ruruare taaõhÿkÿhÿkÿnareny-di.

¹¹ Tiiboho heka Deuxu nibinahakÿmy rryryre webinadumy roireki taaõhÿkÿhÿkÿnareny-di. Timy heka rexinohòtilosanyòhyymyhÿre aõbina binahakÿ riwinymy roiremyhÿ-ribi.

¹² Tahe iwitxira ÿju tahyna ditxiwide. Eufratesi berohokÿ tyre ritxiwire. Tahe ibutumy heka ruÿre. Oriente iòlò mahådu dee tahe ryy kia riraynyre.

¹³ Tuu rabire heka inataò tyytyby binahakÿ. Rexitykynyre òrò tykyhykÿ wese rexitykynyre. Aõni heka hemylala aõni inire tahe iry-ribi rexiòlòdÿÿnyrenyre. Tule aõnibina witxirary-ribi, tule aõni rybedubina-ribi.

¹⁴ Iribi heka aõni bina tyytyby kia tyytyby ibutumy heka bede dinodu iòlò ributunyre. Raaõbinanykemy heka dirahude Deuxu kia mahådu-ò. Deuxu ihitxidÿÿnatxumy rÿikemy heka anade tii dori ibutu ratyre aõna aõna-ki.

¹⁵ Kristu rarybere: —Tahe boholabenyke. Aõwesele heka anakre. Wasidu wesemy heka adehemynymy adeakre. Ibutumy iny wararòsòdu mahådu teysamy rÿikre. Atyky heka biywinymahābenyke tai timyki maixÿrubenyòtyhy adehemynykreu.

¹⁶ Kristu rarybere: —Ibutumy heka widotyde aõbinakedu Mikidu hāwā-ki wahe. Hebreu rybe-ki tahe Armagedom inire.

¹⁷ Tai tahe ikonanatyhy ÿju tahyna ritxiwire yhykile. Tahe raholare bi-umytxihikÿ raholare Deuxusÿ-ki. Deuxu rynana-ribi dòhònyde: —Ibutumyhe rakananamy roire.

¹⁸ Tahe biumytxihikÿle ibutumy rawodÿÿnyre. Tule biu relaanyra. Biu ramytataõmyhÿre idi tahe ramytatare. Tii heka lahityhy rare.

¹⁹ Tai tahe Babilonia hāwā rabòhòre inataò jura juramyhÿmy. Ibutumy hāwā nihikÿ-ribi hetohokÿ rejuxunyre. Tai tahe kia Babilonia kia òraru-txi tahe Deuxu tòhòti reare. Tai tahe aõhòkÿmy risÿnymyhÿ ibutumy aõbede binahakÿ tamy riwahinyre.

²⁰ Bedebute ibutumy rexiwore. Iribi tahe hāwālò tytyhykÿlemy reare bedero wesehekÿle.

²¹ Idi inytyre resemyhÿre bera ere erewesele resererimy ihÿre. Ijõ iutxie tahe 40 quilo bede heka iutxie rare. Kia tahe iny sumy rÿire nibinahakÿmy Deuxumy rarybemy.

17

¹ Tahe ÿju monahyna-ki wadee rybemy nade: —Adee aritÿnynykre aõbo Hãwã Bero sõwe aõhebo rotÿÿnykré heka. Kia hãwã adee ariteòsinykre timybo rare. Wedena wese aõhõkÿmy rotÿÿnykremy. Deuxu heka aõhõkÿmy dÿÿnana riwahinyke kia hãwã-ò.

² Bede iòlò dinodu tamyhe iòraruna tamy rexiòrarunyre. Tule iny bedemy rÿira mahãdu ralòre tamy òtaòtamy.

³ Tai ta kia ÿju tamy riwadyre bederahy-ò. Deuxu Tyytyby wadee dobehede? (Riwatyytamy watyytyby heka ridyre). Tai tahe tuu rabire heka hãwyymy aõma iròdutyre-ki ronyrerimy. Iròdu heka isòhòkÿlemy roire. Debò inatxi reurò irati rÿire, tahe iò debò ituemy sõwe. Iritina heka aõkõre rarÿÿnymyhÿre. Deuxudee heka aõbina binahakÿlemy tai iritidÿÿna rÿimyhÿre.

⁴ Hãwy heka isòhòkÿ ityky rare, iwihikÿ rare. Ityky tyre heka womati tÿrÿhÿkÿ roire. Mana rÿsÿ wiwihikÿ, woumana-wana. Bemona debò-ki idi rare. Iwo-ki tahe bemonawo-ki tahe aõna bina nibina tai roire.

⁵ Tai tasÿ iòru-ki tule rÿire iniò. Aõbo rare tahe iny rieryòtyhy. Babilonia Nihikÿ rare. Ibutu wedenase tii rare. Ibutu inybinase tii rare. Kia luunadu ibutumy bede bedeki.

⁶ Iribi tahe rabire hãwy ixityre. Tii iny hãlubu riõre. Ityhydÿÿdu mahãdu hãlubu-di rexiòdewàrinymy heka rare. Tiiboho rurure, òbitimy Jesusimy rityhynyreki wahe. Kia hãwyymy tahe rabireu, rexiòtiidÿÿnyre.

⁷ Tai tahe ÿju wadee rarybera: —Aõherekibo bede teòtiinymy tÿite. Adee arelyykre aõbo rare —kia hãwy iròdu-wana, aritÿnynykre tiiboho aõbo raré.

⁸ Iròdu tuu tabita, irumy rare tahe rurukre ele elemy. Tii hãloorehehekÿ-ribi kòdòhònykre. Iribi tahe rexihukre. Tii rurure idi ixbyby dòòsede. Bede iny mahãdu bede riòtiinnykre idi heka iròdu debure binamy robirenykreu, bede riòtiinnykre idi. Tiiboho dori ini ihoõre iru tyyritiwo-ki. Tai tahe iròdu deburebina lau ruberure. Iròdu dori ihetxiu irumy rare tahe wiji aõkõre. Idi tii irumy kanankre ixbyby.

⁹ Kia ibutumy adee aritÿnynykre: Debò inataõ rati tahe iròdule rare. Kia hãwy ityre ronyre kia hãwãlò wesere. Iròdu rati tule iòlò mahãduõ rare, debò inatxi reurò sõwe.

¹⁰ Iruyre iòlòõ tahe reserenyre. Sohoji iòlò tahe ratximyhÿre. Ihewotyhy ikonanaludu tahe, kanakre wijina. Tai ibededÿÿnana iòhòlere.

¹¹ Iòlò debòinataõ ludu tahe iròdu rare —kia irumy juhuyu rare tahe wiji rurumy rare wahe —tii juhuyu iòlò mahãduõ rare. Tii tule ituekre.

¹² Debò itue òmy tuu tabitamya wahe tule iòlò mahãdu rare. Tiiboho kanakre iòlòwesemy. Iròdu-wana tiiboho hãwã wedumy ronyrennykre iròdu aõni-wana sohoji horamy. Tii tyytyby bina rare.

¹³ Tyyritiõ riwinykre idi tahe ibutumy ruruna iròdu bina-ò riwahinykre.

¹⁴ Raaõbinanyrennykre heka Budoeni Riòre-wana. Tahe Budoeni Riòre aõbina-ki haÿnadukre. Tahe ÿju wadee rarybere: —Tii dori butu iòlò, ibutu iòlòna ratximyhÿre. Ibutu inynyrÿ ratximyhÿre. Ijoi heka kia ywymy tii-wana roire itarasaõ-ki. Kia rityhynykre rÿirerimy ihÿre.

¹⁵ Tahe kia ahohokÿ, berohokÿ tai kia hãwy ronymyhÿré. Tiiboho iny rare ibutu rybe-ribi, bede-ribi wahe.

¹⁶ Debòwiò òmy tuu tabita iròdu-wana heka hãwy derarennyre. Tii irurawonykre. Tii heka heòty-ò risõmy, riròrennykre wiò wiò. Ityky iribi ritara idi.

¹⁷ Ibutumy inywese rare. Bede bede iny ibutumy rybe òta òta rarybemyhÿre. Tahe Deuxu heka riwahinyre aõbo ixideewimy riwinykremy. Tai tahe aõwaxiny aõ tamywi heka riwinykre. Tai tahe ibutumy iròdu sòhòkÿ taru riwahinykre, Deuxu Rybemyna bede rÿidi.

¹⁸ Hãwãhãkÿ nihikÿ tabite heka wedena wesemy roire. Kia Hãwãhãkÿ heka ibutu wedu iòlò rare.

18

¹ Tai tahe ijõmy rabire ÿjumy rabire biu-ribi ròhònyreri. Tii sòwemy iruru rare. Tii sòwemy iloosòna rare. Ibutumy bede ritoosònyre.

²⁻³ Ta rryryre tarurumy tii rryryre: –Babilonia nihikÿ resera! Resera! Katahe aõma wedumy, bede bede iòlò heka tii-wana òta riwinyre. Ibutu iny-ò tamona riwahinyre iòtaòta boho boho. Nawii wixira wixira ibinahakÿ tai rasÿnymyhÿre, tyytybybina-wana. Ijohodu mahãdu idi nieru sòwemy ributumy. Idi rexityhynyre.

⁴ Iribi tahe raholare ixityre rybeõ biu-ribi rarerí. Manake hewa, Bòdòhònyke wa kia hãwyy-ribi. Kai heka waijoi toite. Tii-wana bexiòrarunybenykemy aõkõ! Bexiòrarunybenyeki tii-wana, tai tii-wana aõhòkÿmy botÿÿnykre.

⁵ Tii heka iòraru sòwe nihikÿmy ratximyhÿre. Deuxu heka aõhòkÿmy dÿÿnana tamy riywinymy ratximyhÿre iòraru-ki.

⁶ Biwinymyhÿre heka iwese tii riwinymyhÿre wese. Aõ ibinamy ibinatyhymy tamy relekre.

⁷ Aõ ibinamy ròhònyke inatxi bededÿÿnanamy tamy ròhònykre. Ibutumy aõbo tamywimy idi raremyhÿ heka riwinymyhÿ ixideewimy. Katahe iwese aõhòkÿmy rotÿÿnykre tahe rabadewokre. Hãwyy tahe ixidee rarybere: –Jikarÿ ikòlò rare. Wytese anokõ jikarÿ rare. Tiku heka rabadewokòtyhy anohòkÿmy ratykÿnykòtyhy.

⁸ Tai taheka aõwesele heka tamy bedeòtiidÿÿdu kedehemynymy bedekre: rubu, aõdese, rama uriteribile tamy kedehemynykre. Heòty ibutumy ritoonykre. Deuxu urihixina-di dehu du ratximyhÿre. Tii ruru-di ratximyhÿre.

⁹ Kia bede dinodu mahãdu rahinykre itòenamy. Tii-wana dori òta òta riwinyrenyra. Tiiboho robikre wàdà iribi ròhònyreriò wahe.

¹⁰ Irehemy iribi rÿire. Ruberureri iaõhòkÿmy dÿÿnana lau. Tahe raryberenyre: –Babilonia hãwã, kai hãwã nihikÿ rare. Tahe wiji ituera atximahãte. Kobelãhãxe.

¹¹ Ibutumy aõna-ribi ijohodu rahinykre itòenamy. Inyõ dorihe iaõ tamy riwydyõmy tamy ijohonamy aõkõ.

¹² Juhuu heka raaõbradÿÿmy aõma iny mahãdu ratyre. Womati tÿrÿrÿ riõbranyõre. Tule woumana riwyrerimy ihÿre juhUU. Tykyisòwihikÿ wixira wixira heka riwyrerimy ihÿre. Tule òwòrulÿnyre, iròdu nohõmy riwinyrerimy ihÿre. Bede ritxoo ibutumy aõna iòwyhykÿre. Womati òta òta wiwihikÿ riwyrerimy ihÿre.

¹³ Aõma rÿsÿna uri wiwihikÿ tule aderòna wiwihikÿ, tule vÿi riwyre, paõ widÿÿna, adÿÿ-wana riwyrerimy ihÿre. Tule maixõmo, broreni, budoeni, awaru, tewe, ityti heòty, tule iny deòdu iòwydimy.

¹⁴ Tahe ijohodu mahãdu rarybere hãwã-ò: –Ibutumy aõna aõna wiwihikÿ ituera, kia kaiboho riwyrerimy ihÿre. Tiu ixityre aõna aõna riwyòtyhy, ixãwira.

¹⁵ Tahe aõna-di ijohodu mahãdu rabadewokre, rahinykre tiiboho dori iòraru-ki raityhynyrenyre. Irehe-ribi retehere. Ruberurenyre. Rryryreri:

¹⁶ –Kobelãhãxe hãwã wihikÿ. Ibutumy atykysò ituera, awomati wiwihikÿ ituera, woumana, manawiwihikÿ ibutumy ixãwire.

¹⁷ Sohoji òraule ibutumy iaõna aõna ixãwira. Ibutumy hãwòhòkỹ dinodu urile, iwiòhenadỹỹdu mahãdu tule suludu mahãdu retehereri irehe-ribi. Tii dori nieru ritamyhỹre iaõna-di.

¹⁸ Iu hãwã wàdàsimy robirenyreu tahe, ryryre: —Kia hãwã wihikỹ rare. Ijõ hãwã iwese ihoõhyyre.

¹⁹ Tahe brybysi ityreneny rehurerimy ihỹre. Rahinyreri, ryryreri: —Bobrekỹ, bobrekỹ hãwã wihikỹ. Aõwesele heka ixãwira. Ibutumy ityhy mahãdu, iaõna rexihura.

²⁰ Tahe kaiboho beysabenyke biu ludu mahãdu. Hãwã nihikỹ dori ituera. Deuxu hõrõ mahãdu, Deuxu deòdỹỹna mahãdu, Deuxu dee rybedu mahãdu ibutumy beysabenyke. Deuxu dori iaõhòkỹmy dỹỹnana tamy riwahinyre aòrauru-ki.

²¹ Tahe ýju nihikỹ heka manaõ rimyre, mana nihikỹõ, iwese maixõmosyna mana wese wahe. Idi rehure ahobero-ki rehure. Tahe ryryre: Kiawese heka Babilonia hãwã-di arehukemy watzireri waruru-di. Ixãwikre.

²² Tahe wiu wodỹỹ kia hãwã-ki roholaõtyhyke, harpa wodỹỹ aõkõ, flauta wodỹỹ aõkõ, jurõna wodỹỹ aõkõ. Aaõmysỹdỹỹdu aõkõ kia hãwã-ki raaõmysỹdỹỹõtyhy. Mai rỹỹna, manasyna iny heka iwodỹỹ roholaõtyhy.

²³ Loosõna ay-ki ritoosõnyõtyhy. Herina mahãdu rybe ay-ki iny roholaõtyhy. Iaõna ijohodu mahãdu ibutu hãwã-ribi ityhy rare. Tule ibutumy iny riitxenanyre aòtaòta-di, bede bede iny wahe.

²⁴ Babilonia hãwã heka aõhòkỹmy dỹỹnana rotỹỹnyre. Deuxu rybedu mahãdu hãlubu dori kai tetata tule Deuxu hõrõ mahãdu. Rirubunyre mahãdu wahe.

19

¹ Iribi tahe ijoi nihikỹmy roholare. Ryrymy heka rỹimyhỹ sõwemy iny rỹimyhỹ biu-ki. Deuxu deysanamy heka ryryreri: —Wowydynamy Inynyrỹ-ò. Tarasana dori inyDeuxu-ribi rare. Wowydyna, ruruna ibutumy ihõrõle rare. Aõbo tii riwinyré, òbiti rare.

² Aõhòkỹmy dỹỹnana òbiti rare. Aõhòkỹmy rotỹỹnyre heka kia aderana-ki heka rare. Tii aõhòkỹmy dỹỹnana ritare. Bede iny heka riòrarudỹỹnyre. Tahe Deuxu riòwinyre teòdu rubudỹỹna heka riòwinyre.

³ Ixityre ijoi ryrynyre, rawiunyre: —Wowydyna Inynyrỹ-ò. Wàdà raòwònyreri tai rawòsi-ribi. Ihyymy raòwònykre, hãwã nihikỹ-ribi wahe.

⁴ Tahe ibutumy rejuxunyre Deuxu luukemy. Wawiò inaubiòwa matuari rare. Tule inaubiòwa aõni rare. Deuxu tahe rynana nihikỹ-ki ronyre. Tamy rirajuare: —Kia, Kia, wowydyna deysana Deuxu-ò.

⁵ Iribi heka ròhònyre Deuxu rynana nihikỹ-ribi heka rybeunimy ròhònyre: —Biwowydynybenyke Deuxu-ò ibutumy deòdu mahãdu, ibutumy iny rityhynymyhỹre mahãdu, iyja ta nihikỹ-wana.

⁶ Tahe ixityre ijoi-ò raholare. Ryrymy rỹimyhỹre. Tahe benihikỹlesetere wese heka iwodỹỹ rỹireri, biumytxi wesehekỹle heka iwodỹỹ rỹireri: —Wowydyna Inynyrỹ-ò biwahinyke. Tii iruru dire. Tii heka iòlò rare.

⁷ Ibutumy iny rekeysarenyke. Tamy wowydyna rikiwahinyrenykre. Tii dori inihikỹre. Iòhòra dori kia Budoeni Riòre kia hãwyy herina kia bededỹỹnana-ò. Worana bedehesi kỹnyikre. Ihãwyy heka rexiywinymy ratxireri.

⁸ Tyyurahakỹle-di rexytyynykre. Awityhymy ity doimyhỹde wahe. Deuxu dee awihikỹ widỹỹna wese heka kia ratxireri.

⁹ Kiamy heka ýju wadee rarybere: —Kia biritinyke. Ibutumy lobidỹỹna mahãdu reysamy ratxireri. Ýju wadee rarybere ijõ: —Kia heka Deuxule tuu rarybere. Inatyhy rare!

¹⁰ Tahe jiarỹ resere ỹjuko-txi ariwowydynykemy. Tahe tii wadee rarybere: –Kia widỹỹõmyke hewa. Jiarỹ tule Deuxu deòdule heka jiarỹ rare, awesele wahe. Aityhydỹỹdu seriòre tule awesele rare. Rarybemyhỹre dori Jesuisi tyhydỹỹnamy. Deuxule biwowydynyke! Ibutumy Jesuisi relyyre heka tuu rybedu mahãdu ritỹnynyre.

¹¹ Iribi tahe tuu rabire awaruurahakỹõ biuwetyky-ki. Inyõ ityre-ki rononymhỹ. Ini heka Òbiti rare, Inatyhy rare. Tii heka aõbinanymhỹle rare.

¹² Irue heka heòty wesele rare. Irati heka sòwemy raheto rỹire. Iò-ribi heka nii roire, ini wahe. Urile inyõ rieryòtyhy mobo ini rare, tyyriti wixira dori tiile heka rieryre.

¹³ Ihety heka hãlubuhukỹle-di ityre rare. Deuxu Rybe heka inire, hãbu wahe.

¹⁴ Sòwemy iny heka awarutyre-ki rỹire, biu-ribi dòidenyde Deuxu Rybe hewomy, soldado wese wahe. Iny ibutumy ityura-di rexityynyre, ityatyhy wahe.

¹⁵ Tii heka mayrehe rabuhukỹle iry-ribi ròhònyrerimy ihỹre. Idi tii heka iny rirubunykemy ibutu bede bede-ò. Iribi tahe tii ròhònyre iòlòtyhy tii rare. Aõhòkỹmy dỹỹnana tamy riwahinyre, ibinatyhymy heka riwahinyre, Deuxu iwona, Deuxu ruruwedu wahe.

¹⁶ Ihety-ki heka iti-ki rỹire iniõ: Iòlò iòlò wedu tii rare, ibutu wedu wahe.

¹⁷ Iribi tahe ỹjumy rabire, txu-ki rỹire. Nawii ibutu-ò ryrymyhỹ: –Bòdòibedenyke heka, Deuxu worana bedehesina-ò bòdòike rỹsỹna birỹsỹbenykemy.

¹⁸ Aõmade biròbenyke, iòlòde, soldadu wedude, iawarude, ibutumy inyde biròbenyke, ixihy mahãdu, deòdu mahãdu, nihikỹ iyja-wana.

¹⁹ Iribi heka tuu rabire aõni binahakỹ, iòlò mahãdu, tasoldado mahãdu wana. Wii ributunyre aõbinamy. Awaru tyre-ki ronyrerimy kia mahãdu-wana tiiboho raaõbinanykremy.

²⁰ Tahe aõni bina rimyrenyre, rybedu bina-wana. Teròwymy tii aõna aõna wixirawi riwinyre. Iribi ridyrenyre heka heòtyaho-txi idi rehurenkykremy, enxofre-di riworonyre wahe.

²¹ Ibutumy isoldado heka ituemy rỹimyhỹre rurumy. Mayrehe-di ruryhỹre, kia awaru ura tyre-ki ratxireri kia ryribi ròhònyreri kia-di rurure. Tahe rararesa deadeade ide riròkremy.

20

¹ Iribi tahe ỹju nademy biu-ribi. Irayna heka debò-ki idi rỹire. Hãloonihikỹ rayna wahe. Tule womati rerotihikỹle iruty-ki roire.

² Kia aõni rimyre, Diabo wahe, Satanasi wahe. Inyõ tule hemylala raninire. Tahe 1000 beòra riekre ritaataare womati reroti-di.

³ Idi heka rehure hãloo nihikỹ-ò tahe riratòbònyre, rirarytxynyre. Tai tahe tii riitxenanyòtyhy bede bede iny. Kia 1000 beòramy bede reakreule, tahe rexihumy iròtena. Urihimyò bededỹỹnana bede riijekre, ixihyyle tai ixybyle ròbòdỹỹkre.

⁴ Iribi tahe rynana sòwemy rabire. Iny ityre ronyreri mahãdu ywisidỹỹdu mahãdu heka rare. Iribi heka tuu rabire Jesuisi dee rurure mahãdu. Inatyhyna rybe tỹnydỹỹ òraru-ki heka rurure. Aõni rityhynyòre, iritxoo rityhynyòre, iritina òraru iòru-ki ritidiòtyhy, deboreny-ki ritidiòtyhy. Rubu-ribi tiiboho rexixarenyre. Kristu-wana ratxireri 1000 beòramy.

⁵ Kia heka juhuludu ixixana heka rare. Ijõ rubu mahãdu heka wiji rexixaõkre. Tahe 1000 beòramy reareu, tahe rexixarenkykre.

⁶ Juhuludu ixixana mahãdu heka reysatyhymy rarekre. Ixyby rubunamy heka ruruòkre, inatxina rubunamy wahe. Deuxu dee, Kristu dee heka tiiboho

Xiwena wahidỹ̄dumy roirekre. Tii-wana 1000 beòramy riwyrenykre, iòlò mahãdu wesemy heka ratxirenykre.

⁷ Kia 1000 beòra reareu heka Satanasi ixihyymy ròhònykre bede-ki.

⁸ Tii itxenadỹ̄dumy ròhònykre ibutu iny riitxenanykremy. Kia Kòke bede, tule Makòke bede rare. Satanasi heka sòwemy iny ributunykre raaòbinanykremy. Tiiboho sòwemy ihỹre ÿnyra sòwe wese.

⁹ Tiiboho tahe ibutu bede-ò rariarenykre ityhydỹ̄du hãwã rirurawonyrenykre kia Deuxu hãwã Deuxudeewi wahe. Idi heòty biu-ribi isòrenymy desede. Idi wewòsimy rururenykre, Deuxu iny mahãdu òludu wahe.

¹⁰ Tahe diabo iitxenadỹ̄dureny heka Deuxu rehure heòty aho-ò. Tai aònibina, ruimy rybedu-wana juhu delemy tamy reserenykre. Tai txumy rummy aò rotỹ̄nyrenyhyykre.

¹¹ Iribi tahe rynanaurahòkỹ̄my rabire ityre rỹdu-wana. Suu biu-wana iribi rexitare, titxibo iòrenykre.

¹² Tahe iny rubumy rabire, iny ibutumy iko-ki rỹirenykre. Tyyriti rarayre. Ijò tahe rarayre, irutyriti wahe. Tyyriti-ribi Deuxu iaõna aõna rierymy aõhebo risỹnykre.

¹³ Ahohokỹ-ribi tahe rubu mahãdu dòhònyde. Rubunahakỹ bede-ribi iludu mahãdu dòhònyde. Idi iaõna aõnamyna Deuxu timybo rexinohòtinykremy idi rare.

¹⁴ Idi rubunahakỹ, rubuna-wana heòtyaho-txi idi adehu rỹikre. Kia ixbyby rubu rare.

¹⁵ Iru ityyriti-ki inyniõ roiòkeki, tii tule heòtyaho-txi adehu rỹikre.

21

¹ Idi biu tỹmyra sutỹmyramy rabire. Juhusu juhubi titxibo ikòrenykre, ahohokỹ tule.

² Deuxu hãwã wihikỹ tỹmyra desemy nade biu-ribi. Iwese ijadòma tỹmyrawesemy ramyhỹre wese kia hãwã nade. Deuxu-ribi nade.

³ Tahe rybehekỹ biurynana rỹdu-ribi nade-ò roholare kiamy: —Kahe Deuxu sỹ heka akireny rare. Deuxu ikyreny-ki rarekre. Tii iwedurenykre. Tiiboho Deuxu dee roirekre.

⁴ Idi Deuxu irubereny risuhokre. Tai rubu, hii, ibru, txuberere ijòòkre. Bede tyby dori rexihura.

⁵ Idi rynana-ki rỹdu narybede: —Wiji itỹmyramy ibutumy aõna aõna ariwinykre. Wadee tule narybede: —Kia bityyritinyke. Kaa rybe dori rybetyhy rare, ibutumy iny ratyhykremy.

⁶ Kia ixbyby narybede: —Ibutumy relera. Jiarỹ dori AA rare YY rare Juhuludu rare ikonanaludu rare. Inyõ bemomo risakeki, tamy iòwykòlemy ariòkre, beòlònaberu-ribi wahe.

⁷ Inyõ tarasadu heka ibutumy waribi rimumykre. Jiarỹ iDeuxukre. Tii wariòrekre.

⁸ Idi kamahãdu heòty aõho enxofre-ò rekoarennykre kamahãdu wahe: —Iny brebu, watyhydỹ̄kòdu, òrarudu, maleerudu mahãdu, òta òta mahãdu, iny rubudỹ̄du mahãdu, hàri mahãdu, ritxoo tyhydỹ̄du, ruidu mahãdu. Kaboho rubunatyhy-ò rururenykre. Kia tahe inatxina rubuna rare.

⁹ Tahe ÿjuõ wadee nade, debò inatxi reurò mahãdu-ò. Tii hyna-di ryireri. Hynawo-ki tahe aõna aõnabina debò inatxi mahãdu-di. Kiamy narybede: —Mana ini, Budoeni hãwyy ini adee ariteòsinykre, hãwyy wese wahe.

¹⁰ Deuxu Tyytybytyhy wamy reare. ÿju tahe riwadyre hãwãlònora-ò. Jerusalẽ hãwã tỹmyra awityhy wadee riteòsinykre. Tii biu-ribi desemy nade.

¹¹ Deuxu loosòna-di yla aõkõ. Tii tahe manawiwihikỹ wese rarỹỹnymyhỹre. Jasje wese, womati wese mana wiiwihikỹ wese rare.

¹² Tii ijòtòbòna irariere, waòinatxi reuròmỹ ijòtòbòna, iitxedu ýju tule. Ijò-ki tahe waòinatxi reuròmỹ Judeusỹ mahāduni wahe.

¹³ Inataõ ijòtòbòna sòwe, iraro-ò, ibòò, biura-ò, beà-ò.

¹⁴ Hãwã rurawona tahe waòinatxi reurò mana tyre-ki rỹimyhỹ. Mana sohoji sohoji-ki budoeni deòdu mahāduni rỹire.

¹⁵ Ýju wadee rybedu tebò-ki womati tỹrỹrỹhỹkỹ deòho-di nade idi hãwã, hãwã ijò, hãwã rurawona iurihinamy.

¹⁶ Hãwã tahe iurihina wiwesele rare. Tahe 2.200 iurihixina rimyre teòho-di tuu riwinyre.

¹⁷ Rurawona raru tahe ýju taurihixinamy riurihixinanyre idi 64my rimyre.

¹⁸ Rurawona tahe jaspe mana-di relere. Hãwã tahe womati tỹrỹrỹhỹkỹ-di relere.

¹⁹ Rurawo òraru heka mana wiiwihikỹ-di juhumana heka jaspe rare. Inatxina safira rare. Inataõna, agata rare. Inaubiò-wana esmeralda rare.

²⁰ Iruyrena sardonio rare. Debò sohoji reuròna sardio rare. Debò inatxi reuròna trisolito rare. Debò inataõ reuròna berilo rare. Debò inaubiò-wana topazio debò ituena crisoprazo rare. Wasohoji reuròna jasinto rare. Wainatxi reuròna ametista rare.

²¹ Woumanahakỹ sohoji-di heka ijò sohoji sohoji relera, 12my ijò wahe. Ryy heka womati tỹrỹrỹhỹkỹhyky-di relera.

²² Tohodỹña heto tahe ihoõhyre. Deuxule dori tuu rare, Budoeni-wana. Tai ihoõre.

²³ Txuu ahãdu-wana tai ijõõre Deuxu loosòna, budoeni loosòna dori itxuxaranarenyre.

²⁴ Bede bede mahãdu iloosòna-di rỹikre. Bede bede mahãdu heka taaõna aõna wiwi-di tamy kidirahukre.

²⁵ Tahe ijò raratòbòõhykre, tai dori ruu ihoõhyre.

²⁶ Bede bede iòlò mahãdu heka wowydyna-di tamy kidirahukre.

²⁷ Inybina bina, iny òrarudu mahãdu tamy ralòõtyhy, ruidu mahãdu tule. Inyni heka Budoeni tyyriti irumy rỹimyhỹre mahãdu sohojile wahe.

22

¹ Idi ýju wadee riteòsinyre, iru wahidỹña berohokỹ. Ibelyramy Deuxu rynana, Budoeni rynana-ribi òlòdu wahe.

² Ryrohokỹ tya-di kaa bera namyhỹde iwyòwyò-ki iruwahidỹña bederaderade rỹimyhỹ. Tii bederaderade waò inatxi reuròmỹ raratynyre. Kia ta ahãdu ahãdu-di sohojile raratynyre. Otxirarade tahe bede bede mahãdu deytana rare.

³ Kia hãwã-ki ihetxi txuhòbina tai ijõõkre, Deuxu aõ ritxuhònyõra tai. Deuxu ryanahakỹ itya-ki rỹikre. Kia teòdu mahãdu riwowydynykre.

⁴ Tiiboho iòsỹnyny robikre inireny iòru-ki rỹikre.

⁵ Tai ruu ijõõkre. Tai txuloosòna ijõõkre. Deuxu dori itxurenykre. Tiiboho tai ihyyiny rỹikre iwese iòlò mahãduõ.

⁶⁻⁷ Kia tahe ýju wadee rarybere: —Kaa rybe tahe inatyhy rybe rare. Bityhnybenyke. Jesuisi rarybere: —Analekre heka tule adehemynylekre heka. Deuxu heka taýju deòdu adee kanarybekre. Kaheka wylemy ibededyỹnana kedeakre. Deuxu rarybehyy ratximyhỹre tỹnydỹỹdu mahãdu-ò, aõhebo bede rotỹỹnymyhỹkremy roimyhỹré. Ibutumy kia tyhydỹỹdu mahãdu heka reysamy rỹikremy rỹira.

⁸ Jiarỹ tahe Joaõ rare. Rabirahe, ibutumy kia raholare. Rabimy rexihurau tahe, jiarỹ watiowotimy resere ýjuko-txi.

⁹ Ixityre wadee rarybere: —Iwidỹỹõmy hewa, Jiarỹ heka Jesuisi deòdu tỹnydỹỹduõle jiarỹ watxireri. Ibutumy Deuxu tyyriti ityhydỹỹdu biòwa jiarỹ rare. Deuxule bityhnyke.

¹⁰ Tahe ýju ijõmy wadee rarybere: —Aõbo teritidỹỹnyteri ibutumy iny-ò rybe bitỹnynyke. Kia bededỹỹnana iòhòlemy ratxireri.

¹¹ Kia bededỹỹnana kedehemynykreu, aõbina bina widỹỹdu heka aõbinale riwinykre. Iny binabina heka, ibinamy rỹikre iu. Inywiwihikỹ tasỹ awimy rỹikre iu. Kia õbitimy rỹira tahe, awityhymy relekre, õbitityhymy rỹira.

¹² Boholake warybe-ò, aõwesele heka anakre. Uriõno heka adiwymy wadi anawãhãde. Aõbo wadee aõ riwinymyhỹre wahe iwese aõbo riwinymy raremyhỹwesemy heka araòwynykre.

¹³ Jiarỹ heka AA jiarỹ rare. YY tule jiarỹ rare. Tyyriti juhoo rare. Tyyriti konana rare. Jiarỹ heka juhuludu rare. Ihewoludu tule jiarỹ rare, ibutumy wahe.

¹⁴ Ibutumy tatytyramy rỹira —teysamy rỹira. Tiiemy teysahyyhy rare. Iru òwòru wahidỹỹna bederaty heka ritokre. Tule rarõnyrenykre kia hãwãhãkỹ-ò.

¹⁵ Ibutumy òrarudu mahãdu tule òwòru widỹỹdu tahe irehemy Deuxu hãwã-ribi nyimyhỹde. Tule iny rirubunymyhỹre mahãdu, tule suritxoo luunadu mahãdu, tule ibutumy ruidu mahãdu. Ibutumy irehemy hãwãhãkỹ-ribi roimyhỹre.

¹⁶ Jesuisi heka jiarỹ rare. Waýju reteònyre adeeremy kia aõnaaõna bededỹỹnana relyykemy. Kaiboho heka dohodỹỹna heto mahãdu-ò relyyrenyke. Jiarỹ iòlò Davi juhu rare, tule Davi riokore rare. Biurasò taina Jiarỹ rare, loosòna rare.

¹⁷ Deuxu Tyytybytyhy rarybere: —Manake! Tule hãwymy hãbumy heridu tule rarybere: —Manke! Ibutumy ijohodu tule marybeke: Jiarỹ, Juaõ, tule rarybere: —Manake! Ibutumy iny bemy rurumyhỹre mahãdu tule manake irube biõke. Iòwy-di aõkõ heka rare.

¹⁸ Jiarỹ, Juaõ, rarybere ibutumy iny katyyriti rariamyhỹre mahãdu-ò.

¹⁹ Iny ributunyekiki aõmybo kaki ritydỹỹna roiré, Deuxu tamy bededỹỹna binahakỹõ riwahinykre karitidỹỹna roireki. Inyõ karitidỹỹna-ribi ritakeki, Deuxu òwòru runa ijuraõ wahe heka iribi ritakre tule Hãwãhãkỹtyhy-ribi nadedi wahe. Tai rỹire tyyriti-ki.

²⁰ Tule aõmybo narybede inatyhymy tule rarybekre (Jesuisi wahe): —Analekre hewa idi. Araroorehenyõtyhy. Juaõ, tule rarybere: —Kie, Manake Wanyrỹ Jesuisi.

²¹ Deuxu deysana, Inynyrỹ Jesuisi Kristu kia deysana ibutumy adee kanakremy watxiwahãre.